

suso ha a hoyo li tuk, achi tok a ont ai ahla chi ka, yummak o ahashwa na Helot ut illi tok.

16. Yohmi ma Helot ash osh, hatak hopoyuksa vhleha hvt ik ahobalo ho pisa mvt, anukhobel a fehna cha, pit on tihlelit, vlla chipunta Behlehem, micha auet a bilika maya kvt afvmmi tuklo ai vhleha hvt iiksho hatu oka ishit yahaya mvt, hopohla hi a ik ahno ka, takali na haiyaklo tok oke, achi tok a ont ai ahli tok.

17, 18. Yvmohmi hoka Chelemaias hopaii vt anumpohonlit, Lama ya a yaiya, micha nishkin okchi minti, mikm nukhaklo chinto, Lechel vt im vlla vhleha hvt iiksho hatu oka ishit yahaya mvt, hopohla hi a ik ahno ka, takali na haiyaklo tok oke, achi tok a ont ai ahli tok.

19, 20. Yohmi tok kia Helot vt illi haya, Chihowa im enchil vt, Chosef vt holhpokuna ho Echip a im a haiaka mvt, Tani cha, vlosi micha ishki aienka pehlichi cha, Islael okla i yakni a ish iashke ; vlosi im ilhfiopak a hoyo tok vt illi hoka, achi tok.

21. Yohmi ma tani mvt, vlosi micha ishki aienka kash pehlichi cha, Islael okla i yakni a vla tok.

22. Yohmi kia Akelavus vt iki vlhtobut Chutea ya i miko na haklo mvt, yvmma ona nukshopa tok : yohmi nana kia holhpokuna ka Chihowa hvt nana i miha hatuk oka, fullott Kalili i kaniohmi ho ona tok.

23. Yohmi ka hopaii vhleha hvt anumpulit, Yummak okvt Nasalet hatak vta hohchifa hi oke, achi tok a ont ai ahla chi ka, tumaha Nasalet hohchifo ho ona cha, ahanta tok.

CHAPTA III.

Chan Baptist vt vba anumpa ha Chutea yakni haiaka isht anumpohonli, mihmvt baptismohonchi, 1. 13 Chisvs vt Chan ak o im a baptismo ; mihma Shilombish Holitopa yvt vba mintit onvtula.

1. NITAK yvmma foka ma Chan Baptist vt Chu^t yakni haiaka ya vbanumpa isht ai anumpohonlit aya *
2. Mihmvt, Uba apehlichika yvt olanlosi vla ilekostininchashke, ahanchi tok.

3. Iluppak o hopaii Esaias vt isht anumpulit, Achufa hosh yakni haiaka yä ai anumpohonlit, Chihowa ataya hi a apoksiachit, i hina puta ka hush apissulechashke, ahancha hi oke, achi tok mak oka.

4. Mihmvt Chan yummak okvt im anchi yvt Kamel hishi yosh toba ma, na-hakshup chuhlafa vskufuchi yo vskufaiyachi tok ; mihmvt im ilhpak vt hawa micha foi-bila aienakak a tok.

5. Yohmi ma Chelusalem, micha Chutea pit a moma, mikmvt Chatan auet a bilika yakni moma ka asht a kohshut ivt ;

6. Yummak ash o im ai onvt, nan im aiashuchika puta ilanolit, Chatan a ai im a baptismo tok.

7. Yohmi kia Falisi vhleha mikmvt Satusi vhleha aienakvt laua hosh im a baptismot ai vla na pisa mvt, yummak ash o, Sinti chilita isht-atiaka huchia ma ! na palvmmi mihinti ka hush i hlakofa hi okvno kvta hosh huchim anoli tuk oh cho ?

8. Yohmi hokvt ilekostininchai itvlhpesa mak o vnit hush wayashke ;

9. Micha, Eblaham ak osh piki oka, acha hi okvno huchik il anukfillo kashke ; Chihowa hvt tvli yak aiasha ka Eblaham im vlla ya chi ka ai ikba hinla hoke, huchim achi lishke.

10. Yohmikma himak ak kia iskifa yvt iti puta akishtvla yä itonla hoke ; yohmi hatuk o iti yvt vni achukma ho vnit waya keyu kvt moyumvt chayvt akakoha cha, luak pit itoka ha chatuk oke.

11. Uno yokuto hush ilekostininchai chi mak o, oka yä ishit huchi baptismochi li ho muhlishke ; yohmi kia auet siakayvt mihinti hokvto uno a shaiyahli, yummak i shulush isht im aya hi o si ahoba keyu hoke ; yummak osh Shimbish Holitopa, micha luak aienakak mak o ishit huchi bapnocha hi oke.

Yummak osh i nan-isht-mushahchi yvt ibbak a foyu-
hokvt i nan-anihichi yatuk ma achukmalit kash-
push atuk ma kanchak a pit ashacha hi oke ;

yohmi kia hakhloplish okvno luak moshola hi keyu mak o ishit hukma hi oke, im achi tok.

13. Yohmi ma Chisvs vt Kalili a vttvt minti hosh Chan a im a baptisma chi hosh Chatan a ai im ona tok.

14. Yohmi kia Chan vt yvmmak ash o im alvmmi mvt, Uno ak osh chishno a chim a baptismo la he si vlhpiesa ka, anonti vno ak o is svn vla cho ? achi tok.

15. Mihma Chisvs vt afalaminchi mvt, Himak okvno yakohma hi oka ish ahnashke : ai yakohmi hosh nana ai vlhpiesa puta ka mominchit il aiahlichia he pim vlhpesa hoke, im achi tok. Yohmi ma vlhpesa, im ahni tok.

16. Yohmi na Chisvs vt baptismo mak inli hosh oka ya ai vttvt kocha ia tok ; yohmi ma vba shutik vt auet in tiwa tok ; mihma Chihowa imi Shilombish vt puchi yoshiba chiyuhmi hosh aka mihintit, yvmmak ash o ant o binili tok.

17. Yohmi ma vba shutik a auet ai anuhumpa kvt, Ilvp-pak osh svso a holitopa yo iluppak o-nan isht a sai yukpa mak oke, achi tok.

C H A P T A I V.

Shilomish osh Chisvs a ilaelit yakni haiaka isht ona : mihma nitak pokoli ushta ka nahullochi ; micha Setan ak osh imomaka pisa : enchil vhleha hvt ant nan isht im anta, 1. 12 Kapenavm a Chisvs vt ai anta : mihmvt ile kostininchia he isht anumpohonli tok. 18 Pita, Antilu, Chemis, Chan aienan kvt nan im aiithvna ya chi ho, Chisvs vt atokolechi. 23 Chisvs vt Kalili yakni a nan im abechit a hlopullit, abeka puta atuk ma hlakofihinchi.

1. YUMOHMI ma Setan vt imomaka pisa chi ka, Shilombish vt Chisvs a yakni haiaka isht ia tok.

2. Atuk o yvmmak ash osh ik impo hosh nitak pokoli ushta cha ninak pokoli ushta aienan ho anta tuk osh, misha pila mvno hohchvfo tok.

3. Mihma imomaka pisa yash osh im vla mvt, Chiho Ushi chia hokmvt, tvli yak maya kvt paska toba chi k-mihá, im achi tok.

4. Yohmi kia yvmmak ash osh afalaminchi mvt vt paska yak bano ho ai okchaya he keyu :

moyuma kvt Chihowa itih akohoncha kak a hi o, holisso tok oke, achi tok.

5. Yohmi ma Setan ash osh ilaelit tmaha holitopa ya ont isht chukowa cha, tempel wishakchi yo ont o hilechi tok.

6. Mihmvt, Chihowa Ushi chia hokmvt, aka pit ish ile pilashke; chi apesahancha chi ka im enchil vhleha ha atohna na ibbak a isht vba takalihinchit chisht aya na nitak kaniohmi kia chiyi ya tuli isht chik ai isso ka hi a, holisso tok oka, im achi tok.

7. Mihma Chisvs ash osh, Chitokaka Chin Chihowa hoka imomaka chik peso kashke, achi kvt holisso tok ak inli hoke, im achi tok.

8. Mihma anonti Setan ash osh ilaelit nvnih chaha fehna ho isht oiya cha, yakni apelichika moma, mikmvt nan-isht-im-aholitopa aienka pit pisachi tok;

9. Mihmvt, Aka hlipivt is si aiokpvchi hokma, iluppa moma ka chima lashke, im achi tok.

10. Mihma Chisvs ash osh, Setan vt kanima iashke: chin Chitokaka Chihowa hak o ish ai okpahanchikmvt, yummak illa ho ish im antiashke, achi kvt holisso hoka, im achi tok.

11. Yohmi ma Setan ash osh i filummi ma, enchil osh ai vla cha, okla ant nan isht im anta tok.

12. Yvmohmi tuk o Chisvs vt, Chan vt aboha kyllo foka na haklo mvt, Kalili a ia tok.

13. Atuk osh Nasalet a issut ia mvt, Kapenavm yummvt Sabulon yakni, micha Neftalim yakni aienka ont ai vhli okhrita lapalika ak o ont ahanta tok.

14, 15, 16. Yakohmi kvt hopaii Esaias anumpulit, Sabulon yakni, micha Neftalim yakni okhrita lapalika, Chatan misha, Chentail okla i Kalili vt aiokhlideka asha tuk vt tohwikeli hinto pisa tuk; mihma isht aiilli yakni, micha isht-aiilli i hantika maya tuk a tohwikeli hvt i kohchvt takalishke, achi a ont aiahla he mak a tok.

7. Yvmma foka aivhlit mihinti ma, Chisvs vt vba isht
** Oh ilekostininch; vba apelichika yut olanlosi vla
** ishtia tok.

18. Atuk osh Chisus vt Kalili okhvta lapalika nowvt aya tuk osh, itibapishi tuklo, Saimon Pita hohchifo, anonti nakfish Antilu itatuklot nvni-hokli atuk osh nvni-isht-hokli a okhvta pit okvchi hosh ashwa na pisa tok.

19. Mihmvt yummak ash o, Hvs siakaiyashke, mikma hatak hokli o hvch ikbi lashke, im achi tok.

20. Yohmi ma mih makinli ho i nvni-isht-hokli a issa cha, yummak ash o iakaiyvt okla tok.

21. Mihma yummak ash vttut ia hosh aya mvt, anonti itibapishi tuklo inla, Sebete ushi Chemis, micha nakfish Chan itatuklo kvt iki Sebete a apihvt nvni-isht-hokli a apoksia hosh peni alhto na pisa tok; micha pit i howa tok.

22. Yohmi ma mih makinli ho peni, micha iki aienan kash o issvt, yummak o iakaiyvt okla tok.

23. Mihma Chisus vt Kalili a mominchit ayvt, i sinakak puta ka nan ai im abvchit, apehlichika isht anumpa hanta ya isht anumpohonli; micha okla hvt abeka, micha haknip ik in chukmo im asha tuk a mominchit hlakofihinchi tok.

24. Mihma isht annoa kvt Silia moma ka ont hlopulli tok; mihma okla hvt abeka ilaiyuka puta isht issikkopá hatuk; micha nan isht-ahullo okpulo ai i fo ka hatuk; mihmvt tasimbo yatuk; micha palsi isht abeka yatuk moyuma ka okla isht im ai ona tok; mihma yummak ash hlakofolichi tok.

25. Yohmi ma okla chinto Kalili minti, mikmvt Tekapolis minti, mikmvt Chelusalem minti, mikmvt Chutea minti, mikmvt Chatan misha minti aienan kvt iakaiya tok.

C H A P T A V.

Chisus vt nvnih chaha ya ai anumpuli. Yohmi kvt kvna hosh nan isht ilaiyukpa anoli, 11. 13. Klaist i yimmi vleha hvt yakni i hvpi: 14 yakni a im a tohwikelika; tvmaha yosh nvnih ai o talaia ka chohmi; 15 prla ha chohmi. 17 Chihowa i nanvlpisa ya Chisus vt aiahlacha chi hosh vla. Kaniohmi hosh nanvlpisa isht hannali ka kobvffi ka anoli. 27 Kaniohmi hosh nanvlpisa isht untuklo ka kobvffi ka anoli. 33 Anumpa kvllo isht ile onochi im olvbbi. 38 Nuk-chintot nana ik achukmo ka a pim ahleka he pi miha. 43, pin tvnvp puta ka il i hulla he; 45 mikmvt nan ai ahla he pim anukfilia ne aienan ka pi miha.

1. YOHMI ma okla chito ka pisut, nnih chaha yo pit oiya tok ; atik osh ont binili ma, nan im ai ithvna vhleha hvt im ai ona tok.
2. Mihma itih ha wakummi cha, yummak ash im abuchi mvt,
3. Chukvsh ilbusha vhleha yokvto vba apehlichika yak osh immi hokvt nayukpushke.
4. Nanukhaklo vhleha yokvto hopohla hi okvt nayukpushke.
5. Anulkhobela iksho vhleha yokvto yakni a isha he vlhespa hokvt nayukpushke.
6. Ahopoyuksaka aiahni vhleha hvt hochahafo, itukshihin-la aieno hokvto, kaiya hi okvt nayukpushke.
7. Nan i nukhaklo vhleha yokvto ilap ma i nukhaklo na pisa hi okvt nayukpushke.
8. Chukvsh kashofa vhleha yokvto Chihowa ya pisa hi okvt nayukpushke.
9. It i nanaiyvchi vhleha, yummak okvto Chihowa ushi hohehifa hi okvt, nayukpushke.
10. Ahopoyuksaka pulla hatuk mak o isht i palummi vhleha yokvto, vba apehlichika yvt immi hokvt nayukpushke.
11. Uno atuk pulla mak o hatak puta kvt isht hvchi yopulvt, hvchi ilbushachit, ahli keyu kia nana okpulo ilaiyuka puta ka isht hvchi miyahanchikma, na hvchi yukpushke.
12. Nayukput hvchi yukpa fenashke : isht hvchim vlhtoba hi vt chintoe hosh vba ya asha hoka ; hopaii vhleha hvchin tikba aiasha ka yakohmichit ilbushachi tok mak oka.
13. Yakni i hvpi hvchia hoke ; yohmi kia hvpi hvt homi kvt i kunia hokmvt, nanta hak o isht a homa hinla cho ? yummak okvt himmakma nana ho isht ai vlhpiesa he keyu ; amba kocha pit hlaya na hatak puta iyi yosh ahvhlihincha he ak o pulla hoke.
14. Yakni in tohwikeli hvchia hoke. Tumaha chito yosh nnih chaha ai on talaia hokvt luma he keyushke.
15. Mikma hatak vt pula ha pvalikmvt, tanchi isht vlhpisa nutaka yo talali chatuk keyu ; amba pula ai-o-hikia yo ai o

hilechi chatuk; yohmikma aboha anukaka maya ka mominchit tohwikelichi chatuk oke.

16. Huchi pula hut hatak puta itikba ya ik a tommi pulla na inla asha kvt nana hvsh akaniohmi hochukma puta ka pisa cha, Iki vba binili ka holitoblashke.

17. Nan vlhpisa, micha hopaii puta im anumpa aienha tok a okpunit aya li tuk a, ik huchim ahobo kashke; okpuni la hi osh aya li tuk keyu; amba aiaghichi la he mak a tok.

18. Ahli mak o huchi miha lishke, Yakni, mikmvt vba shutik aienha hokvto ont ik ai iksho kia, vba nan vlhpisa yvt moma ont ik a lauwo achufona nana kia a kaniohmit aiokpuloka iksho mak osh, momvt ont aiaghla he mak oke.

19. Yohmi hoka kvna hosh vba nan vlhpisa ik a lauwo ilvppa puta ka achufona ka kobuffi cha, hatak puta kvt ai yemihcha chi ho im abuchi hokmvt, vba apehlichika aiasha ka moma ik a lauwo hohchifa he; amba kvna hosh mihma holitobli cha, inla ma isht im abuchi hokvto, mihi yosh vba apehlichika ya chito ont a hohchifa hi oke.

20. Huchi aivilhpiesa kvt na-holissochi vhleha, micha Falisi vhleha aienha ka i shahli ho keyukmvt, nana hosh a kaniohmi kak o vba apehlichika ya ont hvsh chukowa he keyu hoke, huchim achi lishke.

21. Nitak tikba aiasha kvt, Kvna kia ish bi na: kvna hosh inla vbi hokvt nan vlhpisa yo isht im ahlekashke; achi tok a hvsh haklo chatuk.

22. Amba vno vto, Kvna hosh nana hosh a kaniohmi keyu ho, itibapishi ha i nukkilli hokmvt, nan vlhpisa yo isht im ahlekashke: mikma kvna hosh itibapishi ha, Ik chi ahobo, im achi hokmvt, nan vlhpisa kvlo i shahli ho isht im ahleka he: amba kvna hosh, Im anukfila iksho chia hoka, im achi hokvto aiokpuloka luak o ont isht im ahleka hi oke.

23. Yohmi hoka vba chi nan-isht-aiokpuchi ya ieshit alta ya ish ona kvt, ish itibapishi ha nana ish i kaniohmi tuk a asha ka ish ithaiyana hokmvt;

24. Uba chi nan-isht-aiokpuchi ash alta itikba yo ish bohli cha, iwt tikba ish itibapishi ak o ont ish it i nanaiya ha yosh, vlt, vba chi nan-isht-aiokpuchi ash pit isht ish aiokpuchashke.

25. Nan vlpisa chi onochi yatuk ma apehvt ish maya t^akla kak osh, tushpvt ish it ibai achufashke ; keyukma nitak kaniohmi kash inli h^o nan vlpisa chi onochi yash osh chisht nan apesa ibbak a chi fohkikma, anonti nan-apesa yash osh nanvlhtoka ibbak a chi fohki na aboha kullo ya ish fohka he mak oke.

26. Ahli mak o chi miha lishke, Ont ishtaiyopi fehna ka atobbit ish kaiyanchi h^o keyukmut, kaniohmi kak osh yummak atuk a ish kohcha he keyu mak a hi oke.

27. Nitak tikba aiasha kv^t, Hvsh it in lum^aka ná ; achi tok a hvsh haklo chatuk.

28. Amba vno vto, Kvna hosh ohoyo h^a i nukpuli hosh pisa hokvt, chukvsh anukaka ya isht in lum^aka mashko hoke, hvchim achi lishke.

29. Micha chi nishkin isht impak-imma yvt chi ibetubliche hokma, halvllit kohchit ish kanchashke : chi nana achufona hosh okpulo kia, chi haknip vt momvt aiokpuloka ik aiyo ka he ak osh chim vlpesa hoke.

30. Mikmut chibbak isht impak-imma yvt chi ibetubliche hokma, bushlit t^uplit ish kanchashke ; chi nana achufona hosh okpulo kia, chi haknip vt momvt aiokpuloka ik aiyo ka he ak osh chim vlpesa hoke.

31. Kvna hosh tekchi a kanchikmut, it i kvnia holisso ha imashke ; achi tok a takalishke.

32. Amba vno vto, Kvna hosh tekchi vt lum^aka tuk o keyu h^o kanchikmut, hau ikbicha he : yohmikma kanchi haya kvna hosh itauwayakmut, hau toba mak a hi oke, hvchim achi lishke.

33. Micha anonti, nitak tikba aiasha kv^t, Anumpa kullo ish ile onochi tuk vt chik kobuffo kashke : amba anumpa kullo ish ile onochi tuk okvt Chitokaka ya ish im aijahliche hi oke ; achi tok a hvsh haklo chatuk.

34. Amba vno vto, Anumpa kullo chik ile onocco kwmohmashke ; vba shutik ak kia pit isht chik ai a miho kashke ; yummak okvt Chihowa im aiasha mak oka :

35. Mikmut yakni vt iyi im ai-o-heli mak oka, yummak isht chik ai a miho kashke ; anonti Chelusalem a isht chik ai a

miho kashke; yummak okut Miko chito in tumaha chito yoka :

36. Micha chi noshkobo ak kia isht chik ai a miho kashke ; chi pashi achufa kia ish tohbichikmá, ish lusachikmá, nana he keyu hokut :

37. Amba chim anumpa hut Ome, ome ; Keyu, keyu ; achi aieno kak ashke : ilvppak o nana kvt ont atampa hokut o nana ik vlhpeso mak o a minti hoke, hvchim achi lishke.

38. Nishkin atuk ma, nishkin makinlashke, mikmvt noti atuk ma, noti makinlashke ; achi tok a hvsh haklo chatuk :

39. Amba vno vto, Nán ik vlhpeso ka chik i sanalo kashke ; amb a kvna hosh chitisopi isht impakimma ya issokma, in tvnnvp ma pit ish i weli makinlashke.

40. Micha hatak nana kia nan vlhpisa chi onochi cha, chim ilefoka ya chim ai ishikma, chim anchi ma ik ishi, ish im ahni akinlashke.

41. Micha kvna kja awant iwt kowi achufa ka ish ona pulla hi a chim ahnikma, awant iwt tuklo ho ish onashke.

42. Nana chim asilhhakma, ish imashke : mikmvt chim a pota bvnna hoka, chik i shanaiyo kashke.

43. Chin chukapanta hatak a ish i hullo cha, chin tvnvp okuno ish i nukkillashke ; achi tok a hvsh haklo chatuk.

44. Amba vno vto, Hvchin tvnvp vhleha ha hvsh i hullo cha, nana okpuloka hvchim anukfillit miha aieno ka, nana achukma ho im ahnit hvsh mihashke ; hvchi nukkilli ma ai achukma hi o isht hvsh i yvmohmikmvt, hvchi kanimachit, hvchi ilbushachikma, vba isht hvsh anumpohonlashke.

45. Yakohmi hosh hvch Iki vba binili ka im vlla hvchia hi oke : yummak okut i hushi atuk ma nan ik vlhpeso, micha na-hochukma aieno ka i kohchihinchikmvt, kocha umba ka nan-aiahlí hochukma, mikmvt nan ik ahló aieno ka auet i pilinla chatuk oka.

46. Hvchishno a hvch i hullo ho hvsh i hullo hokut, nanta hosh isht hvchim vlhtoba ho ? pblikan vhleha ak kia yummak okuno yohmi akinli chatuk keyu ?

47. Micha hvsh itibapishi vhleha ak bano ho hvsh aiokpu-chi hokmvt, inla qsha ka nantak o isht i shahlichi hesh

huchi yvmohmi ho? publikan vhleha ak kia yohmi ak inli chatuk keyu?

48. Yohmi hoka aiahli huchi achukma kut, huch Iki vba binili kut aiahli achukma kak inli ho hush chiyuhmashke, hush him achi lishke.

CHAPTA VI.

Chisus vt nvnih chaha ai anumpuli tuk vt a moma. Yohmi kut na habenvchi, 1, 5 anumpa ilbvshvt asilhha, 14 nan ai-ashvchi puta ka i kashofa he, 16 na hollochi aieno ka isht anumpuli, na pim ilayak kanima yo il a boyula hi a pim anoli, 24 i shahli ha tuklochit il ai okpvcha he keyu ka miha, 25 yakni paknaka nana a kaniohmi ka ai isht im anukfilvt isht ik ilbvsho hosh, 33 amba Chihowa apehlichika yak o na tikba e hoyo hi a miha.

1. **AHAH!** hush aiahnit na hush habenvchi kut, huchi pisa chi ka, hatak puta itikba yo huch ik a yvmihcho kashke; yummak keyukmut huch Iki vba binili ka im a hvchim vlhtoba hi o keyu hoke.

2. Yohmi ka na hush habenvchi kut, isht-pufa ya chi tikba yo ai olachit, nan-ilahobi vhleha hokvto hatak puta kak o im a holitopa chi hosh sinakak anukkaka, micha ai itvnova puta ka a yvmohmi chatuk oka, huch ik chohmo kashke: ahli mak o hvchim achi lishke, yummak okvto im vlhtomba chatuk oke.

3. Amba nana ish habenvchi hokmut, chibbak isht impak-imma yvt nana kaniohmi ka, chibbak vlhfvbeka yvt akostin-incha hi a chik im ahno kashke.

4. Yohmi na nan ish habenvchi ka a lumakashke; yohmikma Ghiki alumaka a pisa yvt ilap inli hosh otvnichi achukma hosh chim atobba hi oke.

5. Micha vba pit ish anumpuli hokvt, nan-ilahobi vhleha hokvno chik chohmo kashke; yummak okvto, hatak vt pisa chi ka, sinakak anukkaka, ai itvnova ai itai okhunkvchi aieno kak o hiohmavt vba pit anumpuli kak osh im achukma chatuk oka; ahli mak o hvchim achi lishke, yummak okvto im vlhtomba chatuk oke.

6. Amba chishno vba pit ish anumpula chi hokvto, chim abohushi pit ish chukowa cha, okhissa ya pit ish akummik-mvt, Chiki ai-alumaka ai ahanta yatuk ma pit ish im asilh-hashke; yohmikma Chiki alumaka apisa yvt otunichi achuk-ma hosh chim atobba hi oke.

7. Yohmi kia vba pit hvsh anumpuli hokvt it vbillit m-h-iha kvt, oklushi nan ik ithano ak okuno hvch ik chohmo kashke; yummak okvto anumpuli fehna kak o, hakla hinla, im ahoba cha tuk oka.

8. Yohmi hoka yummak oka hvch ik holbo kashke; nana a hvchi bvnna puta hokvt hvch ik im asilhho kisha kak inli ho, hvch Iki vt ithana hoke.

9. Yohmi hoka yakohmichi hosh vba hvsh anumpulashke: Piki vba ish binili ma! Chi hohchifo hvt holitopashke.

10. Ish apehlichika yvt vlashke. Nana ish ai ahni ka yakni pakna ya a yohmi kvt, vba yakni a yohmi mak o chiyuhmashke.

11. Himak nitak ilhpak pim ai vlhpesa kak o ish pi ipetashke.

12. Mikmvt nana il aheka puta ish pi kashofi kvt, pish-no vt nana pim aheka puta il i kashofi chatuk a ish chiyuh-michashke.

13. Mikmvt anukpvlika yoka ik ia chik pim aiahno hosh, amba nan-okpulo a ish pi a hlakofihinchashke: Apehlichika, mikmvt nan-isht-aiahli, micha isht aholitopa aien a kvt chimmi a bilia yoke. Amen.

14. Hatak nan ai ashvchika puta ka hvsh i kashofi hokma, hvch Iki vba binili kvt hvchishno ma hvchi kashofa hinla ak inli hoka.

15. Amba hvchishno vt hatak nan ai ashvchika puta ka hvsh i kashofi keyu hokma, hvch Iki vba binili kak kia na hvchim ai ashvchika puta ka hvch i kashofa he keyu hoke.

16. Yohmikmvt anonti, nana hvsh hullochi kvt nashuka ilapissa, nan ilahobi vhleha hoka hvch ik chohmo kashke; yummak okvto na hullochi kvt hatak puta im otuna chi

kvt, nashuka ya ilapissachi chatuk oka. Ahli mak o hvchi miha lishke, yummak okvto im vlhtomba hoke.

17. Amba chishno vto nan ish hullochikmvt, chi noshkobo ish ahvmmi cha, chi nashuka ma ish achifashke.

18. Yohmi cha hatak puta kano na hullochi ho chik i holbo hosh, amba ai alumaka ai ahanta Chiki ak illa ho ish im otvnashke; yohmikma Chiki ai alumaka a pisa yatuk mvt, otvnichi achukma hosh chim atobba he mak oke.

19. Hvchim ilayak puta ka yakni paknaka nanilayak shushi, micha na-lakna aieno kvt ai okpvni chatuk, micha hukopa puta yvt tiwit isht chukowvt a hukopa ya hvchik ai atahlo kashke.

20. Amba hvchim ilayak puta ka vba yakni nanilayak shushi, micha na-lakna aieno kia ai okpvni keyu, mikma hukopa puta kia tiwit isht chukowvt a hukopa keyu ak o hvsh ai atahlashke.

21. Kanimo yo hvchim ilayak vt itonla hokma, hvchi chukvsh ak kia mihi yo pit takanla hinla ak inli hoka.

22. Haknip a i pvla hvt nishkin ak oke. Yohmi hatuk o chi nishkin vt achukma hokma, chi haknip vt momvt tohwikelit alotowa hinla hoke.

23. Amba chi nishkin vt ik achukmo hokma, chi haknip momvt okhlilit alotowa he. Yohmi ka tohwikelit chi foyuka, yummak atuk vt ont okhlieli hokma, okhlili yvm-mvt chinto fehna nana mak ahinla keyu?

24. Hatak nana kia i shahli ha tuklochit holitoba he keyu; achvfalit i nukkilli cha, achvfa yak o holitoba hinla; keyukmvt achvfalit pit halanli cha, achvfa yak o kanimancha hinla hoke. Chihowa micha Mammon it aieninchit hvsh holitoba he keyushke.

25. Yohmi hoka hvchi ai okchaya hi a nana ho hvsh pa he, micha nana ho hvsh ishka he aieno; mikmvt hvchi haknip ma nana ho hvsh fohka hi a anukfillit isht hvch ik ilbvsho kashke, hvchim achi lishke. Ilhfiopak vt ilhpak a i shahlikma, anonti haknip vt nafohka ya i shahli ho keyu cho?

26. Hushi vba itvnowa ho ho pesá: yummak okvt nana

ho hokchi keyu, anonti vmot, kanchak kia pit ashachi ho keyu; yohmi kia vba hvch Iki vt yvymma ipehinta hoke. Holitopa kvt yvymma hvsh i shahli fehna ho keyu?

27. Hvsh katima kak osh anukfihinlit isht ilbvsha kvt hvchi chaha ka kubit achvfa kia hvsh il achakala hinla cho?

28. Micha nanta katiohmi ho na fohka ya anukfihinlit isht hvsh ilbvsha cho? Na pakanli hochukma lilli oktak aiasha kvt kaniohmit offo hoka anukfihinlit ho pesá: yvmak okvt toksvlit a hoyvblı keyu, anonti nana ho shvnni keyushke.

29. Yohmi ak inli kia Solomon ak kia nan-isht im a holitopa moma isht a shema kvt ilvppa achvfona kia chohmi tok keyu, hvchim achi lishke.

30. Yohmi ka hvshuk himak nitak ano oktak aiasha tuk osh onna ha apalvska vlhpita chi kia, Chihowa hvt she-muchi kvt yvmihchi kvt, hvchishno a i shahlichi hosh ik hvchi shemacho ka hinla cho? na yimmi fehna keyu hvchia ma!

31. Yohmi hoka anukfihinlit isht ilbvshvt, Nantak o e pa chi? mikmvt nantak o iloh ishka chi ho? micha nantak o echo fohka chi cho? hvch ik acho kashke.

32. Ilvppa puta kak o okla nan ik ithano vhleha hvt hoyo chatuk oka; ilvppa moma ka a hvchi bvnnna hokvno vba hvch Iki vt ithana hoka.

33. Amba Chihowa apehlichika, micha nan isht im ai vlhpiesa aieno kak o tikba hush hoyashke; yohmikma ilvppa moyuma kvt hvchim aieno he mak oke.

34. Yohmi hoka onna ha ya hi a nana pit anukfihinlit isht hvch ik ilbvsho kashke; onna ha yokvto ilapo inli nan isht il ai anukfihinlit isht ilbvsha hi oka. Nana ik ai achukmo itonla kak osh nitak oka im vlhpesa hoke.

CHAPTA VII.

Nvnih chaha Chisus vt anumpuli tok osh a moma; yohmi kvt himafokalechit inla ya na mihacha chi ka imolvbbi, 1; 6 micha nana kvt holitompa hokvto ofi puta, keyukmvt shukha aieno ka pit ik in hlatapo ka he miha, 7 anumpa ilbvsha ishit asilhha

ka miha, 13 okhissa iskvtnosi, micha hina ik p̄vtho, mikmvt okhissa chito, micha hina p̄vtha isht anumpuli. 15 Hopaii ilahobi ya ahah! im ahna he, 21 vbanumpa haklo illa he keyu, amba im antia he; 24 tvli chito chuка yvt ai itvbana chatuk a chohmi; mikma kvna hoh kia i yimmi keyu hokvt chuka yvt shinuk o ai itvbana chatuk a chohma hi a miha.

1. HUCHISHNO a nana ik hvch i mihacho ka chi ka, inla ya nana hvch ik mihacho kashke.

2. Kanimihchit inla ya nana mihachi hosh hush mihachi tuk ma, hvchishno ma isht hvch i mihacha he; mikmvt isht vlhpisa nana ho isht hush apesa tuk mut, hvchishno mut isht hvchim vlhpisa he akinli hoka.

3. Micha nanta katiohmi ho na hishonluk iskvtnosi kut ish itibapishi nishkin a foka na ish pisa ho kak osh, anonti iti chito yvt chi nishkin ak inli foka kano chik akostincho cho?

4. Micha katiohmi ho iti chito yvt chishno chi nishkin ak inli ho foka ka, ish itibapishi ha, Na-hishonluk iskvtnosi ka chi nishkin a ai ishit ak kohchi, ish im acha hinla cho?

5. Nan ilahobi chia hoka, chishno chi nishkin ak o tikba iti chito a ish a kohehashke; yohmikmak osh ish pisa achukma cha na hishonluk iskvtnosi ka ish itibapishi nishkin a foka tuk a ish a kohcha hinla hoke.

6. Nana kvt holitompa hokuno ofi puta ma pit hvch ik imokmvt, anonti hvch i na holitopa puta hatuk ma shukha itikba ya hvch ik ashacho kashke; yummak keyukma yummak ash o iyi isht a hvhichi cha, anonti filemt huchishno ash o hvchi okpuna hinla hoke.

7. Hvsh asilhhakma, hvch ima he; hvsh hoyokmvt, hush ahayucha he; hvsh sokohakma, hvchin tiwa he oke.

8. Asilhha aiyuka hokvto ishi bano hoke; mikma kvna hosh hoyo hokvto, ahayuchi hoke; mikma kvna hosh sokoha hokuno, in tiwa pulla hi oke.

9. Yohmi ka hatak hvsh katima kak osh, ushi osh p̄vsko im asilhha ka, tvli yo isht ima hinla ho?

10. Keyukmvt nuni yo asilhhakma, sinti yo isht ima hinla cho?

11. Yohmi ka nan ik ai vlpeso hvchia kia hvchim vlla ya na hochukma isht ima kvt hvchimponna chatuk a, im asilhha hoka hvch Iki vba binili kvt na hochukma isht ima kvt i shahlich i fehno ka hinla ho ?

12. Yohmi hoka nan-okluha ka hatak puta kvt hvchim a yvmohma hi a hvsh aiahni hosh, mih mak o hvsh ai i yvmohmi mak inlashke : ilvppak o nan vlpisa, micha hapaai puta aien a kvt miha hoka.

13. Okhissa iskvtnosi ak o hvsh ai abehashke ; okhissa yvt chito cha, hina mvt putha hosh aiokpuloka ya ona hatuk o, yummak ai abeha kvt laua hoke.

14. Okhissa yvt iskvtnosi cha, hina mvt ik putho hosh ai okchaya ya ona hatuk o, ik lauwo hosh yummak oka ahayuchi hoke :

15. Hopaai ilahobi vhleha chukfvlpoba i na fohka fohka hosh hvchim ai vla kia, anyukaka yokvto nashoba isikopa vhleha mak oka, ahah ! hvsh im ahnashke.

16. Ilap vni kak o isht hvsh akostininch pulla hi oke. Hatak vt kvti hak o pak a ai vmo chatuk o ? micha fik a shumuti ak o ai vmo chatuk oh cho ?

17. Yummak inli ho chohmit iti hochukma moma kvt vni hochukma ho vni chatuk ; amba iti okpulo yokvto vni yvt okpulo yo vni chatuk.

18. Iti achukma yvt vni okpulo yo vna he keyukma, anonti iti okpulo vt vni achukma ho vna he keyushke :

19. Iti vt vni achukma ho vni keyu hokvto momvt chayvt akakoha cha, luak itokaha chatuk oke.

20. Yohmi hoka ilap vni ak o isht hvsh akostininch pulla hi oke.

21. Chitokaka ma ! Chitokaka ma ! v m achi kak osh momvt vba yakni a chukowa hi o keyushke ; amba Aki vba binili nan aiahni ka yvmohmi tuk mak a hi oke.

22. Nitak yummak fehnakma Chitokaka ma ! Chitokaka ma ! chi hohchifo ha nan isht anumpulit, chi hohchifo ha nan-ishtahullo okpulo puta isht kocha welit, anonti chi hohchifo ha na fehna lawa ka isht il a yvmihchi tok keyu cho ? v m achi kvt laua hi oke.

23. Yohmikma otvnichit, Nitak nana asho hvch ithana li tuk keyu, nan ik vlpeso yohmi hvchia hvt a filvmmi misha oh ia chá, im achi la hi oke.

24. Yohmi hoka kvna hosh vm anumpa ilvppa puta hatuk ma haklo cha, mihma yvmohmi ka, hatak hopoyuksa yosh tvli paknaka yo in chuka a talali tok a it apesa lashke.

25. Yohmi tuk o umba hatuk mvt aka ituyula na okchitot vla ma, anonti mahli hvt mahli cha, chuka yummak ash ai ihiso ka, tvli paknaka yo ai itvbana hatuk okvt, ik akamo ki tok.

26. Yohmikma kvna hosh vm anumpa ilvppa puta hatuk ma haklo cha, mihma ik yvmohmo hokvto, hatak ik hopoyuksa yosh in chuka ya shinuk paknaka yo a talali tok a it vlpisashke.

27. Yvmohmi tuk o umba hatuk mvt aka ituyula na okchitot vla ma, anonti mahli hvt mahli cha, chuka yummak ash ai ihiso ma, akama tok ; micha okpuloka kvt aiahli tok oke, ahanehi tok.

28. Atuk o yakohmi tok ; Chisvs vt ilvppa ahanchit ont in taiyaha ma, nan isht im abuchi tuk a okla hvt anukhla-kancha tok.

29. Im ai vlpesa mak osh nana im abuchi tok ; amba na holissochi vhleha hokvno ik chohmo ki tok.

C H A P T A VIII.

Chisvs vt leplosi vbi ya hlakofichi, 1. 5 Mikmvt sintuliyvn in tishu ha hlakofichi. 14 Chisvs vt Pita tekchi ishki, micha inla aienka ka hlakofichi. 18 Mahli chito ya yokopvchi. 23 Micha kaniohmi hosh il iakaya he pim anoli : 28, nan isht ahullo okpulo vhleha ha Chisvs vt kocha weli ma ; nan isht ahullo okpulo vhleha hash osh shukha laua ya iba chukowa.

1. ATUK osh nvnih chaha ya vttvt akowa ma, okla chinto kvt iakaiya tok.

2. Mihma leplosi vbi yosh vlv ant aiokpvchi mvt, Chitokaka ma ! vlpesa ish ahni hokmvt, is sa kashofa hinlvshke, achi tok.

3. Mihma Chisvs vt ibbak a pit weli cha, potoli mvt, Ulhpesa ahni lishke; chi kashofashke, achi tok. Yohmi ma leplosi yash osh ashalika i kashofa tok.

4. Yohmi ma Chisvs vt, Ahah! ish ahni cha, hatak nana kia chik im anolo kashke; amba okla isht im otvna chi ka, Moses nana apesa tok vba isht aiokpuchi a isht irt, na holitompa isht asha ak o ont ish ile haiakachashke, im achi tok.

5. Atuk osh Chisvs vt Kapenaum a ont chukowa ma, sintuliyvn vt mintit im vla tok.

6. Micha im asilhhvt, Chitokaka ma! an tishu hvt palsi isht abeka hosh issikkopa fehna kvt chuka ya itonlvshke, achi tok.

7. Mihma Chisvs vt, Ia lish ont hlakofichi lashke, im achi tok.

8. Mihma sintuliyvn ash osh afalaminchi mvt, Chitokaka ma! um aboha ya ant ish chukowa he si vlpesa keyu hoke; amba anumpa illa ho ish anumpuli kia, an tishu hatuk mvt hlakofa hinlvshke.

9. Uno yokvt hatak tushka chipota vhleha pehlichit i shahli nutaka ahanta chatuk sia hoke; yohmi kvt ilvppak atuk ma, Iá, im achi likma, ia hoke: mikmvt inla ho, Minti, achi likma, minti hoke: mikmvt an tishu ha, Ilvppa yakohmichi, im achi likma, yumihechi chatuk oke.

10. Chisvs vt yummam haklo kvt nukhlakancha mvt, apihvt aya kash o, Ahli mak o hvchi miha lishke; Islael okla ak oh kia nayimmi chinto yakohmi ka ak a pesoshke.

11. Yohmi ka, Hvshi akochaka, mikmvt hvshi a opika aienka a minti kvt laua hosh vba apehlichika ya ai vlt Eblaham, micha Aisaak, mikmvt Chekob aienka aant ai itvpehvt binohla hi oke, hvchim achi lishke.

12. Yohmi ka ilvppa apehlichika im vlla yatuk okvno kocha aiokhlilika ka pit kampila he; yummak oka a yahayvt noti ma ahampa hi oke, im achi tok.

13. Mihmvt Chisvs vt sintuliyvn ash o, Ish iashke: yohmikma isht a chi yimmi hatuk oka, mih mak osh a chi yvmohmashke, im achi tok. Mihma in tishu hatuk vt hvshi kanvlli vlpisa mih mak inli ho hlakofi tok.

14. Atuk o Chisus vt Pita in chuka ya ont chukowa mvt, yvmma tekchi a ishki vt yvnht abeka hosh itonla na pisa tok.

15. Mihmvt ibbak a pit potoli ma, yvnha kvt shipuchi tok: mihma yummak ash osh wakaya mvt, nan isht im vttatok.

16. Atuk o opivt taha ma nan isht ahullo okpulo ai i foka puta kvt laua ho isht im ai ona tok; yohmi ma shilombish okpulo puta kash im anumpa hak o isht kocha weli mvt; abeka yatuk a mominchit hlakofichi tok.

17. Yvmmvt hopaii Esaias vt anumpulit, Ilap ak inli hosh nan isht ik pi ai iksitopo puta ka pim ai ishit, nan isht pi abeka a puta ma isht pi kanchishke, achi tok a ont ai ahla chi mak a tok.

18. Yohmi ma okla chito fehna kvt apehvt ai asha na Chisus vt pisa mvt, misha in tvnnvp ak o ilhkola hinla ka miha tok.

19. Mihma na holissochi achvfa hosh vla mvt, Nan ithvnanchi ma! kanima yo chik aya kia, chiakaiya la chi mak oke, im achi tok.

20. Mihma Chisus ash osh, Chula puta kvt chiluk vt im ashakma, vba hushi puta kvt vlhpichik vt im asha hoke; amba Hatak Ushi okuto noshkobo ha kanima a bohla hi vt ik im iiksho hoke, im achi tok.

21. Mihma nan im ai ithvna vhleha hash osh achvfvt, Chitokaka ma! vmmona kano ivt, aki a ont hohpi la hi a, vlhpesa is svm ahnashke, im achi tok.

22. Yohmi kia Chisus ash osh, Is siakaiyashke; yohmikma illi ak osh ilap bika illi yokuno hohpashke, im achi tok.

23. Mihmvt peni chukowa ma, nan im ai ithvna vhleha hvt iakaiya tok.

24. Atuk o mahli kullo fehna kvt okhuta ha a tobvt kocha ma, peni ash o oka banvtha kvt isht ompohomo tok; yohmi kia yummak ash osh nusi hosh itonla tok.

25. Mihma nan im ai ithvna vhleha hvt im ai vlv ant okehvli mvt Chitokaka ma! ish pi okchalinhashke; pilli mak oke, achi tok.

26. Mihma yummak ash o, Na-yimmi fehna keyu huchia ma! na katihmi ho hrchi nukshopa cho? im achi tok. Micha tani mvt, mahli mikmvt okhvta aienan kash im alvmmi tok; mihma yokopa ai ahlit talaia tok.

27. Yohmi ma hatak ash osh okla nukhlakancha mvt, Ilvppvt hatak katiohmi hatuk okak o, mahli micha okhvta aienan hokak kia im antia cho? im achi tok:

28. Atuk o misha in tvnnvp Kekesenes yakni a ona ma, nan isht ahullo okpulo ai i foka kvt tuklo hosh anukshomunta fehna hatuk o, hatak nana kia yummma imma ka ont ia he keyu chatuk o, hatak illi aiasha ya ashwvt kohchvt minti hosh ont afama tok.

29. Mihmvt tahpvlvt okla mvt, Chisvs, Chihowa Ushicha hut nanta ho isht ish pi ahalaiia cho? ik ai ono kisha ho, ish pilbushacha chi hosh ilvppa ish la hoh cho? achit okla tok.


30. Yohmi ma shukha laua kvt impa hosh auet i hopaki ka ai asha tok.

31. Yohmi hatuk o nan isht ahullo okpulo vhleha hash osh im asilhha mvt, Ish pi kocha weli hokmvt, iwt shukha laua ya ont il abeha he ak o ish pim ahnashke, achi tok.

32. Mihma, Hvsh iashke, im achi tok; mihma kocha wiha mvt, shukha laua yash o, ont abeha tok; mihma shukha laua yash osh momvt yihlepa fehnvt okhvta sakti chaha yo pit ai oka kahvt ok ai illit taha tok.

33. Mihma apesuchi vhleha hatuk vt yihleput, ilhkoli tumaha ona cha, nana ka mominchit anoli tok; micha nan isht ahullo okpulo ai i foka tuk vt nana im a kaniohmi tuk a aieninehit anoli tok.

34. Yohmi ma tumaha hash osh momvt Chisvs a afamvt ilhkoli tok; atuk osh yummak ash o okla pisa mvt, i yakni a kohchvt aya hinla ka okla im asilhha tok.



C H A P T A I X.

Chisvs vt palsi isht abeka ya hlakofichi, 1. 9 Chisvs vt Mahlu i howa; micha Falisi vhleha ha Mahlu im ai impa ashā mvt ai it im anumpuli. Chisvs vt Chan nan im ai ithvna vhleha na hullochi imma ka isht anumpuli. 18 Chisvs vt na pehlichī ushetik vt illi tuk a okchalinchit tanichi: micha ohoyo hvt issish umbokafa isht abeka tuk a hlakofichi. 27 Micha hatak nishkin lypa tuklo ho i fatummi. 32 Chisvs vt hatak ik anumpolo nan-isht ahullo okpulo ai i foka yatuk a im achukmali: mikmvt okla puta kash i nukhaklo.

1. YOHMI ma yummak ash osh peni o pit chukowa mvt, pit tanvibli cha, ilap in tvmaha ak inli ho ona tok.

2. Mihma hatak vt palsi isht abeka hosh potvlhpo pakna itonla ho okla isht im vla tok; mihma Chisvs vt okla na yimmi ka pisa mvt, palsi isht abeka ash o, Suso ma! chi yukpashke; na chim ai-ashuchika puta kvt chi kashofa hoke, im achi tok.

3. Yohmi ma na holissochi vhleha kaniohmi kvt, Hatak ilvppvt nan ik ahobalot anumpulishke, chukvsh anukaka okla ahni tok.

4. Yohmi ma Chisvs vt okla im anukfila ha ithana hatuk osh, Nanta katiohmi ho hvchi chukvsh a nan okpulo ishit hvsh anukfilli cho?

5. Na chim ai ashuchika puta kvt chi kashofa hoke, achi kak okmá, keyukmvt, Tani cha nowá, achi kak okmá, katimampo kak osh ahchiba kvt ik lauwo cho?

6. Yohmi kia Hatak Ushi yvt yakni paknaka anta kvt nan ai ashuchika puta ka kashofa hi vt im ai vlhpesa hatuk a, hvsh akostininchia chi kak oka, palsi isht abeka ash o, Tanit chi potvlhpo ishi cha, chi chuka ish iashke, im achi tok.

7. Mihma yummak ash osh tani cha in chuka ia tok.

8. Yohmi ma okla chinto kvt pisa mvt, nukhlakanchvt, hatak a nan-isht im ai ahli yohmi ka ima tok Chihowa ash o ai okpahanchi tok.

9. Mihma Chisvs vt yummak ash o vttvt ia mvt, hatak vt Mahlu hohchifo hosh, tvli holisso ai itahoba ya binili ho ont

pisa tok; mihmvt yvmmak ash o, Is siakaiyashke, im achi tok; mihma wakaya mvt iakaiya tok.

10. Atuk o yakohmi tok; Chisvs vt impa hosh aboha anuka asha ma, pblikan vhleha, mihmvt nan ashvchi vhleha aien a kvt laua hosh ai vlt yvmmak ash, micha nan im ai ithvna aien ka ant takla binohli tok.

11. Mihma Falisi vhleha hvt pisa mvt, yvmma nan im ai ithvna vhleha hash o, Katiohmi ho nan hvch ithvnanchi vt pblikan, micha nan ashvchi vhleha aien ka it ibai impa cho? im achi tok.

12. Yohmi kia Chisvs vt yvmmma haklo mvt, Haknip im achukma hokano alikchi a ai im ai vlpiesa keyu chatuk, amba abeka yok mak oh chatuk oke.

13. Uba isht-ai okpvchi ak okano ak aiahno; amba nan i nukhaklo ak o aiokpanchi li hoke, achi yvmmak osh nana hokma, ont oh ithvna'; hopoyuksa vhleha ak o hoyot aya li ha tok keyu; amba nan ashvchi vhleha hvt ile kostininch chi mak a tok oke, im achi tok.

14. Yohmi ma Chan nan im ai ithvna vhleha hvt im ai vla mvt, Katiohmi ho pishno, micha Falisi vhleha il aien a kvt nukhaklot nan e hullochi fehna ma, amba nan chim ai ithvna vhleha hvt nukhaklot nan ik hullocho cho? achi tok.

15. Mihma Chisvs vt, Hatak himona ohoyo itauwaya tuk vt takla anta moma ka i kanomi vhleha hvt nukhakla hinla cho? yohmi kia hatak himona ohoyo itauwaya tuk ash ant im ai isha he nitak vt ai ona he; yohmikmak o okla hvt nukhaklot na hullocha hi oke.

16. Hatak nana kia anchi sipokni a nantunna hlilafa himona ya lapalichi chatuk keyu; vltkvt lapali kash osh anchi ash hlilffit ishikma, i shahlit hlilafvt okpulo chatuk oke.

17. Mikma hatak puta kvt oka-paki himona ya shukcha sipokni yo apitta chatuk keyu; yvmmak keyukma shukcha yvt mitahli na oka-paki yvt hlayakma, shukcha yuto okpulo chatuk; amba oka paki himona ya shukcha himona yo apit-takmak o, tuklot nan ik okpulo chatuk oke, im achi tok.

18. Ilvppa puta ka isht im anumpulik fehna, hatak na

pehlichi achusa hosh vla cha, ant aiokpvchi mvt, Himonasi ak kia svso-tek vt illi mak osh itonlvshke: yohmi kia minti cha, chibbak ant isht ish umbitepa hokma, okchaya hinla hoke, achi tok.

19. Mihma Chisus vt wakaya cha, iakaiyvt ia ma, nan im ai ithvna vhleha aieno kvt yohmi ak inli tok.

20. Yvmohmi tuk o ohoyo hvt issish umbokafa isht abeka tok afvmmi auah tuklo hosh, yummak ash im ashaka ya mayut ona cha, im anchi aposhokvchi a pit potoli tok.

21. Im anchi ak illa ho ak potoli kia, sa hlakofa hinlvshke, ahnit im anukfila hatuk osh.

22. Yohmi kia Chisus vt filemt yummak ash o pisa mvt, Svso-tek ma! na chi yukpa achukmashke; na chi yimmi pulla hosh chi hlakofichi hoke, achi tok. Mihma hvshi kanvlli vlhpisa yamma fehna ho ohoyo yummak ash osh hlakofi tok.

23. Mihma Chisus vt hatak na-pehlichi in chuka yash ona cha, oskula olachi vhleha, micha okla yaiya aieno ka ont pisa mvt,

24. Oh iti kanvlli; ohoyo himita yvt illi keyu hoka, amba nusi hoke, im achi tok. Mihma isht yopulvt okla i yukpa tok.

25. Yohmi kia okla hvt kocha wihut taha ma, pit chukowa cha, ibbak a ont halvlli ma, ohoyo himita yash osh tani tok.

26. Yohmi ma ilvppak atuk vt annout yakni yummoma moma hlopulli tok.

27. Atuk o Chisus vt yummak ash vttvt ia ma, hatak lupa tuklo kvt iakaiyvt ayvt, tahpahanvt, Lewi ushi chia ma! ish pi nukhaklashke, ahanchi tok.

28. Mihma yummak ash osh aboha ont chukowa ma, hatak lupa atuk vt im onvt okla tok: mihma Chisus vt, Ilvppa yakohmichi la hinla ka hvchi yimmi cho? im achi ma, Yau, Chitokaka ma! im achit okla tok.

29. Yohmi ma nishkin a pit potoli mvt, Na hvchi yimmi tuk pulla mak osh isht a hvchim vlhpesashke, achi tok.

30. Mihma nishkin vt i fatumvt okla tok: yohmi ma

Chisvs vt kyllochi fehna hosh i mihv, Ahah ! hvsh ahni na hatak nana kia ik akostinincho kashke, achi tok.

31. Yohmi tuk kia itiachi mvt, yummak ash o yakni yumm-a mominchit ai im annowachi tok.

32. Yummvt a kohcha ma, hatak ik anumpolo nan isht ahullo okpulo ai i foka ho okla isht im vla tok.

33. Atuk o nan-isht ahullo okpulo yash osh a kohcha ma, ik anumpolo yash osh anumpuli tok: yohmi ma okla laua yash osh nukhlakancha mvt, Himonna kia Islael okla ha a yakohmi na kvna hosh pisa chatuk keyushke, achi tok.

34. Yohmi kia Falisi vhleha hash osh, Ilvppvt nan-isht ahullo okpulo puta ka nan-isht ahullo okpulo i mik-o yak o isht kocha weli hoke, achi tok.

35. Yohmi ma Chisvs vt tvmaha moma, micha tvmahushi puta aieno ka mominchit ayut, i sinakak puta kak o nan im ai abahanchi, mihmvt vba apehlichika isht anumpa hanta isht anumpohonli, mihmvt abeka moma ka hlakofihinchit, haknip ik in chukmo okla im asha tuk a mominchit hlakofihinchi tok.

36. Yohmi tuk kia okla laua yash osh hoyvbl cha, it a fimimpvt aiasha, chukfvlhpoba yosh apesuchi ik im iksho ho, chohmi na pisa hatuk osh i nukhaklo tok.

37. Yohmi mvt nan im ai ithvna vhleha hash o, Nahoma hi okvto laua ho mrvli, amba toksvli vhleha hak osh ik lauwoshke.

38. Yohmi hoka na-hoya hi okvt Chitokaka immi hoka nan im ahoya hi a toksvli vhleha ha auet tihlela chi ka, hvsh im asilhhashke, im achi tok.

CHAPTA X.

Chisvs vt nan im ai ithvna auah tuklo kvt vbanumpa ha isht anumpohonla chi ka, micha na fehna puta ka ai yvmohma chi aieno ka kanompit tihleli, 1. 5 Micha nana ka ithvnanchi. 40 Micha Chisvs a holitobi kvt nan isht il ai yukpa he miha.

1. **YUMOHMI** tuk osh nan im ai ithvna auah tuklo kash o itahobit tahli mvt, nana im ai ahli, nan-isht ahullo

okpulo puta imaiyvt, yummak atuk ma kocha welit abeka ilaiyuka puta, micha haknip ik in chukmo ilaiyuka moma hlakoficha hi a im apesa tok.

2. Yohmi ka vbanumpeshi auah tuklo hohchifo kvt yakoohmi kak oke: vmmona Saimon atuk osh Pita hohchifo tok; mihma itibapishi Antilu ak a tok; Sebete ushi, Chemis ak osh, nakfish Chan itatuklo tok:

3. Mihma Filip, micha Bahlolomu; Tamas, mikmvt pblikan hatak Mahlu; Alfevs ushi Chemis, micha Lebevs osh hohchifo apunta kvt Tatevs a tok.

4. Mihma Kenan hatak Saimon, micha Chutas Iskaliot ak atuk osh yummma haksichi tok ak inli ka aiena tok.

5. Auah tuklo ilvppak o Chisus vt pit tihleli mvt, nan im apesvt, Chentail aiasha pilla hokuno hvch ik aiyo kashke, mikmvt Samalia okla in tvmaha ha ont hvch ik chukowo kashke.

6. Amba Islael in chuka-chvfa chukfvlpoba tvmoa pulla kak o hvsh im ai onashke.

7. Micha ia hosh hvsh itvnova kvt, vba isht anumponhonlit, Uba apehlichika yvt olanlosi vlushke, hvsh ahanhashke.

8. Mikmvt abeka ya hlakofichit, leplosi vbi puta ka kashofit, illi puta ka tanichit, nan-isht ahullo okpulo puta ma hvsh kocha welashke: pilla ho hvsh habena hatuk okut, pilla ho hvsh imashke.

9. Hvchi shukcha atuk ma tvli holisso lakna, micha tvli hvta, mikmvt tvli lakna nana kia fohkit hvch ik ieshokmvt;

10. Anonti nowvt hvsh aya hokvt bahta kia, ilefoka lumbo tuklochit, shulush aiena ma tuklochit, tubi nana kia hvch ik iesho kashke; hatak toksvli yvt ilhpita he ak o vlhpesa hoka.

11. Micha tvmaha, keyukmvt tvmaha chito yokmá nana ho ont hvsh chukowa chi kvt, kuna hosh vlhpesa kvt yummva anta ka, hvsh ponaklashke; micha yummak o hvsh asha tuk osh a kohchvt hvsh iashke.

12. Micha chuka yo ont hvsh chukowakmvt, hvsh ai okpuchashke.

13. Yohmikma chuka yatuk mvt vlhpesa hokma, na yukpa he hvsh im ahni tuk a onvtulashke: amba vlhpesa keyu hokmvno, na yukpa he hvsh im ahni tuk a hvchi falamashke.

14. Micha kvna kia ik hvchi aiokpacho, micha hvchim anumpa ma haponakla he keyukma, chuka yokma, tvmaha hokma, nana hatuk a hvsh a kohchakmvt, hituk tohbi hvch iyi asha hatuk ma hvsh tahtulashke.

15. Ahli mak o hvchi miha lishke, Nan-vlhpisa chinto nitak okvno Sotom, micha Komola aieno kvt im ahleka hoh kia, pit im vlhpisa kvt tvmaha yummak a tok a i shahla hi oke.

16. Inta! chukfvlpoba yo chohmichi hosh nashoba itintakla pit tihleli lishke; yohmi hoka kostini kvt sinti ak o hvsh chiyuhmi cha, nuktaiyala mvt prchi-yoshuba ak o hvsh itilaushke.

17. Yohmi kia hatak puta ka ahah! hvsh im ahnashke: yummak okvt ishit nan apesa vhleha ibbak a hvchi fohokimka, i sinakak puta ka a hvchi fahama he mak oke.

18. Micha na pehlichi vhleha, mikmut miko puta, Chentail okla aieno ka, na hvsh im ai atokola chj ka, vno pulla hatuk mak o yvmma puta ka itikba hvch isht ohona hi oke.

19. Yohmi kia hvch isht ohona ka, kanimihchit, micha nana ho hvsh anumpula he aieno kvt hvch ik anukfillo kashke: nana ho hvsh anumpula hi a hvshi kanvlli vlhpisa yummak inli ho hvchi anukfohka hi oka.

20. Hvchishno ak osh hvsh anumpula hi o keyu, amba hvch Iki imi Shilombish yummak osh a hvchi anumpula hi oka.

21. Mikma itibapishi hatuk vt itibapishi ha illi issakma, anonti iki atuk vt vlla ya illi issa he: yohmikma vlla puta kvt iki ishki aieno hatuk ma i nukkilli cha, illi issa hi oke.

22. Mikma sa hohchifo pulla hatuk mak o momvt hvchi nukkilli he: yohmi kia kvna hosh achunanchit mahayvt ai vhli ka ona hok mak osh okchaya hi oke.

23. Yohmi kia tvmaha chito ilvppa a hvch issikk-

palikma, yihlepvt inla yo hvsh onashke. Ahli mak o hvchi miha lishke, Islael okla in tvmaha puta ka hvch ik hlopopullo kisha ho, Hatak Ushi yvt vla hi oke.

24. Nan-ithvna yvt nan-ithvnanchi ya imaiya keyukma, anonti tishu hvt i shahli ha imaiya ho keyu chatuk.

25. Nan-ithvna yvt nan-ithvnanchi ya itilauikma, anonti tishu hvt i shahli hatuk ma itilauikmak osh im vlhpesa hoke. Chuka-chufa pehlichika ya Beelsebvb okla hochifo tuk vt in chuka-chufa ya i shahlichi kut katiohmichi hosh hochifa hinla cho ?

26. Yohmi hoka yummak oka hvch ik i nukshopo kashke. Nana kut ompoholmo tuk osh ik otano ka hi vt iksho ma, anonti nana kut luma tuk osh ik annowo ka hi vt iksho hoka.

27. Nana ka okhlilika yo a hvchim anoli li ka a tohwikelika yo hvsh ai anolashke: micha nana ka haksobish tikelichi hosh hvsh haklo kut, yummak ash aboha pakna yo hvsh ai anolashke.

28. Mikmvt haknip a vbi kia, shilombish a illiche he keyu yummak okvno hvch ik i nukshopo kashke: amba shilombish micha haknip it aieninchit aiokpuloka ai ilvshala hinla kak pulla ho hvsh i nukshopashke.

29. Hushi chipunta yvt tuklokmt sint achufa iklunna itatuklo vlhtoba chatuk keyu? mikma yummvt, hvch Iki vt ahni keyukma, achufona kia aka itula hi o keyu hoke.

30. Amba pashi hvchi noshkobo o hikia kak kia momvt holhtinvt taha yoke.

31. Yohmi hoka ik hvchi nukshopo kashke; holitopa kut hushi chipunta laua kia hvsh i shahli hoke.

32. Yohmi hoka kvna hosh hatak puta itikba ya si ai ahninchi tuk ma, vno ak kia ilapa Aki vba binili ka itikba ya ai ahninchi la hi oke.

33. Amba kvna hosh hatak puta itikba ya ik si ai ahnincho tuk ma, vno ak kia ilapa Aki vba binili ka itikba ya ak ai ahnincho ka hi oke.

34. Yakni pakna ya nanaiya yo bohlit aya li tok ik

huchim ahobo kashke: nanaiya yo a bohlit aya li tok keyu, amba b̄ushpo falaia ak a tok.

35. Hatak a iki ik it im v̄lhpesachot, ushetik a ishki ik it im a v̄lhpesachot, ipok atuk ma ipokni a ik it im v̄lhpesachot aya li ha tok.

36. Mikma hatak in t̄n̄v̄p puta kvt ilap in chukachvfa ash inla hi oke.

37. Kvna hosh iki yokmá, keyukmvt ishki yokmá, nana ho i hullo kvt vno a im i shahli hokvt, vmmi ha he v̄lhpesa keyu hoke: mikmvt ushi yokmá, keyukmvt ushetik okmá, nana ho holitobli kvt vno a im i shahli hokvt, vmmi ha he v̄lhpesa keyu mak inli hoke.

38. Yohmikma kvna hosh im iti-taiyukhvna ya sholi cha, siakaiya keyu hokvt, vmmi ha he v̄lhpesa keyu mak oke.

39. Kvna hosh im ilhfiopak a ahayuchi tuk mvt i kvnia he: mikma kvna hosh vno pulla hatuk mak o im ilhfiopak vt i kvnia hokmvt, ahayucha he mak oke.

40. Kvna hosh h̄uchi aiokpvchi hokvt, vno a si aiokpvchikma; anonti kvna hosh vno a si aiokpvchi kvt, auet sa kanchi tok ma aiokpvchi hoke.

41. Kvna hosh hopaïi ya hopaïi atuk mak o aiokpvchi hokvt, hopaïi im ai v̄lhtoba mak o isha he: yohmikma kvna hosh hatak ahlí achukma ka, ahlí achukma atuk mak o, aiokpvchi hokvt, hatak ahlí achukma im ai v̄lhtoba mak o isha hi oke.

42. Mihma kvna hosh chipota vhleha ilvppa achvfonâ kia, nan ithvna yatuk mak o ishka chî ka oka kapussa isht-ishko achvfa illa ho ipeta kia, yvmmvt kaniohmit nân-v̄lhtoba hvt i hlakofa he keyu, ahlí mak o huchim achi lishke, achi tok.

C H A P T A X I.

Chisvs vt v̄ba isht anumpohonli kvt a moma; Chan a pit ponaklo tuk a Chisvs vt afalaminchit im anoli, 1, 7 micha, Chan Baptist a aiahlit isht anumpuli. 20 Chisvs vt t̄maha kanimi ka na palvmi kvt onvtula chî ka anoli, yvmmak oka na fehna laua ka ai yv-

mihinchi tuk kia, okla ik ile kostinincho hoka. 25 Chisvs vt Chihowa pit aiokpvchi mvt, Iki vt nan okluha ka ibbak ifoyuki tuk a achi: 28 mikmvt a foha chi kvt hoyvblu puta kvt im ai ona chi ka i miha.

1. ATUK o yakohmi tok; Chisvs vt nan im ai ithvna auah tuklo kash nan im apesvt in taiyaha mvt, in tvmaha puta ka nan ai ithvnanchi, micha vba isht anumpuli aieno chi hosh yummva vttvt ia tok.

2. Atuk o Klaist vt nan-isht-anta puta ka Chan vt abo-ha kullo anukaka ya a haklo mvt, nan im ai ithvna vhleha tuklo ho pit tihleli tok.

3. Mihmvt yummak ash o, Chishno ak osh aya he tok mak o chia hokma, ak chu? inla yo e hoyokma, nanta chi cho? pit im achi tok.

4. Mihma Chisvs vt a falaminchi mvt, Anonti hvsh ia cha nana ka hvsh haklo, micha hvsh pisa aieno tuk vt Chan a ont hush im anolashke.

5. Lvpa yvt hopokoyo ma, imomokpulo yvt nowa; leplosi vbi okla hvt i kashofa; mikma ik haponaklo yvt haponaklo; illi tuk vt tani; mihma ilbusha puta ka vbanumpa hvt isht im anuhumpushke.

6. Yohmi ka kvna hosh vno a ik si ai ibetvblokmvt, na yukpa he mak oke.

7. Mihma itiachi ma, Chisvs vt okla laua ya im anumpulit ishtia mvt, Chan ak o miha hosh, Nanta ho hvsh pisa chi hosh yakni haiaka ya hvsh ilhkoli tok o? Kushak vt mahli na faiokuchi kak atuk o?

8. Amba nanta ho pisvt hvsh ilhkoli tok o? Hatak nafohka lapushki fohka kak atuk o? nafohka lapushki abehkvchi hoketo miko in chuka puta kak o aiasha hoke.

9. Amba nanta ho pisvt hvsh ilhkoli tok o? Hopaai atuk o? ahli, yohmi ka hopaai ak kia imaiya hoke, hvchim achi lishke.

10. Um anumpeshi ya chi tikba chuffichi li hoka, mihi yosh chi hina ya tikbanli apoksiacha chi hoke, achit isht holisso tok a ilvppak osh mih mak oke.

11. Ahli mak o hvchim achi lishke, Ohoyo ho a tobut

aiasha ka itintakla hikia kvt Chan Baptist a imaiya chatuk keyushke : yohmi nana kia moma ik lauwo hosh vba apehlichika ya anta kvt, yummma imaiya hoke.

12. Yohmi ma Chan Baptist vt ahanta nitak atuk a ai vhilit mihinti ka, vba apehlichika ya ishi bunna kvt achilita fehna, yohmikma achilita puta kvt onvtulvt ihishi na himakushke.

13. Hopaii vhleha moma micha vba nan vlhpisa aien a kvt na tikbanli anoli kvt, Chan ak o ant im ai vhli hoka.

14. Micha hvchi yimma hinla hokma, ilvppak osh vla he tok Elias mak oke.

15. Kvna hosh isht haponakla he haksobish vt i hinlik-mvt, haklashke.

16. Amba himak okla aiasha ilvppak okvno nantak o it-apesa la chi cho ? Ulla yosh ilhpak a kanchi yo binohmaya hosh ilap bika iti howvt,

17. Oskula ha e hvchim olachi ka, hvch ik hehloshke; e hvchi yaiya ka, hvch ik yaiyoshke, achi ho itilauishke.

18. Chan vt ik impo, micha nan ik ishko aien a hosh aya ma, Yvmma nan-isht ahullo okpulo il ai eshi hoke, okla achishke.

19. Hatak Ushi yvt ihimpa, mikmvt nan ihishko aienvt aya ma, Yakeh ! hatak isikopa, oka-paki ishko shahli, prblikan micha nan ashvchi vhleha aien ka i kana yoke, achishke : yohmi kia Ahopoyuksa yokvto im vlla vhleha ha isht im a holitopa hoke, im achi tok.

20. Yohmi mvt tvmaha na-fehna ka a yvmihinchi fehna tuk puta kash, okla ilekostininchi keyu hatuk o, nan isht a mihachit ishtia tok..

21. Kolasin ma ! na chi palvmmi mak oke : Betsaita ma ! na chi palvmmi mak oke ; na-fehna puta kvt hvchishno ya hvchim a yvmohmi tuk vt Taia, micha Saiton aien ka a yvmohmi ha tok okma, hopaki kash inli ho na pashi tvnna anchit hituk chubbi banot mayvt ilekostinincha he a tok oke.

22. Yohmi kia nan vlhpisa chinto nitak okvno Taia micha Saiton aien a kvt im ahleka hoh kia pit im vlhpisa kvt hvchishno yokvno i shahla hi oke, hvchim achi lishke.

23. Yohmikma Kapenaum chia shutik ak o ont ish talia

tuk vt, akivt ai okpuloka mak o ish ona hi oke: na-fehna puta kvt chishno ya chim a yvmohmi tuk vt Sotom a a yvmohmi ha tok okma, himak nitak ak kia talaia hi a tok oka.

24. Yohmi kia nan vlhpisa nitak okvno Sotom yakni vt im ahleka hoh kia, pit im vlhpisa kvt, chishno yokvno i shahla hi oke, hvchim achi lishke, achi tok.

25. Nitak yvmma fehna ma Chisvs vt anumpuli mvt, Aki, shutik micha yakni aienai Chitokaka ma! na yakohmi puta ka na kostini, micha nan ithana aienai kvno ish in luhmi tuk osh, vlosi puta ho ish im otvnichi hoka, yak oke, chim aiahni lishke.

26. Ulhpesashke, Aki ma! yvmmak osh chim vlhpiesa hatuk oka, achi tok.

27. Aki vt nan okluha ka svbbak foikhishke: yohmi ka Ushi ya hatak nana kia ik ithano ho, amba Iki ak banoshke; mikma Iki a hatak nana kia ik ithano ho, Ushi ak illa, micha Ushi ak osh kvna ho im otvnichi hok mak bano hoke.

28. Toksvlit ahantvt hoyvqli, micha shapoh i weki puta hvchia mvt, momvt hvs svn ai vla na hvchi fohvchi lashke.

29. Um ikonla abana yak o isht hvsh il abanali cha, vno ak o hvs svn ai ithvnashke: vno ak osh chukvsh yohbi, micha chukvsh akanlosi aienai sia hoka: yohmik mak osh hvchi shilombish puta a foha hi a hvsh ahayucha he mak oke.

30. Um ikonla abana ya il abanali ka im vlhpiesa, micha a shapoh hvt shohvla hoke, im achi tok.

C H A P T A XII.

Nan im ai ithvna vhleha hash osh nitak hullo yo onush a hlehilit vpa tuk a, vlhpesa, Chisvs vt im ahni, 1. 9 Chisvs vt ibbak bvshi yatuk a achukmali tuk o, Falisi vhleha hvt vbi bvnnna. 22 Shilombish okpulo ai i foika tuk a Chisvs vt hlakofichi; 31 mihmvt Shilombish Holitopa ya ik ahobalot anumpuli kvt i kashofa he keyu miha. 38 Falasi vhleha hvt Klaist a nan-isht-atokowa im a hoyo. 46 Kvna hosh Klaist a i kanomi hoka isht annoa.

1. NITAK yummma foka ma Chisus vt nitak hullo nitak
o osapa hlopullit aya ma, nan im ai ithvna vhleha hvt hoh-
chufo hatuk osh, onush a hlehli cha, vput ishtia tok.

2. Yohmi kia Falisi vhleha hvt pisa mvt, Yakeh! nana
ka nitak hullo nitak a a yohma he vlhpesa keyu ka, na chim
ai ithvna vhleha hvt yohmishke, im achi tok.

3. Yohmi kia yummak ash osh, Lewi micha apehvt aya
tok aieno kvt hohchufo mvt, kariohmi tok,

4. Chihowa im aboha hatuk a ont chukowa cha, prska
otvni yummak oka ilap vt, micha apehvt aya tok aieno kvt
vpa he ai im vlhpesa keyu, amba naholitompa isht asha ak
illa hatuk a vpa tok a, holiso ha hvch ik ai it im anumpulo
chatuk oh cho?

5. Yummak keyukmvt na-holitompa isht asha vhleha hvt
nitak hullo nitak puta ma tempel anukaka ya nitak hullo a
kobahafi kvt ashuchi ha tok keyu ka vba nan vlhpisa holisso
ha hvch ik ai it im anumpulo chatuk oh cho?

6. Yohmi kia, Achufa hosh tempel a imaiya kvt ilvppa
anta hoke, hvchim achi lishke.

7. Yohmi kia, Uba isht-aiokpuchi ya ak ahnincho, amba
nan i nukhaklo ak o ai okpanchi li hoke, achi ilvppak osh
nana ho miha hatuk a hvsh akostininchu hatuk okmvt, ashu-
chi keyu ka anumpa hvsh onocha he tuk keyu chishke.

8. Hatak Ushi yvt nitak hullo ak kia in Chitokaka ak inli
hoka, im achi tok.

9. Micha yummak ash vttvt ia mvt, yummma i sinakak ak
o ont chukowa tok.

10. Yohmi ma hatak vt ibbak shulla yosh asha tok.
Yohmi ma ilvppak ash o nan vlhpisa onocha chi hosh okla
im ponaklot, Nitak hullo nitak a na hlakoficha he vlhpesa
cho? achi tok.

11. Yohmi ma yummak ash osh, Hatak hvchi katima kak
osh chukfvlhpoba yvt achufa hosh im anta tuk vt, nitak
hullo nitak o yakni kula pit itula ka, pit halvllit ik kohcho
ka hinla cho?

12. Yohmi ka hatak vt holitopa kvt chukfvlhpoba
ya katiohmi ho isht i shahli ho? Yohmi hoka nitak hullo

nitak a nana achukma ka yohma he vlpesa hoke, im achi tok.

13. Yohmi mvt hatak ash o, Chibbak a chisemochí, im achi tok. Mihma chisemochi tok: yohmi ma falamvt achuk-mvt taha mvt, in twnnvp akinli ho chohmi tok.

14. Yohmi ma Falisi vhleha hvt kocha wiha mvt, kani-mihchit vba he vt isht it im anumpulit maya tok.

15. Yohmi kia Chisus vt ilvppa akostininchí mvt, yvm-mak ash a kohchvt kvnia tok: mihma okla chito hvt iakai-ya ma, yvmmak ash o mominchit hlakofichi tok.

16. Yohmi mvt ilap a okla ik otvnincho ka hi a kullochit i miha tok.

17, 18. Yohmi ma, hopaii Esaias vt anumpohonli mvt, An tishu hano ai atokoli li tuk o holitopa, sa shilombish vt isht ai yukpa fehna ka ho pesá: ilvppak o vmi Shilombish o onochi likma, yvmmak osh Chentail okla ha vba, nan vlpisa ya im otvnicha hi oke.

19. Yvmmak okvt ik it im paknokmvt, anonti ik tahpulo ka he; mikma tumaha ai itahoba puta ka im anumpa ha hatak nana kia a haiyakla he a keyu ka he.

20. Kushak kushkoia kia ik tilohlecho ka he, mikmvt pula i honnula lua shobulli ka ik mosholicho hosh, vba nan vlpisa ya fihiimit isht imaiyacha he.

21. Yohmikma Chentail vhleha hvt yvmma hohchifo ho anukchieta he, achi tok a ont ai aiahli tok mak oke.

22. Yvmma foka ma achufa hosh nan-isht ahullo okpulo ai i fo^{ka} hosh lupa, micha ik anumpolo aieno ho isht im vla tok: yohmi ma yvmmak ash o hlakofichi na lupa micha ik anumpolo aieno tuk vt anumpuli, micha pisa aieno tok.

23. Mihma okla hvt momvt nukhlakancha mvt, Ilvpput Lewi ushi ash keyu ho? achi tok.

24. Yohmi kia Falisi vhleha hvt haklo mvt, Hatak ilvpput nan-isht-ahullo okpulo a kochá weli ho keyu, amba nanisht-ahullo okpulo i miko Beelsebub ak o ishit kohchi hoke, achi tok.

25. Mihma okla im anukfila ha Chisus vt akostininchí hatuk osh, Apehlichika puta kvt it a kashapvt ilap bi^{ka} it i sanali hokvt, ont ai okpulo kvt taha chatuk: anonti tumaha

chito, keyukmvt chuka puta kvt it a kashapvt ilap bi^{ka} it i sanali hokvt, talaia he keyu hoke.

26. Yohmi hoka Setan osh Setan a kohchi hokmvt, ilap o inli il i sanali hoke; yohmi ka katiohmi hosh im apehlichika yvt talaia hinla cho?

27. Micha vno vt Beelsebub ak o nan-isht-ahullo okpulo a ishit kocha weli li hokma, kvt hak o hvchim vlla vt yummak ishit kocha weli chatuk oh cho? yohmi hoka yummak osh na hvchim apesa yashke.

28. Amba vno yvt nan-isht-ahullo okpulo a Chihowa imi Shilombish o ishit kocha weli li hokma, yohmi hokmvno Chihowa apehlichika yvt hvchim vla mak oke.

29. Keyukmvt katiohmi hosh achufa kvt hatak hlampko in chuka ya ont chukowa cha, im ilayak a wehpula hinla? hatak hlampko ak o tikba takchi ha yo keyukmvt; amba yummak okmuto in chuka ya wehpula hinla hoke.

30. Kvna hosh vno a subafohka keyu kvt, a sanali hoke; mikma kvna hosh svba hoyo keyukmvt, na fimm*i* yoke.

31. Yohmi hoka, Hatak vt nan im ai ashvchika il aiyuka moma, micha Chihowa ik ahobalot anumpuli moma kvt i kashofa he; amba Shilombish Holitopa yo ik ahobalot anumpuli tuk okvto hatak vt ik i kashofo ka hi oke.

32. Micha kvna hosh Hatak Ushi ak o na mihachit anumpuli tuk okvto i kashofa he: amba Shilombish Holitopa ak o na mihachit anumpuli tuk okvto yakni ilvppak inli, micha yakni inla mihinti aien*a* ka ai i kashofa he keyu hoke.

33. Iti vt achukma ho hvsh ikbi hokma, vni ak kia achukma he: keyukmvt iti vt okpulo yo hvsh ikbi hokma, vni ak kia okpula he: iti vt ilap vni ak inli ho isht otvni chatuk oka.

34. Sinti chilita isht-ai-unchululi hvchia ma! ai vlpiesa keyu hvchia kvt, katiohmi hosh nana achukma puta ka hvsh anumpula hinla cho? chukvsh a lotowak mak o, itih hut kohchit miha chatuk oka.

35. Chukvsh anukaka ya na holitopa kvt asha kak o, hatak achukma kvt nana achukma puta ka a yvmohmi chatuk: mikma chukvsh anukaka ya nana ik achukmo kvt asha

kak o, hatak ik vlhpeso kvt nana ik achukmo puta ka a yvmohmi chatuk oke.

36. Yohmi kia anumpa ik vlhpeso puta hatak vt anumpuli tuk okmvt, nan vlhpisa nitak okvno yummak atuk a nan isht il anola hi oke, hvchim achi lishke.

37. Chishno chim anumpa atuk ak o isht chi ai vlhpiesa he: mikmvt chishno chim anumpa atuk ak o nan isht chim vlhpisa hi oke,

38. Yumma foka ma na holissochi vhleha kaniohmi, mica Falisi vhleha aiena kvt anumpuli mvt, Nan ithvnanchi ma! nan-isht-atokowa e chi pisa hinlvshke, achi tok.

39. Yohmi kia afalaminchi mvt, Nan ik vlhpieso, mica haui aiena okla hash osh nan-isht atokowa ya okla hoyo: yohmi kia nan-isht-atokowa nana hosh in takala he keyu, amba hopaii Chonas nan-isht-im atokowa ak illa hi oke.

40. Chonas vt nitak tuchina micha ninak tuchina aiena ho nvni chito ikfoka anukaka ya foka tok a; yummak inli ho chohmit Hatak Ushi vt nitak tuchina micha ninak tuchina aiena ho yakni chukrsh anukaka yatuk ma foyuka hi oke.

41. Nana vlhpisa chinto nitak okvno Ninefeh hatak vt okla ilvppa ai apihvt hieli cha, anumpa onocha hi oke; yummak okvt Chonas vt vbanumpa isht anumpohonli ma, okla ilekostininch tok okvt; atuk o Chonas a imaiya mak osh ilvppa ahantvshke.

42. Nana vlhpisa chinto nitak okvno oka mahli ohoyo miko vt okla ilvppa awant hikia cha, anumpa onocha hi oke: yummak okvt yakni ont ai vhli pilla minti kvt Solomon isht im a hopoyuksaka ya haklot aya tok okvt: yohmi tok o himak a Solomon a imaiya mak osh ilvppa ahan-tvshke.

43. Shilombish okpulo yvt hatak a akohchakmvt, afoha he hoyo kvt oka ik ai iksho puta ka hlopullit aya kia, ik ahayucho chatuk;

44. Yohmikmvt, An chuka ai vta kohehvt a minti li kash osh falamvt ia lashke; achi tuk osh onakmvt, yummak

ash kuna iksho ho, pashpovt, shemvt taiyaha cha hikia ho, ont pisa hoke.

45. Yohmikmvt shilombish okpulo untuklo inla yvt ilap a i shahli ho iwt ont pehlichit vla ma, yummak ash okla pit abeha cha ai asha chatuk; yohmikma hatak yummvt ont ishtaiyopi kak o okpulo kvt vmmona tuk a i shahli chatuk oke. Yohmi ka yummak inli ho okla nan ik vlhpeso ilvpvt chiyuhma chi hoke.

46. Okla ha im anumpuli kvt moma ho, ishki micha itibapishi vhleha aien aien kvt it im anumpuli bunna hosh kocha ya hinli tok.

47. Yohmi ma achvft, Yakeh! chishki micha ish itibapishi vlheha aien kvt chit im anumpuli bunna hosh kocha ya hiohmayvshke, im achi tok.

48. Yohmi kia afalaminchi mvt, nan im anoli yash o, Hushki ak osh kvta ho? mikma itibapishi li vhleha ak osh kvta hoh cho? im achi tok.

49. Mihmvt nan im aiithvna vhleha aiasha ka imma yo ibbak a pit wel i mvt, Hushki, micha itibapishi li vhleha ha pisá;

50. Kvna hosh Aki vba binili nan aiahni ka yvmohmikmvt, yummak osh itibapishi li, micha an tek, mikmvt hushki aien mak oke, achi tok.

C H A P T A X I I I .

Na hokchi nan isht vlhpisa; mikma nana a kaniohmi kak o Chisvs vt nan isht vlhpisa ho isht ithvnanchi, 1. 18 Na hokchi nan isht vlhpisa ho otvnichi; 24 onush micha haiyukpulo ita tuklo ka isht vlhpisa, 31 mvstvt nihi; 33 micha nan isht shatvmmichi ita tuklo ka nan isht vlhpisa: micha na kaniohmi ho Chisvs vt nan isht vlhpisa banu ho isht anumpohonli. 36 Onush micha haiyukpulo ita tuklo nan-isht vlhpisa ho otvnichi; 44 na holitopa luma kvt itu-yula, 45 micha nan chumpa, 47 mikmvt nvni isht hokli aien ka nan isht vlhpisa; 53 Chisvs vt falamvt i yakni ak inli ho ona tuk o, okla hvt kanimanchi.

1. MIHMVT Chisvs vt nitak yummak inli ka aboha ya a kohchut ia mvt, okhvta lapalika yo ont binili tok.

2. Yohmi ma okla laua fehna kvt ant im ai itahoba, yohmi ma peni yo pit chukowa cha binili tok; mihma okla laua yash osh momvt oka vhli ha hiohmaya tok.
3. Mihma nana laua ka nan isht apesa hosh isht im anumpohonli mvt, Inta! na hokchi vt na hokchit ia tok.
4. Atuk osh hokchi ma, na nihi kanimi kvt hina lapalika yo kaha tok; atuk o hushi puta kvt ant vpt tahli tok.
5. Kanimi kvt twli foka yakni asha fehna keyu ho kaha tok; atuk osh yakni vt i suko keyu hatuk okvt, chekosi fehna offo tok;
6. Atuk o hvshi vt kohcha ma, anakshua tok; yohmi kvt hakshish vt ik im iksho hatuk okvt, bvshit taha tok.
7. Yohmi ma kanimi kvt kvti foka yo kaha tok; atuk o kvti vt offo mvt, olvbbit ishi tok.
8. Amba inla ka yvt o yakni achukma ho kaha: yohmi tuk mvt achvfa tuk kia kanimi kvt tahlepa achvfa; kanimi kvt pokoli hanali; kanimi kvt pokoli tuchina aiena ho vnit waya tok oke.
9. Kvna hosh isht haponakla he haksobish vt i hinlikmvt, haklashke, achi tok.
10. Mihma nan im ai ithvna vhleha hvt im ai ona mvt, Nanta katiohmi ho nan isht vlhpisa ho isht ish im anumpuli cho? im achi tok.
11. Mihma afalaminchi mvt, Hvchishno yokvto nan ik otano vba apehlichika ahalaya puta ka hvsh ithana hi okvt hvchim vlhpisa ha tok; amba yummak okvto im vlhpisa keyu hoka.
12. Kvna hosh ishikma, mihi yo ima he; mikma in laua kvt i shahla hi oke: amba kvna hosh ishi keyuk muno, ishi tuk ash kia im ai isha hi oka.
13. Okla pihisa hokak osh, pisa keyu; mikmvt hahaklo hokak osh, haklo keyu; micha akostininchu keyu aiena hatuk; yohmi kak o nan isht vlhpisa ho isht im anumpuli li hoke.
14. Mihma Esaias vt nana tikbanli anoli kvt, Hahaklo hokvno hvsh haklo kia, hvch ik akostininchu ka he; mikmvt pihisa hokvno hvsh pisa kia, hvch ik ithano ka he.

15. Okla ilvppa chukvsh atuk mvt niyt taiyaha, mihmia haksobish a isht hapónahaklo kvt in takobi mvt, nishkin atuk ma okla okhishtvshke; yummak keyukmvt nitak kani-ohmi kia nishkin atuk ma isht pisvt, haksobish a isht haklo cha, chukvsh ma isht akostininchit ilekostininchit na hlakofichi la hinla kak o, yohmi achi tok a okla ilvppak o ont isht aiahli hoke.

16. Amba hvchi nishkin okvto pisa; mikma hvchi hak-sobish atuk mvt haklo aienan hokut na yukpushke.

17. Ahli mak o hvchi miha lishke, Hopaii yvt lawa, micha hatak hochukma aienan kvt nana hvsh pisa ka pisa bunna tok kia, okla ik peso tok; micha nana hvsh haklo ka haklo bunna tok kia, ik haklo tok oke, achi tok.

18. Yohmi hoka na hokchi isht vlpisa hatuk ma hvsh haklashke.

19. Kvna kia apehlichika isht anumpa ha haklo cha, ik akostininchcho, yohmik ma nan okpulo yosh vlt, chukvsh anukaka nana im a holokchi tuk ash yichiffit ishit kanchi chatuk. Ilvppak osh hina lapalika yo na nihi ai ishi tok mak oke.

20. Amba tvli foka yo na nihi ai ishi tok okvto vba anumpa ha haklo mvt, na yukput ashali^kka ishi kak oke.

21. Yohmi kia hakshish vt im a toba keyu hatuk osh, imoma na hopaki keyu chatuk; vba anumpa pulla hatuk mak o isht issikkopali, micha isht hofahyali aienakma, che-kosi mak inli ho ibetvbl chatuk.

22. Mikma kvti foka yo na nihi ai ishi kak kia vbanumpa ha haklo kak oke; yohmi tuk o yakni ilvppak inli nana ai anushkunna, micha nan in laua bunna kvt isht ashvchi aienan kvt vbanumpa hatuk ma ai olvbbit ishi na ik vno toba kak oke.

23. Amba yakni achukma yo na nihi ai ishi vto vba-numpa ha haklo mvt, akostininchit kak oke: micha yummak ash osh vnikmvt, achufa tuk kia kanimi kvt tahlepa achufa, kanimi kvt pokoli hannali, kanimi kvt pokoli tuchina, yohmi hosh isht waya hoke, achi tok.

24. Mihmvt nan-isht vlpisa inla yo in takalichit yak

ahanchi mvt, Üba apehlichî ka yvt hatak osh im osapa ya na nihi achukma ho hokchi tok a holba hoke.

25. Yohmi tuk kia hatak puta kvt nusi hosh maya takla ma, in tvnvp vt vla cha, onush ash haiyukpulo yo ant a hokchichi cha, kvnia tok.

26. Yohmi tuk o offot vpi toba cha, waya ma, haiyukpulo ak kia otvni tok.

27. Yohmi ma chuka-chvfa pehlichî in tishu vhleha hash osh ona cha, Pi shahli ma! na nihi achukma yo chim osapa ya ish a hokchi tok keyu ho? katiohmi ho anonti haiyukpulo vt asha cho? im achi tok.

28. Mihma, Tvnvp osh ilvppa yvmihchi tok, im achi ma; tishu vhleha hash osh, Yohmi ka iwt yummak atuk ma ont aiort il itahoba hi a, ish ahni cho? im achi tok.

29. Yohmi kia yummak ash osh, Keyu; yuminak keyukma haiyukpulo a aiort hvsh itahobi takla kvt, onush a aieninchit hvsh lobba hinla hoke.

30. Itapihvt hiohmayvt abusha onashke: atuk o abusha onak mak o na-bvshli vhleha ha, Haiyukpulo ak o tikba aiort itahobit hvsh sitohli cha, hvsh hukmashke; yohmik-mvt onush ak okvno a kanchak ak o pit hvsh ai itahobashke, im achi lashke, achi tok.

31. Nan-isht vlhpisa inla yo in takalichi mvt, Üba apehlichika yvt mvstvt nihi achvfa ho hatak vt ishi cha, im osapa ya hokchi tok a holba;

32. Yummak okvt iskitini kvt na nihi moma ka ik lauwo ho mvhlî; yohmi kia offot hofantikmvt, haiyukpulo puta ka moma imaiya cha, iti o toba; yohmi na vba hushi puta kvt naksish atuk ma ant a binohli chatuk oke, achi tok.

33. Anonti nan isht vlhpisa inla yo isht im anumpuli mvt, Üba apehlichika yvt puska shatummichi yo ohoyo hvt ishi cha, tanchi pushi vlhpisa tuchina ho ibafohki tuk o, momvt shatummci tuk a, holba hoke, achi tok.

34. Ilvppa puta ka nan isht vlhpisa bano ho Chisvs vt okla laua yatuk ma isht im anumpohonli tok.

35. Hopaii vt anumpuli mvt, Nan-isht vlhpisa ho svtih ha isht anumpohonli lashke; yakni toba tok taiyakla ka na lu-

ma asha chatuk puta ka anohonli lashke, achi tok a ont aiahla chi ka, nan-isht vlpisa ho keyukma im anumpuli tok keyushke.

36. Yohmi mut Chisus vt. okla laua ya kanompit tihleli mvt, aboha ont chukowa tok; mihma nan im ai ithvna vhleha hvt im ai ona mvt, Haiyukpulo osapa anuka asha tok nan-isht vlpisa ka achukmalit ish pim anolashke.

37. Mihma afalaminchi mvt, Na nihi achukma yo hokchi kvt Hatak Ushi ak oke.

38. Osapa vt yakni moma kak oke: nihi achukma yrt vba apehlichika im vlla ak oke; amba haiyukpulo vto nan okpulo im vlla ak oke.

39. Tunvp vt yummak hokchi tok vt Setan ak oke: abvsha ona kvt yakni ont im ishtaiyopi kak a he; mikma na bushli vhleha hvt enchil vhleha ak oke.

40. Yohmi ka haiyukpulo yvt itahoba cha, luak isht holokmi chatuk a, yakni ilvppot ont im ishtaiyopikmvt, yummak inli ho chiyuhma hi oke.

41. Hatak Ushi vt im enchil vhleha ha atohonokma, na yoshubi, micha nan ik vlpeso yohmi vhleha aienan ka mominchit im apehlichika atuk ma ai ishit kocha wela he;

42. Mikmvt yummak atuk ma tlili a bila luak chinto ho pit ai ashacha he: yohmikma yaiya micha noti ahampa aienan hosh yummak oka aiasha hi oke.

43. Yohmikma hopoyuksa vhleha hokvt shohpakali kvt, hvshi ak o chiyuhmi hosh Iki im apehlichika atuk ma aiasha hi oke. Kun hosh isht haponakla he haksobish vt i hinlikmvt, haklashke.

44. Anonti, Uba apehlichika yvt na holitompa luma hosh osapa anuka itonla tuk o, hatak vt yummak ash o ahayuchi cha, luhmi mvt, na yukpa fehna hatuk osh ia mvt, nana im asha tuk vt mominchit kanchi cha, osapa yummak ash o chumpa kak o chohmi hoke.

45, 46. Anonti, Uba apehlichika yvt hatak nan chumpa yosh tlili holitompa hochukma hoyot ahanta; yohmi tuk osh tlili holitompa achvfa kvt vltoba chinto ahayuchi mvt, vt

nana im asha tuk vt mominchit ont kanchi cha, chumpa kak o chohmi hoke.

47. Anonti, Uba apehlichika yut nunni-isht hokli yo okhuta okuchi na ilaiyuka puta pehli ;

48. Atuk o alota ma, okla halvllit oka vhli isht ona mvt, aka binohli cha, hochukma ka aiort nan aivilbeha pit apitta mvt, amba okpulo yuno kampila kak o chohmi hoke.

49. Yakni vt ont im ishtaiyopikma yummak inli ho chiyuhma he ; enchil vhleha hvt kohchut ayakmvt, hatak haksi vhleha hvt hopoyuksa vhleha ha ibvlhto tuk a filamohlichah he :

50. Mikmvt yummak ash o tvli a bila luak chito ka pit ito-ashacha he ; yohmikma yahaya, micha noti ahampa aienan hosh yummak oka aisha hi oke, im achi tok.

51. Mihmvt Chisus ash osh, Ilvppa puta ka mominchit hvsh akostininch cho ? im achi ma, Yau, Chitokaka ma ! okla im achi tok.

52. Yohmi ma, Na holissochi aiyuka vba apehlichika isht im vlbuchi kvt, hatak chuka-chufa pehlichi yosh nan im aia-sha ya nana kvt himona, micha hopaki aienan ho ai ishit kohchi ka chomi hoke, im achi tok.

53. Atuk o yakohmi tok ; Chisus vt nan isht vlhpisa ilvppa puta ka ont taiyali mvt, kohchut ia tok.

54. Atuk osh ilap i yakni ak inli ka vla mvt, i sinakak a nan ai im abahanchi ; yohmi ma okla nukhlakancha mvt, Hatak ilvpput nan ithana, micha na fehna aienan ka yvmichchi kvt, katimak o ai im vlhtaha tok oh cho ?

55. Ilvpput chuka ikbi ya ushi keyu ? ishki vt Meli hoh-chifo keyu ? mikma itibapishi vhleha mvt Chemis, micha Choses, mikmvt Saimon micha Chutas aienan kak keyu ?

56. Mihma in tek vhleha hvt momvt hvpi takla maya keyu ? Yohmi ka hatak ilvpput katimak o nan ilvppa moma ka ai im vlhtaha tok oh cho ? achi tok.

57. Mihmvt yummak ash o okla isht ai ibetvbl tok. Yohmi kia Chisus vt, Hopaii vt ik holitopo keyu hosh ahanta kia, ilap i yakni ak inli, micha ilap in chuka kak illa hoh chatuk oke, im achi tok.

58. Yohmi mvt okla nan ik i yimmo hatuk mak o yummak atuk ma na fehna ka lauachit a yvmihchi tok keyushke.

C H A P T A X I V

Chan Baptist vt nan ai ahli fehna hatuk osh Helot a nan i miha hosh aboha kvllo pit fohka, 1, 3 micha noshkobo vtpa tok. 13 Chisvs vt pvska lumbo tahlapi, micha nvni tuklo aieno ho hatak tahlepa sipokni tahlapi ho ipeta tok. 22 Chisvs vt vba pit anumpula chi hosh nvnih chaha pit oiya; atuk osh ninak a mahli fehna ma ok-hvta paknaka a nowvt nan im ai ithvna vhleha ha im ia; micha Pita yvt oka kvnia he tuk a okchalinchi. 34 Chisvs vt Kenesalet ona mvt, abeka puta tuk a hlakofichi.

1. YOHMI ma nitak yummak foka ma, miko Helot vt Chisvs vt annohowa ka, haklo tok.

2. Mihmvt in tishu vhleha hash o, Ilvppvt Chan Baptist mak oke; illi tuk vt falamvt tanishke: yohmi hatuk o na fehna puta kvt yummak atuk ma ai isht il otvnhinchishke, im achi tok.

3. Helot vt itibapishi Filip a tekchi Helotias ak atuk pulla mak o, Chan a hoklit, ishit takchi cha, aboha kvllo ya fohki tuk a tok.

4. Chan vt, Yummak oka ish itauwaya he chim vlpesa keyushke, im achi hatuk o.

5. Yohmi kak o yummak vbi bvnna kia, okla laua yak o i nukshopa tok: yummak oka hopaai, okla ahni hatuk oka.

6. Yohmi tuk kia Helot vt ai vhta tok nitak a holitoblit maya ma, Helotias ushetik vt itikba ya a hihla ma, Helot vt yukpa tok.

7. Yohmi kak osh anumpa kvllo isht ai il onochi hosh nana ho asilhha hokma, ima hi vt miha tok.

8. Mihma ishki vt tikbanli i miha hatuk oka, Chan Baptist noshkobo vt amphvta chito fohka ho, ilvppak fehna ant is si ai vtrashke, achi tok.

9. Mihma miko vt nukhaklo tok; yohmi nana kia anum-pa kvllo atuk pulla, micha okla ibai-impt maya tuk aieno hatuk mak o, yummak atuk ma ima hi a apesa tok.

10. Micha pit atohno na aboha kullo anukaka yak o Chan noshkobo ya a tubli tok.

11. Mihma yvymma noshkobo hvt amphvta chito fohka ho isht vla cha, ohoyo himita yash ima tok; mihma yvymmak ash osh ishki a isht im ona tok.

12. Yohmi ma nan im ai ithvna vhleha hvt haknip a ont ishi cha, hohpi mvt, vt Chisus a ont im anoli tok.

13. Chisus ash osh haklo mvt, nan im ai ithvna vhleha bano ho ai itapihvt yvymma vttvt ia kvt, peni vlhtot yakni haiaka yo ilhkoli tok; atuk o okla hvt yvymmak ash haklo mvt, aka itvnawa hosh tvmaha puta ka ashvt okla pit iakai-ya tok.

14. Atuk o Chisus vt kohcha cha, okla laua ya pisa mvt, i nukhaklo fehna cha, abeka im asha tuk a hlakofichi tok.

15. Atuk o opirt taha ma, nan im ai ithvna vhleha hash osh im ai vla mvt, Ilvppak okvt yakni haiaka yoke; mikma himak a shoba hosit tahrshke; okla laua ya pit ish tihleli na tvmahushi taloha ka ilhpak vpa chi kvt okla a chumpashke, achi tok.

16. Yohmi kia Chisus ash osh, Okla ik aiyo mak kia, im-pa chi ka hvsh ipetashke.

17. Yohmi ma, Pvaska tahlapi, micha nvni tuklo aienilla hosh ilvppa pim ashvshke, okla im achi tok.

18. Mihma, Ilvppak o isht oh um vlá, achi tok.

19. Mihmvt okla laua yvt aka hvshuk ai om binohla chi ka apesa tok; mihmvt pvaska tahlapi cha nvni tuklo aienaka sh o ishi cha, vba pit vba-chakali mvt, ai okpvchi cha tushahlichit, pvaska yash o nan im ai ithvna vhleha ha ima na nan im ai ithvna vhleha hash osh okla laua ya pit ipeta tok.

20. Mihma okla momvt impvt kaiya tok; mihma boshulli atampvt asha ka kishi alota auah-tuklo ho okla ishi tok.

21. Yohmi ka okla impa tuk vt, ohoyo vlla aienakvto asha ho, hatak tahlepa sipokni tahlapi foka tok.

22. Yohmi ma mih mak inli ho Chisus vt ilapvt okla laua ya tishelichi t^äklakma, nan im ai ithvna vhleha hvt peni pit abeha cha, tikba misha tvnnvp a ilhkola chi ka i miha tok.

23. Micha okla laua yash tishelichit tahli mvt, vba pit anumpula chi hosh ilap illvt nvnih chaha yo pit oiya tok : atuk osh opivt taha ma ilap bano hosh yvmmma anta tok.

24. Amba peni vto okhvta iklvnna ya, mahli ak osh a sanali hatuk o, oka banvtha ka takakanlit aya tok.

25. Atuk o ninak isht vlhpisa ont isht ai ushtak fehna, Chisvs vt okhvta ha a nowvt ayvt im ona tok.

26. Mihma okhvta a nohowvt aya na nan im ai ithvna vhleha hvt pit pisvt, komunta mvt, Shilup oke, achi tok ; mihmvt nukshopa cha, tahpvla tok.

27. Yohmi kia Chisvs ash osh ashalinka pit im anumpulit, Hvchi nuktanla achukmashke ; vno ash sia hoke ; ik hvchi nukshopo kashke, achi tok.

28. Mihma Pita yvt afalaminchi mvt, Chitokaka ma ! chishno ash chia hokmvt, oka ya a nowvt mayvt chim ona la hi a is sa mihashke, im achi tok.

29. Mihma, Minti, achi tok. Yohmi ma Pita yvt peni ash pit akowa mvt, oka ya a nowvt Chisvs a im ia tok.

30. Yohmi tuk kia mahli hvt kvllo fehna ho pisa mvt, nukshopa tok ; micha oka kvniyt ishtia mvt, tahpvlvt, Chitokaka ma ! si okchalinchi, achi tok.

31. Yohmi ma Chisvs vt ashalika ibbak a pit welit halvlli mvt, Na yimmi fehna keyu chia ma ! nanta katiohmi ho chi anuktuklo tuk oh cho ! im achi tok.

32. Atuk o peni a ant vlhto ma, mahli hvt yokopa tok.

33. Yohmi ma peni anukaka maya tuk ash osh yvmmak oka ant aiokpahanchi mvt, Chishno ak osh Chihowa Ushi a chia ho mhlishke, achi tok.

34. Atuk o yvmmak ash o hlopulli mvt, Kenesalet yakni o okla ona tok.

35. Yohmi ma hatak yvmmma asha tuk vt yvmmak ash o akostininchi mvt, inla tohnot yakni yvmmma fullota ka mominchit pit tihleli na abeka yatuk vt momvt ai im ona tok.

36. Mihma im anchi aposhokvchi ak illa kia okla potola hinla ka im asilhha tok ; yohmi ma laua kvt kaniohmi hosh potoli tuk okvt hlakofi aighli tok.

CHAPTA XV.

Chisvs vt na holissochi vhleha micha Falisi vhleha aienā kvt anumpa kochanli i nan vlhpisa puta kak o ahninchī kvt, Chihowa i nan vlhpisa puta ka i shahliche ka nan i miha tok, 1: 11 micha nana puta nana hosh hatak a okpaiyani kvt asha ka anoli. 21 Chisvs vt Kenan ohoyo ho ushetik a hlakofichi, 30 micha okla laua kvt im ona na hlakofihinchi tok; 32 micha paska lumbo untuklo, micha nvni chipunta kanomosi aienā ho hatak tahlepa sipokni ushta ka ipeta.

1. YUMOHMI ma na holissochi vhleha, micha Falisi vhleha aienā kvt, Chelusalem minti hosh Chisvs a im ai vla mvt,

2. Nanta katiohmi ho na chim ai ithvna vhleha hvt hatak tikba vhleha anumpa kochanli isht i nana vlhpisa ha tok a kobuffi cho? okla ibbak achifa keyu hosh paska vpa kvt, achi tok,

3. Yohmi kia yvmmak ash osh afalaminchi mvt, Nanta katiohmi ho hvchishno mvt, Chihowa i nan vlhpisa ya anumpa kochanli chi nana vlhpisa ka isht hvsh kobuffi cho?

4. Chihowa yvt apihisa kvt, Chiki micha chishki aienā ka ish holitoblashke; yohmikma, Kyna hosh iki okmá, keyuk-mvt ishki okmá, nana ho na mihachikmvt, illi mak o illashke, achi tok oka.

5. Amba hvchishno vt, Kyna kia iki, keyukmvt ishki okma nana kash o vm isht ish aiyukpa he tuk a, Uba-isht aiokpuchi oke, im achi: yohmi cha iki okmá, ishki okmá, nana ka ik holitoblo kia nan ik i kanihmo ka hi oke, hvsh achi.

6. Yohmi hosh Chihowa i nana vlhpisa ya anumpa kochanli chi nana vlhpisa ya isht hvsh ai okpvnichishke.

7. Nan-ilaobi hvchia ma! Esaias vt tikbanli nan isht hvchi anohonli hosh,

8. Okla ilvppvt itih hokvno a bilikasi isht vla mvt, itivlbi ma ishit sa holitoblishke; yohmi kia chukvsh okvto auet a hopakishke.

9. Nana abuchi kvt hatak i nana vlhpisa yo ithananchi hokvt, nana vlhpesa keyut okla si aiokpahanchishke, achi tok, im achi tok.

10. Yohmi mvt okla laua yash o itahobi cha, Haklot, hvsh ithaiyanashke;

11. Nana kvt itih ha pit chukowa kak osh hatak a okpuni ho keyu: amba nana hvt itih ha a kohcha, ilvppak osh hatak a okpuni hoke, im achi tok.

12. Yohmi ma nan im ai ithvna vhleha hash osh im ai ona cha, Falisi vhleha hvt anumpa ilvppa haklot issa mvt, ik im vlhpieso tuk a ish akostininch cho ? achi tok.

13. Yohmi kia yummak ash osh afalaminchi mvt, Na holokchi moma kvt Aki vba binili hosh hokchi tok keyu hokvno, tehvt taha hi oke.

14. Ant ik maya, lupa yosh lupa pehlich'i okla hoke: yohmi ka lupa yosh lupa ya ilaeli kvt tuklot yakni kula ya pit kaha hi bano hoke, achi tok.

15. Yohmi ma Pita yvt afalaminchi mvt, Nanisht vlhpisa ilvppa achukmalit pim anoli, achi tok.

16. Mihma Chisvs ash osh, Hvchishno ak kia nana ik akostininch kvt hvchi moma hato ?

17. Nana kvt itih ha fohka cha ia kvt takoba ya ont fohka tuk osh, anonti ont kohcha chatuk a, hvch ik akostininch moma cho ?

18. Amba nana puta kvt itih ha akohcha hokvto chukvsh ak o a minti; micha yummak osh hatak a okpuni chatuk oke.

19. Chukvsh ak o im anukfila okpulo puta, hatak bi ka vbi, hauj toba, ohoyo ik im iksho micha hatak ik im iksho it i lumaka puta, hukopa, anumpa ik ahlo isht atokoli, Chihowa ik ahobalot anumpuli puta kvt a toba hoka.

20. Ilvppa puta kak osh hatak a okpuni hoke; amba ibbak ik ahchifo yo isht impa hokvno hatak a okpuni keyu hoke, achi tok.

21. Yohmi ma Chisvs vt yummak ash vttvt ia mvt, Taia micha Saiton aieno yakni i kaniohmi ho ona tok.

22. Mihma Kenan ohoyo hosh yummak inli ho vttvt aya

tuk vt vla cha in tahpula mvt, Chitokaka Lewi ushi chia ma! is sa nukháklashke; svso-tek vt nan-isht-ahullo okpulo ai i foka isht issikkopa fehna hoke, achi tok.

23. Yohmi kia ilap vt anumpa achvfa kia isht ik im afalamincho ki tok. Yohmi ma nan im ai ithvna vhleha hash osh ona cha, Tahpulvt hvp iakaiya ka, kanompit ish chvffichashke, achit im asilhha tok.

24. Yohmi kia yvmmak ash osh afalaminchi mvt, Inla yokuno im aya li ha tok keyu; amba chukfulhpoba tvmoa Israel in chuka-chvfa ak a tok oke, achi tok.

25. Yohmi ma ohoyo hash osh mintit ant aiokpvchi mvt, Chitokaka ma! si apelvchí, achi tok.

26. Yohmi kia afalaminchi mvt, Ulla im puska ya ishi cha, ofi puta ka pit ipeta he vlhpesa keyu hoke, achi tok.

27. Mihma yvmmak ash osh, Ahlishke, Chitokaka ma! yohmi kia ofi puta kvt boshulli osh im pushnayo im ai-impa a chilofa kuno vpa hoke, achi tok.

28. Yohmi ma Chisvs vt afalaminchi mvt, Ohoyo ma! na chi yimmi kvt chintoshke; chishno ish ai ahni tuk fehna mak o chim ai yvmozmashke, im achi tok. Mihma hvshi kanvlli vlhpisa yvmmak fehna ho ushetik atuk vt hlakofi tok.

29. Yohmi ma Chisvs vt yvmmak ash vttvt ia mvt, Kalili okhvta bilika yo ona tok; mihmvt nvnih chaha yo pit oiya cha, yvmmak o binili tok.

30. Mihma okla chinto fehna kvt hanali okpulo, ik hoponayo, ik anumpolo, imomokpulo puta, mikmvt inla mvt laua ho il ai ishit im ai ona mvt, Chisvs iyi ituma ya ont ashachi tok; mihma yvmmak ash o hlakofichi tok.

31. Yohmi na okla laua kvt, ik anumpolo atuk vt anumpuli, imomokpulo atuk vt hlakofi, hanali okpulo atuk vt nowa, ik hoponayo atuk vt pisa aiena ho okla pisa mvt, nukhlakancha tok; micha Israel in Chihowa ak o okla aiokpahanchi tok.

32. Yohmi ma Chisvs vt nan im ai ithvna vhleha hash o hoyo cha, Okla laua si apehvt maya na himak nitak tuchina ka nana vpa hi vt ik im iksho hatuk o, i sa nukhákloshke; yohmi hatuk osh nan ik po moma hokvno tishelichi la he

keyu, yummak keyukma takla ya okla tikamba hinla hoka, im achi tok.

33. Mihma nan im ai ithvna vhleha hash osh, Yakni haiaka ya katimak o pvska laua ka il ahayuchi na okla chinto yohmi fehna kvt kaiya hinla cho ? im achi tok.

34. Mihma Chisvs ash osh, Pvska yvt katoymi ho hvsh ishi ho ? im achi tok. Mihma, Untuklo, micha nvni chipunta kanomosi hosh aien, im achi tok.

35. Yohmi ma okla laua yvt aka binohla hi a apesa tok.

36. Mihmvt pvska untuklo, micha nvni aien kash o ishi cha, vba isht aiokpvchi mvt, tushtoli cha, nan im ai ithvna vhleha ha ima na nan im ai ithvna vhleha hash osh okla laua ya ipeta tok.

37. Mihma momut okla imput, kaiya tok: mihma bo shulli atamput asha ka kishi alota untuklo ho okla ishi tok.

38. Mihma okla impa tuk vt, ohoyo vlla aien hokvto asha ho, hatak tahlepa sipokni ushta tok.

39. Mihma okla laua yash o tishelichi mvt, peni fohka cha, vt Maktala yakni a ona tok.

C H A P T A X V I .

Falisi vhleha hvt, Chisvs vt nan isht atokowa ya vba ya ai im otvn cha hi a ahni, 1; 6 micha nan im ai ithvna vhleha hvt, Falisi vhleha hvt nana ithvnanchi ka i nuktahlvt ahah ! ahna he i miha tok. 13 Pita yvt Chisvs a Chihowa okchaya Ushi, aiahnit yimmi kvt miha. 21 Chisvs vt iti-taiyukhvna ai illa he, atuk mvt nitak ont atuchinakma falamvt tana he aien kvt tikbanli anoli; 24 anonti Chisvs a im antia vhleha hvt okla ile kaiyanchi, mikmvt tikba na yukpa ai im vlhtoba he takanli kak o isht ai ilvrscha he miak o achi.

1. F ALISI vhleha micha Satusi okla aien kvt ai vla cha, yummak ash o imomaka pisa hosh nan isht atokowa ya vba ya auet ai im otvnicha hinla ka, im ahni tok.

2. Mihma afalaminchi mvt opiaka yokma, Shutik vt humma hoka, kocha yvt achukma chishke, hrsh achi.

3. Mikmvt onnahinli yokma, Shutik vt humma cha hosh-

ontichi fehna hokut, kocha yvt okpula chishke, hvsh achi. Nan ilahobi hvchia ma! shutik pisa yosh kaniohmi hokvno hvsh akostininch i kvt, anonti himak nitak isht ai vlpisa kvno hvch ik akostininch ka hinla cho?

4. Hatak haksi micha haui aien aien okla ash osh nan isht atokowa ya pisa ka ahnishke: yohmi kia nan-isht atokowa nana hosh im otvna he keyu; amba hopaii Chonas a nan-isht im atokowa kak illa hi oke, im achi tok. Mihmvt yvmmak ash o issvt ia tok.

5. Atuk o nan im ai ithvna vhleha hvt misha in tvnnvp a ona mvt, puska okla isha he tuk vt imihaksi tuk a tok.

6. Yohmi ma Chisvs ash osh, Falisi vhleha, micha Satusi vhleha aien im puska isht-shatvmmi ya i nuktahlvt ahah! hvsh aiahnashke, im achi tok.

7. Yohmi ma yvmmak ash osh, Puska kil esho kak oka, achit ilap bi ka it im anumpulit maya tok.

8. Mihma Chisvs vt yvmmak ash o akostininch mvt, Na yimmi fehna keyu hvchia ma! na katihmi ho puska ya isht hvch ik ayo ke tuk ak osh isht it im anumpulit hvsh maya cho?

9, 10. Puska tahlapi ho tahlepa sipokni tahlapi tuk a, kishi kanohmi ho hvsh ishi tok vt, micha puska yvt untuklo ho, tahlepa sipokni ushta tuk a, kishi kanohmi ho hvsh ishi tok aien kvt; hvch ik ithanot hvch ik akostininch moma ho?

11. Katiohmi ho Falisi vhleha, micha Satusi vhleha aien im puska isht-shatvmmi ya ahah! hvsh aiahna he, yvmmv puska imma yo isht hvch im anumpuli li tuk keyu ka hvch ik akostininch cho? im achi tok.

12. Yohmi ma puska isht-shatvmmi hak o ahah! im ahna hi o i miha hatuk keyu; amba Falisi vhleha, mikmvt Satusi vhleha aien nan-isht ai ithvnanchi ak atuk a okla akostininch i tok.

13. Atuk o Chisvs vt Sesalea Fillippi yakni a ona mvt, nan im ai ithvna vhleha im ponaklot, Hatak vto, Hatak Ushi sia ha, kuta ho si achi cho? achi tok.

14. Mihma, Kanimi kuto, Chan Baptist chia ho mihakma;

kanimi kuto, Elias ; mikma inlaka yuto Chelemaias ; keyuk-mvt hopaii a tok achufona mak o chia ho miha hoke, achi tok.

15. Mihma, Amba hvchishno vto kvta ho hvs si achi cho ? im achi tok.

16. Mihma Saimon Pita yvt afalaminchi mvt, Chihowa okchaya Ushi, Klaist chia mak oke, achi tok.

17. Mihma Chisvs vt afalaminchi mvt, Saimon Ba Chona chia hvt na chi yukpushke : nipi micha issish aien a hosh yvmmma chim otvnichi ho keyu hoka, amba Aki vba binili kak oke.

18. Yohmi ma anonti, Chishno vt Pita chia, yohmi ka tvli ilvppak o an chvch atuk ma ai ikbit hilechi la hi oke : yohmikma aiokpuloka okhissa puta kvt yummak atuk ma ik imaiyacho ka he mak oke.

19. Micha vba apehlichika ishit-tiwa puta ka chishno ak o chima lashke : mikma nana ho yakni paknaka ya ish a takchi hoka, vba yakni ma a talakcha he : mikmvt nana ho yakni paknaka ya ish ai i hotofi hoka vba yakni ma ai i hotofa he mak oke, chim achi li akinlishke, achi tok.

20. Yohmi mvt ilap ak osh Chisvs Klaist mak atuk a hatak nana kia okla ik im anolo ka hi a, nan im ai ithvna vhleha hash kullochit i miha tok.

21. Nitak yvmmma ai vhlit maya kak o Chisvs vt ilapvt Chelusalem a ona cha, hatak hochitoka vhleha, micha na holitompa isht asha pehlich vhleha, na holissochi vhleha aien a nan isht im ai ilbvsha in laua he, micha illichi tuk ma, nitak ont atuchinakma falamvt tana he aien a nan im ai ithvna vhleha ha im anolit ishtia tok.

22. Yohmi ma Pita yvt ilaelit ishi cha, im alvmminchit ishtia mvt, Na yakohmi kvt chi mishemashke, Chitokaka ma ! ilvppak okvt a chi yvmohma he keyu hoke, achi tok.

23. Yohmi kia yummak ash osh filema mvt, Pita yash o, Setan chia hvt vñ ashaka yo ish hikiashke ; chishno ak osh is si ataklvmmichishke : nana kvt Chihowa ya ahalaya kak o ish ahninch keyu, amba nana kvt hatak o ahalaya hok mak bano hoka, im achi tok.

24. Yohmi mut nitak yvymma foka ma Chisvs vt nan im ai ithvna vhleha hash o, Hatak nana hosh siakaiya bvnna hokmvt, ile kaiyanchi cha, im iti-taiyukhvna ya sholi hosh siakaiyashke.

25. Kvna kia ilap im ilhfiopak a okchalinchi bvnna hokvto, i kvnia hi oke: yohmikma kvna kia vno pulla hatuk mak o im ilhfiopak vt isht i kvnia hoh kia, ahayucha hi oke.

26. Hatak vt yakni a ai ila mominchi hosh ahanta na ilap imi shilombish ash osh i kvnia hokma, nanta ho ai-isht il aiyukpa hinla cho? yvymmak keyukmvt hatak vt nanta ak o ilap shilombish a isht atobba hinla cho?

27. Hatak Ushi vt enchil vhleha ha pehlichi cha, Iki isht aholitopaka ya il aieshi hosh aya hi oka; yohmikmak osh hatak moma ka ilap nana akariohmi tok aiyuka mak o isht im atobba hi oke;

28. Ahli mak o hvchim achi lishke, Ilvppa hiohmaya kvt kanimi kvt ik illo hosh ahanta cha, Hatak Ushi vt im apehlichika il aieshit minti ka, pisa hi vt asha hoke, im achi tok.

CHAPTA XVII.

Chisvs vt inlv̄t töba, micha Moses Elias ita tuklo kvt im vla na it im anumpuli, 1. 14 Chisvs vt nunih chaha vttvt akowa mvt, haiochichi tuk a hlakofichi; 22 micha illa he atuk mvt falamvt tana he tikbanlit anoli. 24 Chisvs vt trli holisso holitopa ka tempel a nan isht im ai atahla chi ho ima tok.

1. YUMOHMI tuk o nitak hannali ont ia ma, Chisvs vt Pita, Chemis, mikmvt itibapishi Chan aienka ilap bano ho pehlichi cha, nunih chaha yo pit oiya tok.

2. Mihmvt itikba ya ai inla tobvt hikia tok; mihma nashuka yvt shohpakali kvt hvshi ak o chiyuhmi ma, im anchi vt tohbi kvt tommi hak o itilaui tok.

3. Yohmi ma Moses micha Elias itatuklo hosh yvymmak ash ant it im anumpuli hosh im otvni tok.

4. Yohmi ma, Pita yvt anumpuli mut, Chitokaka ma! ilvppa il asha kvt pim achukmvshke; vlhpesa ish ahni hok-

ma, ilvappa vlhtipo tuchina ka il ai ikbashke ; achvfa kvt chishno ak o chimmi hokma, anonti achvfa kvt Moses ak o immi hokma, anonti achvfa kvt Elias ak o immi hashke, Chisvs a im achi tok

5. Yvmmvt anumpohonli moma ho, hoshonti tohbi kvt ant o hoshontikachi tok ; mihma anumpa hoshontika auet a kocha kvt, Ilvppak osh Svso a holitopa yo, nan-isht a sai yukpa fehna hoke ; hvsh i haponaklashke, achi tok.

6. Mihma nan ithvna vhleha hash osh haklo mvt, hlipvt kaha cha, okla nukshopa fehna tok.

7. Mihma Chisvs vt vlt ant tebli mvt, Ho tani ; ik hvchi nukshopa kashke, achi tok.

8. Yohmi ma okla vba chakali mvt, hatak nana kia ik peso, amba Chisvs ak illa tok.

9. Yvmohmi tuk o nnih chaha ya asht akowvt okla minti ma, Chisvs vt yvmmak ash o nan i mihvt, Nana hvsh pisa tuk vt hatak nana kia hvch ik im anolo mak o, Hatak Ushi vt illit falamvt tani hayashke, achi tok.

10. Mihma nan im ai ithana vhleha hvt im ponaklot, Yohmi ka katiohmi ho na holissochi vhleha hvt, Elias ak osh tikba vla pulla he, okla achi cho ? achi tok.

11. Mihma Chisvs vt afalaminchi mvt, Elias ak osh tikba vla cha, nan okluha ka falaminchit achukmalit taiyahla he tuk o myhli :

12. Yohmi ka Elias vt himonasi ak kia vla mashko hoke ; mihma yvmma okla ik ithano cha, amba nana ho okla ahni tuk mvt, yvmmak atuk ma i yvmyhehi tok ; yohmi ka Hatak Ushi ak kia mih mak o, chiyuhmit im ai issikkopa ch^ı hoke, hvchim achi lishke, achi tok.

13. Yohmi ma Chan Baptist ak o yvmmvt isht anumpuli hatuk a nan ithvna vhleha hvt akostininch tok.

14. Atuk o okla laua aiasha kash vlt taha ma, hatak achvfa hosh im vla cha, ant i hvchukbihlepvt hikia mvt,

15. Chitokaka ma ! svso ha ish i nukhaklashke : yvmmak okvt haiochi atuk osh himonna luak a itatohonla fehna, mikmct oka ma himonna oka itohonla fehna aien ahatuk osh issikkopa fehna hoke.

16. Yohmi ho nan chim aiithvna vhleha ha isht im vla li tuk a, okla hlakoficha he keyu tuk oke, achi tok.

17. Mihma Chisvs vt afalaminchi mvt, Na yimmi iksho, micha na shanaiya fehna okla hvchia ma ! hvchi takla ahanta li katiohmi foka chi cho ? nana ka isht ak hvchi ahno ho katiohmi foka chi cho ? Ilvppak o isht hvs svm vlashke, achi tok.

18. Mihmvt Chisvs vt nan-isht ahullo okpulo ya im alvmmi ma, yvmmak ash a kohcha tok ; yohmi ma vlla yash osh hvshi kanvlli vlhpisa mih makinli ho hlakofi tok.

19. Yvmohmi tuk o Chisvs vt ilap bano ma, nan ithvna vhleha hvt im ona cha, Katiohmi ho pishno vto yvmma e kohcha he keyu tuk oh cho ? achi tok.

20. Mihma Chisvs vt, Nan ik hvchi yimmo kak atuk oka ; ahli mak o hvchim achi lishke : Na yimmi kvt mvstvt nihi achufa yak o chohmi hosh hvchi nukfoka hatuk okmvt, nunih chaha ilvppa, Ilvppak atuk ma a kanvllit yvmmak o ish onashke, hvsh im achi hoka, yvmmvt kanvlla hinla hoke : mikma nana hosh hvchi na fehna hi vt iksho ka hinla hoke.

21. Yohmi kia ilvppa chohmi hokvt vba pit anumpuli, micha nahullochi aienakak o keyukma kohcha chatuk keyushke, im achi tok.

22. Atuk osh Kalili a okla maya ho, Hatak Ushi a ishit okla ibbak a fohka chi hoke.

23. Yohmikma yvmmak ash o okla vbi tuk ma, anonti nitak ont atuchinakma falamvt tana hi oke, Chisvs vt im achi tok. Yohmi ma okla nukhaklo fehna tok.

24. Yvmohmi tuk o Kapenavm a okla ai vla ma, vba isht ai okpvchi tvli holisso a sholi vhleha hvt Pita ya im ona mvt, Na hvch ithvnanchi vt vba isht aiokpvchi tvli holisso a bohli chatuk keyu ho ? achi tok.

25. Mihma yvmmak ash osh, Ahli ; achi tok. Micha aboha ya ont chukowa ma, Chisvs vt tikbanli. Saimon vt katiohmi ish ahni cho ? miko vhleha yakni pakna aiasha kvt ilap im vlla yak okmá, keyukmut hatak inla yak okmá, santa ho vlhpoyak i nan vlhpisa tvli holisso, micha nosh-

kobo chumpa tuli holisso, aienā ka im a hoyo chatuk o? achi tok.

26. Pita yash osh, Hatak inla vhleha ha, im achi tok. Mihma Chisvs vt, Yohmikma im vlla yokvto yummā ik ahalaio ho tumvshke.

27. Yohmi kia kil ibetvblecho ka chī ka, ivt okhvta ona cha, nvni isht-vlbi ya pit okvchi; atuk osh nvni tīkba kohcha hō ish ishashke: micha itakha ya ish wakvmmikmv̄t, tuli holisso tushafa kv̄t fōka na ish pisa chī hoke; yummak o ish ishi cha, vno, micha chishno, il ita tuklo isht vlhtoba mak o yummā ont ish imashke, im achi tok.

C H A P T A X V I I I .

Chisvs vt pim anukfila hvt akanlosa he, 1, 7 micha ilap i yimmi ahh vhleha hoka e shitelema he keyu ka pi miha: 12 anonti i yimmi vhleha hā i hullo kv̄t isht anoli mak osh chukfvlpoba kvnia isht apesvt anumpuli: 15 micha itibapishi iksa ibafokha yatuk osh nana ka pim okpvni hokma, il i kaniohma hi oka pi miha: 20 anonti kvna hoh kia i hohchifo hā kanima yo ai it afama ka ai ibafoka hi vt achi. 21 Chisvs vt hatak okvt nana ka ai iti kaniohmi hokvt, peh iti kashofa he tuk nan isht apesa hosh anumpuli.

1. Y OHMI ma yummak fehna akinli ka nan ithvna vhleha hvt Chisvs a im ai vla mv̄t, Kv̄ta hosh vba apehlichika ya ibafoka kv̄t moma i shahli cho? achi tok.

2. Mihma Chisvs vt vlla iskitini o i howa cha, yummak ash intinlakla ya hilechi tok.

3. Mihmv̄t, Ahli hō hvchim achi lishke; Inlv̄t toba cha, vlla chipunta yo chiyuhmi hō keyukmv̄t, vba apehlichika ya hvsh chukowa he keyu hoke.

4. Yohmi hoka kvna hosh ile akanlosichi kv̄t vlla iskitini ilvppak o chiyuhmi hokmv̄t, mihi yosh vba apehlichika ya ibafoka kv̄t moma i shahla hi oke.

5. Mikma kvna hosh vno a hohchifo hatuk mak o vlla dvppa chohmi achufa ka ahninchī hokmv̄t, vno ak o ahninchī hoke.

6. Amba kvna hosh a yimmi chipunta yakohmi achufona

kia ibetvblichi hokmvt, yvmmak ash o ilap ak o tuli tanchi botoli osh ikunla ya atakanli ho, okhvta ahofobi fehna yo ai oka illi hok mak osh im vlpiesa he tuk mak a hi oke.

7. Nan-isht-ai ibetvblili ak pulla tok mak o yakni vt nan i palvmmi hoke: nana ai ibetvblili okakanto kaniohmi kia ik takalo ka wa: yohmi kia hatak nana ho ai ibetvblili vt isht a tobvt minti hatuk okvno i palvmmi mak oke.

8. Yohmi hoka chibbak okmá, chiyi yokmá, nana hosh chi ibetvblichi hokma, hokofit ish kanchashke; hanali okpulo, keyukmvt imomokpulo yokmá, nana hosh ai okchaya ya ont ish chukowa kak osh ibbak vt tuklo, keyukmvt iyi yvt tuklo, kanima hosh luak ataha iksho ma ish itokvnia he tuk a chim i shahla hi oke.

9. Mikmvt chi nishkin vt chi ibetvblichi hokma, kohchit ish kanchashke; nishkin vt im achufa hosh aiokchaya ya ont ish chukowa hok mak osh nishkin tuklo hosh aiokpuloka luak a ish itokvnia he tuk a chim i shahla hi oke.

10. Ahah! aiahnit chipota vhleha ilvppa achufona kia hvch ik kanimancho kashke: yvmmak oka im enchil vhleha vba yakni aiasha kvt, Aki vba binili ka nashuka ya pisa na bilia hoke, hvchim achi lishke.

11. Hatak Ushi vt okpulot taha yak o okchalincha chi hosh aya hatuk oke.

12. Katiohmi hvsh ahni cho? Hatak vt chukfvlpoba tahlepa achufa hosh im asha tuk osh; achufonvt yoshubvt kvnia ka, pokoli chakkali akocha chakkali kash ashachi cha, vt yoshubvt kvnia tuk a hoyot, nrnih foka ya hikikia chatuk keyu cho?

13. Atuk osh ahayucha he yoba tuk osh yohmi hokmvt, achufa yvmma isht a na yukpa kvt, yoshubvt ik tumoo ke tuk pokoli chakkali akocha chakkali ka im i shahli chatuk oke, ahli mak o hvchim achi lishke.

14. Yohmi ka chipota vhleha ilvppa achufona kia okpulot taha hi a, hvch Iki vba binili kvt ik ahno kvt, yvmmak inli ho chiyuhmi hoka.

15. Yohmi ka ish itibapishi hv nana ka chim ashvchi hokma, vt chishno, micha ilap hvsh ita tuklo banu ho nana

ai ashvchi tuk a ish im anolashke: chi haponaklo hokma, ish itibapishi hatuk a falaminchit ish im aiyubacha he mak oke.

16. Amba chi haponakla he keyu, yohmi hok m^vno, himmakma achvfa, keyukmvt tuklokma, nana ho pehlinchit ish ia na nan anoli tuklo, keyukmvt tuchinakmá nana itih ho anumpa puta mvt isht ai ahlashke.

17. Yohmikma yummak atuk ma i haponakla he keyukma, chvch a ish im anolashke: yohmi kia chvch atuk ma i haponakla he keyu hokmvt, yummak atuk mvt Chentail hatak, micha pblikan aienā mak o chim ai itilauashke.

18. Ahli mak o hvchim achi lishke, Nana ho yakni pakna ya hvsh a takchi hoka, vba yakni ma a talakcha he; mikmvt nana ho yakni pakna ya hvsh ai i hotofi hoka, vba yakni ma ai i hotofa he mak oke.

19. Anonti hvsh tuklo hosh nana ka asilhha he imma ho yakni pakna ya hvsh ai it im achvfa hokma, Aki vba binili kvt ai im aighlicha he mak oke, hvchim achi lishke.

20. Kanima yo tuklokma, tuchinakmá, nana hosh sa hohchifo ha isht ai itvnaha hoka, yvmma ai iklvnna hikia li hoka, achi tok.

21. Yohmi ma Pita yvt im ona mvt, Chitokaka ma! itibapishi li hvt katohmi ha yo vm ashvchi ka, i kashofi la hinla cho? untuklo haya hi o? achi tok.

22. Mihma Chisvs vt, Untuklo ha ya hi o ak chim achoshke: amba, Pokoli untuklo bat untukla hi oke, chim achi lishke, im achi tok.

23. Yohmi hoka vba apehlichika yvt miko yosh in tishu vhleha ha aheka i hotihnv^t pisa bunna ho chohmi hoke.

24. Atuk osh i hotihnv^t ishtia ma, achvfa hosh talent tahlepa sipokni pokoli hosh aheka im asha tuk o, ilauelit im vla tok.

25. Yohmi kia isht atobba hi vt ik im iksho hatuk o, i shahli hash osh yummvt, tekchi, micha im vlla vhleha, mikmvt nan im asha tuk moma aienā kvt kvnia na aheka yvt vlhtoba hinla ka apesa tok.

26. Yohmi hatuk o tishu hash osh aka hlipia cha,

aiokpahanchi mvt, Chitokaka ma! is sumi svlaha hokma, mominchit chim atobbi lashke, achi tok.

27. Yohmi ma tishu yummma i shahli yatuk vt i nukhaklo cha, i hotofi mvt, aheka atuk a i kashofi tok.

28. Yohmi tuk kia tishu yummak ash inli kvt kohchvt ia mvt, tishu ilapa ai itilaui yvt achvfa hosh, aheka iskvli tahlepa achvfa hosh in takanli hatuk a ont pisa tok: mihmvt yummak ash o hoklit ishi cha, nuktihlissi mvt, Aheka chin takali kvt is svm atobbashke, achi tok.

29. Mihma tishu itilaui yatuk ash osh iyi ituma aka ya hlipia cha, Is sumi svlaha hokma, mominchit chim atobbi lashke, achit im asilhha tok.

30. Yohmi kia vlpesa ik ahno ki tok: amba aheka ya atobbi pulla chi mak o, yummak ash o aboha kvlo pit fohki tok.

31. Yohmi ma tishu bi ka vhleha hvt nana kvt yvmohmi na pisa mvt, okla nukhaklo fehna cha, ivt nana a kaniohmi tuk a mominchit i shahli ha okla ont im anoli tok.

32. Yohmi tok a i shahli hatuk vt yummak ash o pit hoyo cha, Tishu haksi chia ma! chishno vt is svm aiahni ma, aheka yummma mominchit chi kashofli tuk.

33. Yohmi ka chishno ak kia tishu chi bi ka ya ish i nukhaklo kvt, vno vt chi nukhaklo li tuk a, ish chiyuhma he tuk keyu cho? im achi tok.

34. Mihamvt i shahli hatuk vt anukhobel a mvt, aheka in takanli tuk vt, mominchit atobbi pulla chi mak o, issikkopali vhleha ha im issa tok.

35. Yohmi ka hvchishno hvsh moma kvt hvsh itibapishi nana ai ashvchi ya hvchi chukvsh ak o isht hvsh i kashofli keyukma, yummak inli ho ohmichit Aki vba binili kvt hvchi yvmihcha he akinli hoke, achi tok.

CHAPTA XIX.

Falisi vhleha hvt Chisvs a nan im ponaklo ma. Chisvs vt afalamin-chi mvt, a hatak vt tekchi iti kvnia ka ik vlpeso ka miha, 3. 13 Chisvs vt vlla chipunta hoka ibbak a onochi cha, vba isht anum-

puli. 16 Chisvs a hatak himita yosh, Nantak o katiohmi li kak osh ai okchayvt bilia yoka ona la hinla cho? im achi ma, Chisvs vt isht im anumpuli: 23 nan in laua yvt ai okchaya yoka palvmmi ho chukowa he achi: 27 anonti ilap i yimmi ahli vhleha ha yukpala hi vt miha.

1. ATUK o yakohmi tok; Chisvs vt ilvppa puta ka ahanchit tahli mvt, Kalili a vttvt irt, Chatan misha Chutea yakni ai vhli ho ona tok.

2. Mihma okla chito yvt iakaiya tuk o, yvmmak o a hlakofohlichi tok.

3. Mihma Falisi vhleha hak kia im ai vla cha, yvmmak ash o imomaka pisa hosh, Nana hosh a kaniohmi mak inli ho hatak vt tekchi a kancha hi vt im ai vlhpesa hoh cho? im achi tok.

4. Mihma yvmmak ash osh afalaminchi mvt, Ummona hokvno yvmma ikbi hokvt, nakni micha tek itatuklo ho ikbi tok.

5. Mihmvt, Ilvppa pulla hatuk mak o hatak vt iki micha ishki aienka issa cha, tekchi ak o it asitia hi oke: yohmikma tuklo yvmmak atuk vt haknip achufa hi oke; achi tok holisso ha hvch ik it im anumpulo chatuk oh cho?

6. Yohmi hoka yvmmak okvt himmakma tuklo mak a hi o keyu, amba haknip achufa hoke. Yohmi hoka Chihowa hosh nana ka ita halvllichi ha ya, hatak vt ik iti filvmmichko kashke, im achi tok.

7. Mihma okla hash osh, Yohmi ka katiohmi ho iti kvnia holisso ha ima cha, ohoyo ha kancha hi a, Moses vt apesa tok oh cho? im achi tok.

8. Mihma, Hvchi chukvsh vt kullo pulla hatuk mak o, hvchi tekchi hvsh kancha hi a, Moses vt hvchim ahni tok: amba ummona a mihinti kvno yohmi tok keyushke.

9. Yokmi kia vno vt, Kvna hosh tekchi a inla itinlumaka tuk keyu ho, kanchi cha, inla itauwaya hokmvt, haui toba mak oke: mikma ohoyo kanchi tuk ash o kvna hosh itauwayakmvt, haui toba hoke, hvchim achi lishke, im achi tok.

10. Mihma nan im ai ithvna vhleha hash osh, Hatak vt

tekchi a isht im a yakohma hinlakma, itauwaya ka achukma keyushke, im achi tok.

11. Yohmi ma yummak ash osh, Hatak moma kvt anum-pa ilvppa aiokpucha he keyu, amba kuna ho isht ai im vlhpesa ak illa hinla hoke.

12. Kanimi kvt ishki ikfoka anuka ak inli ho yohmi hosh atobvt vtta tuk yunvk vt asha; mikma kanimi kvt hatak osh yunvk ikbi tok o, yunvk vt asha: yohmi ma kanimi kvt eba apehlichika pulla hatuk mak o, ilap inli hosh yunvk il ikbi tok vt, yunvk vt asha hoka. Kuna hosh ilvppa aiokpucha hinlakmvt aiokpuchi mak inlashke, im achi tok.

13. Yvmma foka ma yummak atukma ibbak a vlla chi punta ya isht umbitepa cha, vba pit anumpula chi ka isht in ai vla tok: mihma nan ithvna vhleha hvt okla ha im alvmmim chi tok.

14. Yohmi kia Chisus vt, Ulla chipunta yvt um vla hi a hvsh im ahni cha, hvch ik im alammo kashke: ilvppa chiyuhmi kak osh vba apehlichika mak oka, achi tok.

15. Mihmut yummak ash o ibbak a isht umbitept tahli mvt, yummak ash a kohchvt ia tok.

16. Yohmi tuk o achufa hosh ayvt ona mvt, Nan ithvnan-chi achukma ma! ai okchayvt bilia yoka pisa la hi vto nana achukma nanta hak o yvmohmi la hinla cho? im achi tok.

17. Mihma yummak ash osh, Katiohmi ho achukma is si achi cho? achukma kvt iksho ho amba achufa illa, yummvt Chihowa ak oke: yohmi kia ai okchaya yoka ont ish chukowa he ish ahni hokmvt, nan vlhpisa puta mak o ish holitoblashke, im achi tok.

18. Mihma, Katima kak o? im achi ma, Chesus vt, Kuna kia chik bo kashke, Chik itinlumako kashke, Chik hukopo kashke, Anumpa ik ahlo isht atokolit chik anto kashke.

19. Chiki micha chishki aienka ish holitoblashke: mik-mvt, Chin chukapanta hatak a ish holitobi kvt, chishno akinli ka chim itilauashke, achi tok.

20. Hatak himita yash osh, Ulla sa tomba mak inli hosh nana ilvppa moma ka holitoblit isht mihinti li tok mak oke: nanta hosh ik svm ono moma cho? im achi tok.

21. Mihma Chisvs vt, Aiahli kak o ish ahni hokmvt, ia cha nan chim asha ka kampilvt, ilbusha vhleha ha ish i hopelashke ; yohmikmvt na holitompa kvt vba yakni ya chin tonla he mak oke : mikmvt ish la cha, ant is siakai. yashke, im achi tok.

22. Yohmi kia hatak himita yash osh anumpa yummā haklo mvt, nan in laua fehna hatuk okvt, nukhaklo fehna hosh kanvllit ia tok.

23. Yohmi ma Chisvs vt nan im ai ithvna vhleha hash o, Ahli mak o hvchī miha lishke, Hatak nan in laua yvt vba apehlichika ya palummi ho chukowa hi oke.

24. Mikma anonti, Kamel vt chofak ushi nishkin a hlo-pulli ka palummi kvt, hatak nan in laua yosh Chihowa apehlichika pit chukowa hokuno, ik lauwo ka he hvchim achi lishke, achi tok.

25. Mihma nan im ai ithvna vhleha hvt okla haklo mvt, nukhlakancha fehna tok : mihmvt, Yohmikma kvt hosh okchaya hinla cho ? achi tok.

26. Yohmi kia Chisvs vt yummak ash o atokolit pisa mvt, Hatak okmuno ilvppvt yohma he keyu, amba Chihowa hokmuno nan okluha kvt yohma he bano hoke, im achi tok.

27. Yohmi ma Pita yvt afalaminchi mvt, Yakeh ! pishno vt mominchit il issa cha, e chiakaiya tuk ; yohmi kvt nanta hak o il isha chi cho ? im achi tok.

28. Mihma Chisvs vt, Ahli mak o hvchī miha lishke ; Si apehvt hvsh itvnowa tuk vt, nan okluha kvt himonvt tobakma, Hatak Ushi yvt im aholitopaka ya aiasha holitopa ai om binilikma hvchishno ak kia aiasha holitopa auah tuklo ka hvsh a chieyvt, Islael oklushi auah tuklo ka na hvchim apesa hi oke.

29. Yohmikma chuka puta, mikmvt itibapishi vhleha, micha in tek vhleha, keyukmvt iki okmá, ishki okmá, tekchi okmá, keyukmvt illa yokmá, yakni okmá, nana ho sa hoh-chifo pulla hatuk mak o issvt aya tuk vt momvt yummak atuk a ohmi tahlepa achvfa ka pisa tuk mvt, anonti ai okchayvt bilia ma iesha he mak oke.

30. Yohmi kia tíkba tuk vt ont ishtaiyopa hi vt lauakma, anonti ishtaiyopi atuk vt tíkba hi vt asha hi oke.

C H A P T A XX.

Na pilesa vhleha hvt nitak achvfa ka hrshi kanvlli vlhpisa ilaiyuka ho pákupi a holokchi ilhkoli tok nan isht vlhpisa. Nan isht vlhpisa iluppak o Chisvs vt ilap im antia vhleha aighli ka ai ilaiyukachit im atobba hi vt ai isht apesa, 1. 17 Chisvs vt anonti illa chi kvt tikbanlit anoli; 20 mihma Sebete ushi ishki vt Chisvs a nan im asilhha, mihma afalaminchit i miha. 30 Chisvs vt hatak lypa tuklo ho hopokoyochi.

1. UBA apehlichika yvt, hatak chuka-chufa pehlichi osh i pákupi aholokchi a toksvla chi ka, tohna chi hosh onnahinli fehna ia ho, chohmi hoka.

2. Atuk osh yummak ash osh ilhtohno vhleha ha nitak achvfa ka iskvli achvfa chi ho it im apesa cha, pákupi aholokchi a pit tihleli tok.

3. Atuk osh hrshi kanvlli vlhpisa ont atuchina foka ho kohchvt aya mvt, inla yvt nan-isht vutta ik im iksho hosh ilhpak a kanchi a hiohmaya na pisa tok,

4. Mihmut yummak ash o, Hvchishno ak kia pákupi aholokchi a pit hvsh abehashke; atukma kaniohmi kak osh ai vlhpesakma, hvch ima lashke, im achi na okla ilhkoli tok.

5. Atuk o anonti hrshi kanvlli vlhpisa isht hannali, mik-mvt ont isht chakkali aieno ka kohchvt aya mvt, yummak ash inli ho chohmichi tok.

6. Atuk osh hrshi kanvlli vlhpisa isht auah achvfa foka ho kohchvt ia mvt, anonti inla yvt nan-isht vutta ik im iksho hosh hiohmaya na pisa cha, Katiohmi ho nan isht vutta ik hvchim iksho hosh hvsh hiohmaya na shoyubi cho? im achi tok.

7. Mihma yummak ash osh, Amba hatak nana kia nan ik pi tohno kuno, im achi tok: mihma yummak ash o, Hvchishno ak kia pákupi aholokchi a pit hvsh abeha ak inlashke; atuk ma kaniohmi kak osh ai vlhpiesakma, mih mak o hvsh ishashke, im achi tok.

8. Yvmohmi tuk o ont opivt taha ma, p_akupi aholokchi in talaia atuk ash osh nan im apesvchi asho, Na pilesa vhleha ha i howa cha, vlhtoba ha imá : ishtaiyopi tuk ak o ai ishtia hosh t_ikba tuk a ont ish tahlashke, im achi tok.

9. Atuk o h_vshi kanvlli vlhpisa ont isht auah achvfa foka ho tohno tuk ash o okla ai vla mvt, hatak achvfa kvt iskvli achvfa aiyuka ho ishi tok.

10. Amba t_ikba tuk vto ai vla mvt, i shahli ho okla isha chi kvt im ahoba tok : atuk o yvmmak ash kia hatak achvfa kvt iskvli achvfa aiyuka ho ishi tok.

11. Micha yvmmma okla ishit tahli mvt, chukachvfa pehlich*i* hatak ash o nanumachit maya mvt,

12. Ishtaiyopi tuk yakohmi kvto hushi kanvlli vlhpisa achvfa illa ho toksvli tuk a pishno nitak lvshpa ho toksvli kullo ka isht il ahanta tuk a, ish pi ai itilauechishke, achi tok.

13. Yohmi kia afalaminchi mvt, achvfa ho, A kana ma ! nan ik vlhpeso nana ho a chi yvmohmi li keyushke : chishno vt iskvli achvfa hi o il it im apesa tuk keyu ?

14. Chimmi mak o ish ishi cha, ish iashke : ishtaiyopi tuk ilvppak kia chishno a it ilauechit ima la chi hoke.

15. Uno vmmi hatuk vt uno nana aiahni li hosh kanimichi la hi vt vm vlhpesa keyu ? uno ak osh si achukma kak o, chi nishkin vt ik vlhpeso hoh cho ? achi tok.

16. Yohmi ka yvmmak inli ho chiyuhmit ishtaiyopi tuk vt t_ikbakma, t_ikba tuk vt ishtaiyopa hi oke; im annoa hokvto laua; amba vlhtoka kak osh achafoa hoka, achi tok.

17. Atuk osh Chesus vt Chelusalem a ia hosh aya mvt, takla ya nan im ai ithvna vhleha auah tuklo kash pehlichit naksika isht ona mvt,

18. Inta ! Chelusalem a, iloh ivshke; yohmi ka Hatak Ushi ishit na holitompa isht asha pehlich*i* vhleha, mikmvt na holissochi vhleha aien*a* ka ibbak fohkikma, yvmmak ash osh illa hi a okla im apesa chi hoke.

19. Yohmikma yvmmak atuk ma ishit yopula chi, micha yumm*i*, mikmvt ititaiyukh*v*na ahonvhlichit vbi aien*a* ch*i*

mak o, Chentail okla ha ibbak fohka chi hoke: yohmi tuk kia nitak ont atuchinakma falamvt tana chi hoke, im achi tok.

20. Yohmi ma Sebete ushi vhleha ishki osh ushi a pehlinchit im ona cha, aiokpahanchi kvt, nana achvfa ho im asilhha tok.

21. Mihma ohoyo hash o, Nanta hak o ish aiahni hoh cho? im achi ma, yummak ash osh, Suso tuklo ilvpput ish apehlichika ya achvft chibbak isht-impakimma ya ont a binilikma, anonti achvfa kvt vlhfvbekimma ya asha hi a ish im apesashke, im achi tok.

22. Yohmi kia Chisus vt afalaminchi mvt, Nana ho hvsh asilhha hokvt hvsh akostininch keyushke. Huchishno vt isht-ishko ai ishko la chi, yummak ash osh, Pi yvmohma hinla hoke, im achi tok.

23. Mihma yummak ash o, Um isht-ishko yoka hvsh ai ishka chi ho mvhli; mikmvt baptismo isht a sa baptismo ka isht hvchi baptismal chi ho mvhli hoke; yohmi kia subbak ishtimpakimma, micha vlhfvbekimma aiena aiasha hokvno vno yosh ima la hi o keyu, amba Aki vt kvna ho im atahli tok mak illa hi oke, achi tok.

24. Yohmi ma pokoli kash osh haklo mvt, itibapishi tuklo kash o isht ik i yukpo fehna tok.

25. Yohmi kia Chisus vt yummak ash o i howa mvt, Chentail miko vhleha hvt ai i shahlit pehlichi chatuk, mikma i hochitoka vhleha hvt nana im ai vlhpesa hatuk osh im ai yvmihchi chatuk a hvsh ithaiyanushke.

26. Amba hvchishno yokvno ai yvmohma he keyushke: amba kvna hosh ai i shahlit hvch itintakla ya anta bunna hokmvt, yummak osh hvchin tishu hashke.

27. Mikma kvna hosh holitopa i shahlit bunna hosh hvchi itintakla ahantakmvt, yummak osh nan isht hvchim vtta yashke.

28. Hatak Ushi vt ilapo ak o nan isht im vtta chi ho aya ha tok keyu: amba nan isht vtta chi, mikmvt laua ho ilap

im ilhfiopak a isht chumpa chi aienā hosh aya tok a, mih mak o hvsh chiyuhmashke, achi tok.

29. Yohmi ma Cheliko a asht ilhkoli ma, okla laua fehna kvt yummak ash o iakaiya tok.

30. Atuk o hatak lypa tuklo kvt hina lapalika yo chiya tuk osh, Chisvs vt ont ia ho haklo mvt, pit tahpvlvt, Chitokaka Lewi ushi chia ma! ish pi nukhaklashke, achi tok.

31. Yohmi ma okla laua yash osh, yummvt nukchinta chi ka, im alvmmi tok; yohmi kia yummak o i shahlichit tahpvlvt, Ish pi nukhaklashke, Chitokaka Lewi ushi chia ma! achi tok.

32. Mihma Chisvs vt lumvt hikia cha, yummak ash o pit i howa mvt, Nanta hak o a hvchi katimichi la he a hvsh aiahni cho? achi ma,

33. Pi nishkin vt fatuma he ak oke, Chitokaka ma! im achit okla tok.

34. Yohmi ma Chisvs vt i nukhaklo cha, nishkin ash pit potoli tok: yohmi ma mih mak inli ho nishkin ashot fala-mvt pisa ma, yummak ash o iakaiyvt okla tok.

CHAPTA XXI.

Chisvs vt kaniohmi hosh Chelusalem a chukowa, 1; 12 anonti na-chumpa vhleha, micha na-kanchi vhleha aienā ka tempel a a kocha weli. 18 Micha iti vlpoba fik achi nan ik vno a bshit illa he im ahni; mikmvt na yimmi micha anumpa ilbvscha anumpuli aienā ka nan isht im aighli ka ya pim anoli. 23 Kanimi kvt nan isht ai vlpesa nana ho isht ai yvmohmi hatuk a a ponaklo tuk kia, yummak ash o Chisvs vt im a tblich, 28 micha hatak ushi tuklo, 33 micha na-pilesa vhleha pakvpi a holokchi i pota tuk nan isht apesa hosh Chu okla nan im ai ashvchi a isht otvnichi.

1. YUMOHMI tuk o Chelusalem pit bilika okla onvt Alif nvnih Betfachi ak o ai ona ma, Chisvs vt nan ithvna tuklo ho pit tihleli tok.

2. Mihmvt, Tumahushi hvchi chapaka auet talaia ka hvsh onashke; yokmikmvt mih mak inli ho issuba hakso-bish falaia ushi ilaeli kvt asinta ho hvsh pisa chi hoke: yummva hvsh i hotofi cha, isht hvs svn vlashke.

3. Micha k^una kia nana ka hvchim achi hokma, Chitokaka yak osh b^unna hatuk oke, hvsh im ahashke: yohmikma mih mak inli h^o auet pila chi hoke, im achi tok.

4, 5. Hopaii vt anumpohonlit, Saion ushetik a, yakeh! chi miko chukvsh yohbi achukma, issuba haksobish falaia a toba tok issubushi haksobish falaia yo om binili hosh ayvt chim vlvshke, hvsh im ahashke, achi tok a ont aiahla chi mak o ilvppa moma kvt a yakohmi tok.

6. Mihma nan ithvna yash osh itiachi mvt, Chisus vt i miha tuk mak o ont yvmohmit okla tok.

7. Micha issuba haksobish falaia, mikmvt ushi aiena kash o isht vla ma, im ilefoka ya om pullit tahli cha, yummak ash o okla om binilichi tok.

8. Yohmi ma okla chinto fehna hosh hina ya im anchi a okla pulli tok; kanimi mvt iti naksish o vmot hina ya pulli tok.

9. Yohmi ma okla chito tikba itvnowa tuk, mikmvt iakaiya aiena kash osh, tahpvlt, Lewi Ushi a Hosanna im ahanchashke. Chitokaka i hohchifo h^o il ai eshi hosh aya hovt holitopa mak oke. Shutik tbokaka fehna ma, Hosanna ai ahanchashke, achi tok.

10. Atuk o Chelusalem a ant chukowa ma, tvmaha hash osh momvt nukhlakancha mvt, Ilvppvt kvt a hoh cho? achi tok.

11. Mihma okla laua yash osh, Ilvppak osh Kalili yakni Nasalet a i hopaii Chisus mak oke, achi tok.

12. Yohmi ma Chisus vt iwt Chihowa in tempel a ont chukowa mvt, tempel anukaka ya nana a kanchi, micha a chumpa aiena maya tuk ash mominchit kocha pit tihleli mvt, ai impa tvli holisso ai itatoba puta, mikmvt puchi vlpoba akanchi abinohli aiena kash halvllit filemohlit kinahli-chi tok.

13. Mihmvt, Um aboha hvt vba pit ai anumpuli chuka yo hohchifa he, achi hosh holisso tok; yohmi kia hvchishno vto na-hukopa vhleha in chuka yo hvsh ikkishke, im achi tok.

14. Mihma lypa, micha hanali okpulo puta kvt tempel anukaka ya im ai vla ma, yummak oka hlakofichi tok.

15. Mihma na holitompa isht asha pehlichi vhleha, mi-cha na holissochi okla aienā kvt, yummvt na fehna puta ka yumihičhi, mikma tempel anukaka ya vlla vt Lewi Ushi a Hosanna im ahanchashke, achi aienā ka pisa mvt, okla isht ik i yukpo fehna tok.

16. Mihmvt yummak ash o, Ilvppvt nana achit maya ka ish haklo cho ? im achi tok; Mihma Chisus vt, Yau, vlosi mikmvt pishi puta itih ha Chihowa hvt a holitopa he ish apesa tok achi holisso ka, himonna kia hvch ik it im anumpulo chatuk oh cho ? im achi tok.

17. Mihmvt yummak ash o issvt tvmaha a kohchvt ia mvt, Betani a ona cha, yummak o ont nusi tok.

18. Atuk osh onnahinli ma falamvt tvmaha ia hosh aya mvt, hohchvfo tok.

19. Micha fik vpi vt tikba ya hikia na pit pisa mvt, yummak ash o ona ; yohmi kia nana kia takanli na ik ahayucho ; amba hishi ak illa tok ; mihmvt, Himak a pilla ma nitak nana vni yvt ik chi a tobo kashke, im achi tok. Mihma chekosi mak inli ho fik vpi vt bshit taha tok.

20. Yohmi ma nan ithvna yvt pisa cha, okla okokko ! aiahni mvt, Chekosi fehna ho fik vpi vt bshit taha chā, achi tok.

21. Mihma Chisus vt afalaminechi mvt, Ahli mak o hvchi miha lishke, Na yimmi kvt hvchi anukfoyuka, micha ik hvchi nukwiyo hokmvt, fik vpi nana a kanimihehi ilvppak bano ho hvsh yumihecha hi o keyu, amba, Nvnih chaha ilvppa kanullit ict okhvta hak o pit ish okvtulashke, hvsh im achi aienakma, ymohma hinla hoke.

22. Micha hvchi yimmi hosh nan okluha ka nana ho anumpa ilvsha isht hvsh asilhha hokvt, hvsh isha hi oke, im achi tok.

23. Atuk osh tempel a ona cha, nan ithvnanchi hosh ahanta ma, na holitompa isht asha pehlichi vhleha, mikmvt okla i hochitoka vhleha aienā kvt im ai vla cha, Nan isht ai vlhpesa nanta mak o ilvppa puta ka isht ish yakohmichi cho ? micha kvta hosh nan isht ai vlhpesa ilvppa chima tok oh cho ? achi tok.

24. Mihma Chisus vt afalaminchi mvt, Uno ak kia nan achvfa ka a hvchim asilhhvchi lashke; yummak o hvs svm anoli hokma, vno vt yummak inli ho chohmit nan isht ai vlhpesa nana ho ilvppa puta ka ishit yakohmichi li hatuk vt hvchim anoli lashke.

25. Chan i baptismo vt katimak o a minti ha tok oh cho? vba yakni okmá, hatak okmá, nanta ha tok oh cho? im achi tok. Yohmi ma, Uba yak o minti ha tok: il achi hokma, Yohmi kak o katiohmi ho yvmma hvch ik i yimmo ke tok oh cho? pim acha hinlushke.

26. Yohmi kia moma kvt Chan a hopaii o okla ahni hatuk oka, Hatak ak a tok: achi kvt okla ha il i nukshopvshke, achit ilap bika it im anumpulit maya tok.

27. Micha Chisus ash o im afalaminchi mvt, Kil ithanoshke, im achi tok. Mihma yummak ash osh, Yohmi ka vno ak osh nan isht ai vlhpesa nana ho ilvppa puta ka isht yakohmichi li hatuk vt ak hvchim anoloshke, achi tok.

28. Yohmi kia katiohmi ho hvsh ahni cho? Hatak achvfa hosh ushi vt in tuklo tok; atuk osh tikba yash o, Svso ma! himak nitak a a pakvpi a holokchi a ont ish toksplashke, ont im achi tok.

29. Mihma afalaminchi mvt, Yohmi la he ak ahnoshke, achi tok: yohmi tuk kia i himmakma inlanchit anukfilli cha, ia tok.

30. Yohmi ma anonti atukla kash yummak inli chohmi ka ont i miha tok. Mihma afalaminchi mvt, Ia lashke, a shahli ma! achi; yohmi tuk kia ik aiyo ki tok.

31. Tuklo yummvt katimampo kak osh iki nan aiahni tuk a yvmoohmi tok oh cho? im achi tok. Mihma, Tikba yatuk a, im achi tok. Mihma Chisus vt, Ahli mak o hvchim achi lishke, Publikan vhleha, micha haui puta kvt hvchi tikba Chihowa apehlichika ya pit abehjha hoke.

32. Chan vt ai vlhpiesa ataya mak osh hvchim vla ka, yvmma hvch ik i yimmo tok: yohmi kia publikan vhleha, micha haui puta kvt i yimmi tok: mihma hvchishno vt yummak atuk ma hvsh pisa ha yvt, yvmma hvchi yimma hi vt i himmak a inlanchit hvch ik anukfillo tok, im achi tok.

33. Nan isht vlhpisa inla ka hush haklashke; Hatak chuka-chvfa pehlichi achvfa hosh pákvpí a hokchit tahli cha, kvti apushi isht a holitvchit apakfobli mvt, oka-páki ai vlhto a yvmmma angkaka ya a kulli cha, chuka chaha ya ikbit tahli mvt, hatak na pilesa vhleha ho pota cha, yakni hopaki ho ia tok.

34. Atuk osh nan vni waya ai ona hosi ma, yvmmak ash vni waya ka ont isha chi ho, in tishu vhleha ha hatak na pilesa vhleha hash pit in tihleli tok.

35. Atuk o hatak na pilesa vhleha hvt in tishu vhleha hash o hoklit ishi cha, achvfa ka boli mvt, anonti achvfa ka vbi cha, anonti achvfa ka tvli isht boli tok.

36. Atuk o anonti inla laua kvt tikba atuk a i shahli ho pit tihleli tok: yvmmak ash kia yvmmak atuk mak inli ho okla itilauechi tok.

37. Yohmi kia ont ishtaiyopi fehna ma, Suso ha holitobla chi hoke, achi mvt, ushi ak o pit i pila tok.

38. Yohmi tuk kia hatak na pilesa vhleha hash osh ushi ash o pisa mvt, Ilvppak osh immi mak oke: kiloh vbi cha, immi yatuk a kiloh ai ishi, ilap bi ka it im achi tok.

39. Mihmvt yvmmak ash o okla iti hoklit pákvpí a holokchi a ishit a kohchi cha, vbi tok oke.

40. Yohmi ka pákvpí a holokchi immi atuk vt onak-mvt, hatak na pilesa vhleha yvmmak atuk a nanta hak o katimihcha hinla cho ? im achi tok.

41. Yohmi ma, Hatak haksi vhleha yvmmak atuk ma issikkopalit tvmoli cha, pákvpí a holokchi yash hatak na pilesa vhleha inla yvto ont ai vlhpiesakma na waya ka ihima he fehna ho, i pota he mak oke, im achi tok.

42. Mihma Chisvs vt, Tvli yvmmma chuk-ikbi vhleha hvt shitilema yash o, yvmmak ash fehna hosh chukbika nutaka in tola holitopa i shahli ho tobvshke: iluppa Chihowa hosh yvmihchi ho, pi nishkin a i na fehnvshke, achi ka Baibil a himonna kia hvch ik ai it im anumpulo chatuk oh cho ?

43. Yohmi hoka Chihowa apehlichika ya mokofit hvchim ai ishi cha, yvmmak atuk ma isht a waya he fehna oklushi o ima he mak oke, hvchim achi lishke.

44. Micha kyna hosh tvli ilvppa onvtulakmvt, litoa he ; amba ilap ak osh kyna ho onvtula hokmvt, botolichit kancha hi oke, im achi tok.

45. Mihma na holitompa isht asha pehlich*i* vhleha micha Falisi vhleha aiena kvt, yvmmvt nan isht apesa ka haklot tahli mvt, yvmmvt ilap ak o isht anumpuli hatuk a okla akostininchi tok.

46. Yohmi kia yvmmak oka hopaii ak o okla ahni hatuk oka, yvmmak ash o iti hoklit ishi bunna tuk kia okla chito ak o i nukshopa tok.

CHAPTA XXII.

Itauwayachi ai impa he tok ik itvnaho ki tok nan isht vlpisa, 1 ; 12 ai itauwaya aya he i nafohka ya ik fohko hosh i palvmmma he im vlpisa ; 15 Chisvs vt Falisi vhleha, micha Helotian okla aiena kvt Sesa ya tvli holisso im itahobi ka vlpesa chishba, ahnit i ponaklo, mihma Chisvs vt afalaminchit nana i miha. 23 Chisvs vt Satusi vhleha hvt illi yvt falamvt tana hi oka ik yimmo chatuk a isht anumpuli ; 34 nan vlpisa chinto moma i shahli, 41 kaniohmi kak osh Klaist vt Lewi in Chitokaka yvt, anonti Lewi ushi ahinla ka, Chisvs vt a ponaklo.

1. **MIHMA** Chisvs vt anonti nan isht vlpisa ho isht im anumpulit,

2. Uba apehlichika vt hatak miko yosh ushi ohoyo itauwaya chi ho, impa im atahli ho chohmi hoke.

3. Micha im annoa tuk vhleha ha ont i howvt itauwaya ai impa ka isht vla chi ho, in tishu vhleha ha pit tihleli tok ; yohmi kia okla minta hi a ik ahno ki tok.

4. Mihma anonti tishu inla yo pit tihleli mvt, Inta ! an tubokoli impa ha atahli lishke ; a wak-hobuk, micha nana vlpitvt nia puta kvt illi ma, nan okluha kvt vltahvushke ; itauwaya ai impa ka hvsh mintashke, achit im annoa tuk vhleha ha hvsh im analashke, im achi tok.

5. Yohmi tok kia yvmmak ash o nan-isht ik ahno hosh kanima pit ilhkolut, achvft im osapa ia ma, anonti achvft im ai itatoba ia tok.

6. Yohmi ma akashampa kuto in tishu vhleha hatuk ash iti hoklit ishi cha, kanimanchi fehnvt, polaka okla illiche tok.

7. Atuk o miko vt yummak ash o haklo mvt, anukshomunta fehna tok: mihmvt in tvshka chipota laua ka pit tihlelit, hatak vbi vhleha yummak ash o vbit tahli mvt, in tumaha ha hukmit tahli tok.

8. Yohmi mvt in tishu vhleha hash o, Itauwaya ai impa hamo vlhtahvshke; yohmi kia im annoa tuk vhleha hash osh ahalaia hi o keyu tuk oke.

9. Yohmi hoka hina ai itafamo put a ka itunowvt, laua kvt kaniohmi ho hush pisakmvt, moyumvt itauwaya ai impa ka aya he hush im anolashke, im achi tok.

10. Yohmi ma tishu vhleha yummak ash osh ilhkoli mvt, hina ai itafamo put a ka itunowvt, okpulo, mikmvt hochukma aien aien laua kvt kaniohmi ho pisa mvt, mominchit hoyot itahobi tok: yohmi ma itauwaya ai impa yash osh im annoa tuk vhleha ha isht alotvt kwnia tok.

11. Atuk o im annoa tuk vhleha hash pisa chi hosh miko vt ant chukowa mvt, hatak vt ai itauwaya aya he i nafohka ya ik fo hko hosh yummna asha na pisa tok.

12. Micha yummak ash o, A kana ma! katiohmi ho ai itauwaya aya he i nafohka vt iksho ho ilvppa ant ish chukowa tuk oh cho? im achi tok. Mihma yummak ash osh nan ik acho ki tok.

13. Yohmi ma miko vt in tishu vhleha hash o, Ilvppa ibbak, mikmvt iyi aien aien ka ho takchi cha, isht ivt kocha aiokhlilika ya ont hush kanchashke: yummak oka yahaya, mikmvt noti ahampa aien mak osh aiasha hi oke, im achi tok.

14. Im annoa hokvto laua kia, amba vlhtoka kak osh achafoa hoka, aehi tok.

15. Yumma foka ma Falisi vhleha hvt ilhkoli mvt, kani ohmit yummak ash ilap im anumpa ho isht a yukacha hinla kvt isht anumpulit maya tok.

16. Mihmvt ilap nan im ai ithvna vhleha ha, Helotian iksa ai itapeha ho pit in tihleli mvt, Nan ithvnanchi ma!

chishno vt aiahli chia achukma chatuk; mikmvt Chihowa i hina aiahli mak o ish ithvnanchi chatuk, hatak nana kia nan isht ik chim ahobo chatuk; mikmvt hatak vt chim it i shashohli keyu chatuk a il ithaiyanvshke.

17. Yohmi hokvt kaniohmi ho chim anukfila hokmvt ish pim anolashke: noshkobo isht chumpa tvli holisso a Sesa yak o ima he ai vlpesa hokma, keyukma, nanta cho? pit achi tok.

18. Yohmi kia yvmmvt im anukfila ai vlpesa keyu atuk a, Chisvs vt akostininchu mvt, Katiohmi ho nan ilahobi vhleha hvchia hvt imomaka hvs sa pesa cho?

19. Noshkobo isht chumpa tvli holisso a ho ha haiakvchi, achi tok. Mihma iskvli achvfa ho okla isht im vla tok.

20. Mihma yvmmak ash o, Ilvppvt kvta hak o holbvt toba ho, mikmvt kvta ho a hohchiso ho? im achi ma,

21. Sesa yak oke, okla im achi tok. Yohmi ma yvmmak ash osh, Yohmi hoka nana kvta Sesa yak o immi hokma, Sesa yak o hush imashke: mikmvt nana kvta Chihowa yak o immi hokmuno, Chihowa yak ashke, im achi tok.

22. Yohmi ma okla haklo mvt nukhlakancha cha, yvmmak ash o issvt, okla ilhkoli tok.

23. Mih nitak mak inli ka Satusi vhleha hvt, illi yvt falamvt tana he keyu, achi chatuk osh im ai vla cha, ant i ponaklot,

24. Nan ithvnanchi ma! Hatak vt vlla yvt ik im iksho hosh illi hokma, nakfish vt tekchi atuk a itauwaya cha, itibapishi hatuk a vlla isht im ai ikbashke, Moses vt achi tok.

25. Yohmi tuk o itibapishi hvt untuklo hosh pitintakla ya maya tok: atuk o akni hash osh ohoyo itauwaya tuk osh illi tok: mihmvt vlla yvt ik im iksho hatuk okvt, tekchi atuk a nakfish ak o im a tosholichi tok.

26. Atuk o atukla kak osh yohmi ak inli tuk o, anonti ont atuchina kvta mihinli ma, mahaya mvt isht untuklo kash osh yohmi tok.

27. Atuk o ont ishtaiyopi fehna ma, ohoyo hash kia illi ak inli tok.

28. Yohmi ka yumma momvt okla itauwaya tok oka, illi yvt falamvt tani kano, untuklo ka katima mak o tekchi mak a hi oh cho ? achi tok.

29. Mihma Chisvs vt afalaminchi mvt, Baibil, mikmvt Chihowa nan im aiahli aienā ka hvch ik ithano hatuk osh hvsh ashvchishke.

30. Illi yvt falamvt tani hokvt okla itauwaya he keyu mvt, anonti itauwaya he im vlhpisa he keyu, amba Chihowa im enchil vhleha vba aiasha kak o, chiyuhma hi oke.

31. Amba illi yvt falamvt tana he yummak okvno, Chihowa hvt hvchim anumpohonli mvt,

32. Uno ak osh Eblaham in Chihowa sia, mikmvt Aisaak in Chihowa sia, micha Chekob aienā ka in Chihowa sia hoke, achi tok holisso ka hvch ik it im anumpolo chatuk oh cho ? Chihowa hvt illi ak o in Chihowa keyu, amba okchaya ak oke, im achi tok.

33. Yohmi ma okla laua yvt ilvppa haklo mvt, nan isht ai ithvnanchi ka anukhlakancha tok.

34. Amba Falisi vhleha hokvto, yummak ash osh Satusi vhleha ha nana acha he keyuchi tok a haklo mvt, okla itahoba tok.

35. Yohmi ma achufa hosh yummvt vba nan vlhpisa ithvnanchi yosh, imomaka pisa hosh nan i ponaklot.

36. Nan ithvnanchi ma ! vba nan vlhpisa katima kak osh nan vlhpisa holitopa kvt moma i shahli cho ? achi tok.

37. Mihma Chisvs vt, Chitokaka chin Chihowa hoka chi chukvsh a mominchit, mikmvt chi shilombish a mominchit, anonti chim anukfila ha mominchit isht ish holitobashke ;

38. Achi ilvppak osh nan vlhpisa in tikba, mikmvt moma i shahli mak oke.

39. Mikma atukla kvt yummak inli ho chohmi hoke ; Chin chuka-panta hatak a ish holitobi kvt chishno ak inli chim itilaushke, achi kak oke.

40. Nan vlhpisa tuklo ilvppak o nan vlhpisa moma, micha hopaii holissochi tok aienā kvt a shaiyahli hoke, im achi tok.

41. Falisi vhleha hvt itvnahvt chiya takla ma, Chisus vt i ponaklot,

42. Klaist a katiohmi isht hvchim anukfila cho ? yummvt kvta hak o ushi o ? achi ma, Lewi ak o ushi oke, okla im achi tok.

43. Mihma yvmmak ash osh, Yohmi ka katiohmi ho Lewi vt Shilombish isht anukfoyuka mvt, yummak oka hochifo cha,

44. Chitokaka yvt an Chitokaka ya, Subbak ishtimpak-imma ya ish binili na chin tnvvp vhleha chiyi ai o hikia yo ikbi lashke, im achi tok oh cho ?

45. Yohmi ka Lewi vt yummak oka Chitokaka hochifo tok okma, anonti yummvt katiohmi hosh ushi ahinla cho ? im achi tok.

46. Yohmi ma hatak nana hosh yvmmak ash o anumpa achufa kia im afalamincha hinla kvt iksho ma, anonti nitak yvmma ai vhlit mihinti ka himmakma hatak nana kia ik nukwiyo hosh nan im ai asilhhuchi kvt iksho ki tok.

C H A P T A XXIII.

Chisus vt nan im ai ithvna vhleha hvt na holissochi micha Falisi aic na kvt nana isht ithvnanchi kvno im antia he, amba nana a kani ohmi yokvno okla ik iakaiyo ka hi a im apesa, 1. 13 Chisus vt na holissochi micha Falisi vhleha aieno kvt im a yvmohma he vlpesa hoka, na palvmmi kvt onvtula chj ka tikbanli anoli, 37 na palvmmi kvt ai imma tikeli ka ithana hatuk osh Chelusalem a Chisus vt isht yaiya.

1. **YUMMA** foka ma Chisus vt okla chinto, mikmvt ilap nan im ai ithvna vhleha aieno kash o im anumpuli mvt,

2. Na holissochi vhleha, micha Falisi vhleha aieno kvt Moses im aiasha ya chieyvshke.

3. Yohmi hoka nan okluha puta ka nana ho hvsh holitolbla hi a hvchj miha hokma, yummak atuk ma holitolbit a hvchj yvmohmashke: amba okla nana a kaniohmi hokvno hvch ik holbo kashke: yummak okvt anumpuli tuk kia yohmi keyu hoka.

4. Shapoh weki shali ka palvmma hinla ho takchit tahli

cha, hatak puta tahchi ma onochi hoka : yohmi kia ilap ak inli kvto yvmmak oka ibbak ushi achvfon a kia pit isht kanvllica hi a okla ahni keyu hoke.

5. Amba nana a kaniohmi puta kv^t, hatak vt pisa chi kak o, yvmoohmi hoke : i failaktili ya okla hopvtkvlli mvt, anonti im anchi aposhokvchi ma hofalohli chatuk,

6. Mikmvt impa asha ka aiasha holitopa i shahli puta kak o im ai achukmakmvt, anonti sinikaka puta anukaka ma aio minili holitopa i shahli puta kak o im ai achukma chatuk,

7. Mikmvt ilhpak a kanchi ai it aiokpvchi, micha hatak puta kv^t Labai, Labai, im achi aienakak o im ai achukma chatuk oke.

8. Yohmi kia hvchishno yokvto Labai ik hvchi hohchifo kashke ; hvch i shahli hvto achvfa, yvmmvt Klaist ak oke. Yohmikma hvsh moyuma kvto itibapishi hvchia hoke.

9. Micha yakni paknaka ya hatak nana kia hvch iki hvch ik hochifo kashke : achvfa hosh hvch Iki okvto vba yak o binili hoka.

10. Micha i shahli vhleha ik hvchi hohchifo kashke : achvfa hosh hvch I shahli, yvmmvt Klaist ak oke.

11. Amba kvna hosh moma i shahli kv^t hvch ibafoka hokmvt, hvchin tishu mak a hi oke.

12. Mikma kvna hosh ilefehnvchi hokmvt, aka ona he ; mikma ile akanlosechi hokmvt, holitopa he oke, im achi tok.

13. Amba na holissochi vhleha, micha Falisi vhleha, nan ilahobi hvchia ma ! na hvchi palvumma he mak oke : vba apehlichika ya hatak inla puta ka hvsh im okhishta hokv^t : mikmvt hvchishno vt yvmma pit hvch ik abeho mvt, anonti pit abeha he tuk a, ant ik abeha hvch ik im ahnoshke.

14. Na holissochi vhleha, micha Falisi vhleha, nan ilahobi hvchia ma ! na hvchi palvumma he mak oke : ohoyo i hatak illi in chuka puta ka wehpulit hvsh tahli, mikmvt peh ilahobi kv^t vba pit anumpuli hosh hvsh falaiachi hoka : yohmi hokv^t na palvummi chito i shahli hosh hvchim vlpisa hi oke.

15. Na holissochi vhleha, mikmvt Falisi vhleha, nan ilahobi hvchia ma ! na hvchi palvumma he mak oke ; na hv-

chim ai ithvna achvfa kia ikbi hvchi hvnna kvt, okhvta mi-cha yakni aien a ka hvsh vlhfullihinchi hoka: atuk o yvm-mak ash osh tobakma, anonti aiokpuloka im vlla fehna kvt hvchishno a chohmi tuklo ho hvsh ikbi hoke.

16. Kvna hosh anumpa kvollo a tempel ak o isht ai a miha hokvno nana keyu; amba kvna hosh tvli holisso lakna tem-pel ankkaka asha kak o anumpa kvollo isht ai a miha hok-mvto, nan il aiahlicha he vlpesa, hvsh achi, na pehlichi lupa hvchia ma! na hvchi palvumma he mak oke.

17. Nan im anukfila iksho, micha lupa aien aien hvchia ho-ka, tvli holisso lakna yak okmá, keyukmv̄t tempel a tvli ho-lisso lakna yvt isht a holitopa kak okmá, nanta hosh i shahli ho?

18. Micha kvna hosh anumpa kvollo a alta yak o isht ai a miha hokvno nana keyu; amba kvna hosh vba pit isht aiokpvchi vt yvmmma pakna onvtonla kak o, nan il aiahlicha he vlpesa, hvsh achi.

19. Nan im anukfila iksho, micha lupa aien aien hvchia ma! vba pit isht aiokpvchi ak okmá, keyukmv̄t alta ya vba pit isht aiokpvchi vt isht a holitopa kak okmá, nanta hosh i shahli ho?

20. Yohmi hoka kvna hosh anumpa kvollo a alta yak o isht ai a miha hokmv̄t, yvmmak ash o, micha nana hosh yvmmma onvtonla ka mominchit anumpa kvollo a isht ai a miha hoke.

21. Micha kvna hosh anumpa kvollo a tempel ak o isht ai a miha hokmv̄t, yvmmak ash o, micha yvmmma ankkaka ai asha aien aien kak o anumpa kvollo a isht ai a miha hoke.

22. Yohmikma kvna hosh anumpa kvollo a vba yak o isht ai a miha hokmv̄t, Chihowa im aiasha, micha yvmmma om bi-nili hatuk ma aieninchit anumpa kvollo a isht ai a miha hoke.

23. Na holissochi vhleha, micha Falisi vhleha, nan ilahobi hvchia ma! na hvchi palvumma he mak oke: mint, mik-mv̄t anise, michä kummin aien aien kvt ont isht pokoli kash osh hvchi kvnia hoka; yohmi mv̄t nan vlpesa kvollo i shahli, nana ai vlpiesa, micha nana i nukhaklo, mikmv̄t na yimmi aien aien hokvno hvsh a haksichishke: ilvppa puta hoka hvchi

yumohma he vlhpesa hatuk, yohmikmvt yummak ash kia hvsh a haksicha he tuk keyu hoke.

24. Na pehlichi lupa ma ! shushi ya hoiyvchit hvsh koh-chi tuk osh, kamel okvno ishit hvsh nanvbl hoke.

25. Na holissochi vhleha, micha Falisi vhleha, nan ilahobi hvchia ma ! na hvchi palvmmma he mak oke : isht-ishko micha ampo aien a ka paknaka yokvno hvsh kashofi hoka ; yohmi kia anukaka yokvto na wehpuli micha nan ik vlhpeso aien a hosh isht alotowa hoke.

26. Falisi lupa chia ma ! isht-ishko ampo aien a ka anukaka yak o tikba ish kashofi ha yo, paknaka yokak heto kash-ofa mak inlashke.

27. Na holissochi vhleha, micha Falisi vhleha, nan ilahobi hvchia ma ! na hvchi palvmmma he mak oke : sepulka toh-bit vlhtaha yak o hvsh chiyuhmi hoka ; yummak okvt paknaka yokvto pisa ka aiokli fehna ho mvhli chatuk ; yohmi kia anukaka yokvto hatak illi foni, micha nan liteha okpulo moma kvt isht alotowa chatuk oke.

28. Yohmi ka hvchishno ak kia paknanli vt vlhpiesa ho hatak a hvsh im ahoba ; yohmi kia anukaka yokvto nan ilahobi, micha nan ik vlhpieso aien a bano hosh ishit hvchi alotowa kut, yummak inli ho hvsh chiyuhmi hoke.

29. Na holissochi vhleha, micha Falisi vhleha, nan ilahobi hvchia ma ! na hvchi palvmmma he mak oke : hopaii vhleha, i sepulka ya hvsh im ikbi mvt, anonti hopoyuksa vhleha ha tok isht ithaiyana he sepulka ya hvsh aioklichi chatuk,

30. Mihmvt, Pin tikba vhleha aiasha nitak ak o il ashwa tok mak osh, hopaii puta im issish hlatvbl ka il ibatakla he tok keyu, hvsh achishke.

31. Yohmi hatuk osh hopaii puta vbi tok vhleha ha in chipota hvchia hatuk vt, hvchishno inli kak osh hvsh il ai atokolishke.

32. Yohmi hokvt hvchin tikba vhleha nan isht im vlhpisa ya hvsh alotolashke.

33. Sinti hvchia, sinti chilita isht unchululi hvchia hvt, katiohmi kak osh aiokpuloka ai ilbvsha he vlhpisa ya hvsh i hlakofa hinla cho ?

34. Yohmi hoka, Yakeh! hopaii vhleha, micha hatak hopoyuksa vhleha, mikmvt na holissochi vhleha aienka pit hvchin tihleli lishke; yohmi ka kanimi ka hvsh ba he, mikmvt, iti-taiyukhvna hvsh a honahliche aienka he; mikmvt kanimi ma hvch_i sinakak puta hvsh a fummikmvt, hvsh ilvushachi kvt tumaha puta ma isht hvsh aya hi oke.

35. Yohmi hokvt hvchishno ak o hopoyuksa puta im issish yakni pakna a hlatahampa tok, hatak hopoyuksa Ebel a im issish a tok ai vhlit mihintit, Sakalias, Balakias ushi, yvymma tempel, micha alta aienka itintakla ya hvsh ai vbi tok im issish ant ai vhli kvt, momvt hvchi onvtula hi oke.

36. Ahli mak o hvchim achi lishke, Ilvappa moyuma kak osh okla himonasi ilvappa asha ka onvtula he mak oke.

37. Chelusalem, Chelusalem, hopaii vhleha vbi, micha auet chi kanchi tuk ma tvli ishit boli chia ma! akaka yosh ushi vhleha ha sinahchi nuta ya pit ai itahobi chatuk mak o, chiyuhmit chim vlla vhleha ha itahombi la he ahni li tuk nana kia, hvchishno ak osh vlhpessa hvch ik aiahno hokvno.

38. Inta! hvchin chuka yvt hvchin chukillissvt taiyaha mak oke.

39. Himak a pillma ma, Hus sa pisa chi keyu; amba, Chitokaka i hohchifo ho mihnti hokvt holitopa mak oke, hvsh acha chi hok mak a hi oke, hvchim achi lishke, im achi tok.

CHAPTA XXIV.

Chisvs vt ishtaiyopi mak o tempel a a kohcha tuk osh, yvmmvt ok-pula he, tikbanli anoli: 3 micha ilap okvt mihintikma, nan isht atokowa kvt yvmohma he, micha na palvmmi kvt ibafoka he miha: 32 mikmvt nana a mihiha kvt ont aiahla hi oka, iti vlhpoba fik achi kvt hishi toba chi hosh bokobli chatuk a nan isht apesvt anumpuli: 42 micha ahah! ahnit im vlhtaha he im apesa.

1. YUMOHMI mvt Chisvs vt kohcha mvt, tempel a issvt kanima ia tok: mihma nan im ai ithvna vhleha hv, tempel vt toba kvt kaniohmi puta ka pisacha chi hosh im ai vla tok.

2. Mihma Chisvs vt, Na yakohmi puta moma ka hvch ik

peso cho ? ahli mak o hvchim achi lishke, Ilvppak oka twli vt achvfon a kia aka ik itolo ke tuk osh, it on twlkanchit itonla kvt iksho ka hi oke, im achi tok.

3. Yvmohmi tuk o yvmmak ash osh nvnih chaha Alif paknaka ya asha ma, nan ithvna vhleha hvt lumvt im ai ona mvt, Nitak kariohmikmak o nana kvt ai yakohma hi o, micha ish minta he, mikmvt yakni vt ont ai vhli aien a chi isht atokowa kuto nanta hi o? ish pim analashke, achi tok.

4. Mihma Chisvs vt afalaminchi mvt, Ahah ! hvsh aiahni na hatak nana kia ik hvchi yoshublecho kashke.

5. L^awa hosh sa hohchifo h^a ishit hohchifo kvt itvnowa cha, Klaist sia hoke, acha hi oka ; mikmvt lauachit yoshublicha he oka.

6. Yohmikma tvnv^p asha, micha tvnv^p asha he annoa aien ka hvsh hakla hi oke : ahah ! hvsh aiahni cha ik hvchi komunto kashke : ilvppa puta kvt moyumvt ont a yvmohmi pulla hi oka : yohmikma hohchvfo chinto, micha ililli puta, mikmvt yakni winakvchi aien a kvt yakni kariohmii ka ai itulvt aya hi oke.

7. Okla achvfa kvt okla mak inli ka it amokvfa he, mikmvt apehlichika achvfa kvt apehlichika mak inli ka it amo-
kvfa hi oka : yohmikma hohchvfo chinto, micha ililli puta, mikmvt yakni winakvchi aien a kvt yakni kariohmii ka ai itulvt aya hi oke.

8. Ilvppa puta kak osh nanukhaklo ai ishtia vmmona mak oke.

9. Yohmikma hvch issikkopa chi ka hvch ishit okla ibbak hvchi fohki, mikmvt hvch illiche hi oke ; micha sa hohchifo pulla hatuk mak o oklushi moyumvt hvchi nukkilla hi oke.

10. Yvmma fokakma ibetvblⁱ kvt laua he, micha ilap bⁱka atuk kia ishit okla h^a im issa, micha ilap bⁱka iti nukkilla hi oke.

11. Mikma hopaii ilahobi vt hiohli kvt laua cha, laua o yoshublicha hi oke.

12. Mikma nan ik ulhpeso bieka hatuk mak o i hullo atuk vt kapvssvt taha kvt laua hi oke.

13. Yohmi kia kvna hosh achunanchit m^{ahay}vt ai vhli ka ona hok mak osh mihi yosh okchaya hi oke.

14. Yohmi ka vba apehlichika isht anumpa hanta ilvpput oklushi moyuma ka isht im ai atokowa he mak osh yakni mominchit ai annoa he: yvmohmi mak o ont ishtaiyopi kvt vla hi oke.

15. Yohmi hoka nan okpvni a i nukkilli vlhpesa ka hopaii Taniel vt isht anumpuli tok a, aholitopaka ya a hikia na hvsh pisa hokma, kvna hosh ilvppa it im anumpuli hokmvt, akostininhashke.

16. Yohmikma kvna hosh Chutea, ya maya tuk mvt, nvnih chaha puta ka pit ik o yihlepá;

17. Aboha pakna yo anta tuk vt akowvt, im aboha ya nana kia ont kohchit ik esho kashke;

18. Mikma osapa anuka yo anta tuk mvt, falamvt im ilefoka ya ont ik esho kashke.

19. Yohmikma nitak yvmma fehna ka kvna hosh vlla i foka hatuk, micha pishechi atuk aien aien hokvto i palvmmma he mak oke.

20. Yohmi kia hvsh yihlepa hi a hvstula yokmá, keyukmvt nitak hullo nitak okmá, ik nano ka hi a vba pit hvsh asihihlashke.

21. Yvmma fehnakma na palvmmi kvt chinto fehna hosh takanla he, yakni vt toba vmmona tok ai vhlt mihintit himak a ai vla ka, yvmma chohmi kvt takali chatuk keyu, mikmvt himmakma nitak nana yvmma chohma he keyu ka hi oke.

22. Yohmi ka nitak yvmma chohmi ka ik falaicho ho keyukma, hatak nana hosh okchaya he keyushke: yohmi kia nan vlhtoka vlheha ak pulla tuk mak o nitak yvmma puta kvt ik falaio ka hi oke.

23. Yvmohmikma hatak nana kia, Yakeh ! ilvppa Klaist vt antvshke, achi ; keyukmvt yvmma antvshke, hvchim achi hoh kia, ik hvchi yimmo kashke.

24. Klaist ilahobi vhleha, micha hopaii ilahobi vhleha aien aien kvt hiohlit nan isht atokowa chinto puta, mikmvt na fehna puta aien ka okla otvnicha he; yvmohmi cha, yvmmvt yohma hinlakma, nan vlhtoka, vhleha fehna atuk kia yoshubliche hi oke.

25. Yakeh! tikbanli hvchim anoli lishke.
26. Yohmi hoka, yakeh! yvmmvt yakni haiaka ya anta hoke, hvchim achi hoh kia, kohchvt hvch ik aiyo kashke: micha, yakeh! vba potvlhpo a lumaka yak o yvmmvt anta hoke, hvchim achi hoh kia, ik hvchi yimmo kashke.
27. Malvtha kvt hvshi akochaka imma yo a kohchakmvt, hvshi aiokvtula ya pit tohwikelichi chatuk oka, Hatak Ushi vt minti kak kia yvmmak inli ho chiyuhma hi oke.
28. Kanim a yo nan illi vt itonla hokma, mihi yo ossi puta mvt ai itahomba hi oke.
29. Na palvmmi nitak yvmmak atuk a in chekosikma, hvshi vt okhlilikma, anonti hvshi ninak aya mvt ik tommo ka he: mikma fochik puta kvt vba ya asht aka fohopakma, nan isht aia^hlika puta vba shutik ash osh faiokahancha hi oke.
30. Yvmmma fokakma, Hatak Ushi a isht atokowa kvt vba ya auet a haiaka hi oke: yohmikma oklushi moma yakni paknaka aiasha kvt yahaya he, mikma Hatak Ushi vt nan isht aia^hlika, micha isht a holitopaka chinto aienka il ai eshi hosh vba hoshonti anukaka ya mihinti na okla pisa hi oke.
31. Atuk ma yvmmak ash osh im enchil vhleha ha isht-pufa ola chinto ieshi ho tihlihinlikma, ilap atokoli tok vhleha ha a mahli ushta shutik ont ai vhlis achvfa ka vhlit iut in tunnvpt pit a fullota ka a hoyot itahohomba hi oke.
32. Yohmi ka fik vpi nan isht vlhpisa ka hvsh ai ithvnashke. Yvmmak okvt hishi toba chi hosh bokoblit tahakma, tofa yvt olanlosi vla ka hvsh ithana chatuk:
33. Yohmi hokvt na yakohmi puta ka hvsh pisakmvt, ai vla hosi, okhissa ak kia ai itukonofa hoka, hvsh ithanashke.
34. Ahli mak o hvchim achi lishke. Himak a okla asha ilvppvt ont ik taho kisha ho, na yakohmi puta kvt ont aia^hla chi hoke.
35. Uba shutik micha yakni aienka kvt ont ai iksho ka he, amba vno um anumpa puta hatuk vto ont ai iksho ka he keyu hoke.
36. Yohmi ka nitak yvmmak a he, micha hvshi kanvulli

vlhpisa a he aieno hokvno, hatak nana hosh, mikmvt enchil puta vba aiasha mak osh pit ithana keyu ho, amba Aki ak bano hoke.

37. Yohmi ka Noah hvt ahanta nitak a kariohmi tok ma, Hatak Ushi vt mihinti kak kia yvmmak inli ho chiyuhma hi oke.

38. Oka falama yvt ik aiyo kisha nitak foka ma, impa micha nan ishko, itauwaya mikmvt itauwaya he im vlhpisa aieno hosh aiasha na Noah hvt peni chukowa he nitak vt ona tok,

39. Yohmi ma ik ithano hosh okla aiasha na oka falama yvt vla cha, mominchit ishit kaiyanchi tok a, Hatak Ushi vt mihinti kak kia yvmmak inli ho chiyuhma hi oke.

40. Yvmmma fokakma tuklo kv̄t osapa ya ashwa tuk ma; achvfa ho ai eshi na achvfa kv̄to anta he.

41. Ohoyo tuklo kv̄t nana a botoli a botoli hosh ashwa tuk ma; achvfa ho ai eshi na achvfa kv̄to anta hi oke.

42. Yohmi hoka hvchishno vt hvchin Chitokaka yvt ai vla he hvshi kanvlli vlhpisa ha hvsh ithana keyu kv̄t, okchut hvsh hoyashke.

43. Yohmi kv̄t hatak chuka-chvfa pehlichi yatuk mvt hvshi kanvlli vlhpisa kariohmi kak o na hukopa yvt aya hinla ka ithana hatuk okmvt, okcha pulla cha, im aboha yatuk mvt tiwa hi a ahna he tuk keyu, ilvppa hvsh ithanashke.

44. Yohmi hoka hvchishno ak kia hvchim vlhtahashke: yvmmak a he hvch ik aiahno hvshi kanvlli vlhpisa takla kia, Hatak Ushi vt vla hi oke.

45. Yohmi ka kv̄ta hak osh tishu aiahli, hopoyuksa achukma aieno tuk o, i shahli hvt ilap in chuka chvfa ya apesvchit ont ai vlhpiesakma ilhpak ipihinta chi ka, atokoli tok oh cho ?

46. Yvmoohmi hosh ahanta ho, i shahli hatuk vt vla cha ant pisa chi ka, tishu yvmmvt na yukpa hi oke.

47. Ahli mak o hvchi miha lishke, Yvmmak atuk ma nana im asha ka moma apesvchi mak o ikba hi oke.

48. Yohmi tuk kia tishu ik vlhpeso yo kv̄to chukvsh

anukaka, A shahli hvt ai vla he tuk vt vbanublichishke, achi ;

49. Yohmi cha tishu bika vhleha hash o bolit ishtia, yohmi mvt ishkot haksi vhleha ha it ibai imptv ibai ishkot ahanta hokmvno ;

50. Tishu yvmmma i shahli hatuk vt, yvmmak ash osh vla chi ik ahno nitak, mikmvt ik akostinincho i hushi kanvlli vlhpisa ho vla hi oke.

51. Yohmikmvt yvmmak ash o chanlit ita hokofi cha, nan ilahobi vhleha isht ai im vlhtoba mak o ibafohkit im apesa he : yvmmak oka yahaya micha noti ahampa aien ahe mak oke.

C H A P T A X X V.

Chisvs vt nitak ishtaiyopi vla hi oka isht anumpuli : yohmi kvt, ohoyo himita hatak haleli keyu pokoli, 1 : 14 micha talent aien ka nan isht apesvt anumpuli. 31 Chisvs vt vla cha nana apesa hi okvt isht anumpuli.

1. YUMMA fokakma vba apehlichika yvt ohoyo himithoa hatak ik halelo pokoli hosh pvla sholit, hatak himona itauwaya chi ka afamvt ilhkoli tok o chohma he.

2. Mihmvt tahlapi hosh hopoyuksa yokma, anonti tahlapi kvt ik hopoyukso ya tok.

3. Ik hopoyukso vhleha hatuk ash osh pvla ha okla ishi kia, bila yano okla ik esho ki tok.

4. Amba hopoyuksa hatuk okvto bila yvt aivilhto a abeha ho pvla ha aieninchit okla ishi tok.

5. Hatak himona ohoyo itauwaya chin tuk ash osh ile sylahachit anta na nosilhhvt taha cha, okla nusi tok.

6. Atuk o ninak ont iklennna ma tahpahanla kvt, Inta ! hatak himona ohoyo itauwaya chin tuk ash osh mintishke, irt ont oh afamá, achi tok.

7. Yohmi ma ohoyo himithoa yvmmak ash osh momvt tanit i pvla ha okla aiiskiachi tok.

8. Mihma ik hopoyukso vhleha hash osh hopoyuksa

vhleha hash o, Pim prla hrt mosholi hoka, hvchi bila ya hvsh pipetashke, im achi tok.

9. Yohmi kia hopoyuksa vhleha ash osh afalaminchi mvt, Yohma he keyu; yvmmak keyukma, pishno micha hvchishno aieno ka hvpim ona he keyu hoka: amba iwt kanchi vhleha hak o ont hvsh in chumpa he, hvsh ahna he vlhpesvshke, achi tok.

10. Atuk o chumpvt ilhkoli takla ma, hatak himona itauwaya chin tuk ash osh vla tok; mihma im vlhtaha tuk vhleha hash osh apihvt ai itauwaya ya pit abeha na okhissa yvt vlhkuma tok.

11. I himmak o anonti ohoyo himithoa kashapa kash osh ai vla mvt, Chitokaka ma! Chitokaka ma! ish pin tiwashke, achi tok.

12. Yohmi kia yvmmak ash osh afalaminchi mvt, Ahli mak o hvchim achi lishke, Hvch ithanali keyushke, achi tok.

13. Yohmi ka Hatak Ushi vt ai vla he nitak, mikmvt hvshi kanvlli vlhpisa aieno hoka pit hvsh ithana keyu hokvt, okchvt hvsh hoyashke.

14. Uba apehlichika yvt, hatak osh yakni hopaki nowvt aya chi hosh in tishu vhleha ha itahobi cha, nana im asha tuk vt ibbak fohki tok o chohmi hoka.

15. Mihmvt achvfa ho talent tahlapi ho ima mvt, anonti achvfa ka tuklo ho ima, anonti achvfa ka achvfa ho ima tok; hatak vt kanimihcha hinla aiyuka ka ai vlhtokowa mak o ima tok; micha mihi mak inli ho nowvt aya tok.

16. Yohmi ma talent tahlapi ishi tuk ash osh ia mvt, yvmmak ash o isht itatobut, anonti talent tahlapi mak inli ka isht ikbi tok.

17. Mihma tuklo ho ishi tuk ash kia, yvmmak ash inli ho chohmit tuklo mak inli ka isht ahayuchi tok.

18. Amba achvfa ho ishi tuk okvto ia mvt, yakni o ont kulli cha, i shahli in tvli holisso atuk ash luhmi tok.

19. Atuk o hopakit taiyaha ma tishu vhleha yvmma i shahli hash osh vla cha, yvmmak ash i hotinvt pisa tok.

20. Yohmi ma talent tahlapi ishi tuk ash osh, anonti

talent tahlapi mak inli ka aieninchit isht vla mvt, Chitokaka ma ! yakeh ! talent tahlapi ho is svma tok : yummak atuk a talent tahlapi mak inli ka isht ahayuchi li tuk oke, achi tok.

21. I shahli hash osh, Ulhpiesvshke, tishu aiahli achukma chia ma ! nana kanomosi ka aiahli chi achukma hoka, nana lawa pehlichi a chikbi la chi hoke : chi shahli nan isht im ilaiyukpa ya ish chukowashke, im achi tok.

22. Mihma talent tuklo ho ishi tuk ash kia vla mvt, Chitokaka ma ! yakeh ! talent tuklo ho is svma tok : yummak atuk a talent tuklo mak inli ka isht ahayuchi li tuk oke, achi tok.

23. I shahli hash osh, Ulhpiesvshke, tishu aiahli achukma chia ma ! nana kanomosi ka aiahli chia achukma hoka, nana lawa pehlichi a chikbi la chi hoke : chi shahli nan isht im ilaiyukpa ya ish chukowashke, im achi tok.

24. Yohmi ma talent achvfa ho ishi tuk ash osh vla mvt, Chitokaka ma ! hatak palvmmi chia chatuk ; chishno ak osh ish hokchi keyu kia, ish ai vmo chatuk ; mikmvt chishno ak osh ish mvshlichi tuk keyu kia, ish pehli chatuk oke, chithanali tuk :

25. Yohmi hatuk osh sa nukshopa cha, irt chin talent a yakni anuka yo luhmi li tuk oke : yakeh ! chimmi hatuk vt yak chin tonlvshke, achi tok.

26. Mihma i shahli hash osh afalaminchi mvt, Tishu haksi nan intakobi chia hvt, vno ak osh hokchi li tuk keyu kia ai vmo likmvt, anonti vno ak osh a mvshlichi li tuk keyu kia, a pehli li chatuk a, ish ithana ;

27. Yohmi hokvt an tvli holisso a tvli holisso abohli ya ont ish bohla he tuk : yohmi tuk ma minti li kvt vmmi atuk micha ushi atuk a aieninchit ishi la hi atuk oke.

28. Yohmi hoka talent a oh im ai eshi cha, talent pokoli ishi kak o oh imá.

29. Kuna hosh ishi hok mak o ima na lauvt im aiasha hi oka : amba ik im iksho hatuk okvno ishi tuk ash kia, im ai isha he oke.

30. Mikmvt tishu ik ahobo yokvno kocha aiokhlilika mak

o pit hush kanchashke: yummak oka yahaya micha noti ahampa aienā mak a hi oke, im achi tok.

31. Hatak Ushi vt, enchil vhleha moma kvt apilha ho, ilap isht aholitopaka il ai ishit vla he, yohmikmv̄t im ai om binili holitopa yatuk ma om binila he oke.

32. Yohmikma itikba ya oklushi moma kvt ai itahoba he: yohmikma yummak ash osh yummma achafolichit iti filamohlichi kvt, chukfv̄lhpb̄a apesv̄chi vt chukfv̄lhpb̄a ya isi kosoma iti filamohlichi chatuk mak o chiyuhma he.

33. Mikmv̄t chukfv̄lhpb̄a ya im ibbak isht-impak imma yak o ashachikmv̄t, amba isi kosoma yokvno vlhfvbekimma yo ashacha he.

34. Yohmikmv̄t Miko ash osh im ibbak isht-impak-imma asha kash o, Aki i holitopa huchia ma! ho minti, vba apehlichika yakni vt ik tobo k̄isha mak o huchim vlhtaha tok vt hush ai ahantashke.

35. Vno vt sa hohchvfo ma, ilhpak a hvs svpetā tok: sa tukshila ma, nana ho hvs svshkochechi tok: hatak ik ithano sia hatuk a, aboha ya ik chukowa, hvs sv̄m aiahni tok:

36. Sa nipi bano ma, nana hvs sa fohkichi tok: si abeka ma, ant hvs sa pesa tok: vno vt aboha kullo fōka li ma, ant hvs sa nowa tok okvt, im acha he.

37. Yohmikma hopoyuksa vhleha hash osh im afalamin-chi kvt, Chitokaka ma! katiohmi kash o chishno vt chi hohchvfo tuk a, e chi pisa cha nana e chipeta tok o? micha chi tukshila tuk a, nana e chishkochechi tok o?

38. Katiohmi kash o hatak ik ithano chia hatuk a e chi pisa cha, aboha ya ik chukowa, e chim aiahni tok o? mihmvt chi nipi bano tuk a, nana e chi fohkichi tok o?

39. Micha katiohmi kash o chi abeka, mihmvt aboha kullo ish fōka aienā tuk a, e chi pisa cha, a chi nowa tok oh cho? acha he.

40. Mikma Miko vt afalaminchikmv̄t Ahli mak o huchi miha lishke, Itibapishi li vhleha yakohmi ka moma ik lauwō achufona ka kaniohmi ho hush ai i yvmohmi tuk okvt, vno ak o hvs sa yvmohmi mak atuk oke, im acha hi oke.

41. Yohmikmv̄t ibbak vlhfvbekimma qsha tuk ash kia,

Issikkopa he vlpesa huchia hvt, a filummit luak ataha iksho, Setan micha imi shilombish okpulo vhleha aien a im vltaha tok mak o, hvsh ilhkolashe.

42. Uno vt sa hohchvfo ma, ilhpak nana kia hvch ik sapeto ki tok: sa tukshila ma, nana kia hvch ik svshkochecho ki tok: hatak ik ithano sia hatuk a, aboha ya ik chukowa hvch ik svm ahno tok: si abeka, micha aboha kullo fo_ka li aien a ma, ant hvch ik sa nowo ki tok okvt, im acha he.

44. Yohmikma yummak ash kia afalaminchi kv_t, Chitokaka ma! katiohmi kash o chi hochaiyafo, mihmvt chi tukshila, micha hatak ik ithano chia, mihmvt chi nipi bano, chi abeka, mihmvt aboha kullo ish fo_ka aien ka e chi pisa cha ke chi apelacho ke tuk oh cho? acha hi oke.

45. Yohmikma yummak ash osh afalaminchikmv_t, Ahli mak o hvch_i miha lishke, Yakohmi ka moma ik lauwo achvpona kia kaniohmi ka a hvch ik i yvmihcho tok mv_t, vno ak o hvch ik sa yvmihcho tok mak oke, acha hi oke.

46. Yohmikma yakohmi kash osh ai issikkopa bilia mak o pit ilhkola he, amba hopoyuksa yokvto aiokchayvt bilia yo ia hi oke.

CHAPTA XXVI.

Na pehlichi vhleha hvt it afama cha, Chisvs a vba chi kv_t isht anumpuli, 1. 6 Ohoyo hosh nan-ahama ya Chisvs noshkobo isht im a hvmmi. 14 Chutas Iskaliot vt Chisvs a tvli hvta pokoli tuchina ho ishit kanchi. 17 Chisvs vt nan im ai ithvna vhleha ha nan vban-vblit ontia it ibai impa; 26 mihmvt opika na holitopa impa isht vlpisa ka apesa, 30 mihmvt kohchvt nvnih chaha Alif a ona; mihmvt Pita yvt ik ithano miha chi ka tikbanlit anoli. 36 Chisvs vt Ketsemane osapushi ont chukowa cha, vba pit anumpuli. Chutas Iskaliot vt hatak na-halupa sholi bieka ho pehlichi cha, Chisvs a ont ishi. 57 Okla hvt Chisvs a ishi mvt na holitompa isht asha pehlichi in chuka holitompa isht ona mv_t, okla hash osh kalakshichit on tuftua. 69 Pita yvt in Chitokaka ya ik ithano il ahobi: yohmit ashvchi tok vt nukhaklo.

1. ATUK o yakohmi tok; Chisvs vt anumpa ilvppa moma ka ahanchit ont in taiyaha mv_t, nan im ai ithvna vhleha hash o,

2. Nitak tuklokma vbanvblit-ontia impa hvt asha chi, mikma Hatak Ushi vt iti-taiyukhvna ahonvhvt illa chⁱ mak o, ishit okla ibbak fohka chⁱ ka hvsh ithaiyanvshke, im achi tok.

3. Yvmmma foka ma na holitompa isht asha pehlichi vhleha, mikmv^t na holissochi vhleha, mikmv^t okla ha i hochitoka vhleha aien^a kvt na holitompa isht asha pehlichi Kaiafas hohchifo ho im aboha holitopa ya ai itvnaha tok.

4. Mihmvt haksichi hosh Chisvs a okla ishi cha, vba hinla kvt it im anumpulit maya tok.

5. Yohmi kia, Impa chito asha nitak ak o keyu ho, yvmmak keyukma okla hvt i sanali fehna hinla yoba ká achi tok.

6. Atuk o Chisvs vt Betani a Saimon leplosi vbi a tok in chuka ya asha ma,

7. Ohoyo pash-ahama holitompa fehna alabasta itombu shi achufa ho ishi kvt im ona mv^t, impa hosh asha ma, noshkobo a ont o fojobli tok.

8. Yohmi kia nan im ai ithvna vhleha hash osh pisa kvt, okla ik im vlhpeso fehna mv^t, Katiohmi mak o ilvpp^t yakohmit okpulo cho ?

9. Pash-ahama ilvpp^t lawa kia isht vlhtoba cha, ilvusha vhleha ha i holhpela hinla tuk oka, achi tok.

10. Chisvs vt akostininchi mv^t, Nanta katiohmi ho ohoyo ha hvsh ataklvmmichi cho ? ilvppak okvt nan achukma mak o isht v^m ai yvmilhchi hoka.

11. Ilvusha yokvto hvchim asha bilia cha tuk : amba vno yokvto hvch ibatakla li bilia keyushke.

12. Pash-ahama ilvppa sa haknip a o fojobli hokvt, sa hollopa chⁱ kak o v^m atahli hosh yvmilhchi hatuk oke.

13. Ahli mak o hvchⁱ miha lishke, Yakni moma ka kanima fehna yo vbanumpa ilvpp^t isht ai anuhumpakma, nana ka ohoyo ilvpp^t yakohmichi tuk a yvmmak ash o isht ithaiyana hi a, anohowa hi oke, im achi tok.

14. Yvmmma foka ma auah tuklo tuk ash achvfut Chutas Iskaliot hohchifo hosh ivt na holitompa isht asha pehlichi vhleha hash o im ona tok.

15. Mihmvt, Yvmmak oka ishit hvchim issa la chī ka nanta hō hvs svma hinla cho ? yvmmak ash o im achi tok. Mihma tvli hvta boshulli pokoli tuchina hi o okla i kahli tok.

16. Yohmi ma nitak yvmma ai vhlit mahaya ka yvmmak ash o kaniohmichit ishit im issa he akostininchia bahana tok.

17. Yohmi tuk o pvska ik shatvmmo vpa nitak vmmona hō nan ithvna vhleha hvt Chisus a im ai ona mvt, Ubavblit-ont ia ish impa chī ka, katima yak o ont e chim ai atahla hi a ish ahni cho ? im achi tok.

18. Mihma yvmmak ash osh, Ivt tvmaha hā hvsh onak mvt, hatak yvmmak o hvsh im ona cha, Nan ithvnanchi vt, Nitak vt vm ai ona hosishke : chin chuka ak o nan vm ai ithvna vhleha hā pehlichit vbanvblit-ontia ya a holitobli la chī hoke, achi kano, hvsh im achashke, achi tok.

19. Yohmi ma nan ithvna vhleha hash osh, Chisus vt ai im atokoli tuk mak o yvmoymi tok ; micha vbanvblit-ontia ya okla atahli tok.

20. Yohmi ma ont opivt taha ma, auah tuklo kash o pehlichi cha impa chī hosh binili tok.

21. Atuk osh okla impvt maya ma, Ahli mak o hvchi miha lishke, Hvsh achvfonat vkt svshit okla hā hvsh im issa chī hoke, achi tok.

22. Mihma okla nukhaklo fehna mvt, achvfaiyukvt momvt, Chitokaka ma ! vno ak oh cho ? im achi tok.

23. Mihma yvmmak ash osh afalaminchi mvt, Kvna hosh ampo a ibbak a pit svb ai okvchikmvt, mihi yosh svshit okla hā im issa chī mak oke.

24. Kaniohmmit isht holihiso tok mak o Hatak Ushi vt a yvmoymi hoke : amba Hatak Ushi a ishit inla ya im issa hatak okvto i palvmma chī mak oke ; hatak yvmmak okvt ik tobo tok okmak osh im achukma hi atuk oke achi tok.

25. Yohmi ma ishit inla ya im issa Chutas ash osh afalaminchi mvt, A shali ma ! vno ak oh cho ? achi ma, Ahli, ish mihvshke, achi tok.

26. Mihmvt okla impa hosh maya ma, Chisus vt pvska ya ishi cha, vba pit aiokpvchi mvt, tushahlichi cha, nan ithvna

vhleha hash o pit ima mvt, Ilvpput sa haknip mak oke ; ishit oh vpá, achi tok.

27. Mihmvt isht-ishko ya ishi cha vba pit aiokpuchi mvt, yummak ash o pit ima mvt, Hvsh moma kvt hvsh ishkashke.

28. Ilvppak okvt svssish nan isht vlhpisa himona, laua kvt nan ai ashvchika puta isht i kashofa he mak o, hlatapa hatuk oka.

29. Yohmi kia himak a pilla ma pakvpi vnit waya ilvppa ak ishko mak atuk osh limonvchit Aki apehlichika ya a hvch ibai ishko la he nitak mak a hi oke, hvchim achi lishke, achi tok.

30. Mihma vba isht taloa ya okla talort issa mvt, okla kohchvt nvnih Alif a pit ilhkoli tok.

31. Yohmi ma Chisvs vt yummak ash o, Himak ninak a vno ak atuk mak o hvsh moma kvt hvch ibetvbla chi hoke. Chukfvlpoba apesvchi a issot kanchi likma, chukfvlpoba atuk vt itafimimpvt aya he, achi hosh holisso hatuk oka.

32. Yohmi kia falamvt tani li ha yokvto, hvchi tikba Kallili a ona la chi, im achi tok.

33. Pita yvt afalaminchi mvt, Moma kvt chishno ak atuk mak o isht ai ibetvblia kia, vno yokvto nitak nana si a ibetvbla he keyushke, im achi tok.

34. Mihma Chisvs vt, Ahli mak o chi miha lishke, Himak ninak a akaka yvt ik olo kisha ho, hituchina ha chik svthano ka ish miha chi hoke, im achi tok.

35. Pita yash osh, Chi awant svlla chi ik nana kia, ak chithano miha la he keyushke, im achi tok. Mihma nan ithvna vhleha hvt momvt yummak inli ho miha tok.

36. Yumma foka ma Chisvs vt yummak ash o pehlichi cha, yakni Ketsemane hohchifo ho ona mvt, nan im ai ithvna vhleha hash o, yumma iwt ont vba pit anumpvli li takla ka, ilvppak inli ho hvsh chiyashke, im achi tok.

37. Mihmvt Pita, micha Sebete ushi tuklo aieno kvno pehlichi cha ia tok ; mihmvt nukháklo fehnvt i wekit kunia tok.

38. Yohmi mvt yummak ash o, Sa shilombish vt nukhák

lo fehna, illa he ak kia chiyuhmishke : ilvppak inli ho chiyut hvs svb ai okhashke, im achi tok.

39. Mihmvt achakalit iwt misha ituma ona mvt, hlipiwt itula cha, vba pit anumpuli mvt, Aki ma ! yohma hinla yoba hokma, isht-ishko ilvpput a kanvllashke : yohmi kia vno ak osh ahni li kak keyu, amba chishno ish ahni kak ashke.

40. Mihmvt mintit nan ithvna aiasha kash o vla mvt, nusi hosh maya na ant pisa cha, Pita yash o, Hvs svb ai okcha na hvshi kanvlli achufa ka ona hinla keyu mak oh cho ?

41. Okchvt vba pit hvsh anumpohonli cha, ayoshuba ya hvch ik iba chukowo kashke : shilombish okvto im vlhtaha ho mvhli, amba nipi ak osh tikambishke, im achi tok.

42. Anonti atukla ma ia cha, ont vba pit anumpuli mvt, Aki ma ! isht-ishko ilvppa ai ishko li ha yo keyukma, a kanvlla he keyu hokma, chishno nana ish aiahni ka yumomashke, achi tok.

43. Micha vla mvt, anonti nusi hosh maya na ant pisa tok : nishkin ak osh weki hatuk okvt.

44. Mihma anonti issvt ia mvt, ont atuchina ma vba pit anumpuli kvt, anumpa yummak ash inli ho miha tok.

45. Yohmi mvt nan im ai ithvna aiasha kash o vla mvt, Himmak mak o maya nusit hvsh fohashke ; inta ! hvshi kanvlli vlhpisa hvt ai ona mak oke ; yohmi ka Hatak Ushi a haksichit nan ashvchi vhleha ibbak sa fohka chi mak oke.

46. Ho taní, kiloh ilhkolí, yakeh ! sa haksichit okla ibbak sa fohka chi hokvt olanlosi vlvshke, im achi tok.

47. Mihma anumpohonli moma ho, auah tuklo atuk achufa Chutas vt na holitompa isht asha pehlichi vhleha micha okla i hochitoka vhleha aieno im anumpa ho okla chinto bvshpo falaia puta, mikmvt iti tvptua aieno sholi ho, pehlichi cha vla tok.

48. Yohmi kvt haksichit okla ibbak fohka chi, yummak okvt isht akostimincha hi a im anoli kvt, Kvna ho ont i suksowa likma, yummak osh mih mak a chi hoke ; kvlochit hvsh ishashke, achi tok.

49. Mihmvt yummak ash osh Chisvs a im ona mvt, A shahli ma ! na chi yukpashke, achi mvt, i suksowa tok.

50. Mihma Chisvs vt, A kana hvt katiohmi ho ish la cho ? im achi tok. Yohmi ma okla ai onvt Chisvs ash o iti hoklit ishi tok.

51. Yohmi ma Chisvs a apehvut aya tuk vt achvfa hosh ibbak atuk ma i.bvshpo falaia ya pit ishit shufi mvt, na holitompa isht asha pehlichi in tishu ho isht fahamvt, haksobish a chanlit tvbli tok.

52. Yvmma foka ma Chisvs ash osh, Chim bvshpo falaia a falaminchit afohka ya pit ish fohkashke : kvna hosh bvshpo falaia yo ishi hokvto, bvshpo falaia yo isht illa he bano hoka.

53. Himonasi ak kia Aki a pit im asilhha li hok ma, ashalika enchil vhleha lechvn auah tuklo atampa ka auet vma hinla ka ik chim ahobo cho ?

54. Yohmi hokma katiohmi hosh yakohma hi a tok vt Baibil vt ont aiahla hinla cho ? im achi tok.

55. Chisvs vt hvshi kanvlli vlpisa yvmmak inli ho okla laua yash o, Hatak hukopa yo ayvt i kohcha ho chiyuhmit bvshpo falaia, mikmvt iti tvptua aien a sholi hosh hvs svsha chi kvt hvsh itvnawa cho ? tempel anukaka ya nana ai ithvnanchit nitak moma hvch itintäkla binili li ka iti hoklit hvch ik sasho chatuk oke, im achi tok.

56. Yohmi kia hopaii vhleha hvt holissohonchi tok a ont aiahla chi mak o, ilvppa moma kvt yakohmi tok. Yohmi ma nan ithvna vhleha hatuk vt momvt yvmmak ash o issvt yihlepa tok.

57. Yohmi ma Chisvs a iti hoklit ishi tuk vhleha hash osh yvmmak ash o ilauelit ivt na holitompa isht asha pehlichi i shahli Kaifas a isht im ona tok ; yvmmak o na holissochi vhleha, mikmvt hochitoka vhleha aien a kvt ai itvnahvt maya hatuk oka.

58. Yohmi ma Pita yvt auet i mishemanchit pit iakaiyvt yahayvt na holitompa isht asha pehlichi i shahli im aboha holitopa hatuk ma ont chukowvt, ont ishtaiyopi ka pisa chi hosh tishu vhleha ha täkla ont binili tok.

59. Mihma na holitompa isht asha pehlichi vhleha, micha hochitoka vhleha, mikmvt nan-apesa moyuma kvt Chisvs a

vba chi kvt, anumpa ik ahlo isht atokola hi a hoyot aiasha tok.

60. Yohmi kia ik ahayucho tok. Anumpa ik ahlo isht atokoli hokvto lauvt ai ahanla mvhli kia, ai vlpesa hi a ik ahayucho tok. Ont ishtaiyopi ma anumpa ik ahlo isht atokoli vt tuklo hosh vla tok;

61. Mihmvt, Ilvppvt Chihowa in tempel a okpuni li tuk mvt, anonti nitak tuchinakma ikbit tahli la hinla hoka, achi kvno, achi tok.

62. Yohmi ma na holitompa isht asha pehlichi i shahli vt wakaya mvt, afalaminchit, Afalaminehit nana kia chik acho cho ? nanta mak o yakohmit isht chi atokoli cho ? im achi tok.

63. Yohmi kia Chisus vt nana ik acho ki tok. Mihma na holitompa isht asha pehlichi i shahli vt anumpuli mvt, Chishno ak osh Klaist Chihowa Ushi chia hatuk okmvt, keyukma nana hatuk okmvt, ish pim anola he mak o Chihowa okchaya pulla ka isht a chim apesa lishke, im achi tok.

64. Mihma Chisus vt, Ulhpesa ish mihuhske : yohmi kia, Himak a pilla ma Hatak Ushi vt nan oklaha im aiya im ibbak-ishtimpakimma ya binili, micha vba hoshonti anukaka minti aien aien ho hush pisa hi oke, huchim achi lishke, im achi tok.

65. Yohmi ma na holitompa isht asha pehlichi i shahli ash osh im ilefoka, im anchi aieninchit ita hlilvffi mvt, Chihowa ik ahobalot anumpa ha anumpulishke; himmakma nan-isht ai atokowa katiohmi ho iloh ahna hinla cho ? inta ! himak okvno Chihowa ik ahobalot anumpuli ka hvchishno vt hush hakloshke.

66. Katiohmi hvchim anukfila cho ? achi ma, okla afalaminchi mvt, Illa he ak o vlpesa hoke, achi tok.

67. Yohmi ma nashuka ya on tuftua ma, ibbak a bonulit isht isso tok, kanimi kvt ibbak a isht pasalichi mvt,

68. Klaist chia ma ! kvna hosh chisso hokma, akostininchit pin anoli, achi tok.

69. Yohmi ma Pita yvt aboha holitompa kocha ya asha

tok : mihma ohoyo himita yosh yummak ash o vla mvt, Chishno ak kia Chisus Kalili vtta ya awant ish aya kamo, achi tok.

70. Yohmi kia moma itikba yatuk ma ik ithano ilahobit, Nana ish miha hoka, ak akostininchoshke, achi tok.

71. Micha kohchvt iwt apishia ona ma, ohoyo himita inla yosh pisa mvt, yumm maya kash o, Ilvppak kia Chisus Nasaleet vtta ya awant aya kamo, im achi tok.

72. Mihma anonti anumpa kullo isht il onochit ik ithano ilahobit, Hatak yumm ma li keyushke, achi tok.

73. Atuk o in chekosi ma bilikasi hiohm yaya tuk ash osh ai vla mvt, Pita yash o, Chishno ak kia okla yumm ma ish ib ai achufa yatuk o pullvshke ; chim anumpa hut chi otnichi hoka, im achi tok.

74. Yohmi ma yummak ash osh, Hatak yumm ma ithana li keyushke, achit ik ahobalot anumpulit anumpa kullo isht il onochit ishtia tok. Mihma chekosi mak inli ho akaka yvt ola tok.

75. Yohmi ma Pita yash osh, Akaka yvt ik olo kisha ho, hituchina ha chik suthano ish miha chi hoke, im achi tok, Chisus im anumpa hash pit ithaiyana tok. Mihmvt kocha ia cha, yahaya fehna tok oke.

C H A P T A XXVII.

Na holitompa isht asha pehlich vleha hash osh Chisus a Pailat Loman i miko ak o isht im ona, 1 ; 3 mihma Chutas Iskaliot vt ile nuksitel. 19 Pailat tekchi vt Chisus a nana ik kanimihcho hok bano im ahni ; yohmi kia na holitompa isht asha vleha hvt nan ahni kak o vlpesa im ahni cha, 26 Balabas ak o peh i hotofi mvt, Chisus vto illa chi mak o miha. 27 Loman tushka chipota vleha vt Chisus a ishi cha, kvti halupa yo noshkobo ha isht iachukolichi. 32 Tushka chipota yvt Chisus a ishit Kalkohla ona cha, im ilefoka yash na shoeli isht apesvt im ishi mvt, Chisus ash iti-taiyukhvna ahonvhlichima ; 50 Chisus vt chitoli fehnvt tahprvla mvt, illit kvnia, illi ma na fehna kvt ai yvmohmi. 57 Chosef Alimahlea vtta yak osh, Chisus vt iti-taiyukhvna takali tuk a ishit akvchi, micha hatak illi ai asha himona ilap immi ak inli ho fohkit bohli.

62 Na holitompa isht asha pehlichi vhleha hak osh asihihla ma,
Pailat vt tvshka chipota ya atoinchi na Chisvs ahollopi a atoni.

1. ONT onnvt taha ma na holitompa isht asha pehlichi
vhleha hvt moma, micha okla i hochitoka vhleha aiena kvt
Chisvs a vba chi kvt isht it im anumpulit maya tok.

2. Micha yvmmak ash o okla takchi mvt, ilauelit isht ivt,
nahullo miko Pantivs Pailat ibbak a ont fohki tok.

3. Yvmma foka ma yvmma ishit okla ha im issa tuk Chutas
ash osh yvmma illi issa na pisa mvt, inlv im anukfila cha,
tvli hvta boshulli pokoli tuchina kash o falaminchit na holitompa
isht asha pehlichi vhleha micha hochitoka vhleha
aiena ka isht om ona mvt,

4. Nan ashvchi keyu issish o ishit okla ha im issa li ho-
kut ashvchi lishke, achi tok. Mihma, Yvmmvt nanta isht pi
ahalaia cho ? yvmmak okvno chishno ak inli hosh ish pisash-
ke, achi tok.

5. Mihma tvli hvta boshulli a tempel anukaka ya pit fo-
holi cha, kocha ia mvt, ont ile nuksiteli tok.

6. Yohmi ma na holitompa isht asha pehlichi vhleha hash
osh tvli hvta boshulli ash ishi mvt, Tvli holisso ai itahoba
holitopa ya pit fohka he vlhpesa keyu, issish o isht vlhtoba
hatuk oka, achi tok.

7. Yohmi mvt okla isht im anumpulit maya cha, oklushi
inla hatak puta ka a hollopa hi vt shuti-tvna im osapa yo
isht chumpha tok.

8. Yvmohmi hatuk o osapa yvmmvt, Osapa issish hoh-
chifo tok vt himak nitak a moyuma hoke.

9. Yvmohmi ma hopaii Chelemaias vt anumpuli mvt, Is-
rael ushi vhleha hvt ai vlhtoba he okla apesa tok mak o ai
vlhtoba he vlhpesa tuk vlhtoba tvli hvta boshulli pokoli tu-
china ka okla ishi tok.

10. Micha Chitokaka yvt um apesa tok mak o, shuti-tvna
atuk im osapa yo isht atobbi tok ; achi tok a ont aiahli tok.

11. Mihma Chisvs vt nahullo miko itikba ya hikia tok ;
mihma nahullo miko vt yvmmak ash o i ponaklot, Chish-
no ak osh Chu okla ha i miko chia mak oh cho ? achi

tok. Mihma Chisus vt, Ulhpesa ho ish mihvshke, im achi tok.

12. Atuk o na holitompa isht asha pehlichi vhleha, mik-mvt hochitoka vhleha aienā kvt nan isht mihachi ka, nanasi kia ilapvt afalaminchit ik miho ki tok.

13. Yohmi ma Pailat ash osh, Nana lawa ka isht a chi atokoli ka chik haklo ho tuma? im achi tok.

14. Yohmi ma yvmmak ash osh anumpa achufa kia ik im afalamincho ki tok; yohmi hatuk o nahullo miko ash osh nukhlakancha fehna tok.

15. Micha vbanvblit ontia impa ashakma, kvna ho okla ahnikma, nahullo miko vt yukvt talakchi atuk a okla ha imi hotofi chatuk a tok.

16. Atuk o yvmmma fehna ma annohwā fehna chatuk yukvt talakchit Balabas hohchifo hosh okla ha im anta tok.

17, 18. Yohmi hatuk o Pailat ash osh yvmmma okla isht ik i yukpo kak osh ishit okla ha im issa hatuk a, ithana hatuk osh, okla itvnahvt taiyaha ma, Kuta mak o hvchim̄ hotofi la he a hvsh aiahni cho? Balabas ak okmá, keyukmut, Chisus osh Klaist hohchifo kak okmá, katimampo kak a chi cho? im achi tok.

19. Mihmvt nan-apesa aiasha ya ont binili ma, tekchi vt pit im anolit, Yvmmak atuk mak o himak nitak a si holhpokunvt nana isht ik sv̄m ai achukmo kvt an laua hatuk oka, hatak ahli achukma yvmmma nana chik kanikhcho kashke, achi tok.

20. Yohmi kia na holitompa isht asha pehlichi vhleha, micha hochitoka vhleha aienā hokvto Balabas ak o okla asilhha cha, Chisus ak o vba chi ka, okla laua ya atohnochi tok.

21. Nahullo miko ash osh afalaminchi mvt, Tuklo ka katimampo hvchim i hotofi la hi a hvsh aiahni cho? im achi ma, Balabas ak o, okla achi tok.

22. Pailat ash osh, Yohmikmvt Chisus osh Klaist hohchifo kvno, nanta hak o katimihchi la hinla cho? im achi ma, Iti-taiyukhvna yak o ahonvhlt illashke, momvt okla achi tok.

23. Mihma nahullo miko ash osh, Katiohmi ho? nan okpulo nanta mak o yvmoohmi tuk oh cho? achi tok, Yohmi

kia i shahlichit tahpulvt, Iti-taiyukhvna yak o ahonvhlt illashke, okla achi tok.

24. Pailat ash osh ilapvt na kanihma he keyu, amba yahapa kak osh i shahlit toba pulla hi a akostininch mvt, oka kapussa ya ishi cha, okla itikba ya ibbak ai achifa mvt, Hatak ahli achukma ilvppa im issish a isht si ahalaia keyu mak oke: hvchishno ak osh isht hvsh ashashke, im achi tok.

25. Yohmi ma okla momvt afalaminchi mvt, Im issish vt pishno, micha pim vlla aienakak o onvtonlashke, im achi tok.

26. Yohmi ma yummak ash osh Balabas ak o okla ha imi hotofi tok: micha Chisvs ash o fummit issa mvt, iti-taiyukhvna ahonvhla chi mak o im issa tok.

27. Yummak foka ma nahullo miko in tvshka chipota vhleha hash osh Chisvs a ishtivt nana ai apesa yo isht ona mvt, tvshka chipota vhleha ha mominchit ont im itvnahli tok.

28. Mihmvt nafohka ya i shoeli cha tvshka chipota pehlich i nafohka humma yo ishit fohkvcchichi tok.

29. Micha kvti iachuka ho o okla tvnvt tahli mvt, noshkobo ha o iachukolichi cha, anonti ibbak isht impakimma ya kushak o pit fohki tok: mihmvt itikba ya okla i hvchukbihlepa cha, isht yopulvt, Chu okla i miko ma! na chi yuskashke, achi tok.

30. Mihmvt yummak ash o okla on tuftua, micha kushak ash ishi cha, noshkobo ha o isht boli aienakak tok.

31. Mihmvt yummak ash o okla ishit yopulvt issa mvt, tvshka chipota i nafohka humma yash o i shufi cha, ilap i nafohka yash inli ho o fohkvcchichi mvt, iti-taiyukhvna ahonvhicha chi hosh ilaelit ishtia tok.

32. Atuk osh okla ont kocha wiha fehna mvt, Saineni hatak Saimon hohchifo ho o okla pisa tok: mihmvt im iti-taiyukhvna ya yummak osh shola he a okla atohnochi tok.

33. Atuk osh yakni Kalkohla hohchifo yummvt, Noshkobo foni aiasha, achi mak o ona ma,

34. Yummak ash o ishka chi ka wineka yosh basunlvsh okchi yvt ibvlhto ho o ipeta tok: mihma yummak ash o ishkot pisa mvt, ishka he keyu ki tok.

35. Mihma yummak ash o iti-taiyukhvna okla ahonvhli-chi mvt, na shoeli o im ilefoka yatuk ash isht iti hopela tok; hopaii vt, anumpuli mvt, Um ilefoka yatuk puta ka okla iti hopela mvt, anonti um ilefoka lumbo atuk a okla nan-isht a shoelishke, achi tok vt aiahla chj mak a tok.

36. Micha okla hash osh yummak o aka binohli cha, yummak ash atoni tok.

37. Mihmvt noshkobo paknaka anumpa onvtula holisso hvt, ILUPPAK OSH CHISUS CHU OKLA I MIKO MAK OKE, achi ho takalichi tok.

38. Yohmi ma hatak hukopa tuklo hosh apihvt ititaiyukhvna ahonvhla tok; achvfa kvt ibbak isht impakimma yo takali ma, anonti achvfut vlfvbekimma yo takali tok.

39. Mihma yamma bilikasi ont ihiya kvt yummak ash o ik ahobalot pit i yuchunukli beka tok.

40. Mihmvt, Tempel a okpuni cha, anonti nitak tuchinakma ikbit tahli chia hvt, ish ile okchalinhashke, Chihowa a Ushi chia hokmvt, iti-taiyukhvna ya auet akowá, achi tok.

41. Na holitompa isht asha pehlichi vhleha ak kia na holissochi vhleha, micha hochitoka vhleha ai itapeha kvt yummak ash o ishit yopulvt,

42. Inla yokvno okchalinchi hatuk okak osh, ilap inli kvt ile okchalincha he keyushke. Ilvpak osh Isael a i miko yatuk okmvt, himonasi ak o iti-taiyukhvna ya auet ik akowá, yohmikmak o iloh i yimmashke.

43. Chihowa ya anukcheto atuk oka, yummak osh i hullo hatuk okmvt, himonasi a ant ik hlakofichi; Chihowa Ushi sia hoke, achi hatuk oka achi tok.

44. Hatak hukopa tuklo yamma apihvt iti-taiyukhvna ahonvhla tuk kak kia ik ahobalo kvt, yummak inli ho, chohmichi tok.

45. Yohmi ma hvshi kanvlli vlpisa ont isht hannalik fehna ai vhlit ivt, hvshi kanvlli vlpisa isht chakkali ona ka, yakni moma ka ai okhlilit kvnia tok.

46. Yohmi ma hvshi kanvlli vlpisa ont isht chakkali foka ma, Chisus vt chitoli fehna hosh tahpulvt, Eli, Eli, lama sabakhlani? achi tok; yummvt an Chihowa ma! an

Chihowa ma! nanta katiohmi ho is sá kanchi cho? achi hoke.

47. Mihma yumma hiohmaya tuk vt kanimi kvt haklo mvt, Hatak ilvppvt Elias a pit i howvshke, achi tok.

48. Mihma mih mak inli ho achvfvt malelit ia mvt, na shatunmi o ont ishi cha wineka alotoli mvt, kushak o takalichi cha, yummak ash o ishka chj ka pit ipeta tok.

49. Mihma inla ka yash osh, Ik ashá, Elias vt okchalin-chit aya hinlakmá, nanakmá, keho pesá, achi tok.

50. Mihma Chisvs vt atukla ma chitoli fehna hosh tah-pula mvt, fiopissa tok.

51. Yohmi ma nantvnna tempel anukaka takali tuk vt paknaka ak o a hlilafvt ia mvt, aka ont taha cha tuklo tok: mihma yakni vt winakahanchi ma, tvli hochito puta kvt bakahli tok.

52. Mihma hatak ahollopi puta kvt tiwa ma, vbanumpuli puta haknip mayvt nusi tuk vt lawa kvt tani tok.

53. Atuk osh Chisvs vt illi tuk vt falamvt tani ma, ahollopi puta ka akohcha wihvt ia mvt, tumaha holitopa ya onvt lawa ka i haiaka tok.

54. Sintulion micha apihvt mayvt Chisvs a apesuchi tuk aiena kash osh yakni winakvchi, mihmvt nana kvt ai yakohmi puta na pisa mvt, okla nukshopa fehna mvt, Ilvppak okvt Chihowa ha Ushi yo mvhli tuk pullvshke, achi tok.

55. Yokmi ma ohoyo lawa Chisvs a apehvt Kalili a asht, mintit yumma nan im atahli yatuk vt yummak maya cha, auet mishema ho pit pisa tok.

56. Yummak takla maya kvt, Meli Makatalene micha Meli, Chemis, mikmvt Choses aiena ishki, mikmvt Sebete ushi vhleha ha ishki ak osh aiena tok.

57. Ont opivt taiyaha ma hatak nan in laua Alimahlea vtta Chosef hohchifo hosh, yummak kia Chisvs a nan im ai ithvna ak inli tuk osh vla tok.

58. Micha ia mvt, Chisvs haknip a Pailat a ont im asilhha tok. Yohmi ma haknip atukma ima he a, Pailat vt miha tok.

59. Mihma Chosef vt haknip atuk a ishi mvt, yummak ash o nantvnna kashofa linen achukma ho a bonulli tok.

60. Mihmvt yummak ash o ilap i sepulka himona tvli chito yo a kulli hosh ikbi tuk osh ont fohki tok: mihmvt sepulka okhissa ash o tvli chito yo tonolichit pit isht akamali cha, ia tok.

61. Mihma Meli Maktalene, micha Meli achvfa itatuklo kvt sepulka i chapaka ya chiya tok.

62. Yohmi ma nana ai vltaha nitak atuk auet achakaya nitak o na holitompa isht asha pehlichi vhleha, micha Falisi vhleha aieno kvt Pailat a ant im ai itvna ha cha,

63. Pi shahli ma! na haksiehi yummvt okchaya momut ahanta mvt, Nitak ont atuchinakma falamvt tani la hi oke; achi tok a il ithaiyanvshke.

64. Yohmi hoka ish apesa na sepulka vt kvllo tlvkama na nitak atuchina ka onashke; yummak keyukma nan im ai ithvna vhleha hvt ninak a ai vlt hukopvt ishit kvnia cha, Illi tuk vt falamvt tanishke, okla ha im acha hinla hoke: yohmikma ishtaiyopi ka isht haksi kak osh ik ai vlpeso kvt vmmoma tuk a i shahla hinla hoke, achi tok.

65. Mihma Pailat ash osh, Nan atoni vt hvchim ashvsh-ke: oh ilhkoli cha, kanimihchit hvsh a kullocha hinla kvt hvsh yvmihchashke, im achi tok.

66. Mihma ilhkoli mvt, tvli ash o in chunli cha, nan atoni a ashachit, sepulka ash a kullochit kaiyanchi tok.

CHAPTA XXVIII.

Nitak ont atuchina onnahinli fehna ohoyo tuklo kvt Chisvs ahollopi tuk a ona; yvmma enhil vt ai afama, 1; 2 micha Chisvs vt illi tuk vt falamvt tani tuk a, im anoli; mihmvt nan im ai ithvna vhleha ha ia cha, ont im anola chi ka i miha. 11 Kaniohmi hosh Chisvs ahollopi ya atonit aiasha tuk vt falamvt tvmaha chito ya ona cha, ahollopi nana a kaniohmi tuk a na holitompa isht asha pehlichi vhleha ha im anoli. 15 Chisvs vt nan im ai ithvna auah achvfa ka Kalili ak o ai i haiaka, 19 micha vbanumpa ha oklusu puta ka isht im anumpohonlit itvnohowa he a im apesa.

1. YUMOHMI tuk o nitak hullo vt ont taha tuk wek nitak vmmona chⁱ hosh onvt mihinti ma, Meli Maktalene, micha Meli achufa itatuklo kvt sepulka yash pisut aya hosh itonachi tok.

2. Yohmi ma yakni vt winakuchi fehna tok: Chitokaka im enchil osh vba mintit vla cha, tvli okhissa onvtula tuk a kanompit tonolichi cha, paknaka ya on asha ha tok,

3. Mihma haknip vt malvtha ak o chiyuhmi ma, im ilefoka yvt tohbi kvt okti pushi ak o chiyuhmi tok.

4. Mihma nan atoni vhleha hatuk vt yumm*ma* i nukshopa kvt wvnihinehi mvt, illi yo chiyuhmi tok.

5. Yohmi ma enchil vt anumpuli mvt, ohoyo hash o, Ititaiyukhvna ahonvhvt illi tuk Chisus ak o hvsh hovo ka hvchim ithanali hoka, ik hvchi nukshopo kashke.

6. Ilvppa ikshoshke; miha tuk okvt falamvt tani tuk oke. Mintit Chitokaka yvt ai itola tuk a ant ho pesá.

7. Micha tushpv*t* vt, illi tuk vt falamvt tani cha, hvchi tⁱkba Kalili a ia chⁱ ka, yummak o ont hvsh a pisa chⁱ hoke, nan im ai ithvna vhleha ha ont hvsh im anolashke: inta! hvchim anoli li mak oke, im achi tok.

8. Yohmi ma nukshopa, mikmvt nayukpa fehna aien*a* hosh sepulka ya ashwvt tushpv*t* itiachi tok; mihmvt nan im ai ithvna vhleha hatuk a anumpa isht im ona chⁱ kvt tihlahaya tok.

9. Atuk o nan im ai ithvna vhleha ha im anolit ia hosh ayvt okla ma, Chisus vt afama cha, Na hvchi yukpashke; achi tok. Mihma vt yummak ash o iyi a ont halvlli cha, aiokpahanchit okla tok.

10. Yohmi ma Chisus ash osh, Ik hvchi nukshopo kashke: Oh ia cha, itibapishili vhleha ha ont hvsh im anolikma, Kalili a okla ai onvt yummak o a sa pesashke, im achi tok.

11. Yohmi na itiachi hosh ayvt okla ma, nan atoni vhleha hatuk kaniohmi kvt tvmaha ha ona cha, nana kvt kaniohmi tuk a mominchit na holitompa isht asha pehlichi vhleha ha im anoli tok.

12. Mihma yummak ash osh hochitoka vhleha ai itapihvt

itvñaha cha, it im anumpulit okla in taiyaha mvt, tvshka chipota vhleha hash o tvli holisso lawa ka ima cha,

13. Nan im ai ithvna vhleha hvt ninak o ai vla cha, nusi hosh e maya takla ma, ant hukopvt ishit kunia tuk oke, hvsh ahashke.

14. Yohmikma ilvppak atuk mvt nahullo miko haksobish a afohka hokma, yummak oka e hopohluchi cha, e hvchi hlakofichashke, achi tok.

15. Yohmi ma tvli holisso ash o okla ishi mvt, nan im abvchi tok mak o okla ai yvmohmi tok: yvmohmi tok o anumpa ilvppvt himak nitak ak kia Chu okla itintakla ya ai annohoa hoke.

16. Yohmi ma nan ithvna auah achufa kash osh Kalili a ilhkolist, nvnih chaha Chisvs vt ai im atokoli tok mak o ona tok.

17. Micha yummak ash o pisa mvt, okla ai okpahanchi tok: yohmi kia kanimi kuto anuktuklo tok.

18. Yohmi ma Chisvs vt vla cha, ant im anumpuli mvt, Uba yakni, micha yakni ilvppa aiena nan-isht im ai ahlika puta moma kvt vmmi toba hoke.

19. Yohmi hoka hvsh ilhkoli cha, oklushi moma ka nan ithvna ikbit, Iki, micha Ushi, mikmvt Shilombish Holitopa aiena ho isht a hochifochit hvsh baptismo honchashke:

20. Nan oklyha ka nana ho hvchim apesa li tuk a holitoba he mak o hvsh im abahanchashke: yohmikma yakeh! uno vt hvchi awant aya li bilia ho, yakni vt ont ai vhla hi oke, achi tok oke. Amen.

UBANUMPA MAK.

UT HOLISSOCHI TOK.

CHAPTA I.

Chan Baptist vt vbanumpa isht anumpohonli 1; 9 Chan vt Chisvs a baptismochi; 12 atuk o yvmmak atuk a i himmak ma Setan vt Chisvs ash o imomaka pisa. 14 Chisvs vt Kalili a vbanumpa isht anumpohonli; 16 mihmvt Saimon, micha Antilu, mikmvvt Chemis, micha Chan aieno ka nan im aiithvna toba chi ka i miha. 23 Nitak hullo ya Chisvs vt nan ithvnanchi, micha shilombish okpulo kohchichi aieno mvt; 29 Pita tekchi ishki, 32 micha hatak abeka inla yvt laua ho hlakofichi; 35 Chisvs vt vba pit anumpula chi hosh onnvvt ik taho kisha ho tani; 39 atuk osh i himmakma Kalili vbanumpa isht ai anumpuli, 40 leplosi vbi yo hlakofichi.

1. CHISVS Klaist Chihowa Ushi im vbanumpa ai ishtia vmmona kvt,

2. Yakeh! um anumpeshi ya chi tikba chuffichi li hoka mihi yosh chi hina ya tikbanli apoksiacha hi oke.

3. Achufa hosh yakni haiaka ya a pahaya kvt, Chitokaka ataya hi a apoksiachit i hina puta ka oh apissulichí, ahan-chishke, achit hopaii vhleha i holisso ha a holisso tok ak o ai itilaui tok.

4. Chan vt yakni haiaka ya a baptismohonchi mvhli tok: mihmvt ai ashvchika puta ka isht a kashofa chi ka, ile kostininchit baptisma hi a isht anumpohonli tok.

5. Yohmi ma Chutea yakni ai asha tuk, micha Chelusalem ai asha tuk aieno kvt, momvt yvmmak ash o im ai ona cha, nan im ai ashvchika puta ka il anohonlit, Chatan okhina yak o ai im a baptismo tok.

6. Mihmvt Chan vt kamel hishi nafohka fohka cha, na-

hakshup vskofvchi yo vskofaiyachi tok : mihmvt hawa, mi-cha foi-bila kowi anuka asha yak o vpa beka tok.

7. Mihmvt vbanumpa isht anumpohonli mvt, Uno a a shahli fehna hosh auet siakaiyut minti, yummak okvno vno vt i shulush isht-talakchi yak kia a hlipvt hotofi la he si ahoba keyu hoke.

8. Uno vto oka yo isht hrchi baptismochi li muhli hatuk ; amba yummak okvto Shilombish Holitopa yo isht hvchi baptismochi chi hoke, achi tok.

9. Atuk o nitak yvmma foka ka yakohmi tok : Chisvs vt Nasalet Kalili talaia ka vttvt mintit vla cha, Chatan ak o Chan a ai im a baptismo tok.

10. Micha oka ya ai vttvt kocha ia mak inli ho, vba shutik vt auet tiwa na Shilombish Holitopa yrt puchi-yoshuba chiyuhmi hosh vba mintit yummak ash o ant o binili tok.

11. Yohmi ma vba ya anumpa hvt auet takali kvt, Chishno ak osh Suso a holitopa chia hoke ; chishno ak o nan-isht chi a sai yukpa hoke, achi tok.

12. Atuk o chekosi mak inli ho Shilombish Holitopa yvt yakni haiaka ya pit chvffichi tok.

13. Yohmi na yakni haiaka yvmma nitak pokoli ushta ho ahanta na Setan vt imomaka pihisa tok ; mihma napoa ok-pulo puta ka itintakla ahanta tok ; mihma enchil vhleha hosh nan-isht im anta tok.

14. Chan vt aboha kullo fohka ha yo, Chisvs vt Kalili a vla cha, Chihowa apehlichika isht anumpa hanta ya isht anumpohonli tok.

15. Mihmvt, Nana kvt ont aiahlit taha na Chihowa apehlichika yrt olanlosi vlvshke ; ile kostininchit, vbanumpa ha ho yimmí, ahanchi tok.

16. Atuk osh Kalili okhvta lapalika ya aya mvt, Saimon vt itibapishi Antilu itatuklot, nuni-hokli yatuk okvt, nuni-isht-hokli a okhvta pit okvchi hosh ahashwa na pisa tok.

17. Mihmvt Chisvs vt, Mintit vno ak o hvs si apeha na hatak hokli yo hvch ikbi lashke, im achi tok.

18. Yohmi ma mih-makinli ho i nuni-isht-hokli yash issa cha, iakaiyvt okla tok.

19. Mihma yummak atuk a i^t mishema ona mvt, Sebete ushi Chemis, micha itibapishi Chan itatuklo kak kia, peni anuka ya nuni-isht-hokli aiskiachi hosh chiya na pisa tok.

20. Mihmvt mih makinli ho yummak ash o pit i howa tok; mihma yummak ash osh iki Sebete vt hatak ilhtohno vhleha ho iba taklvt peni ash foka na issvt, pit iakaiyvt okla tok.

21. Atuk o Kapenavm ak o okla ai ona tok: atuk o chekosi ma nitak-hullo nitak o sinakak a ont chukowa cha, nana abahanchi tok.

22. Yohmi ma nan isht ai im abuchi ka okla anukhlakan-cha tok: yummak okvt nana kvt ai im vlpiesa hosh nana im abahanchi kia, na-holoccochi vhleha yak ovno ik holbo ki tok.

23. Yohmi ma sinakak yumma hatak vt shilombish okpulo ai i foka hosh asha tuk osh, tahpvlvt,

24. Ikikke! Chisvs Nasalet ai vta chia ha nanta ho isht e chi ahalaia cho? kuna ho chia hoka chithana li, Chihowa i na-holitopa chia mak oke, achi tok.

25. Mihma Chisvs vt yummak ash im olvbit, Nukchin-tot yummak ish a kohchashke, im achi tok.

26. Mihma shilombish okpulo ash osh yummak ash o haiochechi cha, chitolit tahpvla mvt, yummak ash a kohcha tok.

27. Yohmi ma momvt, okokko! aiahni fehna; yohmi cha, Ilvpput nanta mak osh yakohmi cho? ilvppak osh nan-isht abuchi himona nanta mak oh cho? ai im vlpiesa hosh yummak ash osh shilombish okpulo vhleha hak kia nan im apesa ma, im antivshke, achit okla it im a ponaklot maya tok.

28. Yohmi ma chekosi makinli ho yummak ash isht annoa kvt Kalili a folumpa yakni moma ka hlopulli tok.

29. Atuk o sinakak a ashvt a kohcha makinli hosh Chemis, Chan itatuklo ka ai it apihvt Saimon, micha Antilu itatuklo in chuka yo okla ont abeha tok.

30. Mihma Saimon tekchi ishki yvt-yvnha hosh itonla tuk o, ashalika yummak ash im anoli tok.

31. Mihma ona cha ibbak a halvllit, tanichi tok ; mihma yvnha hash osh ashalika shipa na nan isht im vtta tok.

32. Atuk o ont opia hvshi vt okatula ma, haknip ik in chukmo puta, mihmvt nan-isht-ahullo okpulo ai i foka aienatuk a, mominchit okla isht im ai vla tok.

33. Mihma tvmaha okla hash osh momvt okhissa ya ant ai itahoba tok.

34. Mihma haknip ik in chukmo ilaiyuka isht abeka tuk a laua ho hlakofichi mvt, nan-isht-ahullo okpulo mvt laua ho kocha weli tok : mihmvt nan-isht-ahullo okpulo yvt ilapa okla ithana hatuk o, ik anumpuli ik im ahno ki tok.

35. Atuk osh ont onnahinli, onnvvt ik taho kisha pill a ho, tani cha, kohchvt iwt haiaka ona cha, vba pit anumpuli tok.

36. Mihma Saimon, micha apeha tuk ash aienatut pit iakaiyvt ilhkoli tok.

37. Atuk osh yummak ash ont pisa mvt, Hatak momvt chi hoyoshke, okla im achi tok.

38. Mihma auet apanta tvmaha maya kak o kil ohona na yummak ma vba isht ai anumpohonli lashke, yummak a he mak osh aya li ha tok okvt, im achi tok.

39. Atuk osh Kalili fullota i sinakak puta ka vba isht a*z* anumpohonlit, nan-isht-ahullo okpulo puta ka kocha wihinli tok.

40. Mihma leplosi vbi yosh ayvt im ona cha, i hvchuk-bihlept im ilvsha mvt, Ulhpesa ish ahni hokmvt, is sa kashofa hinlvshke, im achi tok.

41. Mihma Chisus vt i nukhaklo cha, ibbak a pit welit, potoli mvt, Ulhpesa ahni lishke ; chi kashofashke, im achi tok.

42. Mihma anumpulit ont issa makinli ho, leplosi ash ot ashalika i kvnia na yummak ash osh kashofa tok.

43. Mihma ik annoe ka hi a kvlochi fehna hosh yummak ash i mihvt taiyahli cha, ashalika kanima pit chvffichi ;

44. Yohmi mvt ahah ! aiahnit hatak kvna kia na chik im anolo kashke ; amba chi hlakofi hokvt okla ha nan im atokowa ch*ı* ka, ia cha, na-holitompa-isht vtta yak o ont ish il im*j* haiakuchi cha, nana puta ka Moses vt apesa tok mak o ish yvmihchashke, im achi tok.

45. Yohmi tuk kia yummak ash osh ia mvt, anoli fehnvt, nana kash kanima moma ai im annoachi, yohmi na Chisvs vt himmakma ile haiakvchit ayvt tumaha ha chukowa he keyu hosh, amba kochvt yakni haiaka yak o vttvt aya tok: yohmi ma kanima moma a mintit im ai ohona tok.

CHAPTA II.

Chisvs vt hatak palsi isht abeka yo hlakofichi, 1 : 13 Chisvs vt Mahlu vt nan im ai ithvna toba chi ka i miha; 15 micha pblikan vhleha mikmvt nan ashvchi vhleha aiena ibai impa ka nan isht mihachi ma kaniohmi ho yohmi hatuk vt anoli. 18 Mihmvt nan im aiithvna vhleha ha nan ik hullocho hoka nan isht mihachi; mihma yummak ash osh ik yohmo kvt im ai vlhpesa atuk a miha mvt; 23 nan im aiithvna vhleha ha nitak hullo kobvffi ho nan isht mihachit asha ma, yummak okvt nitak hullo kobvffi hatuk o keyu ka miha.

1. ATUK o nitak kanohmi ma, anonti Kapenaum a ont chukowa tok: mihma aboha anuka asha ka annoa tok.
2. Yohmi ma ashalika lawvt ant itahoba, yohmi na aiasha hi vt iksho ma, okhissa itikba yash kia a hikia hi vt iksho ki tok, mihma vbanumpa ha isht im anumpohonli tok.
3. Yohmi ma hatak vt palsi isht abeka ho ushtvt it i shoyulit, isht im vla tok.
4. Micha okla itakantvli ka, i bilika okla ona he keyu mvt, a hikia ka paknaka ya isht hulmo ya tiwi tok; atuk osh tiwit tahli mvt, palsi isht abeka yvt ai onvtola topa hash okla aka pit bohli tok.
5. Okla na yimmi ka Chisvs vt pisa mvt, palsi isht abeka atuk ash o Suso ma! na chim aiashvchika puta kvt chi kashofa mak oke, im achi tok.
6. Yohmi kia na-holissochi vhleha kanimi kvt yummabinohmaya tuk vt, chukvsh anukkaka isht anukfillit,
7. Na katihmi ho hatak ilvppvt yakohmichit Chihowa ik ahobalot anumpuli cho? Kvta hosh nan ai aiashvchika puta ka kashofa hinla ho? Chihowa ak illa keyu?
8. Mihma yakohmichit okla im anukfila ka Chisvs vt ilap chukvsh ak inli ka isht akostininch mvt, ashalika, Na katih-

mí hó ilvppa puta ka hvchi chukvsh anukaka isht hvchim anukfila cho ?

9. Palsi isht abeka atuk a, Na chim ai ashvchika puta kvt chi kashofa hoke ; im achi kak okmá, keyukmv̄t, Wakayvt, chi potvlhpo a sholi cha, nowá, achi kak okmá, kati-ma kak osh ahchiba kvt ik lauwo cho ?

10. Yohmi kia Hatak Ushi vt yakni paknaka nan aiashvchika puta ka kashofa hi vt ai im vlhpiesa hatuk a hvsh akostinincha chi kak o.

11. Palsi isht abeka yash o im anumpulit, Tanit, chi potvlhpo a sholi cha, chin chuka ish iashke ; chim achi lishke, im achi tok.

12. Mihma ashalika yvmmak ash ot tanit, potvlhpo ash sholi cha, okla momvt pisa na kohchvt ia tok : yohmi na momvt nukhlakancha mv̄t, Nitak nan ash ilvppa chohmi na e pisa chatuk keyushke, ahanchit Chihowa ya pit holitoblichí tok,

13. Atuk o anonti kohchvt ia mv̄t, okhvta lapalika yo ona tok : mihma okla laua yvt momvt ant im ai itahoba na nan im abahanchi tok.

14. Atuk osh ont ia hosh aya mv̄t, Lefai Alfevs ushi vt tvli-holisso abohli a asha na pisa mv̄t, yvmmak ash o, Is siakaiyashke, im achi tok.

15. Atuk o yakohmi tok : Chisvs vt yummma im aboha anuka ya impa hosh asha ma, pblikan micha nan-ashvchi vhleha aieno kvt laua hosh Chisvs, micha nan im ai ithvna vhleha aieno ka takla binohmaya akinli tok : yvmmak okvt laua hatuk osh, okla apihvt aya tuk a tok.

16. Micha na-holoccochi vhleha, micha Falisi vhleha aieno kvt, yummvt pblikan vhleha, micha nan ashvchi vhleha aieno ka it ibai-impna pisa mv̄t, nan im ai ithvna vhleha hash o, Katiohmi ho pblikan vhleha, micha nan-ashvchi vhleha aieno kyno it ibai impvt nan it ibai ishko cho ? im achi tok.

17. Mihma Chisvs vt haklo mv̄t, Haknip im achukma hokvto, alikchi a bunna keyu, amba abeka kak oke : nan-ashvchi ik im iksho vhleha ho hohoyot aya li tok keyu,

amba, nan-ashvchi vhleha yosh ile kostininchā chī kak a tok, im achi tok.

18. Mihma Chan, micha Falisi vhleha aienā nan im ai ithvna vhleha hvt na hullohonchi beka tok: atuk osh ai vla mvt, Nanta katiohmi hō Chan micha Falisi vhleha aienā nan im ai ithvna vhleha hvt na hullohonchi ma, amba chishno na chim ai ithvna vhleha hvt nan ik hullocho cho? im achi tok.

19. Mihma Chisus vt, Hatak himona ohoyo itauwaya tuk vt takla anta moma ka, i kanomi vhleha hvt nukhaklot na hullocha hinla cho? Hatak himona ohoyo itauwaya tuk vt im ašha tākla hokvt okla nahullocha he keyu hoke.

20. Yohmi kia hatak himona itauwaya yash ot ai i filumma he nitak vt ai óna he; yohmikmak o nitak yummā fokak-mvno okla nukhaklot nahullocha hi oke.

21. Hatak nana kia nantvnna hlilafa himona ka anchī hlipa ya isht akvlli chatuk keyu: yummak keyukma, na hlilafa himona vlkvta atuk vt sipokni ash hlilvffi na i shahlit hlilafvt okpulo hoke.

22. Mikma hatak nana kia oka-paki himona ya shukcha sipokni yo apitta chatuk keyu: yummak keyukma, oka-paki himona yash ot shukcha yash mitahlichī na hlayakma; shukcha yash ot okpula hinlvshke: amba oka-paki himona vt shukcha himona yo vlhpitta pullashke, im achi tok.

23. Atuk o yakohmi tok; nitak-hullo nitak o osapa hlopullit aya tok: mihma nan im ai ithvna vhleha hvt onush a hlinlit itvnowa tok.

24. Mihma Falisi vhleha hvt, Yakeh! na-katihmi hō nitak-hullo nitak o nana kvt ai vlhpesa keyu ka, okla yummohmi cho? im achi tok.

25. Mihma, Lewi vt ilap, micha apehvvt aya tuk aienā kvt hohchvfo mvt, nana ka bunna cha, a kaniohmi tok:

26. Micha na holitompa isht vtta i shahli Abaiahla vt ahanta nitak a Chihowa im aboha ya pit chukowa cha, yummā ai vpa he vlhpesa hatuk keyu, amba na-holitompa isht ašha vhleha kak a he tuk a, puska holitopa ya vpa mvt,

anonti apehvt aya tuk ma ipeta tok a himonna kia holisso hvch ik it im anumpulo chatuk oh cho? im achi tok.

27. Mihmvt nitak-hullo vt hatak ak o im vlhpisa a tok: hatak ak osh nitak-hullo ak o im vlhpisa tok keyushke.

28. Yohmi hoka, Hatak Ushi vt nitak hullo ak kia in Chitokaka yoke, im achi tok.

C H A P T A III

Chisvs vt hatak ibbak shila hlakofichi, mihma yvmmak o Falisi vhleha hvt vbi bvnna hatuk o Chisvs vt kochvt kvnia, 1; 10 mihma okla laua apehvt ilhkoli na lauachit hlakofichi. 13 Mihmvt anumpeshi auah tuklo ho atokoli. 20 Chisvs a i kanomi vhleha hvt tasimbo ho im ahoba, 22 mihma Falisi vhleha hvt Chisvs a ik ahobalot anumpuli; yohmi ma yvmmma okla miha ka ahl keyu ka atokolit im anoli. 31 Kvna hosh Chihowa nana aiahni puta ka yvmohmi hokvt Chisvs a i kanomi fehna mak oke.

1. ATUK osh anonti sinakak a ont chukowa ma, yvmmma hatak vt ibbak shilvt illi yosh asha tok.

2. Mihma nitak-hullo nitak a hlakofichikmá, nanakmá, nan-vlhpisa onocha hi vt ahnit okla apesahanchi tok.

3. Mihma hatak ibbak shilvt illi yash o Iklvnnaka ya wakayt a hikiá, im achi tok.

4. Mihmvt, Nitak-hullo nitak a nan achukma ho yvmoymi, keyukmvt achukma keyu ho yohmi kak okmá; ilhfio-pak okchalinchi, keyukmvt vbi kak okmá, nanta kak osh ai vlhpesa cho? im achi tok. Yohmi kia nan ik acho hosh maya tok.

5. Mihma okla chukrsh kvlo ka isht nukháklot, ik im vlhpiesot filemvt pisa mvt, hatak ash o, Chisemochí, im achi tok. Mihma chisemochi tok; yohmi ma ibbak ash osh falamvt hlakofit in tvnnvp ak inli ho chohmi tok.

6. Mihma Falisi vhleha hvt kocha wiha mvt, ashalika Helotian vhleha aiena kvt yvmmak ash vba hi vt isht it im anumpulit maya tok.

7. Yohmi kia Chisvs ash ot nan im ai ithvna vhleha hash

pehlichi cha, filvmmiit okhvta ia tok: nihma Kalili, micha Chutea aieno minti,

8. Micha Chelusalem minti, anonti Itumea, micha Chatan mish-tvnnvp minti, micha Taia, micha Saiton a fullota minti aieno okla chinto kvt nan aiyaka fehna ka yvmihchi ho okla haklo mvt, iakaiyvt okla chinto fehnvt im ai ona tok.

9. Mihma okla laua hokvt ik atehlefo ka chi kak o, peni vt im vltaha chi kvt, nan im ai ithvna vhleha ha i miha tok.

10. Lauachit hlakofichi hatuk; yohmi hatuk oka, nan i palummit aiasha atuk vt momvt yvmmak ash haleli bvnnt okla a hvhlihinchi tok.

11. Mihma shilombish okpulo puta kvt yvmmak ash pisa mvt, itikba aka hlipkvchi mvt, tahpahanlv, Chishno ak osh Chihowa Ushi chia mak oke, achi tok.

12. Mihma yvmmak ash ot ilap a ik otvnincho ka chi ka, yvmmma kullochit im apesa tok.

13. Mihmvt nvnih chaha yo ont oiya cha, kuna ho ilap aiahni hosh hoyo na, okla im ai ona tok.

14, 15. Mihma tohno na yvmmvt ilapa apehvt aya cha, vbanumpa isht ahanta he; micha abeka puta hlakofichit, nan-isht-ahullo okpulo kocha wela he aieno kvt, ai im vlpesa chi ka auah tuklo ho atokoli tok.

16. Mihmvt Saimon atuk a Pita hochifo tok.

17. Mihmvt Sebete Ushi Chemis itibapishi Chan itatuklo, yvmmak ash o Boaneches hochifo, yvmmvt Hiloha ushi, achi hoke.

18. Mikma Antilu, mikmvt Fillip, micha Bahlolomu, mikmvt Mahlu, micha Tamas, micha Alfevs ushi Chemis, mikmvt Tatevs, micha Kenan hatak Saimon aieno,

19. Mikmvt yvmmak ash ishit inla im issa tok Chutas Iskaliot vt aieno tok: mihma chuka chukowa tok.

20. Mihma okla laua yash osh anonti ant ai itahoba na ilhpak ak kia okla vpa he keyu ka chohmi tok.

21. Yohmi ma i kanomi vhleha hvt haklo mvt, Tasimbo hoke, achi cha, hokla chi hosh okla ilhkoli tok.

22. Atuk o na-holissochi vhleha Chelusalem minti tuk

ash osh, Beelsebvb ak o il ai ishi hosh, nan-isht-ahullo okpulo puta ka isht kocha weli hoke, achi tok.

23. Yvmmak ash o hoyo mvt, nan-isht-vlhpisa ho anum-pulit, Katiohmi kak osh Setan vt Setan a kohcha hinla cho ?

24. Micha apehlichika achufa kvt it a kashapvt ilap ash inli it im i sanali hokmvt, apehlichi achufa yvmmak atuk vt talaia he keyu hoke.

25. Mihma chuka achufa vt it a kashapvt ilap ash inli it im i sanal kmvt, chuka achufa yvmmvt talaia he keyushke.

26. Mikma Setan vt ilapo inlit it a sanalit ahanta cha, it a kashapa hokmvt, kvllot hikia he keyu, amba ont iksho ka he bano hoke.

27. Hatak nana ak osh hatak hlampko in chuka ya ont chukowa cha, im ilayak puta ka wehpula he keyu : vmmona hak o hatak hlampko yak o takchi ho keyukmvt ; amba yvmmak okmvt in chuka ya wehpula hinla hoke.

28. Ahli pulla ho hvchim achi lishke. Hatak puta nan im ai ashvchika yvt oklyha, micha kaniohmit Chihowa ik ahobalot anumpuli a puta kvt i kashofa hi oke.

29. Amba kvna hosh Shilombish Holitopa yak o ik ahobalot anumpuli hokvto nitak nana i kashofa he iksho, amba issikkoput bilia mak osh im vlhpisa hi oke, im achi tok.

30. Yvmmvt nan-isht-ahullo okpulo yo il ai ishi hoke, okla achi ha tok oka.

31. Yohmi ma itibapishi vhleha, micha ishki aien aien kvt ai vla cha, kocha ya ont hiohmavt, inla atohnot yvmmak ash pit hoyo tok.

32. Mihma okla laua vt a fuloblit binohmaya tok ; yvmmak ash osh, Yakeh ! chishki micha chitibapishi vhleha aien kvt kocha hiohmaya hosh chi hoyoshke, im achi tok.

33. Mihma afalaminchit, Hvshki micha itibapishi li vhleha aien kak osh kvt a hoh cho ? achi tok.

34. Mihmvt filemt i bilikasi binohmaya kash pisa mvt, Hvshki micha itibapishi li vhleha aien ka ho pesá.

35. Kvna hosh Chihowa nana aiahni ka yvmoymi hokmvt, yvmmak osh svtibapishi, micha an tek, mikmvt hvshki aien mak oke, achi tok.

CHAPTA IV.

Na hokchi nan isht vlpisa; micha kaniohmi kak o Chisvs vt nan isht vlpisa ho isht anumpuli, 1; 14 na hokchi isht vlpisa yvt atokowvt annoa. 21 Kvna hosh Chihowa im anumpa ha ithana hokvto, ai ithana kvt inla asha ka im abvcha he tuk: 26 vbanumpa hanta hatak chukvsh a fohka hokvt na-nihi yakni a holokchi ymmak oka yakohmi hosh ahni keyu kia, offot mahayvt waya cha, vimo ona chatuk a chiyuhmi hoke: 30 micha mvstvt nihi ak o it vlpisa akinli. 35 Chisvs vt kocha umba, mahli kvlo ka im anum-pulit yukobli.

1. ATUK osh anonti okhvta lapalika ya nan ai im abv-chit ahanta tok; yohmi ma okla chinto fehna kvt im ai itahoba: yohmi na yummak ash ot peni yo pit chukowa cha, okhvta paknaka yo binili ma; okla laua yash ot okhvta alaka ak inli ho maya tok.

2. Mihma nana ka lauachit nan-isht vlpisa ho isht im abahanchi tok: mihmvt nan isht im abvchi kvt;

3. Inta! ho haponaklo; na-hokchi vt na-hokcha chi hosh ia tok oke.

4. Atuk o hokchi ma, yakohmi tok; kanimi kvt hina lapalika yo kaha tok; yohmi tuk o vba hushi puta kvt ant vpt tahli tok.

5. Mihma kanimi kvt tuli foka yakni asha fehna keyu ho kaha tok; atuk osh yakni vt i suko keyu hatuk okvt, che-kosi fehna offo tok.

6. Yohmi kia hushi vt kohcha ma, anakshuvt hakshish vt iksho hatuk okvt, bshit kvnia tok.

7. Mihma kanimi kvt kvti foka yo kaha tok: atuk o kvti vt offo cha, ai olvbi na ik wayo ki tok.

8. Mihma inlaka yvto yakni achukma yo kaha tuk osh, offot i shahlit mahayvt, vnit waya mvt, kanimi kvt pokoli tuchina ma, kanimi kvt pokoli hannali, anonti kanimi kvt tahlepa achvfa vnit waya tok.

9. Mihmvt, Kvna hosh haksobish isht haponakla hi vt i hinlikmvt, haklashke, im achi tok.

10. Atuk o ilap banot asha ma, yummma aiasha tuk vt

auah tuklo kash it apeha cha, nan-isht vlhpisa hash im a ponaklo tok.

11, 12. Hvchishno ak okvto Chihowa apehlichika nan ik otano ka hvsh ithana hi vt a hvchim vlhpisa hoke; amba kocha maya kak okvno pisa hokvno pisa kia ik ithano ka he: haklo hokvno haklo kia ik akostinincho ka he mak ə, ilvppa puta kvt nan-isht vlhpisa ho ai im vlhtaha hoke: yummak keyukma nitak kanima ka chukvsh vt inlv toba cha, nan im ai ashvchika puta kvt i kashofa hinla hoke, im achi tok.

13. Mihmvt, Nan-isht vlhpisa ilvppa hvch ik ithano cho? mih kvto katiohmi hosh nan-isht vlhpisa puta moma ka hvsh ithvna hinla cho? im achi tok.

14. Na-hokchi vt vbanumpa hak ə hokchi hoke.

15. Yohmikma kanima yo vbanumpa hvt a holokchikma, yakohmi kak osh ai itvnowa lapalika kaha mak oke: haklo tuk kia, chekosi mak inli ho Setan vt vlvt chukvsh im a holokchi tuk vbanumpa hash ishit kanchi hoke.

16. Yohmikma anonti, yakohmi kak osh tvli foka yakni a holokchi mak oke: yummak okvt vbanumpa ha haklo mvt, ashalika na-yukvt ai okpvchi hoke.

17. Yohmi kia ilap hakshish vt ik im iksho, yohmi hokvt chekosi takla kak bano ho kvllot hiohmaya hoke: atuk mvt vbanumpa pulla hatuk mak ə nan ilbvsha, keyukmvt na-palummi kvt ashakma, chekosi mak inli ho ibetvblu chatuk oke.

18. Mikma yakohmi kak osh kvti foka yo a holokchi mak oke.

19. Vbanumpa ha haklo; yohmi tukmvt yakni ilvppa nan isht im anukfila, micha nan in laua bvnna kvt isht ashvchi, mikmvt nana inla puta ai anushkunna aien a kvt ibai alota cha, vbanumpa hash ai olvbit ishi na ik vno toba kak oke.

20. Mikma yakohmi kak osh yakni achukma a holokchi mak oke; vbanumpa ha haklo mvt, yummak ash yimmi cha, vnit wayvt, kanimi kvt achufa tuk vt pokoli tuchinakma; kanimi kvt pokoli hannali; anonti kanimi kvt tahlepa achufa ona hoke, im achi tok.

21. Mihmvt, Pvla ha tanchi isht-vlhpisa nutaka, keyuk-

mvt topa nuta yokmá, nana ho talali cha, ai-o hikia ik o hi-techo ka hi o toba ho ?

22. Nana kvt ik otano ka hi osh luma kvt ikshokma, anonti nana kvt ik haiako ka hi osh luma tuk vt iksho, amba haiaka he ak o bano hoke.

23. Hatak nana hosh haksobish isht haponakla hi vt i hinlikmvt, haklashke, im achi tok.

24. Mikmvt, Nana hvsh haklo kvt ahah ! hvsh aiahnashke : nan-isht vlhpisa nana ho isht hvsh apesa tuk mvt, hvchishno vt isht hvchim vlhpisa hi oke ; mikma na haponaklo hvchia hoka i shahlit hvchim ibvlhta hi oke.

25. Kvna hosh ishi hokmvt, mihi yosh im ibvlhta he, mikma kvna hosh ik im iksho tuk ma, mihi yo ishi tuk ash kia im ai isha hi oke, im achi tok.

26. Mihmvt, Chihowa apehlichika yvt hatak osh na-nihi o yakni anuka pit hokehi :

27. Yohmi cha ninak a nusit, nitak ma tahanikma, na-nihi ash ot offot hofantit taiyaha ka, yakohmi kak osh ik aiahno ;

28. Yakni ak osh ilap inlit wayachi hoka : vmmona ka vpi atuk mvt, okshonli, yohmi ha mak osh waya chatuk.

29. Yohmi kia vni vt a lakna hokvno, ai-vlmo ona hatuk oka, ashalika isht-vlmo isht iba chukowa chatuk ak o chiyuhmi hoke, achi tok.

30. Mihmvt Chihowa apehlichika ya nanta hak o ohmichit, nan-isht vlhpisa nanta mak o il ai itilauecha chi cho ?

31. Mvstvt nahi yummak okvt yakni anuka a holokchi kvt, na-nihi yakni paknaka moma ka iskitini kvt ik lauwo ;

32. Yohmi kia holokchi mvt, offot isht mahayvt, chito kvt haiyukpulo moma imaiya ma, naksish vt hochitot filamohli : yvmohmi na vba hushi puta kvt hoshontika nutaka a nusi ka chiyuhmi hoke.

33. Mihmvt ai akostininché hinla ka, anumpa hash nan-isht vlhpisa yummma chohmi ka lauachit isht ai anumapohonli beka tok.

34. Amba nan-isht vlhpisa ho keyukmuno ik im anum-

pulo; micha ilapo banot maya hokma, nan im ai ithvna vhleha ha nana moma ka achukmalit im anoli beka tok.

35. Atuk osh nitak yummak atuk vt ont opivt taha ma, yummak ash o, Misha tvnnvp ak o pit keho hlopulli, im achi tok.

36. Mihma okla laua kash kanima pit yuhli mvt, yummak ash o peni fohka tuk vt moma na okla isht ia tok. Yohmi ma peni inla ak kia apehvt aya tok.

37. Atuk o mahli okpulo chinto kvt kocha: yohmi na oka banvtha kvt peni ash ai-issot pit vlhpilhinta ma, polaka alota tok.

38. Mihma yummak ash osh nusi hosh peni asha ka pilla ho vlhpishi on itonla tok: atuk o okla ont okchvli mvt, Nan ithvnanchi ma! pilla chi ka nan-isht chik ahno cho? im achi tok.

39. Mihma wakaya cha, mahli hash im alvmmiit okhvta hash, Nuktanlv tlmvt ish talaiashke, im achi tok. Mihma mahli hvt issa na yokopa achukmvt talaia tok.

40. Mihma, Na katihmi ho hvchi nukshopa fehna cho? na katihmi ho na-yimmi kvt ik hvchim iksho cho? im achi tok.

41. Yohmi ma okla nukshopa fehna mvt, Ilvppvt hatak katiohmi mak atuk a mahli, micha okhvta aienakak kia im antia cho? im achit maya tok.

C H A P T A V.

Chisvs vt nan-isht-ahullo okpulo laua ho kohchichi, 1; 13 mikmvt shukha aya achvfa ho ont abeha chi ka im ahni. 25 Chisvs vt ia cha ushetik a ont hlakoficha chi ho Chailvs vt im asilhha: mihma ia tuk osh takla ya ohoyo issish ont ia isht abeka yo hlakofichi, 35 mihmvt Chailvs ushetik vt illi tuk a falaminchit tanichi.

1. ATUK osh okhvta hash mish tvnnvp pit tanvblit Katalenes yakni a okla ona tok.

2. Mihma yummak ash ot peni kohchvt ia kash o chekosi ma, hatak vt shilombish okpulo ai i foka hosh, yummak

okut hatak illi aiasha ak o takla vttvt aya yosh hatak illi aiasha ya a kohchvt afama tok.

3. Yohmi ka yummak oka hatak nana hosh twli itatakvli yok a isht takeha hi o keyu tok.

4. Yummak okut iyi isht talakchi, micha twli itatakvli aien a ka isht talahakchi kut, twli itatakvli ya hokohlichit, anonti iyi isht talakchi a kobahlihinch; yohmi hoka hatak nana hosh yummak oka kostininch he keyu ya tok.

5. Mihma ninak, nitak moma ka nvnih foka, micha hatak illi aiasha aien kak o vttvt ayvt bilia cha, yahayvt twli puta ka isht ile boli beka tok.

6. Yohmi tok kia Chisvs vt mishema ho minti na pit pisa mvt, malelit ont aiokpvchit,

7. Chitoli hosh anumpulit, Chisvs, Chihowa nana moma imaiya Ushi chia ka nanta ho vno vt isht chi ahalaia li cho? chik svlbvshacho ka chi ka Chihowa pulla ho isht a chim apesa lishke, achi tok.

8. Yummak ash ot, Shilombish okpulo chia hvt hatak yummma ish a kohchashke, im achi ha tok.

9. Mihmvt i ponaklot, Chi hohchifo hvt nanta hoh cho? achi tok. Mihma afalaminchi mvt, Pi laua hoka, sa hohchifo hvt Lechvn oke, achi tok.

10. Mihmvt yakni ashwa tuk ash a kohchit kanima pit ik tihlelo ka chi ka im asilhha fehna tok.

11. Yohmi ma yummma nvnih foka pit bilika ho shukha laua vt impa hosh maya tok.

12. Mihma nan-isht ahullo okpulo ash ot momvt im ilbushvt, Shukha laua ak o pit ish pi on tihleli na yummak o ont il abehashke, achi tok.

13. Mihma Chisvs ash ot mih mak inli ho vlpesa im ahni tok. Yohmi ma nan-isht ahullo okpulo vleha hash ot a kohchvt ilhkoli mvt, shukha laua yash ont abeha tok: mihma shukha laua yash osh, yummvt tahlepa sipokni tuklo foka tuk osh, yihlepa fehnvt sakti chaha yo okhuta ha pit ai oka kahvt oka ai illi tok.

14. Mihma shukha laua ya impvchit maya tuk ash ot yihlepvt, tvmah, micha haiaka asha tuk aien a ka ont okla

anoli tok : yohmi ma nana mak osh yvmohmi tuk okma pisa chi hosh ilhkoli tok.

15. Atuk osh Chisvs a okla im ai ona mvt, nan-isht-ahullo okpulo ai i fokvt Lechvn il ai eshi tuk ash ot nafohka fohka cha, im anukfila mvt achukma hosh asha na, okla pisa tok ; mihmvt okla nukshopa tok.

16. Mihma okla pisa tuk ash ot nan-isht-ahullo okpulo ai i foka tuk vt im a kaniohmi hatuk ; mihma shukha laua yvt a kaniohmi tuk aieno kash okla im anoli tok.

17. Mihma i yakni a kohchvt aya hinla ka, yvmmak ash o okla im asihihla tok.

18. Yohmi na peni a ont chukowa ma, nan-isht-ahullo okpulo ai i foka tuk ash osh awant aya hinla kvt im asilhha tok.

19. Yohmi kia Chisvs vt vlpesa ik im ahno hosh, ambä, Chin chuka ia cha, Chitokaka yvt chi nukhaklo cha, na chinto fehna ka a chim ataiyahli tuk a chi kanomi vhleha ha ish im anolashke, im achi tok.

20. Mihma filummit ia mvt, na chinto nana mak o Chisvs vt im a tahli tuk a Tekapolis a ai anohonli tok. Yohmi ma okla momvt nukhlakancha tok.

21. Mihma Chisvs ash ot peni fohka cha okhuta in tvn-nvp ash inli ho pit tanvblı ma, okla laua hosh im itahoba tok ; mihma okhvt pit bilika ho anta tok.

22. Mihma sinakak apesuchi vhleha achvfa Chailus hoh-chifo hosh vla cha, yvmmak ash ant pisa mvt, iyi ituma ya hlipvt,

23. Im ilbahasha fehnvt, Svso tek iskitini vt illi mak osh itonlvshke : ish ona cha, hlakofa he mak o chibbak a ont isht ish umbitepa hokbano chim ahni lishke : yohmikma okchaya he banoshke, im achi tok.

24. Mihma Chisvs vt awant ia tok : mihma okla laua kvt a hahlihinchit apehvt aya tok.

25. Atuk o ohoyo achvfa hosh yvmmvt issish ont ia vbi tok a afvmmi auah tuklo ;

26. Yohmi hatuk o alikchi lawa ka nan isht i palvmmi ai im a pisvt, nana im asha tuk vt moma kampilvt tahli ; yohmi

kvt achukma hi vt iksho, amba okpulo kvt i shaht ia bano tok.

27. Atuk osh Chisvs a haklo mvt, okla itakantuli ka asha ka imma yo ont chukowvt, im anchi ya ont potoli tok.

28. Yohmi kvt im anchi ak illa ho ont ak potoli kia, sa hlakofa hinla hoke, ahnit im anukfila hatuk osh.

29. Mihma issish a mitafa yash osh ashalika shipa tok : mihma ililli yummak atuk a a hlakofi kvt ilap haknip anuka ak inli ka isht akostininchı tok.

30. Mihma Chisvs ash osh isht-a-hlakofi vt im a kohcha kvt mih-makinli ho akostininchı hatuk osh, okla laua itintakla ash a filemovt, Kuta hosh um anchi ya potoli cho ? achi tok.

31. Mihma nan im ai ithuna vleheha hut, Okla laua hvt chi a kantulit kvnia ka ish pisa kvt, Kuta hosh sa potoli cho ? ish achi ha cha, im achi tok.

32. Mihma yummak yumihihi tuk ash o pisa bunna kvt filemoa tok.

33. Yohmi ma ohoyo hash osh nana kvt ai i kaniohmi tuk vt ithana hatuk osh, nukshopvt wnnihinchı hosh vlv, itikba ya ant hlipia mvt, ai ahli mak o im anoli tok.

34. Mihma yummak ash osh, Suso tek ma ! na chi yimmi yak osh chi hlakofichi hoke ; nuktaiyalvt, micha ililli hatuk a ai i hlakofit ish ayashke, im achi tok.

35. Anumpuli kvt isht anta moma na kaniohmi kvt sinakak apesuchi in chuka minti hosh ai vla mvt, Chiso tek vt illishke ; na katihmi ho nan-ithvnanchi a ish im achibali na himak a cho ? achi tok.

36. Chisvs vt anumpa hvt anumpa na haklo makinli hosh, sinakak apesuchi ash o, Chi komunta na ; amba na chi yimmi kak illashke, im achi tok.

37. Mihmvt hatak nana kia apehvt aya hi a ik ahno mvt, amba Pita, micha Chemis, mikmvt Chemis itibapishi Chan aien a kak illa tok.

38. Atuk osh sinakak apesuchi in chuka ash vla mvt, okla yahapa, micha nishkin okchi minti, mikmvt chitolit yaiya fehna aien a hosh maya na pisa ;

39. Yohmi cha pit chukowa mvt, Na katihami ho yakohmit yahaput, yaiyut hush aiasha cho? ohoyo himita vt illi ho keyu, amba nusi hoke, im achi tok.

40. Mihma ishit yopulvt olvli tok. Yohmi kia yummak ash o mominchit kocha welit tahli mvt, ohoyo himita iki micha ishki itatuklo, mikmvt apehvt aya tuk ash aieno ho pehliche cha, kanima ohoyo himita vt ai itola kash pit chukowa tok.

41 Mihmvt ohoyo himita yash ibbak a ont halvlli mvt, Talibla kumi, im achi tok; yummvt toshowa kvt, Ohoyo himita ma! taní, chim achi lishke, achi hoke.

42. Yohmi ma ohoyo himita yash ot ashalika taní cha, nowa tok, vttä tok afummi auah-tuklo hatuk okvt. Yohmi ma nukhlakancha chinto fehna okla nukhlakancha tok.

43. Yohmi ma yummak oka hatak nana kia ik akostininchö ka hi a i miha tok; mihmvt nanasi kia i hoyo na impa hinla ka miha tok.

CHAPTA VI.

Chisvs vt vbanumpa isht anumpohonli: yohmi ma im ai okla achvfa vrt kanimanchi, 1. 7 Vbanumpa isht anumpula chi₁ ka im anumpeshi auahuklo ka pit tihleli mvt, nan-isht-ahullo okpulo puta imaiaya chi₁ ka im apesa. 14 Helot vt Chan a aboha kvollo fohki; atuk osh tekchi ash osh anukfohkichi ho, noshkobo tvbli tok, 30 Im anumpeshi vhleha hvt falamvt Chisvs a im ai ona: 34 Chisvs vt hatak tahlepa sipokni tahlapi ho nan im abvchit ahanta mvt, pvska lumbo tahlapi, micha nvni tuklo aieno tuk a okla ha impvchi.

1. ATUK osh yummak ash vttvt ia mvt, ilap i yakni ash inli ho ona; yohmi ma nan im ai ithvna vhleha hvt apihvt aya tok.

2 Atuk o nitak-hullo nitak ai ona ma, sinakak anukaka yo nana ai ithvnanchi tok; mihma yummak haklo mvt, lauvt nukhlakancha mvt, Katima yak o hatak ilvpput na yakohmi ka ai ithaiyana tuk o? mikma isht a hopoyuksa ilvpput nanta hokak osh yummvt anukfohka tuk o, nafehna yakohmi puta kvt ibbak atuk ma isht ai yvmohmi cho?

3. Ilvppvt Meli ushi, Chemis micha Choses, mikmvt Chuta anonti Saimon aien a ka itibapishi chuka ikbi yash keyu ho? mikma in tek vhleha mvt ilvppa pi takla maya keyu ho? achi tok. Mihmvt yummak ash o okla isht ai ibetubli tok.

4. Yohmi kia Chisvs ash ot, Hopaii vt ik holitopo hosh ahanta keyu kia, amba ilap i yakni ak inli, micha i kanomi vhleha, mikmvt in chuka-chufa aien takla ahantak mak bano chatuk oke.

5. Mihmvt yummak oka na-fehna nana ka ik ai yumicho ka hi vt ahni tok: amba hatak abeka kaniohmi kak illa ho ibbak isht umbitepv*t* hlakofichi tok.

6. Mihmvt okla na yimma he keyu kak oka, okokko! aiahni tok. Mihmvt tumahushi taloha ka fullokvchit ayvt nan-ithvnanchi tok.

7. Atuk osh auah-tuklo kash o hoyo cha, tuklo aiyukachit kania pit tihleli mvt, nan-isht-ahullo okpulo vhleha ha ai imaiya he mak o im apesa tok;

8. Mihmvt itvnowvt aya kvt nana kia isht ik ayo, amba tvbi ak illa he; bahta vt iksho; paska mvt iksho; tuli holissio kia i shukcha ya ik foko ka he;

9. Amba shulush ak o honla he; mikmvt nafohka lumbo tuklochit ik fohko ka chi ho im apesa tok.

10. Mihmvt peh kania yo aboha ya ont hvsh chukowakmvt, yummak o hvsh ai ahashwa tuk osh a kohchvt hvsh ayashke.

11. Mikma kuna kia ik hvchi aiokpacho, micha ik hvchi haponaklo aienakma, yummak ash a kohchvt hvsh iakmvt, nan-isht im atokoli mak o hvchi iyi putha nuta hituk tohbi asha ka hvsh tahtolashke. Ahli mak o hvchim achi lishke, Nan-vlpisa chinto nitak ma Sotom micha Komola aien kuto pit im vlpisa kvt tumaha yummak atuk a i shahla hi oke im achi tok.

12. Mihma ilhkoli mvt, hatak puta kvt ile kostininch he ak o isht anumpohonli tok.

13. Micha nan-isht-ahullo okpulo a lauachit kocha weli mvt, anonti abeka yatuk ash lauachit bila isht a hvmmichit hlakofichi tok.

14. Mihma miko Helot vt yvymma pit haklo, (hohchifo kvt kanima annoa kvt a mominchi hatuk oka;) mihmvt, Chan Baptist vt illi tuk vt tani hoka: yohmi hatuk o na- fehna puta kvt yvmmak ash o ai isht il otvnihinchishke, achi tok.

15. Kanimi kvto, Elias ak oka, achi ma: kanimi kvt Hopaii oka: keyukmvt hopaii vhleha ha tok achufona ma chohmi hoka, achi tok.

16. Yohmi kia Helot ash ot yvymma haklo mvt, Chan noshkobo tvbli li chash oka: illi tuk vt tani hoke, achi tok.

17. Helot vt itibapishi Filip a tekchi, Helotias ak atuk pulla mak o, ilap inlit pit on tihlelit, Chan a ishit takchi mvt, aboha kullo fohki tok: yvmmak oka itauwaya tuk okvt.

18. Chan vt Helot a, Chitibapishi tekchi a ish itauawayaya hi a chim vlpesa keyu hoke, im achi tuk a tok.

19. Yohmi hatuk o Helotias vt yvmmak ash o i nukkilli cha, vbi ka ahni; yohmi kia na kanihma he keyu ki tok.

20. Helot vt Chan yvmmak okvt hatak ai vlpiesa, micha ai ahli achukma hoka ithana hatuk osh, holitoblit nan ik i kanihmo ka hi a ahni tok; mihmvt yvmmak ash im a haponaklot, nana ka lauachit ai yvmohomi, mihmvt na yukput i haponaklo beka tok.

21. Atuk osh ont ai vlpiesa nitak vt-ai ona ma, Helot vt ilap ai vta tok nitak o i hochitoka vhleha, kypitvni hocchito, mikmvt Kalili i holitompa vhleha aienka opia im- pa im ikbi tok.

22. Atuk o Helotias yvmmak ash ushitek vt ant chukowa cha, hihla ma, Helot micha apehvt binohmaya tuk aienka kash ot na-yukpa ma, miko yash ot ohoyo himita ash, Peh nana ho ish ahni cha is sum asilhhakma, chima lashke, im achi tok.

23. Mihmvt anumpa kullo im isht il ai onochit peh nana ho is sum asilhhakma, apehliechi li iklunna hatuk ik nana kia, chima lashke, im achi tok.

24. Mihma yvmmak ash ot kohchvt ia mvt, ishki ash o,

Nanta hak o asilhha la chi cho ? ont im achi ma, yummak ash osh, Chan Baptist noshkobo hak o', achi tok.

25. Mihma tushpvt chekosi makinli ho ont chukowvt, miko ash im ona mvt, Chekosi mak o, Chan Baptist noshkobo yosh ampo fohka ho, is svma he ak o ahni lishke, achit im asilhha tok.

26. Mihma miko ash ot nukhaklo fehna tok: yohmi kia ilap vt anumpa kullo ikbi tuk pulla, micha apehvt binohmaya hatuk pulla mak o ik im ai ahlo ka hi a ik ahno ki tok.

27. Mihmvt miko ash ot ashalika nan-toni pit chuffichi mvt, noshkobo ya isht vla hi a im apesa tok; mihma ia mvt, aboha kullo anukaka akinli ho noshkobo ya ont a tvbli tok.

28. Mihmvt noshkobo hash ampo fohkit isht vla cha, ohoyo himita yash o ima na, ohoyo himita yash ot ishki a ont ima tok.

29. Yohmi ma nan im ai ithvna vhleha hash ot yummak haklo mvt, okla ai vlt illi haknip ash ishit, hatak illi aiasha yo bohli tok.

30. Mihma anumpeshi vhleha hash ot Chisvs a ant im ai itahoba cha, nana ka a kaniohmi tuk, micha nan abuchi tuk puta ka mominchit im anoli tok.

31. Mihma yummak ash o, Huchishno banot filummit haiaka oh ia cha, chekosi takla ka mayvt ho foħá, im achi tok; lauvt ai ahanla ma, anonti ilhkohonli aienahatuk o, peh maya cha impa kak kia impa he keyu chohmi tok.

32. Mihma lumvt peni pit vlhto cha, a haiaka ka pit ilhkoli tok.

33. Mihma ilhkoli ka okla pisa ma, anonti ithana ket laua tok: micha tvmaha puta ka a kohchvt aka itvnowa hosh yummak ash pit yihlepa tuk osh, yummak ash o imaiya cha, ont im itvnaħha tok.

34. Atuk o Chisvs ash ot ont kohcha cha, okla laua fehna ho pisa mvt, chukfvlhpoba yosh apesuchi iksho ho itilaui hatuk o i nukhaklo tok: mihmvt himona nana ka lauachit im abvchit isht ia tok.

35. Atuk o nitak ash ot ont shohba hosi ma, nan im ai ithvna vhleha hash osh im ai ona mvt, Ilvppak okvt yakni haiaka, anonti nitak mvt shohbit mahayvshke.

36. Kanima pit ish tihleli na yakni auet i bilika tvmahushi puta ka itvnowvt, nana vpa hi vt ik im iksho hatuk okvt, puska okla chumpashke, im achi tok.

37. Mihma, afalaminchi mvt, Ilimpa ha oh ipetá, im achi tok. Mihma, Ivt puska iskvli tahlepa tuklo ai vibi o ont e chumpa cha, ilimpa ha il ipeta chi hoh cho? im achi tok.

38. Mihma, Puska katoymi ho hush ishi ho? ont ho pesá, achi ma; okla pisa mvt, Tahlapi cha, nvni tuklo hosh aienvshke, achi tok.

39. Mihma it a kvshkolit mominchit hvshuk okchaki ya ai o binohlicha chi ka, im apesa tok.

40. Mihma tahlepa achvfa, anonti pokoli tahnapi, yohmit it a kvshkovt binohli tok.

41. Mihma puska tahlapi, micha nvni tuklo aiena kash o ishi cha, vba pit chakalit aiokpvchi mvt, puska yash tushalichi cha, okla ha in talohla chi ho, nan im ai ithvna vhleha hash o ima tok: mihmvt nvni tuklo kash o okla mominchit in tushtuli tok.

42. Yohmi ma momvt impvt okla kaiya tok.

43. Mihma boshulli vt nvni pit aiena kvt kishi auah-tuklo ho ishi tok.

44. Yohmi ka puska ya okla vpa tuk vt hatak tahlepa sipokni tahlapi foka tok.

45. Mihma ilap vto okla ha kanima pit tihlelit anta takla ma, nan im ai ithvna vhleha hash osh peni pit vlhto cha, tikba ivt mish tvnnvp Betsaita okla ona chi ka, mih maklinli ho i miha tok.

46. Atuk osh okla hash kanima pit tihleli mvt, vba pit anumpula chi hosh nvnih chaha yo pit oiya tok.

47. Atuk o ont opivt taha ma, peni ashott okhvta iklvnna ya aya ma, ilap bano hosh haiaka ya anta tok.

48. Atuk o mahli ak osh a sanali hatuk o peni mofi kvollo fehnvt aiasha na pit pisa tok: atuk osh ninak isht vlhpisa

ont ai ushta foka ho okhvta paknaka ya a noh_{ow}v_t, ayv im ona, yohmi kvt ont ia hi a aiahni tok.

49. Yohmi kia yvmmvt okhvta paknaka ya a noh_{ow}v_t aya na okla pisa mvt, shilup atuk o okla im ahoba mvt, taphvula tok.

50. Momvt okla pisa hatuk osh komunta ha tok. Mihma ashali_k pit im anumpulit, Hvchi nuktanla achukmashke. Uno ash sia hoke, hvchi nukshopa ná, im achi tok.

51. Mihmvt peni ash ont ibachukowa ma, mahli hash osh issa tok: mihma okla nukhlakancha atampa fehna mvt, okokko ! aiahni tok.

52. Yohmi kvt okla ak osh chukvsh kvollo hatuk osh, pvska yatuk ash okla pit ik anukfillo kak a tok.

53. Atuk osh yvmmak ash pit tanublit Kenesalet yakni a okla ai vla mvt, vhli ha ont ataiyvli tok.

54. Mihma peni ash okla a kocha wiha ma, mih makinli ho yvmmak ash okla pit ithana tok.

55. Mihmvt yihlepv_t yakni auet a bilika ka mominchit hlopullit ayv, abeka puta tuk ash topa onochit sholit, yvmmak ash osh kanima yo anta na haklo mvt, isht itvnowa tok

56. Mihmvt tumahushi, okmá, keyukmvt, twmaha chito yokmá, yakni kocha yokmá nana peh kanima yo ona hoka, abeka ya okla ai itvnaha ya ashachi mvt, yvmmak ash o im ilefoka a aposhokuchi ak oh kia okla potola hinla ka, okla im asilhha tok: mihma yvmmak ash okla potonli aiyuka hokvto, momvt hlakofi tok.

CHAPTA VII.

Chisvs nan im ai ithvna vhleha hvt ibbak ik ahchifo hosh isht impa ka, Falisi vhleha hvt nan isht mihachi, 1 ; 8 mihma ilap ak osh anumpa kochanli nan vlpisa tikba in tonla cha, Chihowa i nan vlpisa ha isht kobvffi hatuk a Chisvs vt atokolit im anoli: 14 yohmi kvt nana hosh hatak chukvsh a a kocha ilvppak osh hatak a okpvni hoke, achi, 24 Chisvs vt Silofenisan ohoyo ushetk a hlakofichi mvt; 31 hatak vt ik haponaklo, micha anumpuli anuktuklot aienauk a, hlakofichi.

1. YOHMI ma Falisi vhleha, micha na-holoccochi kanohmi Chelusalem minti tuk aienā kvt ant im ai itahoba tok.

2. Atuk osh nan im ai ithvna vhleha kanimi kvt, ibbak liteha yo, yummvt ibbak ik ahchifo kak o miha, pvska isht vpa hosh maya na pisa mvt, nan isht a mihachi tok.

3. Yohmi kvt Falisi vhleha, micha Chu okla moma aienā kvt in tikba vhleha nan im vlhpisa halanli fehna hatukosh, achukmalit ibbak achifa ha yo keyukmvt, impa keyu beka tok.

4. Mihmvt ilhpak ai-itatoba mintit vla kvt, ibbak achifa ha yo keyukmvt, impa keyu beka tok. Micha nana inla ishtishko, micha ampo, mikmvt asonak lakna, anonti aiimpa achifa aienā ka a puta chohmi nan-isht-a hullocha he im vlhpisa tok vt lauvt asha hoke.

5. Yohmi mvt Falisi vhleha, micha na holoccochi vhleha aienā kash osh, i ponaklot, Na katihmi ho na chim ai ithvna vhleha hrt pin tikba vhleha nan im vlhpisa ya ik halanlo hosh, amba ibbak vt ahchifa keyu ho pvska isht vpa cho? achi tok.

6. Mihma afalaminchi mvt, Nan ilahobi hvchia ha vlhpresa ho tikbanli Esaias vt isht hvchi anohonli tuk vt, okla ilvppput iti-vlbi yokvno isht sa holitobli kia, chukvsh okvto auet a hopakishke.

7. Yohmi kia nana abuchi kvt hatak i nan-vlhpisa yo ithvnanchi hokvt, nana vlhpesa hi o keyu ho okla si aiokpahanchishke, achit holoccochi tok.

8. Yohmi kvt Chihowa i nan-vlhpisa hoka naksika pit hvsh bohli cha, hatak i nan-vlhpisa, ampo, micha ishtishko aienā achifa ho hvsh halanlishke; yohmikmvt nana yummva ai itilaui ka hvsh a yvmohmi kvt lauvshke, im achi tok.

9. Mihmvt hvchishno hvchi nan vlhpisa ya hvsh ai ahli-cha chi kvt, Chihowa i nan-vlhpisa ya aiahli hosh hvsh shitemvshke.

10. Moses okvto, Chiki, micha chishki aienā ka ish holitoblashke: yohmikma, Kvna hosh iki okmá, keyukmvt ishki

okmá, nana ho shitilemvt na miachikmvt, illi mak o illi pullashke, achi tok.

11. Yohmi kia hvchishno vto, Hatak vt iki, keyukmvt ishki okmá nana kash o vm isht ish ai yukpa he tuk a Kolban oke, yummá achi hokmvt, vba-isht aiokpuchi isht vlhpisa hoke, achi mak okvt nan ik i kanihmo kashke, hvsh achi;

12. Yohmikmvt himmakma iki, ishki ita tuklo ka nana kia isht im vta hi a hvch ik im ahnot,

13. Hvchin tikba vhleha i nan-vlhpisa isht hvsh abuchi pulla hosh Chihowa im anumpa ha hvsh akshochishke; micha nana yummá ai itilaui ka a hvchi yvmohmi kvt lauvshke, im achi tok.

14. Micha okla hash mominchit hoyot itahobit taiyahli mvt, Hvsh moma kvt hvs sa haponaklot, hvsh akostinin-chashke.

15. Nana hak osh kocha mayvt hatak a itih fohka kvt, okpvna hi vt ikshoshke: amba nana kvt a kohcha hokvto, yummak osh hatak a okpvni hoke.

16. Hatak nana hosh haksobish isht haponakla hi vt i hinlikmvt, haklashke, im achi tok.

17. Atuk o okla aiasha kash vttvt aboha ont chukowa ma, nan im ai ithuna vhleha hash osh nan-isht vlhpisa kash isht im a ponaklo tok:

18, 19. Mihma, Hvchishno ak kia na hvch ik akostinincho fehna akinli ho? peh nana hosh kocha mayvt hatak a itih fohka kvt okpvna he keyu, chukvsh ak o pit chukowa ho keyu hokvt, amba takoba yak o ont chukowa tuk mak osh, anonti a hlopulli kvt ilhpak moma ka ai it im vlhpesvchi ka hvch ik akostinincho cho? achi tok.

20. Mihmvt, Nana kvt hatak a a kohcha yummak osh hatak a okpvni hoke.

21. Hatak haknip anuka chukvsh ak o im anukfila okpulo, haui puta, ohoyo ik im iksho, micha hatak ik im iksho it in lumaka:

22. Hatak bika vbi, hukopa, inla nan im anushkunna, nan i nukkilli, haksichi, haui anukfohka, nishkin isht ik ai

vlhpeso, Chihowa ik ahobalo, ilefehnuchi, im anukfla iksho puta kvt a kohcha hoke.

23. Nan ik vlhpeso ilvppa puta moma kvt anukaka yak o asht kohcha hosh hatak a okpuni hoke, achi tok.

24. Mihmvt yummak ash asht wakaya mvt, vt Taia micha Saiton aienā yakni vhli ha ona cha, aboha ont chukkowa mvt, hatak nana kia ik akostininchō ka hi a ahni tok; yohmi kia kaniohmit luma he keyu ki tok.

25. Ohoyo hvt ushetik himita vt na shilombish okpulo ai i foka hatuk o, yummak ash pit haklo mvt, onvt iyi ituma ya hlipia tok oka.

26. Ohoyo hvt Klik osh Silofenisian im okla ai achufa a tok: mihmvt ushetik a na-shilombish okpulo a ai ishit i kohcha hinla ka yummak ash o im asilhha tok.

27. Yohmi kia Chisus vt, Ulla vhleha ak osh tikba kaiya ha yo; vlla vhleha i pvska ya ishi cha ofi puta ka pit i pilā he vlhpesa keyu hoka, im achi tok.

28. Mihma afalaminchi mvt, Ahlishke Chitokaka ma! yohmi kia ofi puta kvt ai impa nuta ya vlla vhleha im pvska boshulli yak o ai vpa chokvmo, im achi tok.

29. Mihma yummak ash o, Anumpa ilvppa pulla hatuk mak o ish iashke; chiso tek a nan-isht-ahullo okpulo vt a kohcha hoke, im achi tok.

30. Atuk o ilap in chuka yash ona mvt, nan-isht-ahullo okpulo vt a kohcha tuk o, ushetik ash osh topa paknaka itonla na ont pisa tok.

31. Mihma anonti Taia micha Saiton itatuklo yakni ash issvt ia mvt, Tekapolis yakni a iklvnna hlopullit ayvt Kalili okhvta ha ona tok.

32. Mihma achufa hosh ik haponaklo, micha anumpuli anuktuklo aienā hatuk o yummak ash isht im vla; yohmi mvt yummak ash o ibbak a isht umbitepa hinla ka, okla im asilhha tok.

33. Mihma yummak ash o okla laua ya a kohchit naksika isht ona cha, haksobish a ibbak ushi pit hiohlichi mvt, tofa cha, isunlvsh a pit halelichi tok.

34. Mihmvt, pit vba chakalit pisa mvt, hihvt, Effahlá, im achi tok: yvmmut ish tiwashke, achi hoke.

35. Mihma yvmmak ash osh ashalika haksobish vt wakama ma, anonti isunlvsh isht talakchi vt yuhapa na kohchi achukmvt anumpuli tok.

36. Yohmi ma hatak nana kia okla ik im anolo ka chj ka, im apesa tok. Yohmi kia i shahlichit im apesa kak o, anonti okla anoli kvt isht i shahli fehna tok.

37. Mihmvt nukhlakancha kvt atampa fehna mvt, Yummak okvt nan okluha kvt vlhpesa bano ho yvmihchishke: ik haponaklo atuk a haponaklochi mvt, anonti ik anumpulo atuk a anumpuli ikbishke, achi tok.

C H A P T A . V I I I .

Chisvs vt prska lumbo untuklo, micha nvní chipunta kanomosi aien a tuk a hatak tahlepa sipokni ushta impvchi, 1; 11 Falisi vhleha ha nan isht ai atokowa ya i haiakvchi ik bvnno; 14 mihma nan im ai ithvna vhleha hvt Falisi vhleha, micha Helot aien a na-prska ishit-shatvmmi a ahah! okla im ahna chj ka i miha. 22 Betsaita ya hatak lvp a yvt anta tuk o, Chisvs vt hoponayochi. 27 Pita yvt, Chishno ak osh Klaist chia mak oke, atokolit achi ma, Chisvs vt im aiokpanchi; ilap ak o il im antia hosh ile kaiyanchit nana palvmmi puta ma e pihsa chi hekvto ik pi nukwaiyo ka hi a, Chisvs vt pim abahanchi.

1. NITAK yummfa foka ma okla hvt laua fehna, micha vpa hi vt nanasi kia ik im iksho ma, Chisvs ash osh nan im ai ithvna vhleha hash hoyo mvt,

2. Okla laua vt si apehvt maya na himak nitak tuchina ka nana vpa hi vt ik im iksho hatuk o, i sa nukhakloshke.

3. Yohmi kvt okla ik impo ho in chuka ya pit yuhli li hokma, kanimi kvt mishema ho minti hatuk okvt, takla tikamba hinlvshke, im achi tok.

4. Mihma nan im ai ithvna vhleha hash osh, Yakni haiaka ilvppa katima yak o hatak vt prska ya ai ishi hosh okla ilvppa fihobla hinla ho? im achi tok.

5. Mihma i ponaklot, Prska yvt katoymi ho hvsh ishi ho? im achi ma, Untuklo, achi tok.

6. Mihma okla hvt binohla chj ka apesa tok ; micha pvska untuklo kash ishi cha, vba pit aiokpuchi cha boshullichi mvt, okla hq itikba in talohla chj ho nan im ai ithvna vhleha hash ima ma, yummak ash osh okla hash itikba in talohli tok.

7. Micha nvn chipunta kanomosi ka okla isht aya tok ; atuk o yummak ash o vba pit isht aiokpuchi mvt, yummak-ma itikba in talohla chj ka apesa tok.

8. Yohmi na okla imput kaiya tok : mihma ilhpak bo-shulli atampvt asha ka kishi untuklo ho okla ishi tok.

9. Mihma okla impa tuk vt tahlepa sipokni ushta foka tuk a tok ; yohmi ma okla hash kanima pit yuhli tok

10. Mihmvt ashalika nan im ai ithvna vhleha hash it apihvt peni pit fohkvta mvt, Talmanuhla yakni a kaniohmi ho ona tok.

11 Mihmi Falisi vhleha hvt ayt ai vla cha, imomaka pisa hosh, nan isht ai atokowa vba minti ka okla ai im a hoyo hosh himona isht it im anumpulit aisha tok.

12. Mihmi chitolit chukvsh ai anukaka hijha mvt, Na katihma ho hatak himonasi aisha ilvppvt nan isht atokowa ya okla hoyo cho ? Ahli mak o hvchim achi lishke, Hatak himonasi aisha ilvppa nan-isht atokowa nana hosh in takala he keyu mak oke, im achi tok.

13. Mihmvt issvt iwt, peni ash o anonti chukowa mvt, mish-tvnnvp o ia tok.

14. Mihma nan im ai ithvna vhleha hvt pvska okla isha he tuk vt immihaksi, yohmi mvt peni a fo ka kvt pvska achvfa ka ont ia keyu ho okla isht aya tuk a tok.

15. Mihma yummak ash osh achukmalit nan i mihvt, Falisi vhleha i pvska isht-shatvmmi, micha Helot i pvska isht-shatvmmi aienka im il anuktahlvt ahah ! ahnit hvsh pihisashke, achi tok.

16. Mihma ilap bika it im anumpulit, Pvska vt ik pim iksho kak oka, achi tok.

17. Mihma Chisus vt akostininch mvt, Na katihmi ho pvska vt ik hvchim iksho kak atuk a hvsh miha cho ? hvch ik akostininch, mikmvt hvch ik ithano aienka kvt moma ho ? hvchi chukvsh vt kvollo kvt moma ho tuma !

18. Hvchi nishkin vt ąsha kvt hvch ik peso cho ? micha hvchi haksobish vt hinli kvt, hvch ik haponaklo ho ? mikmvt hvch ik ithano cho ?

19. Puska tahlapi ho hatak tahlepa sipokni tahlapi ka in tushahliche li ma, boshulli vt kishi alota katohmi ho hvsh ishi ha tok o ? im achi ma, Auah-tukló, okla achi tok.

20. Anonti tahlepa sipokni ushta ma, untuklo tuk a a boshulli vt kishi alota katohmi ho hvsh ishi ha toko? achi ma, Untuklo, im achi tok.

21. Yohmi ma, Katiohmi ho na hvch ik akostinincho hoh cho ? im achi tok.

22. Atuk osh Betsaita vla ; yohmi ma hatak lupa yo okla isht im ona mvt, yummak ash potola chı̄ ka im asilhha tok.

23. Mihma hatak lupa yash o ibbak a halvlli cha, tumaha ha ishit kohcha ; yohmi mvt nishkin a im on tofa cha, ibbak a isht umbitepa mvt, Nanasi kia ish pisa cho ? achit i ponaklo tok.

24. Mihma vba chakali mvt, Hatak vt iti yak o chohmi hokak osh itenowa ho pisa lishke, achi tok.

25. Yohmi ma anonti nishkin ash o ibbak isht umbitepa mvt, vba chakalichi tok : mihma hlakofi cha, hatak moma ka pisa achukma tok.

26. Mihma in chuka pit chuffichi mvt, Tumaha ha ont chik chukowokmvt, anonti tumaha ąsha ka achufona kia chik im anolo kashke, achi tok.

27. Mihmvt Chisus vt nan im ai ithvna vhleha ha ai itapehvt kohchvt ivt, tumaha Sesalea Filippi ya ona tok : mihmvt takla ya nan im ai ithvna vhleha hash i ponaklot, Okla huto kuta sia ho miha cho ? im achi tok.

28. Mihma afalaminechi mvt, Chan Baptist ; yohmi kia kanimi mvt, Elias ak o achi ; kanimi kvt Hopaïi vhleha ha tok achufona mak oka, achi hoke, achi tok.

29. Mihma, Amba hvchishno vto kuta ho hvs si achi ho ? im achi ma, Pita yet afalaminchi mvt, Chishno ak osh Klaist chia mak oke, im achi tok.

30. Mihma yummak hatak nana kia ik im anolo ka chı̄ ka kellocit i miha tok.

31. Mihmvt Hatak Ushi vt nan-isht ai ilbusha in laua chi, micha hochitoka vhleha, mikmv̄t na-holitompa isht ̄asha pehlichī vhleha, anonti na-holissochi vhleha aienā ka ai im a kvlakshit illa he ; atuk mvt nitak atuchinakma anonti tana hi ̄a isht im abvchit isht ia tok.

32. Mihmvt anumpa yvmmak ash ̄o haiakvchit anumpo honli tok. Mihma Pita yvt halvlli cha, im alvmmiit isht ia tok.

33. Yohmi ma yvmmak ash osh filemvt nan im ai ithvna vhleha hash pisa mvt, Pita yash im alvmmiit, Setan chia hvt um ashaka yo ish hikiashke : chishno vto Chihowa ai im anukfila hano ish ahninchī keyu, amba hatak ai im anukfila yok mak oka, achi tok.

34. Mihmvt okla ha, micha ilap nan im ai ithvna vhleha aienā kash hoyot itvnahli mvt, Kvna hosh siakaiyvt ̄aya chik-mvt, ik ile holitoblot im ititaiyukhvna ma sholi cha, siakai-yashke.

35. Kvna hosh ilap im ilhfiopak ̄a okchalinchi ka ahni hokvt i kvnia he ; amba vno pulla, micha vbanumpa aienā pulla ho kvna hosh im ilhfiopak ̄a kanchi hokvto, mihi yosh okchalincha hi oke.

36. Hatak vt yakni ̄a mominchit immi ikbi hoh kia, anonti ilap im ishilombish ash osh i kvnia kvt, nanta ho isht im ai achukma hinla cho ?

37. Keyukmvt, hatak vt nanta hak ̄o ilap shilombish ̄a isht atobba hinla cho ?

38. Yohmi hoka hauı shahli, mikmv̄t nan-ashvchi fehna aienā aiasha ilvppa kvna kia vno, micha um anumpa aienā ka ai i hofahya atukma, mihi yo Hatak Ushi vt Iki im aholtapa il ai ishit, enchil holitopa vhleha aienā pehlichit ̄ayvt vlakmvt, i hofahya ak inla hi oke, im achi tok.

C H A P T A IX.

Chisvs vt nvnih chaha oyvt pakna ont hikia mvt inlv̄t toba, 1 ; 11 mikmv̄t Elias vt vla he achi chatuk ̄a, Chan Baptist ak osh mih mak atuk ̄o anoli ; 14 mihmvt hatak achvfa hosh shilombish ok-

pulo anukfohka kvt ik haponaklo, micha anumpula he keyu ka aieno tuk o hlakofichi; 30 mihmvt ititaiyukhna a takalit illi tuk mvt, anonti falamvt tana hi vt atuklanchit anoli; 33 nan im ai ithvna vhleha hvt nafehna bunnvt ashka, Chisvs vt nan isht i miha, 38 mihma kwna hosh nan isht ahullo okpulo ya ilap hohchifo ak o isht kocha weli hoka ik ataklvmo ka hi a i miha; 42 na yimmi im anukfila ik hochito puta yoshubli ka ai vlpesa keyu ka miha.

1. MIHMUT, Ahli mak o hvchim achi lishke, Ilvppa hiohmaya ka kanimi kvt ik illo hosh Chihowa apehlichika yvt nian-isht ai ahlika ya ai it ishit vla na pisa chi kvt, ashka hoke im achi tok.

2. Atuk osh yummak atuk a nitak hannali ma, Chisvs vt Pita, micha Chemis, mikmvt Chan aieno ka yummak bano ho pehlichi cha nvnih chaha yo pit oiya tok: mihmvt invt tobvt itikba hikia tok.

3. Mihma im ilefoka yvt shohmalali tohbit kwnia kvt, okti pushi ak o chiyuhmi tok: yohmi hatuk o nantvnna tohbichi nana ak osh i shahlichit tohbicha he keyu ki tok.

4. Mihma Elias, micha Moses itatuklo hosh ant i haiaka tok: mihmvt yummak ash osh Chisvs a it im anumpulit okla tok.

5. Yohmi ma Pita yash ot anumpuli mvt, Chisvs ash o, Pi shahli ma! ilvppa e maya kvt pim achukmvshke: yohmi ka vltipo tuckina kak o il ikbi na achufvt chimmi hokma, anonti achufvt Moses ak o immi hokma, anonti achufa kvt Elias ak o immi hashke, im achi tok.

6. Yohmi ka okla nukshopa fehna hatuk o nana a miha ik ithano ha tok.

7. Yohmi ma hoshonti hvt ant im okhlilichi tok: mihma hoshonti anukaka ya auet anumpuli kvt, Ilvppak osh Suso a holitopa mak oke, hrsh i haponaklashke, achi tok.

8. Mihma ashalika filemvt okla hopokoyo kvt, hatak inla nana kia ik peso; amba Chisvs ash bano ho ai it apicha tok.

9. Atuk o nvnih ashokt okla akowvt minti ma, nana ka okla pisa tuk vt hatak nana kia ik im anolo mak o, Hatak Ushi vt illi tuk vt tani ha ya hi a, i miha tok.

10. Atuk o anumpa yummak ash o ilap illet okla ithanvt, Illi tuk osh tani kvt nanta hak oh chishba? ahnit ilap bika it im a ponaklot itvnowa tok.

11. Mihmvt im a ponaklot, Na katihmi ho na-holissochi vhleha hvt, Elias ak osh tikba vla pulla he, okla achi cho? achi tok.

12. Mihma afalaminchi mvt, Ahli, Elias ak osh tikba vla cha, nan-okluha ka ant falaminchit apoksiacha he; mikmvt Hatak Ushi vt kaniohmit nana lawa ka isht ai ilbvsha he, micha nan isht ik ahobo ka he aien a ka isht a holisso hatuk oke.

13. Yohmi kia, Isht a holisso tok mak oka Elias vt vla ahli ho muhli: yohmi na okla kanimihchi bunna kvt yummak ash o im ai yumihchi tuk oke, huchim achi lishke, im achi tok.

14. Atuk osh nan im ai ithvna vhleha aiasha ka ona mvt, okla chinto fehna kvt aiasha ma, anonti na-holissochi vhleha hvt yummak ash o nan im asilhhvchit maya na ont pisa tok.

15. Mihma okla hvt yummak ash o pisa mvt, mih makinli ho okla nukhlakancha fehnvt, yihlept im ai onvt, okla aiok-pvchi tok.

16. Mihma na-holissochi vhleha hash o i ponaklot, Nanta mak o hvsh it im asilhhvchi hatuk o cho? achi tok.

17. Yohmi ma okla laua yash osh achufvt afalaminchi mvt, Nan-ithvnanchi ma! ssso hvt na-shilombish ik anumpulo yo il ai eshi hatuk o ishit chim vla lishke.

18. Yohmi ka kania yo ai ilhkolichikmvt, haiochichechi chatuk: mikma itukpokpokit noti ahampvt, chunnvt taha chatuk; yohmi ho na chim ai ithvna vhleha ha yummakohcha chi ka im anoli li tuk ak o, okla kohcha he keyu ke tuk oka, achi tok.

19. Mihma afalaminchi mvt, Na yimma he keyu isht-ai unchululi huchia ma! huchi takla ahanta li katiohmi foka chi cho? nana ka isht ak huchi ahno ho katiohmi foka chi cho? Isht hvs svn vlashke, achi tok.

20. Mihma yummak ash o okla isht im ona tok: mihma yummak ash pisa ma, na-shilombish ash osh mih mak-inli

hq̄ haiochichechi tok; mihma aka itula cha, shalali mvt itukpokpoki tok.

21. Mihma iki ash o i panaklot, Katiohmi foka kash o ilvppvt ai yakohmi tok o? achi ma, Ulla tomba mak a tok.

22. Yohmi ka vbi bvnna kvt luak, mikmvt oka aienā ka it a kanchi beka tuk oke: yohmi kia nana hq̄ ish kanimihcha hinlakmvt, ish pi nukkaklo cha, ish pi apelashke, achi tok.

23. Mihma Chisvs ash osh chi yimma hinla hok ma, na-yimmi hokvno nan okluha kvt ai i yvmohma hinla hoke, im achi tok.

24. Mihma vlla ya iki yash ot mih makinli no nishkin okchi mihinti hosh chitolit, Chitokaka ma! sai yimmishke; nan-isht ik a sai yimmo ya is sum apelvchashke, achi tok.

25. Mihma okla hvt yihleput ant ai itahoba ka, Chisvs vt pisa mvt, na-shilombish okpulo ash o im alvmmmit, Na shilombish ik anumpulo, mikmvt ik haponaklo aienā chia hvt ilvppa ish a kohcha cha, mikmvt himmakma chik chukowo ka he mak o chim apesa lishke, im achi tok.

26. Mihma na-shilombish ash osh tahpvlvt, yummak ash o haiochichechi fehna cha, a kohcha tok: mihma yummak ash ot illi yq̄ chohmi tok: yohmi hatuk o, Illishke, achi kvt laua tok.

27. Yokmi kia Chisvs ash osh ibbak a halvlli cha, tanichi ma; yummak ash ot wakaya tok.

28. Atuk o aboha ont chukowa ma, nan im ai ithvna vhleha hash ot ilap banot im a ponaklot, Na katihmi ho pishno vto yamma e kohcha he keyu ke tuk oh cho? achi tok.

29. Mihma, Ilvppa chohmi kvt nana hq̄ isht kohcha hi vt iksho, amba vba pit anumpuli, micha na-hullochi aienā hok mak bano hoke.

30. Mihma yummak ash asht okla ilhkoli mvt, Kalili a okla hlopulli tok: mihma hatak nana kia akostinincha hi oka, ik ahno ki tok.

31. Yohmi kvt nan im ai ithvna vhleha ha nan im abv-chi kvt, Hatak Ushi vt hatak puta ibbak a fofta hoka, okla

vba ch̄i hoke: atukma illi ha ya tuk vt, nitak ont atuchin-akma tana hi oke, im achi tok.

32. Yohmi kia anumpa yumm̄a okla ik akostinincho; yohmi mvt i ponaklo nukshopa tok.

33. Atuk o yumm̄ak ash ot Kapenavm a vla tok: mihm̄t aboha an̄uka asha hosh i ponaklot, Takla ya hvchishno bika isht hvsh it im anumpuli kash osh nanta mak atuk o? achi tok.

34. Yohmi kia lum̄t okla maya tok: yohmi kv̄t takla ya, Kv̄ta hak osh moma i shahli ahanta chishba? ahnit ilap bika okla isht it im anumpuli tuk a tok.

35. Mihma binili mvt, auahuklo kash o hoyo cha, Hatak nana hosh moma i shahli bunna hokm̄t, mihi yosh moma ka ik lauwokm̄t, anonti moma in tishu a hi oke, im achi tok.

36. Mihm̄t vlla yo halvlli cha, itintakla binilichi tok: atuk osh ishit sholi mvt,

37. Kv̄na hosh sa hohchifo pulla hatuk mak o vlla ilvppa chohmi achvfa ka holitoblikm̄t, vno ak o sa holitobli hoke: mikma kv̄na hosh vno a sa holitoblik mvt, vno ak o sa holitobli ho keyu, amba auet sa kanchi tok ak oke, im achi tok.

38. Mihma Chan vt afalaminchi mvt, Nan ithvnanchi ma! achvfa hosh chishno chi hohchifo ha nan-isht ahullo okpulo puta isht kocha weli hosh anta ho e pisa ka, ik pibafokoshke: yohmi ma il im alvmmi kano, ik pibafokho hoka, achi tok.

39. Yohmi kia Chis̄us ash osh, Hvch ik im alammo kashke: hatak vt sa hohchifo pulla hatuk mak o na fehna ka isht ai yvnihehi hokvt vno a yumm̄ak fokalechit na sa mi hacha hi vt iksho hoka.

40. Mikma kv̄na hosh hvpishno a hvp i sanali keyu hokvto, hvp-ibai achvfa hoke.

41. Klaist a immi hvchia hoka, kv̄na kia oka kapussa isht-ishko achvfa ka hvsh ishka ch̄i ho, vno sa hohchifo pulla hatuk mak o hvch ipeta hokm̄t, isht vltoba ka i hlakofa he keyu, ahli mak o hvch im achi lishke.

42. Micha kuna hosh a yimmi vhleha chipunta ilvppa achufona ma ibetvblichi hokmvt, ilapa ak o tanchi botoli tyli ak osh ikunla ya a takanli ho okhvta ha oka kwnia hokmak osh, im vlpesa he tuk mak a hi oke.

43. Yohmi ka chibbak vt chi ibetvblichi hokma, chanlit ish hokofashke : imomokpulo yosh ai-okchaya ya ont ish chukowa hok mak osh, chim vlpesa kvt chibbak vt tuklo hosh aiokpuloka, luak vt nitak nana moshola he keyu mak o, chi itvtula hi atuk a chim i shahli hoke.

44. Yvmmak oka i shushi yvt illi keyukma, anonti luak mvt nitak nana mosholi keyu hoke.

45. Mikmvt chiyi yvt chi ibetvblichi hokma, chanlit ish hokofashke : imomokpulo yosh ai-okchaya ya ont ish chukowa hok mak osh chim vlpesa kvt, chiyi yvt tuklo hosh ai-okpuloka, luak vt nitak nana moshola he keyu mak o chi itvtula hi atuk a chim i shahli hoke.

46. Yvmmak oka i shushi yvt illi keyukma, anonti luak vt nitak nana mosholi keyu hoke.

47. Mikmvt chi nishkin vt chi ibetvblichi hokma, kohchit ish kanchashke : nishkin achufa yosh Chihowa apehlichika ya ont ish chukowa hok mak osh chim vlpesa kvt, chi nishkin vt tuklo hosh aiokpuloka luak a chi itvtula hi a chim i shahli hoke.

48. Yvmmak oka i shushi yvt illi keyukma, luak vt nitak nana mosholi keyu hoke.

49. Mikma moma kvt luak o isht ai yvmmi bano kvt, vba isht aiokpvchi vt hvpi isht ai yvmma hi a ohma hi oka.

50. Hvpi vt achukma ; yohmi kia hvpi vt homi kut i kwnia hokma, nanta hak o isht hvsh homincha hinla cho ? Hvpi a hvchishno inli il anit hvsh ieshikmvt, hvchishno bika ma hvsh it i nanaiya achukmashke, achi tok.

aiokpvchit imomaka pisa : 28 mikmvt kvna hosh ilap ak o holitobli pulla hosh nan okluha ka issvt aya tuk okvno im atobba hi vt miha : 32 ilap vt ititayukhvna a takalit illi tuk mvt anonti, falamvt tana hi vt himmakma Chisvs vt anoli : 35 Chemis Chan ita tuklo kvt Chisvs a nana im asilhha ; mihma Chisvs vt ilap ma nana ho im achi mvt ; 46 ik hoponayo Batimeus a hoponayochi.

1. MIHMA yummak ash o asht wakayut minti mvt, Chatan hlopullit mish-tvnnvp a ayvt Chutea yakni a vla tok : mihma okla hvt im ai itahoba na ai yakohmi yatuk okvt, anonti nan im abvchit ahanta tok

2. Mihma Falisi vhleha hvt im ai vla mvt, imomaka pisa hosh, Hatak vt tekchi a kancha he vlhpesa hoh cho ? achit i ponaklo tok.

3. Mihma yummak ash osh afalaminchi mvt, Moses vt nanta hak o hvchim apesa tok o ? im achi tok.

4. Mihma, It i kvnia holisso hak o ikbi cha, kancha hi o Moses vt ahni tok, achi tok.

5. Mihmvt Chisvs vt afalaminchi mvt, Hvchishno hvchi chukush kvllo pulla kak o nan vlhpisa ilvppa hvchim ikbi tok.

6. Amba nan okluha toba vmmona ka Chihowa hvt nanni, tek ita tuklo ho ikbi tok.

7. Ilvppa pulla hatuk mak o hatak vt iki, micha ishki aieno ka issa cha, tekchi ak o asitia hi oke.

8. Yohmikmvt tuklo yummak atuk vt haknip achvfa hi oke. Yohmi ha mvt i himmakma tuklo mak a hi o keyu, amba haknip achvfa hoke.

9. Yohmi hoka, Chihowa hvt nana ka it a halvlichha ya, hatak nana kia ik it i filvmmichio kashke, im achi tok.

10. Atuk o aboha anukaka maya ho nan im ai ithvna vhleha hash osh anonti na mihi yash inli ho i ponaklo tok.

11. Mihma kvna hosh tekchi a kanchi cha, inla yo it auwaya hokmvt, hau i tobvt yummak ash o isht ik vlhpisalo hoke.

12. Mikma ohoyo hvt i hatak a kanchi cha, inla yo auyaya hokmvt, hau i toba hoke, im achi tok.

13. Mihma yummak ash ot potola chi ho vlla chipunta

ya okla isht im ai vla tok : atuk ak o nan im ai ithvna vhleha hvt nan isht ai vla yummak ash o im alvmmi tok.

14. Yohmi kia Chisvs vt yummma pisa mvt, ik im vlhpieso fehna cha, Ulla chipunta yut um ai vla hi a hvsh ahni cha, hvch ik im alammo kashke : ilvppa chohmi kak osh Chihowa apehlichika mak oka.

15. Ahli mak o hvchim achi lishke, Kvna hosh vlla iskitini ak o chiyuhmit Chihowa apehlichika ya aiokpuchi ho keyukmvt, yummak oka chukowa he keyu hoke, im achi tok.

16. Mihmvt yummak ash o ishit sholi cha, ibbak a isht umbitepa mvt, yukpali tok.

17. Mihmvt kohchvt iwt hina ont fohka ma, achufvt malelit mintit ant i hvchukbihlepa mvt, Nan-ithvnanchi achukma ma ! ai okchayvt bilia ya pisa la he vlhpesa kvto nanta hak o yvmohmi la chi cho ? achit i ponaklo tok.

18. Mihma Chisvs ash osh, Na katihmi ho achukma is si achi cho ? achukma vt iksho ; amba achufa kak illa : yummvt Chihowa ak oke.

19. Anumpa vlhpisa, Hau chik tobo kashke : Kvna kia chik bo kashke : Nana kia chik hukopo kashke : Anumpa ik ahlo isht atokolit chik ahanto kashke : Kvna kia chik haksicho kashke : Chiki, chishki aienka ish holitoblashke, achi puta ka ish ithanvshke, im achi tok.

20. Mihma afalaminchi mvt, Nan ithvnanchi ma ! vlla sa tomba kash inli hosh ilvppa puta ka holitoblit isht mihinti li tuk oke, im achi tok.

21. Yohmi ma Chisvs vt pisa kvt i hullo : mihmvt, Nana achufa hosh ik chim onoshke ; ish ia cha, nana hosh chim ashakmvt, ish kampila cha, ilbvsha puta ka ish imashke : yohmik mak osh na holitompa kvt vba yakni ya chin tonla he mak oke : mikmvt mintit ititaiyukhvna ant ish eshi cha, is siakaiyashke, im achi tok.

22. Mihma yummvt nan in laua fehna hatuk osh anumpa yummma haklo mvt, nukhaklot, kanima ia tok.

23. Mihma Chisvs vt filemvt hopokoyo mvt, nan im ai ithvna vhleha hash o, Na palvmmi nana kvta fehna ho nan

in laua vhleha hut Chihowa apehlichika ya chukowa hi oke, im achi tok.

24. Mihma nan ithvna vhleha hash osh anumpa yvmmma achi ka okla nukhlakancha tok. Yohmi kia Chisvs ash ot anonti anumpuli mvt, Ulla vhleha ma! im ilayak ai anukchieto hosh ahanta kvto Chihowa apehlichika ya chukowa kuno palvmmi kvt katiohmi fehna hoh chishba!

25. Kamel vt chofak ushi nishkin a hlopulli ka palvmmi kvt, hatak nan in laua yosh Chihowa apehlichika chukowa ka ik lauwoshke, im achi tok.

26. Mihma okla nukhlakancha atampa fehna mvt, Yohmikma kvt hosh okchaya hinla cho? ilap bi^ka it im achit maya tok

27. Mihma Chisvs vt atokolit pisa mvt, Hatak okmvno yohma he keyu kia, amba Chihowa hokvno ai yohmi hoke. Chihowa yak okmvno nan okluha kvt aiahli chatuk oka, achi tok.

28. Yohmi ma Pita vt, Yakeh! pishno vto mominchit il issa cha, e chiakaiya tuk oke, im achi tok.

29. Mihma Chisvs vt afalaminchi mvt, Ahli mak o hvchim achi lishke, Hatak nana hosh vno pulla, micha vbanumpa aieno hatuk mak o, in chuka, keyukmvt itibapishi vhleha, in tek puta, iki, ishki, keyukmvt tekchi, mikmvt vlla, micha yakni aieno ka issvt aya hokvto,

30. Mihi yosh okchaya takla kvt chuka, itibapishi vhleha, micha in tek vhleha, mikmvt ishki, micha vlla, anonti yakni aieno kvt mihi atuk a ohmi tahlepa achvfa ho pisa he; mikmvt nan ishtai i palvmmi myt im aieno tukmvt, anonti yakni inlakma aiokchayvt bilia ya pisa hi oke.

31. Yohmi kia tikba yatuk vt ont ishtaiyopa hi vt lawakma, anonti ishtaiyopi atuk vt tikba ya hi vt lauvt asha hi oke, achi tok.

32. Micha Chelusalem ilhkoli hosh hina vlhtot asht aya ma, Chisvs vt tikba hikvt ia ma, okokko! okla ahni mvt, iakaiya kvt nukshoput okla itvnowa tok. Mihma auah-tuklo kash o i howa cha, ilap nana im a kaniohma chi kvt im anolit,

33. Inta ! Chelusalem a iloh ilhkolistik ; yohmi ka Hatchak Ushi vt na-holitompa isht asha pehlichi vhleha, micha na-holissochi vhleha aiena ka ibbak fohka chi ; mikma illa he anumpa onochi cha, Chentail okla ho ibbak fohka chi hoke.

34. Mikmvt yummak ash o okla ishit yopula, micha fummi, mikmvt on tuftua aiena cha, okla vba chi hoke : atukma nitak ont atuchinakma falamvt tana hi oke, achi tok.

35. Mihma Sebete ushi Chemis, micha Chan ita tuklo kvt im ona mvt, Nan-ithvnanchi ma ! nana ho il ahnikma, ish pim aiahlichi hokbano il ahnishke, achi tok.

36. Mihma, Nanta hak o hvchi yvmihchi la hi a hvsh ahni cho ? im achi tok.

37. Chim a holitopa ya achvft chibbak isht impak-imma ashakma, anonti achvft vlhfubekimma asha hosh, e chiya hi ak o ik yohmi ish ahnashke, im achi tok.

38. Yohmi kia Chisus ash osh, Nana ho hvsh asilhha hokvt hvsh akostininch keyushke : isht-ishko vno vt ai ishko la chi ka hvsh ai ishka hinla cho ? mikmvt baptismo a vno vt isht baptismo li ka hvchishno vt isht a hvchi baptisma hinla cho ? im achi tok.

39. Mihma, Pi yvmohma hinlvshke, im achi tok. Mihma Chisus ash osh, Isht-ishko vno vt ai ishko li ka hvsh ai ishkokmvt, anonti baptismo vno vt isht a baptismo li aiena ka isht a hvchi baptismal chi ho mvhli hoke.

40. Amba sabbak ishtimpak imma, micha vlhfubekimma aiena asha hi okvno ima la hi o keyu ; amba kvna ho im vlhtaha mak a he oke.

41. Mihma pokoli kash ot haklo mvt, Chemis, Chan ita tuklo kash okla isht ik i yukpo fehna tok.

42. Yohmi kia Chisus vt yummak ash o hoyo cha, Chentail okla i miko vhleha hvt ai i shahlit pehlichi chatuk : mikma i hochitoka vhleha hvt nana kvt im a vlhpiesa mak osh okla ha i yvmihchi chatuk a hvsh ithaiyanvshke.

43. Yohmi kia hvchishno yokvto hvchi yvmohma he keyushke : amba hvchi kanima mvt i shahli bvnna hosh hvch ibafoka hokmvt, nan-isht hvchim vta ya he.

44. Mikma hvchi kanima hosh moma i shahli hvchi bun-nakmut, moma in tishu hvchia ha hi oke.

45. Hatak Ushi ak kia nan isht im vhta hi o, aya tok keyu : amba ilapo ak osh nan isht vhta he, anonti lawa kvt isht a hlakofa hi a ilap im ilhfiopak a isht atobba he mak a tok oke, im achi tok.

46. Mihma Cheliko a okla ai vla tok : atuk osh nan im ai ithvna vhleha, micha okla lawa fehna aieno ho pelichi cha Cheliko ash a kohchvt ia ma, Timeus ushi Batimeus lupa vrt hina lapalika yo a binilit nan asilhha tok.

47. Atuk osh yummak ash ot Chisvs Nasalet minti yatuk o haklo mut, tahpvlvt, Chisvs Lewi ushi chia hvt is sa nuk-haklashke, ahanchi tok.

48. Mihma nukchinta chi ka, i miha kvt laua tok : yohmi kia yummak o i shahlichi fehnvt tahpvlvt, Chisvs Lewi ushi ma ! is sa nukhaklashke, ahanchi tok.

49. Mihma Chisvs vt hikia cha, yummak ash o hoyo hi a miha tok. Mihma hatak lupa yash o ont hoyot, Chi nuktanla achukmashke, auet chi hoyo hoke ; wakayá, im achi tok.

50. Mihma im anchi ash o kanima pit bohli mut, wakayvt, Chisvs a ima ona tok.

51. Mihma Chisvs vt afalaminchi mut, Nanta mak o chi yvmihchi la hi a ish ahni cho ? im achi tok : mihma hatak lupa yash osh, A shahli ma ! hoponayo la hi a, im achi tok.

52. Mihma Chisvs ash ot, Ish iashke ; na chi yimmi hvt chi hlakofichi hoke, im achi tok. Mihma ashalaika hoponayo mut, hina fohkvt Chisvs a iakaiya tok.

CHAPTA XI.

Chisvs vt issuba haksobish falaia himita om binili cha, Chelusalem ont chukowa, 1. 12 Fik vpi yo nitak nana ik ano ka hi a, Chisvs vt im apesa : 15 mihmvt nan-itatoba vhleha tempel anukaka asha tuk a kocha pit tihleli. 27 Kanimi kvt nan isht ai vlpesa nana ho isht ai yvmohmi hatuk a a ponaklo tuk kia, yummak ash o Chisvs vt im a tvblich.

1. ATUK osh Chelusalem bilika Betfachi, micha Betani ita tuklo, Alif nnih fehna ho ai vla ma, nan im ai ithvna vhleha hash tuklochit tihleli tok.

2. Mihmvt, Ivt tvmahushi hvchi chapaka auet talaia ka hvsh onashke: yohmikmv^t yvmmma ont hvsh chukowa mih makinli hosh, issuba himita hatak vt ik om binilo kisha yvt asinta na hvsh pisa chi hoke: yvmmma i hotofit isht hvsh lashke.

3. Yohmi ka hatak nana kia, Na katihmi ho ilvppa hvsh yvmihchi ho? hvchim achi hokma, Chitokaka yak osh bvnnna hatuk oke, hvsh ahashke: yohmikma mih makinli ho auet pila chi hoke, im achi tok.

4. Mihma it iachi mvt, hina tuklot ant ai it afama ho, issuba himita yvt okhissa kocha ya asinta na ont pisut okla cha, i hotofi tok.

5. Mihma yvmmma hiohmaya tuk vt kanimi kvt, Nanta mak o hvsh katiohmi hosh issuba himita ya hvsh i hotofi cho? im achi tok.

6. Mihma Chisvs vt nan apesa tuk ash o i miha tok: mihma peh ik ilhkoli okla im ahni tok.

7. Mihma issuba himita yash o Chisvs a isht im vla cha, im anchi puta ka om p^ulli na yvmmak ash osh o minili tok.

8. Mihma hina ya im anchi puta ka p^ulli kvt laua ma, anonti kanimi kvt iti naksish o vmot hina ya p^ulli tok.

9. Mihma tikba ilhkoli, micha pit iakaiya aien aien tuk vt, chitoli hosh, Hosanna, Chitokaka i hohchifo il ai eshi hosh minti kvt holitopa mak oke.

10. Piki Lewi apehlichi vt Chitokaka i hohchifo il ai eshi hosh aya kvt, holitopashke; shutik tvbokaka fehna, Hosanna ai ahanchashke, achi tok.

11. Mihma Chisvs vt Chelusalem a ont chukowvt, tempel a ont chukowa tok: micha nana puta kash filemovt pisut in taha, mihma opivt taha aien hatuk o, auah-tuklo kash o pehlichi cha, pit kohehv^t Betani a ia tok.

12. Atuk osh ont onna ho, Betani a asht okla minti na, yvmmak ash osh hohchv^t tok.

13. Micha fik vpi vt hishi asha hosh, mishema ka hikia

ho pit pisa tok ; mihmvt yymma nana kia ahayuchi li yoba hinla ká, ahni cha, ona tok ; atuk osh ona mvt, fik vt a nuna ik ai ono kisha hatuk o, nana kia iksho ho, amba hishi ak bano na ont pisa tok.

14. Mihmvt Chisvs vt anumpuli mvt, Himak a pill a hatak nana kia vni isht ik chi ai vpo ho biliashke. Mihma nan im ai ithvna vhleha hv t haklo tok.

15. Atuk osh Chelusalem a okla ai vla tok : mihma Chisvs vt tempel a pit chukowa mvt, tempel anukaká ya nana a kanchi, micha a chumpa aienvt maya tuk ash kocha pit yuhli mvt, anonti tvli holisso a bohlit itatoba ai-impa, micha puchi vlpoba kanchi vhleha im ai om-binili aiena tuk ash halvllit filemohlit kinahlichi tok.

16. Mihmvt hatak nana kia ai vlbaha ya tempel a isht hlopulla hi a ik im ahno ki tok.

17. Mihmvt nan im abvchit, Um aboha ya oklushi moma kvt vba pit ai anumpuli chuka hochifa hi oke, achi hosh holisso ho keyu ? yohmi kia hvchishno yokvto na hukopa vhleha in chuka yo ish ikbishke, achi tok.

18. Mihma na-holoccochi vhleha, micha na-holitompa isht asha pehlichi vhleha aiena kvt haklo mvt, okla ak osh momvt, yummvt nan isht im abvchi ka ai im anukhlakancha hatuk o i komunta mvt, kanimihehit vbi ka ahni tok.

19. Atuk o opirt taha ma, tvmaha hash a kohchvt ia tok.

20. Atuk o onnahinli ma, fik vpi ash ot ak-isht-vla pit vhlt bvshit kvnia tuk o pit pisvt ont ilhkoli tok.

21. Mihma Pita vt pit anukfilli mvt, Yakeh ! a shahli ma ! fik ik ano ka hi o ish im apesa kash bvshit kvnivshke, im achi tok.

22. Mihma Chisvs vt afalaminchi mvt, Chihowa ak o hvsh i yimmashke.

23. Ahli pulla ho hvchim achi lishke, Kvna kia nvnih chaha ilvppa, Kanvllit, okhvta hak o pit ish okvtulashke ; im achi cha, chukvsh mvt anuktuklochi ik im iksho, amba nana ho miha tuk vt ont aiahla hi a yimmi hokmvt, im aiahla hi oke.

24. Yohmi hoka vba pit hvsh anumpulikmvt, hvsh asilhha

kut hush isha hi vt huchi yimmashke, yohmik mak osh huchim aiāhla hi oke.

25. Micha vba pit anumpulit hush hikiakmvt, nana a huchi kaniohmi tuk ashakma, hush i kashofashke: yohmi na huchishno na huchim aiashvchika puta ka Iki vba binili kut huchi kashofi makinlashke.

26. Amba hush i kashofi keyu hokmvno, huch Iki vba binili kut huchishno a na huchim aiashvchika puta ka huchi kashofa he keyu akinli hoke, im achi tok.

27. Atuk o anonti Chelusalem a okla ai vla tok: mihma yummak ash ot tempel anyukaka ya nowvt hikikia ma, naholitompa isht-asha pehlichi vhleha, micha na-holissochi vhleha, mikmvt hatak hochitoka vhleha aieno kut im ai vla tok.

28. Mihmvt, Nan isht ai vlhpesa mak o ilvppa puta ka ish yakohmichi cho? micha ilvppa puta ka ish yakomichi ka nan isht ai vlhpesa ka kuta hosh chim apesa tok oh cho? im achi tok.

29. Mihma Chisvs vt afalaminchi mvt, Uno ak kia nana achufa ka huchi ponaklo likma, hvs sum anolashke; yohmikma, vno vt nan-isht-ai-vlhpesa kaniohmi ho ilvppa puta ka isht ai yakohmichi li hatuk vt huchim anoli lashke.

30. Chan i baptismo vt vba yakni a minti hokma, keyukmvt hatak akinli hokma, nanta tuk oh cho? oh um anoli, im achi tok.

31. Mihma ilap bika it im anumpohonlit, Uba yak a tok: il achi hokma, Yohmik mak o katiohmi ho huch ik i yimmo tuk oh cho? acha hinla.

32. Amba, Hatak ak a tok; il achi hokma, achi mvt, okla moma kut Chan a hopaii fehna hoke, ahni hatuk o, okla hak o i nukshopa tok.

33. Mihmvt afalaminchi mut, Chisvs ash o, Il anola he keyushke, im achi tok. Mihma Chisvs vt afalaminchi mvt, Uno vt nan isht ai vlhpesa kaniohmi ho ilvppa puta ka isht ai yakohmichi li tuk vt ak huchim analoshke, achi tok.

C H A P T A X I I .

Pak-vpi a holokchi yo hatak toksvli ai vlpesa keyu vhleha i pota tok o isht vlpisa, 1. 13 Falisi vhleha hvt Sesa tvli holisso im itahobi ak o Chisvs a isht i ponaklo ho, anumpa falama ima. 18 Satusi vhleha hvt hatak illi falamvt tana hi ak o, Chisvs a isht i a ponaklo ho, im anoli: 28 anumpa vlpisa puta kvt kanima kak osh moma i shahli hatuk a Chisvs vt im anoli: 35 Klaist vt kvna hak o ushi ahinla ka, ponaklo: micha nan im ai ithvna vhleha ha ahah! im ahna chi ka, i miha. 41 Ohoyo ilvasha i hatak illi yosh mait tuklo ho tvli holisso abohli ya ont apitta ho, Chisvs vt im ahminchi.

1. MIHMUT nan-isht-vlpisa ho isht im anumpulit ahanta mvt, Hatak osh pak-vpi aiasha ya hokchi cha, kvti apushi isht a holihvchit apakfobli cha, oka-paki ai vlbela ya kulli cha, chuka chaha yo ikbi mvt, hatak toksvli vhleha ho i pota cha, yakni hopaki ho ia tok.

2. Atuk osh waya he ai vlpesa ma, pak-vpi aholokchi nana waya ka, hatak toksvli vhleha hash ot ipeta chi ho, hatak toksvli vhleha hash o tishu ha pit in chvffichi tok.

3. Atuk ak o yummak ash o okla it i hoklit boli cha, nana kia iksho ho pit chvffichi tok.

4. Mihma anonti tishu inla ho pit in chvffichi tok: atuk o yummak ash o tvli isht bolit, noshkobo ha mitvffit hofahyalichi fehna cha, okla pit chvffichi tok.

5. Mihma anonti inla ho pit chvffichi tok: mihma yummak ash o okla vbi tok: mihma inla yvt laua ho pit yuhli kash kia, pit aieninchit kanimi ka boli mvt, anonti kanimi ma vbi tok.

6. Yohmi hatuk o iso achvfa, i holitopa fehna yosh im anta moma mvt, Suso hokuno okla holitoba chi hoke, achi mvt, ishtaiyopi mak o yummak ma pit chvffichi tok.

7. Yohmi tuk kia hatak toksvli vhleha hash ot Ilvppak osh immi mak oke; inta! kiloh vbi na immi hatuk vt hv-pimmi hashke; it im achit maya tok.

8. Micha yummak ash o it i hoklit vbi cha, pakvpi a holokchi a ai ishit kocha pila tok oke.

9. Yohmi kvno, pák-vpi aholokchi immi atuk vto nanta hak o katiohma chī cho? Yummak ash ot vla cha, hatak toksvli vhleha hash o vbit tahlikmvt, pákvpí a holokchi ash inla ho im issa chī hoke.

10, 11. Yohmi ka, Tuli yumma chuk-ikbi vhleha hvt shiti-lemá chash o, yummvt chukbika nutaka in tola holitopa i shahli ho tobvshke. Ilvppa Chitokaka yvt yvmihchi ha tok o, hvpi nishkin a i na-fehnushke, achi Holisso Holitopa ilvppa hvch ik it im anumpolo chatuk oh cho? im achi tok.

12. Mihma nana isht apesa hosh ilap ak o isht anumpuli tuk a okla ithana hatuk osh, yummak ash o hoklit ishi bvnna hokak osh, okla ak o i nukshopa tok: mihmvt yummak ash o issvt filamohlit taha tok.

13. Mihmvt ilap im anumpa akinli ho isht ai isht kanupacha chī ka, Falisi vhleha kanimi, micha Helotian iksa aienia ho pit on tihleli tok.

14. Atuk o yummak ash ot ai vla mvt, Nan-ithvnanchi ma! chishno yokvt aiahli chia, mikmvt hatak nana kia nan isht ik chim ahobo; hatak nashuka yak o ish pisa ho keyu hatuk okvt; amba Chihowa nana aiahni ak o aiahlit ish ithvnanchi chatuk a il ithaiyanushke. Noshkobo isht chumpa tuli holisso ya Sesa yak o ima he ai vlpesa hokmá, keyukmá, nanta cho?

15. Pi kvniakmá, ik pi kvniokmá nanta chī cho? im achi tok. Yohmi kia okla nan ilahobi ka ithvna hatuk osh, Na-katihmi ho umomaka hvs sa pesa cho? iskvli isht hvs svn vla na pisa lashke, im achi tok.

16. Mihma okla isht im vla tok. Mihma, Ilvppvt kvt hak o holbvt toba ho, mikmvt kvt ho a hohchifo ho? im achi tok. Mihma Sesa yak oke, okla im achi tok.

17. Mihma Chisus vt afalaminchi mvt, Nana puta kvt Sesa yak o immi hokma, Sesa yak o hush imashke; mikmvt nana puta kvt Chihowa ak o immi hokma Chihowa ak o hush imashke, im achi tok. Mihma okla i nukhlakancha tok.

18. Yohmi ma Satusi vhleha hvt, Illi yvt falamvt tana he keyu; achi mak osh im ai vla cha, i ponaklot,

19. Nan-ithvnanchi ma! Kunə hoh kia itibapishi hvt tekchi əsha hosh vlla vt iksho ho illikma, itlbapishi ash osh tekchi atuk a itauwaya cha, itibapishi im vlla ai ikba hi o, Moses vt holisso pim ikbi tok.

20. Atuk o itibapishi hvt untuklot əsha tok; mihma akni ak osh tekchi əsha tuk osh, vlla iksho ho illi tok.

21. Mihma iakaiya kash osh itauwaya tuk osh, anonti vlla vt iksho ho illi tok: mihma ont atuchina kvt mihinli tok.

22. Mihma untuklo kash osh okla itauwaya ka, vlla vt iksho ki tok: ont ishtaiyopi ma ohoyo hash kia illi tok.

23. Yohmi ka illi yvt falamvt tanikma, okla tanik mvno, untuklo hosh itauwaya tok a yvmmma katima aiyukali mak o tekchi mak a hi oh cho?

24. Mihma Chisvs vt afalaminchi mvt, Holisso Holitopa, micha Chihowa nan isht im aiahli ka aienā ka hvch ik ithano hatuk osh hvsh ashvekhi ho keyu?

25. Illi tuk vt tani hokvto, okla ik itauwayokma, anonti auwaya he i bohli kia iksho ka hi oka; amba enchil vhleha vba yakni aiasha kak inli ho chiyuhma hi oke.

26. Mikma illi yummak okvto tana he ak o miha hosh Chihowa hvt bvfaha anuka a kaniohmit im anumpuli mvt, Uno ak osh Eblaham in Chihowa sia, mikmvt Aisaak in Chihowa siakmvt, anonti Chekob in Chihowa sia hoke, achi tok a Moses i holisso ha a hvch ik peso chatnk oh cho?

27. Yvmmak okvt illi ak o in Chihowa keyu, amba okchaya ak o in Chihowa yoke: yohmi hoka hvchishno ak osh hvsh ashvchi fehna hoke, im achi tok.

28. Mihma na-holissochi vhleha hvt achvfv̄t vla cha, okla it im anumpulit maya ka haklot, yummak ash osh vlhpesa fehna isht i miha na akostininchī mvt, Nan-vlhpisa moma i shahli katima kak osh vmmona fehna hoh cho? achit i ponaklo tok.

29. Mihma Chisvs vt afalaminchit, Nan vlhpisa moma i shahli vmmona fehna kvt, Israel vhleha ma! ho haklo, Chitokaka hvpin Chihowa vt Chitokaka achvfa hoke.

30. Micha Chitokaka chin Chihowa ya chi chukvsh a a

mominchit, chi shilombish a uhvlinchit, mikm^{ut} chim anuk-fila ha mominchit, anonti chim ishthlampko ma a mominchit isht ish holitoblashke, achi ilvppak osh nan-vlhpisa moma i shahli vmmona hoke.

31. Mikma atukla kvt yummak inli ho chohmi hoke, Chin chuka-panta hatak a ish holitobli kvt, chishno akinli ka chim itilauashke, achi hoke: nan vlhpisa inla vt ilvppa i shahli kvt ikshoshke, im achi tok.

32. Mihma na-holissochi ash ot, Ulhpesa nan-ithvnanchi ma! aiahli mak o ish miushke; Chihowa hvt achvfa; yohmi ka inla mvt iksho ho yummak illushke;

33. Mikma yummak ash o chukvsh a mominchit, im anukfila ha mominchit, anonti shilombish a mominchit, im isht-hlampko ma mominchit isht holitoblikm^{ut}, in chuka-panta hatak a holitobli kvt ilapa ai itilauechi kak osh vba isht aiokpvchi nana achvfa nipi vt momvt lua puta ka, micha vba isht aiokpvchi aienka moma i shahlishke, im achi tok.

34. Mihma yumm^{ut} vlhpesa fehna miha na Chisus vt pisa mvt, Chihowa apehlichika ya auet ish i hopaki keyushke, im achi tok. Mihma yummak ash i himmakma hatak nana kia ik nukwiyot nana ik im asilhho ki tok.

35. Mihma Chisus vt tempel anukkaka nan abvchit ahanta mvt, anumpulit, Katiohmi ho na-holissochi vhleha hvt Klaist vt Lewi a ushi achi cho?

36. Lewi vt ilapo inli kak kia Shilombish Holitopa pulla kak o Chitokaka yvt an Chitokaka ya, Svbak ishtimpak-imma ya ish binili na chin tvnnvp vhleha ha chiyi ai-o-hikia ya ikbi lashke, im achi kuno, achi tok.

37. Yohmi kvt Lewi vt ilapo akinli kvt yumm^{ut} Chitokaka hochifo tok; yohmi ka katiohmi kak osh yumm^{ut} ushi yoh cho? achi tok. Mihma hatak holitompa keyu kvt momvt i haponaklo kvt na-yukpa tok.

38. Mihma nan isht ai im abvchit ahanta kvt, Na-holissochi vhleha na-fohka hofaloha abehkvchit itvnowa kvt im achukma, micha ilhpak a kanchi ya ai it aiokpvchi aienka kak osh im achukma;

39. Mikmvt sinakak a aiasha holitopa i shahli, mikmvt impa chito asha ka aiasha holitopa i shahli aienā kak osh im achukma ;

40. Micha ohoyo i hatak illi puta in chuka a wehpuli, mikmvt peh vbanumpuli ilahobi kvt anumpa ilbusha falaia-chit itvnowa yoka, ahah ! hvsh im ahnashke ; yvmmak okvto nana palvmmi kvt i shahli hosh im vlhpisa hi oke, im achi tok.

41. Mihmvt Chisvs vt twli holisso abohli i chapaka yo ashut okla hvt twli holisso twli holisso a bohli pit apitta ka pisa tok. Mihma nan in laua atuk vt lauachit pit apitta kvt laua tok.

42. Mihma ohoyo i hatak illi ilbusha achvfa hosh vla mut, mait tuklo yvmmvt sint achvfa ik ono ho pit abehli tok.

43. Mihma nan im ai ithvna vhleha hash o hoyot, Ahli mak o hvchim achi lishke, Ohoyo i hatak illi ilbusha ilvp-pak osh twli holisso abohli pit apittvt aiasha ka moma i shahlichit fohkishke.

44. Moma kvt nan in laua im atampa hatuk osh okla bohli hatuk : amba yvmmvt ilbusha yatuk vt ishi tuk vt mominchit pit bohli, isht okchaya he tuk ash kia mominchishke, im achi tok.

C H A P T A X I I I .

Tempel, micha Chelusalem aienā kvt aiokpulokvt taha hi a Chisvs vt tikbanli anoli : micha nana kvt ont ik a yakohmo takla ka, nana kvt isht ahoba kvt kaniohma he, 1 ; 14 micha na-palvmmi kvt a kaniohma he aienā ka anoli : 24 mihmvt ilapvt aya chikma a kaniohma he puta ka anoli. 28 Fik vpi ak o nan isht it apesa hosh nana kvt ai yakohma chi ka, ai onvt mahaya hi a anoli : 32 nitak kaniohmi, hvshi kanvlli nana ho ai yakohma hi a, hatak nana hosh ithana keyu hatuk o, moma kvt il anuktahlvvt vba pit anumpo-honlit im vlhtahvt maya chi ka, miha.

1. MIHMVT tempel a a kohchvt iak fehna, nan im ai ithvna vhleha hvt achvfvvt, Nan-ithvnanchi ma ! twli hochito

puta, micha chuka hochito puta aienā kvt a kaniohmi hosh yak aiasha ka, pisá, im achi tok.

2. Mihma Chisus vt afalaminchi mvt, Chuka hochitoka yak hiohmaya ka ish pisa cho? tvli vt achvfa kia aka ik itulo ka hi vt it on tulkanchit itonla kvt iksho hoke, im achi tok.

3. Atuk osh tempel in chapaka Alif nvnih paknaka ya əsha ma, Pita, micha Chemis, mikmvt Chan, anonti Antilu aienā kvt lumvt i ponaklot,

4. Nitak katiohmik mak ə ilvppa puta kvt yohma hi ə, micha ilvppa puta kvt ont aiahla chikma, nanta hosh ai isht atokowa hi oh cho? ish pim analashke, achi tok.

5. Mihma Chisus vt afalaminchi mvt, Ahah! hvsh aiahni na hatak nana kia ik hvchi yoshublecho kashke.

6. Sa hohchifo isht hohchifo kvt itvnowa cha, Klaist sia mak oke, achi kvt laua he, micha lauachit yosublicha hi oke.

7. Yohmikma tvnv̄p əsha, micha tvnv̄p əsha he annoa puta aienā ka hvsh haklokmvt, ik hvchi komunto kashke: ilvppa puta kvt moyumvt ont a yvmoohmi pulla hi oke; yohmi kia ont ai-vhli kuto ik ai ono kisha hoke.

8. Okla achvfa kvt okla makinli ka it amokvfa he, mikmvt apehlichika achvfa kvt apehlichika mak inli ka it amokvfa hi oka; yohmikma yakni ilaiyuka ka yakni vt a winakvcha he: mikma hohchvfo, micha okla ik it im ai achukmo aienā kvt takala hi oke: yakohmi kak osh nanukháklo ai ishtia vmmona mak oke.

9. Yohmi kia ahah! hvsh il aiahnashke; okla hvch ishit nan apesa vhleha ibbak ə hvchi fohka he: mikma sinakak anukaka ma a hvchi a bohōwa he: micha atokowa hvsh im anola chi ka, vno pulla hatuk mak ə na pehlichi vhleha, micha miko puta aienā itikba ya hvch ishit ohona hi oke.

10. Yohmikma vbanumpa hak osh tikba eklushi moma ka isht ai im anuhumpa pulla hi oke

11. Amba okla hvch ishit, vt okla ibbak ə hvchi fohkikma, nana hvsh anumpula hi vt tikbanli hvch ik anukfillokmvt, anonti tikbanli anukfillit ik hvchim vlhtaho kashke:

amba hvshi kanvlli yvymma fehna ka nana ho hvchi nukfoh-kikma, yvymmak o hvsh anumpulashke: hvchishno ak osh hvsh anumpula hi o keyu, amba Shilombish Holitopa yak a hi oke.

12. Mikma itibapishi hatuk vt itibapishi hash illi issakma, anonti iki atuk vt iso ha illi issa he; mikma vlla vhleha hvt iki, ishki ita tuklo ka i nukkilli cha, illi issa hi oke.

13. Yohmikma vno pulla hatuk mak o hatak moma kvt hvchi nukkilli hi oke: yohmi kia kvna hosh aiahlit mahayvt ai vhli ka ona hok mak osh, mihi yosh okchaya hi oke.

14. Yohmi kia hopa*ii* Taniel vt isht anumpuli tok nan-okpvnni a i nukkilli vlpesa kvt a hikia he keyu kvt hikia na hvsh pisakmvt, (kvna hosh ilvppa it im anumpulikmvt akostininchashke,) yohmikma Chutea ya asha tuk mvt nu-nih chaha pit a yihlepasheke.

15. Mikma kania hosh aboha paknaka ahanta tuk mvt aboha ya akowa cha in chuka ya nana kia ai ishit kohcha chi kvt, ont ik chukowo kashke.

16. Yohmikma osapa anukkaka yo anta tuk mvt, i na-fohka ya isha chi kvt, falamvt ik aiyo kashke.

17. Yohmikma nitak yvymma foka ka kvna hosh vlla shanli hatuk, mikmvt vlla pishechi atuk aieno hokvto ai i palvymma he mak oke.

18. Micha hvsttula yo hvch ik yihlepo ka hi vt vba pit hvsh anumpohonlashke.

19. Nitak yvymma foka na-palvmmi kvt nana toba vmmoma Chihowa hvt nan ikbi tok ai vhli mihinti ka yvymma chohmi kvt iksho chatuk: mikmvt yvymma chohma he keyu ka hi oke.

20. Micha Chihowa yak osh nitak yvymma foka ka hokohlichi tuk o keyukma, hatak nana hosh okchaya he tuk keyushke: amba nan-vlhtoka ilap vt atokoli tok pulla hatuk mak o nitak yvymma hokohlichi tok oke.

21. Micha yvymma fokakma hatak nana hosh, Yakeh! Klaist vt ilvppak o antvshke, keyukmvt yakeh! yvymma antvshke, hvchim achi hoh kia, ik hvchi yimmo kashke.

22. Klaist ilahobi vhleha, micha hopa*ii* ilahobi vhleha

aieno tobvt hiohli kvt nan isht atokowa puta, micha na- fehna puta aieno ka otvnihinchit, yohma he yobakma, nan- vlhtoka vhleha nana kia yoshublicha hi oke.

23. Yohmi kia yakeh! nan okluha ka tikbanli hvchim anoli li tuk oke, ahah! hush aiahnashke.

24. Amba na-palvmmi yummak atuk a misha foka nitak okuno, hvshi vt okhlilikma, anonti hvshi ninak aya mvt ik tommo ka he.

25. Mikma vba fochik puta kvt aka fohopakma, vba shutik nana aiasha puta kvt winakvcha hi oke.

26. Yumma fokakma, Hatak Ushi vt nan-isht-aighlikha chinto, micha isht a holitopaka chinto aieno ka il ai eshi hosh hoshonti anukaka mihinti na okla pisa hi oke.

27. Yumma fokakma yummak ash ot im enchil vhleha ha pit tihleli na ilap i nan-vlhtoka vhleha ha a mahli ushta yakni atahaka ya ai vhlit shutik ont ataha pit ai vhli ka a hoyot itahoba hi oke.

28. Inta! fik vpi nan isht vlhpisa ka hush ai ithvnashke; Yummak okvt hishi toba chi hosh bokoblit tahakma, toffa chi kvt olanlosi ka hush ithana hoke.

29. Yohmi hokvt hvchishno vt yummak o hush chiyuh- mi; na-yakohmi puta kvt ont aighli na hush pisakmvt, ai vla hosi, okhissa ak kia ai itukonofa hoka hush ithanashke.

30. Ahli mak o hvchim achi lishke, Himak a okla maya iluppvt ont ik taho kisha ho, nana iluppa puta kvt a yvmoh- ma chi hoke.

31. Uba shutik, micha yakni aieno kuto ont ai iksho ka he, amba vm anumpa puta hatuk vto ont ai iksho ka he keyushke.

32. Yohmi kia nitak yummak a he, micha hvshi kanvlli isht vlhpisa yummak a he aieno hokuno, hatak nana hosh pit ithana keyu, enchil vhleha vba aiasha, mikmvt Ushi aieno kak kia pit ik ithano, amba Iki ak bano hoke.

33. Ahah! aiahnit okchvt vba pit hush anumpohonlash- ke: nitak ont ai vlhpesa hi a hush ithana keyu hoka.

34. Hatak Ushi vt hatak osh anowa hopaki ia hosh, in chuka issvt ia mvt, in tishu vhleha hash o chuka apesvchi

atokoli mvt, mominchit a toksvli aiyuka im apesa cha, okhissa atoni ash o ahah! ahnit okcha chi ka, im apesa tok o chohmi hoka.

35. Yohmi hoka ahah! ahnit hvchi okchashke: chuka chufa pehlichi vt opiakmá, keyukmvt ninak iklvnna hokmá, akaka ohonla kak okmá, keyukmvt, onnahinli kak okmá nana ho vla hi a hvsh ithana keyu hokvt.

36. Yummak keyukma ashalika vla cha, nusi hosh hvsh maya na ant hvchi pesa hinla hoke.

37. Yohmi hoka nana ho hvchim achi li kvt moma kak o Ahah! ahnit hvchi okchashke, im achi li hoke, achi tok oke.

CHAPTA XIV.

Na-holitompa isht asha micha na-holoccoi vhleha aien aien kvt Chisvs a illicha chi kvt anumpa it im achvfa, 1: 3 micha ohoyo hosh pa-shi ahama Chisvs noshkobo yo o fohopli. 10 Chutas Iskalot vt Chisvs a ishit okla ibbak a fohka chi kvt inla nan isht it im apesa. 12 Chisvs ak osh miha ho, nan im ai ithvna vhleha hvt vbanublit ont ia isht-vlhpisa ha atahli: mihma Chisvs vt ibai impa hosh na-haksichi a atokolit bihlibli; 22 mihmvt Chitokaka im ai-imprt asha hi a apesa; 27 nan im ai ithvna vhleha hvt issrt tamo he, 33 mik-mvt Pita yrt ilapa ik ithano miha he puta ka Chisvs vt tikbanli anoli. 32 Chisvs vt Ketsemane a ont chukowa cha, vba pit anum-puli; micha nan i palvmmmit ahanta. 43 Chutas vt vla cha Chisvs a ant yukachit ishi ma, nan ai ithvna vhleha hvt issrt tamo: 53 Chisvs a Kaiafas a okla isht im ona mvt, ik ahobalo fehma, mihmvt illi issa; 66 Pita yrt i shahli ha ik ithano miha tuk osh anonti falamvt nukhaklo.

1. **YUMMAK** atuk o i nitak tuklo ma, vbanublit ont ia, micha pvska ik shatvmmo aien aien kvt asha tok: mihma na-holitompa isht asha pehlichi vhleha, micha na-holoccoi okla aien aien kvt yummak ash o kaniohmit haksichit okla ishi cha, vbi bunnvt maya tok.

2. Yohmi kia, Impa holitopa maya nitak ano keyu kash-ke, yummak keyukma, okla hvt isht ik ai vlhpesot asha hinla hoke, okla achi tok.

3. Mihma yummak ash osh Betani t̄maha Saimon leplosi-vbi a tok in chuka yo impa hosh asha ma, ohoyo hvt spiknat nan-ahama toba ho alabasta kotobushi v̄lto, holitopa fehna ho išhi hosh vla tok: mihmvt kotobushi ash o koli mvt, yummak ash o noshkobo ha o fohopli tok.

4. Yohmi ma kanimi mvt chukush anukaka isht ik im v̄lhpeso fehna kvt asha tok; mihmvt, Na katihmi ho nan-ahama ilvppvt yakohmit okpulot kvnia cho?

5. Ilvppvt iskvli tahlepa tuchina atampa kia aivibi cha, ilbvsha vhleha ha i holhpela hinla tuk oka, achi tok. Mihmvt ohoyo hash o okla nan isht mihachi tok.

6. Mihma Chisus vt, Ik asha, nanta katiohmi ho hvsh achibuchi hosh? nana achukma fehna mak o a si ai yvmih-chi hoke.

7. Yohmi hoka ilbvsha yak okvto hvchim asha bilia chatuk: yohmi hokut yummak okvno peh nitak kaniohmi ho hvchishno hvsh ahnikmvt, nana achukma ka hvsh i yvmih-chi hinla hoke; amba vno vto hvchi takla anta li bilia keyushke.

8. Ilvppak ashott nana ka ai yvmihcha hinla kuto yvmih-chi hoke: sa nipi vt hollopa chi ka, tikbanli ahvumma chi hosh vla ha tuk oke.

9. Ahli mak o hvchim achi lishke: Ubanumpa ilvppvt yakni moma ka kanima fehna ho ai anuhumpakma, nana ai yakohmichi tuk ilvppak ash kia yummak ash o isht ithaiyana hi a, anohowa hi oke, achi tok.

10. Mihma auah-tuklo kash achvft Chutas Iskaliot vt yummak ash o ishit na-holitompa isht asha pehlichi vhleha ibbak fohka chi hosh im ona tok.

11. Mihma yvmma okla haklo mvt, na-yukpa mvt, t̄li holisso ima he apesa tok. Mihma kaniohmi kak osh ai v̄lhpesa na yummak ash o ishi cha, yvmma ibbak fohka hinla kvt anukfihinli tok.

12. Atuk o paska ik shatvmmo nitak v̄mnona ka v̄banvblit ontia ya okla ai v̄bi ma, nan im ai ithvna vhleha hash osh, Katima yak o il ia cha, il atahli na v̄banvblit ont ia ya ish impa hinla kvt ish ahni cho? im achi tok.

13. Mihma nan im ai ithvna vhleha hash o tuklochit pit tihleli cha, Tvmaha ha ont hvsh chukowashke: mikma hatak vt lukfi kotoba oka vlhto ho sholi kvt hvchi afama chi hoke: apihvt hvsh iashke.

14. Mihma kanima yo ont chukowakma, chuka yvamma vutta hatak ash o, Nan-ithvnanchi vt, Ubapotvlhpo ai impa aboha hvt katima yak o talaia ho, nan vñm ai ithvna vhleha ha pehlichit vbanvblit ont ia ya it ibai impa la chi cho? achishke, hvsh im ahashke.

15. Mikma vba-potvlhpo yosh chito, nana vlhtaha achukma ho hvchim anola chi hoke: yvmmak o hvsh a pim atahashke, im achi tok.

16. Mihma nan im ai ithvna ash osh irt, tvmaha ha ont chukowvt okla mvt, nana ai im anoli tuk ash ai vlhpiesa na pisvt okla tok: micha vbanvblit ont ia ya atahlit okla tok.

17. Atuk o ont opia ma yvmmak ash ot auahuklo kash o pehlichi cha, ona tok.

18. Mihma binohmayvt impa ma, Chisvs ash ot, Ahli mak o hvchim achi lishke; Svbai imptv hvsh maya kvt hvsh achufona mvt, svshit inla ibbak hvs sa fohka chi hoke, achi tok.

19. Mihma okla nukhaklo fehna mvt, achvf-aiyukvt, Uno ak oh cho? im achi ma, anonti inla mvt, Uno ak oh cho? achit isht mahaya tok.

20. Mihma afalaminchi mvt, Auah tuklo kvt achvfvt ampo achvfa ho a svbai impa kak oke.

21. Hatak Ushi yokvto isht a holihiso tok mak o aya ho mvhlishke: amba Hatak Ushi a ishit inla ibbak fohki yvmmak okvto i palvamma chi mak oke: hatak yvmmak okvt ik tobo tok okmak osh im achukma hatuk mak a chi hoke, im achi tok.

22. Mihma impa hosh maya ma, Chisvs vt puska ya ishi cha, vba isht aiokpvchi mvt, tushahliche cha, yvmmak ash o ima mvt, Ishit oh vpá, ilvppvt sa haknip mak oke, achi tok.

23. Anonti isht-ishko ya ishi cha, vba pit aiokpvchit issa mvt, yvmmak ash o ima tok: mihma momvt okla ishko tok.

24. Mihma, Ilvpput svssish nan-isht-vlhpisa himona hosh lawa ka i fohopa mak oke.

25. Ahli mak o hvchim achi lishke, Pakvpi a waya ka himmakma ak ishko mak atuk osh himonvchit Chihowa apehlichika yak o ai ishko la he nitak mak a hi oke, im achi tok.

26. Mihma vba-isht-taloa ya okla taloa mvt, kohchvt Alif nvnih ha pit ilhkoli tok.

27. Mihma Chisvs ash osh, Hvsh moma kvt himak ninak a vno pulla kak o hvsh ibetvbla chi hoke: Chukfvlhpoba apesuchi a issot boli likma, chukfvlhpoba vt it a fimimpa hi oke, achit holisso hatuk oka.

28. Yohmi kia tani li ha mvt, hvchi tikba iwt Kalili a ona la chi hoke, im achi tok.

29. Yohmi kia Pita ash osh, Moma kak osh ibetvbl i k nana kia, si yvmohma he keyu, im achi tok.

30. Mihma Chisvs vt, Ahli mak o hvchim achi lishke, Himak nitak peh himak ninak akinli, aka ka yvt hitukla ha ola takla ka hituchina ha chik svthano ish miha chi hoke; im achi tok.

31. Yohmi kia Pita ash ot i shahlichit kvlochit anumpulit, Chi awant svlli hokmvt, kaniohmi kak osh ak chithano ka miha la he keyushke, achi ma, momvt yvmmak inli ho miha tok.

32. Mihma osapushi Ketsemane hohchifo talaia ho okla ai ona tok: mihma nan im ai ithvna vhleha hash o, Uba pit anumpuli la chi t^akla ka ilvppak inli ho ho chiyá, im achi tok.

33. Mihmvt Pita, micha Chemis, mikmvt Chan aienka pehlinchit ia mvt, okokko! ahni fehna mvt, anonti nukhaklot isht alotowa tok.

34. Mihmvt yvmmak ash o, Sa shilombish vt nukhaklot atampvt illi hoke: ilvppakinli ho okchvt hvsh chiyashke, im achi tok.

35. Mihmvt itikba iwt olanlosi ona mvt, aka ont hlipia mvt, yohma hinla hokma, hvshi kanvlli ai vlhpisa atuk vt i kanvlla hinla ka, asilhha tok.

36. Mihmut, Aki Abba ma! nan okluha kvt a chim aiahli bano hoke; isht-ishko ilvppa is sa kanvllichashke: ik yohmi kia uno ak osh nan ahni li kak keyu, amba chishno ak osh nana ho ish ahni mak ashke, achi tok.

37. Micha vla mvt, nusi hosh maya na ant pisa cha, Pita ash o, Saimon chia hut chi nusi ho? hvshi kanvlli vlhpisa achvfa takla ka chi okcha he keyu cho?

38. Okchvt vba pit hvsh anumpulashke, yummak keyuk-mvt anukpuli ho ish iba chukowa hinlvshke. Shilombish okvto im vlhtaha ho mvhli kia, amba haknip ak osh tikam-bi hoke, im achi tok.

39. Mihmvt anonti kanima ia cha, vba pit anumpuli mvt, anumpa mihi ash inli ho miha tok.

40. Micha falamvt vla ma, nishkin ak osh weki hatuk osh, anonti nusi hosh maya na ant pisa tok: mihma nana ho okla im acha hi vt ik ithano ki tok.

41. Atuk o ont isht atuchina vla mvt, Himmak mak o, mayvt nusit hvsh fohashke: ont ai vhli hoke, hvshi kanvlli vlhpisa hut ai onvshke: yakeh! Hatak Ushi a ishit nanashvchi vhleha ibbak a fohka chi mak oke.

42. Ho taní; kiloh ilhkoli, sushit okla ibbak sa fohka chi hokvt olanlosi vlushke, im achi tok.

43. Yohmi ma mih makinli ho anumpuli moma na auah tuklo atuk achvfa Chutas vt okla chinto na-holitompa isht asha pehlichi vhleha, micha na-holissochi vhleha aien aiasha ka a minti hosh bvshpo falaia, micha iti tuptua aien sholi ho it apehvt vla tok.

44. Yohmi kvt ishit okla ibbak fohka chi yummak osh ot nana apesvt, Kuna ho i suksowa likma, yummak osh mih mak achi hoke; yummak o hvsh ishi cha, achukmalit ishit hvsh iashke, im achi tuk a tok.

45. Atuk osh vla makinli hosh, yummak ash o apissanlit vt im ona mvt, A shahli ma! A shahli ma! achi mvt, i suksowa tok.

46. Mihma yummak ash o ibbak onochit okla ishi tok.

47. Mihma bilikasi hiohmaya tuk vt achufut bvshpo falaia

yō ishit shufi mvt, na-holitompa isht ašha pehlichi in tishu hā ishit fahamvt haksobish a chanlit tubli tok.

48. Mihma Chisvs vt anumpuli mvt, Hatak hukopa yō ayut i kohcha hō chiyuhmit bushpo falaia, micha iti tuptua aieno sholi hosh hvs svsha chi kvt hvsh itvnowa cho ?

49. Nitak moma ka tempel anukaka ya hvchi takla antv, nan ithvnanchi li ka, hvch ik sasho chatuk: yohimi kia Holisso Holitopa yvt ont aiahli pulla chi kak o hvsh yakohmishke, im achi tok.

50. Mihma momvt yvmmak ash o issut yihlepa tok.

51. Mihma hatak himita achufa nipi bano hosh linen anchi kvt, yvmmak ash iakaiyut aya tuk o, hatak himita vhleha hut it i hokli tok.

52. Mihma linen anchi ash o kanchi cha, nipi bano hosh mokofit mellelit i kwnia tok.

53. Mihma Chisvs ash o na-holitompa isht ašha i shahli yō okla isht im ia tok; mihma yvmmma na-holitompa isht ašha pehlichi vhleha, micha hochitoka vhleha, mikmvt na-holissochi okla aieno kvt momvt im ai itvnahvt maya tok.

54. Yohmi ma Pita yvt auet mishemanchi hosh pit iakaiyvt maya mvt, na-holitompa isht ašha i shahli im aboha holitopa yak kia ona tok: mihmvt tishu vhleha hā takla ashvt luak libesha tok.

55. Mihma na-holitompa isht ašha pehlichi vhleha, micha nan-apesa moma aieno kvt Chisvs a nan isht im ai atokowa na vba chi kvt, okla akostininchi bvnna tuk osh, ik akostininchō ki tok.

56. Yohmi ka yvmmma nan isht atokoli ilahobi hokvto laua kia, nan isht atokoli kak osh ai it im achufa keyu ki tok.

57. Mihma kanohmi hosh wakaya mvt, nan isht im atokoli ilahobit,

58. Ilvppvt ibbak o, isht toba tok tempel ilvppa okpuni lish, nitak tuchinakma, inla yosh ibbak o isht toba keyu hō iikbi la chi hoke, achi ka e haklo tuk oke, achi tok.

59. Yohmi kia yvmmvt okla nan isht atokoli kvt ont ik itibai achufo akinli tok.

60. Mihma na-holitompa isht asha i shahli ash osh iklu-nna wakayvt hikia mvt, Chisus ash o i ponaklot, Afalamin-chit nana kia chik acho cho? yakohmi kvt nan isht chi atokoli ka katiohmi hatuk oh cho? achi tok.

61. Yohmi kia nana ik acho hosh lumvt asha tok. Mihma anonti na-holitompa isht asha i shahli ash ot i ponaklot, Chishno ak osh Na-holitopa ya Ushi Klaist chia mak oh cho? im achi tok.

62. Mihma Chisus vt, Mih sia mak oke: yohmi ka Hatak Ushi vt nan-oklyha imaiya ibbak ishtimpakimma ya binili, mikmvt vba hoshonti anukaka minti aieno ho hush pisa he mak oke, achi tok.

63. Mihma na-holitompa isht-asha i shahli yash ot i na-fohka ya it a hlilvffi mvt, Na katihmi ho himmakma nan isht atokowa ka iloh ahna hinla cho?

64. Chihowa isht ik ahobalo anumpa ha hush hakloshke: nanta huchim anukfila cho? achi tok. Mihma illa he vlpesa kak o, momvt okla anumpa onochi tok.

65. Mihma kanimi kvt on tuftua mvt, anonti nashuka ya ompohomo cha, ibbak bonunta isht isso cha, Akostininchit anoli, achi tok: mihma tishu vhleha hvt ibbak putha ya okla isht pusaha tok.

66. Mihma Pita yvt nutaka aboha holitopa anukaka ya asha na ohoyo himita na-holitompa isht asha i shahli in toksli vhleha hvt achvft vla tok.

67. Mihma Pita yvt libisha hosh asha na ont pisa cha atokolit pisa tok: mihmvt Chishno vt Chisus Nasalet vtta ya awant ish aya tuk akinlishke, achi tok.

68. Yohmi kia Pita yvt ik ithano ilahobit, yummva ithana li keyu; mikmvt nana ish miha kak kia ak chim akostinin-choshke, acki tok. Micha kohchvt apishia ya ona ma, aka-ka yvt ola tok.

69. Atuk o anonti ohoyo himita yosh yummak ash o pisa mvt, bilikasi hiohmaya kash o, Ilvppak osh yummva pit ai achufa mak oke, im achi tok.

70. Mihma anonti yummva ik ithano, miha tok. Yummak atuk a in chekosi ma bilika hiohmaya tuk ash ot anonti Pita

yash o, Chishno ak kia okla yvamma ish ibai achvfa yatuk o pullvshke: Kalili hatak chia hatuk osh, chim anumpa hvt pit ai achvfa hoke, im achi tok.

71. Yohmi kia Pita yash ot, Hatak ilvppa isht anumpulit hvsh maya ka ithana li keyushke, achit ik ahobalot anumpulit anumpa kvollo isht ile ononchit ishtia tok.

72. Mihma atukla ma akaka vt ola tok. Mihma Pita ash osh, Akaka yvt hitukla ha ik olo kisha ho hituchina ha chik svthano ish miha chi hoke, im achi tok Chisvs im anumpa hash pit ithaiyana tok. Mihma yvamma anukfieli mvt, ya-haya tok.

C H A P T A X V.

Chisvs a okla takchi cha, Pailat ibbak fohki, 1 ; 15 na-holitompa isht asha vhleha hvt Pailat a anukfohkechi na Balabas ak o i hotofi cha Chisvs ovnvo ititaiyukhvna ahonvhvt illa chi ho im issa : 17 mihma tvshka chipota vhleha hvt yvmmak ash o kvti tunna yo iachukolichi cha, isso : 20 mihmvt ititaiyukhvna ahonvhla chi mak o ilauet ia. 21 Chisvs a Kolkohla ya okla isht ona mvt, hatak hukopa tuklo itin takla yo a tak alichit ititaiyukhvna ahonvhlichi ; 29 mihma na-holitompa isht asha vhleha, micha okla puta kvt ishit yopula : 33 hvshi vt okhlilit kvnia ma, Chisvs vt Chihowa ha pit in tahpahanvt illi. 38 Nantvnna holitompa tempel anukaka takali tuk vt it a hlilafa ; Sintulion vt, Chisvs vt Chihowa ushi pulla tuk achi ; Chisvs vt ititaiyukhvna a takali ka, ohoyo kanimi kvt pisa. 42 Chosef vt Chisvs haknip ititaiyukhuna takali tuk a ishit akvchi cha, sepvlnka himona ilap i hikia tuk vt fohki.

1. ATUK o onnahinli makinli ho na-holitompa isht asha pehlichi hash osh hochitoka vhleha, micha na-holissochi okla, mikmvt nan-apesa vhleha moma aieno ho nana ai it im apesvt maya cha, Chisvs a takchi mvt, isht ivt, Pailat ibbak a ont fohki tok.

2. Mihma Pailat ash ot i ponaklot, Chishno ak osh Chu okla ha i miko chia mak oh cho ? achi tok. Mihma Chisvs vt, Ulhpresa ho ish mihvshke, im achi tok.

3. Mihma na-holitompa isht asha pehlichi vhleha hvt

yvmmak ash o nana ilaiyuka laua ho isht onochi tok: yohmi kia nanasi kia ilapvt afalaminchit ik miho ki tok.

4. Mihma Pailat ash osh anonti i ponaklot, Nana chik acho há cha? yakeh! nana ka isht a chi atokoli ka laua fehnvshke, achi tok.

5. Yohmi kia Chisvs ash ot nana ik acho moma tok. Yohmi hatuk o Pailat ash osh, okokko! aiahni tok.

6. Mihma vbanvblit ont ia impa asha ka ilap mak osh, kanima yo okla ahnikma, yukvt talakchi atuk a achufalit im i hotofi chatuk a tok.

7. Mihma achvfa hosh, Balabas hohchifo kvt nan-vlpisa ya itibai i sanalit ahashwa cha, nan-vlpisa i sanali kvt hatak vbi tuk vt ai it apehvt talakchi hosh itonla tok.

8. Atuk o okla laua yash ot chitolit tahpvlvt, nana ka ai i yvmihchi bilia yatuk vt yvmihcha chi ka okla im ahni tok.

9. Yohmi kia Pailat ash osh afalaminchi mvt, Chu okla i Miko ak o hvchim i hotofi la chi ka hvsh ahni cho? im achi tok.

10. Yvmmak okuno na-holitompa isht asha pehlichi vhleha hvt i nukkilli kak osh ishit ibbak fohki tuk a ithana hatuk okvt.

11. Yohmi kia na-holitompa isht asha pehlichi vhleha hash ot Balabas ak o im i hotofi pulla chi ka okla ha isht a nukfohkichi tok.

12. Mihma anonti Pailat ash ot afalaminchi mvt, Yohmi ka Chu okla i Miko hvsh achi yvmmak amo nanta ho kati-michi la he ak o hvsh ahni cho? achi tok.

13. Mihma atuklanchit chitoli hosh, Ititaiyukhvna ak o ahonvhlcí, achi tok.

14. Yohmi ma Pailat ash ot, Nanta katiohmi ho nan ik achukmo nanta mak o yvmohmi tuk oh cho? im achi tok. Mihma yvmmak o okla isht i shahlichi fehnvt tahpvlvt, Ititaiyukhvna ak o ahonvhlichí, achi tok.

15. Yohmi ma Pailat ash ot okla ha yukpali bvunna kvt, Balabas ak o im i hotofi tok: micha Chisvs ash o fvmmi mvt, ititaiyukhvna ahonvhlv illa chi mak o, yvmmak ash o ishit okla hash ibbak fohki tok:

16. Mihma tushka chipota vhleha hash ot yvmmak ash o halvllit isht vt nan ai apesa Pletolivm hohchifo hō isht ona tok : mihmvt aya achvfa tuk ash o momint hoyot itvnali tok.

17. Mihmvt na-fohka hummakbi hō ishit fokuchi mvt, kvti tvnnut iachuka ikbi cha, iachukolichi tok.

18. Mihmvt aiokpuchit, Chu okla i MIKO ma ! na chi yupa shke, achi tok.

19. Mihmvt noshkobo ha kushak ishit isso mvt, on tuf-tuv, anonti hvchikbihlepvt hikia cha, aiokpuchi aienal tok.

20. Mihmvt yummak ash o okla ishit yopula hayosh na-fohka hummakbi ash o i shufi cha, ilap i na-fohka yash inli hō okla fohkuchi mvt, ititaiyukhvna ahonvhlichia chi mak o kocha isht ia tok.

21. Mihma Saimon Silinian hatak Aleksanta, micha Lufus aienal iki vt yakni kocha vttvt minti hosh aya ma, im ititaiyukhvna ya shola chi ka okla atohnochi tok.

22. Mihma yummak ash o yakni Kolkohla, yummvt to-showakma, Noshkobo foni aiasha achi hō okla isht ona tok.

23. Mihmvt ishka chi ka oka-paki osh mvh it-ibvlhto hō okla ipeta tok ; yohmi kia ik ishko ki tok.

24. Mihmvt yummak ash o okla ititaiyukhvna ahonvhlichia mvt, hatak achvfa kvt kaniohmi aiyuka isha chi kvt nan isht a shoelit mayrt, i na-fohka yash okla it i hopela tok.

25. Yohmi kvt hvshi kanvlli vlhpisa ont atuchina hō ititaiyukhvna ya okla ahonvhlichia tok

26. Mihma anumpa isht ai onvtula hatuk holisso kvt pak-naka ya CHU OKLA I MIKO YOKE, achi hosh a holisso tok.

27. Micha hukopa tuklo hō achvft ibbak ishtimpak-imma takali ma, anonti achvft im vlhfvbekimma takali hō it aieninchit ititaiyukhvna ahonvhlichia tok.

28. Mihma holisso holitopa yrt achi kvt, Micha nan-vlhpisa kobvffi vhleha hō iba holhtiena tok achi hatuk vt ont aiahli tok oke.

29. Mihma itvnovt aya mvt, yummak ash o ik ahobalot pit i yuchunuklit, Tempel a okpuni cha anonti nitak tuchinakma ikbi chia hash osh,

30. Chishno ak inli kak osh ile okchalinchit ititaiyukhvna ya auet akowá, im achi beka tok.

31. Mihma na-holitompa isht asha pehlichi vhleha, micha na-holissochi vhleha aieno hash kia ishit yopula akinlit, Inla yokvno okchalinchi hatuk o kak osh, ilap inli hokvto ile okchalincha he keyushke.

32. E pisa cha pi yimma chi ka, himonasi ak o Islael i miko Klaist vt ititaiyukhvna ya vttvt auet ik akowá, it im achit maya tok. Mihma apehvt ititaiyukhvna ahonvhla kash kia yummak ash o na-mihachi tok.

33. Atuk o hvshi kanvlli vlhpisa isht hannali kvt ai ona ma, okhlili hvt yakni mominchit takali na hvshi kanvlli vlhpisa ont isht chakkali ka ona tok.

34. Mihma hvshi kanvlli vlhpisa ont isht chakkalik fehna, Chisus ash ot chitoli hosh tahpvlt, Eloi, Eloi, lama sabakhiani, yummvt toshowa kvt, An Chihowa ma! an Chihowa ma! nanta katiohmi ho is sa kanchi cho? achi hoke.

35. Mihma bilika hiokmaya tuk vt kanimi kvt haklo mvt, Yakeh! Elias ak o i howvshke, achi tok.

36. Mihma achvfut malelit vt na-shatvmmi o wineka ont alotoli cha, kushak o takalichit ishka chi ka pit ima mvt, Ik ashá, Elias vt vla cha ant ishit akvchikmá nana chi hokmá, keho pisá, achi tok.

37. Mihma Chisus ash osh chitoli hosh anumpuli mvt, fiopa issa tok.

38. Mihma nantvnna tempel anukaka takali kash ot paknaka ai it a hlilafvt ia mvt, aka ont taha cha tuklo tok.

39. Mihma Sintulion vt im a chapaka hikia tuk vt, yummvt chitolit makachi cha, fiopa issa na pisa mvt, Hatak ilvppvt Chihowa Ushi yatuk o pulla mvhlishke, achi tok.

40. Mihma ohoyo aieno hosh mishema ho pisvt hiohmaya ma, Meli Maktalene, micha Chemis iskitini, mikmvt Choses aieno ishki Meli, mikmvt Salome aieno kak osh takla hinli tok.

41. Yohmi kvt Kalili a anta ma, ohoyo ilvppak osh apehvt ayvt, nan isht im ashwa tok: mihma apehvt ayvt Chelusalem a ai vla tuk vt ohoyo inla yvt laua hosh pit ai okluha tok.

42. Atuk o ont opirt taha ma, nana il ai atahli nitak, yummvt nitak hullo vt onnvvt asha ho,

43. Chosef Alimahlea vtta, nan-apesa holitompa hosh, yummak kia Chihowa apehlichika hohoyo hosh anta hatuk osh, nukwaya ikshot Pailat ash o ont iba chukowa cha, Chisvs haknip a im asilhha tok.

44. Mihma Pailat ash ot mihi ash takla illi hotuma, ahni kvt nukhlakancha tok, micha Sintulion a hoyo mvt, illi tuk a ahchibakmá, nana tuk a, i ponaklo tok.

45. Micha sintulion a isht ai akostininchí mvt, haknip ash Chosef a im issa tok.

46. Mihma yummak ash ot linen lapushki yo chumpa mvt, yummak ash ishit akvchi cha, linen a a bonulli cha, sepulka tvli yosh kulvt toba ho ont bohli cha, tvli yo tonolichit sepulka okhissa yash pit o bohli tok.

47. Mihma Meli Maktalene, micha Meli Choses ishki ita tuklo kvt yummak ash a bohli ka pisvt okla tok.

CHAPTA XVI.

Enchil osh Chisvs vt falamvt tani tuk a ohoyo im anoli, 1. 9 Chisvs vt falamvt tani ha yvt Meli Maktalene a im otni tuk osh, 12 nan im ai ithvna vleha ha tuklot i haia : 14 atuk osb i himmakma auah-chvfa kash ont im otni : yohmi mvt na yimma he keyu tuk a nan isht i miha ; 15 micha vbanumpa ya kanima moyuma isht ai anumpohonla chi ka im apesa ; 19 mihmvt vba ya ia ma, vba isht anumpa hv̄t anuhumpa.

1. ATUK osh nitak hullot issa ma, Meli Maktalene, micha Chemis ishki, mikmvt Salome aienā kvt ivt yummak ash o ont ahvumma chi kvt, na-balama okla chumpa tok.

2. Atuk osh wek chukowvt ia nitak vmmona onnahinli fehna hushi kohcha ho sepulka yash okla ona tok.

3, 4. Mihmvt, Kuta hosh tvli vt chito fehna kash o sepulka okhissa a pim a kanvllicha chi ho ? ilap bika it im achi tok : mihmvt okla pit hopokoyo kash osh, a kanvlli tuk a, okla pit pisa tok.

5. Micha sepulka ya okla pit chukowa mvt, hatak himita

yvt na-fohka tohbi falaia fohka hosh, ishtimpak imma tun-nvp a binili ho, okla pisa cha, nukhlakancha tok.

6. Mihma yvmmak ash ot, Ik hvchi nukshopo kashke, Chisus Nasalet vtaa yvt ititaiyukhuna ahonvhla tuk ash o hvsh hoyoshke: tani tuk oke: ilvppa ikshoshke: okla a bohli tuk a, pit ho pesá.

7. Yohmi kia hvsh ia cha, nan im ai ithuna vhleha, Pita aienka, yvmmak okvt hvchi tikba Kalili a ia he tuk a, ont hvsh im anolashke: yvmmak o hvchi miha tuk mak oka, yvmmak o hvsh a pisa chi hoke, im achi tok.

8. Mihma tushput pit okla kohcha mvt, sepulka yash ashwvt pit yihlepa tok: nukhlakancha, wvnihinchi, micha nukshopa aienka hatuk osh, kuna kia nanasi kia okla pit ik im acho ki tok.

9. Micha Chisus vt wek chukowvt ia nitak vmmona on-nahinli fehna ho tani tuk vt, Meli Maktalene, yvmmak o nan-isht-ahullo okpulo untuklo ka a kohchi tuk ash nan tikba i haiaka tok.

10. Mihma yvmmak ash osh ivt apehvt itvnowa yatuk vt nukhaklot yaiya hosh maya ma, ont im anoli tok.

11. Mihma yvmmak ash osh okchaya na yvmmvt pisa tuk a okla haklo mvt, ik yimmo ki tok.

12. I himmakma yvmmak ash osh, tuklo hosh itvnowvt ayvt, yakni kocha itonachi ma, anonti ai inlv i haiaka tok.

13. Mihma itiachi cha, kashapa kash o ont im anoli tok: mihma yvmmak ash kia okla ik i yimmo ki tok.

14. Atuk o i himmakma auah-chufa hash osh impa hosh maya ho ont i haiaka cha, tani ha ya inla yvt pisa tuk a okla ik i yimmo hatuk oka, na yimma he keyu, micha chukush kullo aienka na nan isht ai i miha tok.

15. Mihmvt, Yakni moma ka ivt, vbanumpa ha hatak hikia puta isht hvsh im anumpohonlashke.

16. Kuna hosh yimmi cha baptismokmvt, okchaya hi oke; amba kuna hosh ik yimmo hokuto, issikkopvt bilia im vlpisa hi oke, im achi tok.

17. Micha na-yimmi vhleha hokuno nan-isht atokowa yahohmi kak osh a takanlit aya hi oke. Uno sa hohchifo ha

nan-isht ahullo okpulo puta isht kocha welikmvt, anumpa ilaiyuka anumpula hi oke.

18. Micha sinti chilita puta ka peh okla aiowa he, mikmvt ishkot illi nana kia ishko hoh kia, nan ik kanihcho ka he : abeka ya ibbak isht umbitepakma, hlakofa he bano hoke, im achi tok.

19. Yohmi mvt Chitokaka yvt ant im anumpuli mvt, vba ivt vba yakni a ont chukowa cha, Chihowa im ibbak ishtim-pak-imma ya a binili tok oke.

20. Mihma Chitokaka yvt apelahanchit anumpa ha nan isht atokowa kvt a takanlit aya hatuk ash isht aiahlichi ma, kanima moma ka vba isht ai anumpohonlit itenowa tok oke. Amen.

U B A N U M P A L U K

UT HOLISSOCHI TOK.

C H A P T A I.

Luk vt Hliopilvs a pit im anumpuli, 1. 5 Enchil vt Sakalias a ont im otvni: 13 mihmvt ushi qsha hi a i miha; 24 Elisabet vt vlla shali cha, ile luhmi. 26. Enchil vt ohoyo himita Meli a ont i haiaka; yohmi mvt Shilombish Holitopa yosh nan anukfilli ho, Klaist ishki a toba pulla hi a i miha. 39 Meli vt Elisabet a ont i nowa mikmvt ita tuklo kvt Chihowa ya aiokpahanchi. 57 Chan vt vtta cha, hakshup tvpa mvt hohchifo: 64 mihma Sakalias vt falamvt anumpuli mvt, 67 na tikbanli anolit Chihowa ha aiokpahanchi.

1, 2. NANA ka isht a pi yimmi ahli fehna vmmont isht auehinchi ka nishkin isht pisvt, nana ka isht ahashwa tuk vt yvmmma pim anohonli tok mak osh lawa kvt yvmmak atuk a isht anumpa holisso ha ikbi tuk o,

3, 4. Uno ak kia nan vmmona isht-auehinchi ka nana kvt akaniohmi tok puta ka mominchit asilhhit achukmalit akostininchli tuk vt, chishno vt nana ka isht chim annoa tuk a aiahli ka ish ithaiyana chi ka, nan-anno ma it iakaiyachi hosh pit chi holissochi la hi vt vm anukfila tuk oke; Hliopilvs holitopa fehna ma!

5. Chutea i miko Helot vt ahanta nitak a, na-holitompa isht vtta achufa Sakalias hohchifo kvt, Abia apehlichika ai ibafokha yosh anta tok: mihma tekchi vt Aalon ushetik vhleha isht-atiaka yosh, hohchifo kvt Elisabet a tok.

6. Mihi yosh yummvt tuklot Chihowa yvt pisa ho aiahli biekvt, anumpa vlpisa puta, mikmvt nan-vlpisa ilaiyuka Chihowa yvt apihisa tok a moma ka i shanaiya iksho hosh ahashwa tok.

7. Yvmohmi hosh Elisabet ak osh ushiksho yatuk ő, vlla yvt ik im iksho ket okla hosh, tüklot sipoknit taiyaha tok.

8, 9. Atuk ő yakohmi tok : ilap ai itvpeha yvt ont im ai vlhpiesa ma, yvmmvt na holitompa isht ăsha Chihowa itikba ya ă isht ai ahanta chî ka, na holitompa isht ăsha nan im vlhpisa chatuk mak ő, Chihowa in tempel ă ont chukowa cha, na-balama luacha hi vt nashoeli ho isht im vlhpisa tok.

10. Yvmohmi ma okla laua yvt na balama lua takla ka vba pit anumpuli hosh kocha ya ă aiasha tok.

11. Yvmohmi ma Chihowa im enchil vt na-balama a lua alta ishtimpak imma tvnnvp ő hikvt i haiaka tok.

12. Mihma Sakalias vt pisa mvt, nukhlakanchvt nan-nukshopa mvt anukfoyuka tok.

13. Mihma enchil ash ot, Sakalias vt chi nukshopa ná ; vba pit ish asilhha tok vt chim vlhpesa mak oke : yohmi ka chi tekchi Elisabet vt vlla nakni ő chî shala he ; mikma yummma Chan ish hochifa he ;

14. Yohmikmvt na chi yukput chim achukma fehna he ; yohmikma yvmmvt vtta ka na yukpa kvt laua hi oke.

15. Yummak okvt Chihowa ya i holitopa fehna he : mikmvt oka-paki, micha oka homi nana kia ik ishko ka hi oke : micha ishki ikfoka a kohcha mak inli hosh Shilombish Holitopa isht anukfohkvt alotowa hi oke.

16. Yvmohmikmvt yummak okvt Islael isht-aiunchululi vhleha ha lauachit in Chitokaka Chihowa ya im antia hi ă anukfohkicha he mak oke.

17. Mikmvt iki vhleha chukvsh ă falaminchit vlla puta ka ai it ibafohkit it in nanaiyachikmvt, anonti nan ik yimmo puta ma hopoyuksa vhleha ha im anukfila ha pit ai ibafohkit, okla ha anukfohki na Chihowa hoka im vlhtahe chî ka, Elias im anukfila chinto il ai eshi hosh Chitokaka itikba ya ia hi oke, im achi tok.

18. Mihma Sakalias vt, Nanta hosh katiohmi na ilvppa isht akostininchı la chî cho ? uno vt hatak sa sipokni, yohmikma sa tekchi mvt sipoknit taiyaha kuno, enchil ă im achi tok.

19. Mihma enchil ash ot afalaminchi kvt, Uno vt Chih-

wa itikba hikia Kebliel sia mak oke: mih hosh ant chit im anumpulit, nan annoa achukma ilvppa chim anoli la hi vt si vlyhtoka tuk oke.

20. Yvmohmi tuk o vm anumpa ha ont im ai vlhpiesak-mvt aiahla hi oka ik chi yimmo; yohmi hokvt ik anumpulo ish toba cha, ish anumpula he ik chim vlhpeso mak o, nana kash ot ont aiahli nitak a onak mak a hi oke, im achi tok.

21. Mihma okla hash ot Sakalias a pit hoyot aiasha mvt, tempel anukaka ya anta na hopaki hatuk o, katiohmi cho? okla ahni tok.

22. Atuk o yummak ash ot kohcha mvt, okla hash im anumpula he keyu ki tok: peh abahanchi mvt, anumpula he keyu hosh hikia hatuk o, tempel anukaka ya nana ho a pisa tuk a, okla akostininch tok.

23. Atuk o yakohmi tok; ilap na-holitompa isht ai ahanta he nitak atuk vt ont taha makinli ma, in chuka ia tok.

24, 25. Atuk o nitak yummak atuk a i himmak ha yo. tekchi Elisabet vt vlla i fohka cha, Hatak puta itintakla sa hofahya kvt a takali tuk a isht kancha chi hosh, auet sa pihsa nitak vt Chitokaka yvt ilvppak o a yakohmichi tuk oke; achi mvt ile luyuhmi na hvshi tahlapi tok.

26, 27. Atuk o hvshi ont isht hannalik fehna ohoyo himita yvt hatak Chosef hohchifo hosh, Lewi in chuka-chufa isht atiaka yo, im vlhpoa hosh ohoyo himita hohchifo mvt Meli osh, Kalili yakni tvamaha Nasalet hohchifo ho anta ho, Chihowa yvt Kebliel a pit i chuffichi tok.

28. Yvmohmi na enchil ash ot im aboha ha ant chukowa mvt, Holitopa fehna chia hvt na chi yvkpasske; Chihowa hvt chi halvlli hoke, holitopa kvt ohoyo puta moma ka ish imaiyvshke, achi tok.

29. Mihma yummak ash ot pisa mvt, yummvt nana ahan-chi ka nukhlakancha mvt, nan isht aiokpvchi katiohmi hosh yakohma hinla cho? ahnit im anukfila tok.

30. Mihma enchil ash ot, Meli vt ik chi nukshopo kash-ke; Chihowa ish i holitopa hi vt chim vlhpesa tuk oke.

31. Yohmi kvt yakeh! vlla yvt chi fohka cha, vlla nakni o ish ishikmvt, hohchifo ha Chisus ish hochifa he mak oke.

32. Yummak osh Chitokaka tobut ahantut, Nana moma i shahli Ushi hohchifa he ; yohmikma Chitokaka Chihowa yut iki Lewi im ai om binili holitopa ya ima hi oke.

33. Yohmikma yummak osh Chekob in chuka chufa isht atiaka pehlichia na bilia he : yohmikma yummak apehlichika ya ont ataha he mvt iiksho ka he mak oke, im achi tok.

34. Mihma Meli ash ot, Hatak kia ithana li keyu hatuk ano, katiohmit ilvpput yakohma chi cho ? enchil ash o im achi tok.

35. Mihma enchil ash osh anonti afalaminchit, Shilombish Holitopa yak osh chim aya he ; yohmikma Nana moma i shahli nan isht im aiahlika yut chi o hoshontikacha hi oke ; yohmi hoka na-holitopa kvt chim vta hi vt yummak kia Chihowa Ushi hohchifa hi oke.

36. Micha yakeh ! chi kanomi Elisabet vt ushiksho hohchifo chatuk kia, sipoknit taiyaha hosh vlla nakni i fohka tuk a himak vt huishi ont isht i hannali hoke.

37. Chihowa ak okvto nana kvt ik im aiahlo ka hi vt iksho hoka, im achi tok.

38. Mihma Meli ash osh, Chitokaka immi ohoyo sia ka is sa pesashke : chim anuhumpa tuk mak o nana kvt um ai ulhpiesashke, im achi tok. Mihma enchil ash ot issvt ia tok.

39. Mihma nitak yummak foka ma Meli ash ot wakaya cha, tushput vt, Chuta yakni nvnih foka twmaha chito mvt talaia ho ona tok.

40. Yohmi mvt Sakalias in chuka ya ont chukowa cha, Elisabet a aiokpuchi tok.

41. Mihma yakohmi tok ; Meli vt aiokpuchi na Elisabet vt haklo ma, vlla yut ikfoka anuka ilhkoli tok ; yohmi ma Elisabet vt Shilombish Holitopa isht anukfohkt alotowa tok.

42. Mihmvt chitoli hosh anumpulit, Holitopa kvt ohoyo puta moma ka ish imayvshke : mihma chikfoka anuka a toba mvt holitopushke.

43. An Chitokaka ishki vt ayvt um vla ilvpput katiohmi ho a yakohmi cho ?

44. Yakeh ! is si aiokpuchi ka anumpa hvt olvt sa hak-

sobish a ant fohka mak inli ho, vlla yvt na yukpa kvt sak-foka anuka ya ilhkoli kano.

45. Chitokaka yvt yvmmma nana ho im anoli tuk a ont aiahlit taiyaha hi oka, na yimmi tuk yvmmvto na yukpushke achi tok.

46. Mihma Meli ash ot, Sa shilombish vt Chitokaka ya holitobli,

47. Yohmi ma sa chukvsh vt Chihowa si okchalinchi a ai isht ilaiyukpushke.

48. Yvmmak okvt in tishu ohoyo ilbvsha ya i nukhaklot pisa tuk oke: yohmi hoka himak pillvt ia ka hatak isht ai unchululi puta kvt na-yukpa sia hochifa hi oke.

49. Yvmmak osh nana moma imaiya mak osh nafehna chinto ka a yvmmihchi tuk oke: yohmi kvt hohchifo hvt holitopa yoke.

50. Micha hatak it ai unchululi ia puta ka ilapa im antia vhleha ha yvmmvt i nukhaklo kvt ai in takali mak oke.

51. Yvmmak okvt ilapo shakba isht imaiyachi chatuk: ilapunla vhleha hvt ilap chukvsh nan isht im anukfilvt mayakma, yvmmak okvt it a fimbli chatuk oke.

52. Yvmmak okvt hochitoka vhleha im aiasha puta tuk a ai isht akakohlikmvt, anonti ilbvsha vhleha ak o holitoblich chi chatuk oke.

53. Hohchvfo ya yvmmak okvt na hochukma puta ka isht fihiblikmvt, anonti nan in laua yano nana kia ik im ikshochit kanom pit tihleli chatuk oke.

54, 55. Eblaham, mikmvt yvmmma isht ai unchululi ka i nukhaklot a bilia hi vt pin tikba vhleha ha pim anumpohonli tok vt ithaiyana mvt, in tishu Islael a apelahanchi chatuk oke, achi tok.

56. Mihmvt Meli vt yvmmma awant anta na hvshi tuchina foka mvt, falamvt in chuka ona tok.

57. Yohmi ma Elisabet vt vlla in tonla hi vt ont ai im vlpiesa mvt, vlla nakni o sholi tok.

58. Mihma in chuka panta asha, micha i kanomi vhleha aieno kvt, Chitokaka yvt yvmmma i nukhaklo fehna tuk a okla haklo mvt, ibai yukpa tok.

59. Atuk o yakohmi tok: nitak ont isht untuchina ma vlla ya hakshup tvblit itwnowa tok; atuk osh iki a hochifo-chit yummak ash Sakalias hochifo tok.

60. Mihma ishki ash osh anumpuli mvt, Yohma he keyu; amba Chan ak o hohchifa chi hoke, achi tok.

61. Mihma Chⁱ kanomi hvt kanima mvt hohchifo ilvppa isht a hohchifo kvt iikshoshke, okla im achi tok.

62. Mihmvt iki ak osh nana ho hohchifa hi a ahnik mak a chi ka, okla pit abuchi tok.

63. Mihma yummak ash ot aholissochi a hoyo cha, Hohchifo hvt Chan oke, achit holissochi tok. Mihma, Na katihami ho? momvt okla ahni tok.

64. Mihma yummak ash ot itih hvt ashalika wakama ma, isunlush vt yuhapa na anumpuli mvt, Chihowa ya aiokpahanchi tok.

65. Yumohmi ma yummma ai i bilika fullota aiasha tuk ash ot momvt nukshumpa tok: yohmi ma ilvppa yakohmi tuk vt momvt annovt Chutea yakni nvnih foka yash mominchit a hlopulli tok.

66. Mihma okla yummak ash haklo tuk vt moyumvt, Ulla katohma chi hosh ilvppvt yakohmi cho? ahanchit chukush anukkaka okla isht anukfihinli tok. Mihma Chitokaka ibbak vt yummak ash o apelahanchi tok.

67. Mihma iki Sakalias ash ot Shilombish Holitopa isht anukfohkt alotowvt, tikbanli nana anolit pit aiokpahanchit,

68-71. Islael in Chitokaka Chihowa hvt holitopashke: yummak okvt yakni toba tok taiyakla ka i hopaii hochukma aiashvt isht-auehinchi ka itih isht ai anumpohonli tok mak osh, pishno vt pin tunvp vhleha, mikmvt pi nukkilli vhleha ibbak ma mominchit il ai o hlakofa hi o, im okla talaia ka i nukhaklot pihisa cha, nan isht vlhtoba he im atahlit, isht aiokchaya chinto fehna ka ilap in tishu Lewi in chuka-chufa a pi hilechi tok.

72-75. Yohmi kvt pishno vt pin tunvp vhleha ibbak ma il ai in hlakofikmvt, pi okchayvt nitak il ai ahanta kvt, nukshumpa iksho hosh nan-ashvchi ikshot ai vlhpiesa hosh im antivt, itikba ma il ahashwa he mak o, auet pim aiahna hi vt

ilap i nan-vlhpisa holitopa anumpa kullo aienā ka pin tikba Eblaham a isht ai im il onochi tok vt ithaiyana cha, anonti nan i nukhakla he anumpa hā pin tikba vleha hā ihima tok vt aiahlichi mak oke.

76-79. Yohmikma, Ulla chishno vt Chitokaka yvt ataya chi puta ma apoksiachit, anonti hupin Chihowa nan-isht i nukhaklo chinto pulla hatuk mak o, ilap nan im ai ashvchika yvt i kashofa hosh isht-ai okchaya ma im okla hā ish ithuh-nahancha chi hosh Chitokaka itikba ish ia chi hokut, Moma imaiya i hopaii chi hohehifa hi oke. Yummak atuk pulla mak o ai okhlilika, mikmvt ai-illi ai o hoshonti aienā anukaka aiasha tuk a in tohwekelicha chi, mikmvt hvp iyi yvt ai itin-nanaiya hina foyuka chi ka apelvcha chi mak o onna tohwikeli vba minti kvt auet pi on tommishke.

80. Yumohmi tuk o vlla yash ot asenot ivt, im anukfila mvt kvllot i shahlit ia; yohmi hosh yakni haiaka ya ahanta na Islael a i haiaka he nitak vt ai ona tok.

C H A P T A II.

Chisvs vt Behlehem ak o ai vta cha, vlhpoba ai-impa peni yo foftka,

1. 8 Chukfvlpoba apesvchi vleha Behlehem bilika asha tuk o, Chisvs vt vta ka, enhil osh ont im anoli; 13 mihma enhil vleha hut laua hosh ai vla cha, ibai achvft Chihowa hā okla aiokpahan-chi. 21 Chisvs vt hakshup tvpa; yohmi ma tempel anukaka yak o Chitokaka ya pit ai im issa ma, Simeon, micha Anna aienā kvt, ayvt okla hosh tempel a ont chukowa; yohmi cha hatak okchalin-chi himona vta tuk a pisa mvt, Chihowa hā pit aiokpahanchi. 40 Chisvs vt afvmmi auah-tuklo ka ona mvt, 46 tempel o nan ai im abvchi vleha puta ka i haponaklo, nan im asilhhvchi aienā anta: 51 atuk osh falamvt Nasalet ona cha, iki, ishki aienā ka im antia hosh ahanta.

1. MIHMA yakohmi tok: nitak yummfa foka ma, yakni yummvt okluyuhvt holissa hi a Sesa Akvstvs vt apihsa tok.

2. Yakohmi ka Silenivs vt Silia i mikot ahanta mak o okla holissa he ilvppvt vlhpisa vmmona tok.

3. Mihma momvt ilap in tvmaha aiyuka a holissa chi hosh ilhkoli tok.

4, 5. Mihma Chosef ak kia, yummvt Lewi in chuka-chufa yo isht-ai-unchululi hatuk okvt, Kalili yakni Nasaleet tumaha ha vttvt kohchut ia mut, Chutea yakni Lewi in tumaha Behlehem hohchifo ho tekchi vlhpoe Meli vt vlla in tola hosi ho, it iba holissa chi hosh ona tok.

6. Atuk o yakohmi tok: yummva ont ahashwak fehna, yummvt vlla in tola he nitak vt ont ai vlhpiesa tok.

7. Mihmvt ishi ahpi kvt vlla nakni osh in tola cha, yummak ash na-hlilahli o a bonulli mvt, aboha anuka yano aiasha yvt iksho hoka, issuba ai-ilhpita yo foikit bohli tok.

8. Yohmi ma yakni yummak inli ka chukfulhpoba apesuchi vhleha hvt vlhpoba apesuchi hosh ninak a haiaka yo aiasha tok.

9. Yumohmi tuk o Chihowa im enchil vt ayvt im vla na Chihowa im a tohwekeli chinto kvt ai on tommittalaia ma, okla nukshopa fehna tok.

10. Mihma enchil ash ot, Hvchi nukshopa na; vno vt anumpa na-yukpali a chinto fehna okla moyuma ka im aya he mak o isht hvchim aya li hoke.

11. Himak nitak a nan-okchalinchi, yummvt Klaist Chitokaka mak osh Lewi in tumaha ha a hvchim ai vttvshke.

12. Yohmi ka atokowa kvt ilvppak o yakohmi ha chi hoke: Ullosi vt nahlilahli o a bonunta hosh, issuba ai ilhpitta yo foikut itonla ho ont hvsh pisa chi hoke, im achi tok.

13. Yohmi ma i mih-makinli ho enchil okla chinto yvt enchil ash o ant okla apeha cha, Chihowa ya aiokpuchit,

14. Chihowa yvt vba chaha moma i shahli ya ik a holitopá; mikmvt yakni paknaka ma ik a nanaiyá: mikmvt hatak a nana achukma im anukfilli aiencha kvt ik ai ituyulá, ahanchi tok.

15. Mihma yakohmi tok: enchil okla hash osh issut vba ya vt taha ma, chukfulhpoba apesuchi vhleha hash osh, Inta! Behlehem fehna ka kiloh ia cha, nana kvt a yumohmi tuk o, Chitokaka yvt hvpim anohonli tuk ilvppa ont eho pisashke, it im achi tok.

16. Mihmvt tushpvvt itvnovwt ona cha, Meli, Chosef ita

tuklo ka, micha v̄l̄osi atuk mvt issuba ai ilhpitta yo fohkvt itonla aienā ho okla pisa tok.

17. Yakohmit ont pisa mvt, vlla yummā nana ka okla nan isht im annoa tuk ash ot mishema a mominchit ai anoli tok.

18. Yohmi ma na yakohmi ka chukfvlpoba apesuchi vhleha hvt im anoli na okla haiyaklo tuk vt momvt, okokko! aiahni tok.

19. Yohmi kia Meli vto nana yakohmi kash mominchit chukvsh anukaka isht ithaiyanvt, anukfihinli tok.

20. Mihma chukfvlpoba apesuchi vhleha hash ot nana kvt im ai annoa tuk ash fehna ka okluhvl̄linchit haklo, micha pisa aienā mvt, Chihowa ya holitoblichit aiokpahanchit, fala-mvt okla ilhkoli tok.

21. Yvmohmi tuk o nitak ont isht untuchina ma, vlla ya hakshup wishakchi t̄bla hi a ai ona hatuk o, ikfoka anuka ik foko k̄sha mak o, enchil vt yummak o hochifo tok oka, yummak ash ot Chisus hohchifo tok.

22-24. Yvmohmi tuk o Moses vt nana apesa tok a, ishki ash ot na-hullochi nitak vt ont in taha mvt, ishi ahpi ka nakni osh v̄tta hokvto moyumvt Chitokaka ma pit im a holitopa he mak o, Chitokāka i nan-vlpisa ha a holihiso hatuk oka, yummak ash Chitokaka ima chi, micha nan-isht aiokpvchi vt puchi yoshuba tuklo, keyukmvt puchi himita yosh tukla hi o, Chitokaka i nan-vlpisa v̄to ahanchi hatuk oka, isht aiokpvcha chi hosh Chelusalem a itvlachi tok.

25. Yvmohmi ma yakeh! hatak Simeon hohchifo hosh Chelusalem a anta tok: yohmi kvt yummak okvt hatak vlpiesa, Chihowa ma holitobli aiahli hosh Islael okla nayukpali a pit hohoyo hosh anta tok: yohmi ma yummak oka Shilombish Holitopa v̄t anukfoyuka tok.

26. Yohmi kvt yummak okvt Chitokaka i Klaist a ik peso k̄sha hokvto, illa he keyu ka, Shilombish Holitopa v̄t tikbanli im anoli tok.

27. Yvmohmi tuk o Shilombish Holitopa yosh yummak ash o anukfoyuka ho ayvt tempel a ant chukowa tok: atuk

o ai yvmohma he nan-vlhpisa ha isht ai yvmihcha chi hosh iki, ishki ita tuklo kvt vllosi Chisus a sholi cha, ant chuk-owa;

28. Yohmi ma yummak ash ot ibbak ishit sholi cha, Chihowa ya pit aiokpahanchi mvt,

29. Chitokaka ma! chishno chim anumpa ha tok pulla mak o, himak okuno chin tishu hvt na-yukpa hosh ia hi a im aiahni:

30—32. Chi nan-ai-okchaya na-tohwikeli yvt oklushi nan ik ithano vhleha ha isht in tohwikela chi, micha chim okla vhleha Isael mvt isht a holitopa chi ka, okla moma itikba ish ai atahli tok a, sa nishkin vt pisa hoke, achi tok.

33. Yohmi ma yummak ash o ishki, Chosef ita tuklo kvt yummna nana kvt isht anumpa ka, anukhlakancha tok.

34, 35. Mihma Simeon ash ot, yummvt ai yukpvt okla hi a, im aiahnit vba isht asilhha; yohmi mvt ishki Meli ash o, Yakeh! vlla ilvpput Isael okla hvt isht ai akakoha, mikma anonti a tana he aiena kvt law he: micha nan-isht-atokowa ka i sanalit isht anumpohonli na chukvsh law nan isht im anukfila puta mvt ai otaiyana he mak o isht ai vlhtoka hoke; ahli, mikmvt chishno chi shilombish ma aieninchit bushpo falaia yvt a hlopulla hi oke; im achi tok.

36. Yohmi ma ohoyo hopaai Anna hohchifo Ase isht ai unchululi, Fanuel ushetik osh, himitasit hatak auwaya tuk o, afummi untuklo ma illi tuk o, antvt sipoknit kvnia tok.

37. Yohmi kvt vlhtaklv hikia tuk a afummi pokoli unuchina akocha ushta foka hosh, yummak okvt tempel a issvt ik aiyo hosh, nitak, micha ninak aiena ka na-hullochi, micha vba pit anumpuli aiena hosh Chihowa ma isht a holitoblit ahanta tok.

38. Atuk osh yummak ash ot yummak fehna ma ant chukowa mvt, Chihowa ha, yooke, achit aiokpvchi akinli tok: mihmvt isht ai okchaya hi a Chelusalem a hoyot aiasha tuk puta ka yummak ash ai isht im anumpohonli tok.

39. Yvmohmi ma Chihowa i nan-vlhpisa hatuk ash mominchit nana ka ont aiahlichit taiyahli mvt, falamvt, Kalili yakni ilap o in tymaha Nasalet a it onachi tok.

40. Atuk o vlla yash ot asvnot ia mvt, im anukfila hvt hopoyuksvt alotvt kvllo*t* i shahlit mahaya; yohmi ma Chihowa nan isht ahniechi ka mvt ai anukfoka tok.

41. Ubanvblit ont ia nan-ai-impa holitopa ashakma iki, ishki ita tuklo kvt afummikma Chelusalem a itiachi beka tok.

42. Atuk osh impa holitopa isht asha yummak oh chatuk mak osh ont ai vlpiesa ma, yummak ash ot afummi auah tuklo ho, Chelusalem a ilhkoli tok.

43. Atuk osh nitak vlpisa hatuk vt ont in taha cha, falamvt itiachi ma, vlla Chisvs ash ot olbvlaka Chelusalem a anta hokak o; Chosef, micha ishki ita tuklo kvt ik akostincho ki tok.

44. Amba okla it apehvt asht aya ka takla aya he ak o im ahombvt, ayvt nitak achufa nowvt okla tok: mihmvt yummak ash ilap i kanomi vhleha, micha ai it ithvnaka puta itin takla ya a hoyo tok.

45. Atuk osh yummak ash ik ahayucho mvt, hoyo kvt falamvt Chelusalem a itiachi tok.

46. Atuk ak o yakohmi tok: nitak ont atuchina ho yummak ash ot tempel anukaka ya hatak nan-ithvnanchi vhleha i haponaklo, micha nan im a ponaklo aieno hosh takla asha na ont ahayuchit okla tok.

47. Mihma yummvt nan-ithana, micha anumpa afalamin-chit miha imponna aieno ka okla haklo mvt, momvt okokko ! aiahni tok.

48. Mihma yummak ash ot ont pisa mvt, nukhlakanchvt okla tok: mihma ishki ash ot, Soso hvt nanta katiohmi ho ish pi yakohmichi na chiki ita tuklo li kvt nukhaiyaklot chi hoyo li cho ? im achi tok.

49. Yumohmi ma yummak ash ot, Nanta katiohmi ho hvs sa hoyo hosh ? Aki nan isht im a kaniohmi ka isht ahanta la he vlpiesa kuno, hvch ik ithano cho ? im achi tok.

50. Mihma anumpa yummak ash ot, yummvt isht im anumpuli ka, ik ai akostincho kit okla tok.

51. Mihma yummak ash ot awant ia cha, falamvt Nasalet a ona mvt, im antia achukma hosh ahanta tok: yohmi kia

ishki ash ot anumpa yummak atuk ash mominchit ilap chukvsh ma isht il anukfohkit ieshi tok.

52. Mihma Chisvs ash ot ahopoyuksvt asvnnot mahaya mvt, Chihowa, micha hatak puta aienka im a holitopa kvt i shahlit mahaya tok.

CHAPTA III.

Chan Baptist vt ubanumpa isht anumpohonli, 1: 15 Klaist a ato kowa anoli; 20 anonti aboha kyllo fohka. 21 Chisvs vt baptismo, yohmi ma yummak okvt Chihowa ha Ushi pulla hatuk vt annoa. 23 Alum ak o isht ai unchululit mihinti ho, Chisvs vt hatak a toba tok a vlhtokowa annoa.

1. TIBELIUS Sesa yvt mikro tobvt ahanta tok afvmmi ont isht auah tahlapik fehna, Pontius Pailat vt Chutea yakni apehlichi ma, Helot vt Kalili ak o apehlichi ma, anonti itibapishi Filip vt Itulea, micha Hlakonitis yakni aienka apehlichi ma, Lisanias mvt Abilene ak o apehlichi ho,

2. Annas, micha Kaiafas ita tuklo kut na-holitompa isht asha i shahli yosh ashwa ho, Chihowa im anumpa hvt Chan Sakalias ushi a yakni haiaka yo im ai ona tok.

3—6. Yvmohmi ma hopaii Esias im anumpa holisso ha a holibiso kvt, Achufa hosh yakni haiaka yo ai anumpohonlit, Chitokaka ataya hi a apoksiachit, i hina puta ka oh apissulechí: kolukbi puta mvt momvt ik alotá: mikma nvnih, micha nvnih hochito aienka moma kut akanlosit ik tahá: hina fullota atuk kia apissvt ik tobá: yohmi ma ai itilaui iksho ke tuk vt itilauit tahashke: yohmikma hatak moma kvt Chihowa i nan okchalinchi a pisa he mak oke, achishke; ahanchi tok mak o, yummak okvt ai ashvchika puta ka isht a kashofa chi ka, ile kostininchit baptismal hi a isht anumpohonlit Chatan a bilika yakni a mominchit aya tok.

7. Mihmvt im a baptismal chi hosh ok a laua yut ai vla ma, Sinti chilita isht-atiaka hvchia ma! na palvmmi mihinti ka hush i hlakofa hi a, kuta hosh hvchim anoli tuk oh cho?

8. Yohmi hokvt ile kostininchí ai it vlhpesa mak o vnit hvsh wayashke; micha, Himona Eblaham ak osh píki yoke, acha hi okvno hvch ik il anukfillo kashke; Chihowa hvt tvli yak aiasha ka, Eblaham im vlla ya chí ka ai ikba hinla hoka, hvchim achi lishke.

9. Yohmikma himak ak kia iskifa yvt iti puta ak-isht-vla ya ai itonla hoke; yohmi hatuk o iti yvt vni achukma ho vnit waya keyu hokvto, moyumvt chayvt akakoha cha, luak a pit itokaha hi oke, im achi tok.

10. Yohmi ma okla hash osh i ponaklot, Yohmi kvno nanta hak o e katiohma chí ho? achi tok.

11. Mihma afalaminchi kvt, Kvna hosh na-fohka yvt in tuklokmt, kanima hosh ik im ikshokma ik in chvfalí; mik-ma kanima hosh ilimpa hvt im ashá kvt, yohmi makinlashke, im achi tok.

12. Yohmi ma pblikan vhleha hak kia baptisma chí hosh ai vla mvt, Nan-ithvnanchi ma! nanta hak o e katiohma chí cho? im achi tok.

13. Yohmi ma, Nana hvchim vlhpisa tuk vt atamblit hvch ik hoyo kashke, im achi tok.

14. Yohmi ma tvshka chipota vhleha hak kia i ponaklot, Mikma pishno ak osh nanta hak o e yvmohma chí ho? achi tok: yohmi ma yummak ash o, Hatak nana kia hvch ik o mahlantokmt, anonti kvna kia a holvbit hvch ik wehpulo kashke; yohmikmt na hvchim ai vlhtoba ma, Ulhpiesa akinli hvsh aiahnashke, im achi tok.

15. Okla hvt nana ka pit hohoyo hosh ashá hatuk, atul osh hatak moma kvt, Chan a yummak osh Klaist mak okmá, keyukmá, nanta ho chishba? ahnit chukvsh a isht anukfielit okla aiasha ma,

16. Chan ash ot mominchit im anumpullit, Uno yokvto oka yo isht hvchi baptismochi li mvhlí; yohmi kia achvfa kvt a shahli fehna hosh mihinti ka i shulush isht-talakchi a uno vt hlitolí la hi-o si ahoba keyu hoke; yummak osh Shilombish Holitopa, micha luak aieno ho isht hvchi baptismocha hi oke.

17. Yummak osh i nan-isht mushahchi yvt ibbak a foyuka : yohmi kvt i nan-anihechi yatuk ma achukmali fehnvt kashofa he ; mikmvt onush atuk ma kanchak a pit ashachikmvt, amba hakhlophil okvno luak vt moshola he keyu a isht hukma hi oke, ahanchi tok.

18. Micha okla ha nana inla mvt laua ho isht ai i mihi-hvt, vbanumpa ha isht im anumpohonli tok.

19. Yohmi kia Helot miko yvt ilap itibapishi Filip tekchi Helotias atuk, micha Helot vt nan ik vlhpeso puta ai yvmohmi chatuk ash, pit a mominchit atokowvt nan isht ai i miha hatuk o.

20. Nana ik ai vlhpesacho ke tuk moma kvt ilvppakma isht ai ibafokhi hosh Chan a aboha kvollo fohkit im okhishta tok.

21. Okla moyuma kvt baptismot taha ma, yakohmi tok : Chisvs ak kia baptismo cha, vba pit asilhha ma, vba yvt auet tiwa,

22. Yohmi ma Shilombish Holitopa yvt nipi asha hosh puchi-yoshuba chiyuhmit vba mintit im vla ma, vba ya anumpa hvt auet takali kvt, Chishno ak osh svso a holitopa chia hoke ; chishno ak o nan isht chi a sai yukpa mak oke, achi tok.

23. Mihma Chisvs vt afummi pokoli tuchina ka ona foka hosh, peh im ahoba kvno, Chosef ak o ushi a tok : mihma yvmmvt Heli ak o ushi a tok.

24. Mihma yvmmvt Mahlat ak o ushi a tok : mihma yvmmvt Lefai ak o ushi a tok : mihma yvmmvt Melchi ak o ushi a tok : mihma yvmmvt Channa ak o ushi a tok : mihma yvmmvt Chosef ak o ushi a tok.

25. Mihma yvmmvt Mattahlias ak o ushi a tok : mihma yvmmvt Amos ak o ushi a tok ; mihma yvmmvt Naum ak o ushi a tok ; mihma svmmvt Esli ak o ushi a tok : mihma yvmmvt Nakke ak o ushi a tok :

26. Mihma yvmmvt Maath ak o ushi a tok : mihma yvmmvt Mattahlias ak o ushi a tok : mihma yvmmvt Semei ak o ushi a tok : mihma yvmmvt Chosef ak o ushi a tok : mihma yvmmvt Chuta ak o ushi a tok :

27. Mihma yvmmvt Choanna ak o ushi a tok: mihma yvmmvt Lehesa ak o ushi a tok: mihma yvmmvt Solobabel ak o ushi a tok: mihma yvmmvt Salahiel ak o ushi a tok: mihma yvmmvt Neli ah o ushi a tok:

28. Mihma yvmmvt Melchi ak o ushi a tok: mihma yvmmvt Alli ak o ushi a tok: mihma yvmmvt Kosam ak o ushi a tok; mihma yvmmvt Elmolam ak o ushi a tok: mihma yvmmvt El ak o ushi a tok.

29. Mihma yvmmvt Chose ak o ushi a tok: mihma yvmmvt Eliesel ak o ushi a tok: mihma yvmmvt Cholim ak o ushi a tok; mihma yvmmvt Mathlat ak o ushi a tok: mihma yvmmvt Lefai ak o ushi a tok.

30. Mihma yvmmvt Simeon ak o ushi a tok: mihma yvmmvt Chuta ak o ushi a tok: mihma yvmmvt Chosef ak o ushi a tok: mihma yvmmvt Chonan ak o ushi a tok: mihma yvmmvt Eliakim ak o ushi a tok.

31. Mihma yvmmvt Melea ak o ushi a tok: mihma yvmmvt Menan ak o ushi a tok: mihma yvmmvt Mattahla ak o ushi a tok: mihma yvmmvt Nahlan ak o ushi a tok: mihma yvmmvt Lewi ak o ushi a tok.

32. Mihma yvmmvt Chesse ak o ushi a tok: mihma yvmmvt Obet ak o ushi a tok: mihma yvmmvt Boos ak o ushi a tok: mihma yvmmvt Salmon ak o ushi a tok: mihma yvmmvt Naason ak o ushi a tok.

33. Mihma yvmmvt Aminatab ak o ushi a tok: mihma yvmmvt Alam ak o ushi a tok: mihma yvmmvt Eslom ak o ushi a tok: mihma yvmmvt Fales ak o ushi a tok: mihma yvmmvt Chuta ak o ushi a tok.

34. Mihma yvmmvt Chekob ak o ushi a tok: mihma yvmmvt Aisaak ak o ushi a tok: mihma yvmmvt Eblaham ak o ushi a tok: mihma yvmmvt Hlala ak o ushi a tok: mihma yvmmvt Nachol ak o ushi a tok.

35. Mihma yvmmvt Saluk ak o ushi a tok: mihma yvmmvt Lakau ak o ushi a tok: mihma yvmmvt Falek ak o ushi a tok: mihma yvmmvt Hebeh ak o ushi a tok: mihma yvmmvt Sala ak o ushi a tok.

36. Mihma yvmmvt Kainan ak o ushi a tok: mihma

yummvt Alfaksat ak o ushi a tok: mihma yummvt Sem ak o ushi a tok: mihma yummvt Noah ak o ushi a tok: mihma yummvt Lamek ak o ushi a tok.

37. Mihma yummvt Mehlusala ak o ushi a tok: mihma yummvt Enok ak o ushi a tok: mihma yummvt Chalet ak o ushi a tok: mihma yummvt Maleleel ak o ushi a tok: mihma yummvt Kainan ak o ushi a tok.

38. Mihma yummvt Enos ak o ushi a tok: mihma yummvt Seth ak o ushi a tok: mihma yummvt Alam ak o ushi a tok: mihma yummvt Chihowa ak o ushi a tok.

CHAPTA IV.

Chisvs vt, nan-isht-ahullo okpulo yosh imomaka pihsa ma, ik impo o nitak pokoli ushta mvt, nan-isht ai imomaka pisa puta ka imaiyachi, 1. 14 Chisvs vt falamvt Kalili a ona cha, vba isht anumpohonli; 16 atuk osh Nasalet a ona cha, nitak hullo yo sinakak a nan ai ithvnanchi: 28 mihma okla hvt ik im vlpeso mvt, vbi bvnna; 31 Chisvs vt Kapenarm a ona cha, nitak hullo ya nan ithvnanchit ahanta mvt, 33 nan-ishtahullo okpullo ma kohchichi; 38 Pita tekchi ishki a hlakofichi; 40 mihmvt nan abeka ilaiyuka laua ka isht ahullo fehna kia ai yvmihchit ahanta mvt, 43 Kalili fullota ka vbanumpa ya isht ai anumpohonli.

1. CHISVS vt Shilombish Holitopa isht anukfohkvt im alotowa hosh, Chatan vttvt falamvt ia ma, Shilombish ash ot im aiahni na ayt yakni haiaka ont chukowa na,

2. Nitak pokoli ushta ka Setan vt imomaka pisa tok. Mihma nitak yvmmma fehna ka nanasi kia vpa tok keyu: atuk osh yummvt ont taha na misha pilla mvno hohchvfo tok.

3. Yohmi ma Setan ash ot, Chihowa Ushi chia hokmvt, tul iivppvt pvska toba chi i mihá, im achi tok.

4. Yohmi ma Chisvs vt afalaminchi mvt, Hatak vt pvska yak bieka o ai okchaya he keyu; amba Chihowa im anumpa moma kak ashke; achi kvt holisso hoke, im achi tok.

5. Mihma Setan ash ot yvmmak ash ilauelit nrnih chaha

yo isht oiya cha, yakosi itin takla fehna ho miko apehlich
puta yakni aasha ka mominchit i haiakvchi tok.

6. Mihmvt Setan ash ot, Nan im aiahlika, micha im a holitopaka aieno ilvppa mominchit chima lashke; yummvk okvt vno ak o vmmi toba tok: yohmi ka kvna ho vno ahni li hok mak osh ima li hoke.

7. Yohmi hoka chishno vt aka hlipiwt is si aiokpvchi hokma, moma kvt chimmi hashke, im achi tok.

8. Mihma Chisvs ash ot afalaminchit, Setan chia hut vm ashaka yak o ish hikiashke; Chitokaka chin Chihowa yak o i hvchukbihleput ish aiokpahanchashke; micha yummak illa ho holitoblit ish im antiashke; achi kvt holisso hoka, im achi tok.

9. Mihma yummak ash ot Chisvs ash o ilauelit Chelusalem a ont isht chukowa cha, tempel wishakchi yo ont o hilechi mvt, Chihowa Ushi chia hokmvt, aka pit ish ile pilashke:

10, 11. Chishno a chi apesahancha chi ka, im enchil vhleha ha atohno na ibbak a okla vba isht takalihinchit chisht aya na nitak kanima kia chiyi ya tvli isht chik ai isso ka hi a, achi hosh holisso tok oka, im achi tok.

12. Mihma Chisvs ash ot afalaminchi mvt, Chitokaka chin Chihowa ya imomaka chik peso kashke; achi tok a ashushke, im achi tok.

13. Mihma Setan ash ot nan isht ai imomaka pisa puta kash o isht im anukfillit ont tahli mvt, yakosi takla kvno i filummit ia tok.

14. Yohmi ma Chisvs ash ot Shilombish nan-isht im aiahli ka yvt anukfoyuka hosh falamvt Kalili a ona tok: mihma yummma isht annoa kvt yakni yummma a bilika a mominchit hlopulli tok.

15. Mihma yummma i sinakak a puta ka nan ai ithvnanchit ahanta ma, momvt ahninchit tok.

16. Yohmi ma ai vttvt hofanti tok Nasalet mak o vla tok; mihmvt a yohmi atuk okvt, nitak hullo nitak a sinakak a ont chukowa cha, holisso it im anumpula chi hosh wakayvt hikia tok.

17—19. Mihma hopaii Esaias i holisso ho ant ima tok: yohmi ma holisso hash wakummi mvt, yamma a holisso kvt, Ilbusha puta ka vbanumpa isht im anumpuli la hi a yummak osh nan isht si ahvmmi tuk okvt, Chitokaka im i shilombish vt si onvtuyula hoke: chukvsh nukhaklo puta hatuk kia hopohluchit, yuka vhleha hatuk ma isht a hlakofa he; mikma lupa puta yatuk mvt isht a hoponaya he, micha issikkopa puta kvt asha tuk a isht a mokofit, Chitokaka yvt aiokpahanchi afvmmi ma isht anumpohonli la hi o, si a tohno tuk oke, achi ho ahayuchi tok.

20. Micha holisso hash akamvli mvt, falaminchit sinakak nan-isht aivtta yash ima cha, aka binili tok. Mihma sinakak aiasha tuk ash ot momvt nishkin isht aiokchifeli tok.

21. Mihma yummak ash ot, Holisso ilvppvt himak nitak a hvchi haksobish a isht hvsh haklo kvt ont aiahli hoke, im achit isht ia tok.

22. Yohmi ma moma kvt nan ia atokowa ma pisvt, anum-pa hochukma kvt itih ha a kohoncha ka okokko! aiahni tok: mihmvt, Ilvppvt Chosef ushi keyu ho? okla achi tok.

23. Mihma, Alikchi a chishno inlit ile hlakofichí: nana kvt Kapenaum a a yvmohmi na e haklo tuk okma, chi yakni ilvppak inli ma a yvmihchí, achi anumpa isht vlhpisa ilvp-pak o hvs svm achi pulla chi hoke, im achi tok.

24. Mihmvt, Ahli pulla ho hvchim achi lishke, Hopaii nana ak osh ilap i yakni ak inli hoka ai a holitopa chatuk keyushke, achi tok.

25. Yohmi kia aiahli mak o hvchim anoli li: Elias vt ahanta nitak a vba vt ai okshilitvt kvnia na afvmmi tuchina hvshi hannali; yohmi na hopoa chinta fehnvt a hlopulli ka, Islael okla ha ohoyo i hatak illi vt lauvt aiasha tok.

26. Yohmi kia yamma achufona kia im aya hi vt Elias vt ik vlhtoko: amba Saiton yakni Salepta tumaha, ohoyo i hatak illi yummak illa tok.

27. Micha hopaii Eliseus vt ahanta nitak a Islael okla ha leplosi vbi kvt lauvt aiasha tok: yohmi kia yummak ash ot achufona kia ik hlakofo ho, amba Naaman Silian hatak ak illa tok.

28. Mihma sinakak aiasha tuk vt ilvppa puta ka haklo mvt, momvt anukhobelvt kvnia tok.
29. Mihmvt okla wakaya cha, yummak ash o tumaha ha kohcha pit chvffichi mvt, itehpelvt aka pit kancha chi hosh ilaelit, in tumaha ai on talaia sakti ont on talaka fehna isht ona tok.
30. Yohmi tuk kia yummak ash ot okla hash itin takla a hlopullit kanima ia tok.
31. Mihmvt Kapenavm tumaha Kalili yakni a ona cha, nitak hullo nitak puta ka okla nana ithvnanchi tok.
32. Yohmi ma im anumpa hvt a na-fehna hatuk o, nana ithvnanchi ka okokko! okla aiahnit im anukfila tok.
33. Yohmi ma sinakak a hatak vt shilombish okpulo yvt isht ai i fo^ka hosh anta tok: atuk osh yummak ash ot chitolit tahpvlt,
34. Ikkie! Chisus Nasalet minti chia ha nanta ho isht e chi ahalaia cho? ish pissikkopala chi hosh ish la hoh cho? kvna ho chia hoka chithana li, Chihowa i holitopa yak oke, achi tok.
35. Mihma Chisus ash ot yummak ash im olvbbit, Nukchintot yamma ish a kohchashke, achi tok. Yohmi ma shilombish okpulo ash ot okla ai itintaklvchit ai akvchi mvt, nan ik kanehiho hosh a kohcha tok.
36. Yohmi ma okla moyuma mvt nukhlakanchvt, ilap bika it im anumpulit, Ilvppvt anumpa nanta hokak osh yakohmi cho? nan im vlpisa, nan aiahlika aieno ho shilombish okpulo puta ka nan isht im ai apihisa hoka, okla kocha wihshe, achi tok.
37. Yohmi ma yamma ai isht annoachi ka yakni auet a bilika aiasha ka moyuma a hlopulli tok.
38. Mihma sinakak a vttvt kohchvt ia mvt, Saimon in chuka ont chukowa tok: mihma Saimon tekchi ishki vt yvnha fehna tuk o, pisa hinla ka okla im aiahni tok.
39. Mihma yummak ash o wakayut hikia mvt, yvnha hash im olvbbi: yohmi ma yummak ash o yvnha hvt ai issvchi tok; mihma ashalika tani cha, okla hash nan isht im vta tok.

40. Yohmi hatuk o h̄vshi vt okvtula ma, ililli ilaiyuka isht abeka im asha tuk puta kvt momvt yvmmak ash o im ai ona tok ; yohmi ma ibbak vt aieninchit mominchit isht um-biteput hlakofihinchi tok.

41. Mihma nan-isht-ahullo okpulo puta kvt laua ka a ko-cha wiha mvt, chitoli hosh miht, Chishno ak osh Chihowa Ushi Klaist chia hoke, ahanchi tok. Mihma yvmmak ash im olvbbi mvt, ilap ak osh Klaist atuk a ithvna ka, yvmma ik mihá, ik im ahno ki tok.

42. Atuk osh ont onnvut taha ma, kohchvt iwt yahni haia-ka yo ona tok : mihma okla hvt hoyot itvnovvt im ai ona mvt, ai i filvmmmit kanima ik aiyo ka ch̄i ho, im olvbbi tok.

43. Mihma tvmaha inla ak kia Chihowa apehlichika ya isht im anumpohonli la ch̄i hoka, yvmmak a he mak osh-aya li ha tok okvt, im achi tok.

44. Mihmvt sinakak pvt Kalili aiasha ka vbanumpa isht ai anumpohonli tok.

C H A P T A V.

Chisvs vt Saimon i peni yo fohkvt asha hosh okla ha nan-ithvnan-chi, 1 : 4 Saimon vt, Chisvs osh i miht nan anukfilli pulla ho, him-onia ka nvni l̄awa fehna hokli : 11 mihma Saimon, Chemis, micha Chan aiena kvt Chisvs a apeha. 12 Chisvs vt leplosi vbi yo hlak-ofichi : 16 atuk osh vba pit anumpula ch̄i hosh haiaka ia ; 17 mik-mvt hatak palsi isht abeka yatuk a hlakofichi ; 27 Chisvs vt Leifai nan im ai ithvna toba ch̄i ka i miha : 29 micha publikan vhleha mikmvt hatak nan-ashvchi vhleha aiena ka yvmmvt ai vlpesa ho ibai impa hatuk vt miha ; 33 ilap nan im ai ithvna vhleha hvt kaniohmit nan i palvmmma he anoli.

1. ATUK o yakohmi tok ; okla hvt Chihowa im anum-pa ha hakla ch̄i kvt yvmmak ash atehlifichit kaiyanchi ho, Chenesalet hohtak lapalika yo hikia ;

2. Yohmi cha peni tuklo kvt hohtak lapalika ya takohnli na pisa tok : yohmi kia hatak nvni vbi vhleha hatuk vto a kocha wiha tuk osh nvni isht-hokli achvfa hosh maya ha tok.

3. Mihmvt peni achvfalit Saimon ak o immi yo pit chuk-

owa mvt, oka alaka takali tuk a kanvlichit mishemanchit pit takalicha hinla ka, im ahni tok. Mihmvt binili cha, peni yo fohkvt asha hosh okla ha nan ithvnanchi tok.

4. Anumpuli kvt ont issa mvt, Saimon ash o, Ahofombika pit takalichi cha, nvni isht-hokli puta ka okvchit ish hoklashke, im achi tok.

5. Mihma Saimon ash osh afalaminchi mvt, A shahli ma! ninak a isht il asha na oyunna kvt nana ke hoklo ke tuk: yohmi kia chishno chim anumpa atuk oka, nvni isht-hokli a pit okvchi li mak inlashke, im achi tok.

6. Micha ilvppa okla yumihchi mvt, nvni lawa fehna ho hokli na i nvni isht hokli vt mitafa tok.

7. Yohmi ma im itapela vhleha hvt peni achvfa ya asha tuk vt vla cha, ant apela hinla ka, okla pit im abuchi tok. Mihma okla ai vla cha, peni ash it aieninchit okla alotoli: yohmi hoka yummak ash ot okbilhhvt isht iwt okla tok.

8. Saimon Pita yvt yakohmi na pisa mvt, Chisvs iyikala-ha ya pit tikinlit aka hlipi^vt, Hatak nan-ashvchi sia hoka a filummit, kanima ish iashke, Chitokaka ma! achi tok.

9. Himonna okvchit kohchi kvt, nvni yvt yohmi ho hokli kvt, ilapo, micha inla apehvt aya tuk vt momvt nukhlakan-chi tok.

10. Mihma Saimon im itapela, Sebete ushi, Chemis, mi-cha Chan ita tuklo kak kia yvmohmi tok. Mihma Chisvs vt Saimon a, Chi nukshopa ná, himak pilla ha hatak ak o ish hokla chi hoke, im achi tok.

11. Mihma i peni ash vhli ha okla ant itaiyali mvt, nana moma kvt asha na issa cha, yummak ash okla iakaiya tok.

12. Atuk o yakohmi tok; yummak ash ot tumaha kani-ohmi ho anta tuk o, hatak vt leplosi isht ai vbi fehna hosh anta tuk osh, Chisvs a pisa mvt, hlipi^vt itola cha, im ilbvshvt Chitokaka ma! chishno vt vlhpesa ish ahnikmvt, is sa kashofa hinlvshke, im achi tok.

13. Mihma ibbak pit welit potoli mvt, Ulhpesa ahni lish-ke; chi kashofashke, im achi tok. Yohmi ma leplosi ash ot ashalika a mokofut kvnia tok.

14. Mihma hatak nana kia ik im anolo ka chi ka i miha

mvt, amba iwt na-holitompa isht vtta yak o ont im ile haia-kvchi cha, na chi kashofa ka nan-isht-ai im atokowa mak o Moses vt nan apesa tok a, nana ka ish bohlashke, im achi tok.

15. Yohmi kia yohmi ha yak o isht i shahlit kanima moma ka yummak o ai annoa tok: yohmi ma im a haponakla chi, micha haknip ik achukmo puta kvt a hlakofa chi hosh okla chinto fehnvt ai itvnaha tok.

16. Mihma ilap illvt ai i mokofvt, yakni haiaka ona cha, vba pit anumpohonli tok.

17. Atuk o yakohmi tok: nitak kaniohmi ho nana ithvnanchi hosh ahanta ma, Falisi vhleha, micha nan-vlpisa ithvnanchi vhleha aiena kvt Kalili yakni tvmaha aiasha moma, micha Chutea, mikmvt Chelusalem aiena ka asht kohchvt aya kvt yummma binohmaya tok: yohmi ma Chito-kaka nan-isht im aiahlika yvt okla ma hlakoficha chi kvt ai iklvnvt takali tok.

18. Yohmi ma hatak kanohmi kvt hatak vt palsi vbi yo potvlhpo ai it i sholit isht vla tok: mihmvt kaniohmit yuma-pit isht chukowa cha, itikba ya ont bohla hinla kvt, okla akostininchu bvunna tok.

19. Mihmvt okla hak osh laua fehna hatuk o, kaniohmit pit isht chukowa hinla kvt ik akostininchu mvt, aboha pak-naka yo okla pit oiya cha, pit hlopullichit in topushi ash fokit iklvnna ka Chisvs itikba ya pit bohli tok.

20. Mihma okla na yimmi ka pisa mvt, Hatak chia kvt na chim ai ashvchika yvt chi kashofa hoke, im achi tok.

21. Mihma na-holissochi vhleha, micha Falisi vhleha aiena kvt, Ilvppvt kvta hokak osh Chihowa ik ahobalot anumpuli cho? Kvta hosh nan-ai ashvchika ya kashofa hinla? Chihowa ak illa keyu? aiahnit okla im anukfilvt aiasha tok.

22. Yohmi kia yummva im anukfila ha Chisvs vt im akostininchu mvt, anumpulit, Nanta mak o hvchi chukush anuk-kaka isht hvchim anukfila cho?

23. Na chim ai ashvchika puta kvt chi kashofashke, achi

kak okmá, keyukmvt, Tani cha nowá : achi kak okmá, katimampo kak osh ahchiba kvt ik lauwo cho ?

24. Yohmi kia Hatak Ushi vt nan ai ashvchika puta kashofa hi vt yakni paknaka ya ai im vlpiesa hatuk a hvsh akostininch a ch i kak oka, im achi mvt, palsi vbi ash, Tanit chin topushi a ish ishi cha, chin chuka ish iashke, chim achi lishke, im achi tok.

25. Mihma okla momvt pisa na tanit ai onvtola tuk ash ishi mvt, Chihowa ya holitoblichit aiokpahanchit in chuka ia tok.

26. Mihma okla momvt nukhlakancha fehnvt, Chihowa ya holitoblichit aiokpahanchi mvt, nukshopa fehna hosh, Himak nitak oka nana kvt inla fehna ho echo piesvhke, achi tok ;

27. Atuk o nana kvt a yakohmi ha ya kohchvt ia mvt, publikan vt Lefai hohchifo hosh tvli holisso abohli ya asha na ont pisa mvt, Is si akaiyashke, im achi tok.

28. Mihma nana moma kvt asha na issut wakaya mvt, iakaiya tok.

29. Mihmvt Lefai ash osh ilap in chuka akinli ho yvm-mak ash o impa chinto fehna im ai ikbi tok : mihma publikan vhleha, micha inlaka aien aien kvt laua hosh iba takla binoh-maya tok.

30. Yohmi kia i na-holoccoh vhleha, micha Falisi vhleha aien kuto yvmma nan im ai ithvna vhleha ha lumvt nana mihachit, Nanta katiohmi ho publikan vhleha, micha nan-ashvchi vhleha aien ka it-ibai imput, nan it ibai ishkot hvsh aiasha cho ? achi tok.

31. Mihma Chisvs vt afalaminchi mvt, Haknip im achuk ma hokvto alikchi a bunna keyu ; amba abeka mak oh chatuk oke.

32. Hopoyuksa vhleha ak o hoyot aya li ha tok keyu : amba nan-ashvchi vhleha hvto chekosikma nahullochit, vba pit anumpuli aienvt ahashwa, mikma Falisi vhleha nan im ai ithvna vhleha ak

33. Yohmi ma, Nanta katiohmi ho Chan nan im ai ithvna vhleha hvto chekosikma nahullochit, vba pit anumpuli aienvt ahashwa, mikma Falisi vhleha nan im ai ithvna vhleha ak

kia yvmohmi akinli hokak o, amba chimmi hvto impt nanishkot aiasha cho ? okla im achi tok.

34. Mihma hatak himona ohoyo itauwaya tuk vt takla anta moma ka, i kana vhleha hvt nukh^äklot nahullocha hinla, hvsh im apesa vlhpesa cho ?

35. Yohmi kia hatak himona ohoyo itauwaya tuk ash ot ai i filumma he nitak vt ai ona he: yohmik mak o nitak yummva fokakmvno okla nukh^äklot nahullocha hi oke.

36. Mihmvt nan isht vlhpisa h^o aieninchit isht im anumpuli mvt, Hatak nan ak osh na-fohka himona a hlilafa ka nafohka sipokni a akvlli chatuk keyu: yummak keyukma himona yvt hliloffikmvt, anonti himona y^a a hlilafa tuk okvt sipokni a ai it im vlhpesa he keyu hoke.

37. Mikma hatak nan ak osh oka paki himona y^a shukcha sipokni y^o pit vni chatuk keyu: yummak keyukma oka paki himona yash ot shukcha y^a mitahliche cha hlayakma, anonti shukcha yash ot okpulo chatuk.

38. Amba oka paki himona yvt shukcha himona y^o vlhto hok mak osh tuklot nan ik kanihmo chatuk oke.

39. Micha hatak nan ak osh oka paki siponki a ishko ha yvt ashalika himona ma bunna chatuk keyu: sipokni ak osh achukma kvt i shahlishke, achi hokvt, im achi tok.

C H A P T A VI.

Nana kvt achukma he okvno nitak hullo kia isht anta he ai vlhpesa hatuk a, Chisvs vt anoli, 1 : 8 mihmvt ibbak shila yatuk a hlakofichi. 12 Chisvs vt ninak a vba pit anumpohonli na onna mvt, vbanumpeshi auah-tuklo ka atokoli; 17 yohmi mvt hatak abeka laua ka hlakofichi. 20 Hatak kaniohmi hosh holitopa he, mikma hatak kaniohmi h^o na-palvmmi kvt onvtula he puta ka, Chisvs vt otvnichi. 27 Pin tvnvp vhleha kia e holitoblit, nan isht ai achukma he puta ma il i yvmohma hi a Chisvs vt pi miha; mikmvt okla moyuma ka il i kana hi ak o, pim ahni; 37 hatak inla asha ka nan ik achukmo imma hokvno im anukfillit kil anumpulo ka hi a, pim abvchi. 43 Iti a ilap vni akinli kak o isht ithvna chatuk: mikma hatak a ilap nana a kaniohmi kak o isht akostininchu chatuk.

1. YUMOHMI tuk osh vbanvblit ont ia yatuk nitak atukla ka ai isht nitak-hullo vmmona ho, yummak ash ot osapa taloha ha hlopullit aya tok: yohmi ma nan im ai ithvna vhleha hash ot onush vni ya tuptulit ibbak isht koyuhlit okla vpa tok.

2. Mihma Falisi vhleha kaniohmi kvt, Nanta katiohmi ho nana ka nitak hullo nitak a a yohma he vlhpesa keyu kvno hvchi yumohmi cho? im achi tok.

3. Mihma Chisus ash ot afalaminchi mvt, Lewi vt ilapo, micha apehvt aya tuk aieno kvt hohchvfo mvt, nana a kani-ohmi tok;

4. Yohmi kvt kaniohmit Chihowa im aboha ha pit chukowvt, prska otvnni a ishi cha vpa mvt, apehvt aya tuk ash kia ipeta tok: yummak oka ai vpa he vlhpesa keyu, amba na-holitompa isht asha ak illa ha tok oka, ilvppak kia holisso ha hvch ik a peso chatuk oh cho? achi tok.

5. Mihmvt Hatak Ushi vt nitak-hullo a in Chitokaka akinli hoke, im achi tok.

6. Atuk o anonti yakohmi tok: nitak-hullo inla ho sinakak ont chukowa cha, nana ithvnanchi tok: mihma hatak vt ibbak ishtimpak imma yvt shila yosh yummak asha tok.

7. Mihma na-holissochi vhleha, micha Falisi vhleha aieno kvt nan vlhpisa onocha chj hosh, nitak-hullo nitak a na hla-kofichikmá, nanta chj chishba? ahnit apesuchi tok.

8. Yohmi kia ilap vt okla im anukfila ha im ithana hatuk osh, hatak ibbak shila yash, Wakaya cha, iklvnnaka ya ont hikiá, im achi tok. Mihma yummak ash ot wakaya mvt, ont hikia tok.

9. Mihma Chisus ash ot okla hash, Nana achufa ho hvchi ponaklo lashke: Nitak hullo nitak a nana achukma kak o a yumohmi kak okmá, keyukmvt nana ik vlhpeso yak o a yummohmi kak okmá, ilhfiopak a okchalinchi kak okmá, keyukmvt tvbli kak okmá, nana kak osh ai vlhpesa hoh cho? im achi tok.

10. Mihmvt filemvt okla hash o mominchit pisa mvt, hatak ash o, Chibbak a chisemochí, im achi tok: mihma yv-

mihchi tok : yohmi ma ibbak ash osh falamvt achukmvt taha mvt, in tynnvp akinli ho chiyuhmi tok.

11. Mihma okla hvt anukhobela fehna tok : yohmi mvt Chisvs a nana ho kvnihecha chi kvt it i miht aiasha tok.

12. Mihma nitak yvmmma foka ka, yakohmi tok : vba pit anumpula chi hosh kohchvt nvnih chaya yo ont oiya tok ; micha ninak a Chihowa pit im asilhhvt ahanta na onna tok.

13. Mihmvt ont onnvt taha ma, ilap nan im ai ithvna vhleha hash hoyot itahobi tok : mihmvt yummak ash auah-tuklo ho ai atokoli mvt, yummak ash vbanumpeshi hochifo tok.

14. Saimon yummakma ilap ak osh Pita yo hochifo, mikmvt itibapishi Antilu, Chemis, micha Chan, Filip, mikmvt Bathlolomu,

15. Mahlu, micha Tamas, Alfeus ushi Chemis, Saimon Selotes hohchifo :

16. Micha Chutas Chemis itibapishi, mikmvt Chutas Iskaliot, yummak osh na haksichi yosh aieno tok.

17, 18. Mihmvt yummak ash ot awant akowa cha, yakni matali yo ant hikia ma, nan im ai ithvna yvt lawa, mihmvt okla chinto fehna Chutea yakni moma, Chelusalem aieno ka a minti ; mikma okhvt lapali ka Taia, micha Saiton aieno asht minti ; mihma shilombish okpulo yo isht issikkopa yatuk aieno kvt yvmmma im a haponakla chi, micha haknip ik in chukmo puta atuk vt im a hlakofohla chi hosh im ai vlt hlakofohli tok.

19. Mihma okla chito ash ot momvt, nan-isht a hlakofi vt yummak o a kohcha hosh mominchit hlakofichi hatuk oka, yummak potoli bunna tok.

20. Mihma ilap nishkin ash nan im ai ithvna vhleha ha isht on talohli mvt, Ilbusha hvchia ma ! Chihowa apehlichika yak osh hvchimmi hokvt na hvchi yukpushke.

21. Himonasi hokvno hohchvphot aiasha hvchia mvt, hvchi kaiya hi okvt na hvchi yukpushke. Himonasi hokvno yahayt hvch hvchia mvt, hvch yukpa hi okvt na hvchi yukprshke.

22. Hatak Ushi pulla atuk mak o hatak puta mvt hvchi

nukkillit, ilap ai itapeha ya isht a hvch il a filamohlichit, na hvchi mihachit, hvchi hohchifo ma nan okpulo yo ai itilauechit kahancha hi oke: yohmikma na hvchi yukpvshke.

23. Yakeh! nan-isht-vlhtoba hvt chinto hosh vba ya hvchin tonla hokvt, nitak yvmma fehnakma, na ho yukpá: na hvchi yukput hvsh mullahke: yvmmá in tikba vhleha hvt hopaii puta ka yummak inli ho i yvmihchi beka tok oke.

24. Amba nan in laua hvchia huto nan-isht a hvchi yarpa ma hvsh pisa hokvt, na hvchi palvmmi mak oke.

25. Kaiya hvchia huto hvchi hohchufa hi okvt na hvchi palvmmi mak oke. Himonasí a hvchi yukpa hokvto hvchi nukháklot hvsh yahaya hi okvt na hvchi palvmmi mak oke.

26. Hatak moma kvt ahninchit isht hvchi anumpohonlimma, na hvchi palvmmi mak oke: in tikba vhleha hvt hopaii ilahobi puta ka yummak inli ho i yvmihchi tok oka.

27. Amba hvsh haklo hvsh puta kvna hvchin tvnvp vhleha ma i hullot, hvchi nukkillikma nana achukma ho hvsh i yvmohmashke.

28. Nan ik vlhpeso isht hvchim anukfillit na hvchi miachi ya na-yukpali hosh anumpulit, anonti anumpa isht hvchi a holvbechikma, vba pit isht hvsh anumpohonlashke.

29. Micha kvna hosh chitisukpi a issokma, in tvnnvp ma pit ish i welí makinlashke: mikmut kvna hosh chim anchi a chim ai ishi ka, chi na-fohka lumbo ma isha chi ka, chik i halanlo makinlashke.

30. Kanimá hosh nan chim asilhha ka ish imashke; micha kvna hosh nana ka chim ai ishikma, falaminchit chik i hoyo kashke.

31. Micha hatak puta kvt hvchishno a a hvchi yohma hi a, hvsh aiahni hok mak osh, hvchishno ak kia mih-mak o hvsh ai i yvmohmi makinlashke.

32. Micha hvchishno a hvchi hullo na mihi yo hvsh i hullo hokvto, nanta ho isht a hvchi yukpa cho? nan-ashvchi vhleha hvt, kanimá hosh ilap a i hullo hokvno i hullo chatuk akinli hoka.

33. Micha kanimá kvt hvchishno a nana achukma ka isht a hvchi yvmohmi ho hvchishno mvt nan achukma ka isht

hvsh ai i yvmo^hmi hokvto, nanta ho isht hvchi yukpa cho ? nan-ashvchi vhleha ak kia yvmmvno yohmi chatuk oka.

34. Micha yvmmut huchim atobba hinla ka huchim ahoba hokmak osh hvsh i-pota hokvto, nanta ho isht a hvchi yukpa cho ? nan-ashvchi vhleha ak kia yvmmak atuk ash inli ohmi ho isha chi kvt, nanashvchi bi^ka ya i pota chatuk oka.

35. Amba hvchishno vto hvchin tvnvp puta ka hvsh i hullo, mikmvt nana achukma ho hvsh yvmo^hmikmvt ; anonti nana kia isht ai vlhtoba hi a ik aiahno hosh hvsh i potashke : yohmikma isht a huchim vlhtoba hokvto chinta he ; micha Nana moma imaiya im vlla hvchia ha hi hoke. Yvmmak okvt ilap a ik aiokpacho, micha nan vlhpesa keyu vhleha aieno ka i kana achukma yoka.

36. Yvmo^hmi hoka hvchishno mvt na hvchi nukhaklo bano kvt, hvch iki vt nan i nukhaklo bano yoka yvmmak inli ho hvsh chiyuhmashke.

37. Inla ya ik vlhpesachot nan hvch ik apeso kashke. Yohmik mak osh nan ik huchim vlhpiso ka he mak oke : isht a hotopa he anumpa ha hvsh onochi na : yohmikmak osh hvchishno vt isht a hotopa he anumpa hvt ik hvchi onvtulo ka hi oke : inla ya i kashofit hvchim i haksashke ; yohmikmak osh hvchishno mvt hvchi kashofa hi oke.

38. Hvsh ihmashke : yohmikmak osh hvchishno mvt hvsh habihina hi oke : vlhpisa achukma, vltekvchit, mikmvt faiokvchit it ai isso hosh ont atampvt hlaha^yya ho, hatak vt hvch il ai vskofvchi anukaka ya pit hvchim apitta hi oke. Nan isht vlhpisa hvchishno vt isht hvsh apesa tuk a, yvmmak inli hosh hvchishno ma isht hvchim vlhpisa hi oke, hvchim achi lishke.

39. Mihmvt nan isht apesvt anumpulit, L^vp^a yvt l^vp^a ya halvllit isht aya hinla ? tuklot yakni chiluk kia pit ik kaho ka hinla ho ?

40. Nana ithvna vt nan ithvnanchi a i shahli chatuk keyu : amba nana ka imponmvt aiahli hok mak osh moma kvt nan-ithvnanchi ak o ai itilaua hi oke.

41. Micha nanta katiohmi ho na hishonluk iskvtnosi kvt

ish itibapishi nishkin a foka na ish pisa hokak osh, anonti iti chito yvt chi nishkin akinli ka foka k^uno chik akostinincho cho?

42. Keyukmvt anonti katiohmit ish itibapishi ha, Itibapishi li ma! na hishonluk iskvtnosi kvt chi nishkin a foka ka ak chi kohchí, ish acha hinla cho? chishno chi nishkin akinli k^uno iti chito yosh foka ka chik peso kvt; nan-ilahobi chia hoka, iti chito yak o tikba ishit chi nishkin a ish a koh-chashke; yohmikmak osh ish pisa achukma hosh ish itibapishi nishkin a nahishonluk iskvtnosi kvt foka ka ish kohcha hinla hoke.

43. Iti achukma kvt vni vt okpulo y^o vnit waya chatuk keyu: yohmikma iti okpulo mvt vni achukma ka vnit waya keyu chatuk oke.

44. Iti puta kvt ilap vni yak o isht il ai otvninchi chatuk: hatak vt kvti hak o fik a ai vmo chatuk keyu: yohmikmvt bissupi ak o paki a ai vmo chatuk keyushke.

45. Hatak achukma yvt chukvsh a nana achukma kvt i foka hatuk osh, nana kvt achukma ho ai ishit kohonchi chatuk: mikma hatak vlhpesa keyu kvto chukvsh a nana okpulo yosh i foka hatuk osh, nana kvt vlhpesa keyu ho ai ishit kohonchi chatuk: chukvsh vt isht alotowakmak o itih hvt kohchit anumpuli chatuk oke.

46. Na katihmi ho nana ka hvchí mihiha li ka hvsh yohmi keyu kak osh, Chitokaka ma! Chitokaka ma! hvsh si achi cho?

47. Kvna kia um vlt, nana mihiha li ka haponaklo cha, ai yvmohmi kvt, kvna ho holba ka hvchim anoli lashke.

48. Hatak vt chuka ya ikbi kvt, yakni a kullit, hofobichit, tvli y^o nutaka in tola ya ai om bohli tuk mak o chiyuhmi hoke: yvmohmi tuk o okchito hvt aya mvt, chuka yvmmak ash yanvlli hvt kvllo ai isso fehna tok: yohmi kia tvli y^o a toba ha tok oka, ik winalecho ki tok.

49. Amba kvna hosh haklo cha, mihma ik yohmo hokvto, hatak vt nutaka in tonla yvt iksho ho yakni yak o chuka ya ai on talali tok mak o chiyuhmi hoke: yvmohmi tuk o yvmmak ash yanvlli hvt kvllo ai isso fehna tok: yohmi ma

chekosi makinli ho kinafa mvt, chuka yvmmvt okpulo kvt ai okluha tok, im achi tok.

C H A P T A VII.

Chisvs vt Kapenavm a ona cha, Sintulion na-yimmi ka ahninchi mvt, 1 ; 10 in tishu ha hlakofichi. 11 Nain a ona cha, ohoyo i hatak illi ushi illi tuk a falaminchit tanichi. 18 Chan vt aboha krvlo foka mvt, yvmmak osh Klaist mak okma, keyukma, nana hatuk ma Chisvs a pit i ponaklo : 22 mihma ilap vt nana kvt a fehna kia yvmmichi tok puta kvt Chisvs vt im anoli : 24 mihmvt Chisvs vt Chan a isht anumpulit atokowa ka anoli. 37 Ohoyo hvt nanashuchi yo ik yohmi, im aiahni na iyi ya nan-ahama a hvmmi ; mihma ohoyo hash hopohlvcxit nan im ai ashvchika ya i kashiofi.

1. OKLA hvt haponaklot aisha na nana ka mihvvt ont in taiyaha mvt, Kapenavm a ont chukowa tok.

2. Mihma Sintulion achvft in tishu, yvmmvt i holitopa chatuk osh, abeka cha, illa hosi tok.

3. Atuk osh Chisvs a pit haklo mvt, vla cha, in tishu hash hlakoficha hinla ka, pit im aiahni hosh, Chu okla in tikba vhleha ha pit in tihleli tok.

4. Atuk o yvmmak ash ot Chisvs a im ai ona mvt, im asilhha kvt achilita fehnvt, Ilvppa ai i yvmlhcha he vlpiesa fehna ;

5. Yvmmak okvt pim okla talaia ha pi holitoblit sinakak a pim ikbi tok oka, achi tok.

6. Mihma Chisvs vt awant ia tok. Atuk osh chuka atuk ash ona hosit taha ma, Sintulion ash osh i kana vhleha ha pit in tihleli mvt, Chitokaka ma ! ayvt ik chim ahchibo kashke : chishno vt vm aboha ya ant ish chukowa he si ahoba keyu hoka.

7. Yohmi kvt anonti vno akinli hosh ayvt ont chi pisa la he si ahoba keyu kvt vm anukfila atuk oke : amba anum-pa bano ho ish mihakma, an tishu hatuk mvt hlakofa hin-lvshke.

8. Uno ak kia hatak tvshka chipota vhleha pehlichit i shahli nutaka ahanta chatuk sia hoka : yohmi kvt achvfa ka, Iá, im achi likma, ia hoke : mikmvt inla ma, Mintí, im achi

likma, minti hoke : mikmvt an tishu ha, Ilvppa yakohmichi, im achi likma, yvmihchi chatuk oke, pit im achi tok.

9. Mihma Chisvs vt ilvppa puta ka haiyaklo mvt, pit im aiokpanchi fehnvt, filemvt hikia cha, apehvt aya tuk okla hash, Islael okla ha kanima kia na yimmi chinto yakohmi ka ak a pesoshke, hvchim achi lishke, im achi tok.

10. Mihma yummvt yakohmit itvnova tuk vt chuka ash falamvt, tishu abeka tuk vt hlakofi tuk o ont pisa tok.

11. Atuk o ont onna ma yakohmi tok : tmaha Nain hohchifo ho ia tok ; mihma nan im ai ithvna laua, micha okla laua aienvt apehvt ilhkoli tok.

12. Atuk osh tmaha okhissa ya i bilika vla ma, hatak vt ohoyo i hatak illi yo ushi yosh, ishki a yummak osh i bano chatuk osh illi na okla sholit kohcha tok ; yohmi ma tmaha okla hvt lauvt yamma apehvt aya tok.

13. Mihma Chitokaka yvt ishki atuk a pisa mvt, i nukhaklo cha, Ish yaiya ná, im achi tok.

14. Mihmvt yummak ash ot ai onvtola kash ant potoli tok : mihma sholi tuk vt lumvt hieli tok. Mihma, Hatak himita chia hrt ish tanashke, chim achi lishke, achi tok.

15. Mihma illi yatuk yummak ash ot tanit binili cha, anumpuli tok ; mihma yummak ash ishki a pit ima tok.

16. Mihma okla moma ka nanukshopa kvt ai anukfoyuka tok : mihmvt Chihowa ya holitoblichit aiokpahanchit, Hopaii chinto kvt pitintakla ya a tobvt hikiushke ; micha Chihowa yvt im okla ha i nowvt ayvshke, okla achi tok.

17. Mihma yakohmit Chisvs isht ai annoa kvt Chutea yakni a mominchit, anonti yakni inla auet a bilika aiasha ma moma a hlopulli tok.

18. Mihma Chan nan im ai ithvna vhleha hvt nana kvt a yakokmi tuk a mominchit im anoli tok.

19. Mihma Chan ash ot ilap nan im ai ithvna ya tuklot hoyo cha, Chisvs a pit in tihleli mvt, Chishno ak osh aya he tuk mak o chia hokmá, ak chu ? himmak pilla hak o inla yo e hoyo chi cho ? achi tok.

20. Hatak ash ot ayvt im it onachi mvt, Chan Baptist vt, Chishno ak osh aya he tuk mak o chia hokmá, ak chu ?

himmak pill a hak o inla yo e heya chi cho ? achi hosh auet pi tihleli tuk oke, achi tok.

21. Mihma hvshi kanvlli vlhpisa yummak fehna ka haknip ik in chukmo, mikmvt ililli isht ai ilbusha, micha shilombish okpulo ai i fo_ka puta aien a kvt laua ho_g hlakofichi tok : mihmvt lupa vt laua atuk a hoponayochi tok.

22. Mihmvt Chisvs vt afalaminchi mvt, Oh ia cha, nana ka hvsh pisa tuk, mihmvt hvsh haklo tuk aien a kvt Chan a ont oh im anolí ; lupa yvt hoponayo, imomokpulo yvt nowama, leplosi vbi vt i kashofa, ik haponaklo vt haponaklo ma, illi mvt falamvt tani, mihma ilbusha ya_g vbanumpa hvt isht im anuhumpushke.

23. Yohmi ka kuna hosh vno a ik si ai ibetvblokmvt, mihi yosh na yukpa hoke, achi tok.

24. Mihma Chan im anumpa isht aya tuk vt a falamvt, itiachi ma, okla ha_g Chan ak o isht im anumpulit, Nanta ho_g hvsh pisa chi hosh yakni haiaka yvno hvsh ilhkoli tuk oh cho ? Kushak osh mahli na winakuchi kak atuk o ?

25. Amba nanta ho_g hvsh pisa chi hosh hvsh ilhkoli tuk o ? Hatak na-fohka lapushki fohka kak atuk o ? Yakeh ! na-fohka holitopa ishit shemvt, ilimpa hochukma in laua hokvto, hatak miko vhleha in chuka ak o aiasha cho kumo.

26. Amba nanta ho_g hvsh pisa chi hosh hvsh ilhkoli tuk o ? Hopaii ak atuk o ? Ahlishke, micha holitopa kvt hopaii ya i shahli fehna hoke, hvchim achi lishke.

27. Ish ataya he chi tikba ai apoksiahancha chi mak o um anumpeshi a chi nashuka itikba ma chuffichi lishke, achit holisso tok a, ilvppak osh mih mak oke.

28. Ohoyo ho_g a tobut ai vta tok puta ka hopaii chito kvt Chan Baptist a imaiya kvt iikshoshke, hvchim achi lishke ; yohmi ik nana kia moma ik lauwo hosh Chihowa apehlichika yvno anta kvt, Chan a imaiya hoke.

29. Yohmi ma Chan a okla im a haponaklo tuk vt moyuma, micha pblikan vhleha aien a kvt Chan a i baptismo ya isht a baptismot, Chihowa ya im aia_hlichi tok.

30. Amba Falisi vhleha, micha nan-vlhpisa ithvnanchi

Luk

vhleha aien a kuto ilapo yokvto yummak ash o ik im a baptismo, Chihowa nana im aiahni tuk a ik aiahlecho hokvt.

31. Mihma Chitokaka yvt, Yohmi kyⁿo hatak himaka aiasha ka nanta hak o pit it apesa la chⁱ cho ? yohmi ka nanta hak o okla pit hoyulba cho ?

32. Ulla yosh ilhpak a kanchi yo binomaya hosh ilap bika it i howvt, Oskula ha e hvchim olachi ka, hvchik hehloshke ; illi isht taloa isht e hvchⁱ yaiya ka, hvch ik yaiyoshke, ahanchi ho chiyumishke.

33. Chan Baptist vt pvska yo ik po, mihmvt oka pakⁱ ma ik ishko yosh aya ; yohmi ma, Nan-isht-ahullo okpuli il ai ishishke, hvsh achi.

34. Hatak Ushi yokvto impa, micha nan ishko aien a hosh aya : yohmi ma, Yakeh ! hatak isikopa, micha oka pakⁱ ishko shahli, pblikan vhleha mikmvt nan ashvchi puta ka i kana yoke, hvsh achishke.

35. Yohmi kia Ahopoyuksaka yokvto ilap im vlla vhleha ha mominchit ai isht aiahli chatuk oke, achi tok.

36. Mihma ibai impa hinla ka Falisi achvfut im ahni tok : yohmi ma Falisi in chuka yash ont chukowvt, impa chⁱ hosh binili tok.

37. Yohmi ma ohoyo nan-ashvchi yosh tvmaha yummanta tuk osh, Falisi in chuka ya Chisvs vt asht' impa na akostininchⁱ mvt, alabasta kotoba nan-ahama balama v^lhto ho isht ona mvt,

38. Im asha-ka iyi pit a chiya ka ont hikvt yahaya cha, iyi ash nishkin okchi yak o isht achifvt, anonti ilap noshkobo pa^{sh}i akinli ho ishit kasholinchi mvt, iyi a i suksohowvt, nan ahama balama ash o isht a hvmmi tok.

39. Mihma Falisi vt yummak ash o hoyo tuk ash ot, yummva pisa mvt, Hatak ilvppvt hopaii atuk ok mvt, kvna hosh, micha ohoyo kaniohmi chatuk osh potoli ka, ik akostininchⁱ ka heto ; ohoyo ilvppvt nanashvchi yoka, ahnit ilapo inli il im achi tok.

40. Mihma Chisvs ash ot afalaminchit, Saimon a nana chi miha la hinla kvt um ashvshke, im achi tok. Mihma

yummak ash ot, Nan ithvnanchi ma! ish mihashke, achi tok.

41. Mihma, Hatak nan-ahekuchi achvfa yvmmma aheka im in takohnli kvt tuklo tok: achvfa kvto aheka yvt iskvli tahlepa in tahlapikma, anonti achvfa kvto pokoli tahlapi ha tok.

42. Atuk osh isht atobba hi vt nana kia ik im iksho kit okla ma, it aieninchit pill a ho yummak ash ot i kashof i tok. Yohmi ka, Um anoli; katimampo kak osh yvmmma i hullo kvt i shahlicha hinla cho? achi tok.

43. Saimon ash ot afalaminchi mvt, Laua i shahli tuk o i kashof i kak a hinla, ahni li, achi tok. Mihma, Pit vlpesv-chit ish anukfilli mvhlishke, im achi tok.

44. Mihmvt ohoyo a hikia ka pit filema mvt, Ohoyo ilvppa ish pisa cho? chim aboha ant chukowa li ma, chishno vto saiyi isht achifa he oka kapussa kia chik samo ke tuk: amba ilvppak okuto nishkin okchi yo saiysi ya isht achifa mvt, ilap noshkobo pashi ak o isht kasholihinchishke.

45. Chishno vto chik sa suksowo ke tuk: amba ohoyo ilvppak okvto, ilvppa ant chukowa li tuk takla ka, saiysi ya i suksowowa kvt ik iesoshke.

46. Chishno vto sa noshkobo ha nan-ahama isht chik sum a hummo ke tuk; amba ohoyo ilvppak okuto saiysi ya nan-ahama isht ahvmmishke.

47. Yohmi hokvt, Nan im ai ashvchika yvt laua tuk vt kashofa hoke: mihi yosh nan i hullo fehna hatuk okvt, chim achi lishke: amba ik lauo hosh i kashofa hok mak osh mihi yosh nan i hullo kvt a fehna keyu chatuk oke, im achi tok.

48. Mihmvt ohoyo hash o, Chim ai ashvchika puta kvt chj kashofa mak oke, im achi tok.

49. Mihma it apehv^t asht impa tuk yummak ash ot, Ilvppvt kvta hokak osh nan-ai ashvchika puta kak kia kashof i hoh cho? ahnit ilapo inli okla im anukfila tok.

50. Mihma ohoyo hash o, Na chi yimmika yvt chi okchalinchishke: na-yukput ish ayashke, im achi tok.

CHAPTA VIII.

Chisvs vt im anumpeshi vhleha, micha nan-isht im vitta vhleha ohoyo aienvt apihvt aya ho, vbanumpa isht anumpuli, 1. 4 Na hokchi isht vlhpisa anumpa; 6 micha yvmmak atuk vt vlbittv achukma annoa. 16 Pvla tohwikeli isht vlhpisa; 21 kvna hosh Klaist im anumpa puta ka im antia hokvto, yvmmak o i kanomi fehna mak oke. 22 Chisvs vt kocha umba mahli kullo ka yukobli; 26 mihmvt nan-isht-ahullo okpulo lawa ho hatak achvfa ka a kocha weli: yohmi ma, shukha lokoli achvfa ho ont abeha chj ka, vlhpesa im ahni; 43 ohoyo issish ont ia vbi yatuk o hlakofichi; 49 mihmvt Chailvs ushetik illi tuk a falaminchit tanichi.

1. ATUK osh i himmakma yakohmi tok: tumaha, micha chuka lokoli puta aiena ka mominchit a hlopullit ayut, vbanumpa isht anumpohonli; micha Chihowa apehlichika ai isht ilaiyukpa anumpa ha otvninchit isht anumpohonli tok: mihma auah tuklo kash ot apehvt aya ma,

2. Micha ohoyo kanohmi, yvmmvt shilombish okpulo puta, micha haknip ik in chukmo puta aiena tuk osh a hlakofi tok, Meli Maktalene hohchifo yvmmak o nan-isht-ahullo okpulo untuklot a kohcha tok.

3. Mihmvt Choanna Helot a nan-isht im vitta Chusa a tekchi, micha Susanna; mikmvt inlaka mvt laua hosh nana im asha tuk vt, Chisvs a isht apelvchi tuk vt apehvt aya akinli tok.

4. Okla lawa fehnvt tumaha moma ashvt minti kvt im ai itvna ma, nana isht apesa hosh im anumpuli tok.

5. Na hokehi vt i nanihi hokchit ia tok; atuk osh hokchi ma, kanimi kvt hina lapalika yo kaha tok: atuk o a hvhli-chi; yohmi na hushi puta vba itvnova ket ant aiowvt vpa tok.

6. Mihma kanimi kuto twli yo ai o kaha tok: atuk osh offo mak inli hosh a shummi takanli kvt ik im iksho hatuk okvt, bshit kvnia tok.

7. Anonti kanimi kuto kvti foka yo a kaha tok: atuk o kvti ash ot awant offo cha, olvbbit ishi tok.

8. Yohmi ma inla kuto yakni achukma ho ai o kaha tuk osh offot, nihi achufa tuk kia tahlepa achufa vnit waya tok : ilvppa puta ka achit ont in taiyaha mvt, Kuna hosh isht haponakla he haksobish vt i hinlikmvt, haklashke, chitoli hosh achi tok.

9. Mihma nan im ai ithvna vhleha hash ot, Ilvppvt nan-isht vlhpisa katiohmi ha hinla hoh cho ? achit i ponaklo tok.

10. Mihma, Hvchishno ano Chihowa apehlichika ya nana kvt ik otaiyano ke tuk a hvsh akostininchka he mak osh hvchim vlhpisa hoke : amba inla ka yokvto pisa kia, pisa he keyu ; mikmvt haklo kia, ik akostininchka chi ho nan-isht vlhpisa anumpa ha chi ha tok.

11. Nan-isht vlhpisa kvt ilvppak oke. Na-nihi ak osh Chihowa im anumpa mak oke.

12. Hina lapalika kaha kvt, anumpa ha haklo kak oke : yohmi ma Setan vt ayut, okla yimmit ik okchayo ka chi kia, anumpa ha chukvsh ash'a kohchit im ishi chatuk oke.

13. Trli yo ai o kaha kvt, anumpa ha haklokmvt, na yukpa hosh ahninchka kak oke ; yakohmi kak osh hakshish vt iksho ; yohmi hosh chekosi takla hokvno yimmi tuk osh, nana kvt ont a palvmmikma, mokohli hoke.

14. Mikma kvti foka yo a kaha kvt, anumpa ha haklo tuk kia, yakni pakna ahantvt nan-isht a kariohmi puta, mikmvt nan in laua bunna, micha na-washoha puta isht a nukfoyska kak osh ai im olvbbi na vnit ahlit ik wayo kak oke.

15. Amba yakni achukma yo ai o kaha kvt, yvmmvt chukvsh achukma aiahli mak osh anumpa ha haklokmvt, ieshit achunanchi cha, vnit waya kak oke.

16. Hatak nan ak osh pula ha luachi mvt, nan-avlhto yo isht ompohomokmá, keyukmvt topa nutaka yo pit talalikmá, nana chatuk keyu ; amba kuna hosh ant chukowakmvt tohwikelka pisa chi kia, pula ai-o-hikia yak o o hilechi chatuk oke.

17. Na luma nana hatuk osh ik otaiyano ka hi vt iiksho :

mikma nana hosh luma tuk ak o ik akostinincho ki, ik otano ka he mvt iksho hoke.

18. Yohmi hoka nana ka hvsh haklo kvt, Ahah! hvsh ahnashke; kvna hosh ishi hokmak o, mihi yo ima hi oke: mikmvt kvna hosh ishi keyu tuk mvno, mihi yo ishi ahomba tuk ash kia aieninchit im ai isha hi oke, achi tok. •

19. Yohmi ma ishki, micha itibapishi vhleha aien a kvt im ai vla kia, okla hak osh atehlefut kvnia hatuk o, a hikia ka ona he keyu ki tok.

20. Mihma, Chishki, micha chitibapishi vhleha aien a kvt chi pisa bvnna hosh, kocha ya hiohmayvshke, achit im anoli tok.

21. Mihma yummak ash ot afalaminchi mvt, Chihowa im anumpa ha haponaklo cha, mihi yo ai yummohmi vhleha ilvppak osh vshki, micha itibapishi li vhleha aien mak oke, im achi tok.

22. Atuk osh nitak kariohmi ho yakohmi tok: nan im ai ithvna vhleha hash ai it apehv^t peni ont chukowa tok; mihmvt, Okhvta mish-tvnnvp ak o pit eho tanvblasthke, achi tok. Mihma peni ash okla oka tobli tok.

23. Atuk o yakohmit peni a asht itvnowa ma, yummak amo nusi tok: atuk o mahli chito kvt okhvta hash on itu-yula; yohmi ma oka yvt ibai alota na ai isht-kvnvp^t ai i palvmmma he pullvt aiasha tok.

24. Yohmi cha okla onvt yummak ash okchvli mvt, Pithvnanchi ma! Pithvnanchi ma! pilli mak oke, achi tok. Mihma yummak ash ot tani cha, mahli micha oka poakuchi aien kash im alvmmi tok: mihma yummak ash ot yokopa na chulusvt talaia tok.

25. Mihma yummak ash ot, Na hvchi yimmika mvt? im achi tok. Mihma okla nukshopa hatuk okvt, nukhlakanchvt, Ilvppvt hatak katiohmi mak oh cho? ilvppvt mahli, oka aien kak kia nan i miha ma, im antivshke, it im achit maya tok.

26. Atuk osh Katalenes okla i yakni Kalili auet i chapa ka talaia ka, okla ont ataiya tok.

27. Yohmi na yummak ash ot pit kohehv^t ia ma, hatak achvfa kvt nan-isht-ahullo okpulo puta kvt ai i foka tok ho-

paki hosh, na fohka kia fohka chatuk keyu, mihmvt chuka yo ai vtta chatuk keyu, amba hatak illi aiasha yak o ai vtta chatuk osh, tvmaha ha a kohchvt aya hosh afama tok.

28. Mihmvt Chisvs a pisa mvt, chitolit tahpula mvt, yummak ash itikba ya aka hlipiwt chitoli hosh anumpulit, Chisvs Chihowa nana moma imaiya Ushi chia ha, uno vt nanta ho isht chi ahalaia li cho? chik svlbushalo ka chi mak o, chim asilhha lishke, achi tok.

29. Yummak okvt shilombish okpulo vt hatak ash a kohcha chi ka, im apesa ha tok. Yummak okvt himonna hak-sinchit hohokli beka tok; yohmi hatuk a yummak okvt tvli ita-takvli, micha iyi ai vlhpitta tvli aienas isht talakchi ho okla apesvchi ha tok: yohmi kvt isht a kamussa yatuk a kobuffikma, nan-isht-ahullo okpulo ash osh chuffichi na yakni haiaka a kvnia beka tok.

30. Yohmi hatuk o Chisvs ash ot i ponaklot, Chi hohchifo hvt nanta ho? achi tok: mihma yummak ash ot nan-isht-ahullo okpulo vt laua hosh pit ai abeha hatuk oka, Lechun sia, achi tok.

31. Yohmi ma kohchvt ahofobika ai-ilbusha mak o okla ia hi a ik im apeso ka chi ka, okla im asilhha tok.

32. Yohmi ma nvnih pilla yummak oka shukha laua yut ai impa hosh aiasha tok: yohmi ma yummak o okla ont abeha chi ka vlhpesa, im ahna chi ka, im asilhha tok. Yohmi ma vlhpesa, im ahni tok.

33. Yohmi ma-nan-isht-ahullo okpulo puta kash ot hatak ash a kocha wihvt ia mvt, shukha yash o ont chukowa tok. Yohmi ma shukha laua yash osh nvnih chakpatali ka asht aka pit yihlepa fehnvt, okhvt a ont ai oka kahvt, nuksakkit illi tok.

34. Yohmi ma yummak apesvchi vhleha hvt nana kvt ai ymohmi ka pisa mvt, yihlepvt ivt, tvmaha mikmvt haiaka aiasha tuk aienas ka ai im anoli tok.

35. Yohmi ma nana kvt ai ymohmi tuk ash okla pisvt ilhkoli tok. Atuk osh Chisvs ash im ai vla cha, hatak nan-isht-ahullo okpulo puta kvt a kocha wiha tuk ash, ilefoka vohka cha, im anukfila mvt hopoyuksa achukma hosh,

Chisvs iyi ituma ya binili ho okla pisa tok: yohmi mvt okla nukshopa tok.

36. Yohmi ma nan-isht-ahullo okpulo puta ai i foka tuk vt kaniohmit a hlakofi na okla pisa tuk ash kia im anoli tok.

37. Yumohmi ma Katalenes yakni ai i bilika tuk vt okla laua kvt nanukshopa chinto kvt ai onvtuyula hatuk osh, yummak okvt i filvmma hinla ka, momvt okla im asilhha tok. Yohmi na yummak ash ot oiyvt peni ash pit chukowa mvt, falamvt aya tok.

38, 39. Mihma nan-isht-ahullo puta kvt a kocha wiha tuk hatak ash ot awant aya hinla kvt, im asilhha tok: yohmi kia Chisvs ash ot, Chin chuka yak o falamvt ish ona cha, Chihowa hvt nana chinto nana mak o a chi yvmihchi tuk a, ont ishanolashke, achit pit chvffichi tok. Mihma yummak ash ot ia mvt, nana chinto fehna nana mak o Chisvs vt i yvmihchi tuk a, tumaha hash mominchit ai anoli tok.

40. Atuk o yakohmi tok; Chisvs ash ot falamvt vla ma, okla hvt momvt hoyo hosh aiasha tuk okvt, okla na yukvt aiokpvchi tok.

41. Yohmi ma hatak vt Chaikvs hochifo hosh, sinakak apesuchi yosh vla tok; mihmvt Chisvs iyi ituma ya aka ant hlipia cha, in chuka ya ona hinla ka, im asilhha tok.

42. Yummak okvt ushetik vt achufa illa hosh, afummi auah-tuklo foka tuk osh, illa hosi hosh itonla ha tok. Yohmi ma yummak ash ot ia hosh aya ma, okla chinto kvt ai a folublit kvnia tok.

43. Yohmi ma ohoyo hvt issish um-bokafa tok afummi auah-tuklo hatuk osh, nana im asha tuk a mominchit alikchi puta kak o ai ataiyaha kia, achufona ma a hlakofa he mvt iksho hosh, aya tuk osh,

44. Im ashaka ona cha, im anchi aposhokvchi ya pit potoli tok: yohmi ma ashalika issish ont ia tuk vt i hokofa tok.

45. Mihma Chisvs vt, Kvta hosh sa potoli cho? achi tok. Kvna hatuk keyu ka momvt miha ma, Pita yvt, micha ape-hut aya tok aieno kash ot, Pi shahli ma! okla chito vt chi a folublit chi atehlifichi fehna hokak o, Kvta hosh sa potoli, ish achi cha? achi tok.

46. Mihma Chisus ash ot, Kuna hosh sa potoli tuk, nan-
isht aiahlika yvt a si a kohcha ka akostininchli hoka, achi
tok.

47. Yohmi ma ohoyo hash ot ilapvt luma keyu kvt akos-
tininchli mvt, wunihinchit ona mvt, itikba ya aka ont hlipia
cha, nana kaniohmi ho yummak oka potoli tuk, micha ka-
nionhmit ashalika hlakofi tuk aienä kvt okla moma itikba ya
ai im anoli tok.

48. Mihma yummak ash ot, Svsotek ma! na chi yukpa
achukmashke; na chi yimmika yak osh chi hlakofichi hoka,
na-yukpa bieka anukfoyuka hosh ish ayashke, im achi tok.

49. Yummak okvt anumpuli moma ho, sinakak apesuchi
in chuka ya achvft minti hosh vla mvt, Chiso-tek vt illish-
ke; nan-ithvnanchi ma chik im ahchibalo kashke, im achi
tok.

50. Yohmi kia Chisus vt pit haklo mvt nan i mihvt, Ik
chi komunto kashke; pilla ik chi yimmí, mikma yummak
okvt hlakofa chj hoke, im achi tok.

51. Atuk osh aboha yash ont chukowa mvt, hatak nana
kia ik chukowá, ik aiahno; amba Pita, micha Chemis, mik-
mvt Chan, micha ohoyo himita ya iki, mikmvt ishki ita-
tuklo kak illa tok.

52. Yohmi ma moyumvt ilbushvt isht yahaya tok: yohmi
kia yummak ash ot, Hvsh yaiya na; illi keyu; pilla nusi
hoke, achi tok.

53. Mihma yummak okvt illi hoka, okla ithana hatuk osh,
yummak ash ik ahobalot olvli tok.

54. Yohmi ma yummak ash ot mominchit kohchichit tahli
mvt, yummak ash ibbak a halvlli cha, i howvt, Ohoyo himita
ma! taní, achi tok.

55. Mihma shilombish vt falamvt im vla cha, yummak
ash ot ashalika taní tok; mihma nan-ilimpa i hoy a hinla ka,
miha tok.

56. Mihma iki, ishki itatuklo kash ot nukhlakancha fehna
tok. Yohmi ma nana kvt a yvmohmi tuk ash hatak nana
kia ik im anolo ka hi o i miha tok

CHAPTA IX.

Chisvs vt im anumpeshi auah-tuklo ka vbanumpa isht anumpula chi, micha nana kvt isht ahullo fehna kia yvmihchi a puta hosh im ai vlhpesa hatuk vt otvnincha chi ho, pit tihleli, 1. 7 Helot vt, Chisvs a pisa bvnna. 17 Chisvs vt prska lumbo tahlapi, micha nvni chipunta tuklo aien a, hatak tahlepa sipokni tahlapi ka impvchi: 18 micha ilapa kvna hak o okla im ahoba hatuk a ponaklo tok; 22 micha ilap vt illi tuk osh, anonti falamvt tana he aien a kvt tikbanli anoli: 23 yohmi mvt nan im ai ithvna vhleha ilapa holitobli pulla kvt, ile kaiyancha he, micha na-palvmmi puta ma pisa chi aien a kvt im vlhtaha hi a, i miha. 28 Chisvs vt vba pit anumpula chi hosh nvnih chaha pit oiya atuk osh, vba pit anumpulit ahanta moma hosh pisa ka inlv toba. 37 Illa yosh nan-isht-ahullo okpulo isht abeka tuk a Chisvs vt hlakofichi: 43 mihmvt anonti ilap i palvmmi illa hi vt tikbanli anoli; 46 nan im ai ithvna vhleha hvt ilap na-fehna bvnna im anukfila puta ka im oktvbli: 51 Samalia okla hvt Chisvs a ik aiokpacho kvt okla illit taha chi ka, Chemis, Chan, Ita-tuklo kvt ahni ma, Chisvs vt nan isht i miha; 57 hatak kaniohmi kvt chukvsh a mominchit isht im antia he keyu kvt ash a hatuk o, nan i miha.

1. YUMOHMI mvt ilapo nan im ai ithvna vhleha auah-tuklo kash hoyot itahobi mvt, nan-isht-ahullo okpulo puta imaiyvt, mikmvt abeka ilaiyuka puta ma hlakofihincha chi ka, nan aiahlika ya isht im apesa tok.

2. Yohmi mvt, Chihowa apehlichika yoka isht anumpohonlit, anonti abeka puta ma hlakofihincha chi mak o pit tihleli tok.

3. Yohmi mvt, Itvnowvt hvsh aya kvt tubi kia, mikmvt shukcha, micha prska, anonti tuli holisso, ilefoka lumbo mvt tuklo aiyuka, peh nanasi kia hvch ik jsho kashke.

4. Mikmvt chuka nana ho ont hvsh chukowakmvt, yummak o hvsh ahashwa tuk osh, kohchvt hvsh iashke.

5. Micha kvna kia ik hvchi aiokpachokma, tumaha yuma a kohchvt hvsh iakmvt, nan-isht im atokowa mak o hituk tohbi ka hvch iyi ya tahtulit hvsh a kanchashke, im achi tok.

6. Mihma okla ivt tumaha puta ka hlopullit ayvt, vba-

numpa isht anumpohonlit, kanima moma ka abeka a hlakofichit itvnowa tok.

7. 8. Helot miko ash ot, yummvt nana puta ai yvmihchi ka haklo tok; yohmi mvt kanimi kvt, Chan ak osh illi tuk vt falamvt tani tuk, achi ma; anonti kanimi kvt, Elias ak osh ant haiaka, achi: mihma inlaka mvt hopaii vhleha tikba ya tok ak osh achufvt falamvt tani hoke, achi hoka, katiohmi ahnit ik im vlpiesot im anukfila tok.

9. Mihmvt Helot ash ot Chan ano noshkoba ha tbli li chamo: amba na yakohmi puta a hahaklo li ka yummak osh kuta hoh cho? achi tok. Mihmvt yummak ash pisa bunna tok.

10. Mihma vbanumpeshi vhleha hash ot falamvt ai ona mvt, nana ai yvmihchi tuk vt mominchit okla im anoli tok. Mihma yummak ash ot pehlinchit il a lumvt, naksika tvmaha hohchifo Betsaita ai i bilka yakni haiaka yo ia tok.

11. Mihma okla hvt akostininch mvt, yummak ash o pit iakaiya tok; mihma yummak ash ot im aiokpahanchit, Chihowa apehlichika isht im anumpohonlit, yummak okvt hlakofvi hokvno hlakofhinch tok.

12. Atuk o nitak ash ot ont shohbit mahaya ma, auah-tuklo kash ot ai vlt, Yakni haiaka yo il aiasha hoka, okla laua yo ish in tohno na ilhkolut tvmaha puta, micha a kocha chuka hiohli yakni auet a bilka fullota aienka ont a nusit, ilhpak ma ahayuchit mayashke, im achi tok.

13. Yohmi kia yummak ash ot, Impa oh ipetá, im achi tok. Yohmi ma, Pvska tahlapi, mikmvt nvni tuklo aienka misha keyu hosh pin chiyvshke; kanima yo vt okla moma ilvppa ilhpak a kil in chumpo hokmvt, okla achi tok.

14. Yohmi ka hatak vt tahlepa sipokni tahlapi foka ha tok. Yohmi ma nan im ai ithvna vhleha hash o, Pokoli tahlapi aiyukvt ia ho ho binohlichí, im achi tok.

15. Yohmi ma yvmihchit, mominchit okla binohlich tok.

16. Yohmi ma yummak ash ot puska tahlapi, micha nvni tuklo aienka kash o ishi cha, pit vba chakalit aiokpvchi cha, tushahlich mvt, okla laua yo in talohla chi ho, nan im ai ithvna vhleha hash pit imia tok.

17. Mihma okla impvt momvt kaiya tok ; mihma okla im atampa tuk a, boshulli yvt kishi auah-tuklo hō okla aiowa tok.

18. Atuk o yakohmi tok : nan im ai ithvna vhleha ak illa hosh ap̄iha hō antvt, vba pit anumpuli tok : atuk osh yvm-mak ash o i ponaklot, Okla huto vno vt kvta sia hō achi hō ? achi tok.

19. Yohmi ma afalaminchi mvt, Chan Baptist ; amba kanimi kvto, Elias ak o achi : mikma inlaka yvto, Hopaii vhleha tikba ya tok ak osh achvft falamvt tani hoke, okla achishke, achi tok.

20. Amba, Hvhishno vto vno vt kvta sia hō hvsh achi hō ? im achi ma, Pita yvt afalaminchit, Chihowa i Klaist a, achi tok.

21. Yohmi ma yvmmma hatak nana kia okla ik im anolo ka ch̄i ka, achukmalit kvlochit i miha mvt,

22. Hatak Ushi yokut nan isht ai ilbvsha kv̄t in laua ch̄i, yohmikmt hochitoka vhleha, micha na holitompa isht asha pehlichi vhleha, mikmt na holissochi puta aienā mvt ik i yimmot ik aiokpachot vbi tuk ma, nitak ont atuchinakma falamvt tana hi oke, achi tok.

23. Yohmi mvt mominchit i miha kv̄t, Kvna hosh siakaiya he, ahni hok mvt, ilapo yvt ik ile holitoblo hosh nitak moma ka im iti-taiyukhvna atuk ma ieshi hosh, vno a siakaiyashke.

24. Kvna kia ilap im ilhfiopak a okchalinchi bunna hok-mvt, i-kvnia hi oka ; amba kvna hosh vno pulla hatuk mak o im ilhfiopak vt isht i kvnia hokmvt, mihi yosh il im okchalincha hi oke.

25. Hatak vt yakni a il a mominchit ieshi hosh, anonti ilapo fehna yash il okpvnichit il issikkopalit kaiyanchi hok-mvto, nanta hō isht ilaiyukpa hinla cho ?

26. Kvna hosh vno, micha v̄m anumpa puta aienā ka i hofahya tukma, mihi yo Hatak Ushi vt ilapo, mikmt Iki, micha enchil hochukma vhleha a puta nan-isht aholitopa ka il aieshit ayvt vlakmvt, i hofahya hi oke.

27. Yohmi kia Chihowa apehlichika ya pisa ha keyuk

mvt, illa chi keyu kut ilvppa kanimi mvt hiohmaya hoke : ahli mak o huchim anoli lishke, achi tok.

28. Ilvppa puta ka ahanchi tuk ash nitak ont isht untucha foka ma, Pita, micha Chan, mikmvt Chemis aienka pehlichi cha, nvnih chaha yo vba pit anumpula chi hosh ia tok.

29. Atuk osh vba pit anumpuli ma, nashuka yvt inlv toba ma, i na-fohka yvt tohbit shohmalili tok.

30. Yohmi ma hatak tuklo kvt, yummvt Moses, micha Elias ita-tuklo mak osh yummak ash ant im anumpulit okla tok.

31. Yummak okvt nan-isht a holitopa ahli ka il aieshi hosh ant otaiyanit okla cha, yummak okvt Chelusalem a ai illa hi a, isht anumpohonlit okla tok.

32. Yohmi kia Pita, micha inlaka aienka yummma apehvt aya tuk ash ot nosilhha fehna tok : atuk osh okla ont okchvt taha mvt, isht-a holitopaka yash, micha hatak tuklo kvt apehvt hieli tuk ash aienka okla pisa tok.

33. Atuk o yakohmi tok ; yummak ash ot ai i filvmmmit tamort okla ma, Pita yash osh Chisvs ash, Pi shahli ma ! ilvppa e maya kvt pim achukmvshke : yohmi ka vlhtipo tuchina ka il ikbashke, achvfa kvt chimmi hokma, anonti achefvt Moses ak o immi hokma, anonti achvfa kvt Elias ak o immi hashke, achi tok : yummak o miha li, ahni keyu hosh :

34. Yummak ash ot yakohmichit anumpohonli moma na hoshonti aya kvt, ant o hoshontikachi tok ; yohmi ma hoshonti anukaka ya pit chukowvt ia kvt, okla nukshopa tok.

35. Yohmi ma hoshonti anukaka ya auet ai anumpa kvt, Ilvppak osh Suso a holitopa mak oke, hush i haponaklashe, achi tok.

36. Atuk o anumpa hash ot ont taha ma, Chisvs ak illa hosh hikja na okla pisa tok. Yvmohmi ma nana yakohmi kash okla nana ik achot, nana ho pisa tuk vt achvfonvchi mvt hatak nana kia nitak yummma foka ka ik im anolo beka tok.

37. Atuk o yakohmi tok : ont onna ma nvnih hash okla asht akowvt minti ma, okla lawa kvt ont afama tok.

38. Yohmi ma okla ha takla aya tuk vt hatak achufvt chitolit mihvt, Nan-ithvnanchi ma! svso ha ish pisakbano chim ahni lishke, v̄m v̄lla yvt yummak bano hatuk oke.

39. Yohmi ho shilombish okpulo yvt ishikma, ashalika tahpahanla hoke; mikmvt haiochichechit itukpokpokihinch chi beka hoke: yohmi kvt kaniohmit i filvmmma he keyu chohmit, haknip litolit hotopahanlishke.

40. Yohmi ho na chim ai ithvna vhleha hak o yvmma kohchicha hinla ka, im asilhha li tuk ak o, okla yvmihcha he keyu ketuk oke, achi tok.

41. Mihma Chis̄s ash ot afalaminchi mvt, Na yimmi iksho, micha nan-ahli ai i shanaia fehna okla hvchia ma! hvch iba takla ahantvt, nana ka isht ak ahno ho katiohmi foka chi cho? Chiso ha ilvppa ishit minti.

42. Mihma ishit minti hosh aya ma, nan-isht-ahullo okpulo yash ot aka pila cha, haiochichechi tok. Mihma Chis̄s vt nan-isht ahullo okpulo yash im alvmmi cha, v̄lla yash hla-kofichit, iki ibbak ash falaminchit fohki tok.

43. Yohmi ma Chihowa nan isht im aiahli chinto fehna ka momvt okla isht nukhlakancha tok. Yohmi kvt nana ka Chis̄s vt ai yvmihchi tuk puta kash momvt, okokko! okla aiahnit maya takla ma, yummak ash osh ilap nan im ai ithvna vhleha hash,

44. Anumpa ilvppa puta kvt hvchi haksobish atuk ma ik a fohoká, hvsh ahnashke; Hatak Ushi yokvt hatak puta ibbak a i foyuka hi oke.

45. Yohmi kia anumpa ilvppa okla ik akostininch ki tok: mihma na miha kash ik im ai otano; yohmi hoka yummak ash okla ik ai ithaiyano ki tok: mihmvt anumpa yummak ash im asilhvchi okla nukwia tok.

46. Yohini ma, Katima kak osh holitopa kvt moma i shahla hinla hoh chishba? ahnit okla isht im ai anukfilvt maya tok.

47. Mihmvt, Kvna hosh v̄lla ilvppa vmmi hohchifo ho ahninchi hokvto, vno ak o si ahninchi hoke: mikmvt kvna

48. Mihmvt, Kvna hosh v̄lla ilvppa vmmi hohchifo ho ahninchi hokvto, vno ak o si ahninchi hoke: mikmvt kvna

hosh vno a si ahninchı hokmvt, yummvt auet sa kanchi tok ma pit ahninchı hoke: kanima hosh moma ik a lauwo kvt hvchi takla ahanta hokvto, mihi yosh moma i shahla hi oke, im achi tok.

49. Mihma Chan vt afalaminchi mvt, Pi shahli ma! achufa hosh chı hohchifo ha nan-isht-ahullo okpulo puta ka ishit kocha weli hosh anta ho e pisa tuk: yohmi kia yummak okvt ik piba fohko hatuk o, il im alummī kano, achi tok.

50. Mihma Chisvs ash ot, Hvch ik im alammo kashke: kvna hosh pi sanalit anta keyu hokvto, pibai achufa hoke.

51. Atuk o yakohmi tok: yummak ash o aiokpanchit vba ya isht ia chı nitak vt ont vlhpiesa hatuk o, Chelusalem a ia chı kvt ai anukfoyukvt nashuka ya pit filimmi tok.

52. Mihmvt nan ont im atahla chı ho, anumpa shali vhleha ha tikba pit tihleli tok: yohmi na okla ıvt Samalitan okla in tumahushi o ont chukowa tok.

53. Yohmi ma yummak okvt Chelusalem a ia ho fehna nashuka yatuk o, okla ik aiokpacho ki tok.

54. Yohmi na nan im ai ithvna Chemis, micha Chan ita tuklo kvt yakomi ka pisa mvt, Chitokaka ma! Elias vt yvmihchi tok akinli ho chohmichit, pishno mvt luak vba minti kvt aka itula cha, okla ilvppa hushmit tahla chı ka il im apesa hinla ka, ish ahni cho? achi tok.

55. Mihma yummak ash ot filemvt im alummī mvt, Hvchi chukvsh ai im anukfila a kaniohmi hosh hvsh aya kvt hvch ik ithanoshke.

56. Hatak Ushi vt hatak puta ka vba chı hosh aya ha tok keyu, amba okchalincha chı ha tok oke, achi tok. Mihma ilhkolut tumahushi inla yo ong tok.

57. Atuk o yakohmi tok; ia hosh okla itvnowa ma, takla ya hatak achufut, Chitokaka ma! kanimak fehna chik aya kia, vno vt chiakaiya la chı hoke, im achi tok.

58. Mihma Chisvs ash ot, Chula puta kvt chiluk vt im ai ashakma, vba hushi puta kvt vlhpichik vt im asha hoke: amba Hatak Ushi okvto noshkobo ha kanima a bohla hi vt ik im iiksho hoke, im achi tok.

59. Mihmvt inla yo, Is siakaiyashke, im achi tok. Yoh-

mi kia yummak ash ot, Chitokaka ma! vlhpesa, vm ahni na iwt, aki ak o tikba ont ak hohpi ha yosh; im achi tok.

60. Mihma Chisus ash ot, Illi ak osh ilap bika illi yokvno hohpashke: amba chishno vto iwt, Chihowa apehlichika ya isht ish anumpohonlashke, im achi tok.

61. Mihma anonti inla mvt, Chiakaiya la chi mak oke; yohmi kia iyt an chuka maya kak o tikba ont aiokpvchi la hi a, is svm ahnashke, achi tok.

62. Mihma Chisus ash ot, Hatak nana kiá yakni isht patafa ya ibbak a isht ishi ha yvt, olbulaka a pit hopokoyo kvt, Chihowa apehlichika ya ahalaia he vlhpesa keyu hoke, achi tok.

C H A P T A X.

Chisus vt nan im ai ithvna vhleha pokoli untuklochit vbanumpa isht anumpula chi, micha nana kvt a fehna kia yvmihchi puta hosh im ai vlhpesa hatuk vt ovnicha chi mak o a tohno, 1: 17 kaniohmi kak o okla na yukpa he isht ai vlhpesa hatuk a, Chisus vt im anoli; 25 Chisus vt nan-vlpisa ithvnanchi hatuk a vba yakni hina ya isht it im anumpuli: yohmi hosh hatak achukma Samalitan vt kaniohmi tok nan-isht vlpisa yvmmak o, ilapvt in chuka panta hatak puta ka isht ithana he mak o isht im anumpuli.

1. NANA kvt a yakohmi ha ya, Chitokaka yvt inla yosh pokoli untuklo ho atokoli akinli cha, tuklo aiyukachit tvma-ha puta, mikmvt kanima yo ilapo vt ai ona hinla kvt, tik-banli pit tihleli tok.

2. Yvmohmi hatuk osh na-waya yvt ai-vlmo-on a hokvto laua mvhli ho, amba na-toksli vhleha hak osh chvbehashish-ke: yohmi hoka na-waya yvt ai-vlmo-on a ka in Chitokaka ya hush im asilhhahanchi na na-toksli vhleha ha i na-waya yvt ai-vlmo-on a ka pit apittashke.

3. Hush itvnwashke: yakeh! chukfvlhpoba ushi yosh nashobo ai itintakla maya ho, ohmichi mak osh pit hvchi tihleli li hoke.

4. Tuli holissu ai-vlhto, micha bahta, mikmvt shulush

aiena ka isht hvch ik ayo kashke : micha hina takla ya hatak nana kia hvch ik aiokpacho kashke.

5. Mikmvt chuka nana ho ont hvsh chukowa kut nan tikba, Na-nanaiya kut chuka ilvppa ant iba fokashke, ahnit hvsh mihashke ;

6. Mikma na-nanaiya ushi vt yummma anta tukma, nan-isht hvsh il a nanaiya mvt ai onvtuyulashke : amba keyukmvno, nan-isht hvsh il a nanaiya yut hvchi falama hi oke.

7. Mikmvt chuka yummak ash inli ho ahashwvt, peh nana hoh kia hvch ipetakma, vptv hvsh ishkashke : toksvli vt im vlhtoba he ak osh im ai vlhpesa hoka. Chuka vbaiyvchit hvch ik itvnowo kashke.

8. Mikmvt tumaha nana ho ont hvsh chukowa ka, okla hvchi aiokpachikma, impa nana hosh hvchi tikba talaia hokma, hvsh pashke.

9. Yohmikmvt abeka yut yummma ashakma, ho hlakofichí : yohmikmvt Chihowa apehlichika yut hvch i bilika vlvhshke, hvsh im ahashke.

10. Amba tumaha nana ho ont hvsh chukowa na ik hvchi aiokpachokma, yummak ash a kohchvt vt, hina bvshkvchi puta ka hvsh ona cha,

11. Hvchin tumaha i hituk tohbi vt pi a lapali tuk a, hvchi o kashofit e kanchishke : yohmi kia Chihowa apehlichika yato hvch i bilika vla hoka, hvsh ithaiyanashke, hvsh im ahashke.

12. Yohmi kia nitak yummma fehnakma Sotom vt im ahleka hoh kia pit im vlhpisa kut, tumaha yummma i shahla hi oke.

13. Kolasin ma ! na chi palvmmi mak oke ; Betsaita ma ! na chi palvmmi mak oke ; na-fehna puta kut hvchishno ya a hvchim a yvmoohmi tuk vt Taia, micha Saiton ita-tuklo ka a yvmoohmi ha tok okma, hopaki kash inli ho na-pashi tunna fohka cha, hituk chubbi anuka binoh-mayvt ile kostininchha hi a tok oke.

14. Yohmi kia nan ai-vlhpisa chinto nitak okvno Taia, micha Saiton ita-tuklo kut im ahleka hoh kia pit im vlhpisa kut, hvchishno a i shahla hi oke.

15. Yohmikma Kapenam chia hvt shutik ak o ont ish talaia tuk vt, aka ivt ai-okpuloka mak o pit ish a kuna hi oke.

16. Mikma kuna hosh huchi haponaklokmvt, vno a a haponaklo hoke: mikma kuna hosh huchishno a huchi shitile-makmvt, vno a sa shitilema hoke: mikmvt vno a sa shitile-makmvt, auet sa kanchi tok a shitilema hoke.

17. Yumohmi tuk o pokoli untuklo kash osh na yukpa hosh falamvt ai vla mvt, Chitokaka ma! chi hohchifo pulla kak o nan-isht-ahullo okpulo puta kak kia pim antihiyvshke, achi tok.

18. Mihma yummak ash ot, Setan vt malvtha kvt vba vttvt aka minti chatuk a, chiyuhmi ho pisa li kuno.

19. Yakeh! sinti chilita puta, mikmvt halambia puta aiena ka hush a hvhlihinchi: micha na tnv^p nan-isht ai im ahli ka ma mominchit a hush imaiya chi mak o nan isht aiahlika ya hush ima lishke: yohmi ka nana hosh a kaniohmit huchi hotopala hi vt iksho ka hi oke.

20. Yohmi kia shilombish okpulo puta kvt huchim antia ilvppak okvno nan ik huchi yukpo kashke; amba huchi hohchifo puta kvt vba ya a holocco, yummak o na huchi yukpa vlhpesa hoke, im achi tok.

21. Hvshi kanvlli vlhpisa yummma fehna ma Chisus vt chukvsh na yukpa mvt, Aki, vba, mikmvt yakni ita-tuklo in Chitokaka ma! na yakohmi puta ka na kostini, micha nan-ithvna aieno kuno ish in luhmi tuk osh, vlosi puta ho ish im otvninchi hoka, yak oke, chim aiahni lishke, vlhpiesvshke, Aki ma! yummak osh chim vlhpiesa hatuk oka:

22. Nan okluha ka Aki vt subbak a a fohkishke; yohmi ka kuna hosh Ushi yoka hatak nana kia ik ithano ho, amba Iki vt ak illa hoke: mikmvt kuna hosh Iki yoka kuna kia ik ithano ho, amba Ushi vt ak illa; micha Ushi vt kuna ho im otvninchi mak bano hoke, achi tok.

23. Yohmi mvt nan im ai ithvna vhleha a hieli ka pit filema mvt, yummak ash bano ho, Nishkin vt huchishno nana hush pisa ka pisa kuto na yukpushke.

24. Hopaii vhleha, micha miko vhleha aieno kvt laua hosh

hvchishno nana hvsh pihisa ka pisa bvnna tuk osh, ik peso ki tok: micha hvchishno nana hvsh hah^{ak}lo ka haklo bvnna tuk osh, ik haklo ki tok o, hvchim anoli lishke, achi tok.

25. Yohmi ma yakeh! nan-vlhpisa ithvnanchi achvfa hosh wakayvt hikia mvt, imomaka pisa bvnvt, Nan-ithvnanchi ma! ai okchayvt bilia ya pisa la hi okvto, nanta ho katiohmi la chⁱ cho? achi tok.

26. Mihma yummak ash ot, Nan-vlhpisa holisso ha katiohmit a holisso ho? katiohmi ho ai ish it im anumpuli ho? im achi tok.

27. Mihma yummak ash ot afalaminchi mvt, Chi chukvsh mominchi hosh, chi shilombish ma mominchit, chim isht-hlampko a mominchit, mikmvt chim anukfila ma mominchi hosh Chitokaka chin Chihowa ya isht ish holitoblashke; mikmvt chin chuka panta hatak ma ish holitobli kv^t, chishno akinli chim itilauashke, im achi tok.

28. Mihma yummak ash ot, Ulhpesa, ish miha mvhlishke: ilvppak o ish yvmihchashke: yohmi hokmak osh chi okchaya hi oke, im achi tok.

29. Yohmi kia yummak ash ot il ai achukmali bvnna kv^t, Chisvs ash, Yohmi ka kvta hak osh an chuka panta hatak o? im achi tok.

30. Mihma Chisvs ash ot afalaminchi mvt, Hatak achvft Chelusalem vttvt Cheliko ia tuk osh, hatak hu-kopa vhleha ont iba chukowa na i nafohka ya im apoyua cha, isskkopalit boyuhli na ill^a hosit itonla ho, issvt ilhkoli tok.

31. Atuk o yakohmi tok; na-holitompa isht vtta yosh hina yummak minta he mak yoba tuk osh, yummak ash ant pisa mvt, apakfompt hina in tvnnvp o ant ia tok.

32. Mihma Lefait hatak ak kia yummak ash vlvt ant pisa kia, yummak ash inli ho apakfompt hina in tvnnvp o ant ia tok.

33. Amba Samalitan hatak osh nowvt aya tuk osh, yummak mvt ai itola kash, vlvt pisa mvt, i nukh^{ak}lo tok.

34. Mihmvt ai-itola kash vla cha, ai okpunlo tuk a na-

bila, micha okapaki aienā ka isht ahummit, afohlit in tahli cha, ilap im issuba hatuk ash o binilichit isht ayvt, a-foha chuka yo isht ona cha, apesuchi tok.

35. Atuk osh ont onna ma ia chi mut, iskvli tuklo ka ishit kohchit, afoha chuka apesuchi yash ima mut, Ilvppa ish apistikelashke : micha atampa kvt kaniohmi hosh chi kvnia tuk mak heno, falamut aya likmut, chim atobbi lashke ; im achi tok.

36. Yumohmi ka tuchina ilvppa katima kak osh hatak hukopa vhleha ont im isht kanvpa tuk a in chuka panta hatak a tok o, chim ahoba cho ? achi tok.

37. Mihma yummak ash ot, I nukhaklo tok a, achi tok. Mihma Chisus ash ot, Ia cha, chishno mut yummak inli ho ish chohminchashke, im achi tok.

38. Atuk osh yakohmi tok ; ia hosh okla itvnowvt aya ma, yummak ash ot tvmahushi achvfa ho pit chukowa tok : mihma ohoyo achvfa, Mahla hohchifo hosh, aiokpvchit im aboha ya isht chukowa tok.

39. Mihma yummma itibapishi hvt Meli hohchifo hosh anta tuk osh, yummak ash kia Chisus iyi ituma ya binilit, im anumpa ha haklo tok.

40. Amba Mahla vto nan-isht vttā in lauvt isht ik im ai vlhpieso mut, yummak ash o im ai vlt, Chitokaka ma ! sa nakfish vt si apela hi a ik ahno ho, vno ak bano hosh nan-isht anta li ka, nan isht chik ahno cho ? yohmi hoka nan isht ik subai vttā, ish i mihashke, ant im achi tok.

41. Mihma Chisus ash ot afalaminchi mut, Mahla ma ! Mahla ma ! nana ka ahalaivt im anukfila isht ik chim vlhpieso kvt chin lauvshke.

42. Yohmi kia nana ai vlhpiesa hokvto achvfa hoke ; yohmi ka ai im ai isha he keyu nana achukma mih mak o Meli yokvto ai apissali tuk oke, im achi tok.

C H A P T A XI.

Chisus vt nan im ai ithvna vhleha ha vba pit anumpuli im abvchi, 1 ;
14 nan-isht abullo okpulo kohchichi : 28 mikmut kvna hosh Chih-

wa im anumpa h̄a im antia hokvto holitopa ka anoli; 37 Falisi okla nana ka ilahobi, yummak oka nana palvmmi opvtula he puta ka atokowa anoli.

1. ATUK o yakohmi tok: a kaniohmi ho antvt vba pit anumpuli tuk osh ont issa ma, nan im ai ithvna vhleha h̄a achvft, Chitokaka ma! Chan vt nan im ai ithvna vhleha h̄a im abvchi tok a, chohmit pishno ma vba pit anumpuli ka, ish pim abvchashke, im achi tok.

2. Mihma yummak ash ot, Uba pit hvsh anumpulikmvt, Piki vba ish binili ma! Chi hohchifo hvt holitopashke. Ish apehlichika yvt vlashke. Nana ish aiahni ka vba ya a yohmi kvt yakni ilvppak ma a yohmi makinlashke.

3. Nitak moma ilhpak vt a pim vlhpiesa mak o nitak osh nitak ma ish pihimashke.

4. Mikmvt il ai-ashvchika puta ka ish pi kashofashke: pishno mvt kvna kia aheda pin takalikma, il i kashofi banō hoke: micha anukpvlika imma hokvno ik iba chukowá, chik pim ahno kashke; amba nanokpulo ya ish pi a hlakofihin-chashke, hvsh achashke, im achi tok.

5, 6. Mihmvt yummak ash ot, Hvsh katima kak osh chi kana hvt asha tuk osh, ninak iklvnna ho ayvt ish onvt, A kana hvt nowvt aya tuk osh vm vla ho, nana kia itikba ma talali la hi vt ik sv̄m iksho hoka, pvska tuchina ka is sam potashke, a kana ma! ish im achi;

7. Yohmikma aboha anukaka ya auet ai afalaminchi kut, Chik sv̄m ahchibalo kia, himak ano okhissa vt vlkama ho, vm vlla vt si apihvt topa h̄a kahvt maya ka, tani lish chima la he keyushke, auet chim achi;

8. Yohmi tuk kia i kana hatuk ak osh tani cha, ipeta he tuk keyu kia, amba yummak ash osh im ahchibuchi fehna kak o tani cha, laua kvt kaniohmi ho bvnnakma, ima hinla hoke, hvchim achi lishke.

9. Yohmi ka hvsh asilhhakma, hvch ima he: hvsh hoyokmut, hvsh ahayucha he: hvsh sokohakma, hvchin tiwa hi oke.

10. Asilhha aiyuka hokvto habena hoke; mikma kvna

hosh hoyo hokvto, ahayuchi hoke: micha kuna hosh sokohakma, in tiwa pulla hi oke, hvchim achi lishke.

11. Hvsh kanima kvt iki atuk o, ushi vt pvska im asilhhakma, yvmmak ash tuli yo ima hinla? keyukmvt nuni yo asilhhakma, nuni a he tuk ash sinti yo ima hinla ho?

12. Yvmmak keyukmvt, akak-ushi lobunchi yo asilhhakma, halambia ho ima hinla ho?

13. Yvmohmi ka hvchishno vt hvchi ai vlhpesa keyu kia, hvchim vlla ya nana achukma puta ka isht ima hokvto hvchimponna ka, hvch Iki vba binili kvt i shaiyahlit, kuna hosh im asilhhakma, Shilombish Holitopa ya ima hinla keyu cho? im achi tok.

14. Mihma yvmmak ash ot ik anumpulo yo nan-isht ahullo okpulo ya a kohchit anta tok. Atuk o yakohmi tok: nan-isht ahullo okpulo vt a kohcha mvno, ik anumpulo ash ot anumpuli tok; mihma okla hvt anukhlakancha tok.

15. Yohmi kia kanimi kvto, Ilvppvt nan-isht ahullo okpulo puta i miko Beelsebvb ak o nan-isht ahullo okpulo puta ka isht kocha weli hoke, achi tok.

16. Mihma inlaka mvt imomaka pisa kvt, nan-isht-atomkowa kvt vba a minta hi a im a hoyo tok.

17. Yohmi kia yvmmak okvt nana im anukfila puta ka ithana hatuk osh, Apehlichika achvfa kvt it a kashapvt ilapo ash inli it im i sanali hokvt, ont aiokpulokvt taha hoke: mikma chuka yvt ita kashapvt ilapo ash inli it im i sanali hokvt, akvma hoke.

18. Setan ak kia ita kashapvt ilapo ash inlit il im i sanali hokmvt, im apehlichika yvt katiohmi hosh talaia hinla cho? vno vt Beelsebvb ak o nan-isht ahullo okpulo puta ka isht kocha weli li ho hvsh miha hoka,

19. Yohmi ka vno vt Beelsebvb ak o nan-isht ahullo okpulo puta ka isht kocha weli li hokma, hvch iso vhleha hvto kvta hak o yvmma isht kocha weli cho? Yohmi hoka yvmmak osh na hvchim apesa yashke.

20. Amba vno vt Chihowa ibbak-ushi o nan isht ahullo

okpulo puta ka isht kocha wihinli li hokma, yohmi hokmno, Chihowa apehlichika yvt hvchim vla mak oke.

21. Hatak hlampko yosh na-halupa ai im vlhtaiyaha hosh in chuka apesuchi hokuno, nana kvt aiyubaka hoke.

22. Amba kullo kvt ilapo a i shahli hosh ant i kohchvt, imaiyachi hokmak osh, i na-halupa ai anukchieto tuk ash mominchit im ai eshi cha, nana immi hatuk ash inla im it a kvshkoli chatuk oke.

23. Kvna hosh vno a sub ai achufa keyu kvt vm i sanali hoke: mikma kvna hosh suba hoyo keyu hokvto na fimm*i* yoke.

24. Shilombish okpulo yvt hatak a a kohchakmvt, a foha he hoyot haiaka oka ik ai iksho puta ka hlopullit aya kia ik ahayucho mvt, An chuka ai vttvt kohchvt a minti li kash osh falamvt ia lashke, achi hoke.

25. Atuk osh onakmvt, yvmmak ash ot pashpovt shemvt taiyaha cha hikia ho, ont pisa hoke.

26. Yohmikmvt shilombish okpulo untuklo inla yvt okpulo kvt ilapo a i shahli ho ont pehlichit vla na, yvmmak ash okla pit abeha cha, aisha hoke; yohmikma hatak yvmma nana kvt ont ai-isht im aiyopa kak osh ik achukmo kvt vmmona tuk ash i shahli hoke, im achi tok.

27. Atuk o yakohmi tok; ilvppa anumpohonli moma ho, ohoyo achufut okla takla hikia tuk vt chitoli hosh mihvvt, Ikfoka yvt yvmmak osh chisht aya tuk, mikma i pishi ma ish a pihsish tuk a aiena kuto holitopushke, im achi tok.

28. Yohmi kia yvmmak ash ot, Ahli, na-yukpa aiahli kuto Chihowa im anumpa ha haklo cha, im antia hak oke, achi tok.

29. Atuk o okla hvt itahobvt ant a laua fehnvt taha ma, Hatak himonasi asha ilvppvt ai vlhpesa keyushke; nan-isht atokowa okla hoyo; yohmi kia nan-isht atokowa nana hosh in takala he keyu, amba hopaii Chonas nan-isht im atokowa kak a hi oke.

30. Chonas vt Ninefeh okla ha isht ai im atokowa tok a, Hatak Ushi mvt hatak himonasi asha ilvppa ai in chiyuhmi makinla hi oke.

31. Nana ulhpisa chinto nitak okvno oka-mahli ohoyo miko vt hatak himonasi asha ilvppa awant hikia cha, atokowvt anumpa onocha hi oke ; yummak okvto yakni ont ai vhli pilla vttvt minti kvt, Solomon isht im a hopoyuksaka ya haklot aya tok okvt ; atuk o yakeh ! Solomon a imaiya mak osh ilvppa ahantvshke.

32. Nana ulhpisa chinto nitak okvno Ninefeh okla hvt hatak vt himonasi asha ilrppa iba takla wakayvt hiohmavt, atokowvt anumpa onocha hi oke ; yummak okvto Chonas vt vbanumpa ont isht im anumpohonli ma, ile kostininch tok okvt ; atuk o yakeh ! Chonas a imaiya mak osh ilvppa ahantvshke.

33. Hatak nana ak osh pula ha pvlali kvt a lumaka ho talali chatuk keyu, keyukmvt tanchi isht-ulhpisa nutaka yo talali chatuk keyu, amba kvna hoh kia ant chukowakmvt tohwikelki ka pisa chi ka, pula ai-o hikia ak o o hilechi chatuk.

34. Haknip a i pula hvt nishkin ak oke : yohmi hoka chi nishkin vt achukmakma, chi haknip ak kia momvt tohwikelit alota hoke ; amba chi nishkin vt okpulo yokmuno, chi haknip ak kia ai okhlilikvt kvnia hoke.

35. Yohmi ka ahah ! ish aiahni na na tohwikel kvt a chi foyuka yummvt ik okhlilo kashke.

36. Yvmohmi ka chi haknip vt im a kanima kvt ai okhli-likia iiksho hosh tohwikelki banot alotowa hokma, moma kvt tohwikelit alotowa kvt, pula lua achukma kvt chim a tohwikelichi chatuk a a chiyuhma hinla hoke, achi tok.

37. Yvmohmit anumpohonli moma na Falisi achvft, yummak ash ot ont ibai impa hinla ka im ahni tok : mihma ont chukowa cha, impa chi hosh binili tok.

38. Yohmi ma Falisi ash ot pisa mvt, ik impo kisha kvt ibbak ik ahchifo ke tuk a, okokko ! aiahni tok.

39. Mihma Chitokaka ash osh, Falisi huchia hvt isht-ishko micha ampo aienka ka paknaka yokvno hvsh kashofishke : amba huchi anukaka yvto na wehpuli, micha nan ik ai ulh-peso banot isht huchi alotowvshke.

40. Nan anukfila iksho huchia ma ! nana ka paknaka ya ikbi mvt, anukaka yak kia ikbi akinli tok keyu cho ?

41. Amba yohmi kia nana hvchim asha kvt hvsh habenu-chashke: yohmikma yakeh! nana puta kvt a hvchim vlpesa bano hoke,

42. Amba Falisi hvchia ma! na hvchi palummi mak oke, mint, micha lu, mikmut haiyu^upolo ilaiyuka puta waya it a kashko^a ont isht pokoli kak osh hvchiⁱ kunia, mikmut nana ai-vlhpiesa ka, micha Chihowa holitobli aien a hokuno hvsh vbanvbl hoka: ilvppak o a hvchi yvmohmi ha yosh, anonti yvmmak ma hvch ik a haksecho ka hetuk oke.

43. Falisi hvchia ma! na hvchi palummi mak oke, sinakak puta anukaka aiasha holitopa puta, mikmut ilhpak a kanchi ai it aiokpvchi aien a kak o hvchim ai achukma hoka.

44. Na-holissochi vhleha, micha Falisi okla aien a nan-ilahobi hvchia ma! na hvchi palummi mak oke; a-hollopi vt otani keyu ho, hatak vt a nowvt vbanopoli kia, yvmmvt ik akostininch chatuk a hvch itilaui hoka, im achi tok.

45. Mihma nan-vlhpisa ithvnanchi vhleha hvt achvfut afalaminchit, Nan-ithvnanchi ma! ilvppa yak ish achi kvt pishno a aieninchit nan isht chik pi ahobaloshke.

46. Mihma yvmmak ash ot, Nan-vlhpisa ithvnanchi hvchia ma! hvchishno ak kia na hvchi palummi mak oke; nana weki shali ka palumma hinla ho hatak a hvsh shalihinch mvt, hvchishno yak okto nana weki ash hvch ibbak ushi achvfona kia ishit hvch ik potolo hoka.

47. Na hvchi palummi mak oke: hopaⁱⁱ puta ka hvchin tikba vhleha hvt vbi tok a i sepulka yo hvsh ihikbi hoka.

48. Hvchin tikba vhleha hvt yvmmak oka ahambi mvhli ma, hvchishno vt i sepulka puta ma hvsh ihikbi kvt, hvchin tikba vhleha hvt nana a kaniohmi tok a hvsh im ahninch kvt isht atokowa mak o hvsh ieshi mvhlishke.

49. Yvmohmi ka Chihowa i hopoyuksaka yak kia yak achi tok. Hopaⁱⁱ vhleha, micha vbanumpeshi vhleha aien ka pit in tihlihinli likma, kanima ka vblkmt, anonti issikkopalai aien he;

50. Yohmi na yakni vt toba tok taiyakla ka hopaⁱⁱ vhleha im issish vt hlatahampa tok moyuma ka, himonasi hatak ahashwa ilvppak o im a hoy a hi oke.

51. Ebel a im issish a tok a ai vhlit mihintit Sakalaia
al ta micha temple itin takla ai vbi tok issish ak o ant ai
vhli yvmmak o himonasi hatak aiasha ilvppak o im a hoy
he mak oke, aiahli mak o hvchi miha lishke.

52. Nan-vlhpisa ithvnanchi hvchia ma ! na hvchi palummi
mak oke ; nan-ai-ithuna isht tiwa ya ishit hvsh kanchi hoka :
hvchishno ak kia pit hvch ik chukowokmvt, inla yvt pit
abeha he tuk a hvsh ataklahamishke, achi tok.

53. Ilvppa puta ka isht im ahanchi moma na na holissochi
vhleha micha Falisi vhleha aiena kvt a tuhpalechit,
yummvt nana ilaiyuka miha he tuk, okla achibuchi o fehna
mvt,

54. Nana kia itakha a kohchvt miha na haklot nan-vlhpisa
isht onocha he bunna hosh okla im aiechi tok.

C H A P T A X I I .

Chisvs vt nan-im ai ithvna vhleha ha nana ka peh ilahoba he imma
hokvno ahah ! okla ahna chi ka i miha, 1 ; 13 yohmi mvt nan im
ai ithvna vhleha hvt chukvsh a nan ilaiyuka isht ik asitio ka chi
ka, hatak nan in laua yosh nana ai isht ilaiyukpvt ahanta tuk o,
nan illi hvt ashalka a mokofit ishi tok, nan isht vlhpisa ha isht im
anumpuli. 22 Chisvs vt nan im ai ithvna vhleha ha yakni paknaka
nana a kaniohmi puta hokvno chukvsh isht ik anushkunno ka hi a
i miha ; 31 micha hatak shilombish okchaya he ak o na tikba anuk-
fihinli ; 36 yohmikmvt Chitokaka yvt aya hi a, tikbanli im vlhta
he puta ka isht im anumpuli. 54 Chisvs vt okla ha, ilap ak osh
Klaist mak atuk a ik akostininch ka, nan isht i miha ; yohmi mvt
Chihowa ha iti nanaiya pulla hi a i miha.

1. YUMOHMI ai itin takla ma, okla laua kvt atampa
fehna hosh itvna, yvmoohmi cha ilap bika okla it i hvhlihini-
chi ma, yvmmak ash ot nan im ai ithvna vhleha hash, Falisi
vhleha i pvska isht shatvmmi, yvmmvt nan-ilahobi yak oka,
ik kaniohmi kia ahah ! hvsh aiahnashke.

2. Nana kvt ompoholmo tuk vt ik wakamo ka he, mikma
nana kvt luma tuk vt ik otaiyano ka he aiena kvt iksho ka
hi oke.

3. Yumohmi hoka nana ho aiokhlilika ya hvsh ai anumpohonli tuk ma, a tohwikeli yo a hakla he; mikmvt hakso-bish ont tikelichit abohushi anukaka yo hvsh ai anumpohonli tok ma, aboha paknaka puta ma ai annoa hi oke.

4. Yohmi ka a kana hvchia ma! Haknip a vbi kia, him-makma nana ho a kaniohma he mvt ik im iksho yummak okvno hvch ik i nukshopo kashke, hvchim achi lishke.

5. Amba kuna ho hvsh i nukshopa he okvno hvchim anoli lashke; Illichi ha mvt, ai-okpuloka ya pit kancha hi vt im vlhpiesa yummak o hvsh i nukshopashke; ahli, Yummak o hvsh i nukshohompashke, hvchim achi lishke.

6. Hushi chipunta tahlapi kvt s int tuchina ho ai vibi chatuk keyu? Yohmi kvt yummak okvt achvfon a Chihowa itikba ya ai a haksi keyu chatuk oke.

7. Yohmi ka hvchishno hvchi pashi puta noshkobo ai o hieli kak kia moyumvt holhtinvt taha yoke. Yohmi hoka ik hvchi nukshopo kashke; holitopa kvt hushi chipunta laua ka hvsh i shahli hoke.

8. Kuna hosh vno a hatak itikba ya Klaist oke, si achit si ahninchit tuk ma, mibi yo Hatak Ushi vt Chihowa im enchil puta itikba ai ahninchit, Um antia yoke, achit aiokpu-cha he akinli hoke.

9. Amba kuna hosh hatak puta itikba vno a ik si ahnie-chot, Ahalaia li keyu, achi tuk ak o, mihi yo Chihowa im enchil itikba ya ik ahniechot ik ahalaiyo ka hi oke.

10. Mikma kuna hosh Hatak Ushi a na mihachit anumpuli tuk okvto, i kashofa he; amba kuna hosh Shilombish Holitopa ak o ik ahobalot anumpuli tuk okvto, i kashofa he keyu kumohmi hoke.

11. Micha sinakak puta, mikmvt miko vhleha, mikmvt nan apesa puta ka hvch isht im ai onakma, kaniohmi hosh, micha afalaminchit nana ka hvsh anumpula he aien a kvt hvch ik anukfillo kashke.

12. Nana ho hvsh acha he vlhpesa ka Shilombish Holitopa ak osh hvshi kanvilli yummak fehna akinli ka hvchim anola hi oke, hvchim achi lishke, im achi tok.

13. Mihma okla hash ot achvft, Nan-ithvnanchi ma!.

itibapishi li ha ish i miha na, nana kvt vlhtoshowvt pibbak a pi fohka tuk a a kashvblastke, im achi tok.

14. Mihma yummak ash o, Hatak chia ha, kvta hosh nana hrchim apesa yokmá, keyukmvt nana hvchi itakovshkoli yokmá, nanta ho sakbi tok oh cho ? im achi tok.

15. Mihmvt, Ahah ! hvsh aiahni cha, nan in laua bvnna ya hvch ik ahalaayo kashke : hatak vt nana kvt laua ho il aieshi kak o im ilhfiopak vt takali ho keyu hoke, im achi tok.

16. Mihmvt okla hash nan-isht vlhpisa ho isht im anumpulit, Hatak nan in laua achvfa hosh im osapa yvt nana waya fehna tok.

17. Mihmvt, Nana a waya puta ka kanima ai ashachi la hi vt ik sv̄m iksho kvt, nanta ak o katiohmi la chi cho ? achit il anukfilli tok.

18. Mihmvt, Ilvppak o yakohmi lashke ; an tanchi in chuka yak o yuhli lish, chito i shahli ho ikbi lashke : micha yummak o a nan a waya, micha na hochukma puta ka mominchit ashachi lashke.

19. Mikmvt sa shilombish a, Sa shilombish ma ! na hochukma laua kvt afvmmi laua taha he vlhpesa ka achukmalit ashachit chin tahlishke ; peh nan ik pilesot fohut, imvt, nan-ishkot, nan isht ish ilaiyukpashke, im achi lashke, achi tok.

20. Yohmi kia Chihowa yokuto yummak ash, Ik hopoyukso chia ma ! chi shilombish a falaminchit himak ninak a chim a hoy a chi hoke ; yohmikmuno nana ish atahli tuk amo kvta ho immi ha chi cho ? im achi tok.

21. Yohmi ka kvna hosh na hochukma puta ma ilap inli isht im atahlit ahanta hosh, anonti Chihowa ai imma hokvno nana kvt im vlhtaiyaha tuk keyu kvt yummak o chiyuhmi hoke, achi tok.

22. Mihmvt nan im ai ithvna vhleha hash, Yvmoohmi hoka hvchi ai okchaya hi a nana ho hvsh pa he ; mikmvt hvchi haknip ma nana ho hvsh fohka hi a anukfillit hvch ik ilbvsho kashke, hvchim achi lishke.

23. Okchaya kvt holitopa kvt ilhpak a i shahlikma, anonti haknip vt holitopa kvt na fohka ya i shahli hoke.

24. Fvla chito puta ka anukfillit ho pesá: yummak okvt nana kia hokchi cha vmo ho keyu: mikmvt yummak okvt vlhpoyak in chuka, micha kanchak aienā kia im asha keyu ho, Chihowa ak osh ipeta hoke. Holitopa kvt hushi puta ka katiohmit isht hvsh i shahli ho?

25. Yohmi ka hvsh katima kak osh anukfihinlit isht ilbusha kvt hvchi chaha ka k u b i t achvfa kia hvsh il acha-kala hinla cho?

26. Nana kvt moma ik a lauwo hoka hvsh yvmihcha he keyu kvt, nanta katiohmi ho inla yokak heno anukfillit hvsh pisa cho?

27. Lilli puta kvt kaniohmit offot hofantit mahaya ka anukfillit ho pesá; yummak okvt toksvlit a hoyubli keyu: anonti nana ho shunni keyushke: yohmi kia Solomon vt nan isht im a holitopa moma isht a shema kvt ilvppa achv-fona kia chohmi tok keyu, hvchim achi lishke.

28. Yohmi ka Chihowa hvt hvshuk himak nitak a kowi ha hiohmaya tuk osh, onna ha apalvska pit vlhpita chj kia, shemvchi kvt yvmihchi kvt, hvchishno a i shahlichi hosh ik hvchi shemacho ka hinla cho? na yimmi fehna keyu hvchia ma!

29. Yohmi hoka nana hvsh impa he, mikmvt nana hvsh ishka he aienā kvt hvch ik hoyo kashke; mikmvt komuntvt ik hvchim anukfilo kashke.

30. Ilvppa chohmi puta kak o oklushi yakni paknaka aiasha kvt hoyo chatuk mak oke: ilvppa chohmi puta ka a hvchi bunna hokvno hvch Iki vt ithana hoke.

31. Yohmi kia amba Chihowa apehlichika yak o hvsh hoyashke; mikmuno ilvppa moyuma kvt a hvchim ibakaha hi oke.

32. Apehlichika ya hvch ima kvt im achukma hoka, chukfulhpoba aya ik lauwo hvchia mvt, ik hvchi nukshopo kashke.

33. Na hvchim asha kvt hvsh kanchi cha, ilbusha ya hvsh habenvchashke: tuli holisso i shukcha yummak okvt nitak nana ont a sipokna he keyu, na-holitompa nitak nana taiyaha he keyu vt vba itonla; hukopa nana hosh ai i bilin-

cha he keyu, mikma shushi mvt okpuna he keyu, yak o
isht hvsh il atahlashke.

34. Kanim yo hvchim ilayak vt itonla hokma, hvchi
chukvsh ak kia mihi yo pit takanla hinla akinli hoka.

35. Il ai-vskufuchi ma isht il ai vskufuchit im vlhtahvt,
pvla puta mvt hvchin lihimashke.

36. Yohmikmvt hvchishno ak kia hatak osh i shahli hvt
ohoyo ipetvchi ia tuk osh falamvt vla chj, atuk osh vla cha
sokohakma, ashalika in tiwa chj cha, pit hoyo hosh aisha
ho hvsh chiyuhmashke.

37. Chitokaka yut ayvt vlt, okchvt asha na ont pisa ka,
tishu vhleha yummvt na-yukpa mak oke : ahli mak o hvchim
achi lishke, Ilap ash osh nan isht il ai vskufuchit tahli-cha,
yummak osh impa chj ka binohlichikmvt, wakayvt nan isht
im vta hi oke.

38. Micha ninak kashapa ont atukla ho ayakmá, keyuk-
mvt ont atuchina ho ayakmá, nana cha yumohmit aisha ho
ont pisa ka, tishu vhleha yummvt nayukpa hi oke.

39. Hatak chuka chufa pehlichi vt in chuka ahanta kv
hvshi kanvlli vlhpisa kaniohmi kak o hukopa yvt vla hi a
akostininchu hokmvt, atoni tuk osh in chuka yvt okpulot ik
in tiwo ka hetuk a, ilvppa hvsh ithaiyanashke.

40. Yohmi hoka hvchishno mvt, hvchim vlhtahashke :
yummak a he hvch ik aiahno hvshi kanvlli vlhpisa takla kia
Hatak Ushi vt vla hi oke.

41. Mihma Pita yash ot, Chitokaka ma ! nan-isht-vlhpisa
ilvppa pishno ak okmá, keyukmvt peh moma kak o isht ish
im anumpulikmá, nanta cho ? im achi tok.

42. Mihma, Yohmi kvno kuta hak osh nan-apesvchi
aiahli, mikmvt hopoyuksa achukma aien tuk o, mihi yo i
shahli hvt ont ai-vlpiesakma nan-vpa hvt ai immi ha he
vlhpesa ka, ipihinta chj ka, ilap in chuka chufa yash pehli-
chi ikba chj cho ?

43. I shahli hvt ayvt vla kv, yakohmi hosh ahanta na
ant pisa ka, tishu yummvt na yukpa mak oke.

44. Ahli mak o hvchim achi lishke : Nana im ashka
moma apesvchi o ikba hi oke.

45. Yohmi tuk kia tishu yvmmak ash osh chukvsh anukaka, A shahli hvt ai vla he tuk vt vbanvblichishke, achi cha, hatak toksvli puta, micha ohoyo toksvli puta aieno kash bolit, impvt, nan-ishkot, okishkot haksi aieno hosh ahanta tok mvno ;

46. Tishu yvmmma i shahli hash ot ilapvt yvmmma pit hoyo nitak keyu, micha ik akostininchö ai itin takla hvshi kanvlli vlhpisa fehna ho ayvt vla cha, chanlit ita hokofit, nan ik yimmo vhleha yak o ai iba foyuka chi ka im apesa hi oke.

47. Yohmikma i shahli nan ahni tuk a akostininchö hosh, ik il atahlokmvt, nan-ahni tuk ash kia yvmmihchi keyu ke tuk tishu yvmmak ash ot fahama lawa isht boa hi oke.

48. Amba ik akostininchö hosh nana ka isht a fuma he vlhpesa ka yvmmohmi hokmvto, fahama ik lauwo ho isht fuma hi oke : kvna ho lauachit ima tok ma, mihi yo laua ho im a hoyo hi oke : micha kanima ho hatak vt lauachit ibbak fohki tuk ma, mihi yo laua i shahli ho im a hoyo hi oke.

49. Yakni paknaka ya luak o ai yo bohyuli la chi hosh aya li tok : atuk osh himonasi ak o lua hatuk bano, nana ka ai ahni lishke

50. Yohmi kia baptismo isht a baptismo la chi kvt vñ asha : yohmi ka yvmmvt ont ai yvmmohma chi takla hokvno a palvmmi fehnushke.

51. Yakni paknaka ya a nanaiyvcha chi hosh aya li tok o, hvchim ahoba cho ? Keyushke ; ita kvshkoli kak illa hoke, hvchim achi lishke.

52. Himak pilla ma chuka chufa ka tahlapit ashvt it a kashapa cha, tuchina kvt tuklo ka i sanalikma, anonti tuklo kvt tuchina ka i sanala hi oke.

53. It i kanimachi cha, iki vt ushi a i sanalikma, anonti ushi atuk vt iki a i sanalikma ; ishki vt ushetik a i sanalikma, anonti ushetik atuk vt ishki a i sanalikma, anonti ipokni vt ipok a i sanalikma, ipok atuk vt ipokni a i sanala hi oke, achi tok.

54. Mihmvt anonti okla hash, Hvshi ai-okvtulaka hoshon tit kocha na hvsh pisakmvt, ashalika, Umbvt mihintishke, hvsh achi chatuk ; atukma yohm' mvhli chatuk.

55. Micha oka-mahli hosh mahlikma, Lvshpa chishke, hvsh achi chatuk ; atuk ma ont yvmohmi chatuk oke.

56. Nan ilahobi hvchia hoka, shutik, micha yakni aienā kvt pisa kaniohmi hokvno nan isht hvsh ai akostininchī hōkak osh, amba katiohmi hō himak okuno nana ka hvch ik akostininchī cho ?

57. Ahli, micha nanta katiohmi hō hvchishno akinli kvt nana vlhpesa kvno hvch ik ithano cho ?

58. Nan-vlhpisa chi onochi ya awant miko ish im ona chi hosh ish aya kvt, takla ya, ai i hlakofi bvnna kvt ish achunanchashke : yvmmak keyukma chi halvllit nan-apesa ya isht chi ai onakma, anonti nan apesa yash ot tishu ha ibbak a a chi fohki na tishu hash ot aboha kvollo ya chi fohka hinla hoke.

59. Iskvli ont isht aiyopi fehna ka ish atobbi hō keyukmvt, yvmmak oka ish kohcha he keyu hoke, chim achi lishke, achi tok.

CHAPTA XIII.

Chisvs vt ile kostininchit il aiasha he ak o pi miha, 1. 6 Fik vpi vna he keyu nan isht-vlhpisa. 10 Nitak hullo yo Chisvs vt nan ithvnananchit ahanta hosh ohoyo iksitopo ilbusha ya hlakofichi ; 15 micha vba yakni apehlichika ya mvstvt nihi, micha pvska isht shatvmmichi aienā kak o isht it apesa ; 24 okhissa iskvtnosi yvmma chukowa bvnna kvt achunancha hi a, okla ha i miha. 31 Chisvs a Helot vt vbi bvnna hatuk o, kohchvt kvnia hinla ka, okla im ahni ma, nana hō im achi; anonti Chelusalem vt ont aiokpulokvt taha chi ka, itukonofrt mihinti ka, Chisvs vt tikbanli anoli mvt, isht yahaya.

1. YVMMMA fēhna ma kanimi kvt yvmma asha tuk vt, Pailat vt Kalili hatak issish a okla vba pit isht aiokpuchi a ai itaiomi tuk a, im anoli tok.

2. Mihma Chisvs ash ot afalaminchi mvt, Kalili hatak osh yakohmi hokvt nan-ashvchi kvt Kalili okla ha moma i shahl atuk osh na yakohmi ka isht ai ilbusha tuk o, hvchim ahoba cho ?

3. Keyushke ; amba hvchishno ak kia hvsh ile kostininchı keyukmvt, hvsh moma kvt ilbvshvt hvch illi akinla chıka, hvchim anoli lishke.

4. Yummak keyukmvt Siloam a chuka chaha hikia tuk vt auah untuchina ka o kinafvt vbi tok a, yummak osh nan ashvchi kvt hatak Chelusalem asha moma ka i shahli ha tok a, hvchim ahoba cho ?

5. Keyushke ; amba hvchishno ak kia hvsh ile kostininchı keyukmvt, hvsh moma kvt ilbvshvt hvch illi akinla chıka, hvchim anoli lishke.

6. Nan-isht-vlhpisa ilvppakma isht anumpuli tok : Hatak achvfa hosh f i k vpi vt osapushi anykaka ya im a hollokchi tuk osh ona cha, vni a a hoyo tuk osh, ik ahayucho ki tok.

7. Mihmvt im osapushi apoksiachi ash o, Inta ! ilvpput afvmmi atuchina mak o f i k vpi ilvppa vni a hoyo kvt aya li hosh ak ahayucho bekvshke : chanlit akvchı ; nanta katiohmi ho hikiut yakni a ai okpvninchı cho ? im achi tok.

8. Mihma yummak ash ot afalaminchi mvt, Chitokaka ma ! himak afvmmi achvfa takla hokvno ant hikia na, kullit apakfoplit, yakni achukmali ya isht apolichit tahli li hayashke.

9. Yohmi na vnit waya hokvno, vlhpesa : amba keyukmvo, yummak ash ot nan ithvnanchi hosh sinakak achvfona ka anta tok.

10. Mihmvt nitak hullo yo yummak ash ot nan ithvnanchi hosh sinakak achvfona ka anta tok.

11. Mihma ohoyo hvt shilombish okpulo nan iksitopochi yvt ai i foča tuk a afvmmi auah untuchina hosh, kochofvtna, kaniohmit il apissalecha he keyu kumohmi hosh anta tok :

12. Atuk o Chisus vt yummak ash pisa mvt, pit i howa cha, Ohoyo chia ma ! nan ik chi ai iksitopo ka ish ai i mokofa mak oke, im achi tok.

13. Mihmvt yummak ash o ibbak a ita tuklonchit isht umbitepa tok : mihma yummak ash ot mihmakinli ho apissvt taha mvt, Chihowa ha holitoblichı tok.

14. Mihma sinakak a apesuchi ash ot, Chisus vt nitak

hullo yo hlakofichi ka im okpulo fehna hatuk osh, okla hash, Nitak hannali kak o hatak vt a toksula he vlhpesa kvt ashvshke: yohmi ka nitak hullo ak a he tuk keyu; yohmi hoka yvymma ai itintakla kak o ai vlt hvchi hlakofashke, im achi tok.

15. Yohmi ma Chitokaka yash ot afalaminchi mvt, yummak ash, Peh nana ilahobi chia hoke: hvsh moma kvt nitak hullo a chi wak toksuli okmá, keyukmt chim issuba hakso-bish falaia okmá, nana kvt ai ilhpitta ya talakchit hikja tuk a i hotofi cha, halvllit oka ipetvt ish ia chatuk keyu?

16. Yohmi ka ohoyo ilvppvt Eblaham ushetik atuk o, Setan vt takchit ishi tok a, ilvpput afvmmi auahuntuchina hatuk a, nitak hullo ya isht talakchi tuk vt ai i holhtofa he vlhpesa keyu cho? im achi tok.

17. Mihma ilvppa yummak achi ma, i sanali vhleha hash ot momvt hofahya tok; mihma nan isht a chinto a puta ka yvmyihinchi ka okla hvt momvt na yukpa tok.

18. Mihma yummak ash ot, Chihowa apehlichika yvt nanta hak o hoyulba? yohmi ka nanta hak o isht it apesa la chi cho?

19. Mvstvt nihi achvfa ho hatak vt ishi cha, im osapushi a pit a pila tok o, offot hofantit mahayvt, iti chito tobvt hikia tok: yohmi na vba hushi puta kvt nakkish puta ka ant ai o binohonli tok mak o chiyuhmi hoke, achi tok.

20. Mihmt anonti Chihowa apehlichika ya nanta hak o isht it apesa la chi cho?

21. Pvska shatvmmichi yo ohoyo hvt ishi cha, tanchi pu-shi isht vlhpisa tuchina ho a yvmyislichi tuk o, momvt shatvmmi taiyaha tuk mak o holba hoke, achi tok.

22. Mihmt tvmaha puta, micha tvmahushi aienka hlo-pullit ayvt nan ithvnanchit, Chelusalem imma ia hosh aya tok.

23. Mihma achvfvt, Chitokaka ma! Achafoa kak illa hosh okchaya hi oh cho? im achi tok.

24. Mihma yummak ash ot, Yichina fehnvt okhissa iskitini a chukowa hvchi bunnashke; chukowa bunnvt pisa kia, nan ik kanihmo ka chi kvt laua hoke, hvchim achi lishke.

25. Chuka chvfa pehlich i yvt kaniohmi ho wakayvt, okhissa ya okhishta ha ma, kocha ya hvsh hiohmavt, okhissa ya sokohvt, Chitokaka ma ! Chitokaka ma ! ish pin tiwashke hvsh achi kia, yummak ash ot afalaminchit, Yummak o minti, ahnit hvch ithana li keyu kvt, hvchim acha hi oke.

26. Yumma fokakma hvchishno ash ot, Chi tikba ya ai impvt, nan ishkot il aiasha chatuk: yohmi ma chishno vt pin tvmaha itin takla ya nana ish ai ithvnanchi tok mak oke, hvsh acha he.

27. Yohmi kia yummak ash ot, Yummak o minti, ahnit hvch ithana li keyu hoka, nan ai vlpesa keyu puta ka a yohmi hvchia hvt, momvt hvs sa filummashke, hvchim achi lishke, acha hi oke.

28. Yohmikma hvchishno yokvno kocha hvchi kanchi na, Eblaham, micha Aisaak, mikmvn Chekob, micha hopaii puta ka a moyuma hokvto Chihowa apehlichika ya auet aiasha na hvsh pisa he, yummak mak osh yahayvt noti a vpt hvsh aiasha hi oke.

29. Mikma hvshi akochaka imma, micha hvshi ai okutula ka, mikmvn falummi, micha oka mahli aienka a mihintit Chihowa apehlichika im ai-impa ya ai a binohla hi oke.

30. Mikma yakeh ! ishtaiyopi tuk vt mihi yosh na tikba hi oke, mikma na tikba tuk vt mihi yosh ishtaiyopa hi oke.

31. Mih-nitak fehna akinli ka Falisi kaniohmi kvt ai vla cha, Ilvppa a kohchvt kanima ish iashke ; Helot vt chiba he ahna hinla hoka, achi tok.

32. Mihma yummak ash o, Oh ia cha, chula yummak ont oh im anoli ; Himak nitak, micha onna ha aienka kuno nanisht ahullo okpulo puta kocha weli, micha haknip ik in chukmo puta ka hlakofichi aienvt ahanta li tuk osh, nitak ont atuchinakma, nana ka aiahlit ont vmt ataiyaha hok mak a hi oke.

33. Yohmi kia himak nitak, micha onna ha, anonti nitak ont atuchina kuno, nowa li pullashke ; hopaii atuk vt Chelusalem keyu ka ai illa he keyu hoka.

34. Chelusalem, Chelusalem hopaii vhleha vbi, micha auet

chin tihleli tuk a tvli ishit boli chia ma! akaka yosh ushi vhleha ha sanahchi nuta ya pit ai itahobi chatuk mak o, chiyuhmit chim vlla vhleha ha itahohombi la he, aiahni li tuk nana kia, hvchishno ak osh vlhpesa hvch ik aiahno hokvno,

35. Yakeh! hvchin chuka yvt hvchin chuk-illissvt taiyaha mak oke. Yohmi hoka aiahli mak o hvchi miha lishke; Chitokaka i hohchifo mak o aya kvt holitopvshke, hvsh acha chi ka, ont ai vlhpiesa keyukma, hvch ik sa peso ka chi hoke, im achi tok oke.

C H A P T A X I V.

Chisvs vt, nitak hullo nitak o hatak nipi shofohli isht abeka ya hlakofichi, 1 : 7 hatak im anukfila kvlyo vhleha hvt im anukfila ha akanlosecha hi a, micha nan in laua vhleha hvt ilbwsha ya i kana he aieno ka im abvchi. 15 Opiaka impa chito asha tok isht vlhpisa. 25 Chisvs a nan im ai ithvna e toba chi hokmvt, yvmmak o e hilitobli hatuk mak osh pishno vt ile kaiyanchit, nana fehna hatuk kia il issa hinla hatuk puta ka, yvmmak okvt nan isht vlhpisa ilaiyuka ho isht a pim abvchi.

1. ATUK o yakohmi tok ; nitak hullo yo impa chi Falisi miko vhleha achufa ka in chuka yo pit chukowa ma, okla apesuchi tok.

2. Yohmi ma hatak achufa kvt haknip oka atoba illilli ho isht abeka kvt itikba ya asha tok.

3. Mihma Chisvs ash ot na mihvt, nan-vlhpisa ithvnanchi vhleha, Falisi okla aieno kash im anumpulit, Nitak hullo ya na hlakoficha he ai vlhpiesa hoh cho ? achi tok.

4. Mihma nan ik achot maya tok. Mihma yvmmak ash ishi cha, hlakofichi mvt, kanima ia chi ka, im ahni tok.

5. Mihmvt okla hash im anumpulit, Hvsh katima kak osh hvchim issuba haksobish falaia okmá, keyukmvt wak toksvli okmá, nana kvt yakni chiluk hofobi o pit itula ka, ashalika nitak hullo nitak a halvllit hvch ik kohcho ka hinla cho ? achi tok.

6. Yohmi ma anonti ilvppa puta ka okla ai isht im afala mincha he keyu ki tok.

7. Mihma im annoa tuk vhleha hvt aiasha holitompa kak o hoyot a binohli na pisa mvt, nan-isht vlhpisa ha takalichit,

8. Ohoyo ipetvchi ish aya hi a, kuna hosh chim anoli tuk ma, aiasha holitopa i shahli ka chik binilo kashke; hatak holitopa kvt chishno a chi shahli kia yummak ash ot im anoli tuk a hinla hoke.

9. Atuk o chim anoli tuk, anonti yummak ash im anoli tuk yummak ash ot ita tuklot vla cha, Hatak ilvppak osh ik aiashá, chim achikma, chi hofahyt aiasha ik a lauwo kak o ish a binila hinla hoke.

10. Amba chim annoakmvt ivt, aiasha ik a lauwo kak o ish a binili tuk o, na chim anoli tuk ash ot vlakmvt, A kana hvt chaha i shahli kak o pit oiyá, chim acha hinla hoke: yohmikma chibai impt maya yummak ish ai i holitopa he mak oke.

11. Kuna hosh ilefehnuchi hokvto aka ona he; anonti kuna hosh ik ile fehnacho hokvto holitopa hi oke.

12. Yohmi mvt ilapa hoyo tuk ash kia, Tvbokoli impa yokmá, keyukmvt opiaka impa yokmá, nana ho ish ikbi kvt, chi kana vhleha, micha ish itibapishi vhleha, mikmvt chi kanomi vhleha, chin chuka panta hatak nan in laua puta kia chik hoyo kashke; yummak keyukma, ilapo mvt chishno a chi hoyo hinla hoke: yohmikma nana ho, ish yvmihchi tuk a ai itilauit chim vlhtoba hi oke.

13. Amba impa chito ish ikbikmvt, ilbusha, imomokpulo, kinafa; lupa aiena kak o ish hoyashke.

14. Yohmikmak osh na chi yukpa hi oke: yummak okvto chishno ma afalaminchit ai itilauechit chi yvmihcha he keyu hoka: hatak vlhpesa illi puta kvt tanik mak o yummak atuk a falamvt pit ai itilauit chim vlhtoba hi oke, im achi tok.

15. Mihma ai ibai impt maya tuk ash o achvft ilvppa puta ka haklo mvt, Chihowa apchlichika ya puska ai vpa kak osh mihi hosh na yukpa hi oke, im achi tok.

16. Mihma yummak ash o, Hatak achvfa hosh opiaka impa chito fehna ka ikbi cha, lauvt aya chi ka, im anoli tok.

17. Atuk ash opiaka impa ont ai vlhpesa ma, im annoa

tuk vhleha hash, Himak ano nana moma kvt vlhtahvshke, ho minti, im acha chi ho, in tishu ha chvffichi tok.

18. Mihma moyumvt im anukfila achvfa ohmit taha mvt, okla nan isht ile mihachit isht ia tok. Ummona kvt, Osapa iskitini yo chumpa li tuk osh, yvmmma pisvt ia la he vlhpesa hoke; vno yokvno ik ayo mak kia ba is svn ahna hi a chim asilhha lishke, im achi tok.

19. Mihma inla mvt, Uno vt wak toksvli y o k tahlapi ho, chumpa li tuk osh, iwt kaniohmi hatuk okma pisa la chi hatuk oka, vno yokvno ik ayo mak kia ba is svn ahna hi a chim asilhha lishke, achi tok.

20. Mihma anonti inla hosh, Uno vt ohoyo itauwaya li; yohmi hatuk osh aya la he keyushke, achi tok.

21. Yvmohmi ma tishu yvmmak ash ot vla cha, i shahli ha ilvppa puta kash ant im anoli tok. Mihma chuka yvmmma pehlichi ash ot im okpulo mvt, in tishu hash, Tushpvt kohchvt iwt tumaha itin takla hina hochito, chipunta aieno ka ayvt, ilbusha, micha imomokpulo, mikmvt kinafa, micha lupa aieno ka pehlichit ilvppa isht ish lashke, im achi tok.

22. Atuk o tishu hashot, Chitokaka ma! chishno nana ish ai apesa tuk ano, ont aiahlit taha akinli kia, aiasha vt asha momvshke, achi tok.

23. Mihma i shahli ash ot tishu hash, Kohchvt iwt, haika hina bvshkvchi, mikmvt kvti holhta anukaka aieno puta ka ayvt, ilvppa vla chi ka, ish atushpalechi na an chuka vt alota mak inlashke,

24. Im annoa tuk vhleha hatuk yvmmak amo achvfa kia um opiaka impa ya iskitiosi kia ai vpa he keyu mak oke, hvchim achi lishke, im achi tok, im achi tok oke.

25. Atuk o okla lawa fehna hosh apehvvt aya ma, yvmmak ash ot filema cha;

26. Kvna hosh ayvt um vla kvt, iki, micha ishki, mikmvt tekchi, mikmvt im vlla, anonti ilap itibapishi, mikmvt in tek vhleha aieno, mikmvt im ilhfiopak akinli aieno kak kia, i nukkilli keyu hokvto, nan um ai ithvna a he keyushke.

27. Micha kuna hosh im iti-taiyukh̄na ya shoyuli cha, siakaiya keyu hokvto, nan v̄m ai ithvna a he keyushke.

28. Hvsh katima kak osh chuka chaha ikba he ahni kvt, v̄mmona ka aka binilit, Tahli la hinlakmá, nanta cho ? ahnit ai-vlhtoba he ma hotinv̄t ik peso ka hinla cho ?

29. Yvmmak atuk keyukm̄t nutaka in tola ya bohli ha yosh, anonti atahla he keyukma, yvmmak atuk ash p̄isa kvt momv̄t isht itukhlakafv̄t,

30. Hatak ilvpp̄t itv̄bvnnit isht ia tuk ak osh, atahla he keyu ke tuk, acha hinla hoke.

31. Yvmmak keyukm̄t m̄iko nanta ak osh m̄iko inla yo it in tanampa chi kvt, v̄mmona ka aka binilit, ilapvt tahlepa sipokni pokoli ishi kvt, tahlepa sipokni pokoli tuklo pehliche hosh i kohcha ka, amokvfa he vlhpesakmá, nana kvt anukfillit ik peso ka hinla cho ?

32. Yvmmak keyukm̄t, achufa yash ot hopaki pilla auet takanli moma kak inli ho itin nanaiya ka ahnit, anumpa shali a pit chvfficha hinla hoke.

33. Yohmi ka yvmmak o chiyuhmit, hvchishno vt hvsh moma kvt nana ho hvchim asha tuk vt mominchit hvsh issa keyukm̄t, nan v̄m ai ithvna hvchia ha he keyu hoke.

34. Hupi vt achukma hoke : yohmi kia hvpi hash ot homi tuk vt i kuniakm̄t, katiohmi kak osh anonti homa hinla cho ?

35. Yvmm̄t yakni, micha nan i yvlhki yakni isht achukm̄li aieno kak kia isht ai im vlhpesa he keyu ; amba hatak vt kocha pit kanchi chatuk oke. Kuna hosh isht haponakla he haksobish vt i hinlikm̄t, haklashke, im achi tok.

C H A P T A X V.

Chukfvlpoba kvnia nan isht vlhpisa, 1 ; 8 mikm̄t tvli hvta tushafa kvnia nan-isht-vlhpisa aieno. 11 Hatak himita ik hoyoyukso nan isht vlhpisa.

1. YUMMA foka ma publikan vhleha, micha nan-ashvchi okla aieno kvt i haponakla chi kvt, momv̄t auet a kanulli tok.

2. Yohmi ma Falisi vhleha hvt micha na-holissochi vhleha aiena kash ot lumasit na-mihachit, Hatak ilvpput nan-ashvchi vhleha hvt ilapa ai ibafokha chi ka ahninchit, it ibai impa yoke, achi tok.

3. Mihma yummak ash ot nan-isht-vlhpisa ilvppa isht im anumpuli mvt,

4. Hatak hvsh katima kak osh chukfvlpoba tahlepa achufut im asha tuk osh, achufut i kvnia hokmvt, pokoli chakkali a kocha chakkali kash ot yakni haiaka ya maya na issvt, kvnia tuk yummak ash o hoyot hikiki^vt ahayuchik mak a hinla keyu?

5. Atuk osh ahayuchikmvt, na yukput isht iabvnali;

6. Atuk osh in chuka yash vla mvt, i kana vhleha, micha in chuka panta hatak puta ka hoyot itahobi cha, An chukfvlpoba yvt kvnia tuk ash ahayuchi li hoka, na hvs svbai yukpashke; im achi hokc.

7. Yohmi ka yummak inli ho chohmit, Nan-ashvchi achufa hosh ile kostininchikma, vba ya na yukpa asha kvt hatak vlhpesa pokoli chakkali akocha chakkali kvt nan ile kostininch i yvt ai im ahalaiya he keyu, yummak oka i shahla hi oke, hvchim achi lishke.

8. Yummak keyukmvt ohoyo nanta hak osh tuli hvta tushahli pokoli kvt im asha tuk osh, tushafa achufut i kvni-akmvt, vla ha vvlali cha, aboha ya bshpolit achukmalit hoyot hikiki^vt ahayuchik mak ahinla keyu?

9. Atuk osh ahayuchikmvt, i kana puta, micha in chuka panta asha tuk aiena kash hoyot itahobi cha, Tuli hvta tushafa a kvnia tuk ash ot ahayuchi li hoka, na hvs svb ai yukpashke, achi hoke.

10. Yohmi ka nan-ashvchi achufut ile kostininchikma, Chihowa im enchil vhleha aiasha ka na yukpa kvt yummakinli ho chiyuhmi chatuk oke, hvchim achi lishke, achi tok.

11. Mihmvt, Hatak achrfra hosh ushi vt in tuklo tok.

12. Atuk o nakfish ash ot iki a, Aki ma! nana kvt vmmi ha he tuk ash is sv mashke, im achi tok. Mihma nan isht ai okchaya yash o im it a kashvbl tok.

13. Mihma yummak atuk ä nitak kanohmi keyu hq, ushi nakfish ash osh mominchit itahobit taiyahli cha, iwt yakni hopaki fehna hq ona cha, nan isht aya tuk puta kash yummak o isht a yopomot ahantut kampilvt taiyahli tok.

14. Yohmit mominchit kampilvt tahli ma, yakni yummma hohchvfo chinto fehna kvt a kohcha tok; mihma yummak ash ot nana kvt ik im iksho kit isht ia tok.

15. Mihmvt yakni yummma hatak ont iba fohka tok; atuk o yummak osh shukha laua ipeta beka chi ka im osapa puta ka pit chvffichi tok.

16. Atuk o yummak ash ot shukha laua yvt nanvni ai rpa beka tok yummak o vput kaiya bunna beka tok: yohmi kia kuna kia yummma ik ipeto beka tok.

17. Atuk o yummak ash ot ont il akostininchi mvt, Aki im ilhtohno vhleha hvt laua kvt katiohmi hosh pvska yvt laua kvt im vlhpesakma, anonti atampa mvt asha chatuk ak o, vno ilvppa a hohchvfot sulli cho?

18. Wakayut iwt, aki im ona lish, Aki ma! Chihowa im ashvchit, mikmvt chi tikba ya a sai yoshuba tuk.

19. Yohmi kvt himak a pilla ma, chiso sa hohchifa he si ahoba keyushke; chim ilhtohno vhleha achvfa kak o is si ai itilauechashke, im achi lashke, achi tok.

20. Mihmvt wakaya cha, iki a im ia tok; atuk osh auet hopaki pilla minti kak inli hq, iki ash osh pit pisa mvt, i nukhaklo cha, chvftv iwt, yummak ash ikunla ont vbnaiyvt i suksowa tok.

21. Mihma ushi ash ot, Aki ma! Chihowa im ashvchit, mikmvt chi tikba ya a sai yoshohumba tuk; yohmi kvt himak a pilla ma chiso sa hohchifa he si ahoba keyushke, im achi tok.

22. Yohmi kia iki ash ot im ilhtohno vhleha hash, Nafokha holitopa moma i shahli kak o ishit kohchit ant ho fohkvchi cha, ibbak ma ibbak-ushi-fohka ant fohkit, iyi ma shulush hush holochashke;

23. Micha wak ushi ilhpitvt nia ya ilvppa isht vlt, oh ubi na imput na-yukpvt kiloh aiaashá;

24. Sušo ilvppvt illi tuk osh, falamvt okchaya hoke;

kvnia tuk osh haiaka hoke. Mihma na yukput okla aiasha tok.

25. Yohmi ka ushi akni hvto osapa anta tok : atuk osh minti cha, chuka yash bilikasi vla mvt, vhlepa ola, micha hihla aienka pit haklo tok.

26. Mihmvt ilhtohno vhleha hash achvfalit pit i howa cha, Katiohmi hosh yakohmi cho ? achit i ponaklo tok.

27. Mihma yummak ash ot, Chi nakfish ak osh vla hosh achukmakvt ayvt vla ho, chiki vt pisa kak osh wakushi ilhpitvt nia ya vbi hatuk oke, im achi tok.

28. Mihma yummak ash ot hvshaya cha, ont chukowa ik bunno ki tok : yohmi hatuk o iki ash ot kohchvt iwt, ont i howa tok.

29. Mihma afalaminchi mvt, iki ash o, Inta ! afummi kanohmi ilvppa chi yuka chiyuhmit isht chim ahanta li mvt, chim anumpa ma himonna kia ak kobvffoshke ; yohmi kia a kana vhleha ai isht it ibai yukpa la chi ka, isi kosomushi kia chik samo chatuk,

30. Amba chiso ilvppvt hau putai iba fohvvt ayvt, nan isht ish ai okchaya he tuk ash isht yopomot tahli cha vla ma, mih makinli ho wak ushi ilhpitvt nia ya ish im vbishke, im achi tok.

31. Mihma yummak ash ot, Suso ma ! nitak moma ka si awant ish ahantvshke, yohmi kvt nan okluha um asha kvt chimmi hoke.

32. Chi nakfish ilvppak okvt illi tuk osh, anonti falamvt okchaya ; micha kvnia tuk osh haiaka hoka, impa ikbit na yukpt il aiasha he vlhpesa hatuk oke, im achi tok oke ; achi tok.

CHAPTA XVI.

Nan-apesvchi ik aiahlo nan-isht-vlhpisa, 1; 14 Chisvs vt Falisi vhleha hvt ilap a okla ishit yopula ma, nana ka peh ilahobi vhleha hatuk a nan isht i miha. 19 Hatak nan in laua, micha Lasalvs ita tuklo nan-isht-vlhpisa.

1. MIHMUT yummak ash ot nan im ai ithvna vhleha ha, Hatak nan in laua achvfa hosh nan-apesvchi vt im anta tok: atuk o yummak ash ot nana immi puta kash isht i yopomot tahli ho, im annoa cha haklo tok.

2. Mihmvt yummak ash o i howa cha, Katiohmi ho ilvppa isht a chi haklo li cho? nan ish apesvchi yatuk vt achukmalit ish ai il anolashke: himak a pilla ma nan apesvchi chia ha chi keyu hoke, im achi tok.

3. Yohmi ma nan apesvchi yash osh, Nanta hak o katiohmi la chi cho? a shahli hvt nan ai apesvchi li ash si a kohchichikma, okchahli la he keyukmvt, nan asilhha ma sa hofahyvshke.

4. Nan ai apesvchi li ash sa kohchichikma, in chuka yokvno chukowa la hi a okla vmt ahna chi ka, nana ho kaniohmi la chi kvto ithaiyana lishke, achi tok.

5. Mihmvt i shahli ha aheka im asha tuk vhleha hash mominchit hoyo mvt, Ummona ka a shahli ho aheka katohmi ho ish in takanli cho? im achi tok.

6. Mihmvt yummak ash ot, Na-bila vlhpisa tahlepa achvfa, achi tok. Mihma, Chim aheka holisso ha ishi cha, tushput aka binilit, pokoli tahlapi ho takalichi, im achi tok.

7. Mihma anonti inla ho, Mikma chishno vto katohmi hosh aheka yvt chim asha cho? im achi tok. Mihma, Onush vlhpisa tahlepa achvfa, achi tok. Mihma yummak ash o, Chim aheka holisso ha ishi cha, pokoli untuchina ho takalichi, im achi tok.

8. Yohmi ma nan-apesvchi nan ik ai vlhpeso ash ot kostini fehnvt yvmohmi hatuk o, i shahli hvt im ai okpahanchi tok: yakni ilvppa im vlla vhleha hvt ilap bika nan it im a kaniohmit hopoyuksa kvt, a nitaki im vlla vhleha ha i shahli hoke.

9. Yohmi ka, Nan-ai-vlhpesa keyu m a m m o n a hvchi kana vhleha ha hi a isht hvsh ikbashke, hvchim achi lishke: yohmi tukma ont hvch ai illikma, ai vta bilia ya ik chukowá, hvchim aiahna hi oke.

10. Kéna hosh nana kvt moma ik a lauwo ho aiahli achukma yatuk mvt, nana kvt ik aiaka kia aiahli achukma

akinli chatuk ; yohmikma kvna hosh nana kvt moma ik a lauwo ho aiahli achukma atuk keyukmv̄t, nana kvt ik aiaka kia, aiahli achukma chatuk keyu akinli hoke.

11. Yohmi ka nan-ai-vlhpesa keyu mammon a isht a hvch ik aiahlo ke tuk ma, kvta hak osh na holitopa ahli yahush apesvcha hi a hvchi tohma hinla cho ?

12. Micha inla yo nana kvt immi hatuk a isht hvch ik aiahlo ke tuk m̄no, kvta hosh nana kvt chimmi fehna yachima hi o ?

13. Tishu yuka nana kia i shahli tuklochit im antia he keyushke ; achufalit i nukkilli cha, achufa kamo holitoba hinla ; keyukmv̄t achufalit halanli cha, anonti achufa kamo a haksicha hinla hoke. Chihowa, micha mammon it aieninchit hvsh im antia he keyushke, im achi tok.

14. Mihma Falisi vt vli holisso anuksitia fehna vhleha hatuk osh, ilvppa puta ka haiyaklo mv̄t, isht ik imi ahno ki tok.

15. Mihma yummak ash o, Hvchishno ak osh hatak itikba ya ai il achukmvli hvchia mak oke : yohmi kia Chihowa hvt hvchi chukvsh puta ka ithaiyanvshke ; nana kvt hatak a im a holitopa fehnakma, Chihowa hvt ai i nukkilli mak oke.

16. Nan-vlhpisa, micha hopaii vhleha i holisso aiena kvt aiashvt mihinti tuk o Chan vt vla tok : yummak a tok takla kvno Chihowa apehlichika yak osh anuhumpa na hatak puta kvt yichinv̄t pit vlbihhvshke.

17. Micha vba shutik, mikmv̄t yakni aiena hokvto ont ik ahobot ik ai iksho ka hinla kvt, nan-vlhpisa iskitinosi kvt moma ik lauwo hosh ont ik ai iksho ka hi a ik lauwo ka hi oke.

18. Kvna hosh tekchi a kanchi cha, inla itauwayakmv̄t, haui toba hoke ; mikma kvna hosh i hatak vt kanchi tok o itauwaya hokmv̄t, haui toba hoke, im achi tok.

19. Hatak nan in laua achufa hosh na-fohka hummakbi ho anonti linen lapushki aiena ho foyuka mv̄t, nitak moma nan-vpa in chitot nan isht ilaiyukpa hosh anta tok.

20. Yumohmi ma hatak ilbusha yosh Lasalys hohchifo

hosh liahpo bieka ho, yummma i holihta okhissa ya ont bohyuli na ituyula tok.

21. Yohmi kvt hatak nan in laua im ai-impa yo boshulli vt a chilofa kak o habenvt vpa ka aiahni ha tok; yohmi ma ofi puta nana kia ai vlv liahpo a i holahakshi tok.

22. Atuk ash o yakohmi tok: hatak ilvsha yash ot illi ma, enchil vhleha hosh ant isht ivt, Eblaham shakba pohloma ka ont fohki tok. Mihma hatak nan in laua yash kia illi cha, hollopi tok.

23. Atuk osh yummak ash osh aiokpuloka ya ont ai issikkopa cha, vba chakali mvt, Eblaham vt hopaki pilla ka auet asha ma, Lasalvs vt shakba pohloma ka foka na pisa tok.

24. Mihmvt tahpahanlv, Aki Eblaham ma! auet a nuk-haklot Lasalvs a auet chvffichi na ibbak-ushi wishakchi a oka kapussa ik oka hilechi cha, sasunlvsh a ant ik kapvs-sulli: a libbi ilvppa vm a palummi kvt atampa fehnushke, achi tok.

25. Yohmi kia Eblaham ash ot, Suso ma! chi okchaya taklv ish ahanta kvt, na hochukma puta ka ish pihisa tok: yohmi ma Lasalvs ak kia nana kvt a palummi puta ka pihisa tuk a, ish ithaiyanashke: yohmi tuk kia yummak ash ot himak okvno hopohlv na yukpa ma, anonti chishno vto chim a palummi fehnushke.

26. Micha ilvppak osh ai vhli keyu; a hvp itin takla ya kolukbi chito fehna hosh bachaya hoke; yohmi hatuk o ilvppa ai asht ia kvt tanvblit yummma a chim ona he tuk mak osh, na kanikhma he keyu; yohmikma anonti yummma asht minti kvt hlopulli cha pim vla he keyu akinli hoke, achi tok.

27. Yohmi ma yummak ash ot, Yohmi hoka aki ma! yummak oka aki in chuka ya pit ish chvfficha he mak o chim asilhha lishke.

28. Yohmi ka itibapishi li hvt tahlapit asha hoka, atokowa ka ont ai im anoli na ai issikkopa ilvppa yummakmvt ai vla yoba ná, achi tok.

29. Eblaham ash ot, Moses micha hopaii puta im anumpa

hvt in tonla hokut, yummak o okla i haponaklashke, im achi tok.

30. Yohmi ma yummak ash ot, Aha! aki Eblaham ma! illi atuk ak osh achufut ayt im ona hokmvno, okla ile kostininchä hoke, achi tok.

31. Mihma yummak ash ot, Moses, micha hopaii puta im anumpa ha haklo keyukmvt, illi tuk osh achufut tani mak o, yimma hi vt anukfoyuka he keyu hoke, im achi tok.

CHAPTA XVII.

Chisvs vt nan im ai ithvna vhleha hvt ahah! ahni cha, inla ya ik yoshublecho ka he, 1, 3 micha ilap bika yvt nana ka it i kashofa he aiena ka i miha: 6 na yimmi aiahlika yokvt na fehna ka anoli: micha Chihowa ha holitobli kvnana ho ik yvmohmi kia im anukfilä mvt akanlosi bieka hi a, i miha; 11 leplosi vbi a hatak pokoli ho hlakofichi; 20 Chihowa apehlichika yvt hatak chukvsh anukaka ak o fohka: micha kvna hosh yummak oka nan isht ik ahno tuk okvto momvt ont ai okpulokvt taha pulla hi a, anoli.

1. YOHMI mrt nan im ai ithvna vhleha hash o ik kaniohmi hoh kia nana isht ai ibetvblı okvt iksho ka chi keyu pulla hoke; yohmi kia kvna ho yummvt isht a tobakma, mihi yosh nan i palummi mak oke.

2. Chipunta ilvppa achufona ka ibetvblichi hokmvt, ilap ak o ikunla ya tvli chito na botoli ak osh a takanli ho, okhuta ha pit okvchi kak o, vlhpesa kvt im i shahli hoke.

3. Ahah! hvsh il aiahnashke. Ish itibapishi hvt chi yoshuba hokma, im alvmmmit nana ish i mihashke: yohmi na yummak ash ot nukhaklot ile kostininchä hokma, kashofit ish i kanchashke.

4. Micha nitak achufa ka untuklo ha chi yoshuba cha, anonti nitak achufa ka untuklo ha yo filemt, Sa nukhakloshke, achi hokma, ish i kashofa he mak oke.

5. Mihma vbanumpeshi vhleha hash ot Chitokaka yash, Na pi yimmi ka i shahlichit ish pi nukfohakashke, im achi tok.

6. Mihma Chitokaka yash osh, Na hvchi yimmi kvt mvstvt nihi achufa ka chohmi hosh hvchi anukfoka hok-

mvt, bihi vpi ilvppa hakshish fehna ai isht alobafvt okhvta hak o ont ish a holokchashke, hvsh im achikma, hvchim antia hinla hoke.

7. Yohmi ka hvsh katima kak osh yuka hvt im anta tuk vt yakni patvffi hokmá, keyukmvt wak ipeta hokmá, nana hosh anta tuk osh osapa mintit vla makinli ho, lvt ont binili cha, impá, im acha hinla?

8. Amba yummak o keyukmvt; Nana ho opiaka impa la ch̄i ka atahli cha, il ai-uskofvchit chin taha cha, nan isht is sv̄m anta na imvt nan ishko aienvt issa li ha yo, himmak o imvt nan ish ishkashke, im acha hinla keyu?

9. Micha yuka yummak ash ot nan ai im vlhpisa atuk ash ot yvmihchi ma, yak oke! im ahni ho? keyu ka, v̄m ahobvshke.

10. Yohmi hoka yumma chiyuhmit hvchishno mvt, nana kvt a hvchim vlhpisa tuk vt mominchit ont hvsh ataiyahlikmvt, Nana ho isht ai yukpa hi o keyu tishu pia: nana ka isht il ai v̄tta hi a pim vlhpesa tuk mak osh e yvmihchishke, hvsh achi makinlashke, achi tok.

11. Atuk o yakohmi tok: yummak ash ot Chelusalem ia hosh aya mvt, Samalia micha Kalili aijena ka iklvnna hlopullit ia tok.

12. Micha tumahushi achufa ho ont chukowak fehna, hatak pokoli kvt leplosi vbi yosh ant afama cha, mishemanchit auet hiel tok.

13. Mihmvt chitoli hosh okla anumpulit, Chis̄s pi shahli ma! ish pi nukhaklashke, achi tok.

14. Mihma yummak ash ot pit pisa mvt, Oh ia cha, naholitompa isht asha vleha hak o ont hvsh im ile haiakovchashke, im achi tok. Atuk o yakohmi tok: ilhkoli hosh asht aya mvt, okla hlakofi tok.

15. Mihma yummak ash ot achufut hlakofi kvt ile pisa mvt, falama cha, chitoli hosh anumpulit, Chihowa ha holitoblich tok.

16. Mihmvt yummak ash iyi ituma yak o hlipia cha, yak oke! ahnit aiokpvchi tok: yohmi kvt yummvt Samalatan hatak a tok.

17. Yohmi ma Chisus ash ot anumpuli mvt, Pokoli hosh hlakofi tuk keyu ? amba chakkali mvt?

18. Falamvt Chihowa ha holitoblichit aya kut iiksho ho, amba oklushi inla hatak ilvppak illvshke, achi tok.

19. Mihmvt yvmmak ash o, Ish wakaya cha, ish iashke ; a chi yimmika yak osh chi hlakofichi hoke, im achi tok.

20. Yvmohmi ma Falisi vhleha hvt Chihowa apehlichika yvt, Katiohmi kak o aya hi o ? ahnit i ponaklo ma, afalaminchi mvt, Chihowa apehlichika yvt ai im akostininch ho aya he keyu.

21. Micha Yakeh ! ilvppak oke : keyukmvt, Yakeh ! yvmmak oke ; achi kak okmá, kanimampa he keyu hoke. Chihowa apehlichika yvt hvchi chukvsh anukaka foyuka hoka, achi tok.

22. Yohmi mvt nan im ai ithvna vhleha hash o, Hatak Ushi i nitak o achufalichit pisa ka hvchi bvnna fehna kia, hvch ik peso ka hi a nitak vt ai ona pulla hi oke.

23. Yohmi ka Yakeh ! ilvppak oke ; keyukmvt, Yakeh ! yvmmak oke ; hvchim achikmá, nana hi oke. Yohmikma vt hvch ik im onokmvt, hvch ik iakaiyo kashke.

24. Malvtha kvt shutik nutaka kanima ho a malvthakachit kohchakmvt, shutik nutaka bakapa tvnnvp ma pit on tommi chatuk a, Hatak Ushi i nitak vt ont ai vlhpiesakma, yvmmak inlj ho chiyuhma hi oke.

25. Yohmi kia ik a yvmohmo kisha ka, isht ai issikkopa mvt in laua he ; mikma hatak himonasi asha ilvpput ik i yimmot ik ahningcho ka hi mak oke.

26. Mikma Hatak Ushi i nitak mvt, Noah vt ahanta nitak a a kaniohmi tok mak o, a chiyuhmi makinla hi oke.

27. Okla impvt, okla nan ishkot, ohoyo okla itauwayvt, okla itauwaya hi vt im vlhpowvchit aiasha tuk o, Noah vt peni chito a pit chukowa nitak fehna ma, oka falama vt aya cha, mominchit vbit taiyahli tok.

28. Lat ahanta nitak a a kaniohmi tok mvt, okla impvt, okla nan ishkot, okla na chumpvt, okla na kanchit, okla na hokchit, chuka okla ikbi aienvt aiasha tok.

29. Yohmi tuk kia Lat vt Sotom a a kohchvt ia nitak

fehna ma, luak, micha hituk lakna aienā kvt vba ya auet ai umba cha, mominchit vbit taiyahli tok.

30. Yakohmi tok a chiyuhmit Hatak Ushi vt ont haiaka nitak fehnakma, yvmohma he akinli hoke.

31. Nitak yvymma fehnakma kuna hosh aboha paknaka anta na im vlpoyak vt aboha anuka ashā tuk ma, akowvt apoyuvt isht ik aiyo kashke; yohmikma anonti kuna hosh osapa anta tukmvt, falamvt ik aiyo akinlashke.

32. Lat tekchi a tok a hvsh ithaiyanashke.

33. Kuna hosh ilap im ilhfiopak okehalinghi bvnna hokvto, kaiyancha he; mikma kuna hosh im ilhfiopak a ik i hullo hokmvt, okehalingha hi oke.

34. Ninak yvymma fehnakma topa achufa ka hatak tuklot kaha tuk ma, achufa ka ai eshi na achufa hosh itonla he.

35. Ohoyo tuklo hosh nan it iba botoli hosh ashwa tuk ma, achufa kash o ai eshi na achufa hosh anta he.

36. Hatak tuklo hosh osapa ya ashwa tuk ma, achufa kash o ai eshi na achufa hosh anta hi oka, hvch im anoli lishke, im achi tok.

37. Mihma okla afalaminchi mvt, Chitokaka ma ! katima yak o ? im achi tok. Mihma yummak ash ot, Kanima yo illi haknip vt ituyulakma mihi yo ossi puta mvt ont ai itahoba hi mak oke, im achi tok.

C H A P T A X V I I I .

Nan apesa ai ahlichi keyu, micha ohoyo i hatak illi nan asilhha achunanchi aienā nan isht vlpisa, 1 ; 9 Falisi, micha pblikan ita tuklo nan isht vlpisa. 15 Chisvs vt vlla chipunta ya holitoblit ishit sholi. 18 Chisvs vt hatak pehlichi himita nan in laua yo Klaist okmā, nan laua im ashā kak okmā, nanta kak osh holitopa kvt im i shahli chishba ? ahnit imomaka pisa. 31 Chisvs vt ilapvt ititayukhvna ahonvhlt illa he, atukmvt nitak ont isht atuchinakma falamvt tana he, anonti tikbanli anoli.

1. MIHMUT yummak ash o, Hatak vt vba pit anum-pohonli kvt bilia cha, ik in takobo ka he tuk a, nan isht vlpisa ho isht anumpulit achi mvt,

2. Tumaha ho nan apesa vt ahanta kvt, Chihowa ya i nukshompa keyukmvt, anonti hatak ma nan isht ik im aho-bo ya tok.

3. Yohmi ma tumaha yumma ohoyo i hatak illi yosh anta tok; atuk osh yummak ash o im ai vla cha, Nan vlpisa si onochi tuk a nan ahli achukma ka isht is sv̄m ai apesashke, achi tok.

4. Yohmi ma yakosi takla kvno yvmihcha he ik ahno ke tuk osh, amba himmak o nan il anukfilli kvt, Chihowa ya i nukshompa li keyu mvt, anonti hatak ma nān isht v̄m ahomba keyu hatuk nana kia,

5. Ohoyo i hatak illi ilvpput si ataklaiyami hoka, nan ahli achukma ka isht ai im apesa lashke; yummak keyukma, mihinti bekakmvt, an takobicha hinlvshke, achi tok.

6. Mihma Chitokaka yash ot, Nan apesa ai vlpesa keyu vt nana achi tuk a, ho haiyaklo.

7. Yohmi ka Chihowa hvt ilap osh ai atokoli tok mak o nitak, micha ninak aienā ka pit in tahpanhanla ka, im ile sv̄laha tuk mak osh, nan ai ahli achukma ka ik im apeso ka hinla cho?

8. Chekosi makinli ho nan ai ahli achukma ka isht ai im apesa hi oka, hvchim achi lishke. Yohmi kia amba Hatak Ushi vt ayakmuto, yakni paknaka ya na yimmi kvt asha na pisa hi oh cho? achi tok.

9. Mihmvt kanimi kvt ile yimmit, ilap ak osh ai vlpesa mak o im ahobvt, inla asha kvno ik ahobalo vhleha hatuk ash nan-isht-vlpisa ilvppa isht im anumpuli mvt,

10. Hatak tuklo kvt vba pit anumpula ch̄i hosh tempel a pit chukowvt okla tok: achufa kak osh Falisi okma, achufa kuto pblikan a tok.

11. Falisi ash osh hikia cha, vba pit isht il anumpuli mvt, Chihowa ma! hatak inla asha na-wehli; nan ik ai vlpieso; haui puta; mikmvt pblikan ilvppak kia ak chohmo kvt, yak oke! pit chim aiahni lishke.

12. Nitak hullo achufakma hitukla na hullochi likmvt, nan v̄m asha puta kvt ont isht pokoli kvt a kunihiyvshke, achi tok.

13. Yohmi ma publikan ash ot auet mishema yak inli ho hikivt, i holponayo ak kia vba chakalinchi keyu hosh, peh ikkishi ak o isso mvt, Nan ashvchi sia hoka, Chihowa hvt is sa nukha~~k~~lashke, im achi tok.

14. Yohmi kvt hatak ilvppvt nan im aiahli achukma kvt achvfa yash i shahli hosh in chuka ona tok a hvchim anoli lishke: kuna hosh ile fehnvchikmvt, aka ona he; mikma kuna hosh ile akanlosichi hokmvt, holitopa hi oka, achi tok.

15. Yohmi ma vlosi puta kia, yvmmak ash ot potola hinla ka okla ishit im ai vla tok: yohmi kia nan im ai ithvna vhleha hash ot pisa mvt, okla im alvmmi tok.

16. Yohmi kia Chisvs vto yvmmak ash o pit hoyo cha, Ulla chipunta vt vm ai vla hi a hvsh ahni cha, hvch ik im alammo kashke; ilvppak o chohmi hosh Chihowa apehlichika ya aiasha hoke.

17. Ahli mak o hvchim achi lishke; Kuna hosh vlla iskitini ak o chohmit Chihowa apehlichika ya aiokpuehi ho keyukmvt, kaniohmi kak osh yvmma chukowa he keyu hoke, achi tok.

18. Mihma hatak pehlichi achvft i ponaklot, Nan-ithvnanchi achukma ma! nantak o katiohmi li kak osh ai ok-chayvt bilia yato vmmi ha hinla cho? achi tok.

19. Mihma Chisvs vt yvmmak ash o, Na katihmi ho uno a achukma is si achi cho? achukma kvt iksho ho, amba achvfa kak illa, yvmmvt Chihowa ak oke.

20. Nan vlpisa, Haui ish toba na: Kuna kia ish bi na: Na chik hukopo kashke; Anumpa ik ahlo isht atokolit chik anto kashke; Chiki, micha chishke aienka ish holitoblashke; achi puta ka ish ithavshke, im achi tok.

21. Mihma yvmmak ash ot, vlla sa tomba kash inli hosh ilvppa puta ka holitoblit isht mihinti li tok a ant a himak vshke, achi tok.

22. Mihma Chisvs vt ilvppa puta ka haklo mvt, Yohmi kia nana achvfa ho isht chik ai onoshke; nana chim asha kvt mominchit ish kampila cha, ilvusha ya ishit it a kvshkoachí, yohmik mak osh vba ya chim ilayak vt asha hi oke; micha ant is siakayashke, im achi tok.

23. Mihma yummak ash ot ilvppa haklo mvt, nan in laua fehna hatuk osh, nukh^äklo fehna tok.

24. Yohmi ma nukh^äklo fehna ho Chisvs vt pisa mvt, Nana in laua vhleha hokvto palvmmi fehna nana ho Chihowa apehlichika ya chukowa he ;

25. Kamel vt chofak ushi nishkin a hlpulli ka palvmmi kvt hatak nan in laua yosh Chihowa apehlichika chukowa hokvno ik lauwoshke, im achi tok.

26. Mihma yummak okla haklo mvt, Yohmikma kvt hak osh okchaya hinla cho ? achi tok.

27. Mihma yummak ash ot, Hatak okmvno nana kvt ai yvmohma he keyu kia, Chihowa yak okmvno ai yvmohmi hoke, achi tok.

28. Yohmi ma Pita yash ot, Yakeh ! Pishno vto mominchit il issa cha, e chiakaiya kvno, achi tok.

29. Mihma yummak ash ot okla hash, Ahli mak o hvchim achi lishke ; Hatak vt Chihowa apehlichika pulla hatuk mak o in chuka, iki, ishki, itibapishi vhleha, tekchi, im vlla puta aienka a kanima kia issvt aya hokvto,

30. Yakni ilvppak inli ka nana laua kvt yummak atuk a im i shahli tuk mvt, yakni inla mihintikma, ai okchayvt bilia ya ik peso ka hi vt iksho hoke, im achi tok.

31. Yohmi mvt auah-tuklo kash hoyo cha, Inta ! Chelusalem ak o iloh ivshke ; yohmi ka hopaii vhleha hvt Hatak Ushi ak o holisso ha ishi ai ikbichi tok a puyuta kvt ont ai ahla chi hoke.

32. Yummak oka ishit Chentail okla ibbak fohki na ishit yopukvt, itukhlakafvt hofahyalichit, on tuftua chi :

33. Micha okla fvmmi cha, vba chi hoke ; atukma nitak ont a tuchinakma falamvt tana hi oke, im achi tok.

34. Yohmi ma ilvppa puta ka achi kia okla ik akostinincho ki tok : mihma anumpa ilvppvt im a luma na nana kvt anumpa tuk ash kia okla ik ithaiyano ki tok.

35. Atuk o yakohmi tok ; yummak ash ot Cheliko bili-kasi ka vla ma, hatak lupa achufa kvt hina lapalika yo binilit nan asilhha tok.

36. Atuk osh okla laua vt ont ihiya ka haklo mut, Katiohmi hosh yakohmi cho ? achit a ponaklo tok.

37. Mihma, Chisvs Nasalet ai vtta ak osh aya hatuk a, okla im anoli tok.

38. Mihma yummak ash ot tahpulvt, Chisvs, Lewi Ushi chia hvt is sə nukha~~k~~lashke, achi tok.

39. Mihma tikba asht aya tuk ash ot, nukchinta chi ka, i miha tok: yohmi kia yummak o isht i shahliche fehnvt tahpulvt, Lewi Ushi chia hvt is sə nukha~~k~~lashke, achi tok.

40. Mihma Chisvs vt hikia mut, yummak ash o isht im vla hinla ka miha tok: atuk osh yummak ash ot i bilikasi vla ma, i ponaklot,

41. Nanta hak o a chi katimichi la hi a, ish ahni cho ? achi tok. Mihma yummak ash ot Chitokaka ma ! hoponayo la hi á, achi tok.

42. Mihma Chisvs ash ot, Ish hoponayashke, a chi yimmi yak osh chi okchalinchishke, im achi tok.

43. Yohmi ma yummak ash ot ashalika hoponayo cha, yummak ash o iakaiya mut, Chihowa ya holitoblich tok : mihma okla hvt pisa mut, Chihowa ya pit aiokpahanchi tok.

CHAPTA XIX.

Sakevs vt vbanumpa anukfohka tok a isht anumpa, 1. 11 Hatak holitompa hosh miko tobvt ia hosh, in tishu vleha ha tvli holisso ibbak fohki. 25 Chisvs vt issuba haksobish falaia himita yo o minilit aya hosh Chelusalem a ont chukowa; 45 Chisvs vt tempel a ont chukowa cha, nan itatoba vleha maya tuk a kocha pit tihleli.

1. MIHMA Chisvs vt Cheliko ont chukowvt a hlopullit ia tok.

2. Mihma hatak vt publikan vleha pehlichi yosh Sakevs hohchifo kvt, nan in laua hosh anta tok.

3. Atuk osh yummak ash ot, Kvta hoh chishba ? ahni mut, Chisvs a pisa bunna tok: atuk ak osh okla a fohopa fehna hatuk o, ik chaho hatuk osh na kanihma he keyu ki tok.

4. Mihmvt yvm-imma ont ia chi hatuk o, pisa chi hosh tikba pit malelit, bihi iti o ont oiya tok:

5. Atuk o Chisvs ash ot yvmmak ash o vla mvt, pit vba chakalit yvmmak ash o pisa cha, Sakevs ma! tushpvt akowá; himak nitak a chin chuka ya anta la chi hatuk oke, im achi tok.

6. Mihma yvmmak ash ot tushpvt akowa cha, na yukpa fehna hosh yvmmak ash o ilaelit ilap in chuka isht chukawa tok.

7. Mihma okla hvt pisa mvt, momvt lumasit na mihachit, Hatak nan ashuchi yo kak o ont ibai vtta chi hosh ia tuk, achi tok.

8. Mihma Sakevs ash osh hikia cha, Chitokaka yash, Inta! Chitokaka ma! vm ilayak a iklynnachit ilvusha ya im issa lishke; yohmi kvt hatak nana kia nanasi ka anumpa isht a holabi hosh im ishi li tuk okmvt, yummak atuk a ohmi ushta ho i falamichi lashke, im achi tok.

9. Mihma Chisvs ash ot Ilvppak kia Eblaham ushi akinli hatuk oka, himak nitak a ai-okchaya yvt chuka ilvppa vlvshke.

10. Hatak Ushi vt okpulot taha tok mak o hoyot okchalincha chi hosh aya tok oka, achi tok.

11. Mihma ilvppa puta ka okla haklo ma, achakalinchi mvt, Chelusalem a ona he, micha Chihowa apehlichika yvt chekosi otvna hinla ka, okla im ahoba aieno hatuk oka, nan-isht-vlpisa ho isht anumpuli tok.

12. Yohmi hatuk osh, Hatak holitompa achvfa hosh miko ont vlhtoka cha, falamvt aya hi osh yakni hopaki ka ia tok.

13. Mihmvt in tishu pokoli ka hoyo cha, tvli holisso weki pokoli ka ibbak fohki mvt, Nan isht hvsh itatomba tuk o, vla lashke, achi tok.

14. Atuk ak o i yakni achvfa okla hash ot i nukkilli cha, Hatak yvmmak okvno ik pi pehlichí, il ahna he keyu, achit anumpa shali a iakaiyachit pit chvffichi tok.

15. Atuk o yakohmi tok; yvmmak ash ot miko ont vlhtokvt im vlhtaha cha, falamvt vla; yohmi mvt nana isht itatoba kvt hatak achvfa aiyuka kvt kaniohmi ho ahayuchi

tukma, akostininchá hinla kvt, tishu vhleha ilvppa tvli holisso ima tok ash, yummvt im annoa cha, im ai vla chi ka, apesa tok.

16. Mihma tikba vla kvt, Chitokaka ma! chin tvli holisso weki achvfa tuk ash osh weki pokoli ho isht il ahayuchi li tuk oke, achi tok.

17. Mihma yummak ash o, Ulhpesa, tishu chi achuk-mushke; nana kvt ik lauwo fehna kia aiahli chi achukma tuk okvt, tumaha pokoli ho ai i shalhit ish pehliche chi kvt a chim vlhpiesashke, im achi tok.

18. Mihma atukla kvt vla mut, Chitokaka ma! chin tvli holisso weki achvfa tuk ash ot weki tahlapi ho isht il ahayuchi li tuk oke, achi tok.

19. Mihma yummak ash kia, Chishno mut, tumaha tahlapi ho ish pehliche chi kvt a chim vlhpiesashke, im achi tok.

20. Yohmi ma inla yosh vla mut, Yakeh! Chitokaka ma! chin tvli holisso weki achvfa kash nantapuski yo a bonullit bohli li tuk o, yak itonlushke.

21. Nana ka chishno ak osh ish bohli tuk keyu kia, ish ishi; yohmikmt ish hokchi tuk keyu kia ish mo chatuk; hatak palvmmi chia hatuk oka chi sa nukshopa tuk oke, im achi tok.

22. Mihma yummak ash o, Tishu haksi chia ka chishno chitih a kohcha kak inli ho nan isht chim apesa la chi hoke. Hatak palvmmi sia nana ka vno yak osh bohli li tuk keyu kia ishi li; mikmt hokchi li tuk keyu kia vmo li chatuk a, ish ithana;

23. Yohmi ho kak osh na katihmi ho an tvli holisso weki achvfa kash tvli holisso a bohli a chik bohlo ke tuk o, vla li kut ummi hash a chelichi hosh ak hoyo cho? im achi tok.

24. Mihmvt bilika hiohmaya kash o, Yummva tvli holisso weki achvfa kash oh im ishi cha, tvli holisso weki pokoli ha ishi kak o oh imá, im achi tok.

25. Mihma, Chitokaka ma! yummak okvto tvli holisso weki pokoli ka ishishke, okla im achi tok.

26. Kvna hosh jshi hok mak o ima he; amba ik im iksho

hatuk okvno ishi tuk ash kia, im ai isha hi oka, hvch im achi lishke.

27. Amba a nukkilli vhleha hvt i miko la he tuk a, vlh-pesa ik ahno ke tuk yummak okvno ilvppa isht vla cha, satikba ya oh ai vbi, achi tok oke, achi tok.

28. Micha ilvppa yakohmichit anumpuli mvt, tikba hikvt Chelusalem a pit oyvt ia tok.

29. Atuk o yakohmi tok; Betfachi, micha Betani aienaka auet bilikka nunih chaha Alif hohchifo ho vla mvt, nan im ai ithvna ya tuklochit pit tihleli mvt,

30. Ivt tvmahushi hvchi chapaka talaia ka hvsh onashke : yummma ont hvsh chukowak fehna kvt issuba himita hatak vt ik o minilo kisha yosh talakehit hikia na hvsh pisa chi hoke ; yummma hvsh i hotofi cha, isht hvsh lashke.

31. Mikma hatak nana hosh hvchim ponaklot, Nanta katiohmi ho hvsh i hotofi cho ? achikma, Chitokaka yak osh bunna hatuk oke ; hvsh im ahashke, im achi tok.

32. Mihma vltoka tuk ash ot itiachi mvt, yummma nana ai i miha tuk ash yohmi fehna mvhli ho ont pisvt okla tok.

33. Micha issuba himita yash i hotofi hosh ahashwa ma, yummvt immi atuk ash ot, Nanta katiohmi ho issuba himita ya hvsh i hotofi cho ? im achi tok.

34. Mihma, Chitokaka yak osh bunna hatuk oke, achi tok.

35. Mihmvt yummak ash o Chisvs a isht im ona ; yohmi ma issuba himita yash anchi puta ka om pfulli cha, Chisvs a okla o minilichi tok.

36. Micha ia hosh aya ma, hina ya im anchi puta ka okla pfulli tok.

37. Atuk osh yummak ash ot ona he Alif nunih ha pit okvtanowvt mahaya ma, nan im ai ithvna vhleha okla chito ash ot moyumvt na fehna puta kvt yvmohmi na okla pihsa tuk vt, na yukpvt chitolit tahpvlvt, Chihowa ya pit aiokpahanchi tok.

38. Chitokaka i hohchifo ho aya kvt miko yummvt holitopushke ; vba ya nanaiya achukmakma, achaha moma i shahli ma Chihowa vt ik a holitopá, achi tok.

39. Mihma Falisi vt okla laua takla asht aya tuk vt kani

mi kvt, Nan ithvnanchi ma! na chim ai ithvna vhleha h̄a im alvnimi, im achi tok.

40. Mihmā yummak ash ot afalaminchi mvt, Yakohmi kvt ont yokopa hokma, tvli puta kvt chekosi fehna tahpvlt anumpula hinla hoka, hvch im anoli lishke, im achi tok.

41. Atuk osh bilika ona cha, tvmaha hash pit pisa cha, isht yaiya mvt,

42. Chishno akinli fehna kvt a ch̄i nitak ilvppa fehna kak kia nana isht chi ai yukpa he ai vlpesa ka ish ithaiyana tok okbato ; amba himak okvno ch̄i holhponayo h̄a ai in lumvt kvnia hoke.

43. Chin tvnvp vhleha h̄vt yakni kullit on talaka holhta kvllo ai ikbichit isht chi a folvblit a chim oktvbli bieka na anukaka ya ish foyuka hi a nitak vt chim aya hi oke.

44. Yohmikma a ch̄i nowvt aya he nitak a chik ithaiyano ke tuk oka, chishno, mikmvt chim vlla chi anukaka asha aien-a ka yakni ak o ai itilauechit aka chi bohla he ; mikmvt tvli achvfon a kia it vlnatvt kaha hi a, ik chim ahno ka hi oke, achi tok.

45. Mihma tempel a ont chukowa cha, anukaka yumma nana a kanchi, micha nana a chumpa aien-a maya tuk ash kocha pit yuhli mvt,

46. An chuka yvt vba pit ai anumpuli chuka yoke : achi hosh holisso tok okak o, hvchishno yokuto na hukopa vhleha in chuka yo hvsh ikbishke, im achi tok.

47. Yohmi mvt nitak moma tempel anukaka ya nana im ai abahanchi tok. Yohmi kia na holitompa isht asha pehli-chi vhleha, mikmvt na-holissochi puta, micha hatak hochit-toka vhleha aien-a kvt vbi bvnvt aiasha tok.

48. Yohmi kia okla momvt im a haponaklo kvt im achuk-ma fehnvt aiasha hatuk o, nana a kaniohma hinla kvt ik ithaiyano ki tok.

CHAPTA XX.

Kanimi kvt, Klaist kaniohmit isht im ai vlpesa hosh yvmohmi hatuk vt atokowa anola ch̄i ka, im ahni hatuk o nan anoli, 1. 9 Pa kvpi a hollokchi isht vlpisa. 20 Iskvli itvnali vt Sesa ak o im

itahoba he ai v̄lhpesa hatuk a Chis̄s vt otvninchi. 27 Chis̄s vt hatak illi falamvt tana he ilvppa Satusi okla ha isht it im anumpuli mvt, anumpa ha i kobvffi. 41 Klaist vt a katiohmi kak osh Lewi a ushi okmvt, anonti Lewi a in Chitokaka ya hinla chishba ? achit Chis̄s vt ponaklo tok.

1. ATUK o yakohmi tok: nitak yumm̄ma foka ma tempel anukaka ya okla nana im abvchi, micha vbanumpa isht anumpuli aienā hosh ahanta ma, na-holitompa isht asha pehlichi vhleha, micha na-holissochi vhleha, mikmvt hochitoka vhleha aienā kv̄t ai it apihvt ant i kohcha tok.

2. Mihmvt im anumpulit, Nan-isht ai v̄lhpesa nana ho ilvppa puta ka isht ish yakohmichi, micha kuna hosh nan isht ai v̄lhpesa ilvppa chima tok a ish pim anolashke, achi tok.

3. Mihma yumm̄mak ash ot afalaminchi mvt, Uno ak kia nana achvfa ka hvch̄i ponaklo la ch̄i hoke, mikma is sum anolashke.

4. Chan baptismo vt vba yak o a minti hokmá, keyukmvt hatak ak o a minti hokmá, nanta ha tok o ? im achi tok.

5. Mihma ilap bika nan it im achit maya mvt, Uba yak o a minti tok ; il achi hokma, Nanta katiohmi ho yumm̄ma hvch ik i yimmo ke tuk oh cho ? acha hinla.

6. Amba anonti, Hatak ak o a minti tok ; il achi hokma, Chan vt hopaii a tok a okla yimmi hatuk okvt, okla momvt tvli isht pi bola hinla hoke, achi tok.

7. Mihmvt afalaminchit, Kanimampo kak a tok a kil ithanoshke, okla im achi tok.

8. Mihma Chis̄s ash ot, uno ak kia nan isht ai v̄lhpesa nana ho ilvppa puta ka isht yakohmichi li hatuk vt ak hvchim analoshke, im achi tok.

9. Mihmvt nan-isht v̄lhpisa ilvppa okla ha isht anumpulit isht ia tok : Hatak achvfa hosh pakvpi a hokchit tahli cha, hatak toksuli vhleha ho i pota cha, yakni hopaki ho nowvt aya na ahehiba tok.

10. Atuk osh a waya ont v̄lhpesvt taha ma, pakvpi a hollokchi a waya ka okla ipeta ch̄i ho, yumm̄mak ash ot tishu

ha hatak toksvli vhleha hash pit i chvffichi tok: yohmi tok kia hatak toksvli vhleha hash ot yummak ash o boli cha, nana ik im iksho ho kania pit chvffichi tok.

11. Mihma anonti tishu inla ho pit chvffichi tok; atuk o yummak ash kia okla bolit hofahyalichi fehna cha, nana ik im iksho ho kania pit chvffichi tok.

12. Mihma anonti ont atuchina ma pit chvffichi tok; yohmi ma yummak ash kia okla bolit ai okpvninchi cha, kocha pit pila tok.

13. Yohmi ma pakvpi a hollokchi vt immi hatuk ash ot, Nanta ho katiohmi la chi cho? suso a holitopa yak o pit chvffichi lashke; yummak okmuno okla pisakmvt, holitobla hinla yoba ka, achi tok.

14. Yohmi tuk kia hatak toksvli vhleha hash ot yummak ash o pisa mvt, Ilvppak osh immi ha he mak oke; inta! kiloh vbi, atuk mvt nan im ai vlhtoshowa he tuk vt hvpimmi ha hinla hoke, ilap bika it im achit maya tok.

15. Mihma yummak ash o pakvpi a hollokchi a ishit a kohchi cha, okla vbi tok: yohmi kvno pakvpi a hollokchi vt immi hatuk ash ot yummak ash o nanta ho katimihcha hinla cho?

16. Yummak ash ot ayvt vla cha, hatak toksvli vhleha ilvppak ash vbit tahlikmvt, pakvpi a hollokchi ash inla yo i pota hi oke, achi tok. Mihma okla haklo mvt, Yohma hi a Chihowa yut ik ahno kashke, okla achi tok.

17. Mihma okla ha atokolit pisa mvt, Yohmi ka tvli ya chuk-ikbi vhleha hvt shitilema yash o mihi ash inli hosh chukbika nutaka in tola holitopa i shahli ho tobushke, achi holisso ilvppvt katiohmi hoh cho?

18. Kvna hosh tvli yvma onvtulakmvt, kobahla he; amba yummak ash ot kvna ho onvtula hokmuto, litolit kaiyancha hi oke, achi tok.

19. Yohmi ma hvshi kanvlli vlhpisa yummak fehna ka na-holitompa isht asha pehlichi vhleha, micha na-holissochi vhleha aieno kvt, yummvt nan-isht-vlhpisa ilvppa ilap ak o isht anumpuli hatuk a okla akostininchi hatuk osh, yummak ash ishi bunna hokak osh okla hak o i nukshopa tok.

20. Mihmut okla apesuchi beka ; yohmi mvt hatak vlpesa ilahobi cha, yvmmak ash ilap im anumpa akinli ho ai isht onochi : yohmi hokmak osh yvmmak ash ishit hatak pehli chi ibbak a ont fohki na nana im apesa hinla ka, na pisa vhleha ha tohno tok.

21. Mihmut yvmmak ash ot okla i ponaklot, Nan ithvnanchi ma ! nana kvt ai-vlpiesa ho ish miha, mikmvt ish ithvnanchi, yohmi kvt hatak mvt a chim it i shahsholi keyu, amba Chihowa i hina ai ahli mak o ish ithvnanchi chatuk a il ithaiyanvshke.

22. Noshkobo isht chumpa tuli holisso a Sesa yak o ima he ai vlpesa hokma, keyukma, nanta cho ? pit achi tok.

23. Yohmi kia yvmmak ash ot okla nan-ilahobi ka akostininch hatuk osh, Nanta katiohmi ho imomakachit hvs sa pisa cho ?

24. Iskvli a oh a haiakovchi. Kvta hak o holbvt toba ho, mikmvt kvta ho a hohchifo ho ? im achi tok. Mihma afalaminchi mvt, Sesa yak oke, okla im achi tok.

25. Mihma yvmmak ash ot, Yohmi hoka nana kvt Sesa yak o ai immi hokma Sesa yak o hvsh imashke ; mikma nana kvt Chihowa yak o ai immi hokmuno Chihowa yak ashke, im achi tok.

26. Yohmi ma okla itikba ya im anumpa ha ai isht onocha he keyu mvt, yummvt nana miha ka anukhlakancha cha, nana ik acho ki tok.

27. Yohmi ma Satusi vhleha kanimi kvt, Illi yvt falamvt tana he keyu, achi chatuk osh im ai vla cha, i ponaklot,

28. Nan-ithvnanchi ma ! hatak nana kia itibapishi hvt illi kvt tekchi vt asha hosh, vlla yvt iksho ho illi hokma, itibapishi hatuk ak osh tekchi atuk a ilaeli cha, itibapishi hatuk a vlla isht im ai ikba hi oka, Moses vt holissochit pi bohli tok.

29. Yohmi tok o itibapishi hvt untuklo hosh asha tok : atuk o akni ak osh ohoyo itauawa tuk osh, vlla yvt iksho ho illi tok.

30. Mihma atukla kash ot yvmmak ash ilaeli tuk osh, anonti vlla yvt iksho ho illi tok.

31. Yohmi ma ont atuchina kash ot ilaeli ; yohmi tok o ont isht untuklo kash kia yummak ash inli ho chomit ilaeli ; yohmi kvt vlla kia iksho ho illi tok.

32. Ont isht aiyopi fehna ma ohoyo hash kia illi tok.

33. Yohmi ka untuklo kash ot yummak tekchi ikbit ilaeli tok okvno, illi yvt falamvt tanikma, katima kak o tekchi mak a hi oh cho ? achi tok.

34. Mihma Chisus vt afalaminchit, Yakni ilvppa vlla yokuto itauwaya, mikmvt vlhpowchit itauwayvchishke.

35. Amba yakni yummak pisa he, micha illi tok vt falamvt tana he aieno kvt ai im vlhpesa tuk yummak okvto itauwaya he keyu, micha it im apobvchit itauwacha he keyu hoke,

36. Mikmvt himmakma illa he keyu ; yummak okvt enchil vhleha hak o ai itilaui hokvt, micha falamvt tani tok okla hokvt Chihowa im vlla mak oke.

37. Illi yvt tana he, Moses ak kia bufaha anukaka ya ai otvninchi mak osh Chitokaka yvt Eblaham in Chihowa, mikmvt Aisaak in Chihowa, micha Chekob in Chihowa aieno ka hochihifo tok.

38. Yummak okvt illi ak o in Chihowa yo keyu, amba okchaya yak oke ; yummak o moma kvt ai okchaya hoka, im achi tok.

39. Mihma na-holoccohi vhleha kanimi kvt afalaminchit, Nan ithvnanchi ma ! vlhpesa fehna ho ish mihvshke, achi tok.

40. Mihmvt yummak atuk o i himmakma okla nan i ponaklo kvt nukwia tok.

41. Mihma yummak ash ot okla hash, Katiohmi ho Klaist vt Lewi a Ushi okla achi cho ?

42. Mihma Lewi vt ilap inli kvt ataloa holocco ha, Chitokaka yvt an Chitokaka ya, Svbak isht-impakimma ya ish binili na,

43. Chin tvnyp vhleha ha chiyi yvt ai-o-hikia yo ikbi lashke, im achi tok, achishke.

44. Lewi vt yummak Chitokaka achi, yohmi ka katiohmi hosh ilap ushi oh cho ? im achi tok.

45. Yohmi mvt okla momvt haklo na nan im ai ithvna vhleha yash,

46. Na-holoccochi vhleha nafohka holitopa hofvloha ho abehkvchit itvnowa bunna, micha ilhpak a kanchi ai it-aiok-pvchi yak o, micha sinakak puta anukaka ma ai-o-minili holitopa i shahli puta kak o, mikmvt impa chito ashka ka aia-sha holitopa i shahli puta kak o ai im achukma vhleha;

47. Ohoyo i hatak illi vhleha in chuka puta ka a weh-puli, micha peh ilahobi kvt vba pit anumpuli aieno kvt falaiachi vhleha ha ahah ! hvsh im aiahnashke ; yummak okvto na palummi chito i shahli ho pisa he mak oke, im achi tok.

CHAPTA XXI.

Ohoyo i hatak illi yosh Chitokaka ya na kvtnosi pit isht aiokpvchi ho, Chisvs vt ahninchi fehna, 1. 5 Tempel vt ont aiokpulokvt taha hi a, anonti Chelusalem vt ont aiokpulokvt taha cha, chukillissvt talaia hi a isht anumpuli ; 25 micha ilap vt vla chikma, nan isht atokowa puta kvt kaniohma hi a anoli.

1. MIHMVT vba chakalit hopokoyo mvt, hatak nan in laua vhleha hvt twli holocco abohli holitopa yo in twli holocco ya pit apittvt maya ho pisa tok.

2. Mihmvt ohoyo i hatak illi ilbusha yosh mait tuklo ho yummak pit apitta ka, pisa akinli tok.

3. Mihmvt yummak ash ot, Ahli mak o hvchim achi lish-ke, Ohoyo i hatak illi ilvppvt moma i shahlichit pit fo-kishke.

4. Ilvppak okvto moma kvt nan in laua hatuk osh ai im atampa kvt Chihowa isht aiokpvchi abohli ya pit apittvshke ; amba yummak okvto ilbusha yosh isht ai okchaya he vt in tonla tuk vt lushumit pit abehlishke, achi tok.

5. Yohmi ma kanimi kvt tempel vt twli hochukma, micha na hvlbena puta ishit shema fehna ka okla isht anumpulit maya ma, yummak ash ot,

6. Ilvppa puta hvsh pisa ka, twli achvpona kia aka ik itolo ke tuk osh, it o twlkanchit itonla kvt ai iksho ka he nitak vt vla hi oke, achi tok.

7. Mihma okla i ponaklot, Nan-ithvnanchi ma! katiohmi fokak mak o ilvppa puta kvt ai yvmohma hi oh cho? micha ilvppa puta kvt ont a yvmohma chik ma, nan-isht atokowa nanta hosh otaiyana hi oh cho? achi tok.

8. Mihma yvmmak ash ot, Ahah! hvsh ahni cha, ik hvchi yoshubo kashke; sa hohchifo ha isht hochifo kvt, Uno ak osh Klaist sia hoke, achit aya kvt laua hi oka; ai yohma he nitak vt ik hopakoshke: yohmi kia yvmmma hvch ik iakaiyo kashke.

9. Tunvp asha, micha nana ik it im achukmo fehna ka hvsh haklo kia, ik hvchi nukshopo kashke: yvmmma puta kak osh tikbanli ai yvmohma hi oka; amba ont ishtaiyopi kuto chekosa chi keyu hoke.

10. Yvmmma fokakma oklushi achvfa kvt oklushi inla ya it in tanampa he; yohmikma miko apehlichi achvfa kvt miko apehlichi inla ya it in tanampa hi oke.

11. Yohmikma kanima ai ilaiyukachit yakni vt winakvchi chinta he; mikma hohchvfo chinto, micha abeka opculo aieno kvt asha he; yohmikma nana pisut ai i nukshopa he fehna, micha nan isht atokowa chinto aieno kvt vba ya auet a haiaka hi oke.

12. Yohmi kia ilvppa puta kvt ik a yvmohmo kisha ka, sa hohchifo pulla hatuk mak o okla hut ibbak a hvchi onochi cha, hvch issikkopala he; yohmi kvt miko vhleha, micha hatak pehlichi a puta itikba ya isht hvchi ai onvt, sinakak puta isht hvchi ai ona, mikmvt aboha kvlo a hvchi foehka hi oke.

13. Mikma yvmmak ash osh nan isht a hvchim atokoli mak a hi oke.

14. Yohmi hoka afalaminchit nana ho hvsh miha hi vt tikbanli hvch ik anukfillo ka chi kvt, hvchi chukvsh ma hvsh il anukfoyukashke.

15. Uno ak osh itih, mikmvt im anukfila hopoyuksa aieno ka hvch ima likma, yvmmak o hvchi nukkilli vhleha hut i sanalit miha, mikmvt a kanimancha he kia iksho ka hi oke.

16. Micha hvch iki, hvch ishki, mikmvt hvsh itibapishi

vhleha, hvchi kanomi vhleha, micha hvch i kana vhleha aieno kvt hvch ishit, okla ibbak a a hvchi fo~~ka~~ he: mikmvt hvsh kanima mvt, yvmmak osh ai ahni ho, hvch illa hi oke.

17. Micha vno sa hohchifo pulla hatuk mak o hatak moma kvt isht a hvchi nukkilla hi oke.

18. Yohmi kia hvchi noshkobo pashi vt achvfa kia ai okpuloka he keyu hoke.

19. Nuklanlv^t achunanchit hvsh ahanta pulla hosh hvchim ilhfiopak atuk ma hvsh il ai eshashke.

20. Micha Chelusalem a tvshka chipota puta ka isht apakfoyupa na hvsh pisakmvt, yvmmvt aiokpulokt taha chi ka, atukonofa ka hvsh ithaiyanashke.

21. Yvmma fokakma Chutea ya aiasha tuk vt nunih chaha foka pit yihlepakma; anonti yvmma ai iklunna aiasha tuk vt a kocha wihashke; mikma kocha foka tmahushi maya tuk okvto yvmma pit ik vlbeho kashke.

22. Nana puta holihiso tok vt ont ai ahla chi mak o, ilvppvt na palvmmi chinto kvt isht ai im vlhpisa he nitak a hi oke.

23. Amba nitak yvmma foka ho vlla shanli, micha pishinch chi aieno hokvto i palvmmma he; na komunta chinto kvt yakni a ai onvtuyulakma, vba auet i nukkilli mvt okla ilvppa onvtula hi oke.

24. Yohmkma bvshpo falaia yo isht akakoha he; micha yuka tobvt oklushi moma ai im ohona he; mikma Chelusalem a Chentail okla hosh aka a hvhlihinch na Chentail okla nana im ai vlhpisa atuk vt ont ai ahlik mak a hi oke.

25. Yohmkma hvshi, micha hvshi-ninak-aya, mikmvt fochik puta aieno ka nan isht atokowa kvt aiasha he; mikma oklushi puta a kaniohmi ik ithanot isht a komunta yvt yakni paknaka ya ai onvtuyulakma, okhvta oka bvnvtha kvt fojompa he;

26. Ilvppa puta kvt yakni a ai onvtuyula chi ka hohoyo tuk vt hatak chukvsh puta kash ot nukshopvt illa hi oke: vba nan isht aiahli ka puta asha kash ot winakahancha hi oke.

27. Yvmma fokakma Hatak Ushi vt nan-isht-aiahlka,

micha isht a holitopa chinto aienā ka il ai eshit a hoshonti anukaka minti na okla pisa hi oke.

28. Mikma nana ilvppa puta kvt ont aiahlit isht ia, yohmikma a hvchi hlakofa chi kvt atukonofvt taha hoka, vba pit hopokoyot hvchi noshkobo ha hvsh vba chakalichashke, im achi tok.

29. Mihmvt nan-isht vlhpisa ho okla hash isht im anumpulit, Fik vpi, micha iti puta ka ho pesá.

30. Yvmmvt bokoplit kohcha na hvsh pisakmvt, hvchishno akinli kia toffa vt olanlosi ant takanli ka hvsh ithana chatuk oke.

31. Yohmi kvt yvmmak inli ho chiyuhmit nana ilvppa puta kvt ont aiahli na hvsh pisakmvt, Chihowa apehlichika vvt auet olanlosi vla ka hvsh ithaiyanashke.

32. Ahli mak o hvchim achi lishke; Himak a hatak asha ilvppvt ont ik ai ikshot ik kvnio kisha ho, momvt ont aiahli ha chi hoke.

33. Uba shutik, micha yakni aienā hokvto ont ik ai iksho ka he; amba vno vm anumpa puta hatuk vto ont ik ai iksho ka he keyu hoke.

34. Micha ahah! hvsh il aiahnashke; yvmmak keyukmvt kanima kash inli ho isikopa, micha na homi ishkot haksi, mikmvt yakni ilvppa antvt nana ai okchaya he anukfoyuka fehna aienā kak osh hvchi chukvsh ma isht alotvt atupa, yohmi na hvch ik akostininchō ho, nitak yvmmvt ayvt ant hvchi kohcha hinla hoke.

35. Yvmmak okvt nan-isht hokli o chiyuhmit ayvt, yakni pataiya ai ahashwa tuk a mominchit i kohcha hi oke.

36. Yvmohmi hoka il a nuktahlvt vba pit anumpohonlit hvsh biliashke: yohmi tuk osh nana kvt a yakohma chi puta ka mominchit ai i hlakofit, Hatak Ushi itikba ya hiohmaya hi vt a hvchi vlhpesashke, im achi tok.

37. Mihmvt nitak okvno tempel anukaka yak o nana ithvnanchit anta tuk osh, ninak ano kohchvt ia mvt, nvnih chaha Alif hohchifo ho ont antvt on onna tok.

38. Atuk o onnahinli fehna i haponakla chi kvt, okla hv momvt tempel a im ai ona tok.

C H A P T A XXII.

Chutas Iskaliot vt Chisvs a ishit na-holitompa isht asha pehlichi vhleha ha ibbak fohka chi kvt nan it im apesa, 1. 7 Pita, Chan ita tuklo hosh ont ai vbanvblit isht vlhpisa ka atahli ho, Chisvs vt auah-tuklo yash it ibai impa mvt, 19 opiaka na holitopa impa isht vlhpisa ka apesa. 31 Pita na-yimmi im anukfila hatuk vt i kvnia chi keyu, amba hituchina ha yo ilapa ik ithano chatuk vt miha chi ka, Chisvs vt im anoli. 39 Nana kvt im a palvmmi, micha vba pit anumpohonlit osapushi anukaka ya anta; 47 Chisvs a okla isht ia na na holitompa isht asha pehlichi a im ona. 54 Pita yvt hituchina ha yo Chisvs a ik ithano ka miha tuk osh, i himmak o nuk-haklot yahaya fehna, 63 mihma Chisvs a okla ik ahobalot na mihachi. 66 Chisvs a ilaelit nan ai apesa ya isht ona na illa chi im vlhpisa.

1. MIHMA vbanvblit ont ia achi, puska ik shatvmmo impa hvt ai ona he tok.

2. Yvmohmi ma okla hak o i nukshopa hatuk osh, na-holitompa isht asha pehlichi vhleha, micha na-holissochi puta kash ot yamma kaniohmichit vba hinla kvt akostininch chi bahana tok.

3. Yohmi ma Setan vt Chutas Iskaliot hohchifo, auah-tuklo ka ai iba holhtina hatuk ash ont chukowa tok.

4. Mihma yummak ash ot ia mvt, kaniohmichit ishit ibbak fohka hinla kvt, na-holitompa isht asha pehlichi vhleha, micha kypitvi vhleha aienka ont isht it im anumpuli tok.

5. Mihma okla na yukpa mvt, yummak ash twli holisso ima chi kvt im apesa tok.

6. Mihma, Yohma hinla kvt miha mvt, okla laua yvt ai iksho ma ataklvchit ishit, ibbak a fohka hinla kvt ai vlhpesa hi a hoyo tok.

7. Atuk o puska ik a shatvmmo ka he, micha ai vbanvblit ont ia illa he nitak vt ai ona tok.

8. Mihma Chisvs vt Pita, Chan ita tuklo ka pit tihlelit, Ivt ai vbanvblit ont ia ya hvsh pim atahli tuk o, iloh impashke, achi tok.

9. Mihmia yummak ash ot, Katima yak o il ai atahla hinla ka ish ahni cho? im achit okla tok.

10. Mihma, Yakeh! tumaha ha ont hush chukowakma, hatak vt lukfi kotoba oka vlhto ho sholi kvt huchi afama chi hoke; yummak o apihvt aboha kanima yo pit chukowakma, hush chukowashke.

11. Mikmvt hatak chuka yummak ai vta yatuk ash, Nanithvnanchi vt, Katima ko ai impa aboha yvt talaia ho, n'an um ai ithvna vhleha ha pehlichit ai vbanublit ont ia ya ai it ibai impa la chi cho? auet chim achi kvno; hush im ahashke.

12. Yohmikma yummak ash ot vba potvlhpo chito hosh nana ai vlhtaha achukma ho huchi pisacha chi hoke; yummak o hush ai atahlashke, im achi tok.

13. Mihma itiachi tuk osh, yummvt nana ai i miha hatuk ash ont ai vlhpiesa na pisvt okla tok; yohmi mvt ai vbanublit ont ia ya ai atahlit okla tok.

14. Atuk o hushi kanvlli vt ai ona ma, vbanumpeshi auah-tuklo kash ot apihha ho, binili tok.

15. Mihmvt, Ik si ai ilvsho kisha takla kak osh ai vbanublit ont ia ilvppa a huch ibai impa ka ahni kvt ahani li fehna tuk oke.

16. Himak a pilla ma yummak ak ai vpo mak o, Chihowa apehlichika yak o ai isht aiahla chi mak oke, huchim achi lishke, im achi tok.

17. Mihmvt isht ishko a ishi cha, vba pit aiokpvchi mvt, Ilvppa oh ishi cha, hush ita kashkoashke;

18. Pakvpi a waya ka ak ai ishko mak o, Chihowa apehlichika yvt vla chi mak oke, huchim achi lishke, im achi tok.

19. Mihmvt puska ya ishi cha, vba pit aiokpvchi mvt, tushalichi cha, yummak ash o ima mvt, Ilvppvt sa nipi yosh huchishno yak o isht huchi vlhtoba mak oke, isht hvs svth: iyana chi mak osh ilvppa huchi yvmohmashke, achi tok.

20. Impvt issa ma, isht ishko ma aieninchit, Isht ishko ilvppvt nan vlhpisa himona yosh um issish vt huchishno atuk mak o hlatapa ka isht a toba mak oke.

21. Yohmi kia yakeh ! svshit inla ibbak fohka chī ibbak vt si awant ai impa ya ashvshke.

22. Yohmi ka Hatak Ushi yokvto ai im vlpisa tok mak osh yohmi mvhl ; amba ishit inla ibbak fohki yummak okuto ai i palummi mak oke.

23. Yohmi ma, E katima mak osh ilvppa a pi yakohma chī hatuk oh cho ? ahnit il im asilhhvchit maya tok.

24. Atuk osh anonti, E katima kak osh moma i shahli ha hinla chishba ? ahnit ai ita-chaport maya tok.

25. Yohmi ma yummak ash ot, Chentail okla i miko vhleha hak osh i na-hullo ho tobvt, nana ho ahnikmvt, ai i yvmihchi chatuk ; micha yvmma ai i shahlit nan im ai vlpisvt antakmvt, nana achukmali yo hohchifo chatuk.

26. Amba hvchishno vto hvchi ymohma he keyu hoke ; mikma kvna hosh moma i shahli kvt hvch ibafoka hokmvt, yummak osh himmak o chohmashke ; mikma na pehlichi yokmvt, nan-isht im vta yo chiyuhmashke.

27. Ashut impa kak okmá, nan isht im anta kak okmá, nanta kak osh i shahli yo ? ashut impa kak keyu ? yohmi kia vno vto nan isht im vta mak o chohmi hosh hvchi ibafoka lishke.

28. Isht ai imomaka sa pesa a puta ka hvchishno ak osh hvsi apeha beka tuk mak oke.

29, 30. Yohmi ka a pehlichi li a vñ ai impvt, ai ishkot, aiasha holitopa ka chieyvt, Islael hatak isht-ai-un-chululi auah-tuklo ka nana hvsh im apihisa chī mak o, apehlichika ya hvch im apesa li kvt, vno a Aki vt ai vñ apesa tok a chiyuhmichi lishke, im achi tok.

31. Mihmvt Chitokaka yash ot Saimon, Saimon, yakeh ! Setan vt chishi cha, mvshlichit onush o chiyuhmichi ka bvnna tuk.

32. Yohmi kia na chi yimmi tuk vt ik chī kvnio ka chi ka, vba pit isht chi anumpuli li tuk ; yohmi ka a filemvt ish ile kostininchikmvt, ish itibapishi vhleha ha ish hlampko-chashke, achi tok.

33 Mihma yummak ash ot, Chitokaka ma ! aboha kvlo,

micha ai-illi aienā ka chi awant ona la hi vt vñlhtaha hoke, im achi tok.

34. Mihma, Pita chia ha chim anoli lishke, himak nitak a akaka yvt ik olo kisha ho, hituchina ha chik svthano ish miha chi hoke, achi tok.

35. Mihmvt, Tüli holisso i shukcha, micha bahta pinak ai-vlhto, mihmvt shulush aienā kvt iksho ho pit hvchi tihleli li chash, nanasi kia isht ik hvchim ai ono ke tuk o? im achi tok; mihma, Nanasi kia ik pim ai ono ke tuk keyu, okla achi tok.

36. Mihma, Amba himak okvno, kvna hosh tüli holisso i shukcha yvt in tonla tukmvt, ishi cha, anonti bahta pinak-ai-vlhto ma mihinlashke; yohmikma kvna hosh bvshpo falaia yvt ik im iksho ke tuk mvt, im anchi a kanchi cha, achvfa ka chumpashke.

37. Yohmi kvt yvmmak ash ot, Nan-vlhpisa kobvffi vhleha ho ai iba holhtina tok, achi holisso tok ilvppvt vno ak o ant si ai isht ai ahla chi ka pulla moma hoke; nana kvt vno ak o svsh anumpa tok okvto ont ai vhla chi mak oke, im achi tok.

38. Mihma, Yakeh! Chitokaka ma! bvshpo falaia yvt tuklo hosh yak chiyvshke, achi tok. Mihma, Yvmmak oh kia vlhpesa hoke, im achi tok.

39. Mihmvt yvmmak o yohmi chatuk okvt, kocha ia mvt, Alif nvnih chaha ya ona ma, nan-im ai ithvna vhleha hash kia iakaiya tok.

40. Mihma yvmmak ash ot yvmma ont anta mvt, A yoshuba ya hvch ik iba chukowo ka chi kvt vba pit hvsh anumpohonlashke, im achi tok.

41. Mihmvt ai i filvmmitt tüli bohpoa ont ai itola ho tuk ohmi foka ho, ont hvchukbihlepvt hikia cha, vba pit anumpulit,

42. Aki ma! vlhpesa ish ahni hokmvt, isht-ishko ilvppa is sa kanvlllichashke: yohmi kia vno ak osh ahni li kak o keyu; amba chishno ish aiahni kak o ai yvmohmashke, achi tok.

43. Mihma enchil vba minti kvt ant i haiakvt hlampko-honchi tok.

44. Mihma i palummi kvt a fehna hatuk okvt, i shahlichit a chilitvt vba pit asilhha tok: mihma laksha kvt issish hlatapa chinto aka fohompa ho chiyuhmi tok.

45 Atuk osh vba pit asilhha tuk ash ot wakaya cha, nan im ai ithvna vhleha aiasha ka vla mvt, nukhaklo kvt nusi tuk osh aiasha na pisa mvt,

46. Nanta katiohmi ho hvchi nusi cho? ai-ashvchika ya hvch ik iba chukowo ka chi kvt, tanit vba pit oh asilhhá, im achi tok.

47. Mihma yummvt anumpuli moma ho, auahatklo ai iba holhtina Chutas hohchifo hash ot okla lawa ka in tikba hikvt aya tuk osh, i suksowa chi kvt Chisvs a atukonofvt ia tok.

48. Yohmi kia Chisvs ash ot, Chutas ma! na suksowa hak o Hatak Ushi a isht haksichit ishit inla ibbak a ish fohki hoh cho? im achi tok.

49. Mihma apeha atuk ash ot nana kvt a kaniohma hinla ka pisa mvt, Chitokaka ma! bvshpo falaia yo isht e fahama chi cho? im achi tok.

50. Mihma achvft na-holitompa isht asha pehlichi i shahli in tishu ho fahama cha, ishtimpak imma haksobish a tvbli tok.

51. Mihma Chisvs ash ot anumpulit, Yummak okvno ant ik a yohmi na hvsh aiahnashke, achi tok. Mihmv^t hakso-bish ash i potoli mvt, hlakofichi tok.

52. Mihmv^t Chisvs ash ot na-holitompa isht asha pehlichi vhleha, micha tempel i kvpitvni vhleha, mikmv^t hochitoka vhleha aiena kvt ai im vla tuk ash, Na-hukopa yo ayvt i kohcha ho chiyuhmit bvshpo falaia, mikmv^t iti tvptua aiena ka sholi hosh hvsh itvnowa cho?

53. Nitak moma hvchi takla tempel a anukaka ya ahanta li kvno; ibbak nana kia hvch ik si o welo ke tuk; yohmi kia himak okvto hvchishno, micha aiokhlilik aiena im aiahli aiena ka hvch i nitak mak okvt, im achi tok.

54. Yohmi ma yummak ash o okla ishi mvt, isht ivt na holitompa isht asha pehlichi i shahli in chuka yo ont ishit chukowa tok. Mihma Pita yvt auet i mishemanchit iakaiya tok.

55. Atuk o kvsbi aboha ai itin-takla talaia tuk a ai ik-lunna ka okla luak ai oti cha, binohlit taha ma, Pita yvt takla binili tok.

56. Atuk o yvmmvt luak bilika ont binili ka, ohoyo himita achvft pisa cha, atokolit pisa fehna mvt, Hatak ilvppak kia yvmma awant aya kamo, achi tok.

57. Mihma ik ithano ilahobit, Ohoyo ma! yvmma ak ithanoshke, achi tok.

58. Atuk o anonti in chekosi ma, inla yosh yummak ash pisa mvt, Chishno vt yvmma ai achvfa chia akinli, achi ma; Pita ash ot, Hatak ma! mihi yo sia keyushke.

59. Atuk o yvmmak atuk a i hvshi kanvlli achvfa foka ma, inla hosh kvollochi fehnvt miha mvt, Ilvppak kia yvmma awant aya yatuk vt aighli hoke; ilvpput Kalili hatak oka, achi tok.

60. Mihma Pita yash osh, Hatak ma! nana ho ish miha ka ak ithanoshke, achi tok. Mihma ashalika anumpohonli moma na akaka yvt ola tok.

61. Mihma Chitokaka yvt filemvt Pita ya pisa tok. Mihma Pita yash ot, yvmmvt, Akaka yvt ik olo kisha ho, hituchina ha chik svthano ish miha chi hoke, im achi tuk Chitokaka im anumpa hash ithaiyana tok.

62. Mihmvt Pita yvt kohcha cha, yahaya fehna tok.

63. Mihma Chisvs ash apesvchit maya tuk hatak ash ot ik ahobalot na-mihachi mvt, boli tok.

64. Micha nishkin a okla ompohomot, nashuka ya isso mvt, kvta hosh chisso ho? akostininchit anoli, achit i ponaklo tok.

65. Mihmvt ik ahobalo fehnvt nan ilaiyuka isht im i sana-lit mihachi kvt lauachi tok.

66. Atuk o onnvvt taha mak inli ho, hochitoka vhleha, micha na holitompa isht asha pehlichi vhleha, mikmvn na-holissochi vhleha aiena kvt itahoba cha, yvmmak ash ilauelit im ai-apesa aboha ya ishit chukowa mvt,

67. Chishno ak osh, Klaist mak o chia hoh cho? pim anoli, im achi tok. Mihma, Hvchim anoli li mak o, hvchi yimma he keyu.

68. Micha vno mut na hvchim asilhha li mak o, afalamin-chit hvs sv̄m anumpula he keyukmut, anonti ant ik i hotofá, hvs sv̄m ahna he keyu.

69. Himak a pilla ma Hatak Ushi vt Chihowa nan okluha imaiya im ibbak isht impak imma yā a binila he mak oke, im achi tok.

70. Mihma momvt, Mih-kvto chishno ak osh Chihowa Ushi chia hō? okla achi tok. Mihma yvmmak ash ot, Mihi yo sia mak atuk o hvsh mihvshke, im achi tok.

71. Mihma, Hv̄pishno akinli hosh ilap itih fehna iloh a haklo kv̄t, himmakma nan isht atokowa ka iloh ahna hinla cho? okla achi tok.

C H A P T A XXIII.

Chisvs a okla ilaelit Pailat ak o isht im ona ma, 1, 13 Pailat ash ot, okla ak osh yvmmma im ahni fehna hatuk o, Chisvs vt ititaiyukhvna ahonvhla chi ka, im issa cha, Balabbas ak o i hotofi. 26 Chisvs vt iti-taiyukhvna ahonvhla chi hō okla isht ia mvt, Saimon ak osh iti taiyukhvna yā iba shola chi ka atohno; 33 hatak hukopa tuklo hosh apihv̄t iti-taiyukhvna ahonvhla ak inli; achvfa kvto Chisvs vt yvmmma takanli moma hō, i yimmit aiokpvchi. 44 Chisvs vt illi. 50 Chosef Alimahlea minti osh Chisvs haknip a ishi cha, hohpi.

1. **MIHMA** okla laua yvt momvt wakaya cha, yvmmak ash ilaelit Pailat a isht im ona tok.

2. Yohmi mvt, Hatak ilvppvt Klaist miko yo ile mihvt, Sesa yā noshkobo isht chumpa tvli holisso im itahobi chatuk a im alvmminchit ahantvt, pim okla talaia ka ok-pvnit ahanta hō, e pisa tuk oke, achit anumpa okla onochi tok.

3. Mihma Pailat vt yvmmak ash o i ponaklot, Chishno ak osh Chu okla hā i miko chia mak oh cho? achi tok. Mihma afalaminchi mvt, Mih-mak atuk ish mihvshke, achi tok.

4. Yohmi ma Pailat ash ot, na-holitompa isht asha peh-lichi vhleha, micha okla puta kash, Hatak ilvppa nan ik ai vlhpeso nana kia ak ai akostininchoshke, im achi tok.

5. Mihma okla isht i shahlit a chilitvt, Ilvppvt vmmona ka Kalili ak o ai isht ia hosh Chu okla aiasha ka mominchit a hlopullit nana im abvchit, okla ha ai okpvnichit isht aya hosh ilvppa vla hoke, achi tok.

6. Mihma Kalili achi na Pailat vt haklo mvt, Kalili hatak okmá, nanta hatuk ba ? achit ponaklo tok.

7. Atuk osh Helot apehlichi yak o ai iba fohka atuk o akostininchí makinli hosh, Helot ak kia ilapvt nitak yvymma fehna ma Chelusalem a ant anta hatuk o, pit i chuffichi tok.

8. Yohmi na Helot vt Chisvs a pisa mvt, na yukpa fehna tok : yohmi kvt yvymma isht ai annoa ka haháklo ka laua hatuk osh, pisa bunna fehna tuk a hopaki tok ; yohmi hatuk osh nana a fehna kaniohmi kia a yvmihchi na pisa chi kvt ahni tok.

9. Mihmvt anumpa lauachit nana isht im asilhhvchi tok : yohmi kia yvmmak ash ot afalaminchi kvt nana kia ik im acho ki tok.

10. Mihma na-holitompa isht asha pehlichi vhleha micha, na-holissochi vhleha aiena kash ot kvllochi fehnvt anumpa onochit hiohmaya tok.

11. Mihma Helot ash ot in tshka chipota vhleha hash o pehlinchi cha, yvmmak ash o na-keyukechi fehnvt isht itukhlakafvt ik ahobacho ke tuk : mihmvt na-fohka tohbi holitompa ho fohkachechi cha, falaminchit Pailat a pit i chuffichi tok.

12. Mihma tikba hokvno ai it i nukkilli yoh chatuk ak osh, nitak yvymma fehna ka Pailat, micha Helot itatuklo kvt ai iti kana toba tok.

13. Mihma Pailat ash ot na-holitompa isht asha pehlichi vhleha, micha hochitoka vhleha, mikmvt okla a puta kash hoyot itahobi mvt,

14. Hatak ilvppvt okla ha i miko a isht ai iti filamolichi yoke, achi hosh isht hvs svm vla tuk : mihma yakeh ! hvchi tikba ya nana ka ai im asilhhahanchi li kvt, anumpa isht hvsh ai onochi tuk imma ka, nana ik ai-vlhpeso kvt hatak ilvppa ai a takali ka ak im akostininchoshke.

15. Mihma Helot vt mihinli tuk; yvmmak o pit huchi a tihleli li; yohmi ka nana ka isht ai illa he vlpesa ma a takali keyushke.

16. Yohmi hoka fummi lish, i hotofi la chi hoke, im achi tok.

17. Yohmi kvt ai-vbanvblit ont ia impa asha ka achv-falichit ai i hotofa hi a vlpesa ha tok.

18. Mihma himonna achvfa momvt tahpvlvt, Hatak ilvppvno kanima isht ia cha, Balabbas ak o ish pi kohchi-hashke, achi tok.

19. Yvmmak okvt tumaha ha antvt i miko a ik im antio ka chi ka okla ha anukfohkichi, micha hatak vbi aien a hatuk o, aboha kyllo a pit a fohki tuk a tok.

20. Yohmi hatuk o Pailat vt Chisvs ak o i hotofi ka ahni hatuk osh, himmak ma okla ha im anumpuli tok.

21. Yohmi kia okla tahpvlvt, Iti-taiyukhvna yo ahonvhuchi, iti-taiyukhana yo ahonvhlichí, ahanchi tok.

22. Mihma ont atuchina ma, Nanta katiohmi o? nan ik ai vlpeso nanta mak o yvmoohmi tuk oh cho? nana ka isht ai illa he vlpesa ka vno vt ak im akostinchoshke; yohmi hatuk osh fummi lish, i hotofi la chi hoke, im achi tok.

23. Mihma okla a chilita fehnvt chitolit anumpuli hosh, yvmmvt iti-taiyukhvna ahonvhla hinla ka asihjhlha tok: mihmvt yvmma, micha na-holitompa isht asha pehlichi vhleha aien a im anumpa hak osh imaiyachi tok.

24. Mihma Pailat ash ot okla hut nana asilhha tuk mak o vlpesa chi ka apesa tok.

25. Mihma yvmmak o okla asilhha tuk oka, i miko ik im antio ka chi ka anukfohkvchichi, micha hatak ma vbi aien a hatuk o aboha kyllo a pit a fohki tuk a tok ash, i kohchichi tok: amba Chisvs ak okvno nana o okla ahna chi ka, im issa tok.

26. Mihma yvmmak ash o kanima isht iwt itvnova mv, Silinian hatak Saimon osh haiaka vttvt minti o okla halvllit ishi; yohmi mv yvmmak osh Chisvs a iba shola chi ka, iti-taiyukhvna ya om bohli tok.

27. Yohmi ma okla lawa fehna kvt iakaiyvt itvnowa ma,

ohoyo aienā tuk osh yummak ash ḥ isht nukhaklot chitolit yahaya tok.

28. Yohmi kia Chisvs ash ot pit filema mvt, Chelusalem ushetik hvchia ma! vno ak okvno svsh yaiyvt nishkin okchi hvch ik hlatvblo kashke: amba hvchishno inli kak ḥ isht ile yaiyvt nishkin okchi hvsh hlatvblimvt, hvchim vlla aienā kak ashke.

29. Yakeh! vlla ik im iksho, micha oshvto nana a foyuka keyu, mikmvt i pishik vt na pishechi keyu aienā hokvto im achukmvshke, okla acha he nitak vt mihintishke.

30. Yvmmma fokakma nvnih chaha puta ka, Pi ḥ kinahlí, im achikmvt, nvnih chipunta ya, Hvsh pi ompohomashke, achit isht ia hi oke.

31. Yohmi ka iti vt okchaki ḥ ilvppa okla ai yvmichi tuk mvno, anonti shila yokvno nanta mak osh a katiohma hi oh cho? achi tok.

32. Yohmi ma hatak haksi tuklo hosh illit okla chi ho, ai apehalinchit isht aya tok.

33. Atuk osh Kalfali hohchifo yummak atuk ash okla ai vla mvt, yummak ash, mikmvt hatak haksi tuklo aienā kash ot achvftt ibbak isht-impak imma yo takali ma, anonti achvftt vlhfvbeka twnnvp ḥ takali ho, iti-taiyukhvna ya ai aho-nvhlichi tok.

34. Yohmi ma Chisvs ash ot, Aki ma! ish i kashofashke: nana ka kaniohmi kv̄t okla ithana ho keyu hoka, achi tok. Yohmi ma i na fohka ya ita kvshkolit mayvt na-shoeli tok.

35. Mihma okla hv̄t pisvt hiohmaya tok: mihma hochitoka vhleha mvt ik ahobalot, Inla ya okchalinchi yatuk okvt, ilap ak osh Chihowa i holitopa Klaist atuk okmvt ilap inli kak osh ik il okchalinchi, achi tok.

36. Mihma tvshka chipota vhleha ak kia ai im vlv̄t, ishit yopulvt, anonti wineka ipeta mvt,

37. Chishno ak osh Chu okla ha i miko chia hokmvt, ish il okchalinhashke, achi tok.

38. Yohmi ma Klik, micha Latin, mikmvt Heblu aienā anumpa ho isht a holisso kv̄t, ILÜPPAK OSH CHU OKLA HA I MIKO MAK OKE, achi hosh paknaka ya takali tok.

39. Mihma hatak haksi tuklot vba takohli tuk ash ot achvft yvmmak ash ik ahobalot mihachit, Chishno ak osh Klaist chia hokmvt, il okchalinchi cha, pishno ma ish pi okchalinchashke, achi tok.

40. Amba achvfa kvto afalaminchit im alvmmmit, Chishno ak kia na chim vlhpisa kv a miha achvfa hokak osh Chihowa ha chik i nukshopo cho ?

41. Micha pishno ak okvto pim ai vlhpesa ho mvhli ; pishno nana il a kaniohmi tuk isht ai vlhtoba he vlhpesa mak o e pisa hoka ; amba hatak ilvppak okvto nana ho okpvni tuk keyushke, achi tok.

42. Mihmvt Chisvs ash, Chitokaka ma ! ish apehlichika ya ont ish chukowakmvt, is svthaiyanashke, im achi tok.

43. Mihma Chisvs ash ot, Himak nitak a si awant palatais a ish anta chi hoke, ai ahli mak o chim achi lishke, im achi tok.

44. Yohmi ka yvmmvt hushi kanvlli vlhpisa ont isht haniali foka tok ; mihma yakni moma ka ai okhlilit kvnia na hushi kanvlli vlhpisa ont isht chakkali tok.

45. Yohmi ma hushi vt okhilli ma, nan-tvnna tempel anukaka takali atuk vt iklvnna ita hlilafa tok.

46. Mihma Chisvs vt chitoli hosh anumpuli mvt, Aki ma ! sa shilombish a chibbak pit a foiki lishke, achi tok : mihmvt yakohmichit miha mvt, fiopissa tok.

47. Mihma nana kv a yvmoymi na Sintulion vt pisa mvt, Ilvpput hatak ahli achukma yatuk o pulla mvhlishke, achit Chihowa ya holitobliche tok.

48. Mihma okla yvmma pisvt ai itahoba tuk ash ot, nana kv a yvmoymi ka pisa mvt, momvt ilap ikkishi ha isso cha, falamvt ilhkoli tok.

49. Mihma yvmma ai it ithanaka puta, micha ohoyo Kalili a asht ai apehv minti tuk aienas kash ot mishema ho auet hielit, na yakohmi puta ka pihisa tok.

50. Mihma hatak vt Chosef hohchifo nan-apesa, micha hatak aighli achukma hosh anta tok.

51. Okla nana im anukfila, micha a kaniohmit maya aienas ka ilvppvt ik ibafohko ki tok : ilvppvt Chu okla in tvmaha

Alimahlea ak o ai vitta hosh yummak kia Chihowa apehlichika ya pit hohoyo ya tok.

52. Hatak ilvppak ash ot iwt, Pailat a im ona cha, Chisvs haknip a asilhha tok.

53. Micha yummak ash ot akvchi cha, na-lapushki lin en o a bonullit sepvka vt tvli yosh kulvt toba ho, yummahat tak nana kia ik a fohko yatuk o fohki tok.

54. Mihma yummvt ai atahli nitak atuk o, nitak hullo vt atukonofvt mihinti tok.

55. Mihma ohoyo Kalili a asht ai apehvvt aya tuk ash kia, iakaiyvt ilhkoli cha, sepvka, micha haknip ash ot kaniohmit itola aienka achukmalit pisa tok.

56. Mihmvt falamvt ilhkoli cha, na-balama, micha nanahama aienka atahlit maya tok : mihmvt anumpa vlpisa yoka nitak hullo yokvno foha tok.

Chisvs vt falamvt tani tuk a enchil tuklo hosh ohoyo hash sepvka ak o ai im anoli. 1. 13 Chisvs nan im ai ithvna vhleha tuk vt tuklot Emmaus a itiachi hosh ayvt okla ; 38 il otvnichi, nan im ai ithvna vhleha hatuk vt chiya moma na Chisvs vt itintakla ant hikia : 47 yohmi cha Chelusalem ak o vmmona ka ai isht ia hosh vbanumpa ya okla isht anumpula chi ka, im apesa. 51 Chisvs vt vba a holitopa ya ia.

1. ATUK osh wek nitak vmmona onnvnt okhlilinchi fehna ho na-balama atahli tuk vt ishit, inla ka ai itapihvt, sepvka yash okla ai ona tok.

2. Mihma tvli vt sepvka ya kanima pit tonoli tuk o okla pisa tok.

3. Mihmvt okla pit' chukowa tuk osh, Chitokaka Chisvs haknip ash ik peso ki tok.

4. Atuk o yakohmi tok ; okla nana a kaniohmi ik ai ithano fehnvt maya ma, yakeh ! hatak tuklo kvt i na-fohka shohmalali hosh itumasi a hinli tok.

5. Mihma okla nukshopvt, aka pit yochonoli ma, yummak

ash ot, Nanta katiohmi ho okehaya illi aiasha ak o hush hoyo cho ?

6. Ilvppa ikshoshke ; amba tani tuk oke ; Kalili a anta moma mvt hvchim anoli kvt ;

7. Hatak Ushi vt hatak nan ashvchi vhleha ibbak a a fohka cha, iti-taiyukhva ai ahonvhla tuk osh, nitak ont atuchinakma falamvt tana hi oke, achi tuk a hush ithaiyanashke, im achi tok.

8. Mihma im anumpa ha tok ash okla ithaiyana tok.

9. Micha sepulka yash asht falamvt ilhkoli mvt, auah-achvfa kash, micha inla moma aiena ka na yakohmi puta tuk ash mominchit ont im anoli tok.

10. Meli Maktalene, micha Choanna, mikmvt Meli, Chemis ishki, micha ohoyo inla ka yvmmma apehvrt aya tuk aiena kak osh vbanumpeshi vhleha ha na-yakohmi puta tuk a ont im anoli tok.

11. Mihma yvmmma im anumpa hvt annoa ik ahlo yak o ai im itilaui cha, okla ik yimmo ki tok.

12. Mihma Pita yvt wakaya cha, malelit sepulka ya onvt, pit aka chonoli mvt, line n nan-tvnna ak bano hosh asha na pisa cha, ia mvt, nana kvt ai yvmoohmi tuk ash, okokko ! ahni tok.

13. Atuk o tuklo kvt nitak mih-makinli ka tvmahushi Emmaus hohchifo hosh, yvmmvt Chelusalem a auet i kowi untuchina foka hatuk o itiachi tok.

14. Mihmvt nana kvt ai yvmoohmi tuk ilvppa puta kash isht it im anumpohonli tok.

15. Atuk o yakohmi tok ; it im anumpulit nan it im asilhhahanchi kash ot moma ho, Chisvs akinli kvt sakki cha, takla aya tok.

16. Yohmi kia ik ithano ket okla chi ka, nishkin vt mo-choli ho chiyuhmi tok.

17. Mihma yvmmak ash ot, Ilvppak osh anumpa katiohmi mak o isht it im anumpohonlit hush aya cha, hush ilapissa cho ? im achi tok.

18. Mihma achvfvt Kleopas hohchifo hosh afalaminchit ; Hatak kanima minti chishno ak hosh Chelusalem a ish anta

kvt himak nitak chohmi yvmmma nana kvt a kaniohmi ka chik akostininchø ke tuk oh cho ? im achi tok.

19. Mihma yvmmak ash ot, Nana nanta hø ? achi ma, Chisvs Nasalet hatak nan im a kaniohmi tuk a, yvmmak okvt hopaii yosh Chihowa, mikmvt okla puta aien a itikba ya nana a kaniohmi, micha anumpuli aien a kvt a chinto fehna tuk ;

20. Yvmohmi tuk o na-holitompa isht asha pehlichi vhleha, micha pi hochitoka vhleha aien a kvt, yvmmvt illa chi hosh im vlpisa chi ka, kaniohmichit ishit inla ibbak a fohki na iti-taiyukhuna ahonvhlichi tuk.

21. Yohmi kia yvmmak osh Islael okla ha hlakoficha he tuk mak atuk a pi yihiimmi tuk ; yvmohmi tuk kia keyushke ; micha yvmmak bano keyu, nana kvt a yakohmi tuk a himak nitak vt nitak ont isht atuchinvshke.

22. Micha anonti ohoyo il ai itapeha tuk a a kanimi kvt onnahinli fehna sepulka ya ont maya tuk vt,

23. Yvmmma haknip a ik peso hosh ai vla mvt, anonti en-chil mvt i haiaka na pisa ma, Yvmmak ash ot okchaya hoke, achi tuk achi cha, okla pi nukhlakvshli tuk oke.

24. Yohmi ma il ai itapeha tuk a a kanimi kvt sepulka ya ona, yohmi mvt ohoyo nana a miha tuk a vlpesa ho ont pisa tuk ; yohmi kia yvmmak amo okla ik peso ke tuk oke, im achi tok.

25. Mihma yvmmak ash ot, Im anukfila iksho, hopaii vhleha hvt anumpuli tok moma ka chukvsh isht yimma he svlaha hvchia ma !

26. Klaist vt na yakohmi puta ka pisa ha yosh a holitopaka ya chukowa he vlpesa ha tok keyu cho ?

27. Mihmvt Moses, micha hopaii puta aien tok ai vhli kak o isht ia hosh, Holisso Holitopa ya a mominchit ilap a isht ai annoa ka achukmalit im anohonli tok.

28. Mihma tvmahushi itiachi yvmmak atuk ash ot itonacha hosi tok ; yohmi ma yvmmak ash ot ont ia hinla ka, ile chohmichi tok.

29. Yohmi kia im a chilita fehnvt okvt, Nitak vt shohbit ont opivt mahaya hoka, pi takla ish antashke,

achit okla tok. Mihma takla anta chi hosh ont chukowa tok.

30. Atuk o yakohmi tok; yummak ash ot takla impvt binili mvt, puska ya ishi cha, vba isht aiokpuchi mvt, tush-tolit, yummak ash o ipeta tok.

31. Mihma nishkin vt i fatumvt okla cha, yummak ash ithanvt okla tok; yohmi ma yummak ash ot i holhponayo ha ai i kvninihya tok.

32. Mihma, Ilvpput takla ya a pim anumpuli, micha Holisso Holitopa aien a achukmalit a pim otvninchi ma, pi chukvsh vt libisha tuk keyu? it im achi tok.

33. Mihmvt hvshi kanvlli vlhpisa mih-makinli ho wakaya cha, falamvt Chelusalem a it vlachi mvt, auah-achvfa kash ot, micha ai itapeha tuk aien a kvt, itvnaha mvt,

34. Chitokaka yvt falamvt tani pulla mvhli tuk osh, Simon a i haiaka kvno, achit maya ho ant pisvt okla tok.

35. Mihmvt yummak ash osh hina takla ya nana kvt a kaniohmi tuk, micha yummvt puska tushalichit ashrt kani-ohmit im otaianyi tuk aien a kash anolit okla tok.

36. Mihma yakohmichit anumpohonli moma ho, Chesus vt ilap fehna hosh ai iklvnna ont hikia cha, Nanaiya kvt hv-chimmi hashke; im achi tok.

37. Yohmi kia yummak ash ot komuntvt nukshopa fehna mvt, Shilup o pisa ka, im ahoba tok.

38. Yohmi ma, Na katihmi ho hvchi komunta cho? micha, Na katihmi ho hvchi chukvsh anukaka ya na hvchim anukfila anuktuklo kvt takali cho?

39. Subbak, saiyi aien ka ho pesá; vno sia hash inli hoke; sa pusholit ho pesá: shilup vto nipi, micha foni puta aien a sha, vno vt si ymohmi na hvs sa pisa ka, chohmi keyu hoka, im achi tok.

40. Micha ilvppa yakohmichit anumpuli mvt, ibbak, micha iyi aien a kash i haiakvchi tok.

41. Mihma okla na yukpa kak osh yimmi keyu kisha, micha okokko! aiahni aienvt maya takla ma, yummak ash ot, Ilvppa nan-ilhpak nana kia hvchim sha cho? im achi tok.

42. Mihma n̄n̄i v̄lhpusha tushafa, micha foi-bila aienā
hō okla ipeta tok.

43. Mihma ishi cha, okla itikba ya ai vpa tok.

44. Mihmvt, Nan okluha kvt isht a si annovt Moses, mi-
cha hopaii vhleha aienā i holisso, mikmvt ataloa holitopa
aienā ka ai o holisso tok vt ont aiahlī pulla chī mak o, hvchi
takla anta li moma kvt anumpa ilvppa puta ka isht hvchim
anumpuli li tok oke, im achi tok.

45. Mihmvt Holisso Holitopa ya ithaiyana chī ka, im
anukfila nan-isht akostininchī a in tiwi tok.

46. Mihmvt, Klaist vt yakohmi hosh i palvmmmit, illi tuk
osh, anonti nitak ont atuchinakma illi tuk vt tana hi a, isht
ai v̄lhpiesa tok.

47. Micha ile kostininchā he, mikmvt ai ashvchika puta
isht a kashofa he aienā kvt yvmma hohchifo hō isht anumpa
kvt, vmmona ka Chelusalem ak o ai isht ia hosh, oklushi
moma isht im anumpa hi oke, achi hosh yakohmit holihiso
hoke.

48. Yohmi hō hvchishno ak osh na yakohmi puta ka ai-
atokowvt anoli hvchia mak oke.

49. Yohmi ka yakeh! Aki vt nana ka hvch ima hi vt
miha tok mak o, hvchishno a hvchi o kaiyanchi lishke: yoh-
mi kia Chelusalem tvmaha hak o hvsh aiashvt, nana aiahlī
vba minti kvt ont hvchi anukfoyska kak mak ashke, im achi
tok.

50. Yvmohmi tuk osh yvmmak ash pehlichit kohchvt vt
Betani yokvno isht ona tok: mihmvt ilap ibbak ash vba pit
wieli cha, yvmmak ash holitoblit aiokpvuchi tok.

51. Atuk o yakohmi tok: yvmmak ash holitoblit aiok-
pvchi ai itin takla mvt, ai i filvmmmit vba pilla pit a kvnia
tok.

52. Mihma yvmmak ash okla pit holitoblichit aiokpvchi
cha, na-yukpa fehna hosh falamvt Chelusalem a ai vla tok.

53. Yohmi mvt Chihowa ya in talovt holitoblichit pit
aiokpahanchit tempel anukaka ya aiasha beka tok. Amen.

U B A N U M P A C H A N

V T H O L I S S O C H I T O K.

C H A P T A I.

Anumpa achi Chisvs Klaist yvmmak osh vmmona fehna ka Chihowa ha iba chvfa, 1; 6 Nan-tohwikeli ai ahli kvt achvfa illa ilvppak atuk a atokowa anola chi mak osh Chan vt aya hatok. 15 Chan vt Klaist a nan vlhtokowa isht ai anoli. 35 Chan nan im ai ithvna yatuk vt tuklot Chisvs a apeha toba; yvmmak atuk vt achvft Antilu ak osh itibapishi Pita ya ilaelit Chisvs a isht im ona.

1. UMMONA ka Anumpa hvt ahanta mvt, Anumpa hvt Chihowa ya ai iba chvfa tok: mihmvt Anumpa hash ot Chihowa ya tok.

2. Yummak inli hosh vmmona ka Chihowa ya ai iba chvfa tok.

3. Yummak atuk mak o nan okluha kut toba tok; yohmi ka nana kvt toba tok vt yummak o keyu hokvno ik tobo ki tok.

4. Yummak oka isht ai okchaya yvt asha tok: yohmi ka isht ai okchaya yummak ash ot hatak puta ka in tohwikeli ya tok.

5. Mihmvt tohwikeli hash ot ai okhlilika ya a tohommi; yohmi ka okhlilika yvt yummak ash o ik akostininch ki tok.

6. Hatak Chan hohchifo hosh, Chihowa nana aiahni ho aya tok.

7. Yumma pulla tuk mak o hatak vt momvt yimma hi o, yummak ash osh nan atokoli osh Nan-tohwikeli ash atokowa anola chi hosh aya tok.

8. Yummak osh Nan-tohwikeli mih mak a tok keyu; am-

ba Nan-tohwikel i yummak oka atokowa anoli hosh chi mak osh aya tok.

9. Yakni pakna hatak vt ai vta hoka mominchit in tohwikelichi, yummak osh Nan-tohwikel ahli mak a tok.

10. Yummak atuk mak o yakni vt toba tok o, yakni a ai ahanta ma, yakni vt yummak ash ik ithano ki tok.

11. Yummak okvt ayvt ilap immi vhleha ho im vla ma, immi vhleha hash osh ik i yimmo ki tok.

12. Amba laua kariohmi hosh ahninchit, ilapo hohchifo ha i yimmi hokvno, Chihowa ushi vhleha toba chi mak o isht ai vlhpesa ka ima tok;

13. Issish ak o keyu, mikmvt haknip nan ahni keyu, micha hatak osh nan ahni keyu ho, yummak okvt toba tok; amba Chihowa yak a tok.

14. Micha Anumpa hash ot nipi yo toba cha, nan isht i kana, micha nana aiahlika aienvt isht alotowa hosh pi takla ahanta tok: yohmi na isht a holitopa ya, Iki a Ushi vt achvfa illa cha ai isht a holitopa chatuk mak o, chiyuhmi ho e pihsa tok.

15. Chan vt yummak oka atokowa anoli hosh, chitolit anumpulit, Auet siakaiyvt mihinti kak osh sa tikba ahanta tok mak okvt, yummak ash holitopa kvt vno a a shahli ho, isht anumpohonli li tuk a ilvppak atuk mak oke, achi tok.

16. Micha yummvt isht alotowa hatuk ash e moma kvt nan isht i kana yut ai itulbitkuchi ho, e pisa tok.

17. Nan-vlhpisa yokvto Moses ak atuk mak o vlhpihsa tok: amba nan isht i kana, micha nan-aiahlika aieno hokvto Chisus Klaist ak o a minti tok.

18. Hatak nana hosh Chihowa ya nitak nan ash o pisa tok keyu: Ushi holitopa achvfa illa Iki shakba ya afoyuka, yummak atuk okvt yummak oka otuninchi tok oke.

19. Mihma yummak ash o, Kvta chia hoh cho? achit ont i ponakla chi ka, Chu okla hvt na-holitompa isht asha, micha Lefait okla aieno ka Chelusalem a a kohchit pit tihleli na Chan vt atokowa anoli tok a ilvppak oke.

20. Yohmi kvt yummak ash ot atokolit anoli kvt, Mih sia

hoke, achi tok keyu; amba atokolit, Üno ak osh Klaist o sia keyu hoke, achi tok.

21. Mihma okla i ponaklot, Mih kuto kuta hak o? Elias ak o chia ho? achi tok: mihma, Mih sia keyu, achi tok. Hopaii mih mak o chia ho? achi ma; afalaminchi mvt, Keyú, achi tok.

22. Mihma, Kuta chia hak o? ish pim anoli na auet pi tihleli tuk vhleha ha anumpa falama ka ont il imashke: chishno akinli kuto, Kuta ho ish ile miha cho? im achi tok.

23. Mihma yummak ash ot, Achufa hosh yakni haiaka yo ai anumpohonlit, Chitokaka ataya hi a oh apissvlichí, ahanchi ho hopaii Esaias vt isht anumpohonli tok mak o mih sia mak oke, achi tok.

24. Mihma okla vlhtokvt ilhkoli tuk ash ot Falisi vhleha ha tok.

25. Atuk osh yummak ash o okla i ponaklot, Chishno ak osh Klaist mih mak o chia keyu; Elias a chia keyu; anonti hopaii mih mak o chia keyu hokak osh, nanta katiohmi ho ish baptismochi cho? im achi tok.

26. Chan ash osh yummak ash o im afalaminchi mvt, Üno vto oka yo ishit baptismochi lishke; amba achufa kvt hruchi takla hikja yummak okvno hrch ik ithanoshke.

27. Yummak osh siakaiyvt minti kvt holitopa kvt a shahli ka, i shulush isht-talakchi a hotofi la he si ahoba keyu mak oke, achi tok.

28. Chatan misha Behlabala yummak o Chan vt a baptismochi hosh ahanta hatuk o, ilvppa puta kvt ai yakohmi tok.

29. Atuk o ont onna ma Chan vt, Chisus vt i minti na pisa mvt, Chihowa in Chukfulhpoba ushi, yummak osh yakni im ai-ashvchika isht kanchi a, ho pesá.

30. Hatak vt auet siakaiyvt minti kvt, yummak osh sa tijkba ahanta tuk osh holitopa kvt a shahli hoke; achi li tuk a ilvppak osh mih mak oke.

31. Yohmi kvt ilvppa ithana li tuk keyu; yohmi kia

iluppak osh Islael okla ha im otvna chi kak o, vno vt oka ya ishit baptismochit aya li hatuk oke, achi tok.

32. Mihmvt Chan vt atokowa anolit, Shilombish okuto puchi yoshuba yo chiyuhmi hosh vba ya vttvt mintit, yummak ash ant o binili na pisa li tok.

33. Yohmi ka yummak ash o ak ithano ki tok; yohmi kia oka ishit baptismochi la chi ho, sa tohno tuk yummak osh, Kvna ho Shilombish ak osh aka mintit ant o binili na ish pisa chi ka, mihi yosh Shilombish Holitopa ya ishit baptismocha chi mak oke, im achi tok.

34. Atuk o, Iluppak osh Chihowa ha Ushi pulla hatuk a pisvt, atokowa anoli li tuk oke, achi tok.

35. Anonti ont onna ma Chan vt ilap, nan im ai ithvna tuklo aienvt hinli tok.

36. Micha Chisvs ash ot nowvt aya na pisa mvt, Chihowa in Chukfvlhpoba ushi a ho pesá, im achi tok.

37. Mihma nan im ai ithvna tuklo kash ot, yummak ash ot anumpuli na haklo mvt, Chisvs a iakaiyvt okla tok.

38. Mihma Chisvs ash ot filema cha, iakaiyvt okla kash o pisa mvt, Nanta ho hvsh hoyo cho? im achi ma, Labbai ma! yummvt vlhtoshowakmvt, nan-ithvnanchi ma! achi, Katima ko ish ai vutta yoh cho? im achi tok.

39. Mihma, Mintit ant ho pesá, im achi tok. Mihma itvlachit kanima ai-vtta yatuk a ant pisvt okla mvt, hvshi kanvlli vlhpisa ont isht pokoli foka hatuk oka, nitak yummno apehvt ashwa tok.

40. Tuklot Chan vt anumpuli na haklo cha, yummak iakaiyvt okla tuk ash, achufa kvt Antilu, Saimon Pita itibapishi ha tok.

41. Yummak ash ot na tikba ilapo itibapishi akinli Saimon ak o pisa mvt, Messias ash, yummvt vlhtoshowakmvt, Klaist achi ho il ahayuchishke, im achi tok.

42. Mihma yummak ash o ilaelit Chisvs a im vla tok. Mihma Chisvs vt yummak ash o pisa mvt, Chona ushi Saimon chia hvt Sefas, yummvt toshawakmvt, tuli achi hoke, yummak o chi hohchifashke, achi tok.

43. Atuk osh ont onna ka Chisvs vt Kalili a ia hi atuk osh Filip a pisa mvt, Is siakaiyashke, im achi tok.

44. Filip vt Antilu, micha Pita ita-tuklo in twmaha Bet-saita yak o ai vtta ya tok.

45. Filip vt Nahlanael a pisa mvt, Chisvs Nasalet vtta, Chosef ushi, yummak o nan vlhpisa ya Moses vt, micha hopaii puta kvt isht a holissohonchi tok mak o, e pisvshke, im achi tok.

46. Mihma Nahlanael ash osh, Nana achukma kvt Nasalet a ai itolv kohcha hinla ho? im achi ma, Filip ash osh, Minti cha, ant pisá, im achi tok.

47. Chisvs vt Nahlanael vt i minti na pisa mvt, Yakeh! Islael hatak ahli fehna kvt nana ilahobi keyu mak oke, achi tok.

48. Mihma Nahlanael ash ot, Katiohmit is svthana cho? im achi ma, Chisvs vt afalaminchi mvt, Filip vt ont ik chi hoyo kisha ho, fik vpi nuta ya ish asha kak o, chi pisa li kamo, im achi tok.

49. Mihma Nahlanael ash ot afalaminchi mvt, Labbai ma! chishno ak osh Chihowa Ushi chivshke; chishno ak osh Islael okla i miko chivshke, im achi tok.

50. Chisvs vt afalaminchi mvt, Fik vpi nuta ya ish asha ho chi pisa li tuk achi li kak o, chi yimmi há cha? nana kvt ilvppa i shahli fehna ka ish pisa hi oke, im achi tok.

51. Mihma, Ahlishke, ahli mak o chim achi lishke, Himak a pilla vba yvt tiwa na Chihowa im enchil vhleha hvt Hatak Ushi a auet ai akohowa, anonti vba pit ai ihiya aienka, ish pisa hi oke, im achi tok.

C H A P T A 11.

Kana ak o nan-itauwayvchi asha ho Chisvs vt oka kapussa atuk a oka pakib, 1; 12 Chelusalem a ona cha, na chumpa vhleha, micha na kanchi vhleha aienka tempel anyukaka aiasha tuk a kocha pit yuhli; 23 yohmi ma Chisvs vt na fehna yvmihinchu ho pisa hatuk mak osh lauvt i yimmi.

1. ATUK o nitak ont atuchina ma Kalili yakni Kana a nan-itauwayvchi vt asha tok: mihma Chisvs ishki vt yummma ont anta tok.

2. Mihma Chisvs, micha nan im ai ithvna vhleha aien a kvt nan-itauwayvchi a aya hi a, im annoa tok.

3. Atuk o oka paki vt ont ai ik im ikshot taha ma, Chisvs ishki vt yummak ash o, Oka paki vt okla ik im ikshoshke, im achi tok.

4. Chisvs ash ot, Ohoyo ma! uno vt nanta isht a chi ahalia li cho? hvshi kanvlli vm ai vlpisa hvt ik ai ono kisha hoke.

5. Ishki ash ot nan-isht asha vhleha hash, Nana ho hvchim achikma, hvsh yvmihchashke, im achi tok.

6. Mihma Chu okla ai ymohmi yatuk osh isht il ai achi fa ya tuk, teli shuti oka ai-vlbeha hannali kvt, fvkin tuklokmá, tuchinakmá nana ai vlhto aiyuka hosh yummata lohmaya tok.

7. Atuk o Chisvs ash ot, Shuti oka ai-vlbeha ya oka oh alotolí, im achi tok. Mihma yummak ash o okla alotolit iti-vlbi vhlichi tok.

8. Mihma, Inta! ho bicheli cha impa pehlichi ya ishit oh im ia, im achi tok. Mihma okla ishit im ia tok.

9. Mihma impa pehlichi ash ot oka oka paki toba tuk ash ishkot pisa cha, kaniohmi hosh toba tuk a ik akostinincho mvt, yohmi kia nan-isht asha vhleha oka ochi tuk okvo ithana ho, impa pehlichi ash ot himona ohoyo itauwaya ash hoyo tok.

10. Yohmi mvt, Hatak moma kvt vmmona ka okapaki achukma ka talohli chatuk; atuk osh hatak vt ishkot fiopak mak o, okpulo yak oh chatuk; amba chishno vto oka paki achukma ya ish il atomba na himak atoshke, im achi tok.

11. Na fehna yvmihchit isht ai vmmona kvt ilvppak o Chisvs vt Kalili yakni Kana yak o ai yvmihchit, ilap im a holitopa ya otvninchi tok; mihma nan im ai ithvna vhleha hvt i yimmi tok.

12. Ai yakohmi ha ya, yummak ash ot, ishki, micha itibapishi vhleha, mikmvt nan im ai ithvna vhleha aienvt Ka-

penavm a ilhkoli tok; atuk osh nitak kanohmi keyu ho ont maya tok.

13. Mihma Chu okla i nan-ubanublit ont ia yvt ai ona hosi hatuk o, Chisvs vt Chelusalem a ia tok.

14. Atuk osh tempel anukaka yä wak, chukfulhpoba, micha puchi vlpoba aien a kanchi vhleha, mihmvt tuli holisso itatoba aien a kvt binohmaya na pisa tok.

15. Mihmvt aseta chipunta yo isht fuma ikbi cha, yvm-mak ash, chukfulhpoba, micha wak puta aien a kash mom-inchit tempel a a kocha weli tok; mihmvt tuli holisso itatoba vhleha in tuli holisso ash aka fohopli mvt, anonti ai-impa tuli holisso ai-itatoba puta kash kinahliche tok.

16. Mihmvt puchi yoshuba vlpoba kanchi vhleha hatuk ash o, Ilvppa kanima ishit oh ia cha, Aki in chuka yano na-na ai-itatoba chuka huch ik ikbo kashke, im achi tok.

17. Mihma, Chin chuka i hullo pulla kak osh vñ anuk-fila uhvlinchit ai ishit kaiyanchishke, achi hosh holisso ha tok a, nan im ai ithvna vhleha hvt ithaiyana tok.

18. Mihma Chu okla hash ot afalaminchi mvt, Nan isht atokowa nanta ho ish pim otvninchi hosh ilvppa puta ka ish yakohmichi cho ? im achi tok.

19. Mihma Chisvs ash ot afalaminchi mvt, Tempel ilvppa oh okpvni ; atuk ma nitak tuchinakma falaminchit ikbit hilechi lashke, im achi tok.

20. Yohmi ma Chu okla hash ot, Tempel ilvppvt afvmmi pokoli ushta akocha hannali ho tobvt vlltaha tok: yohmi ka chishno vto nitak tuchina ho falaminchit ikbit ish hilecha hinla cho ? achi tok.

21. Yohmi kia yummak okvt ilap haknip tempel ak o isht anumpuli ha tok.

22. Yohmi tok o yummak ash ot illi tuk vt falamvt tani ma, ilvppa im achi tok a, nan im ai ithvna vhleha hvt ithaiyana tok; mihmvt Holisso Holitopa, micha Chisvs vt anum-pa anumpuli tok aien ka okla yimmi tok.

23. Ubanublit ont ia isht ashut impvt maya nitak o, yvmmvt Chelusalem a anta cha, na-fehna puta ka yvmihinchi na okla pisa mvt, lauvt i yimmi tok.

24. Yohmi kia Chisus vt hatak moma ka ithana hatuk okut ik i yimmo ki tok.

25. Micha nana hosh hatak a anukfoyuka ka ithaiyana hoka, kuna kia hatak a isht atokolit im anola he vlhpesa keyu ki tok.

CHAPTA III.

Chisus vt Nikotemus a it im anumpuli; yohmi hosh atuklanchit vutta hi oka ai vlhpesa hatuk, 1 ; 14 micha kaniohmi kia ilapvt ititaiyuhvna a takalit illa hi a ai vlhpesa hatuk aieno; 16 mikmvt Chihowa hvt hatak a i hullo ka, 18 micha Chihowa ik im antio vhleha hvt nan i palvmma he aieno ka anoli. 22 Chan vt Klaist nan-isht a holitopa ya, micha yummma i yimmi hatuk okvto ai okchaya he.

1. HATAK vt Falisi yosh Nikotemus hohchifo hosh, Chu okla pehlichi yosh ahanta tok.

2. Atuk osh yummak ash ot ninak o ayvt Chisus a im vla cha, A shahli ma ! chishno ak osh nan ithvnanchi yosh Chihowa ak o ish a minti ka il ithanvshke; Chihowa ak osh ik apelachokma, hatak nana hosh na-fehna ilrppa puta ish yvmihinchi ka, yvmihcha he keyu hoka, im achi tok.

3. Chisus vt afalaminchi mvt, Ahlishke, ahli mak o chim achi lishke, Hatak vt atuklant vutta keyukmvt, Chihowa apehlichika ya pisa he keyu hoke, im achi tok.

4. Nikotemus ash ot, Hatak vt sipoknit taiyaha kvt kati-ohmi kak osh vutta hinla ho ? atukla ma ishki im oshuto ya pit chukowa cha, vutta hinla ho ? im achi tok.

5. Chisus vt afalaminchi mvt, Ahlishke, ahli mak o chim achilishke, Hatak vt oka, micha Shilombish ita-tuklo kak o isht ai vutta keyu hokvto, Chihowa apehlichika ya chukowa he keyu hoke.

6. Nipi yo a tobvt vutta hokvto, nipi yoke ; mikma Shilombish o a tobvt vutta hokvto, shilombish oke.

7. Atuklanchit hvsh vutta pullashke, chim achi li tuk a, okokko ! chik ahno kashke.

8. Mahli hvt kanima yo pit ai im vlhpesakmvt, pit mahlit fokka hokvno ish haklo kia, yummak o a minti hosh, anonti

yvmmak o ia, ish ai ahni keyu ka, Shilombish ak o a tobvt vta hokvto yvmmak inli kak o chiyuhmi bano hoke, im achi tok.

9. Nikotemvs ash osh afalaminchi mvt, Katiohmi kak osh ilvppa puta kvt yvmohma hinla cho ? im achi tok.

10. Chisvs vt afalaminchi mvt, Islael okla ha nan-ithvnanchi chia hokak osh, ilvppa puta ka chik ithano cho ?

11. Ahlishke, ahli mak o chim achi lishke, Nana ka il ithana mak osh il anumpuli : mikmvt e pisa tuk mak osh atokolit il anoli hoke ; yohmi ka nana atokolit il anoli ka ik hvchi yimmoshke.

12. Nana kvt yakni paknaka asha yo isht a hvchim anoli li ha ya tuk a, ik hvchi yimmo ke tuk vt, anonti nana kvt vba asha ho isht a hvchim anoli li hok mak o, katiohmit hvchi yimma chi cho ?

13. Yohmi ka hatak nana hosh vba ya ia tuk keyu ; amba vba ya mintit vla tok Hatak Ushi vba ya asha yvmmak ilvshke.

14. Yohmi ka Moses vt sinti a kowi anukaka ya vba takalichi tok a, yvmmak inli chiyuhmit Hatak Ushi vt vba takali pulla hi oke :

15. Yohmi na kvna hosh yvmma i yimmikmvt, ik illo hosh, amba ai-okchayvt bilia yo pisa hi oke.

16. Chihowa yvt yakni a i hullo fehna kvt, kvna hosh yvmma i yimmikmvt ik illo hosh, amba ai okchayvt bilia yo pisa hi o, Ushi achufa illa holitopa ya auet ima tok.

17. Yakni ak o ilbvshacha chi ho, Chihowa yvt Ushi a auet ima tok keyu hoka ; amba yvmmak atuk mak o yakni vt isht ai okchaya hi a tok ;

18. Kvna hosh yvmma i yimmi kvt, isht ai ilbvsha he anumpa hvt onvtula keyu hoke : amba kvna hosh i yimmi keyu hokvto, Chihowa Ushi achufa illa holitopa hohchifo hatuk a i yimmi keyu kvt, isht ai ilbvsha he anumpa hvt onvtula mashko hoke.

19. Yohmi ka tohwikeli hvt yakni a ant iba chukowa ma, ilap nana a kaniohmi ai vlhpesa keyu hatuk okvt, hatak vt ai okhlilikayak osh im ai achukma kvt atohwikinli ka.

im i shahli, ilvppak o isht ai ilbusha he anumpa hut onvtula hoke.

20. Nan ik ai vlhpeso ya a yohmi aiyukali vt atohwakinli ka i nukkillikmvt, anonti ilap nana a kaniohmi yvt otvnit ik hofahyalo ka hinla ka, atohwakinli ka ik ono chatuk oke.

21. Amba kuna hosh nan-ai ahlika yo a yohmi yokvto, ilap nana a kaniohmi yvt Chihowa yak atuk mak o isht a yvmohmi tuk vt otvna chi ka, atohwakinli ka ona chatuk oke, im achi tok.

22. Nana kvt ai yakohmi ha ya, Chisvs vt nan im ai ithvna vhleha ha it apihvt Chutea yakni a ai vla tok; mihma takla yummak o antvt baptismochi tok.

23. Mihma Chan ak kia Salim i bilika Enon yummak o oka vt laua hatuk o, baptismochit ahanta tok: mihma okla hut ai vlv baptismochi tok.

24. Chan vt aboha kullo ik fohko kisha ha tok.

25. Yohmi ma Chan nan im ai ithvna vhleha kanimi, micha Chu okla aien a kvt na-baptismo a isht ai it im asilhhuchit maya tok.

26. Mihmvt Chan a ai im ai vlv, Nan-ithvnanchi ma! Chatan misha ya a chi awant aya tok yummak o nana ai atokowa isht ish anohonli kash, yummak fehna kvt baptismochonchi ho, okla momvt im ai itahohombvshke, im achi tok.

27. Chan ash ot afalaminchi mvt, Uba yak o auet ai ima ho keyukma, hatak vt nana ho ilap inli kvt isha he keyu hoke.

28. Uno vt Klaist mak o sia keyu: amba itikba aya a si vlhtoka hatuk oke; achi li tok a huchishno fehna akinli kvt ai atokowa ka hvs svn ithanvshke.

29 Ohoyo himona hatak auwaya ka ilaueli kak osh, yummvt hatak himona ohoyo itauwaya mak oke: amba himona ohoyo itauwaya i kana hokvto himona ohoyo itauwaya anumpuli pulla kak o hikivt i haponaklot isht a yukpa chinto hoke: yohmi ka na sai yukpa ilvppvt isht aiahli mak oke.

30. Yummak okuto isht i shahlit mahaya he vlhpesakma, amba vno vto ak a lauwot mahaya la he vlhpesa hoke.

31. Uba ya a minti yummak okuto moma ka i shahli hoke: yakni yak o a minti hokvto yakni yakinli; mikmut yakni yak o ai isht anumpuli hoke; uba ya a minti yummak okuto moma ka i shahli hoke.

32. Micha nana ka pisa tuk; mihmvt haklo tuk aienamak osh yummak ash atokolit anumpuli hoke; yohmi kia nan ai vlhtokowa anohonli ka, hatak nana kia ik yimmoshke.

33. Kuna hosh, yummvt nan ai vlhtokowa anoli ka yimmit aiokpvchi hokvto, Chihowa yvt aiahli ka, aiahlichi hosh yimmi hoke.

34. Chihowa yvt atohno tok a, yummak okvt Chihowa im anumpa ho anumpohonlishke; yummak oka Shilombish vt vlhpisa ho Chihowa yvt ihima keyu hoka.

35. Iki vt Ushi a i hullo kvt nan okluha ka yumma ibbak o foikhishke.

36. Kuna hosh Ushi a i yimmi hokvto ai-okchayvt bilia ya pisa hoke; mikma kuna hosh Ushi a i yimmi keyu hokvto, ai-okchaya ya pisa he keyu; amba Chihowa nan-isht ai i nukkilli yak osh onvtuyula hoke, achi tok.

CHAPTA IV.

Chisvs vt Samalia ohoyo ho ai okchaya oka ak o isht im anumpuli hosh 1, 26 ilap ak osh Klaist mak atuk vt il anoli; 28 mihma ohoyo hash ot falamvt tvmaha ha ona cha, yummak atuk a okla ha im anoli; 39 mihma okla hash ot na yimmi. 43 Chisvs vt falamvt Kalili a ona tuk osh Kana ak o anta hosh, hatak holitompa ushi vt abeka hosh Kapenavm ak o itonla ka, pit hlakofichi.

1. CHISUS vt nan ithvna vhleha ikbit baptismochi kvt, Chan a i shahlichi ka, Falisi vhleha hvt haklot maya ka, Chitokaka yvt akostininchu hatuk osh,

2. Chisvs vt ilap inli kvt baptismochi keyu ho, amba nan im ai ithvna vhleha hak atuk ak o,

3. Chutea yash issvt Kalili yash inli ho anonti ia tok.

4. Yohmi kvt Samalia ya pit hlopullit maya he vlhpesa tuk a tok.

5. Atuk osh Chekob vt ushi Chosef a osapa ima tok ta-

laia ka bilika, Samalia yakni tumaha Saika hohchifo hq, vla tok.

6. Yohmi ma Chekob i kvli hvt yvma hikia tok ; yohmi hatuk o Chisvs vt nowvt ayvt hoyvblu mvt, hvshi kanvlli isht vlpisa ont hannali foka hatuk o, kvli yummak ash yakohmit a bininli tok.

7. Atuk o Samalia ohoyo hvt oka ochit aya hosh yummak ash o vla ma, Chisvs ash ot, Supeta na ak ishkó, im achi tok.

8. Nan im ai ithvna vhleha hamo ilimpa chumpvt tumaha ilhkoli tuk a tok.

9. Yohmi ma Chu okla hvt Samalia okla ha nan ai itim ahalaia keyu chatuk oka, Katiohmi hq Chu chia hokak osh, vno vt Samalia ohoyo sia ha oka is svu asilhha cho ? im achi tok.

10. Chisvs ash ot afalaminchi mvt, Chihowa i na-hvlbena ha, micha kvna hosh, Supeta na ak ishkó ; chim achi aiena ka ish ithana hatuk okmvt, ilapo ak o ish im asilhha na yummak okvt oka okchaya yo chipeta he tuk oke, im achi tok.

11. Mihma ohoyo hash ot, A shahli ma ! isht ish ocha hi vt nana kia ik chim iksho hq, anonti kvli hvt hofobishke ; yohmi ka katimak o oka okchaya yummak ish ai ishi hosh ?

12. Chishno ak osh piki Chekob vt ilapo inli, micha im vlla vhleha, mikmvt i wak aienvt ai ishko yatuk vt kvli ha pima tok a ish imaiya hotuma ! im achi tok.

13. Chisvs vt afalaminchi mvt, Kvna hosh oka ilvppa ishko tukmvt, anonti itukshila he ;

14. Amba kvna hosh oka ya ipeta la chi yummak o ishko hokuto, nitak nana itukshila he keyu ; amba vno ak osh oka ya ipeta la chi hokuno, yummak atuk ma a foyukvt tobohonli na nitak bilia hi oke im achi tok.

15. Ohoyo hash ot, A shahli ma ! oka ilvppa is supeta na ik svukshilokmvt, anonti ochit aya kvt ilvppak o ak lo kashke, im achi tok.

16. Chisvs ash ot, Ia cha, chi hatak a ont i howvt vlá, im achi tok.

17. Mihma ohoyo hash ot afalaminchi mut, A hatak vt ikshoshke, achi ma, Chisus vt, A hatak vt iksho, ish achi kvt, vlpesa ish mihvshke.

18. Hatak vt tahlapi hosh chim asha tuk osh, anonti himonasi a chim asha kuto, chi hatak atuk o keyu hoka, yummak okvno aiahli mak osh ish mihvshke, im achi tok.

19. Ohoyo hash ot, A shahli ma! hopaii chia hatuk o chi akostininchli lishke.

20. Pin tikba vhleha hvt nvnih ilvppak o asht Chihowa pit aiokpahanchi tok : a tok ak o hvchishno vto Chelusalem a ashvt hatak puta kvt Chihowa pit aiokpahancha he vlpesa hatuk a ish mihvshke, im achi tok.

21. Mihma Chisus ash ot, Ohoyo chia mut is sa yim-mashke ; nvnih ilvppa, micha Chelusalem aienak kak kia mayut Iki a pit hvsh aiokpvcha he keyu ka hi a hvshi kanvlli vlpisa hvt mihinti hoke.

22. Hvchishno vto yummak o hvsh ahni keyu hosh pit hvsh aiokpvchishke ; isht-ai-okchaya hi vt Chu okla immi hoka, pishno vto nana ho pit il aiokpvchi hokvt il ithana hoke.

23. Yohmi kia Chihowa pit aiokpvchi aiahli vhleha hvt shilombish, mikmut aiahli aienak mak o isht aiokpahancha hi a, hvshi kanvlli at vlpisa hvt mihinti ho, anonti himonasi a vla hoke : yummma chohmi hosh ilapa aiokpvcha he ak o Iki vt hoyo hoka.

24. Chihowa yvt Shilombish oke : yohmi ka kvna hosh yummma pit aiokpvchi hokvt shilombish, mikmut aiahli aienak mak o isht aiokpvchi pullashke, im achi tok.

25. Ohoyo hash ot, Messias, Klaist hohchifo kvt, vla hi a ithana lishke, yummvt vla hok mak osh, nana moma ka pim anola hi oke, im achi tok.

26. Chisus ash osh, Uno vt chim anumpohonli li kak osh mihi yo sia hoke, im achi tok.

27. Mihma nan im ai ithuna vhleha hash ot ilvppa atak-lama ma ai vla cha, yummvt ohoyo ha it im anumpuli tuk a, okla anukhlakanchi tok : yohmi kvt hatak achufa kia, Nanta ho ish hoyo hosh ? Katiohmi ho yummma ish it im anumpuli cho ? achi kia iksho ki tok.

28. Yohmi ma ohoyo hash ot isht-ochi ash talali cha, iwt tvmaha ont chukowa mvt, hatak puta kash,

29. Yakeh ! hatak vt nana ho a kaniohmi li tok a mominchit vm anoli ka ant ho pesá, ilvppvt Klaist mak o keyu ho ? achi tok.

30. Mihma tvmaha hash a kohchvt iwt, yummak ash okla im ai ona tok.

31. Yohmi takla ma nan im ai ithvna vhleha hash ot, Pi shahli ma ! impá, achit im asilhha tok.

32. Yohmi kia, Ilhpak vpa la chi kvt vm asha yummak oka hvch ik akostininchoshke.

33. Yohmi hatuk o nan-ithvna vhleha hash ot, Upa chi ka hatak nana kia isht im vla tuk atuk o ? it im achit maya tok.

34. Chisvs ash ot, Auet sa kanchi tok nan ahni kak o a yumohmi, micha i na-toksvli atahli aienak osh vm ilhpak oke.

35. Na-hoyo ai vlhpesa chi ka hvshi ushtvt asha moma, hvsh achi keyu ho ? yakeh ! oh vba chakali cha, osapa puta kvt himonasi ak kia a hoyo he ai ona kvt tohmbi ka ho pesá, hvchim achi lishke.

36. Na-hokchi, micha nan vmo ita-tuklo kvt itibai yukpa chi ka, nan vmo yash ot vlhtoba ha ishi hosh ai okchayvt bilia na-waya ya hoyo hoke.

37. Yohmi ka achvft hokchi okma, anonti achvfa hosh vmo, achi tok a yummvt aiahlishke,

38. Hvchishno vt hvsh a toksaiali tok keyu kvt hvsh ai vma chi ka, pit hvchi tihleli li tuk : hatak inla yosh toksvli tuk o, im a toksvli yash pit hvsh chukowa tuk oke, im achi tok.

39. Mihma ohoyo hvt nana vlhtokowa ka anolit, Nana ho a kaniohmi li tok a mominchit vm anolishke, achi ka Samalia okla tvmaha asha tuk vt lauvt yummak ash isht ai i yimmi tok.

40. Yohmi hatuk osh Samalia okla hvt yummak ash im ai vla mvt, tákla anta hinla ka im asilhha tok ; mihma yuma- ma anta na nitak tuklo tok.

41. Mihma ilap fehna akinli im anumpa hatuk o himakma yimmi kvt laua tok.

42. Mihmut ohoyo hash o, Himak ano pi yimmishke, chishno ak osh nan ish anoli kak o keyu; pishno akinli hosh il ai i haponaklo cha, iluppak osh Klaist, yakni okchalinchi mak atuk pulla ka il akostininchishke, im achi tok.

43. Nitak tuklo ont vbanvpa ma yummak ash kohchvt ia mvt, Kalili a ona tok.

44. Chisvs akinli kvt hopaii vt ilap i yakni akinli ka a holitopa hi vt ik im iksho ka, vlhtokowa anoli tok.

45. Micha Kalili ash vla ma, Kalili okla hvt yummak kia impa holitopa ya itvnova hatuk osh, impa holitopa isht asha yummvt Chelusalem a nana puta ka a yumihchi tuk mominchit pisa tuk okvt, yummak ash o okla aiokpvchi tok.

46. Yohmi hatuk o Chisvs ash ot Kalili yakni Kana yummak o oka ya okapaki ai ikbi tok ash ot, anonti ona tok. Mihma hatak holitompa achvfa hosh ushi vt abeka kvt Kapenaum a itonla tok.

47. Atuk osh, Chisvs vt Chutea ya a kohchvt ayt Kalili vla ka, haklo mvt, yummak ash im ona cha, ushi vt illa hosi hatuk o, ivt ont hlakoficha hinla ka, im asilhha tok.

48. Yohmi ma Chisvs ash ot, Nan isht atokowa, micha na-fehna aiena ho hvsh pisa ho keyukmvt, hruchi yimma he keyushke, im achi tok.

49. Mihma hatak holitompa hash osh, A shahli ma! um vlla vt ik inlo takla ish onashke, im achi tok.

50. Mihma Chisvs ash ot, Chiso hvt okchaya hoke; ish iashke, im achi tok. Mihma hatak ash ot, Chisvs vt im anumpuli ka anumpa ha yimmi cha, ia tok.

51. Atuk osh ia hosh aya ma, nan isht im asha vhleha hvt afama cha, Chiso hvt okchayvshke; achit im anoli tok.

52. Mihma hvshi kanvlli vlhpisa yvt kaniohmi kak o pit nuktanlut isht ia tuk a im a ponaklo tok. Mihma, Pilashash hvshi kanvlli vlhpisa ont isht untuklo kak o yvnha hvt shipa tuk, im achi tok.

53. Yohmi ma iki ash ot, Chisvs vt, Chiso hvt okchaya hoke, im achi tuk hvshi kanvlli vlhpisa vt yummak fehna

akinli tuk a ithana tok ; micha ilapo fehna, mikmvt in chuka chufa yvt a momvt yimmi tok.

54. Chisvs vt Chutea ya a kohchvt ayvt Kalili a vlv, anonti na-fehna ka ai yimihchi kvt ilvppvt ont atukla ha tok oke.

C H A P T A V.

Chisvs vt Chelusalem a ona tuk osh, nitak hullo nitak o Behlesta oka talaia ho hatak vt abeka tok a afvmmi pokoli tuchina akocha untuchina tuk a a hlakofichi, 1. 10 Chu vhleha hvt, Chisvs vt nitak hullo yo na hlakofichi hatuk o, vbi bvnna ma ; 17 Chisvs ash osh ilapvt Chihowa ya Ushi yatuk okvt yvmmak oka yvmmihcha he im ai vlpesa-hosh yvmmihchi tuk vt anoli. 32 Chisvs vt ilapvt Chihowa Ushi pulla hatuk a, Chan vt atokolit anoli ma, 36 atukla ma ilapo inli kvt nana kvt a fehna kia yvmmihinch ka isht otvni ; 39 Baibil vt yvmmma atokolit anoli akinli hoke.

1. ILUPPUT ai yakohmi ha ya, Chu okla impa holitopa hvt asha tok : mihma Chisvs vt Chelusalem a ia tok.

2. Yohmi ka Chelusalem a chukfvlpoba a kanchi i bili-ka yvmmak o ai-yupi vt Heblu hohchifo hosh Behlesta yosh i hoshontika tahlapi hosh talaya hoke.

3. Yakohmi ka hatak iksitopo, ik hoponayo, imomokpulo, nipi vt ikshot kvnia puta aien aien kvt laua fehna hosh oka piakvicha chj ka, im aiehchi hosh kahvt maya tok.

4. Enchil vt kaniohmikma ayvt, ai yupi ash oka ont piailichi hatuk o ; yohmikma kvna hosh oka vt piakvchikma, tjkba pit okvtulakmvt, abeka nana ho isht abeka hatuk kia hlakofi beka tok.

5. Yohmi ho hatak achufa kvt iksitopo ik nowo tok a afvmmi pokoli tuchina akocha untuchina hosh yvmmma itonla tok.

6. Yvmmak ash ot itonla na Chisvs vt pisa mvt, ai yvmmi tok vt hopaki fehnvt taha ka ithana hatuk osh, yvmmak ash o, Chi hlakofa hi a ish ahni cho ? im achi tok.

7. Mihma hatak iksitopo ik nowo yash ot afalaminchi mvt, A shahli ma ! hatak nana kia oka yvt piakvchikma, ai-yupi a pit si okvicha hi vt ik sum ikshoshke ; yohmi hatuk o maya

li taklakma, inla yosh sa tikba okvtula beka hoke, im achi tok.

8. Chisvs ash ot, Tanit, chi potvlhpo ya ishi cha, nowá, im achi tok.

9. Yohmi ma ashalika fehna hatak ash ot hlakofi cha, i potvlhpo ash ishi mvt, nowa tok; mihma nitak yvmmma fehna kvt nitak hullo ya tok.

10. Yohmi hatuk o Chu okla hvt na hlakofi tuk yvmmak ash o, Nitak hullo yoke; chi potvlhpo a isht ish aya he ai vlhpesa keyu hoke, im achi tok.

11. Mihma yvmmak ash osh afalaminchi mvt, Na sa hlakofichi yvmmak osh, Chi potvlhpo ya ishi cha, nowá, um achi tuk oke, im achi tok.

12. Mihma yvmmvt, Hatak nanta hosh, Chi potvlhpo ya ishi cha, nowá, chim achi tuk oh cho? achit okla im asilhhuchi tok.

13. Yohmi ma okla laua yvt yvmmma asha hatuk o, Chisvs vt lumvt a kvnia tuk atuk a, na hlakofi tuk ash ot kvna ak atuk a ik ithano ki tok.

14. I himmakma Chisvs vt yvmmak ash o tempel anuka-ka ya a pisa mvt, Yakeh! chi hlakofi hokvt, nan okpulo i shahli kvt ik chi onvtulo ka chi kvt, himmak vno ik chi yoshubo kashke, im achi tok.

15. Mihma hatak ash at kohchvt ia mvt, hlakofichi tuk vt Chisvs ak atuk a, Chu okla ha ont im anoli tok.

16. Yohmi hatuk o Chu okla hash osh, Chisvs vt nitak hullo nitak o yvmmma yvnihechi tuk o, yvmmak ash i nukkil-lit vbi bunvt maya tok.

17. Yohmi kia Chisvs vt, Aki vt toksahanli na himak a kak o, vno vt toksvli li hoke.

18. Yohmi ka yvmmvt nitak hullo ya kobuffi kak o illa keyu, amba Chihowa yak osh Iki yo mihvt, Chihowa ya ilapinli kvt itilaui ho isht il ilapissa aieno hatuk o, Chu okla hvt yvmmak ash vbi bunna kvt i shahlichi tok.

19. Mihma Chisvs ash osh afalaminchi mvt, Ahlishke, ahli mak o hvchim achi lishke; Ushi yvt ilapo inli hokvto nana kaniohma he keyu, amba nana ho Iki vt yvnihechi ho,

pisa tuk mak oh chatuk oke ; nana ho yummak osh a yohmik mak o, Ushi yak kia yummak o ai yohmi akinli hoke.

20. Iki vt Ushi a i hullo hatuk osh, ilapvt nana ho a kaniohmi kvt mominchit yummma im otvninchi chatuk ; yohmi kvt hvchi nukhlakancha chi ka, nana kvt ilvppa i shahli fehna ka im otvnincha hi oke.

21. Iki vt illi a tanichit okchalinchi chatuk a, Ushi vt yummak inli ho chohmit kvna ho ilap ahni hosh okchalinchi hoke.

22, 23. Iki vt hatak kvna kia nana ka im apesa keyu hoka ; amba hatak vt momvt Ushi a holitobli kvt, Iki a holitobli kak inli hosh ai itilauecha chi ka, nan-vlhpisa he putaka mominchit Ushi ak o im issa hoke. Kvna hosh Ushi yash ik holitoblokvt, yummma auet kanchi tuk Iki ash ik holitoblo hoke.

24. Ahlishke, ahli mak o hvchim achi lishke ; Kvna hosh um anumpa ha haklo cha, auet sa kanchi tok a pit i yimmi hokvto, ai-okchayvt bilia ya ahayuchi ; mikmvvt isht ai ilvusha he anumpa hvt ik onvtulo ka hi oke : amba ai-illi ha a kohchvt ai-okchaya yo ona hoke.

25. Ahlishke, ahli mak o hvchim achi lishke ; Illi yvt Chihowa Ushi im anumpa ha hakla he hvshi kanvlli ai vlhpisa kvt mihintit, himonasi ak kia vlvshke ; yohmi ka haklo hokvto, yummvt okchaya he mak oke.

26. Iki vt ilapvt kaniohmit ai-okchaya ya ilap inli il ai ishi hokvt, yummak inli ho chohmit Ushi vt ilap inli il ai isha chi ka, im apesa hoke :

27. Micha yummak okvt Hatak Ushi atuk oka, nan apesvt ahanta he isht ai vlhpesa ka im apesa hatuk oke.

28. Hvshi kanvlli ai vlhpisa kvt mihinti yummak okvno a-hollopi ya vlbehvt maya kvt, momvt yummma im anumpa ha haklo cha, kocha wiha he ;

29. Kvna hosh ai vlhpiesa ho yvmohmi tok okvto okchaya chi mak osh tana he ; anonti kvna hosh aivlhpesa keyu ho yvmohmi tok okvto, nan isht ai i palvumma chi mak osh tana hi oka, ilvppa hvch ik anukhlakancho kashke.

30. Uno akinli hokvto nana ho kaniohmi la he keyu ; na-

na ka haklo lik mak osh apesa li; yohmi kut vno vm anuk-fila ho hoyo li keyu, amba Aki auet sa kanchi tok im anuk-fila ak oka, nan apesa li kut ai vlhpiesa hoke.

31. Uno akinli hosh nan il atokolit anoli li hokmuno, nan il atokolit anoli li kut ik ahlo hoke.

32. Na si atokowa anoli kut inla hosh asha kut, yummvt nan atokowa isht si anoli ka nan vlhtokowa aiahli mak oka ithana lishke.

33. Chan a nan i ponakla chi ka, pit hvsh tihleli ma, yummak ash ot aiahli ka atokolit anoli tok.

34. Yohmi kia hatak osh nan atokowa anoli ho, hoyo li keyu hoke; yohmi kia hvchishno yak osh a hvchi okchaya chi kak o, ilvppa puta ka achi li hoke.

35. Yummak okut pula lua yosh shohmalalit tohwikeli ya tok: yohmi ma hvshi kanvli vlhpisa achvfa kvno in tohwikinli ka nan isht il aiyukpa ka hvsh abni tok.

36. Yohmi kia nan atokowa si anoli kut Chan a i shahli-chi kut asha hoke; na toksuli atahli la hi o Aki vt vm apesa tok o, na toksuli ho isht ahanta li ka yummak osh, Aki vt auet sa kanchi tok o mvhli ka, atokowa si anohonli hoke.

37. Mihma Aki vt auet sa kanchi tok vt, ilapvt ai atokowa ka si anohonli tok. Nitak kaniohmi kash o yummma im anumpa ha hvsh im antia tok keyu mvt, anonti kaniohmit otaiyani ka hvsh pisa tok keyushke.

38. Mihma im anumpa hvt hvchi anukfoka keyu hoke: auet sa kanchi tok ash yummma hvsh i yimmi keyu hoke.

39. Holisso Holitopa ya achukmalit asilhhit ho pihisá: yummak o ai okchaya yvt a hvchin takali ka hvchim ahoba-hatuk okut, micha yummak osh ai-atokowa ka si anohonli mak oke.

40. Yohmi ka vm vlt ai-okchaya ya hvsh pisa hi vt hvch ik ahno kvmohmishke.

41. Hatak o ai im a holitopa hi ano ahni li keyushke.

42. Yohmi kia Chihowa holitobli kut hvchi anukfoka keyu ka, hvch ithana lishke.

43. Uno vt Aki i hohchifo ho aya li ma, hvch ik si ahnin-

choshke ; inla yosh ilap i hohchifo akinli ho aya hokmuno, yummak o hush ahnincha hinlvshke.

44. Ilap bi^{ka} ai it im aholitopa yak o hush aiahni cha, Chihowa ak illa ai im a holitopa hi ano hush ahni keyu kvt, katiohmi kak osh hvchi yimma hinla cho ?

45. Anumpa hvchi onochit Aki a im anoli la hinla ka, ik hvchim ahobo kashke ; amba hvsh anukchieto tuk Moses ak osh anumpa hvchi onochi hoke.

46. Moses a hvsh i yimmi tok okmvt, vno a hvsh sa yimma he tuk oke ; yummvt vno ak o isht a sa holissochi tok oka.

47. Amba yummvt holissohonchi tok a ik hvchi yimmo hokmvt, katiohmit um anumpa hak o hvchi yimma hinla cho ? im achi tok.

C H A P T A VI.

Chisvs vt prska lumbo tahlapi, micha nvni tuklo aien a tuk a hatak tahlepa sipokni tahlapi ka impvchi, 1. 14 Nan-ithvna vhleha ash ot okhvta ilhkoli tuk osh, mahli okpulo itafama ; yohmi tuk kia okhvta paknaka ya a nowrt maya hosh Chisvs vt ona. 27 Hatak vt imi shilombish ak o ilhpak im atahli brynnrt maya hi a i miha mvt, 32 ilap ak osh ai okchaya prska mak atuk vt miha. 65 Laua hosh ik im vlpeso mvt, issrt i filvmmi ; 66 Pita yvt auah tuklo nan im anukfila ka anoli hosh, Chisvs vt Chihowa ak o Ushi pulla ka yimmi ka anoli.

1. NANA kvt ai yakohmi ha ya, Chisvs ash ot Kalili okhvta, yummvt Tibelias okhvta ho pit tanubli tok.

2. Mihma abeka puta hatuk a nana ka ai i yvmihchit anta na pisa tuk ak osh okla laua fehnvt pit iakaiya tok.

3. Yohmi ma Chisvs vt nvnih chaha yo pit oiya cha, yummak o nan im ai ithvna vhleha hash pehlinchit binili tok.

4. Mihma vbanublit ont-ia Chu okla im impa holitopa yvt ai ona hosi tok.

5. Yohmi ma Chisvs ash ot vba chakalit, okla laua fehna

hosh im ai vla na pisa mvt, Filip ash o, Katima ko pvska ya il a chumpa na okla ilvppvt impa chi cho ? im achi tok.

6. Ilapvt nana a kaniohma hinla hokvto ithana hatuk osh, yvmmak o imomaka pisa hosh ilvppa achi tok.

7. Mihma Filip ash ot afalaminchi mvt, Pvska yvt iskvli tahlepa tuklo vlhtoba mak osh, momvt iskvtnosi aiyuka ho isha hinla kia, vlhpesa he keyushke, achi tok.

8. Nan im ai ithvna achvft, Antilu, Saimon Pita itibapishi hash osh,

9. Ulla himita yvt b al i palvska tahlapi, micha nvni chippunta tuklo aieno ho ishi kvt ilvppa ashvshke; yohmi mak osh laua fehna hoka, na katihma heto, im achi tok.

10. Mihma Chisvs ash ot, Okla ha ho binolichí, achi tok. Yvmmah vshuk vt asha fehna tok. Yohmi hatuk o hatak holhtina kvt tahlepa sipokni tahlapi foka hosh aka binohli tok.

11. Mihma Chisvs vt pvska yash ishi cha, vba pit aiok-pvchi mvt, nan im ai ithvna vhleha ha ima ma, nan im ai ithvna vhleha hash ot aka binohli tuk ash ima tok: mihmvt nvni mvt kaniohmi ho okla bunna hinla tuk a yvmmak atuk ash inli ho okla chohmichi tok.

12. Mihma okla hash ot kaiyut taha ma, nan im ai ithvna vhleha hash o, Boshulli vt atampvt asha ka oh itahobi, nansi kia ik kvnio kashke, im achi tok.

13. Yohmi na yvmmak ash ot b al i palvska tahlapi ka okla ai vpa ma im atampa tuk boshulli asha ka, aiowvt itahobi mvt, kishi auah tuklo ka okla alotoli tok.

14. Yohmi ma Chisvs vt na-fehna ho yvmihchi na okla pisa mvt, Ilvppak osh hopaii yakni ilvppa vla he tuk mak o pulla mvhlishke, achi tok.

15. Yohmi hatuk osh okla mintit iti halvllit ishit, miko ikba hinla ka, Chisvs vt akostininchí mvt, filvmmmit ilap bieka hosh nvnih chaha yo anonti ia tok.

16. Atuk o opivt taha ma, nan im ai ithvna vhleha hash ot pit okvtahvt okhvta ho ona tok.

17. Micha peni ont vlhbeha mvt, Kapenavm imma ia hosh

okhvta ha asht aya tok. Atuk o ont okhlilit taiyaha ka, Chisvs ash ot ik im ayo kisha tok.

18. Mihma mahli chito yosh mahli hatuk o, okhvta hash ot poakahanchi tok.

19. Yohmi hatuk o peni ash okla mof kvt, kowi tuchi-nakmá, keyukmvt ushtakmá, nana foka ho ona mvt, Chisvs vt okhvta paknaka a nohowa hosh peni ash i bilika ona na okla pisa tok; yohmi mvt okla nukshopa tok.

20. Yohmi kia yummak ash ot, Hvchi nukshopa ná, vno sia hash oke.

21. Mihma okla na yukpa fehnvt yummak ash o peni ash ik chukowá, okla im ahni tok; atuk o peni ash ot chekosi fehna okla ai ona he tuk ash yakni a ont ataiya tok.

22. Ont onna ma okla okhvta mish tvnnvp hiohmaya kvt, peni inla mvt yamma iksho ho, achvfa yummak illa tuk o nan im ai ithvna vhleha hvt vlbeha tuk; yohmi ka Chisvs vt nan im ai ithvna vhleha ha takla peni ont ik chukowo ho, amba nan im ai ithvna vhleha ak bano hosh ilhkoli tuk a, pisa mvt;

23. Yohmi kia Chitokaka yvt puska vba pit ai isht aiok-puchi na okla ai impa tuk a pit bilika Tibelias a a minti kvt peni inla kanohmi hosh vla tok.

24. Yohmi hatuk a Chisvs, micha nan im ai ithvna vhleha aiena kash ot yummak ash iksho ho okla akostininchí mvt, yummak kia peni inla kanohmi kash vlbeha cha, Chisvs a hoyot, itvnovvt Kapenavm a okla ai vla tok.

25. Mihmvt okhvta ha mish in tvnnvp o anta na okla ont pisa mvt, Pi shahli ma ! katiohmi kash o ilvppa ish la tuk oh cho ? im achi tok.

26. Chisvs vt afalaminchi mvt, Ahlishke, ahli mak o hv-chim achi lishke; Nana a fehna puta ka yumihchi li ho hvs sa pisa tuk ak osh hvs sa hoyo kak keyu, amba puska ya hvsh pvt, hvchi kaiya tuk ak oke.

27. Ilhpak vt okpula hi okvno ahnit hvch ik toksgalo kashke; amba ilhpak vt ik taho hosh ai-okchayvt bilia ya ona hinla, yamma Hatak Ushi vt hvch ima he yummak ash-

ke: yummak o Iki Chihowa yvt ai atokolit ai im aiahlichi hatuk oke, im achi tok.

28. Yohmi ma okla afalaminchi mvt, Nanta ak o e kati-ohmi hosh Chihowa i na toksvli ha e toksvla hinla cho ? im achi tok.

29. Chisvs vt afalaminchi mvt, Auet sa kanchi tok yummak o hvch i yimmi ilvppak osh Chihowa i na toksvli mak oke, im achi tok.

30. Yohmi hatuk o okla hash ot, E pisa cha, e chi yimma chi kvno, na-fehna nanta ho ish yvmihchi ho ? nanta hak o isht ish ahanta cho ?

31. Pin tikba vhleha hvt chukushmi foka ya manna yo ai ahampa tok ; okla vpa chi ka puska vba minti ho ipeta tok, achi kvt holisso tok oke, im achi tok.

32. Yohmi ma Chisvs ash ot, Ahlishke, ahli mak o hvchim achi lishke, Puska vba minti yamma Moses ak osh hvch ipeta ha tok keyu ; yohmi kia Aki ak osh puska aiahli vba minti ka hvch ipeta hoke.

33. Uba mintit vla cha, yakni a ai-okchaya ihima kak osh, yvmmvt Chihowa i puska mak oke, im achi tok.

34. Yohmi ma, Chitokaka ma ! Puska ilvppak o ish pipi-hinta na biliashke, im achi tok.

35. Mihma Chisvs ash ot, Uno ak osh ai-okchaya puska ya sia mak oke : kvna hosh vno ak o vm vla hokvt nitak nana hohchufa he keyu ; micha kvna hosh vno a a yimmi hokvt nitak nana itukshila he keyu hoke.

36. Yohmi kia hvchishno vto hvs sa pisa kvt ik hvchi yimmo ka, hvchim anoli li tuk oke.

37. Aki vt vma hokuno momvt vm vla hi oke ; mikma kvna hosh vm vla hokuno, ik kaniohmi kia falaminchit kocha pit tobli la he keyu hoke.

38. Uba ya mintit vla li kvt, vno akinli nana vm anukfila hosh a ymohmi la he tok keyu hokvt, amba auet sa kanchi tok nan im anukfila ha he tok.

39. Yohmi kvt auet sa kanchi tok Aki vt vma tok moyuma ka achufa kia ik sa kvnio hosh, amba nitak ont ishtaiyopikma falaminchit tanichi la he ilvppak o im anukfila hoke.

40. Micha Ushi a pisa cha, yummak ash i yimmi hokvto, momvt ai-okchayvt bilia ya pisa he, ilvppak o auet sa kanchi tok vt aiahni hoke; yohmi ka nitak ont ishtaiyopikma yummak ash o falaminchit tanichi la hi oke.

41. Yummvt, Uno ak osh puska vba minti tok mak o sia hoke, achi hatuk o, Chu okla hash ot yummak ash o lumasit na-mihachit maya tok.

42. Mihmvt, Ilvppvt Chisvs, Chosef a Ushi yoh chokush keyu? mikma iki, micha ishki aienka iloh ithana keya ho? yohmi hokak osh katiohmi ho vba mintit vla li tok, achi cho? achi tok.

43. Yohmi hatuk o Chisvs vt afalaminchi mvt, Lumasit nan itiba mihvut hvch ik mayo kashke.

44. Hatak nana kia um vla he keyv, amba auet sa kanchi tok Aki ak osh halvlli hok mak a hi oke: mikma nitak ont ishtaiyopikma falaminchit tanichi la hi oke.

45. Mihmvt momvt Chihowa yak o nan im ai ithvna he, achi kvt hopaii puta i holisso ha a holisso tok. Yohmi hatuk o hatak vt Aki a im a haponaklot, nana ka im ai ithvna aiyuka hokvto, um ahanla hoke.

46. Hatak nana hosh Aki ak o pisa chatuk o keyu; Chihowa yak o a minti tok ak bano yummuto Aki a pisa chatuk oke.

47. Ahlishke, ahli mak o hvch im achi lishke, Kyna kia a yimmi hokvto ai-okchayvt bilia ya pisa hoke.

48. Uno ak osh ai-okchaya puska sia mak oke.

49. Hvchin tikba vhleha hvt chukushmi foka ya manna ai ahampa tok vt illi tok.

50. Puska ilvppak o hatak vt ai vpa cha, ik illo ka hi o, vba ya mintit vla tok mak oke.

51. Uno ak osh puska okchaya vba minti tok a sia mak oke; hatak nana hosh puska ilvppa vpa hokmvt, okchaya na bilia he; yohmikma puska ipeta la he, yummvt uno sa nipi yakni vt ai okchaya hi o, isht atobbi la chi kak oke, im achi tok.

52. Yohmi hatuk o Chu okla hash ot, Hatak ilvpput

katiohmi kak osh ilap nipi ya pipeta na e pa hinla ho ? achit itachowvt maya tok.

53. Mihma Chisvs vt, Ahlishke, ahli mak o hvchim achi lishke ; Hatak Ushi nipi ya vpt, im issish ma hvsh ishko keyu hokmvt, ai okchaya hi vt hvchi anukfoka keyu hoke.

54. Kvna hosh sa nipi a vpa cha, svssish ma ishko hokvto, ai-okchayvt bilia ya pisa hoke ; atukma nitak ont ishtaiyopikma falaminchit tanichi la hi oke.

55. Sa nipi vt ilhpak o fehnakma, svssish a ishka hi o fehna hoke.

56. Kvna hosh sa nipi a vpa cha, svssish ma ishko hokvt, vno a a subai achafakma, anonti vno mvt ilapa ai ibachafa li hoke.

57. Aki okchaya yut vno a auet sa kanchi tok o, Aki ak o vno vt ai okchaya li hatuk a, kvna hosh vno a svpa hokvt, yummak inli ho chohmit vno ak o si ai okchaya hi oke.

58. Ilvppak osh puska vba minti tok mak oke ; hvchin tikba vhleha hvt manna ya vpa tuk osh anonti illi tok a a chohmi ho keyu ; kvna hosh puska ilvppa vpa hokvto okchayvt bilia he mak oke, im ahanchi tok.

59. Kapenavm a nan ai ithvnanchit ahanta mak osh sinakak anukaka ya ilvppa puta ka ai ahanchi tok.

60. Yohmi hatuk o nan im ai ithvna vhleha hvt ilvppa haklot in taha mvt, lawa kvt, Ilvppvt anumpa kyllo fehnushke, kuta hosh haponakla hinla cho ? achi tok.

61. Nan im ai ithvna vhleha hvt yummak lumasit nan isht a miha ka, Chisvs vt ilapo inlit akostininch mvt, Ilvppvt hvchi ibetvblichi hoh cho ?

62. Yohmi kvt Hatak Ushi vt tikba ma ai vtta tok vba ya ia na hvsh pisa hok mvt ?

63. Okchalinchi vt shilombish ak oke ; yohmikma nipi vto nana ho isht ai vlhpesa keyu hoke ; anumpa hvchim anumpuli li yummak osh shilombish okmvt, anonti isht ai okchaya yoke.

64. Yohmi ka hvsh kaniohmi mvt ik yimmo kvt hvsh ashvshke, im achi tok. Ummonvt isht auehinchi kak inli ho kvna hak osh ik yimmo ka he, mikma kvna hak osh

ilapa ishit inla ibbak fohka he aienā ka Chisv̄s vt ithana tuk a tok.

65. Mihmvt, Yohmi hatuk o Aki ak osh anukfohkichi ho keyukma, hatak nana hosh v̄m vla he keyu hoke, hvchim achi li kvno, achi tok.

66. Yvmmak fehna kak o nan im ai ithvna vhleha hvt lauv̄t filamovt taha mvt, i himmak ma apehvt ik itvnowo ki tok.

67. Yohmi ma Chisv̄s ash ot auah-tuklo kash o, Hvchishno ak kia filvmmmit aya hi a hvchim anukfila cho ? im achi tok.

68. Mihma Saimon Pita yvt afalaminchi mvt, Kvta hak o il im ia hinla cho ? chishno ak osh ai okchayvt bilia isht anumpa ha ish ieshishke.

69. Micha chishno ak osh Chihowa okchaya Ushi, Klaist mak o chia pulla ka il ithanvt, pi yimmi fehna hoke, im achi tok.

70. Chisv̄s ash ot, Auah-tuklo ho hvchi atokoli li tok o, hvsh achvpona kvt nan-isht-ahullo okpulo yo chia keyu ? im achi tok.

71. Yvmmak osh auah-tuklo ka ai iba chvfa yatuk osh, yvmmak ash ishit inla ibbak fohka chi ha tok oka Saimon, ushi Chutas Iskaliot ak o isht anumpuli ha tok oke.

CHAPTA VII.

Chisv̄s vt luma chohmi hosh ayvt Chelusalem a ona ma, Chu vhleha hvt yvmmak ash pisa bvnnvt aiasha mvt, nan isht anukfilli kvt im ilaiyukvt aiasha, 1. 14 Chisv̄s vt tempel a ont chukowa cha, nan ithvnanchit ahanta. 37 Hatak vt itukshila hokvto, ilap ak o im ai onvt nan ishka hi a, ahnit Chisv̄s vt hoyo.

1. NANA kvt ai yakohmi ha ya, Chisv̄s vt Kalili yakni ak o ahanta tok : Chu okla hash osh yvmmak ash vbi ka bvnnvt maya hatuk o, Chu i yakni yokvno ahanta he ik ahno ha tok.

2. Mihma Chu okla chishako vlhtipo nuta ai impa holitopa yoh chatuk nitak vt a tikeli tok.

3. Yohmi hatuk o i kanomi vhleha hvt yummak ash o, Ilvppa issvt iwt, Chutea yakni yak o ish ona na nan chim ai ithuna vhleha hak kia na-fehna puta ish ai yvmihchi ka pisashke.

4. Ilapo vt otvni achukmvt annoa hi a ahni hokvt, hatak vt ai alumaka ho nana ka yvmihchi chatuk vt iksho hoke. Ilvppak oka a chi yvmohmi mvhli chatuk okmvt, yakni a ish il ai im otvninchashke, okla im achi tok.

5. I kanomi vhleha hak kia ik i yimmo hatuk osh.

6. Mihma Chisvs ash ot, Uno vt ia la he ai vlpiesa kvto ik ai ono kisha hoke; amba huchishno vto hush ia hi vt huchim vlpiesa bieka hoke.

7. Yakni vt huchishno yokuno huchi nukkillala he keyu: amba vno vto yamma nana a kaniohmi kvto ai vlpiesa keyu ka atokolit anoli li hatuk o, vno yokuno a nukkilli hoke.

8. Ai-impa holitopa asha ilvppa hush iashke; vno yokuto ai vlpiesa kvto ai ona fehna keyu kisha hoka, ai-impa holitopa asha ilvppa himonasi kuno ia la chi keyu hoke, im achi tok.

9. Anumpa ilvppa puta ka im ahanchit in taha mvt, Kalili yakni akinli ho anta tok.

10. Yohmi tuk kia i kanomi vhleha hash ot iwt taha tuk o, ilap ash kia ile haiakuchi fehna keyu, amba luma choh-mit ayvt, ai-impa holitopa asha kash ona tok.

11. Yohimi ma Chu okla hvt yummak ash ai-impa holitopa asha ka hoyot, Mih mvt katima yak o hikia cho? achi tok.

12. Mihmvt kanimi kvto, Yummvt hatak achukma hoke, achi ma, inlaka yokvto, Keyu, amba okla ha haksichi yoke, achi hatuk o yummak ash lumasit isht anumpulit, ilap bika itachowa fehnvt maya tok.

13. Yohmi kia Chu okla ha i nukshopa hatuk osh, hatak nana kia haiakvchit yamma isht anumpuli kvto iksho ki tok.

14. Atuk o ai-impa holitopa asha ka iklvnnvt taha foka

ma, Chisvs ash ot tempel a pit chukowa cha, nana ithvnanchi tok.

15. Mihma Chu okla hvt nukhlakancha *cha, Hatak ilvppvt katiohmi kak osh ithvna tok keyu kvto, holisso ha imponna hoh chishba ? achi tok.

16. Chisvs vt afalaminchi mvt, Nan isht ai ithvnanchi li kvt vno vmmi ho keyu, amba auet sa kanchi tok ak o immi hoke.

17. Hatak nana hosh, yvmmvt nana ai ahni tok mak o ahninchit yvmihchi hokmvt, nan-isht-ithvnanchi ka Chiho wa ak o a minti hokma, keyukmvt peh vno ahni li hosh anumpuli li hokma, nana hatuk ma akostininchia hi oke.

18. Kvna kia peh ilap ahni hosh anumpuli hokvto ilap isht a holitopa he ak o aiahni chatuk; amba auet kanchi tok vt nan-isht a-holitopa he ak o aiahni hokvto, yummak osh aighli, mikma nana ik ai vlhpeso nana kia ai a takali keyu hoke.

19. Moses vt vba-nan-vlhpisa ya hvch ima tok keyu ho ? a tok ak o hvchi achvfta kia vba-nan-vlhpisa mvno hvch ik holitobleshke. Nanta katiohmi ho subi bvnnvt hvsh itvnowa cho ?

20. Okla hash ot afalaminchi mvt, Nan-isht-ahullo okpulo yo il ai eshi chia hoka, kvta hosh chibi bvnnvt itvnowa hoh cho ? okla achi tok.

21. Chisvs vt afalaminchi mvt, Nana achvfa ho ai yvmihchi li, yvmohmi ma momvt okokko ! hvsh ahnishke.

22. Yohmi ka Moses vt hakshup tvpa ka hvchim apesa tok. Moses ak osh yvmma tikbanliche tok keyu, amba in tikba vhleha ak a tok: a tok kia hvchishno vto nitak hullo nitak o hatak hakshup hvsh in tahamblishke.

23. Moses i nan-vlhpisa yut ik kobafo ka chj ka, hatak vt nitak hullo nitak o hakshup in tvptohowa ma, vno vto nitak hullo nitak o hlakofichit kaiyanchi li kak o, hvs sa nukkilli cho ?

24. Nana kvt a kariohmi ahoba kak o isht ik hvchim a-

nukfilo kashke; amba nana kvt isht vlhpisa kvt ai-vlhpiesa mak o isht hvchim anukflashke.

25. Mihma Chelusalem a asha tuk vt kanimi kvt, Okla vbi bunnu^t maya beka tuk a ilvppak osh mih mak o keyu?

26. Yohmi kia nukwaya iksho hosh anumpohonli ma, nan ok ik im achoshke. Ilvppak osh Klaist fehna mak o mvhlⁱ kvno, hatak pehlichi vhleha hvt akostininch hoh chishba?

27. Yohmi kia hatak ilvppvto kanima yo a minti ka iloh im ithanvshke; amba Klaist ak osh vla hokma, kanima yo a minti ka hatak nana hosh akostininch he keyu hoke.

28. Mihma Chisvs vt tempel anukaka ya nana ai ithvnanchi hosh anta tuk ash osh chitolit, Uno a hvs svthana mvt, anonti kanima yo a minti li tuk ma hvsh ithanvshke; yohmi ka vno akinli ahni li hosh aya li keyu, amba auet sa kanchi tok yummak osh aiahli mak atuk o yummma chik ithanoshke.

29. Amba vno vto yummak o a minti li tuk okvt, yummma ithana li hoke; yummak osh auet sa kanchi tok mak oke, achi tok.

30. Mihma okla ishi bunna tok; yohmi kia hvshi kanvlli isht ai im vlhpisa kvt ik ai ono kisha hatuk oka, hatak nana kia ibbak a ik onochko ki tok.

31. Mihma okla lawut yummak ash i yimmi mvt, Klaist ak osh vla hokmuto, na-fehna puta ka yvmihchi kvt, hatak ilvppvt ai yvmihchi tuk puta ka i shahliche hinla ho? okla achi tok.

32. Okla hvt lumasit yakohmichit yummma isht anumpulit maya ka, Falisi vhleha hvt haklo tok; micha Falisi vhleha, mikmvt na-holitompa isht asha pehlichi vhleha aieno kash ot yummak ash isha chi ka, tishu vhleha ha pit tihleli tok.

33. Mihma Chisvs ash ot, Chekosi itintakla kak o hvchi takla anta li moma chi; atuk mvt anonti auet sa kanchi tok a im ia la chi hoke.

34. Hvs sa hoyo kia, hvch ik sa peso ka chi; mikmvt kanima yo ai ahanta likma, yummma hvsh ai ona he keyu hoke, im achi tok.

35. Mihma Chu okla hash osh ilapo bika it im achit, Katima ko ia chi hokak o, keho pesa ka chi hoh chishba?

ita-fimimput Chentail okla ibvlhkahvt asha hak o im ayvt,
Chentail okla ha nan ithvnancha chi ho ?

36. Ilvppak osh anumpa nanta mak o, Hvs sa hoyo kia,
hvch ik sa peso ka chi; mikmvt kanima yo ai ahanta likma,
yumma hvsh ona he keyu hoke, achi tok.

37. Nitak ont ishtaiyopi na holitoblit ai-impa nitak chinto
yummak fehna Chisvs vt hikia cha, tahpanhanla mvt, Hatak
nana hosh itukshila hokmvt, vno ak o vm ai vlt ik ishkó.

38. Kvna hosh vno a a yimmikma, yummak o, Holisso
Holitopa yvt achi hatuk oka, oka okchaya okhina yvt chu
kvsh a a yanvllit a kokoncha chi hoke, achi tok.

39. Yohmi kia ilapa i yimmi vhleha hvt Shilombish a
habena he yummak o isht anumpuli hosh ilvppa miha tok:
Chisvs vt ont ik a holitopo kisha hatuk o, Shilombish Holi-
topa yvt ik ayo kisha ha tok.

40. Yohmi hatuk o anumpa ilvppa haklo mvt, okla hash
ot laurt, Ilvppak osh hopaii mih mak o fehna ho mvhlishke,
achi tok.

41. Kanimi mvt, Ilvppak osh Klaist mak oke, achi ma,
amba kanimi kvt, Klaist vt Kalili yakni a vttvt a kohchvt
aya hinla ho ?

42. Klaist vt Lewi Ushi ai isht atiaka ho, micha Behle-
hem trmaha Lewi vt ai ahanta tok mak o ai vtta ahpia hi a,
Holisso Holitopa yvt achi hatuk keyu? achi tok.

43. Yohmi hatuk o yummak atuk mak o okla hvt isht ai
ita kashapvt maya tok.

44. Mihma kanimi kvt yummak ash ishi ka ahni tok;
yohmi kia hatak nana hosh ibbak a ik onochi ki tok.

45. Yohmi ma tishu vhleha hash osh na holitompa isht
asha pehlichi vhleha, micha Falisi vhleha aieno kash im ai
ona tok; mihma yummak ash osh, Nanta katiohmi ho yum-
mak ash isht hvch ik lo cho? im achi tok.

46. Mihma tishu vhleha hash ot, Hatak nana hosh
anumpuli kvt hatak ilvppa chohmi chatuk keyushke, achi
tok.

47. Mihma Falisi vhleha hash ot afalaminchi mvt, Hv-
chishno ak kia hvsh i haksi hotuma?

48. Hatak hochitoka, keyukmvt Falisi vhleha aienā kvt kanimi mvt, yummā i yimmi tuk o?

49. Yohmi ka nan-vlhpisa kia ithana keyu okla ilvppvto nan isht i palvmmma he vlhpesushke, achi tok.

50. Nikotemvs, yummvt ninak o ayvt Chisvs a im ona tok ash ot, yummā ai ibachvfa hatuk osh,

51. Nan vlhpisa pin tonla kvt hatak a ai i haponaklot, nana ho a kaniohmi hatuk ma ai akostininchī keyu kisha kvt, nan im apesa chatuk oh cho? im achi tok.

52. Mihma okla afalaminchi mvt, Chishno ak kia Kalili hatak chia hatuk o? achukmalit hoyot pisá: hopaii vt Kalili yakni a ai vttvt kohchvt aya hi vt iksho hoka, im achi tok.

53. Yohmi ma hatak ash ot momvt in chuka aiyuka ilhkolut taha tok.

CHAPTA VIII.

Falisi vhleha hvt, ohoyo hosh hauí tobvt ahanta na yummak osh nan im apesa chi ho, isht im ona, 1. 12 Chisvs vt ilap ak osh yakni in tohwikeli; yohmi ka yummvt im aiahli ka Iki vt atokolit anoli chatuk aienā ka miha. 30 Chu okla hvt Chisvs a i sanali; yohmi hatuk o ilapet Eblaham ak okvno isht atiaka ho mvli akinli kia, nan ai ashvchika yokvno i yuka vhleha; micha nan isht ahullo okpulo a im vlla vhleha aienā hatuk a, Chisvs vt im otninchi.

1. CHISUS vt Alif nvnih ha ia tok.

2. Atuk osh onna-hinli fehna falamvt tempel ash ant chukowa ma, okla momvt im ai itvnaha tok: mihma aka binilit nan ithvnanchi tok.

3. Mihma na-holissochi vhleha, micha Falisi vhleha aienā kvt, ohoyo hvt lumakvt anta tuk o, isht im ona tok; micha ai ikvnna ka okla binilichi mvt,

4. Nan-ithvnanchi ma! ohoyo ilvppvt lumakvt anta, ai yakohmi fehnvt haiaka na ishi tuk oke.

5. Yohmi ka Moses vt ilvppa chohmi hokvt tvli isht boa hi o, nan-vlhpisa ya isht a pim apesa tok; yohmi ka chishno vto nantuk ish achi cho? im achi tok.

6. Ilap ak o anumpa onocha hi vt ahnit, imomaka pisa hosh ilvppa okla achi tok. Yohmi kia Chisvs ash ot ik i haponaklo ho chohmit, aka pit waiahpvt, ibbak-ushi a yakni a isht ai o holissochi tok.

7. Yohmi ka okla i ponaklo kash ot a moyuma ma, wakaya mvt, Kanim a hosh ai ashvehika ik im iksho kvt hvchi takla hikia hokmvt, yummak osh na tikba teli ya isht ik boli, im achi tok.

8. Mihmvt anonti aka pit waiahpvt yakni a ai o holissochi tok.

9. Mihma okla haklo tuk ash ot, ilap chukvsh akinli ka nan isht ai il akostininch mvt, holitopa i shahli tuk ak osh tikba achvfa aiyukvt kohchvt ihiya mvt, ik a lauwo ke tuk vt momvt ont taiyaha tok; mihma Chisvs ak bano hosh hikia ma, ohoyo hash osh ai iklnnna ash hikja tok.

10. Chisvs ash ot wakaya mvt, inla yvt iksho ho, ohoyo ak bano ho pisa mvt, Ohoyo chia ma! anumpa chi onochi vhleha mvt? hatak nana kia anumpa ik chi onocco ke tuk oh cho? im achi tok.

11. Mihma, Hatak nana kia anumpa ik si onochoshke, Chitokaka ma! achi tok. Mihma Chisvs ash ot, Uno ak kia anumpa chi onochi li keyushke, ia cha, himmakma ik chi hakso kashke, im achi tok.

12. Mihmvt Chisvs ash ot anonti okla ha im anumpuli mvt, Uno ak osh yakni im a tohwikeli sia mak oke; vna hosh uno a siakaiya hokvt, ai okhlilika yo aya he keyu; amba ai okchaya tohwikeli hvt in takala he mak oke, im achi tok.

13. Yohmi hatuk o Falisi vhleha hash ot, Nan ish ai atokoli kvt chishno akinli hosh ish il ai-anoli hokvt, nan ish ai atokoli ka ahli keyushke, im achi tok.

14. Chisvs ash ot afalaminchi mvt Atokoli kvt uno akinli hosh il ai anoli li akinli kia, nan ai atokoli li ka ahli hoke: uno ak okvto kanima yo a minti li tuk: mikmvt kanima yo atia la he aieno kvt ithanali hoka; amba hvchishno vto kanima yo a minti li tuk, micha kanima yo atia la he aieno ka hvsh akostininch he keyushke.

15. Haknip nan isht a kaniohmi chatuk mak o nana hvsh apesvshke; vno vto hatak nana kia nana ak im apesoshke.

16. Yohmi kia nana ka apesa li hokma, nan apesa li ka aiahli hoke; vno ak illa keyu hoka, amba vno vt auet sa kanchi tok Aki a itatuklo li hoke.

17. Hatak tuklo hosh nana atokolit anoli ho aiahla hi a, hvchi nan-vlhpisa yak kia a holihiso hoke.

18. Nan isht a si atokowa anoli kvt vno akinli kak osh mihi yo sia hokma, anonti auet sa kanchi tok Aki ak osh nana atokowa ka si anoli hoke.

19. Yohmi ma Katima kō Chiki vto asha hosh? okla im achi tok. Chisvs vt afalaminchi mvt, U'no, mikmvt Aki ita tuklo li ka hvch ik pithanoshke; vno a hvs svthana hatuk okmvt, Aki ma hvsh ithana he tuk akinli hoke, im achi tok.

20. Anumpa ilvppa Chisvs vt tempel anukaka ya nana ai ithvnanchi hosh ahantvt, tuli holisso abohli yo hikja hosh anumpuli tok: hvshi kanvlli isht ai im vlhpisa kvt ik ai ono kisha hatuk o, hatak nana kia ibbak a ik onocho ki tok.

21. Anonti Chisvs ash ot, Kanima ia likma, hvs sa hoyo kia, nan ai-ashvchika puta kak o isht hvchi ai illa hi oke: kanima yo ai ona li ka, hvchishno vto hvsh ona he keyu, im achi tok.

22. Yohmi ma Chu okla hash ot, Kanima yo ai ona li ka, hvchishno vto hvsh ona he keyu, achi kvt ilap inli kak osh ile ba chī hoh cho? achi tok.

23. Mihma, Hvchishno vto aka yo a minti hvchia hokma, vno vto vba yo a minti li hoke; hvchishno vto yakni ilvppak o ai ibachvfa hvchia hokma, vno vto yakni ilvppa ai ibachvfa sia keyu hoke.

24. Yohmi ka na hvchim ai-ashvchika puta kak o isht hvchi ai illa hi oke, hvchim achi li hokvno; vno ak osh mih mak o sia ka ik hvchi yimmo hokmvt, na hvchim ai-ashvchika puta kak o isht hvchi ai illa hi oka, im achi tok.

25. Mihma, Chishno ak osh kvta hak o chia ho? okla im

achi tok. Mihma Chisvs ash ot, Ummona ka nana ho hvchim anoli li kash mih mak o sia hoke.

26. Nana ka hvchi mihvt, nan isht apesa la hi vt lauvt vm ashvshke. Yohmi kia auet sa kanchi tok yummak osh aiahli mak oke; mihma vno vt yummak o nana ka ai im a haklo li tuk mak osh yakni a isht im anumpuli li hoke.

27. Iki ak o isht im anumpuli hatuk a, okla ik akostinincho ki tok.

28. Mihma Chisvs ash ot, Hatak Ushi a vba hvsh takali-chi hok mak osh, vno vt mih mak sia hatuk; micha vno akinli vm anukfila hosh nanasi ka ai yvmohmi li keyu; amba Aki ak osh nan svthvnanchi tuk mak o ilvppa puta ka anumpuli li hatuk a hvsh akostinincha hi oke.

29. Micha auet sa kanchi tok vt sa takla aya hoke; Aki vt ilap illvchit sa kanchi tok keyu; nana kvt yummak yuk-pali pulla kak o yvmohmi kvt a sa bilia chatuk oke, im achi tok.

30. Anumpa ilvppa puta ka anumpohonli ma, i yimmi kvt laua tok.

31. Yohmi ma Chisvs ash ot i yimmi tuk vhleha Chu okla hash o, Um anumpa ha hvsh halvlli kvt hvch ik issok-mvt, nan vm ai ithvna ahli fehna hvchia mak a chi hoke.

32. Mikmut nan-aiahli ka hvsh ithana he; mikma nan-aihlika yash ot yuka keyu hvch ikba hi oke, im achi tok.

33. Okla afalaminchi mvt, Eblaham ak o isht atiaka pia, yohmi kvt nitak nan ash o hatak nana kia ai i yuka hosh il anta tok keyu ka, katiohmi ho, Yuka keyu hvchi toba hi oke, ish achi cho? im achi tok.

34. Chisvs ash ot afalaminchi mvt, Ahlishke, ahli mak o hvchim achi lishke, Kuna hosh nan ai ashvchika ya ai yohmi hokmvt, nan-ai-ashvchika ya i yuka mak oke.

35. Yohmi ka yuka hokvto chuka ya ai ahantvt bilia chatuk keyu; amba Ushi yokvto ahanta na bilia chatuk oke.

36. Yohmi hoka Ushi yak osh yuka keyu ka hvch ikbi hokma, yuka keyu ahli mak o hvchia ha hi oke.

37. Eblaham ak o isht atiaka hvchia hokvno hvchim

ithana li; yohmi kia vm anumpa hak osh huchi chukush a
ai anukfoyuka keyu kak o, subi huchi bunvshke.

38. Aki a ai iba pisa li tok mak osh vno vt nana ka isht
anumpuli li hoke; mihma huchishno vt huch iki a hush ai
iba-pisa tok mak osh a huchi yummishke, im achi tok.

39. Mihma okla afalaminchi mv, Eblaham ak osh piki
oke; im achi tok. Chisus ash ot, Eblaham ak o ushi hu-
chia hatuk okmv, Eblaham vt nana a kaniohmi tok mak o,
hush yummohma he tuk oke.

40. Amba Chihowa ya nana ai im a haponaklo li tuk vt
nan ai ahlika mak o hatak huchim anoli li ka, subi huchi bun-
vshke; Eblaham vt ilvppa yakohmi tok keyu hoke.

41. Huch iki vt nana a kaniohmi tok mak o hush yummoh-
mishke, im achi tok. Mihma, Iki, ishki ita tuklo kvt ai vhpesa
keyu ho a toba hosh il vta tok keyu: Piki vt achufa,
Chihowa ak oke, im achi tok.

42. Chisus ash osh, Chihowa ak osh huch Iki atuk okma,
hus sa hulla he tuk oke; vno vt Chihowa yak o a kohchvt
aya li hosh vla li ha tok oka; yohmi kv vno vm anukfila
akinli hosh vla li tok keyu; amba yummak osh auet sa kan-
chi tok oke.

43. Nanta katiohmi ho vm anumpa ha huch ik svm akos-
tincho cho? vm anumpa ha haponaklo ik huchi bunno kak
okvt,

44. Setan huch iki ak o hush a toba hatuk osh, huch iki
nana ai-ahni kak o ai yohma hi a huchim anukfilvshke;
yummak okvt vmmona kash inli ho hatak vbi a tok; micha
ilap ak osh nan ai ahli kv anukfoka keyu hatuk osh, nan
ai ahlika ya a hikia keyu hoke. Holabit anumpuli kvt ai
immi ka mak okvt anumpuli hoke; ilap ak osh holabi yokvt,
anonti na-holabi iki mak oke.

45. Yohmi hatuk o ai ahlika yo huchim anoli li hatuk o,
huch ik sa yimmoshke.

46. Hush katima kak osh nan ai-ashuchi li tuk a hus sv
atokola hinla cho? Ahli mak o miha li hok mak heno,
nanta katiohmi ho huch ik sa yimmo cho?

47. Kuna kia Chihowa ya immi hokmv, Chihowa im

anumpa ha haklo hoke ; yohmi hoka hvchishno vto Chihowa immi hvchia keyu hokut hvch ik hakloshke, im achi tok.

48. Mihma Chu okla vhleha hash ot afalaminchi mut, Chishno vt Samalitan hatak chia hosh, nan-isht-ahullo okpulo a ish il ai eshi hatuk a, e chi achi kvt vlhpesa ho e miha keyu cho ? im achi tok.

49. Chisus vt afalaminchi mut, Nan-isht-ahullo okpulo il ai ishi li keyushke : amba Aki a holitobli li hatuk o, hvchishno vto vno a hvch ik sa holitobloshe.

50. Micha vno akinli isht a sa holitopa hi o ahni li keyu ; yvmma aiahni cha, nan apihisa kvt achrfa hosh asha hoke.

51. Ahlishke, ahli mak o hvchim achi lishke ; Hatak vt nana mihija li ka vñ antia hokmut, nitak nana ai-illika ya pisa he keyu hoke, im achi tok.

52. Mihma Chu okla hash ot, Nan-isht-ahullo okpulo a ish il ai eshi hatuk a, himak vno il akostininchishke ; Eblaham, mikmut hopaii vhleha aieno kvt illi tok : yohmi ka hatak vt nana mihija li ka vñ antia hokmut, nitak nana ai-illika ya pisa he keyu, ish achishke.

53. Piki Eblaham illi tok a ish i shaiyahli cho ? mihma hopaii vhleha aieno kvt illit taha tok. Chishno ok ash kuta hak o ish il ai apesa hoh cho ? im achi tok.

54. Chisus vt afalaminchi mut, Uno akinli hosh ile holitobli li hokma, na sa holitopa he mak keyu hoke. Hvchin Chihowa hvsh miha tuk Aki yvmmak osh sa holitobli hoke.

55. Yohmi kia hvchishno vto yvmina hvch ik ithanoshke ; amba vno vto yvmma ithana lishke ; yohmi kvt yvmma ak ithano hoke ; achi li hokmut, holabi hvchishno akinli ho chohmi la chi hoke ; yohmi kia yvmmak oka ithana li mut, nana ahanchi ka holitobli lishke.

56. Hvch iki Eblaham vt ai ahanta li nitak a pisa hi okut na yukpa tok ; atuk osh pisa cha, na yukpa chinto fehna tok, achi tok.

57. Mihma Chu okla hash ot, Sipokni kvt afvmmi pokoli tahlapi ka chik ono kisha hokak osh, Eblaham a ish pisa tok oh cho ? im achi tok.

58. Mihma Chisus vt Ahlishke, ahli mak o hvchim achi

lishke, Eblaham vt iksho kisha ma, anta li tok oke, im achi tok.

59. Yohmi ma ishit bola chi kvt, tuli a okla aiowa tok : yohmi kia Chisvs ash ot lumvt okla ai iklunnaka ya hlopul-lit ayvt tempel a a kohchvt ont ia tok.

CHAPTA IX.

Hatak vt lupa yosh vtta tok a, Chisvs vt hoponayochi, 1 : 13 hatak ash o ilauet Falisi vhleha ha isht im ona ma, Falisi vhleha hash ot hatak ash sinakak a a kohchichi. 35 Chisvs vt ilap ak osh Chihowa ha Ushi mak atuk vt hatak yummak ash im il otninchi ma, hatak ash ot i yimmi cha, aiokpvchi.

1. MICH A Chisvs vt ont ia cha aya mvt, hatak vt lupa imoma yosh vtta tok osh asha na pisa tok.

2. Mihma nan im ai ithvna vhleha hut, Pi shahli ma ! hatak ilvppak okmá, keyukmvt iki, ishki itatuklo ka a katima kak osh nan ashvchi tok o, hatak ilvppvt lupa imoma yosh vtta tok oh cho ? achit i ponaklo tok.

3. Chisvs ash ot afalaminchi mvt, Hatak ilvppak okmá, keyukmvt iki, ishki ita-tuklo ka a kanima kak osh nana ashvchi tok o keyu hoke ; amba Chihowa nan-isht im ai ahlika yvt ilvppak o isht ai otna he mak o, ai yakohmi tok oke.

4. In toksvli la he mak o auet sa kanchi tok oka nitaki moma kak o isht im ahanta li pullashke ; ninak vt vla ha yokmvno, hatak nana kia pilesa he keyushke.

5. Yakni a ai ahanta li takla hokvto, yakni a in tohwikeli sia hoke, im achi tok.

6. Ilvppa mak achit ont issa mvt, yakni a on tofut, lukfi a itukchi ishit yvmvslit tahli mvt, hatak lupa nishkin a lukfi ash o isht im apolusli tok.

7. Mihmvt, Oka talaia Siloam, yvmmvt toshowakmvt, Pila, achi ho ia cha, ont okamí, im achi tok. Yohmi ma ia cha ont okami mvt, pisa hosh vla tok.

8. Yohmi hatuk o chuka panta hatak vhleha, micha yvm-mvt lupa yo tikba ka pisa beka tuk vhleha yummak ash ot, Ilvppvt ashvt nana asihjhla chokush mak o keyu ? achi ma,

9. Kanimi kvt, Ilvppvt mihi yoka, achi ma, inla mvt, Peh holba hoka, achi tok: yohmi kia ilap vto, Mihi yo sia hoke, achi tok.

10. Yohmi hatuk o, Katiohmi hosh chi nishkin vto fatuma tuk oh cho? im achi tok.

11. Mihma afalaminchi mvt, Hatak Chisvs hohchifo kak osh lukfi a yvmvslit, sa nishkin a isht vrm apolusli cha, Oka talaia Siloam a ia cha, ont okami, vrm achi ma, iwt ont akami li hosh, hoponayo li tuk oke, achi tok.

12. Mihma, Atuk osh mih muto? okla im achi ma, Ak akostininchoshke, achi tok.

13. Mihma lupa yo beka tuk yvmmak ash o ilauinlit Falisi vhleha ha isht im ona tok.

14. Yohmi ka nitak hullo nitak o Chisvs vt lukfi a yvmvslit cha, nishkin a i fatummi tuk a tok.

15. Yohmi hatuk o anonti Falisi vhleha hvt kaniohmit hopanayo tuk a, im asilhhvchi akinli tok. Lukfi yvmvsk a yo sa nishkin a isht a lapohlechi na okami li tuk osh, hoponayo lishke, im achi tok.

16. Yohmi hatuk o Falisi vhleha kanimi kvt, Hatak yvmvmt nitak hullo nitak a holitobli keyu hokvt, Chihowa ak o a minti keyushke, achi tok. Inlaka yokvto, Hatak vt nan ashvchi atuk vt katiohmi hosh na-fehna puta yakohmi ka yvmihcha hinla cho? achi tok: yohmi mvt ilap bika okla ai ita kashapvt maya tok.

17. Hatak lupa yatuk ash o anonti, Chishno vto chi nishkin a chi fatummi tuk a, yvmmak oka nanta isht ish achi cho? okla im achi ma, Yvmmak ash ot hopaii yoke, achi tok.

18. Yohmi kia Chu okla hash ot hoponayo tuk ash iki, ishki ita tuklo ka hoyot ik im asilhhacho kisha kvt, yvmmvt lupa yatuk osh hoponayo tuk a, ik yimmo ki tok.

19. Atuk osh yvmmak ash o okla i ponaklot, Ilvppvt hvch iso lupa yosh vtta tok hvsh achi chokvsh oh cho? Yohmi hak osh katiohmi ho himak ano hoponayo cho? okla achi tok.

20. Iki, ishki ita-tuklo kash ot afalaminchi mvt, Ilvppvt piso, micha lupa yosh vtta tok okvno il ithanvshke.

21. Amba nana hosh kaniohmi ho himak ano pisa kvno,

kil akostininchoshke ; mikmvt kvna hosh nishkin a i fatummi tuk aieno kvno, kil ithanoshke ; vlla keyu hoka, ilap ak o hvsh i ponaklokma, ilap inli hosh isht il ai anumpula hinla hoke, achit okla tok.

22. Hatak nana hosh, yvmmvt Klaist oke, achi hokmt, sinakak a a kohcha hi o, Chu okla hvt ai it ibachufvt taha mashko hatuk o, iki, ishki itatuklo kvt Chu okla hak o i nukshopa hatuk osh, anumpa ilvppa achit okla tok.

23. Yohmi hatuk osh iki, ishki itatuklo kash ot, Ulla keyu hoka, ilap ak o oh i ponaklo, achit okla tok.

24. Yohmi ma atukla ma hatak lupa yatuk ash o okla hoyo mvt, Chihowa yak o pit holitoblichi, hatak ilvppak okvto nan ashvchi a il im ithana hoke, im achi tok.

25. Mihma afalaminchi mvt, Yvmmak okvt nana ashvchi yokmá, keyukmá, nana hokvno ak im ithanoshke ; nana achufa kvno ithana li ; yohmi kvt lupa sia ha tuk kia, himak ano hoponayo li kak oke.

26. Mihma anonti, Nanta ho a chi katimichi tuk o ? Katimihchi hosh chi nishkin a fatummi tuk oh cho ? okla im achi tok.

27. Mihma im afalaminchi mvt, Hvchim anolit taiyahli li kia, hvch ik haponaklo ke tuk vt, nanta katiohmi ho atuk-lanchit haklo ka hvsh ahni cho ? hvchishno ak kia nan im ai ithvna toba hvchi bvnna ho ? achi tok.

28. Yohmi ma okla ishtukhlakafvt, Chishno ak osh yvmmma nan im ai ithvna chia hoke ; amba pishno vto Moses ak o nan im ai ithvna pia hoke.

29. Moses ak okvno Chihowa yvt im anumpuli beka tok a il ithana ; amba ilvppak okvto kanima yo a minti ma, il ai im ithana keyushke, okla im achi tok.

30. Mihma hatak ash osh afalaminchi mvt, Yvmmvt kanima yo a minti tuk a hvch ik im akostininch ho, anonti sa nishkin a a fatummi hoka, ilvppvt na-fehnvshke.

31. Mihmvt Chihowa yvt nan ashvchi vhleha hokvno i haponaklo keyu chatuk ; amba hatak nana hosh Chihowa ya aiokpvchi, micha nan ahni ka im antia aieno yok mak o mihi yo i haponaklo chatuk a iloh ithanvshke.

32. Yakni vt toba tok a taiyakla ka lupa imoma yosh vtta tok a hatak nana kia nishkin ash i fatummi tok a annoa chatuk keyushke.

33. Hatak ilvppvt Chihowa yak o a minti hatuk keyu hokmvt, nana ho yvmihcha he keyushke, im achi tok.

34. Mihma okla afalaminchi mvt, Nana ai ashvchika bieka mak osh ish vtta tok ak naka nan ish pim abuchi hotuma ? im achi mvt, a kohchichi tok.

35. Yvmma a kohchichi tuk a, Chisvs vt haklo tok ; atuk osh yvmmak ash o pisa mvt, Chihowa Ushi a ish i yimmi cho ? im achi tok.

36. Afalaminchi mvt, Chitokaka ma ! i yimmi la hinla yvmmak osh kvta ho ? achi tok.

37. Mihma Chisvs ash osh, Yvmmak oka ish pisa tuk o, anonti mihi yosh chit im anumpohonli hoke, im achi tok.

38. Mihma, Chitokaka ma ! sai yimmishke, achi mvt, yvmmak ash aiokpvehi tok.

39. Ik hoponayo atuk vt hoponayo yokma, anonti hoponayo tuk vt lupa yo toba he, yakohmit nan isht im vlpisa hi o, yakni ilvppa aya li hatuk oke.

40. Mihma Falisi vhleha kanimi kvt yvmmma apeha tuk ash ot anumpa ilvppa puta ka haklo mvt, Pishno ak kia lupa pia hoh cho ? im achi tok.

41. Chisvs ash ot, Lupa hvchia hatuk okmvt, nan ai ashvchika yvt ik hvchim ik sho ka he tuk ; amba, E hoponayo, himak a hvsh achi ; yohmi hokvt hvchim ai ashvchika yvt takanli moma hoke, im achi tok.

C H A P T A X.

Chisvs ak osh okhissa, mikmvt yvmmak osh chukfvlpoba apesvchi achukma yatuk osh chukfvlpoba ya vlhtobvt illi, 1. 19 Okla hvt Chisvs a nan isht ai im anukfila kvt ilaiyuka, 24 Chisvs vt Chihowa hak o a minti tuk a ilap nana ai isht ahanta kak inli hosh otvninchi ka im anoli ; 39 Chu okla hvt vbi bvnna kia im a hlakofit kocha. 40 Chisvs vt ia mvt Chatan misha tvnnvp o ona ma, okla laua hosh i yimmi.

1. AHLISHKE, ahli mak o hvchim achi lishke, Kvna hosh chukfvlhpoba i holihta okhissa yak o ik a chukowo hosh, amba naksika kanima yo pit oiyvt o walvbli hokvto, yummvt hukopa, mikmvt na wehpuli mak oke.

2. Amber okhissa yak o pit a chukowa hokvto, yummak osh chukfvlhpoba ya apesvchi mak oke.

3. Yummak o okhissa apesvchi atuk vt in tiwikma, itih ola ka, chukfvlhpoba yvt ithana; yohmi hatuk oka in chukfvlhpoba atuk ash hohchifo aiyuka hochifot pehlichit kohcha chatuk.

4. Atuk osh in chukfvlhpoba yash kocha welit tahlikmvt, tikba im iakma, itih ola ka, ithana hatuk okvt, chukfvlhpoba yash ot apehvt ia chatuk.

5. Yohmi kia inla itih ola hokvno ik ithano hatuk osh, api-hvt ia he keyu hosh, amba i filummit yihlepa chatuk oke, im achi tok.

6. Nan-isht-vlhpisa ilvppak o Chisvs vt okla ha isht im anumpuli tok: yohmi kia nana ho yummvt isht ai im anumpuli hatuk a, okla ik akostininch ki tok.

7. Yohmi hatuk o Chisvs ash ot atuklanchit, Ahlishke, ahli mak o hvchim achi lishke, Uno ak osh chukfvlhpoba im okhissa sia hoke.

8. A sa tikba aya tok puta kvt hukopa, mikmvt na
wehpuli bano ha tok: yohmi hatuk o chukfvlhpoba yvt,
yummak okvno ik i haponaklo ki tok.

9. Uno ak osh okhissa sia hoke: hatak nana hosh vno ak o si a chukowa hokvto, okchaya he: micha pit chukoho-wvt, anonti kohonchvt, ai-impa ya ahayuhoncha hi oke.

10. Na-hukopa yvt hukopa, micha vbi, nan okpvni aiena he ak bieka hosh aya chatuk; amba ai okchaya ya okla ahayuchikmvt, anonti laua kvt i shahli fehna ho pisa he mak o, vno vto aya li ha tok.

11. Uno ak osh chukfvlhpoba apesvchi achukma sia mak oke; chukfvlhpoba apesvchi achukma yvt chukfvlhpoba ya ilap im ilhfiopak a a kaiyanchi hoke.

12. Amber peh ilhtohno, chukfvlhpoba apesvchi keyu hatuk, micha chukfvlhpoba yvt immi atuk keyuk mvt, na

shoba vt minti na pisakmvt, chukfvlpoba ya issut chvfa hoke; yohmi ma nashoba yvt yummak ash ant hoklit, chukfvlpoba yash it ai yuhli hoke.

13. Ilhtono hvt peh ilhtohno atuk okvt, chukfvlpoba ya nan isht ik ahno hatuk mak osh chvfa hoke.

14. Uno ak osh chukfvlpoba apesuchi achukma sia hoke; an chukfvlpoba ya ithaiyana li hoke; mikma anonti vmmi hvt uno a svthana hoke.

15. Aki vt svthana ka, uno mvt Aki a ithana li akinli koke; yohmi hosh chukfvlpoba ya isht vlhtoba ho vm ilhfiopak a aka bohyuli lishke.

16. Yohmi kvt chukfvlpoba inla mvt ilvppa ashaka ai achvfa keyu kvt vm asha hoke: yummakma pehlichit vla likma, vm anumpa ha hakla hi oke: yohmikma aiasha vt achvfakma, anonti chukfvlpoba apesuchi vt achvfa hi oke.

17. Um ilhfiopak a falaminchit ishi la hinla hosh aka bohyuli li; yohmi hoka Aki vt sa holitobli hoke.

18. Hatak nana hosh vm ishi ho keyu: amba vno akinli ahni li hosh aka bohyuli li hoke. Aka bohyuli la hi vt isht vm ai vlhpesakmvt, anonti falaminchit ishi la hi vt isht vm ai vlhpesa hoke. Nan-vlhpisa ilvppak o Aki a im a habena li tok, im achi tok.

19. Yohmi hatuk o anonti Chu vhleha hash ot anumpa ilvppa isht ai it a kashapvt maya tok.

20. Yohmi mvt, Nan-isht-ahullo okpulo il ai ishi hatuk osh tasimbo hokvto, nanta katiohmi ho hush i haponaklo hosh? achi kvt laua ma,

21. Inlaka yokvto, Ilvppak okvt nan-isht-ahullo okpulo il ai ishi ho im anumpa keyushke. Nan-isht-ahullo okpulo vt lupa nishkin a fatumma hinla ho? achi tok.

22. Hushtula yo tempel a himonuchit Chitokaka pit im issa impa hosh Chelusalem a asha ho, yohmi tok.

23. Mihma Chisvs vt tempel anukaka Solomon im apishia nutaka ya hikikia tok.

24. Mihma Chu vhleha hash ot vlt yummak ash o ant a folubli cha, Ik ai ithano chohmit il aiasha na katiohmi foka

chi ho ish pim ahni cho ? Chishno ak osh Klaist chia hok-mvt, achukmalit ish pim anolashke, im achi tok.

25. Mihma Chisvs ash ot afalaminchi mvt, Hvchim anoli li ka, ik hvchi yimmo hoke : nana ka Aki hohchifo ho isht a yvmihinchi li kak o, yvmmak osh ai vlhtokowa ka si anohonlishke.

26. Yohmi kia ik hvchi yimmoshke ; yvmmak o hvchim achi li hatuk oka, an chukfvlhpoba keyu hvchia hatuk okvt.

27. An chukfvlhpoba vto vñ anumpa ha haklokma, anonti vno vt ilap ma ithana li ho, a si apeha chatuk.

28. Mikma ai-okehayvt bilia ya yvmmma im issa li ; yohmi ka nitak nana ilbushvt illa he keyukma, anonti kvna kia yvmmak ash svbbak a a kohchit isha hi vt iksho hoke.

29. Aki yvmmma vma tok vt moma i shahli ; yohmi ka kvna kia yvmmak ash Aki ibbak a a kohchit isha hi vt iksho hoke.

30. Uno, Aki itatuklo li kvt il it ibai achvfa hoke, achi tok.

31. Mihma anonti Chu okla hash ot tvli ishit bola chi kvt tvli a okla aiowa tok.

32. Chisvs vt afalaminchi mvt, Isht il apelvchi vt Aki a minti pulla na na hochukma lawa ka isht a yvmihinchi li hvsh pisa tuk a, na-fehna yvmmma puta tuk ash katima kak o tvli a isht hvsh sa bola chi mak oh cho ? im achi tok.

33. Mihma Chu okla hash ot afalaminchi mvt, Na fehna achukma yvmmak atuk ak o tvli a ishit e chi bola chi mak o keyu ; amba ik ahobalot anumpulit, anonti hatak chia hok-kak osh, Chihowa ish il apesa aiena kak oke, im achi tok.

34. Chisvs vt afalaminchi mvt, Chitokaka vhleha hvchia hoke, achi li tok, achi kvt hvchi nan-vlpisa holisso ha a holihiso keyu cho ?

35. Chihowa im anumpa hvvt ayvt ai im ahanta yo yvmmak o Chitokaka vhleha hohchifo tok okma, anonti Holisso Holitopa yvt kobafa hi o keyushke :

36. Iki vt na-holitopa ka isht a im atokoli cha, yakni a auet kanchi tok o, Chihowa Ushi sia hoke, achi li tuk ak o, Nan ik ahobalot ish anumpuli, hvsh achi hoh cho ?

37. Aki vt nana a kaniohmi ak o ak yvmihcho hok mak o, huchi sa yimmo kashke.

38. Amba yvmihchi li hokmuno, vno ak okvno huch ik sa yimmo hoh kia, nana kvt a kaniohmi ymmak o huchi yimmi cha, Aki vt auet a si achafakma, anonti vno vt ilap a pit ai achafa li ka, akostininchit huchi yimmashke, im achi tok.

39. Yohmi hatuk o anonti okla ishi bunna tok: yohmi kia ibbak a im a hlakofi tok.

40. Mihmt anonti iwt, Chatan misha Chan vt a baptis-mochi vmmona tok ymmak o ona cha, ahanta tok.

41. Mihma okla lawut im ai itahoba mvt, Chan vto na-fehna nana kia yvmihchi tok keyu; yohmi kia Chan vt hatak iluppa isht anumpohonli tok a, momvt aiahli ha tok, achi tok.

42. Yohmi ma yvmmma ashvt ai i yimmi kvt laua tok.

C H A P T A X I.

Lasalvs vt abeka na in tek vhleha hvt Chisvs a pit im anoli, 1 ; 17
Chisvs vt Betani a vla, mihmvt Lasalvs a falaminchit tanichi. 45
Laua hosh Chisvs a i yimmi kia, kanimi kvt Falisi vhleha ha ont
im anoli; Chisvs vt kohchvt ia mvt, tvmaha Eflihaim ont anta.

1. **H**ATAK achvfa Lasalvs hohchifo, Meli micha itibapishi Mahla itatuklo in tvmaha Betani ak o vta yosh abeka tok.

2. Meli yvmmak osh Chitokaka ya pashi ahama isht a hvmmi cha, iyi ma ilap pashi yo isht i kasholichi tok mak o i nakfi yosh Lasalvs vt abeka ha tok.

3. Yohmi hatuk o in tek tuklo kash ot yvmmak ash pit im anolit, Yakeh ! Chitokaka ma ! ish holitobli chatuk vt abekvshke, achi tok.

4. Mihma iluppa Chisvs vt haklo mvt, Nan abeka iluppvt isht ai illa hi o keyu hoke; amba Chihowa vt isht a holitopa na Chihowa Ushi vt yvmmak o isht a holitopa chi mak oke, achi tok.

5. Mahla, micha itibapishi, mikmvt Lasalvs aienka Chisvs vt holitobli tok.

6. Yohmi hatuk osh yummvt abeka tuk ä haklo ha yut, ai vtta tuk ash inli ho ahanta na nitak tuklo tok.

7. Atuk osh yummva ont vbanvpa ma nan im ai ithvna vhleha hash, Anonti Chutea yakni ya iloh iashke, im achi tok.

8. Mihma nan im ai ithvna vhleha hash ot, Pi shahli ma! Chu okla hvt chekosi kash o tvli ä ishit chi boli bvnna tuk ä, anonti yummva ish ia ch_i ho? im achi tok.

9. Chisvs vt afalaminchi mvt, Nitak achvfa ka hvshi kanvlli vlhpisa auah-tuklo chatuk keyu cho? Hatak nana hosh nitak o nowvt aya hokmvt, yakni ilvppa ai in tohwikeli ka pisa hatuk osh ik ibetvblo hoke.

10. Amba hatak vt ninak o nowvt aya hokmvt, tohwekeli kvt ik im iksho hatuk osh, ibetvbl hoke, achi tok.

11. Ilvppak o achi tok: yohmi ha yosh i himmak o, Hvpi kana Lasalus vt nusishke; yohmi kia nusi tuk ä ont okchvli la ch_i mak osh ia li hoke, im achi tok.

12. Yohmi ma nan im ai ithvna vhleha hvt, Chitokaka ma! nusi hatuk okmvt, hlakofa ch_i hoke, achi tok.

13. Yohmi kia yummvt illi kak o Chisvs vt miha ha tok; amba nusit foha kak o miha ka, okla im ahoba tok.

14. Yohmi ma Chisvs vt achukmali fehnvt, Lasalus vt illi tuk oke.

15. Yohmi ka uno vt yummva ont ak anto ke tuk vt, hvchishno na hvchi yimma ch_i ka, hvchishno ak atuk mak o sai yukprshke; yohmi kia yummva iloh im ai onashke, im achi tok.

16. Mihma Tamas, yummvt Titimus hohchifo hosh yummva nan im ai ithvna ai itilaui vhleha hash, Pishno ak kia iloh ia cha, apihvt hvp illashke, im achi tok.

17. Atuk o Chisvs ash ot ona mvt, yummak ash ot hollopi tuk ä nitak ushta tuk o, ont akostininch tok.

18. Betani vt Chelusalem ä pit i bilika kowi tuklo foka tok.

19. Mihma i nakfi illi Mahla, micha Meli itatuklo ka hophlvla ch_i hosh Chu okla hvt lauvt im ai itahoba tok.

20. Atuk o Mahla ash osh, Chisvs vt minti ka, haklo

makinli hosh, iwt ont afama tok ; amba Meli vto aboha anuka yash asha moma tok.

21. Mihma Mahla vt Chisvs ash o, Chitokaka ma ! ilvppa ant ish anta tuk okma, a nakfi vt illa hetuk keyushke.

22. Ik yohmi kia himonasi mak o Chihowa ya nana ho ish im asilhha hoka, Chihowa yvt chima hinla ka ithana lishke, im achi tok.

23. Mihma Chisvs vt, chi nakfi vt falamvt tana chi akinli hoke, im achi tok.

24. Mihma Mahla ash ot, Nitak ont ishtaiyopi illi vt falamvt tani yvmmak okvno falamvt tana hi oka, ithana lishke, im achi tok.

25. Chisvs vt, Uno ak osh illi a falaminchit tanichi, mikmvt ai-okchaya aieno ka sia mak oke. Kvna hosh uno ak o a yimmi hokvto, ik illi tuk nana kia, okchaya he mak oke.

26. Micha kvna hosh okchayvt ahanta hosh uno a a yimmi hokvto, nitak nana illa he heyu hoke. Ilvppa chi yimmi cho ? im achi tok.

27. Ahli, Chitokaka ma ! chishno ak osh Chihowa Ushi, Klaist yakni ilvppa aya hi a tok mak o chia ka sai yimmishke, im achi tok.

28. Ilvppa yakohmichit miha mvt, iwt itibapishi Meli a lumasit ont i howvt, Nan-ithvnanchi vt vla cha, chi hoyoshke, achi tok.

29. Yvmma haklo makinli hosh, ashalika wakayvt iwt ont afama tok.

30. Chisvs vt tvamaha ha ant ik chukowo kisha hosh, Mahla yvt ai afama tuk ash akinli ho hikja ha tok.

31. Mihma Chu okla hvt apehvt aboha anuka ya mayvt hopohlvi tuk ash ot, Meli vt tushpvvt wakayvt kocha ia na okla pisa mvt, Ahollopi yvmmak o ont a yaiya chi hosh ia hoka, achi mvt iakaiya tok.

32. Atuk o Meli ash ot Chisvs a hikia kash ona cha, pisa mvt, iyi ituma ya ont hlipia cha, Chitokaka ma ! ilvppa ant ish anta tuk okma, a nakfi vt illa he tuk keyushke, im achi tok.

33. Yvmmvt yahaya ma, anonti Chu okla yvmma apihvt

ai vla tuk aienā kvt yahaya akinli na Chisus vt pisa hatuk osh, chukvsh anukaka isht a nukhaklo fehnvt ik im vlpieso ki tok.

34. Mihmvt, Katima yak o hvsh bohli tuk oh cho? achi ma, Chitokaka ma! minti cha, ant pisá, okla im achi tok.

35. Chisus vt nishkin okehi minti tok.

36. Mihma Chu okla hash ot, Yakeh! i holitopa fehna tuk o mvhl, achi tok.

37. Mihma kanimi kvt, Lvpā yatuk a hoponayochi tuk vt, hatak ilvppak kia ik illo ka hinla ka, a kanimihcha he tuk keyu chishba? okla achi tok.

38. Yohmi ma Chisus ash ot anonti chukvsh anukaka isht anukhaklo fehnvt ayut ahollopi a ona tok. Yakni chiluk o tvli yosh isht vlpkuma ha tok.

39. Chisus ash osh, Tvlī ya ishit ho kanvlichí achi, ma, Mahla illi tuk a in tek ash osh, Chitokaka ma! illi tuk a nitak ushta hokvt himak foka ma shua hoke, im achi tok.

40. Mihma Chisus vt, Chi yimmi hokmvt, Chihowa isht a holitopaka ya ish pisa hinla hoke, ak chim acho ke tuk oh cho? im achi tok.

41. Mihma illi ai itola tuk ash tvli ya okla ai ishit kanvlichí tok. Mihma Chisus vt nishkin a pit vba chakalichivt, Aki ma! is sa haiyaklo hatuk a yak oke, chim aiahnilishke.

42. Yohmi kvt is sa haiyaklo a bilia chatuk a ithaiyana li kvno; yohmi kia okla ilvppa hiohmaya kvt, chishno ak osh auet is sa kanchi tok a ai yimma chj kak o, yvmmma achi li tuk oke, achi tok.

43. Yakohmichit anumpulit ont in taha mvt, chitoli hosh anumpulit, Lasalvs ma! auet kohchá, achi tok.

44. Mihma illi atuk ash ot ibbak, iyi aienā ka ahollopi ishit shema yvt isht vlfowa ho ant kohcha tok; mihma nashuka yano nantapvski yosh isht vhlfoyuka tok. Mihma Chisus vt, Oh i hotofi na ik ia, im achi tok.

45. Yohmi ma Chu okla Meli a im ai itahoba tuk osh, Chisus vt nana ka ai yvmmihchi na pisa mvt, laua hosh i yimmi tok.

46. Yohmi kia kanimi hokuto falamet iwt, Falisi vhleha ha im ona cha, nana ka Chisus vt ai yvmihchi tuk ash okla im anoli tok.

47. Yohmi ma na-holitompa isht asha pehlichi vhleha, micha Falisi vhleha aiena kash ot hatak hochitoka nan apesa vhleha ha itahobi mvt, Hatak ilvpput na-fehna lawa ka yvmihchi ka, nanta mak o ka^{to}homi hosh iloh aiasha cho ?

48. Ilvppa ant ik yohmí, iloh im ahni hokma, hatak momma kvt i yimma ch^u hoke ; yohmikma Loman okla hvt vla cha, p^u yakni, micha pim okla talaia aiena kash ai okpnicha hinla hoke, achi tok.

49. Mihma achufut Kaiafas hohchifo hosh afymmi yvmma fehna ka na holitompa isht asha pehlichi i shahli a ai ibafohka hatuk osh, Nana ka hvch ik akostinincho kumoh-mishke.

50. Mikmvt hatak achufa hosh okla ha vlhtobut illi na okla talaia kash ot momvt ik illo ka hi a, a hvpmi vlpiesa hatuk a hvch ik anukfilloshke, im achi tok.

51. Yohmi kvt ilap nana aiahni hosh ilvppa anumpuli ha tok keyu ; amba afymmi yvmma fehna ka na-holitompa isht asha pehlichi i shahli hosh anta hatuk okvt, Klaist vt okla yvmma vlhtobut illa he.

52. Yohmi kvt okla yummak bana hi o keyu ; amba Chihowa im vlla vhleha kanima ai it afimimpvt asha tuk aiena ma hoyot a miha chrfra ho ai itahoba he ak o, tikbanli anoli ha tok.

53. Yvmohmi hatuk o nitak yvmma ai vhlit mihinti ka, yvmma vba ch^u kvt nana it im apesut okla maya beka tok.

54. Yohmi hatuk o Chisus vt himmakma haiaka fehnvt Chu okla itintakla ya ik a hikikjo ki tok ; amba yummak ash vttut ia mvt, yakni haiaka pit a bilika tvmaha Eflihaim hohchifo ho nan im ai ithvna vhleha ha pehliechit ahanta tok.

55. Atuk o Chu okla nan im vbanvblit ont ia yvt ai ona hosi tok ; mihma ilap nan ai il atahlit maya ch^u kvt, nan-vbanvblit ont ia yvt ik ai ono kisha ho yakni yvmma asht Chelusalem a ia kvt laua tok.

56. Atuk osh Chisvs ash okla hoyot, tempel anukaka ya hiohm̄ayvt, Impa holitopa asha ka ik lo ka ch̄i hokmá, nana ka huchim ahoba cho ? it im achit maya tok.

57. Na-holitompa isht asha pehlichi vhleha, mikm̄vt Falisi vhleha aienā kash ot, yvmm̄vt kanima yo anta ka hatak nana hosh akostininchī hokm̄vt, anoli na okla isha hinla kvt anum-pa v̄lhpisa ka bohli tuk a tok oke.

CHAPTA XII.

Meli vt Chisvs iyi ya nan-ahama im ahvmmi ma, yvmm̄vt ai v̄lhpesa ho yohmi hatuk a Chisvs vt miha, 1. 12 Chisvs vt issuba nashoba yo om binili hosh Chelusalem a ona. 20 Klik kanimi kvt Chisvs a pisa bunna : 23 Chisvs vt ilapvt kaniohmit illa he, anoli ; 27 Chisvs vt ch̄ukvsh anukaka nan isht nukhaklo in chito mvt, vba pit anumpuli ; 37 Hatak pehlichi vhleha hvt laua hosh Chisvs a i yimmi : yohmi kia Chisvs a isht anumpuli nukwia.

1. ATUK o nan vbanvblit ont ia isht asha ch̄i ka nitak hannalit takanli moma ho, Chisvs vt Betani ak o Lasalvs vt ai illi tuk o falaminchit tanichi tuk a yvmm̄vt yvmmak o ai v̄tta chatuk o, ona tok.

2. Mihma yvmmak o opiaka impa yo okla ai im atahli tok ; mihma Mahla ak osh nan ai isht im anta ma, amba Lasalvs vto ibai impa hosh maya kak o iba takla asha tok.

3. Yohmi ma Meli vt spiknat nan-ahama holitopa fehna weki achvfa ka ishi cha, Chisvs iyi ya ishit a hvmmi mvt ilap pashi akinli ho iyi yash isht i kasholichi tok : mihma nan ahama balama kvt aboha yash alotowa tok.

4. Mihma nan im ai ithvna vhleha achvfa Saimon ushi Chutas Iskaliot vt yvmmak oka inla ibbak fohka he mak osh,

5. Nanta katiohmi ho nan ahama ilvpput iskvli tahlepa tuchina kia isht ik v̄lbi cha, ilbusha ya ik i holhpelo ke tuk oh cho ? achi tok.

6. Ilbusha yak o i nukhaklo kak osh ilvppa achi tok keyu ; amba hukopa yatuk osh, micha yvmmak osh shuk-

cha ya ishi hatuk osh, nana kvt yummma ai ulbeha ho shaiyali yatuk ak a tok.

7. Mihma Chisvs vt, Ant ik yvmihchi, ish im aiahnashke, a sa hollopa chi nitak mak a hi o, ilvppa ilatomba hatuk oke.

8. Ilvusha yak okvto hvchim asha na bilia chatuk; amba vno ak okvto hvchim anta li a bilia he keyushke.

9. Yohmi ma yummma ant anta ka Chu okla hvt lauvt akostininch tok: mihmvt Chisvs ak bano kak o keyu, amba Lasalvs, yvmmvt illi tuk o, falaminchit tanichi tuk ash it aieninchit pisa chi hosh okla ai vla tok.

10. Yohmi kia na-holitopma isht asha pehlichi vhleha ho-kvto Lasalvs ak kia aieninchit illica hinla kvt, isht it im anumpulit maya tok.

11. Yvmmak atuk pulla mak o Chu vhleha laua kvt yummma itvnawvt, Chisvs a ai i yimmi kak a tok.

12. Nitak ont atukla ma okla laua kvt ai-impma holitopa ya itvnawa tuk vt, Chisvs vt Chelusalem a vla chi hosh minti na okla haklo mvt,

13. Pam vpi naksish a ishit, kohchvt afamvt okla ia mvt, chitoli hosh, Hosanna, Islael i miko Chitokaka i hohchifo ho il ai eshi hosh aya hokvt holitopa mak oke, okla achi tok.

14, 15. Saion ushetik chia hvt chi nukshopa ná, chi miko vt issuba haksobish falaia himita ya on talaia hosh minti hoke, achi hosh holisso hatuk oka, Chisvs ash ot issuba haksobish falaia himita yo pisa mvt, yvmmak ash on talaia tok.

16. Ummona kvno nan im ai ithvna vhleha hvt ilvppa ik ai akostininch ki tok; amba Chisvs vt ont a holitopa ha yak o, nana kvt yakohmi hosh yummma isht a holisso tok a, anonti okla hvt nana kash ai i yvmihchi tok aiena ka ithai-yana tok.

17. Mihma yvmmvt Lasalvs a ahollopi ai i howvt kohchit illi tuk a falaminchit tanichi ka, okla apihvt aya tuk ash osh ai ulhtokowa ka anohonli tok.

18. Yvmmut na-fehna ilvppa yvmihchi tuk a okla haklo tuk atuk osh, ilvppak atuk pulla kak o okla mak kia ont afama ha tok.

19. Yohmi ma Falisi vhleha hash ot, Nana hvsh kanihma he keyu kvto hvsh akostininch cho ? yakeh ! okla puta hash ot yummak o pit a kanvllishke, ilap bika it im achit maya tok.

20. Mihma Klik vhleha kanimi kvt vba pit aiokpvchit ayvt, ai impa holitopa ashka ai vla tuk vt takla maya tok.

21. Yohmi hatuk osh yummak ash ot Kalili yakni Bet-saita tvmaha a minti tuk, Filip ash im ai ona mvt, Pi shahli ma ! Chisvs a pisa pi bvnnvshke, achit i ponaklo tok.

22. Mihma Filip ash osh ivt, Antilu a ont im anoli tok ; atuk o anonti Antilu ash osh Filip a ita tuklo cha Chisvs a im anoli tok.

23. Mihma Chisvs vt afalaminchi mvt, Hatak Ushi vt a holitopa he tuk a hvshi kanvlli vlhpisa kvt ai onvshke.

24. Ahlishke, ahli mak o hvchim achi lishke, Onush nihi vt yakni anyukaka yo itola cha, illi ho keyukmvt, ilap ash biekvt itonla hoke ; amba illi hokmvt, waya fehna chatuk oke.

25. Kvna hosh ilap im ilhfiopak a i hullo fehna hokvto, i kvnia hi oke ; amba kvna hosh yakni ilvppa ahanta kvt ilap im ilhfiopak a i nukkilli hokvto, mihma ieshit okchayvt a bilia hi oke.

26. Hatak nana hosh vm antia hokmvt, siakaiyashke ; mikmvt kanima yo ai ahanta likma, yummak o an tishu hoh kia anta hi oke ; hatak nana hosh vm antia hokma, yummak o Aki vt holitobla he mak oke.

27. Himak oka sa shilombish vt ik im ai vlhpesoshke : yohmi ka, Aki ma ! hvshi kanvlli ai vlhpisa takali ilvppa ai isht is sai i hlakofichashke, achi likma, nanta chi cho ? yohmi kia ilvppak a he mak o hvshi kanvlli vlhpisa takali ilvppa im aya li ha tok oke.

28. Chi hohchifo ha ish holitoblichashke, Aki ma ! achi tok. Yohma ma vba ya auet ai anumpa kvt, Yummak oka holitoblichli tuk osh, anonti himmakma holitoblichli la chi akinli hoke, achi tok.

29. Yohmi hatuk o okla hv bilika hiohmaya tuk vt, yum-

ma haklo mvt, Hilohvshke, achi tok. Mihma kanimi kvt, Enchil osh auet im anumpuli hoke, achi tok.

30. Chisus ash osh afalaminchit, Uno ak atuk mak o anumpa ilvpput auet takali ho keyu, amba hvchishno pulla kak oke.

31. Himak okuno yakni vt nana im ai vlhpisa mak oke: himak okvno yakni ilvppa ai i shahli nan im aiyahanchi ash ot issvt kohcha he mak oke.

22. Uno vt yakni a a mokofvt vba takali li hokmvt, hatak moma ka halvllit il a kanvllichi la hi oke, achi tok.

33. Ai-illi kaniohmi ho isht illa he ak osh anoli hosh ilvppa achi ha tok.

34. Mihma okla hash ot afalaminchi mvt, Klaist vt ahanta na bilia ho nan-vlhpisa holisso ha okla il a haklo chatuk; yohmi ka katiohmi ho, Hatak Ushi vt vba ya takala hi o ish achi cho? Hatak Ushi ilvppak osh kvta hokak o? okla im achi tok.

35. Mihma Chisus vt, Himonasi takla kak o tohwikeli hvt hvch in takanli hoke. Tohwikeli hvt hvchin takanli takla kak osh hvsh nowashke, yvmmak keyukma okhlili hvt hvchi onvtula hinla hoke. Kvna hosh okhlili ho nowvt aya hokuto, kanima yo ia kvt ithana keyu hoke.

36. A tohwikeli hvt hvchin takanli takla kak osh a tohwikinli vlla hvchia ha chj kvt, a tohwikeli ha hvsh i yim-mashke, im achi tok. Ilvppak o Chisus vt anumpohonli mvt, ai i filvmmiit kvnia cha, ik i haiako ki tok.

37. Na-fehna laua ho itikba ya yvmmak ash ot ai yumi-hinchhi hoh kia, okla ai i yimma he keyu ki tok.

38. Yohmi kvt hopaii Esaias vt anumpuli mvt, Chitokaka ma! nana il anoli ka kvta hosh pi yimmi cho? micha kvta hak o Chihowa i shakba mvt i haiaka tuk oh cho? ahanchi tok a ont aiahla chj mak a tok.

39, 40. Anonti Esaias vt i himmakma, Nishkin a isht ik peso, mikmvt chukvsh ma ik akostininchcho kish, chukvsh himona ik anukfoyuko ki, ak hlakoficho ka chj ka, nishkin a im akummi mvt, anonti chukvsh ma i kyllochishke; achi tok oka, okla yimma he keyu ki tok.

41. Yvymma im isht a holitopa ya pisut yvymma pit isht anumpuli mak osh Esaias vt ilvppa puta ka achi tok.

42. Yohmi kia nan apesa hochitoka vhleha hvt i yimmi kvt laua akinli tok : yohmi kia sinakak a a kohchicha hinla hatuk o, Falisi vhleha pulla kak o yummak ash i yimmi hatuk vt okla ik otvnincho ki tok.

43. Hatak ai im aholitopa yak o im aghukma kvt, Chihowa ai im a holitopa ka im i shahli hatuk osh.

44. Chisvs vt chitoli hosh, Kvna hosh vno a a yimmi kvt vno ak o a yimmi ho keyu, amba auet sa kanchi tok yummak o i yimmi mak oke.

45. Micha kvna hosh vno a sa pisa hokmvt, auet sa kanchi tok ma pisa mak oke.

46. Kvna hoh kia vno a a yimmi hokvt ai-okhlilika ya ik ai ahanto ka chi mak o, nan-tohwikeli mak osh ayut yakni a vla li ha tok oke.

47. Yohmi kia hatak nana hosh vñ anumpa ha haklo cha, ik yimmo hokma, nan im apesvt ilbvshali la hi o keyushke ; yakni ak o nan im apesvt ilbvshali la hi osh aya li tok keyu ; amba yakni a okchalinchi la chi ha tok oke.

48. Kvna hosh vno a sa shitilema cha, vñ anumpa ha ik ahnincho hokvno, achvfa hosh nan im apesvt ilbvshali kvt a sha hoke ; anumpa anumpohonli li tuk ash fehna akinli kak osh nitak ai ishtaiyopikma nana im apesvt ilbvshala he mak oke.

49. Vno akinli hosh nana ka ahnit anumpuli li tuk keyu hoka ; amba auet sa kanchi tok Aki ak osh nana ho achi la he, mikmvt nana ho anumpuli la he aiena ka nana vñ ape-sa ha tok.

50. Yohmi ka i nan-vlpisa vt ai-okchayvt bilia yoka ithaiyana lishke ; yohmi hatuk osh nana ho anumpohonli li ka, yvmmvt Aki vt vno a a miha tok a mih mak o anumpuli li hoke, achi tok.

C H A P T A XIII.

Chisvs vt nan im ai ithvna vhleha h_q iyi im achifa, 1. 18 Chisvs vt Chutas ak osh ishit inla im issa ch_i hatuk a, nana kvt isht vlhpisa h_q isht im atokoli. 31 Chisvs vt ilap nan isht a holitopa hi anoli, mihmvt nan im ai ithvna vhleha hvt it i hulla ch_i ka, i miha mvt, 36 Pita yvt hituchina ha yo ilapa ik ithano miha ch_i ka, tikbanli im anoli.

1. NAN vbanvblit ont ia ai-impa holitopa kvt ik ai ono kisha h_q, Chisvs vt ilapvt yakni ilvppa ai issvt, Iki a im ia ch_i hvshi kanvlli vlhpisa kvt ai ona ka ithaiyana mvt, immi hvt yakni paknaka asha ka i hullo hatuk vt, yummva i hullo kvt imomvt ont illi tok.

2. Yohmi ka okhlili ai-impa yvt ont vlhtaha yummva fehna ma, yummak ash ishit inla im issa ch_i ka Setan vt Saimon ushi, Chutas Iskaliot chukvsh a anukfohkichi hatuk o;

3. Chisvs vt, Iki vt nana moma ka ilap ak o ibbak a fohki tok, micha ilapvt Chihowa hak o a minti ha tok osh, anonti Chihowa hak o im ia ch_i kvt ithaiyana mvt,

4. Okhlili impa asha tuk vt wakayvt, im anchi ash o naksika pit bohli mvt, tikba takali ishi cha, isht il ai vskofuchi tok.

5. Yohmi ha yosh oka ya ampo pit vnit ishi cha, nan im ai ithvna vhleha iyi yash achifvt isht ia mvt, tikba takali isht ai il ai vskofanchi tuk ash o ishit isht i kasholichi tok.

6. Atuk osh Saimon Pita yash o ont a hikia tok ; mihma Saimon Pita yash ot, Chitokaka ma ! saiyi ya ish achifa ch_i hoh cho ? im achi tok.

7. Chisvs vt afalaminchi mvt, Nana ka yvmihchi li ka himonasi kuno chik akostininchoshke ; yohmi kia himmak o ish akostininchha hi oke, im achi tok.

8. Pita yash ot, Saiyi yak okvno nitak nana chik sum achifo kashke, im achi tok. Chisvs vt afalaminchi mvt, Ak chi achifo hokma, is si ahalaia keyu hoke, im achi tok.

9. Saimon Pita yash ot, Chitokaka ma ! saiyi ak bano

keyu kashke, amba subbak, micha sa noshkobo pit aieninchi hosh, im achi tok.

10. Chisus vt, Ulhchifa tuk okvto himmak ma ik vlhchifo ho iyi ak bano kia, momvt kashofa chatuk; yohmi ka hvchishno vt hvchi kashofa akinli kia, hvsh moma keyushke.

11. Kvna hosh ilapa ishit inla ibbak fohka chi hoka ithana, yohmi hatuk osh, Momvt hvchi kashofa keyushke, achi tok.

12. Yohmit iyi ya im achifvt taiyahli mvt, im anchi ash ishi cha, falamvt aka binili mvt, Nana ka hvchi yumiichi li ka hvsh ithana cho?

13. Uno a, Na pithvnanchi, pin Chitokaka hvsh si achi; yohmi ka mih sia ho mvhlis hoka, vlhpesa hvsh mihvshke.

14. Yohmi kia vno vt hvchin Chitokaka, micha na hvch ithvnanchi sia hatuk osh, hvch iyi ya hvchim achifa li hatuk okma, hvchishno ak kia hvchishno bika iyi ya hvsh it im achifa he vlhpesa hoke.

15. Uno vt a hvchi yumiichi li tuk mak o hvsh a chiyuhmicha he mak o, na hvchim abvchi li hatuk oke.

16. Ahlishke, ahli mak o hvchim achi lishke; Tishu hvt i shahli ha imaiya chatuk keyu; mikma nan-vlhtoka yosh aya kvt nan-atokoli tuk a imaiya chatuk keyu hoke.

17. Ilvppa puta ka hvsh ithana cha, yummak o hvsh yumiichi hokmvt, na hvchi yukpa mak oke.

18. Moma kak o isht hvchi anumpuli li ho keyushke: kanima kak o vno vt atokoli li tok okvto ithana lishke: yohmi kia Holisso Holitopa yvt, Pvska svbai vpa kash ot iyi kotoba ya isht a sai o wakelishke, achi ha tok a yummvt ont ai ahla chi mak oke.

19. Yummak ash ot ont ai yvmohmi ha ma, vno ak atuk a hvchi yimma he mak o, ik ai ono kisha ho himak ano hvchim anoli lishke.

20. Ahlishke, ahli mak o hvchim achi lishke, Kvna kia vno ak osh nan tohno li ho aya ka ahninch hokvt, vno ak o si ahninch hoke; micha kvna kia, vno a si ahninch hokmvt, auet sa kanchi tok mak o ahninch hoke; im achi tok.

21. Chisvs vt yakohmiechit anumpuli mvt, chukvsh anukaka ai ik im vlpieso mvt, atokolit anolit, Ahlishke, ahli mak o hvchim achi lishke, Hvsh achufona kvt svshit inla ibbak o hvs sa fohka chi hoke, achi tok.

22. Mihma nan im ai ithuna vhleha hash ot kanima kak o miha hatuk a ik ai akostinincho mvt, filemvt okla iti pisa tok.

23. Yohmi ma nan im ai ithuna vhleha ha achufa ka Chisvs vt holitobli yatuk o, Chisvs ikkishi ha vtayvt asha tok.

24. Yohmi tuk o yummak ash osh kyna hak o miha hatuk ma a ponakla chi ka, Saimon Pita yvt i yuchunukli tok.

25. Mihma Chisvs ikkishi ha vtayvt asha hosh, Chitokaka ma! kvta hak o cho ? im achi tok.

26. Mihma Chisvs vt afalaminchi mvt, Itih fohka achufa ka pit okvhit kohchi li kvt, kanima ho pit ima likma, yummak osh mih mak a chi hoke, achi tok. Atuk osh itih fohka achufa ka pit okvhit kohchi mvt, Saimon ushi Chutas Iskaliot ak o ima tok.

27. Mihma itih fohka achufa ishi ma, Setan vt yummak ash ont ckukowa tok. Mihma Chisvs vt, Nana ka ish ymohma chi kvt tushprt ish yvmihchashke, im achi tok.

28. Nana ka a kaniohma hi o, ilvppa im achi ka, impvt maya tuk vt hatak achufa kia ik akostinincho ki tok.

29. Chutas ak osh shukcha ya ishi hatuk oka, ai impa holitopa asha takla ka nana ho pi bunna hinla ka chumpakma, keyukmvt ilbvsha vhleha yak o nanasi kia i hopela hinlakmá, nana ho Chisvs vt i miha hatuk a, kanimi kvt im ahoba tok.

30. Mihma itih fohka achufa ka ishi makinli hosh kocha ia tok ; mihma yummvt ninak a tok.

31. Yummak ash ot kocha ia ma, Chisvs vt, Himak okuno Hatak Ushi vt ai ahlit holitopakma, anonti Chihowa yvt yummak o isht a holitopa ai ahla chi mak oke.

32. Chihowa yvt yummak o isht a holitopa ai ahli hokmvt, Chihowa yvt anonti ilap inlit yummak ash o ai isht il

a holiloblich i ahla chi akinli: micha chekosi fehna yvm-mak ash o holiloblich ai ahla chi mak oke.

33. Chipota vhleha ma! chekosi takla kak o hvchi takla asha lishke; yohmi ka hvs sa hoy a chi hoke; Chu okla ha, Kanima yo ai ia li hoka, hvsh ona he keyushke, im achi li tuk mak osh anonti hvchishno ma himonasi a hvchim achi lishke.

34. Hvsh it i hullo kvt, vno vt hvchi hullo li tuk a ohmichi hosh hvchishno yak kia hvsh it i hulla he mak o, nan vlpisa himona ka hvch ima lishke.

35. Hvchishno bika yvt hvsh it i hullo ilvppa pulla kak o nan vñ ai ithvna hvchia hatuk a, hatak moma kvt isht ithaiyana he mak oke, achi tok.

36. Saimon Pita yash ot, Chitokaka ma! katima ko ish ia chi hoh cho? im achi ma, Chisus vt afalaminchi mvt, Kanima yo ia li hoka, himonasi kuno pit is siakaiya he keyushke; yohmi kia i himmak o pit is siakaiya hi oke, im achi tok.

37. Pita yash osh, Chitokaka ma! Na katihmi ho himonasi akinli kuno pit ak chiakaiyo ka hinla cho? chishno a pulla kak o vñ ilhfiopak a aka bohyuli lashke.

38. Chisus vt afalaminchi mvt, Uno a pulla kak o chim ilhfiopak aka ish bohyula chi cho? Ahlishke, ahli mak o chim achi lishke; Akaka yvt ik olo kisha ho, hituchina ha chik svthano ish miha chi hoke, im achi tok.

CHAPTA XIV.

Chisus vt nan im ai ithvna vhleha ha pehlichit impvt asha moma hosh, apihvt vba yakni a ont okla asha hi a, i miha, 1; 13 micha ilap hohchifo hak o nan isht asilhhvt anumpuli hokvno moma im aiahicha hi vt miha. 15 Chisus vt nanuktalali inla auet ima hi vt miha.

1. HUCHI chukvsh vt nana ik hvchi kaniohmo kashke; Chihowa ha, oh i yimmi cha, vno ma oh a yimmí.

2. Aki in chuka ya aiasha yvt laua hoke: ik yvmohmo

hatuk okma, hvchim anoli la he tuk oke, aiasha ya hvchim apoksiachit atahli la chi hosh ia li hoke.

3. Yohmi kvt ont apoksiachit hvchim atahli li hokmvt, anonti falamvt vla lish, vno vt kanima yo ai ahanta likma, hvchishno mvt yvmmak o hvsh ai ahashwa hi a, ant hvch ishit ai vta li ka ona la hi oke.

4. Yohmi hokvt kanima yo ia li hoka pit hvsh ithana; mikmvt hina ya hvsh ithanushke, im achi tok.

5. Tamas ash osh, Chitokaka ma! kanima yo ish ia hoka il ithana keyu: yohmi kvt katiohmi hosh hina yano il ithana hinla cho? im achi tok.

6. Mihma Chisvs ash ot, Uno ak osh hina, micha ai ahlika, ai okchaya aiena sia mak oke: vno ak o keyukma hatak nana hosh Aki a im ai ona he keyu hoke.

7. Uno a hvs svthana hatuk okmvt, Aki ma hvsh ithana akinla he tuk oke: atuk kia hvsh pisa tuk okvt himak ai vhlit ia hokvno hvsh ithaiyanushke.

8. Filip ash osh, Chitokaka ma! Chiki a ish pi haiakuhashke, yohmikma pim vlpesa hinla hoke, im achi tok.

9. Mihma Chisvs vt, Chi takla ahanta li hopakit taiyaha ka, Filip vt chik svthano kisha tuk oh cho? kvna hosh vno a sa pisakmvt, Aki a pisa hatuk; yohmi ka katiohmi ho, Chiki a ish pi haiakuhashke, ish achi cho?

10. Uno vt Aki ibai achafa likma, anonti Aki vt vno a a svbai achafa ka ik chi yimmo cho? anumpa hvchim anum-pohonli li kvt vno akinli um anukfila hosh anumpuli li keyushke; amba Aki svbai achafa yvmmak osh nana ka ai yvmihchi hoke.

11. Uno vt Aki a ibai achafa likma, anonti Aki vt auet svbai achafa ka hvs sa yimmashke; keyuk mak heto nana kvt a kaniohmi tuk yvmmak pulla kak o isht ai hvs sa yimmashke.

12. Ahlishke, ahli mak o hvchim achi lishke, Kvna hosh a yimmikmvt, vno nana ai yvmihchi li tuk ash yvmihchi akinla hi oke: yohmikmvt vno vto Aki a im ia li hatuk oka, nana kvt a fehna ilvppa puta ka i shahli ho yvmihcha hi oke.

13. Micha a hohehifo pulla ho nana ka isht hvsh asilhha hokma, Iki vt Ushi a ai isht a holitopa ai ahla hi a, mihi yo yvmihchi la hi oke.

14. A hohehifo pulla ho nana ka isht hvsh asilhha hokma, ai yvmihchi la hi mak oke.

15. Hvs sa hullo hokmvt, vm anumpa vlhpisa puta ka hvsh holitoblashke.

16. Mikma Aki a im asilhha likma, yvmmut a hvchi takla ahanta na bilia he mak o hvchi nanuktalali inla ya auet hvch ima hi oke.

17. Yvmmut Shilombish ai ahli, yvmmak oka yakni okvto pisa keyu, micha ithana keyu aien ahatuk osh, ahnincha he keyu mak oke; yohmi kia hvchishno yokvno hvchi takla ahanta tuk osh, anonti hvchi anukfoyuka chi hoka hvsh ithana hoke.

18. Hvchi vlhtakla ho hvch issut aya la he keyu; hvchim aya la hi oke.

19. Chekosikma yakni vt sa pisa chi keyu hoke; amba hvchishno vto hvs sa pisa hi oke; yohmi ka sai okchaya hoka, anonti hvchi okchaya he akinli hoke.

20. Uno vt Aki a ibai achafa likma, anonti hvchishno vt uno a hvs svbai achafa na hvchishno ma hvch ibai achafa li aien a ka, nitak yvmma fehnakma hvsh akostininch hi oke.

21. Kvna hosh vm anumpa vlhpisa vt in tonla cha, holitobli hokmvt, yvmmak osh sa holitobli mak oke; micha kvna hosh uno a sa holitoblikmvt, Aki ma i holitopakma, uno mvt holitoblit il im otvninch la hi oke.

22. Chutas vt Iskaliot ak keyu hosh, Chitokaka ma ! katiohmi ho pishno ano ant ish pim ile haiakuhi hokak osh, yakni ano chik im ile haiakucho ka chi hoh cho ? im achi tok.

23. Chisvs vt afalaminch mvt, Hatak vt a hullo hokmvt, vm anumpa ha holitobla he; yohmikma Aki vt ilapo ma holitoblikma, il im aya cha, il ibai vtta he mak oke.

24. Uno a a hullo keyu hokvto, vm anumpa ha ik holitobli hoke; micha anumpa ilvppa hvsh haiyaklo ka vm anumpa keyu, amba auet sa kanchi tok Aki ak o immi hoke.

25. Huchi täkla ahanta li täkla hatuk mak osh ilvppa puta ka isht hvchim anumpohonli lishke.

26. Yohmi kia nanuktalali, yummvt Shilombish Holitopa mak o a hohchifo pulla hatuk mak o Aki vt auet kancha chi hoka, yvmmak osh nan okluha ka hvch ithvnanchit, nana ho hvchim ahanchi li tuk ma, moma falaminchit hvchi anukfohka hi oke.

27. Nanaiya ya hvchi bohli lishke: a nanaiya ya hvch ima lishke: yakni vt ima chatuk a chohmi keyu ho hvch ima lishke. Huchi chukvsh vt ik kaniohmokmv^t, anonti ik nukshopo kashke.

28. Ia li tukmv^t, anonti falamvt hvchim aya la hi oke, hvchim achi li ka hvsh haklo kuno. Hvs sa hullo hatuk okmv^t, Aki ak o im ia li hoke, achi li tuk a na hvchi yukpa he tuk; Aki vt vmaiya hatuk oka.

29. Micha ont ai ahlikma, hvsh i yimma he mak o, himonasi ik ono kisha ho hvchim anoli li tuk oke.

30. Yakni ilvppa ai i shahli yatuk mv^t, nana ho isht a si ahalaia keyu hosh minti hoka, himak a pill a mnno hvch it im anumpuli li fehna chi keyu mak oke.

31. Yohmi kia Aki a holitobli li ka, yakni vt ithaiyana chi ka, Aki vt nana ho um apihisa tok a, mih mak o yvmich*hi* li hoke. Ho wakayá, kiloh ilhkoli.

CHAPTA XV.

Chisvs vt paki vpi yosh naksish puta aieno hosh nan isht vlpisa ilvppak o hatak vt ilap ak o pit ai achafa pulla hosh vnit waya ka chohma he ai vlpesa hatuk a anoli, 1 : 9 micha ilapvt nan im ai ithvna vleha ha i hullo fehna hatuk vt anoli mv^t, 12 anonti yvmmakmv^t it i hullo kv^t yvmmak inli ho chohma hi a in tohno; 19 yakni ilvppak okvt ilap, micha Iki ita-tuklo ka ik ahnincho yatuk okvt yvmmakma i nukkillit ilvshacha hi a im anoli.

1. UNO ak osh pak-vpi ahli sia hokma, anonti Aki ak osh apoksiachi oke.

2. Naksish uno ak o a sai offo hosh vni keyu hokma, mo-

minchit ishit kanchi hoke: mikmvt naksish vt vni hokrto, isht i shahlit vna chi ka, achukmalit apoksiachi hoke.

3. Anumpa isht hvchim anumpohonli li tuk pulla ho himonasi a isht a hvchi a kashofvshke.

4. Uno a ho subai achafá; mikma uno mvt hvch ibai achafa lashke. Naksish vt vpi ak o pit a hikia ho keyukmvt, ilap illa kvt vna he keyu chatuk a, yummak i chiyuhmit hvchishno ak kia uno a hvs subai achafa ho keyukmvt, nana hvsh kanihma he keyushke.

5. Uno ak osh pakvpi sia hokma, hvchishno vto naksish hvchia hoke. Kuna hosh uno a subai achafa na anonti ilap ma ibai achafa li hokma, mihi yosh vni fehna chatuk oke: uno ak o keyukma nana hvsh kanihma he keyu hoke.

6. Kuna kia uno a subai achafa keyu hokma, naksish mak o ai itilauechit kanchi na bushi chatuk; yohmikma hatak puta mvt yummak ash aiowvt luak a pila na lua chatuk oke.

7. Uno a hvs subai achafa na um anumpa mvt hvchi anukfoyuka hokma, nana ho hvsh aiahni cha hvsh asilhha hokvt, hvchim ai ahla hi oke.

8. Hvs vni fehna yummak okmak o, Aki vt isht a holitopa ai ahla he; yohmikma nan um ai ithuna hvchia mak a hi oke.

9. Uno a Aki vt a hullo tok mak o, ai itilauechi hosh hvchi hullo li hoke; a sa holitobli kvt hvsh biliashke.

10. Um anumpa vlhpisa puta ka hvsh im antia hokmvt, a sa holitobli kvt a hvchi bilia he: uno vt Aki a im anumpa vlhpisa puta ka im antia li kvt, ai i hullo mvt a sa bilia tok mak o hvsh chiyuhma hi oke.

11. Hvchishno pulla atuk mak o nan isht um ilaiyukpa hatuk mvt hvchin takali bilia na, na hvchi yukpa kvt aloto-wa chi mak o, ilvppa puta ka isht hvchim anumpohonli li hoke.

12. Uno vt hvchi hullo li tok mak o, chiyuhmichit hvsh it i hulla he, ilvppak osh um anumpa vlhpisa mak oke.

13. Hatak vt i kana vhleha ha i hullo kvt im ilhfipak a aka bohyuli hoka, hatak nana kia yvmma i shahlichit it i hulla hi vt ikshoshke.

14. Nana ho huchim apesa li ka hush yvmoohmi hokmvt, a kana huchia mak oke.

15. Himak pilla kvno ilhtohno huchi achi la he keyu; ilhtohno yokvto, i shahli hvt nana ho isht ahanta ka, akos-tininch keyu chatuk; amba nana ho Aki a im a haklo li tuk vt okluyuha huchim anoli li hatuk okvt, a kana vhleha huchi achi lishke.

16. Huchishno ak osh hvs si atokoli tok o keyu; amba itvnowvt vnit hush waya he ak atuk oke; yohmikma huchi a waya kvt aiasha na Aki a nana ho a hohchifo pulla kak o isht hush im asilhhakma, huch ima he mak o, vno ak osh ai atokolit huchim apesa li hatuk oke.

17. Hush it i hulla he mak o, ilvppa huchim apihisa li hoke.

18. Yakni vt huchi nukkilli hokmvt, ik huchi nukkillo ki-sha hosh vno a a nukkilli tok a hush ithaiyanvshke.

19. Yakni ak o hush ai achvfa hatuk okmvno, yakni vt immi hatuk okvno holitobla he tuk; amba yakni a hush ai achvfa keyu; amba vno ak osh atokolit yakni a a kohehit huch ishi li hatuk; yohmi hatuk o yakni vt huchi nukkilli hoke.

20. Tishu hvt i shahli ha imaiya chatuk keyu, huchim achi li tok anumpa yvmma hush ithaiyanashke. Uno a okla svlbvshachi tok okmvt, huchishno ma huch ilbvshacha he akinli hoke; vñ anumpa ha im antia tok okmvt, huchim anumpa ha im antia he akinli hoke.

21. Yohmi kia auet sa kanchi tok a pit ithana keyu hokvt, vno pulla hatuk mak o ilvppa puta ka huchi yvmihcha hi oke.

22. Uno ak osh ayvt vlt ant ak im anumpulo hatuk ok-mvno, ai ashvchika yvt okla ik im iksho ka he tuk; amba himak okvno nan im ai ashvchika ya isht ompoholma hi v. okla ik im ikshoshke.

23. Kvna hosh vno a a nukkilli hokvt, Aki ma i nukkilli akinli hoke.

24. Uno vt na-fehna puta ka, hatak inla nana kia ai yv-mihchi chatuk keyu ka ai itintakla ma vno vt ai yv-mihchi li

tuk keyu hokmuno, nan ai ashvchika yvt okla ik im iksho ka he tuk ; amba himak okvno pisa cha, anonti vno, mikmvt Aki ita-tuklo ka i nukkilli tuk oke.

25. Yohmi kia na kaniohmi keyu ho okla a nukkillishke, achi anumpa hvt i nan vlhpisa holisso ha a holisso tok vt ont ai ahla chi kak o, ilvppt ai yakohmi tok.

26. Yohmi kia nanuktalali, yummak okvt Shilombish ahli, Aki a a kohchvt aya mak o, Aki a im ai isht auet hvchi kanchi li vla hokmvt, yummak osh ai atokowa ka si anohonla he mak oke.

27. Yohmikma hvchishno vt nana vmonna ka si apehvt hvsh aya tuk okvt, nan ai-atokowa ka hvsh anoli akinla hi oke.

C H A P T A X V I .

Chisvs vt anonti nan im ai ithvna vhleha ha okla hvt ilvshala chi puta ka im anoli, 1: 7 mihmvt nanuktalali, yummvt Shilombish Holitopa mak o auet ima hi vt miha. 16 Falamvt tani ha yvt, ilapvt i nowvt aya pulla he im anoli ; 23 ilap hohchifo pulla ho Chihowa ha nan isht im asilhba hokvto im anumpa hvt holitopa pulla hi a miha.

1. IK hvchi ibetvblo ka he mak o, ilvppa puta ka isht hvchim anumpohonli li hoke.

2. Sinakak puta ka okla a hvchi kohchicha he ; ahli, kvna hosh hvchibi hokmvt, Chihowa ha holitoblichi mak o im ahoba he nitak vt mihinti hoke.

3. Yohmi kvt Aki, mikmvt vno il ita-tuklo ka ik pithano hatuk mak osh, ilvppa puta ka hvchi yvnihecha hi oke.

4. Yohmi kia nitak yummvt ai ona hokma, yummak oka hvchim anoli li tok a hvsh ithana he mak o, ilvppa puta ka hvchim anoli li hoke. Yohmi kvt vno vt hvchi takla anta li hokvt, nana vmonna hokvno ilvppa puta ka ak hvchim acho ki tok oke.

5. Yohmi tuk osh himonasi yokvno auet sa kanchi tok mak o falamvt im ia la chi hoke ; yohmi na hvsh kanima kia, Katima yo ish ia chi cho ? achit hvchik sa ponakloshke.

6. Amba ilvppa puta ka hvchim achi li kak o, nanukhaklo kvt hvchi chukvsh a alotolishke.

7. Yohmi kia ahli mak o hvch im anoli lishke. Uno vt ia li hok mak o nan isht a hvchim vlhpiesa chi hoke; vno vt ia li keyu hokmvno, nanuktalali vt hvchim aya he keyu: amba ia li hokmvt, yvmmma auet hvchi kanchi la he mak oke.

8. Yohmikma yummak osh vlakmvt, ai ashvchika, micha nan ai vlhpiesa, mikmvt nan-vlhpisa aienka okla puta ka, anukfohkicha hi oke.

9. Uno a okla a yimmi hatuk keyu hoka, nan im ai ashvchi hatuk a im otvnihinchha he;

10. Uno vt Aki a im ia li; yohmi na himmakma hvch ik sa peso hatuk oka, nan ai vlhpiesa hatuk a im otvnihinchha he;

11. Yakni a ai i shahli hvt nan im vlhpisa hatuk oka, nan-vlhpisa ma im otvnihinchha hi oke.

12. Na hvchim achi la he yokuto vm asha moma akinli kia, himonasi okvno yummak oka hvsh akostininchha he keyushke.

13. Yohmi kia Shilombish ahli, yummvt vla hok mak osh, nan ai ahlika puta ma hvch ithvnancha hi oke; yummak okvt ilap nana aiahni hosh anumpula he keyu hokvt; amba nana ho haklo tuk mak osh mihi yo anumpula hi oke; mikmvt nana a kaniohma he puta ka hvchim otvnihinchha hi oke.

14. Yummak okvt vno ak o vm ai ishi eha, hvchim otvnihinchha hi okvt, vno a sa holitoblichha he mak oke.

15. Nana moma Aki vt im asha kvt vmmi hoke; yohmi hatuk mak o, vno ak o vm ai eshi cha hvchim otvnihinchha he, hvchim achi li tuk oke.

16. Chekosikma hvs sa pisa chi keyushke; atukmvt antonti Aki ak o im ia li hatuk oka, chekosikma hvs sa pisa hi oke, im achi tok.

17. Yohmi ma nan im ai ithvna vhleha kaniohmi kvt, Chekosikma hvs sa pisa chi keyushke; antonti Aki a im ia li hatuk oka, chekosikma hvs sa pisa chi hoka hvpm achi ka, ilvppak osh katiohmi hoh cho? ilap biika it im achit maya tok.

18. Yohmi hatuk osh, Chekosikma, achi ilvppvt nanta hak oh cho ? nana ho miha ka kil im akostininchoshke, okla achi tok.

19. Ilapa okla i ponaklo bunna ka Chisvs vt im ithana hatuk osh, Chekosikma hvs sa pisa chj keyushke : atuk osh anonti chekosikma hvs sa pisa chj oke, achi li tuk yummak ash isht ai it im a ponaklot hush maya cho ?

20. Ahlishke, ahli mak o huch im achi lishke ; Huchishno yokuto nishkin okchi mintit hush yahaya chj hoke ; yohmikma yakni vto na-yukpa chj hoke : mikma huchi nukhaklo fehna he ; yohmi kia na huchi nukhaklo kash ot falamvt isht a huchi yukpa hi oke.

21. Ohoyo hvt vlla in tonla chikmvt, hushi kanvlli vlhpisa hvt im ai vla hokvt ilbusha hoke ; yohmi tuk kia hatak osh tobvt yakni a ai ituyula ka, na yukpa kut, vlla yvt in tola makinli hosh na palvmmi tuk a imi-haksi hoke.

22. Yohmi ka huchishno vt himonasi kuno huchi ilbushushke ; yohmi kia himmakma huchi pisa la chj akinli ; yohmikma huchi chukvsh vt yukpa he, mikma na huchi yukpa ka hatak nana hosh ishit huchi kancha wa.

23. Mikma nitak yummak fehnakma nana kia huchi ik sa ponaklo ka hi oke. Ahlishke, ahli mak o huchi im achi lishke, Uno a hohchifo ho nana ka Aki a isht a hush im asilhhakma, huchi ima he mak oke.

24. Tikbut a mihinti hokvno a hohchifo ha nana ka isht huchi ik asilhho ke tuk ; oh asilhhá ; yohmikmvt na huchi yukpvt isht alotowa chj ka, hush habena he mak oke.

25. Nana ilvppa puta ka nan isht vlhpisa ho isht huchim anumpuli lishke ; yohmi kia himmakma nan isht vlhpisa ho isht ak huchim anumpulo hosh, amba otvninchi achukma hosh Aki a isht a huchim anohonli la he nitak vt mihinti hoke.

26. Nitak yummak okuno a hohchifo ha nan isht a hush asilhha hi oke : yohmikma Aki a huchi isht im a ponaklo la hi oke ; huchim achi li keyushke.

27. Huchishno vt hvs sa hullo, mikmvt Chihowa ak o a

kochut aya li hatok a hvchi yimmi tuk : yohmi hatuk o Aki vt ilapo akinli kvt hvchi hullo hoka.

28. Aki ak o a kohchut aya hosh yakni a vla li tok osh ; anonti yakni ash issvt, Aki a im ia li hoke, im achi tok.

29. Nan im ai ithvna vhleha hash ot, Inta ! himak okvno achukmalit isht pim anumpuli cha, nan-isht vlhpisa ho chik anumpuloshke.

30. Nan okluha ka ish ithaiyana ka, hatak nana hosh nana ka a chim a ponakla hi o keyu ka himak okvno il akostininchishke ; Chihowa ak o a kohchut ish aya tok pulla ka ilvppak o isht a pi yimmishke, okla im achi tok.

31. Chisvs vt afalaminchi mvt, Himak ano okla hvchi yimmi cho ?

32. Inta ! hatak vt ilap in chuka aiyukali ka ai ita fimid-pvt ilap banochit hvs sa filvmmma chi ka hvshi kanvlli ai vlhpisa kvt mihinti tuk osh, anonti himak okvno ai ona hoke ; yohmi kia Aki ak osh si ahina hoka, vno ak illa he keyushke.

33. Uno pulla ho nana anuktanla ka hvsh iesha he mak o, ilvppa puta ka isht hvchim anumpuli lishke. Yakni pak-naka yokvno na palvmmi puta kvt a hvchim aiasha he ; yohmi kia hvchi nuktanla achukmashke ; vno vt yakni a imaiyachi li tuk oke, im achi tok.

C H A P T A X V I I .

Ishit inla ibbak fohka chi ninak a Chisvs vt vba pit anumpuli kvt, ilapvt illi tuk vt falamvt tani ha ya, Chihowa hvt nan im ai ithvna vhleha ha apelahanchi na im anukfila hvt ai it achvfa he, 1; 20 Chihowa, Ushi ita tuklo ka im anukfila pit ai itachvfa he : 24 yohmi cha ilap vt vba yakni a holitopvt ahanta ka ont apehvt maya he puta ka vba isht anumpohonli.

1. ANUMPA ilvppa puta ka Chisvs vt anumpohonli mvt, vba pit vba chakali cha, Aki ma ! hvshi kanvlli vlhpisa vyt ai onvshke. Chiso ha ish holitoblich*i* na anonti chiso mvt chi holitoblich*i* akinlashke.

2. Laua kvt kaniohmi ho ish im ihisa tuk ma, yvmmak

ash ai okchayvt bilia yo yummak ash ot ima hi vt, hatak puyuta ma ai imaiya he mak o, ish im apihisa tok oke.

3. Yohmi ka Chishno ak illa kak osh Chihowa ahli chia ka, micha Chisus Klaist auet ish kanchi tok ma okla ithaiyana he ak o ilvppak osh ai-okchayvt bilia yoke.

4. Yakni paknaka ya a chi holitoblich lishke. Natosvli isht ahanta la hi o is svma apesa tok a, atahli lishke.

5. Yohmi ka, Aki ma! yakni vt iksho mak o na holitopa ka isht chiba holitopa li ya tok mak o, himak a chishno a ai il a aieninchit is sa holitoblichashke.

6. Hatak puta ka yakni ak o ai ishit is svma hatuk a, chi hohchifo ha im otvninchi li hokvno; yummak okvt chimmi hatuk o, is svma hatuk oka, chim anumpa ha okla holitobli tuk oke.

7. Nana ka is svma tok okluyuha kvt chishno ak o a minti hatuk a himak okvno okla akostininchishke.

8. Anumpa is svma chash yummak o ima li hokvno; mihma yummak okla aiokpvchi mvt, vno vt chishno ak o a chi a minti li hatuk a, okla akostininch, micha chishno ak osh auet is sa kanchi tok aienka okla yimmi hatuk oke.

9. Yummak o isht chim ilvshvt anumpuli lishke; yakni ak o isht chim ilvshvt anumpuli li keyu, amba ilvppak o is svma tok a, yummvt chimmi vhleha hoka, isht chim ilvshvt anumpuli lishke.

10. Yohmi ka vmmi hvt momvt chimmi hokma, anonti chimmi hvt vno a vmmi makinli hoke: yohmi hoka vno vt yummak isht a sa holitopa hoke.

11. Himak okvno yakni paknaka ya himmakma ik si ai iksho mak oke; yohmi kia ilvppak okvt yakni a ai ahashwa na vno vt chim aya li mak oke. Aki holitopa ma! is svma tok vhleha ilvppak oka chishno chi hohchifo pulla hatuk mak o ish apesahanchi na yummak mvt ai itibai achufa kvt pishno a chiyuhmashke.

12. Pehliechit yakni paknaka ai ahanta li moma kvt chi hohchifo pulla ho isht ai apesahanchi li tok: is svma tok vhleha yummak oka apesahanchi li ma, achufa kia ik kvnio

hq, amba Holisso Holitopa vt ont ai ahla chj kak o, nan-ok-pvni ushi ak illa tuk oke.

13. Yohmi ka vno pulla hatuk mak o a nan-isht ilaiyukpa ma ilap inlit okla il ai esha hi o, ilvppa puyuta ka yakni paknaka isht ai anumpohonli li, yohmi tuk osh himak okvno chim aya li mak oke.

14. Chim anumpa ha ima li tuk oke: yohmi ma yummak okvt yakni a ai immi keyu kvt, vno vt yakni a ai immi sia keyu kak inli hq chohmi hatuk o, okla i nukkilli hatuk oke.

15. Yakni ak o a kohchit ish isha hi o chim asilhha li keyu; amba apesahanchit nan-okpulo ak o ishit chik ahalai-yacho ka he ak oke.

16. Yakni a ai immi keyu kvt, vno vt yakni a ai immi sia keyu kak inli hq okla chiyuhmi hoke.

17. Yummak oka na chim ai ahlika pulla kak o isht ish i kashofichashke; chim anumpa hak osh nan ai ahlika yoke.

18. Chishno vt yakni paknaka ya auet is sa kanchi tok mak o, chohmichit vno mvt ilvppak ma yakni paknaka ya a tiellehinli lishke.

19. Micha ilap ak kia nan-ai ahlika ya ai isht a kashofa chj ka, vno vt ilvppak pulla hatuk mak o ile kashofichi li hoke.

20. Micha ilvppa illa hq isht asihihla li keyu; amba ilvppa pulla im anumpa hatuk mak o a yimma he aienakak oke.

21. Moyumvt ai itib achufa kvt, Aki chia hut vno a is svbai achafakma, anonti vno mvt a chibai achafa li kak inli hq okla chiyuhmi cha, yummak mvt pishno a a pibai achafashke: yohmi na chishno ak osh auet is sa kanchi tok a okla moma kvt ithaiyanashke.

22. Yohmikma ilvpput ai itib achufa kvt pishno il itibai achufa kak inli hq chohma hi a, nan-isht aholitopa is svma tok a ilvppa ima lishke.

23. Uno vt ilvppa ai ibachafa likma, anonti chishno mvt auet is svbai achafa; ai yakohmi hq yummak osh ont ai ahli achufa ka tobashke; yohmikma chishno ak osh auet is sa

kanchi tok; a tok osh ilvppak oka ish i hullo kvt vno a is sa hullo kak inli ho ish chohmichi ka, yakni vt ithaiyanashke.

24. Aki ma! is suma tok vhleha hak kia kania yo ai ahanta likma, si apihvt asha cha, nan-isht vm aholitopa yummma is suma tok a pisa he ak o, ahni lishke: yakni vt ik tobo kisha mak o is sa holitobli tok mak oke.

25. Aki ahli achukma ma! yakni vt ik chithanoshke; yohmi kia vno vto chithana li; mihma chishno ak osh auet is sa kanchi tok a ilvppak okvto akostininch hatuk oke.

26. Yohmi na ilvppak o chi hohchifo ha isht im anohonli li tuk osh, anonti anohonli la chi hoke: yohmikma na-holitobli ai isht is sa hullo hatuk vt ilvppak ma anukfoyuka na, anonti vno mvt ai ibachafa lashke, achi tok.

C H A P T A X V I I I .

Chisvs vt osapushi yo ont chukowa, 1; 6 Chutas vt Chisvs a isha cni hosh ai vla na, Chisvs vt anumpuli ma, falamvt obvlhpelvt aka ont fohopa; 10 Pita yvt Malkvs haksobish a chanlit hokofi. 12 Chisvs a okla takchi cha isht ia mvt, Annas ak o isht im ona tuk osh achakalinchi mvt, Kaifafas ak o okla isht im ona; 15 mihma Pita yvt Chisvs a ik ithano miha. 29 Chisvs a Pailat ak o okla isht im ona ma, Pailat ash osh achukmalit nan im a ponaklo.

1. CHISUS vt ilvppa puta ka ahanchit in taiyaha mvt, nan im ai ithvna vhleha pehlinchit Kitlon bokushi a pit tanvblit osapushi vt yummma talaia tuk o, nan im ai ithvna vhleha hash ai it apihvt ont chukowa tok.

2. Yohmi ka Chisvs vt nan im ai ithvna vhleha ha pehlinchit yummma ai ona fehna chatuk a ishit inla im issa tok Chutas ak kia yummma pit ai ithana tok.

3. Yohmi hatuk osh Chutas ash ot hatak ai-itapeha achufa, i kvpitvi vhleha aienka na-holitompa isht asha pehlichii vhleha, mikmvt Falisi vhleha aienka ai im ai ishi mvt, pula afohka, mikmvt na shimahli pula, micha na halupa aienka sholi hosh yummak ash ai vla tok.

4. Yohmi ma Chisvs vt nana hosh ilapa ai onvtuyula chi

puta moma ka ithana hatuk okvt, iwt ont afamvt, Kvta ho hush hoyo cho ? im achi tok.

5. Mihma, Chisvs Nasalet minti ak oke, okla im achi ma, Chisvs ash osh, vno ak osh mih sia mak oke, im achi tok. Mihma ishit inla im issa tok Chutas ash kia yummatakla hikja tok.

6. Atuk o, Uno ak osh mih sia mak oke, im achi makinli ho, okla obvlhpelvt iwt aka ont kaha tok.

7. Mihma atuklanchit i ponaklot, Kvta hak o hush hoyo cho ? achi tok. Mihma, Chisvs Nasalet minti ak oke, okla achi tok.

8. Chisvs vt afalaminchi mvvt, Uno ak osh mih sia hatuk vt hvchim anoli li kvno ; yohmi hoka vno ak o hush sa hoyo hatuk okmvvt, ilvppak okvno asht ik itvnnowá, hush im ah-nashke.

9. Yohmi na yummak o isht anumpuli hosh, Is svma tok vhleha hokvt achufa kia ik sa kunioshke, ahanchi tok a ont ai ahlashke, achi tok.

10. Yohmi ma Saimon Pita yvt bvshpo falaia shanli tuk osh halvllit shufi mvvt, na holitompa isht asha pehlichi i shahli in tishu ho isht fahamvt, haksobish isht impak imma ya chanlit hokofi tok. Tishu hohchifo hvt Malkus a tok.

11. Mihma Chisvs vt Pita yash o, Chi bvshpo falaia ya i shukcha pit fohki ; isht ishko Aki vt auet vma tok a ak ai ishko ka hinla cho ? im achi tok.

12. Yohmi ma hatak aya achufa, micha kypituni, mikmvvt Chu okla nan vlhtoka vhleha aienka kash ot Chisvs ash ishi cha, takchi tok.

13. Mihmvvt yummak osh Kaiafas vt afummi yummfa fehna ka na holitompa isht asha pehlichi i shahli yatuk o, yummfa ipochi yatuk oka Annas ak o tikba okla isht im ona tok.

14. Kaiafas ilvppak osh hatak achufa hosh okla hoka vlhblobut illa he ak o ai vlhpiesa ka, Chu okla ha it im apesa tuk a tok.

15. Mihma Saimon Pita yvt Chisvs a pit iakaiyvt aya ma, anonti nan im ai ithuna achufa yummak oka na-holi-

tompa isht asha pehlichi i shahli hvt ithana hatuk o, Chisus a awant na-holitompa isht asha pehlichi i shahli i nan-ai-apesa ya ont chukowa tok.

16. Amba Pita vto okhissa kocha yak o hikia tok. Yoh-mi ma nan im ai ithvna achufa na-holitompa isht asha pehlichi i shahli hvt ithana hatuk, yummak ash ot kohchvt ivt, ohoyo okhissa apesvchi yash ont im anoli cha, Pita ya ilaelit chukowa tok.

17. Mihma ohoyo himita okhissa apesvchi yash ot Pita ya, Chishno ak kia hatak ilvppa nan im ai ithvna chia keyu? im achi ma, Mih sia keyushke, im achi tok.

18. Mihma kapussvchi hatuk o, ilhtohno vhleha, micha nan vlhtoka vhleha aiena kash ot tobaksi yo oti cha, libisha hosh hiohmaya tok; mihma Pita yvt takla hikiyt libisha tok.

19. Na-holitompa isht asha pehlichi i shahli ash ot Chisus a nan im ai ithvna vhleha, mikmut nan isht im abuchi aiena ka ai im asilhhvchi tok.

20. Chisus vt afalaminchi mut, okla puta ka ai im otvni achukma hosh anumpohonli li hatuk; Chu okla hvt ai itvna bilia sinakak, micha tempel aiena yummak o nana ai ithvnanchi li chatuk; yohmi kvt luma chohmi hokvto nana ak achoshke.

21. Na katihmi ho vno ak o is suma ponaklo cho? nana im achi li ka haklo chatuk vhleha hak o ish i ponaklashke: yakeh! yummak osh nana achi li chatuk a okla ithana hoke, achi tok.

22. Ilvppa yakohmichit anumpuli ma, nan-vlhtoka vhleha hvt achufet bilikasi hikia tuk osh, Chisus ash ibbak isht pasalichi mut, Na holitompa isht asha pehlichi i shahli ya yakohmichi hosh ish im anumpuli cho? achi tok.

23. Chisus vt afalaminchi mut, Ik vlhpeso ho anumpuli li hokma, nan ik vlhpeso mak o isht ish atokolashke: amba vlhpesa tuk mvno, katiohmi ho is svsscho? achi tok.

24. Yummak ash ot talakchi na Annas vt na holitompa isht asha pehlichi i shahli Kaifas a pit pila tuk a tok.

25. Mihma Saimon Pita yvt libisha hosh hikia tok : yoh mi ma, Chishno vt yvymma nan im ai ithvna vhleha ha ish ibai achufa tuk keyu ? okla im achi ma, ik ahlo mihvt, Uno yokvt mih sia keyushke, achi tok.

26. Na holitompa isht asha pehlichi i shahli im ilhtohno vhleha achufut Pita yvt haksobish twbli tuk ash i kanomi hosh, Chishno ak osh yummva awant osapushi a ish anta ho, chi pisa li tuk keyu ? achi tok.

27. Mihma Pita yvt ik ahlo kash inli ho miha tok : mihma chekosi fehna akaka yvt ola tok.

28. Yohmi ma Chisvs ash Kaiafas a im ai ishit ivt, nan ai apesa yo okla isht ona tok : yummvt onnahinli ha tok ; yohmi kvt nan-urbanblit ont ia ya ai impa he tuk vt, im ai okpuloka hinla hatuk osh ilapo ak okvto nan ai-apesa ya okla pit ik chukowo ki tok.

29. Mihma Pailat vt kohchvt ona mvt, Hatak ilvppa anumpa nanta mak o hush ai ikbichi cho ? achi tok.

30. Mihma okla afalaminchi mvt, Ilvpput nanokpuni keyu hatuk okma, chibbak oka ant e chi fohka he tuk keyu hoke, okla im achi tok.

31. Mihma Pailat vt, Isht oh ia cha, hvchi nan-vlhpisa mak o isht oh ai im apesá, im achi tok. Yohmi hatuk o Chu okla hash osh, Hatak nana kia illa he il im apesa he vt a pim vlhpesa keyu hoke, okla im achi tok.

32. Yohmi ka Chisvs vt kaniohmit ai-illi yo ai illa hi vt anumpohonli tok a, ont ai ahla he mak a tok.

33. Mihma Pailat vt atuklanchit nan-ai-apesa yash ont chukowa cha, Chisvs a i howa mvt, Chishno ak osh Chu okla i miko chia mak oh cho ? im achi tok.

34. Mihma Chisvs vt afalaminchi mvt, Chishno akinli hosh, keyukmvt, inla yak osh vno a isht a chim anolikma, nanta tuk o ilvppa ish achi cho ? im achi tok.

35. Pailat vt afalaminchit, Uno vt Chu sia ho ? chishno chim okla ash inli, mikmvt na holitompa isht asha pehlichi vhleha aienak kak osh chishit subbak a fohki tuk oke. Nanta mak o ish katiohmi tuk oh cho ? achi tok.

36. Chisvs vt afalaminchi mvt, Apehlichi li ka yvt yakni

ilvppak inli keyushke. Apehlichi li ka yvt yakni ilvppak inli hatuk okma, Chu okla ibbak ak a fohko ka ch̄i ka, an tishu vhleha hvt itihimba he tuk: amba himak okvno apehlichi li ka yvt ilvppak inli ho keyushke, achi tok.

37. Yohmi hatuk o Pailat ash osh, Mih kvto m̄iko chia akinli hotuma? im achi ma, Chisvs vt afalaminchit, M̄iko sia mak atuk o ish mihvshke. Nan ai ahlika atokolit anoli la he ilvppak osh sa toba cha, anonti ilvppa pulla hatuk mak o ayvt yakni a vla li tuk oke. Nan ai ahlika yo anukfoyuka aiyukali hokvto, vñ anumpa ha haponaklo bano hoke, achi tok.

38. Pailat ash osh, Nan-ai ahlika yak osh nanta ho? im achi tok. Mihmvt ilvppa achi mvt, falamvt kohchvt Chu okla hash im ona mvt, Nan ik ai-vlhpeso nana kia a takali ka ak im akostininchu kumohmishke.

39. Yohmi kia nan-vbanvblı ont ia isht asha hokvno, achufalichit a hvchim i hotofi la he ai vlhpesa chatuk vt ashvshke: yohmi hoka Chu okla i m̄iko ak o a hvchim i hotofi la hi a hvsh ahni cho? im achi tok.

40. Mihma anonti momvt chitoli hosh, Hatak ilvppvno keyu ho, amba Balabbas ak ashke, okla achi tok. Yohmi ka Balabbas vt hatak hukopa ya tok.

CHAPTA XIX.

Pailat vt Chisvs ash fvummit issa ma, tvshka chipota vhleha hvt kvti tvnna yo iachokolichi, 1 : 4 hlakofichi bvnna kia, Chu okla nan ahni kak o im antia hatuk osh, yvmmvt ititaiyuhvna ahonvhla ch̄i mak o, im issa: 17 tvshka chipota vhleha hvt i nafohka yatuk a iti hopela: 26 Chisvs vt ishki yatuk a achukmalit apelahancha ch̄i ka, nan im ai ithvna i holitopa yatuk a i miha cha, illi. 31 Tvshka chipota vhleha hvt, Chisvs naksi a tvli halupa ishit bahli. 38 Chossef Alimahlea minti, micha Nikotemvs ita tuklo hosh Chisvs haknip a ishi cha, hohpi.

1. YOHMI hatuk o yvmmma foka ma Pailat vt Chisvs a ishi cha, fvummi tok.

2. Mihma tvshka chipota vhleha hvt kvti tvnvt iachuka

ikbit, noshkobo ha iachukolichi mvt, na tishepa na fohka holitopa yo ishit okla anchichi tok.

3. Mihmvt aiokpvchi mvt, Chu okla i miko yosh nan ik yukpá, achi mvt ibbak okla isht isso tok.

4. Yohmi ma anonti Pailat ash ot ia cha, Yakeh ! nana ik ai-vlhpeso nana kia ai a takali na akostininchi li keyu ka hush akostinincha chj mak o, ilaelit hvchj kohchi lishke, im achi tok.

5. Mihma Chisvs vt kvt iachuka ha iachukoli cha, na-tishepa na-fohka holitopa fohka hosh auet kohcha tok. Mihma Pailat ash osh, Yakeh ! hatak atukma ho pesá, okla ha im achi tok.

6. Yohmi ma na-holitompa isht asha pehlichi vhleha, mikmvt nan-vlhtoka vhleha aien a kash ot yummak ash pisa mvt, chitoli hosh mihvt, Ititaiyukhvna ak o oh ahonvhlichí, ititaiyukhvna ak o oh ahonvhlichí; ahanchi ma, Pailat ash osh, Oh ishi cha, ititaiyukhvna ak o oh ahonvhlichí; vno yokvto nana ik ai-vlhpeso nana kia ai atakali ka ak im akostinincho hoke, im achi tok.

7. Chu okla hvt afalaminchi mvt, Nan-vlhpisa hvt pin tonla : yohmi ka ilvppak okvt Chihowa Ushi ilapissa hatuk okvt, pi-nan-vlhpisa pulla kak o isht illa he vlhpesa hoke, im achi tok.

8. Yohmi hatuk o Pailat vt anumpa yummma haklo mvt, nukshopa kvt isht i shahli tok.

9. Mihmvt anonti nan ai apesa yash ont chukowa cha, Chisvs ash o, Katima k ish minti tok oh cho ? im achi tok. Yohmi kia Chisvs ash ot nana ik im acho ki tok.

10. Yohmi ma Pailat ash ot, Chik sv̄m anumpulo mak oh cho ? vno vt ititaiyukhvna yq a chi ahonvhlichí la hi vt v̄m vlhpesa, anonti chj hotofi la hi vt v̄m vlhpesa aien ka chik ithaiyano cho ?

11. Chisvs vt afalaminchi mvt, Chishno yokvt vba ak o auet a chima ho keyukma, vno yoka nana ho is sa kanihcha hi vt chim vlhpesa keyushke : yohmi hoka sv̄shit ayvt chibbak a ant sa fohki tuk a yummak osh nan-ashvchi kvt ai in chinto hoke, achi tok.

12. Yohmi ma yummak ash i hotofi bunnvt im anukfihinla tok: yohmi kia Chu okla hvt chitolit anumpulit, Hatak ilvppa ish i hotofi hokmvt, Sesa ya i kana chia ha he keyu. Kuna hosh miko il ape-sakmvt, Sesa ak o i sanalit anumpuli hoke, okla achi tok.

13. Yohmi hatuk o Pailat vt anumpa yummak haklo mvt, Chisus ash ishit kohchi cha, ilap vto nan ai-apesa ai-o-minili om binili tok, yummvt Tuli potvlhpo hohchifo ho, amba Heblu ano Kabbahla hohchifo ha tok.

14. Mihma nan vbanvblit ont ia asha chi ka, ai il atahlit maya nitak, mihmvt hvshi kanvlli vlhpisa yvt ont isht han-nali foka aiena; yohmi hatuk o Chu okla hash o, Hvchi miko ya ho pesá, im achi tok.

15. Yohmi kia okla chitolit hosh anumpulit, Kanima isht oh ia cha, kanima isht oh ia cha, ititaiyukhvna oh ahonvhlichí, achi ma, Pailot ash ot, Hvchi miko ya ititaiyukhvna ahonvhlichí la chi cho? im achi ma, na holitompa isht asha pehlichi vhleha hash ot, Pi miko vt iksho, Sesa ak banoshke, im achi tok.

16. Yohmi ma polaka yummak ash ot ititaiyukhvna ahon-vhlvt illa chi mak o, ibbak i fohki tok. Yummak foka ma Chisus ash o okla ishi cha, halvllit kanima isht ia tok.

17. Yohmi ma im ititaiyukhvna yash o sholi cha iwt yakni hohchifo noshkobo foni aiasha yo, anonti Heblu yokvno yummvt Kalkohla hohchifo ho ona tok.

18. Mihma yummak ash, micha inla yvt tuklo ho aieninchit ititaiyukhvna okla ai ahonvhlichí tok: Chisus ak osh iklnnna yo takali na achvfa bikvt ita hlaklaka takohli tok.

19. Mihma Pailat vt nan anoli holisso ha holissochit ititaiyukhvna ya a lapalichi tok. Yohmi ka holisso kvt, CHISUS NASALET MINTI CHU OKLA I MIKO YOKE, achi ha tok.

20. Yohmi na Chisus vt ititaiyukhvna ai ahonvhlt illi yummvt tvmaha ha i bilika ha tok: yohmi ka holisso kvt Heblu, Klik, mikmvt Latin aiena anumpa hosh isht a holisso hatuk oka, nan anoli holisso ilvppak ash Chu okla laua kvt pisa tok.

21. Yohmi ma Chu okla na holitompa isht im asha peh lichi vhleha hash osh Pailat a, Chu okla i miko, achit chik holissocho kashke; amba Chu okla i miko sia hoke, achi chatuk yummak o ish holissochashke, okla im achi tok.

22. Mihma Pailat ash ot, Nana ho holissochi li kvt holissochi li mak atuk oke, im achi tok.

23. Yohmi ma tushka chipota vhleha hvt Chisvs a ititaiyukhuna ahonvhlichi mvt, i na fohka yatuk a ishit ita kvshkoia ushtali cha, tushka, chipota vt i kashampa aiyuka tok; mihmvt i na fohka lumbo ash kia aieninchi tok: na fohka lumbo yvt ahchwa yo keyu, paknaka yak o a tunvt maya hosh ont taiyaha ha tok.

24. Yohmi hatuk o, Ilvppak okvno keho hlilvffo hosh, amba kvna hosh immi ha chi ka, na shoelit kil oh ashá, ilap bika it im achit maya tok; yohmi ka Holisso Holitopa vt, Um ilifoka ya okla iti hopela mvt, a na fohka lumbo yoka na shoeli isht aisha kvno, achi ka ont aiahla chi mak a tok; yohmi hatuk o tushka chipota vhleha hvt ilvppa okla yakohmi tok.

25. Mihma Chisvs ititaiyukhuna a takali ka ituma ya ishki, micha ishki nakfish, mikmvt Meli Kleofas tekchi, mikmvt Meli Maktalene aiena hosh hiohmaya tok.

26. Yohmi hatuk o Chisvs vt ishki, micha nan im ai ithvna yummak i hullo beka tuk mak osh itatuklot hinli na pisa mvt, ishki ash o, Ohoyo ma! chiso ha ish pisashke, im achi tok.

27. Mihmvt nan im ai ithvna yash o, Chishki a ish pisashke, im achi tok. Mihma nan im ai ithvna yummak ash osh heshi kanvlli vlpisa yummak fehna ai-vhlit ia ka, ohoyo hash ilaelit ilap in chuka akinli ho bohli tok.

28. Yakohmi ha ya, nan okluha kvt ont ai vlhtaha ka, Chisvs vt ithana hatuk osh, Holisso Holitopa yvt ont ai ahla chi ka, Sa tukshilvshke, achi tok.

29. Yohmi ma nan-ai-vlhto wineka alota kvt talaia tok; atuk o na-shatvmmi yo wineka yash alotolit hissop o takalichit itih ha pit tikelichi tok.

30. Yohmi hatuk o Chisvs vt wineka yash ishkot pisa

mvt, Ulhtaiyahvshke, achi tok; yohmi cha aka yuhehunukli mvt, fiopissa tok.

31. Yohmi hatuk o nan il ai atahli nitak atuk oka, nitak hullo ya haknip vt ititaiyukhvna ya ik a takohm^{ayo} ka chⁱka, nitak hullo yummvt nitak holitopa hatuk oka, Chu okla hash osh yvmmma hanali ak osh kobahli na ishit kanima ia hinla ka, Pailat a im asilhha tok.

32. Yohmi na tvshka chipota vhleha hash ot irt, ititaiyukhvna ai iba honvhlt okla kash achvfalit tⁱkba hanali ha kobahlichi mvt, anonti achvfa yash kobahlichi tok.

33. Amba Chisvs vt a takali tuk a okla ona mvt, yvmmvto illi m^ashko tuk o pisa cha, yvmmvno hanali ha ik kobahlecho ki tok.

34. Yohmi kia tvshka chipota vhleha yash ot achvfut naksi a na halupa ho ishit bahli na ashali^{ka} issish, micha oka aieno hosh auet fohopa tok.

35. Yohmi ka yvmmma pisa tok mak osh atokowa ka anoli; yohmi ka yvmmvt atokoli ka ai ahli hoke: yohmi ka hvchishno vt hvchi yimma chⁱka, ai ahli mak o miha kvt ithana hoke.

36. Holisso Holitopa yvt, Foni vt ik pakoto ka he, achi kvt ont ai ahla chⁱ mak o, nana kvt a yakohmi tok.

37. Micha anonti Holisso Holitopa ai anumpa inla mvt, Yvmmma okla bahli tuk vt yummak ash pisa hi oke, achishke.

38. Micha ai yakohmi ha ya, Chosef Alimahlea minti vt Chisvs a nan im ai ithvna akinli kia, Chu okla ha i nukshopa kvt il aluma beka tuk osh, Chisvs haknip a isha hinla kvt, Pailat a ont im asilhha tok: mihma Pailat vt vlpesa, im ahni tok. Yohmi hatuk o irt, Chisvs haknip ash ont ishi tok.

39. Yohmi ma Nikotemus vt nan vmmona ka ninak o ayvt Chisvs a pisa tok yummak ash kia vla cha, m^vh micha a lo es itibvlhto kvt weki tahlepa achvfa foka ho isht vla tok.

40. Yohmi ma Chisvs haknip ash o ishit okla cha, Chu okla hut hohpi kvt yvmmchi chatuk mak o, yummak ash o linen osh na-balama pit aieno ho isht a bonulli tok.

41. Ititaiyukhvna ahonvhlt ai illi yvmmma osapushi osh ta-

laia tok : mihma osapushi anukaka ya sepulka himona, hatak vt ik a hollopo kisha yo, hikia tok.

42. Yohmi hatuk o Chu okla nan il ai atahli nitak a tok; yohmi hatuk o sepulka yvt yvmmma auet i bilikasi hatuk oka, yvmmak o Chisus a bohlit okla tok.

CHAPTA XX.

Meli Maktalene vt sepulka yash ona, 1. 2 Pita, Chan itatuklo kvt tushpvrt iwt, sepulka yash it onachi akinli. 11 Meli Maktalene ash ot sepulka ya falamvt ona, atuk o i himmak o Chisus fehna kash osh yvmmak ash inli ho ont i haiaka. 19 Mih nitak akinli opivt taha ho nan im ai ithvna vhleha hvt itvnahvt chiya ma, Chisus vt im ona; 25 Wek inla hosh ont taha ho nan im ai ithvna vhleha hvt Tamas a pit a momvt itvnahvt chiya ho, Chisus vt anonti i haiaka.

1. WEK chukowvt iahpi onnahinli fehna okhlilinchimoma ho, Meli Maktalene vt sepulka yash ona cha, twli yash osh sepulka ya a kanvlli tuk o, pisa tok.

2. Yohmi ma maleli hosh vlv, Saimon Pita, micha nan-ithvna achufa Chisus vt holitobli yatuk ita tuklo ka, Chitokaka ya sepulka ya ai ishit kohchi cha kanima yo ont bohli tuk a chini ho, kil akostininchoshke, im achi tok.

3. Yohmi ma Pita yvt, micha nan-ithvna achufa yash ita tuklo cha iwt, sepulka ya it onachi tok.

4. Yohmi kvt tuklot pit tihlaiya tok ; atuk o nan-ithvna achufa yash ot Pita ya imaiya cha, tikba sepulka ya ona tok.

5. Yohmi cha ont a hiliput pit hopokoyo mvt, lin en vto kahvt maya na pisa akinli kia, pit ik chukowo ki tok.

6. Yohmi ma Saimon Pita yash ot auet iakayvt vla mvt, sepulka yash pit chukowa cha, lin en vt kahvt maya ka pisa tok.

7. Yohmi ma nantapuski noshkobo isht afoa tuk vto lin en a ik ibafoko hosh, amba pohlvt taha cha, ilapissa yo itonla tok.

8. Mihma nan-ithvna achufa na tikba sepulka ya ona tuk ash kia pit chukowa cha, pisa mvt, yimmi tok.

9. Yvemma foka muno illi tuk vt falamvt tana hi oka, Holisso Holitopa ya ik ai akostininchó kishrt okla tok.

10. Yohmi mvt nan-ithvna ash osh ilap in chuka atuk akinli ho itiachi tok.

11. Yohmi kia Meli vto sepvlnka a kocha ya nishkin okchi mihintit hikja tok: atuk osh nishkin okchi mihintit pit akə chunulit, sepvlnka anukaka ya pit hopokoyo tok.

12. Mihmvt enchil tuklo i na-fohka tombi kvt Chisvs haknip ai itola tuk a, achvfvt noshkobo imma yatuk ak o asha ma, achvfvt iyi pilla hatuk ak o asha na pisa tok.

13. Mihma, Ohoyo chia hut na katihmi ho ish yahaya cho? im achit okla ma, An Chitokaka ya okla ishit kvnia tuk a chini ho, kanima yo a bohli tuk a ak ithano kak oke, im achi tok.

14. Micha ilvppa mak achi mvt, im ashak-imma pit filema mvt, Chisvs vt hikja na pisa kia, yvmmak osh Chisvs ash atuk a ik ahno ki tok.

15. Chisvs ash ot, Ohoyo chia hut na katihmi ho ish yahaya cho? Kuta ho ish hoyo cho? im achi tok: mihma osapushi apesuchi mak o im ahoba mvt, A shahli ma! chishno ak osh yvmmak ash ai isht ish ia tuk okmvt, kanima yo ont ish bohli tuk mvt, is svn anoli na ont ishit minti lashke, im achi tok.

16. Chisvs ash ot, Meli, im achi ma, pit-filema mvt, Labboni, yvmmvt nan-ithvnanchi ma! achi hoke, im achi tok.

17. Chisvs vt, Uba iwt Aki a ak im ono kisha hoka, is sa potoli na; amba iwt itibapishi li vhleha aiasha kak o ona cha, Aki, mikmvt hvch Iki, an Chihowa, mikmvt hvchin Chihowa im ia li ka, ish im anolashke, im achi tok.

18. Meli Maktalene ash osh vla cha, Chitokaka ya pisa tuk, yohmi na ilvppa puta ka im ahanchi tuk a, nan-ithvna vhleha hash im anoli tok.

19. Atuk o nitak yvmmak ash inlit ont shohbi wek chukowvt iahpi nitak atuk o, Chu okla ha i nukshopa hatuk osh nan-ithvna vhleha ai itvnahvt chieya ka, okhissa yet

v^lhk^vma h^o, Chisvs ash ot v^lvt iklvnna ant hikia cha, Hvchi nuktanlashke, im achi tok.

20. Ilvppa mak achi mvt, ibbak iti chaplinchit, naksi aien^a ka i weli tok. Yohmi ma nan-ithvna vhleha hash osh Chitokaka ya pisa kvt na yukpa tok.

21. Yohmi ma Chisvs ash ot atuklanchit, Hvchi nuktanlashke; Aki vt na sa tohno tok mak o, ai itilauechi hosh hvchishno ma na hvchi tohno li hoke, im achi tok.

22. Micha ilvppa makachit in taha mvt, o fiopa mvt, Shilombish Holitopa ya oh ishi.

23. Kvna im ai ashvchika yo hvsh i kashofi hoka, i kashofa he mak oke; mikmvt kuna im ai ashvchika yo hvch ik i kashofa hokma, ik i kashofa ka he mak oke, im achi tok.

24. Yohmi kia Chisvs vt vla ka, auah-tuklo yatuk a achvfa, Titimvs hohchifo Tamas vt takla asha tok keyu.

25. Yohmi tuk o nan-ithvna vhleha inla yash osh, Chitokaka ya e pisa kvno; im achi tok. Yohmi kia, Ibbak chofak ai ahonvhla tuk a pisa lish, chofak pit a hika tuk a subbak ushi pit maiachi lish, anonti naksi a subbak pit hilechi li h^o keyukmvt, sai yimma he keyushke, im achi tok.

26. Atuk o anonti nitak isht untuchina ma nañ im ai ithvna vhleha hash osh aboha anuka aiasha ma, Tamas vt takla asha tok; yohmi ma okhissa yvt v^lhk^vma h^o, Chisvs vt vla cha, iklvnna ya ant hikvt, Hvchi nuktanlashke, achi tok.

27. Mihmvt Tamas ash o, Chibbak ushi a auet welit, subbak a pisá; mikmvt chibbak ma auet welit sa naksi a pit hilechí: yohmi cha, na yimmi iksho hosh ish anta ná, amba chi yimmi kvt a chim alotowashke, im achi tok.

28. Mihma Tamas vt afalaminchi mvt, An Chitokaka ma! an Chihowa ma! im achi tok.

29. Chisvs ash ot, Tamas is sa pisa hatuk mak osh chi yimmishke: pisa h^o keyu kia, yimmi tok vhleha hokvt na yukpa mak oke, im achi tok.

30. Micha na-fehna inla kvt laua h^o, Chisvs vt nan im ai ithvna vhleha hvt pisa na yumihehi m^vhli tok a holisso ilvppa ik a holissoshke.

31. Amba Chisvs vt Chihowa Ushi Klaist mak a tok a,

hvchi yimma he; micha hvchi yimmi pulla hosh yummma hohchifo hatuk mak o okchayvt bilia ya hvsh ahayucha he mak o, ilvppa puta kvt holisso hatuk oke.

CHAPTA XXI.

Chisvs vt, nan im ai ithvna vhleha hvt Tibelias okhvta ha nvnvi hokli hosh maya ho, ont im ovni, 1 ; 12 yohmi cha nan-isht-hokli a nvnvi im alotoli cha, anonti itibai impa. 15 Chisvs a i hullokmt in chukfvlhpoba, micha in chukfvlhpobushi aienka im ipeta hi a hituchina ha Pita ya i miha; micha Pita yvt na palvmmi isht illa hi a tikbanli im anoli. 24 Chan vt ilap nana anohonli ka aighli, micha Chisvs vt na fehna ka yvmihchi tok a, inla yvt lauvt asha hosh ik holisso ka, miha.

1. ILUPPUT ai yakohmi ha ya, anonti Chisvs vt nan im ai ithvna vhleha ha Tibelias okhvta hak o ont a im ile haiakvchi tok: mihmvt ilvppak o ai yakohmi hosh ile haiakvchi tok.

2. Saimon Pita, micha Tamas Titimus hohchifo, mikmvt Nahlanael Kalili yakni Kana vhta, micha Sebete ushi tuklo, anonti nan im ai ithvna inla tuklo aienka kvt ai itapehvt ma-yatok.

3. Saimon Pita yash ot, Nvnvi vbit ia lishke, im achi ma, Pishno ak kia chi apihvt il ivshke, im achi tok. Okla koh-chvt irt chekosi makinli ho peni a ont vlbela tok; atuk osh ninak yummma nana kia okla ik hoklo ki tok.

4. Atuk o ont onnvut taha ma, Chisvs vt alaka ya hikia tok; yohmi kia nan-ithvna vhleha hvt Chisvs ash-atuk a ik ithano ki tok.

5. Yohmi ma Chisvs ash ot, Ulla vto ilimpa hvchim asha cho? im achi ma, afalaminchit, Ikshoshke, achi tok.

6. Mihma, Peni ishtimpak-imma yak o nvnvi-isht-hokli a oh okvchi, micha hvsh ahayuchashke, im achi tok. Yohmi hatuk o pit okvchi mt, anonti nvnvi yvt laua fehna ka, halvlli kvt okla na kanihma he keyu ki tok.

7. Yohmi ma nan-ithvna Chisvs vt holitobli yatuk, yummak ash ot, Chitokaka mak oke, Pita ya im achi tok.

Mihma yummvt Chitokaka mak atuk o, Saimon Pita yvt haklo mvt, nipi bano tuk osh nafohkv^t nvn hokli yatuk ash o ishit il ai vskofuchi mvt, okhuta hash pit okatula tok.

8. Mihma nan-ithvna vhleha inla ka yvt alaka ya pit i hopaki keyu, amba k u b i t tahlepa tuklo foka ho asha hatuk okvt, pen-ushi ash o alhtot nvn-isht-hokli nvn alota ka halvllit isht ia tok.

9. Atuk osh alaka ya okla ona makinli ho, tobaksi luak vt yvmmma asha ma, nvn yvmmma itotonla ma, pvska ak kia itonla na okla pisa tok.

10. Chisvs ash ot, Nvn himonasi hvsh hokli tuk vt, ishit ho minti, im achi tok.

11. Saimon Pita yvt pit chukowvt nvn-isht-hokli ash nvn hochito tahlepa achvfa pokoli tahlapi cha, akocha tuchina aienvt alota ho halvllit, alaka isht ona tok: laua hokvto yakohmi nana kia nvn-isht-hokli ash ot ik okpulo ki tok.

12. Chisvs ash ot, Mintit ant oh impá, im achi tok. Mihma yummvt Chitokaka mak atuk a ithana hatuk osh, nan-ithvna vhleha hvt achvfa kia i ponaklot, Kvta chia ho ? achi kia iksho ki tok.

13. Mihma Chisvs ash ot onvt, pvska ya ishi cha, i hopeila mvt, nvn ma yvmihchi akinli tok.

14. Chisvs vt illi tuk osh falamvt tani ha yvt, ilvppvt ont atuchina mak o nan im ai ithvna vhleha ha im ile haiakovchi tok.

15. Atuk o impvt okla issa ma, Chisvs ash ot Saimon Pita ya, Saimon, Chonas ushi chia hvt is so hullo kv^t, ilvppa puta ka chim i shahli cho ? im achi ma, Ahlishke, Chitokaka ma ! ch^j hullo li hoka chishno vt ish ithanvshke, im achi ma, An chukfulhpoba ushi puta ka pehlichit ish ipih-intashke, im achi tok.

16. Anonti atukla ma, Saimon, Chonas ushi chia hvt is sa hullo cho ? im achi ma, Ahlishke, Chitokaka ma ! ch^j hullo li hoka, chishno vt ish ithanvshke, im achi tok: mihma, An chukfulhpoba puta ka pehlichit ish ipihintashke, im achi tok.

17. Ont atuchina ma, Saimon, Chonas ushi chia hvt is sa

hullo cho ? im achi ma ; ont atuchina mak o, Is sa hullo cho ? im achi hatuk o, Pita yash osh nukhaklot taha tok. Yohmi mvt, Chitokaka ma ! nan okluha ka ish ithanvshke, chi hullo li hoka chishno vt ish ithanvshke, im achi tok. Mihma Chisus vt, An chukfulhpoba puta ka pehlichit ish ipihintashke, im achi tok.

18. Ahlishke, ahli mak o chim achi lishke, Chi himita muto chishnq inlit il ai vskofachechit, chishno ish ahni hosh kanima ish aya beka tok : yohmi kia ont a chi sipokni hayokmvt, chibbak a ish wakeli na inla hosh chi vskofachechi cha, kanima ish aiahni keyu kia, chisht aya hi oke, im achi tok.

19. Ai illi kaniohmi ho Chihowa ha isht a holitoblicha he ak o, anoli hosh ilvppa anumpuli tok. Mihmvt ilvppa anumpuli mvt, Is siakaiyashke, im achi tok.

20. Mihma Pita yvt filemt, nan-ithvna achvfa Chisus vt holitobli chatuk opiaka impvt maya ka ikkishi ha pit vtayvt ashvt, Chitokaka ma ! chishit inla ibbak chi fohki kvto, katima kak oh cho ? achi tok ash osh awant aya na pisa tok.

21. Pita yvt yvmmma pisa mvt, Chisus ash o, Chitokaka ma ! yohmikmuno hatak ilvppak amo katiohma chi cho ? im achi tok.

22. Chisus ash osh, Uno ak osh ahni li hokma, ilvppak okvt ahanta tuk o vla la he, yvmmvt nanta isht chi ahalaia cho ? Is siakaiyashke, im achi tok.

23. Yohmi ma itibapishi vhleha hvt, nan-ithvna yvmmvt ik illo ka he yatuk a, it im anolit maya tok ; yohmi kia Chisus vt, Yvmmvt ik illo ka hi a i miha tok keyu ; amba uno ahni li hokma, ahanta tuk o vla la he, yvmmvt nanta isht chi ahalaia cho ? achi tok.

24. Nan-ithvna ilvppak a tok mak osh ilvppa puta ka atokoli cha, anonti yakohmi ka holissochi tok : yohmi ka yvmmvt nana atokolit anoli ka ai ahli ka il ithaiyanvshke.

25. Micha nana inla Chisus vt a kaniohmi tok a lauvt asha, yvmmak osh momvt holisso hokma, holihiso kvt yakni ak oh kia holisso hvt ai itola hi vt iksho ka hinla, um aho bvshke. Amen.

CHISUS KLAIST

IM APOSTEL UHLEHA HUT NANA A KANIOHMI TOK.

CHAPTA I.

Klaist vt illi ha ya tok a isht annoa kaniohmi kvt vlbittv annoa, 1. 9
Yummvt vba ia isht annoa. 15 Chutv vltoba ho achvfa ka atokola hi a, Pita yrt isht anumpuli.

1, 2. TIAFILUS ma ! Chisus vt vmmona, nana puta a kaniohmit nan im abvchit isht mahaya tok osh, vba anumpeshi vleha ha ilapo akinli atokoli tok vt, nana vlpisa ka Shilombish Holitopa pulla ho isht ai ihima tok osh, vba ia tok nitak fena ka, holissó tikba kash o, isht ai ikbi li tok.

3. Yummak okvt ilbusha haytt okchaya kvt, nana ahli isht ikhaiyana he law ka, yummak ash o ai isht im ile hai-akuchi cha, nana kvt Chihowa apehlichika ya, pit ai ahalaia puta ka isht anumpohonli ka, okla pisa na nitak pokoli ushta tok.

4. Micha itahobit taiyahli mvt, Chelusalem a okla issvt ik aiyo hosh ; amba Iki vt nana miha tok, Yumma hvs sum a haklo tuk vt, pit hoyot hush chieyashke ; achit im apesa mvt,

5. Chan ak okvto oka yo isht baptismochi mvhli tok ; amba hvchishno vto himmak pila ha, nitak kanohmi keyukma, Shilombish Holitopa yak o isht hvchi baptisma chi hoke ; achi tok.

6. Yvmohmi na okla itahobut chieya mvt, nan i ponaklot, Chitokaka ma, himak foka hokvno apehlichika ya falamin-chit Islael a ish ema chi cho ? achi tok.

7. Mihma, Nitak, micha afvmmi puta ka, Iki vt ilapo ibbak akinli ho fohkit ieshi ka hvsh ithana vlpesa keyu hoka,

8. Amba Shilombish Holitopa yvt ayvt hvchim vla ha mvno, nana ai ahlika ya, hvsh esha he: yvmohmikmvt Chelusalem, micha Chutia moma, micha Samelia, micha yakni afolota ont ai vhli fena aienka, atokolit a na si anoli hvchia ha he mak oke; im achi tok.

9. Mihma nana yakohmi ka anumpulit ont in taiyaha ma, oklat pisa na, vba ishtia ma, hoshonti hvt i holhponayo ha ant im a luhmit ishi tok.

10. Mihma vba ia na, pit aiokchifelit shutik pilla ka pit hopokoyot hieli ma, hatak tuklot nafohka tohbi fohka hosh i bilikasi hieli tok.

11. Mihmt yummak ash osh, Kalili hatak hvchia hvt, nanta katihmi ho shutik pilla ka pit hopokoyot hvsh hieli cho? Chisvs ilvppak ash fehna akinli kvt hvchim eshit vba ishtia ka, kaniohmit vba ia ho hvsh pisa tuk a yummak inli ho chohmit ayvt vla hi oke; achi tok.

12. Yvmohmi ma, nvnih chaha Alifit hohchifo ho, yummak okvt Chelusalem a pit bilika nitak hullo anowa vlhpesa ho asht falamvt Chelusalem a okla vla tok.

13. Micha okla ant chukowa mvt, vba potvlhpo ya yummak o Pita, micha Chemis, micha Chan, mikmvt Antilu, Filip, micha Tamus, Bahlolomu, micha Mahlu, Chemis, Alfius ushi, mikmvt Saimon Selotis, micha Chutus Chemis itibapishi aienka kvt ai asha tuk o pit oiyat taha tok.

14. Ilvppak osh momvt ohoyo puta, micha Meli Chisvs ishki, micha itibapishi vhleha hatuk aienka ai itapehvut im anukfila ai achvfvt vba pit anumpulit, nana asilhha aienka kvt ik isso hosh aisha tok.

15. Atuk o nitak yummak foka ma! nan ithvna vhleha hohchifo holhtina kvt tahlepa achvfa cha pokoli tuklo foka hosh itvnahvt chieya ho, Pita yvt iklynna wakayvt hikia cha,

16. Hatak itibapishi li vhleha ma! Shilombish Holitopa yvt tikbanli, Lewi ash itakha ai isht Chutus a isht anumpuli tok o, Chisvs okla ishi ka in tikba hika tuk a, ik kaniohmi kia holiso ilvppvt ai ahli tuk pulla hoke.

17. Yummak okvt hvp iba holhtiena cha, anonti nan isht vta ilvppa pit ahalaia ka ieshi hatuk,

18. Micha hatak ilvppvt yoshoba isht vlhtoba tuk a osapa yo ishit chumpa tuk; micha itihpelvt akvt, iklvnna mitafa na, iskuna puta kashot momvt kocha pit fohopa tok.

19. Yvmohmi ka Chelusalem okla aiasha kvt momvt akostininch i tuk; yohmi hatuk o osapa yummvt ilap im anumpa ya, Esiltama hohchifo, yummvt osapa issish achi hoke.

20. Micha ataloa holisso ha a holisso kv, Yummvt ai ahanta yatuk a ik chukilissá, yohmikma hatak nana kia yummak ash ik ai ahanto kashke; micha, Nana ai isht vtta yatuk a, inla yosh ishashke; achishke.

21, 22. Yvmohmi hoka, Chitokaka Chisvs vt pi takla vttvt aya, Chan a im a baptismo chash, vhlt mintit a hvpm eshi na vba ia nitak fehna ai vla ka, hatak yakohmi kv pi apehvt, aya na bilia tok okvt, yummvt falamvt tani tuk a, atokowa pib ai anola chi kv, achvft vltoka pullashke; achi tok.

23. Mihma hatak tuklot, Chosef osh Basabvs hohchifo hosh, hochifo apunta kv Chvstvs o, anonti Mathlaivs aien aho, okla hiohlichi tok.

24. Micha okla vba pit anumpuli mvt, Chitokaka hatak moma chukvsh a ithaiyana chia hokvt, tuklo ilvppa kani mampo kak o, ish atokoli hatuk okmvit ish otvninchi na,

25. Nan isht vtta ilvppa, micha vba anumpa isht vtta pit ahalaia aien, yummak atuk o, Chutvs vt ilap ai vtta ya ia chin cha, yoshoba cha issa tuk oka, ieshashke; okla achi tok.

26. Micha okla nashoeli bohli tok; mihma nashoeli ash ot Mathlaivs ak o onvtula na, yummak osh vbanumpeshi auah-chvfa kash iba holhtiena tok oke.

CHAPTA II.

vbanumpeshi vleha hvt Shilombish anukfohka fehna mvt, anumpa ilaiyuka anumpuli, 1. 14 Pita yvt vbanumpa isht anumpuli.

1. ATUKO Pentekost nitak vt ont vlpiesvt taha ma, momvt im anukfila ai achvft mih achvfa yo chieya tok.

2. Yumohmi ma ashalika mahli kullo chinto chiyuhmit, vba ya fopa hosh mintit vla cha, aboha anuka okla aiasha tuk ash ant alotolit kaiyanchi tok oke.

3, 4. Yumohmi ma, isunlvsh chuhlahli kvt luak o chiyuhmi hosh ant i haiaka, micha achufaiyuka ant onvtoyula tok; yumohmi na, moyumvt Shilombish Holitopa yvt isht anukfohkvt alota ma, anumpa inla puta anumpula hi a, Shilombish vt apelahanchi na, okla anumpulit ishtia tok oke.

5. Yumohmi ma Chelusalem a Chu vhleha, hatak hopoyuksa puta, oklushi moma shutik nuta ka aiasha ka a minti hosh, aiasha tok.

6. Mihma ilvppak ashott annovt takakanli ma, okla laua yvt ant itahoba cha, ilap im anumpa aiyuka yo, ai anumpulit maya na, hatak momvt haklo hatuk osh, okla anukhlakancha tok.

7. Micha momvt okla nukhlakancha mvt, okokko! ai ahni mvt, Iluppa anumpulit maya kvt momvt Kalili okla keyu ho?

8. Micha nanta katiohmi ho hatak moma kvt il a toba tok pim anumpa akinli ho, e hahaklo cho?

9. Patia okla, micha Mit okla, micha Ilam okla, mikmvt Mesopotemia, micha Chutia, anonti Kapatosha micha Pontvs mikmvt Asia,

10. Fichia micha Pafilia Echip, mikmvt Libya pilla Sainlini foka aiena aiasha puta, micha Chu vhleha, mikmvt ai ibvlhto puta, Lom mintit itvnovwt aya,

11. Klit okla, micha Alabia okla puta kashot, Chihowa i na fehna ka, pishno pim anumpa ho okla isht anumpuli na echo haiyakloshke; itim achit maya tok.

12. Micha okla momvt nukhlakancha mvt, ik ai akostininchoh chohmi cha ilvpput, Katiohma hinla hosh yakohmi ho? itim achit maya ma,

13. Anonti inla ka mvt isht yopulvt, Hatak yakohmi kvt oka pakimona yo yummhi hoka; achi tok.

14. Yohmi kia Pita yashot, auah chufa kash ibafohkvt hikia cha, im anumpa vba takalichit, Chutia hatak huchia,

micha Chelusalem aiasha hvchia, hvsh moma kvt, ilvppa oh ithaiyana cha, vñ anumpa h̄ hvsh haponaklashke.

15. Yakohmi kvt nan ishkot haksi h̄ keyu, chishno yokvto yohmi h̄ hvchim ahoba kia nitak hvshi isht vlhpisa ont atuchina hoka.

16. Amba ilvppvto hopaii Choel vt isht anumpo-honlit,

17. Nitak himmaka pilakma yakohma hi oke : Nipi puyuta ka vmi shilombish ma ai isht o fofohompli la hi oke : yohmikma hvch iso nakni vhleha, micha hvch iso tek puta kash ot vba anumpa isht anumpulikma, anonti hatak hvchi himithoa puta kash ot nan isht ahoba pihisa he ; yohmikma hatak hvchi sipokni puta kvt holhpokunna ma holhpokohuna hi oke.

18. Micha nitak yummfa fokakma, an tishu vhleha, micha ohoyo an tishu moyuma ka vmi shilombish a o fofohombl la he ; yohmikma vbanumpa isht anumpula hi oke.

19. Micha vba shutik a nana fehna ka a haiakahanchi lik-mvt, anonti aka yakni ma nan isht ahoba, issish, micha luak, anonti shobulli yobota aienaya hi oke.

20. Chitokaka i nitak chinto holitopa kvt ik lo kisha h̄, hvshi ash ot okhlili h̄ tobakma, hvshi ninak aya ash ot issish toba hi oke.

21. Micha yakohma hi oke, Kvna kia Chitokaka hohchifo h̄ pit hochihifokmvt okchaya he mak oke ; Chihowa yvt ahanchishke : ahanchi tok mak oke.

22. Islael hatak hvchia hv, anumpa yakohmi ka hvsh haiyaklashke ; Chisus Nasalet ai vutta, Chihowa yvt ai ahnichi hatak osh, hvch itintakla ahanta ma, yummak o Chihowa yvt isht ahullo, nana fehna, micha nan isht ahoba puyuta ka isht hvch itintakla ma, a yumihinchi tuk a, hvchishno akinli kak kia hvsh ithainayushke.

23. Yumma Chihowa yvt nan tikbanli pit akostininch, micha ik kaniohmi kia yohma he ma im anukfila cha, issa tok pulla hatuk mak o, hvsh ishi cha, ibbak haksi yash isht iti taiyukhvna a takalichit hvsh bi tok.

24. Yumma Chihowa yvt illi na-hotopa puta ka hotoffi

cha, tanichi tok: yummak oka yummvt a foka he vlpesa keyu hatuk oka.

25. Lewi yvt yummma isht anumpuli mvt, Chitokaka yvt sa nashuka itikba ya hikia na, pit pihisa li chatuk. Ik sa kanvlo ka hi a, yummak okvt svbbak isht impak imma ya hikia hoka :

26. Yohmi hatuk o, sa chukvsh vt na yukpa ma, anonti sa sunlvsh vt yukpa tok: yohmikma sa nipi ak kia nan ahni iksho hosh foha hi oke.

27. Umi shilombish a aiokpuloka ya ish a kancha he keyu hokvt, anonti chi Holitopa tuk ash kia ant toshbit ik tahá, ish im ahna he keyu boke.

28. Chishno yvt ai okchaya hina puta is svn otvnichi tok; chishno vt chi nashuka ya, isht yukpalit is si alotola hi oke; ahanchi tok.

29. Hatak il itibapishi vhleha ma! nukwaya ikshot hatak iki chinto Lewi atuk osh illi cha hollopi aiena tok o, im ahollopi yvt hvp itin takla ya hikia na himak a nitak fehna hatuk a, isht hvchim anumpohonli lashke.

30. Yomohmi ka hopaii atuk, micha Chihowa yvt, nipi okvt yummma isht atia ka yo, Klaist a ai ikbit yummma im ai asha holitopa tuk ash, ai o binila chi mak o, hilecha hi vt, anumpa kvlo isht ai im il apihisa tok a, ithaiyana tok oke.

31. Ilvppa tikbanli akostininchu hatuk osh, Klaist vt fala-mvt tana hi a isht anumpuli mvt, ilap imi shilombish a aiok-puloka ya ik im a kancho ma, anonti nipi yvt toshbit ik taho ki tok aiena ka, miha tok oke.

32. Chisus ilvppa Chihowa yvt tanichi tuk o, yummma atokowa nan anoli pi bieka mak osh e hielishke.

33. Yohmi ka Chihowa im ibbak isht impak imma a binilit holitopa, micha Shilombish Holitopa im ihisa tuk ash, Iki ya im ai ihishi aiena hatuk makosh, ilvppa auet foohombli na, himonasi ka mihmak o hvsh pisa, micha hvsh hahak-loshke.

34. Lewi yvt vba shutik a ona tok keyu hoka; yohmi kia ilapinli kv, Chitokaka yvt an Chitokaka ya, Svbbak isht impak imma ya ish binili na,

35. Chin t̄nvyp vhleha h̄a chiyi ai o hikia ikbi lashke ; im achi tok, ahanchi tok.

36. Ȳmohmi hoka, Islael okla moma kvt, Chisus iti itai-yukhvna hvsh a takalichi chash fehna ka, Chihowa yvt yvm-mvt Chitokaka, micha Klaist aienā mak o, ikbi tok a, ithai-yana pullashke ; im achi tok.

37. Yohmi ma ilvppa okla haiyaklo mvt, chukvsh vt nuk-haklo fena mvt, Pita, micha vbanumpeshi inla aienā kash o, Hatak il itibapishi vhleha ma ! nantak o e katiohma ch̄i cho ? im ahanchi tok oke.

38. Ȳmohmi ma Pita yashot, Hvsh moma kvt ile kosti-ninchit, nan ai ashvchika puta isht kashofa ch̄i ka, Chisus Klaist hohchifo h̄a, im a hvchi baptismashke ; yohmikmvt Shilombish Holitopa holhpila ka hvsh isha he mak oke.

39. Anumpa hvt hvchishno, micha chim vlla puta aienā, micha auet hopaki pilla aiasha ka moma, peh laua kvt kaniohmi ho Chitokaka hvpin Chihowa yvt pit hoyo hi a, im aya hoka ; im ahanchi tok oke.

40. Micha anumpa inla mvt laiyawa ho, isht im anumpulit, anonti atohnohonchi mvt, Aivlhpesa iksho isht ai unchululi vhleha ilvppa hvsh ai ile mokofashke ; ahanchi tok oke.

41. Ȳmohmi ma im anumpa h̄a na yukpvt ihishi tuk puta kvt baptismo tok ; ȳmohmi na nitak yummak inli ka hatak tahlepa sipokni tuchina fokvt ibvlhkaha tok oke.

42. Ȳmohmi cha vbanumpeshi vhleha im anumpa hash, micha iti hullo aienā, micha pska boshullichi, mikmvt vba pit anumpuli aienā kvt kullo fenhvt ahashwa tok.

43. Ȳmohmi ma hatak moma ka nukshopa hvt onvtyula tok ; mihma nana fehna, micha nan isht ahoba laua aienā kvt vbanumpeshi vhleha hash isht a ȳmohmi tok.

44. Ȳmohmi ma na yimmi tuk vhleha hvt momvt ai it achvfa mvt, anonti nana puta ka ai i moma hosh ai asha tok.

45. Micha im osapa puta, vlhpoyak aienā kash okla kampela cha, hatak mominchit hatak vt nana ho bvnna hatuk aiyuka ka, i hopela tok.

46. Micha im anukfila mvt ai achvft, Tempel anukaka ya, nitak moma ai ahashwa, micha chuka taloha puta ma,

puska a boshullichit itvnowa aienā mvt, chūkvsh ai ăhlit na
yukprt im ilhpak ma vpt aiashvt,

47. Chihowa ya ai okpahanchi ma, okla moyuma kvt
ahniechi tok. Yvnohmi ma okchaya he puta kano, Chito-
kaka yvt nitak moyuma ka vbanumpuli iksa ya isht ibaka-
hanli tok oke.

CHAPTA III.

Pita, Chan ita tuklo kvt hatak imomokpulo hlakofichi tok o isht an-
noa, 6.

1. YOHMI ma Pita, Chan ita tuklo kvt hushi kanvlli
isht vlpisa chakkali ho, vba pit ai anumpuli hushi kanvlli
hatuk o, tempel a itiachit ont chukowa tok.

2. Yumohmi ma hatak vt imomokpulo yosh vutta tok o,
yummma okla iti sholit, tempel a, okla ont a chukowa ka,
nanasi kia im asilhha chi ho, nitak uha tempel okhissa,
yummvt hohchifo mvt aiukli achi ho, ont okla bohyuli beka
tok o;

3. Yummak ashott, Pita, micha Chan ita tuklo kvt tem-
pel a pit chukowvt okla chi ho, pisa mvt nanasi kia asilhha
tok.

4. Mihma Pita yvt Chan ash awant yummak ash aiok-
chifelit pihsa mvt, Auet pi pesá, achi tok.

5. Yohmi ma yummak ashott nana ho im a habena chi
ka, im ahoba mvt im atia tok.

6. Mihma Pita yashott, Tuli holisso, micha tuli holisso
lakna aienā hokvto ik sv̄m ikshoshke: amba nana ho ishi li
kto chima lishke: Chisvs Klaist Nasalet ai vutta hohchifo
pulla ka, wakaya cha nowá, achi tok.

7. Mihmvt ibbak im ishtimpak imma ya halvlli cha,
wakeli tok: mihma ashalika iyi, micha iyi imoksak foni
puta aienā kash ot hlampkot toba tok.

8. Mihma yummak ash ot balaklit tanit hikia cha, nowa
tok: mihmvt nohovvt, anonti mvllit, Chihowa ma pit aiok-
pahanchit, yummak ash awant Tempel a ont chukowa tok.

9. Mihma okla momvt yummvt nohowa, micha Chihowa pit aiokpahanchi aienka, piesa tok.

10. Mihmvt yummak osh na habena chi hosh tempel okhissa aiukli a asha beka tuk a, okla ithana tok: nana kvt ai i yakohmi tuk a, okla okokko! ahnit anukhlakanchut kunia tok.

11. Micha hatak imomokpulo hlakofi tuk ash ot Pita, micha Chan ita tuklo ka halanli ma, okla moma kashot okokko! ahni fehnvt, o yihleput Solomon im apishia achi ho nutaka ya, ont ai itahoba tok.

12. Yumohmi na Pita yvt pihisa mvt, okla hash im anumpulit, Islael hatak hvchia hvt, nanta katihmi ho ilvppa isht hvchi anukhlakanche cho? Micha nanta katihmi ho pishno nan isht a pim ahlika akinli hokma, keyukmvt pi achukma hokiná, nána tuk osh hatak ilvppa e nowuchi tuk o chiyuhmit aiokchifeli fenvt hvsh pi pihisa cho?

13. Eblaham micha Aisak, mikmvt Chekob in Chihowa, micha hvp iki vhleha in Chihowa yvt Ushi Chesus a holitobli tok; yummak oka Pailat vt ant ik ia, im ahni vlhpiesa tuk a hvchishno vt itikba hielit kanchit ibbak hvsh fohki tok oke.

14. Micha Holitopa, mikmvt Aiähli aienka tuk ash hvsh kanchi cha, hatak ubi yak osh a hvchim vlhpiesa chi kvt, hvsh asihihla tok.

15. Micha Aiokchaya i miko ya hvsh bi tok o, yummak ash illi tuk a, Chihowa yvt tanichi tok o; yumma atokowa anoli vhleha pia mak oke.

16. Yumma hohchifo, hohchifo yumma a yimmi pulla hosh hatak ilvppa hlampkochi tuk o, hvsh pisvt hvsh ithaiyanushke: ahli, yumma ai i yimmika pulla hosh haknip achukma aiähli ilvppa, hvsh moma hvchi tikba ya a im ataiyahli hoke.

17. Yohmi ka itibapishili vhleha ma! na hvchik ithaiyano kak osh hvsh yumohmi tok; micha hatak hvchi pehlichi vhleha ak kia yohmi akinli tuk a, himak a ithaiyana lishke.

18. Yohmi kia Klaist vt ilbusha he a, Chihowa yvt tikba

ma i hopaii puta itih ha, nana yvymma puta ka isht anohonli tuk vt, yvymihehit ai ahliche tok oke.

19. Yvmohmi hoka ile kostininchit im anukfila inla hvchi anukfohkashke; yvmohmi na nitak hochukma Chitokaka itikba a mihinti kvt ahanlakma, nan hvsh ai ashvchika puta kvt hvchi kashofa hi oke.

20. Yvmohmikma tikba kash isht hvchim anumpa tok Chisvs Klaist a auet chvfficha hi oke.

21. Yvmmak oka vba shutik vt ieshi pulla na, nana okluha Chihowa yvt nitak tikba pilla mihinti ka, i hopaii hochukma puta itih ha isht anumpohonli tok vt, ont ai ahla he vlhpiesa hoke.

22. Moses okvt hatak pin tikba vhleha ha, Chin Chitokaka Chihowa yvt hvsh itibapishi hatuk a hopaii, vno chohmi ka ikbit hvchi hilecha he: yvmmak o nan okluha nana ho hvchim ahanchikma, hvsh haiyakla hi oke.

23. Yohmikma, yakohma hi oke: kuna hosh Hopaii yvymma i haponakla he keyukmv, okla ai ibafokha tuk vt ai okpulo kvt kwnia hi oke; im ahanchi mvhli tok.

24. Ahli, micha hopaii moma, Samuel ai vhlit minti, micha ola takla ha asht isht auehinchit anumponli kvt momvt, nitak yakohma hi oka, tikbanlit anoli akinli tok.

25. Hvchishno vt, hopaii vhleha, micha Chihowa yvt hvpin tikba vhleha ha, nan it im apesvt Eblaham a, chishno isht chi ai unchululi ho, oklushi puta yakni paknaka aiasha kvt ai isht ilayukpa hi oke; im ahanchi tok, anumpa ha ushi hvchia hoke.

26. Chihowa yvt ushi Chisvs ikbit hilechi mv, hvchishno ak o mominchit nan im ai ashvchika ya ai isht filummitchit a chi yukpala chi ka, tikbanli auet chvffihinchi tok oke; achi tok oke.

CHAPTA IV.

Pita, Chan ita tuklo kvt aboha kvollo vlhpitta tok, 1. 8 Pita yvt nukwaya iksho tok. 18 vbanumpeshi vlheha hvt anumpa kvollo im vlhpisa tok.

1, 2. MICHA okla ha im anumpulit ahashwa ma, na holitompa ish v^tta vhleha, micha tempel atoni, mikmvt Satusi vhleha aiena kvt, yummvt hatak illi puta tana hi oka, Chisvs atuk mak o okla ha nan ikhvñanchi, micha isht anumpohonli kak o, ik im v^lhpieso hatuk osh, ant i kocha tok.

3. Micha okla ibbak isht ieshit, aboha kullo apitta na onna tok, opia hosi tok oka.

4. Yohmi kia anumpa ha hahaklo tuk vt, laua hosh yimmi tok; yvmohmi ma hatak holhtina kvt tahlepa sipokni tahlapi foka tok.

5. Ont onna ma yakohmi tok; Okla i pehlichika vhleha, micha hatak hochitoka vhleha, micha na holissochi vhleha,

6. Mikmvt Annas, na holitompa isht asha pehlichi, micha Kaiafus, mikmvt Chan, micha Aliksanta, micha na holitompa isht asha pehlichi i kanomi vhleha moma aienvt, Cheluselem a ai itahoba tok.

7. Micha yummak ash o ai iklnna hiohlechi mvt, Kuta hosh nan apesa tuk o, keyukmvt nanta hohchifo ho ilvppa isht hvsh ai yakohmi tuk oh cho? achit ponaklo tok.

8. Yohmi ma Pita vt Shilombish Holitopa isht anukfohka fehna mvt, Okla pehlichi vhleha micha Islael i hochitoka vhleha huchia ma!

9. Hatak iksitopo vt nan isht il ayukpa yvt im v^lhtaha tuk a, kaniohmi ho isht a hlakofi tuk a, himak nitak a pishno ak o pi ponaklo hatuk oka,

10. Huchishno vt hvsh moma, micha Islael okla moma kvt hvsh ithaiyanashke; Chisvs Klaist Nasalet ai v^tta hohchifo pulla, yvmma iti itaiyuhvna hvsh a takalichi tok o illi tuk a, Chihowa yvt tanichi tok: yummak fehna kak o, hatak ilvppvt isht a hlakofi cha hrchi tikba ya, yak hikia hoke.

11. TuLi ilvppak o, chuk-ikbi vhleha huchia hvt, ik ahobalot hvsh kanchi tok mak o, yummak ash ot chukbi ka nutak intola fehna toba hoke.

12. Micha ai okchaya mvt inla kia iiksho: shutik nutaka ya hohchifo inla ma hatak puta ka auet ai ima tok o, mihi yo il ai okchaya he v^lhpesa kvt iksho hoka; im ahanchi tok.

13. Yohmi ma Pita, micha Chan ita tuklo kvt nukwaya iksho ho okla pihisa, micha yvmmvt hatak holisso imponna keyu, micha nan ik ithano aien a yatuk a, akostininch mvt, okokko! okla aiahni tok; micha yvmmvt Chisus a apehvvt aya tuk a, okla im akostininch tok.

14. Micha hlakofi tuk hatak ashott ibafokvt hikia na, okla pisa hatuk osh, yummma okla nan isht a miha he keyu tok.

15. Amba ai itunaha ka a kohcha chⁱ ka, okla im apesa ha yokvto, ilap bika it im anumpulit mayvt,

16. Hatak ilvppa nanta k^o echo katimihcha chⁱ ho? na fehna ithana hinla mak o, yummma ai isht yvmohmi mvhli tuk a, Chelusalem ai asha kvt momvt akostininch hoka; anonti pishno vt ik ahlo, e miha he keyushke.

17. Amba okla ha ibai a chukowvt i shahlit isht ik aiyo ka he a, i nokowa fehnvt, himmak a pill a ma, hatak nana kia hohchifo ilvppa isht ik im anumpulo ka hⁱ a, iloh im ape-sashke; ahanchi tok.

18. Mihmvt okla pit i howa cha, Chisus hohchifo ha isht ik anumpulo kumohmikmvt, anonti nan im abvchit ik ahashwo ka chⁱ ho, im apesa tok.

19. Yohmi kia Pita, micha Chan ita tuklo kash ot, afalaminch mvt, Hvchishno ak o a hvchⁱ haponaklo kvt, Chihowa ya, i shahliche kak okmā, nanta kosh Chihowa itikba ya ai vlpiesa ho anukfillit ho pesá.

20. Nana ka e pisa tuk, micha e hahaklo tuk aien a kvt, isht kil anumpulo ka he keyu hoka; im achi tok.

21. Yvmohmi ma okla hatuk pulla mak o, kanimihchit a fumma hinla kvt, ik akostininch hatuk osh, achakalit nan i mihvt tahli mvt, ant ik ayá, okla im ahni tok; nana kvt a yvmohmi tuk a, hatak moma kvt, Chihowa ya pit isht holitobli hatuk o.

22. Hatak vt hopahki kvt afummi pokoli ushta ka atampa ho na fehna nahlakofichi ilvppvt ai i yvmohmi hatuk oka.

23. Ant ik ayá, im ahni muno, vt ilap ai itapeha ai asha kash itonachi tok; micha na holitompa isht vtta vhleha, holitok aien a kvt nana im achi tuk ash mominchit anoli tok.

24. Mihma yummma okla haklo mvt, im anukfila ai achvfvvt,

Chihowa ya okla pit im anumpuli mvt, Chitokaka ma ! chishno akosh Chihowa chia hosh, vba shutik, micha yakni, mikmvt okhvta, micha nana moma yakohmi aiasha ka ikbi tok chia hvt ;

25. Lewi chim vlla itih ha isht ish ai anumpuli mvt, Nanta katihmi ho okla nan ik ithano yvt nokowa ma, anonti okla hvt nana tok keyu ka anukfillit ai asha tok oh cho ?

26. Yakni miko vhleha hvt hieli ma, yohmi na pehlichi vhleha hvt Chitokaka, micha i Klaist aieno ka i sanalit itahomba tok, ish achi tok.

27, 28. Ahli muhlishke, chiso holitopa Chisus, yummak o chishno vt ish il a hummichi tuk ash, Helot vt Pašhis Pailat a ita tuklot, okla nan ik ithano vhleha, micha Islael okla aieno ka itapehvt i sanalit nana hosh kaniohma hi a, chibbak, micha chim anukfila aieno kvt, tikbanlit aiahni tok a, yv-mihcha chi mak osh, okla itahohomba tok oke.

29, 30. Yvmohmi ka himonasi a, Chitokaka yvt okla im anumpa palummi a ish ithaiyanashke, micha hlakoficha chi kvt, chibbak a auet ish wihiqli ; micha nan isht ahoba puta, anonti na fehna-puta aieno kvt chiso holitopa Chisus hoh-chifo pulla ka isht a yvmohmi na, chin tishu vhleha hvt nuk-waya iksho hosh chim anumpa ha isht anumpohonla chi ka auet ish im aiahnashke ; achi tok.

31. Yvmohmit vba pit anumpulit okla in taiyaha ma, itunahvt okla a chieya tuk ash winakahanchi tok : yohmi ma momvt Shilombish Holitopa yvt anukfohkv kvnia mvt, nuk-waya iksho hosh Chihowa im anumpa ha okla isht anumpohonli tok oke.

32. Okla laua na yimmi tuk vhleha hashot chukvsh achvfa mvt, Shilombish mvt achvfa hosh ai asha tok ; micha achvfonia kia nana im aiasha kvt kaniohmi ka ilvppa vno ummi fena, achi tok keyu ; amba nana moma ai i moma hosh aiasha tok.

33. Ubanumpeshi vhleha hash ot nan ahlika chinto ka il aieshi hosh, Chitokaka Chisus vt tani tok a atokowa okla anohonli tok : yvmohmi ma ayukpa chinto kvt mominchit onvtoyula tok.

34. Micha achvona kia nana kvt ik im iksho mvt ibafoka tok keyu ; amba osapa, micha chuka kia in talohmaya aiyukali atuk vt, kampila cha, nana hosh nana kanchi ka it vlhtoba tuk puta ka, okla isht ai vla tok.

35. Micha yummak ash vbanumpeshi vhleha iyi ituma ya, ant ashachi tok ; yohmi na hatak vt nana ka banna ka aiyukali tuk a isht i holhpila tok oke.

36. Yohmi ma Choses atuk o, vbanumpeshi vhleha hvt Banabas hochifo tok, yvmmvt toshowakmvt Nana im abuchi ushi achi hoke, Lefait hatak Saiplus yakni vtta vt,

37. Osapa in talaia tuk osh, kanchi cha, twli holisso a isht vla cha, vbanumpeshi vhleha iyi ituma ya, ant ashachi tok oke.

C H A P T A V .

Ananaius, Safaila itatuklo kvt, Pita yvt nan i miha ma, illit aka kaha,

1. 12 vbanumpeshi vhleha hvt na fehna puta yvmihinchi tok.

1. YOHMI kia hatak achvfa Ananaius hohchifo hosh, tekchi Safaila itatuklot, osapa kanchi,

2. Micha isht vlhtoba tuk ash kashvblit ishi tok ; tekchi ak kia im akostininch i ho ; micha a kashampa ho isht vla cha, vbanumpeshi vhleha iyi ituma ant bohli tok.

3. Yohmi ma Pita yashot, Ananaius, nanta katiohmi ho Shilombish Holitopa ya ish i holabi cha, osapa isht vlhtoba tuk a kashvblit ish isha chi ka, Setan vt chi chukvsh a anukfohki tok oh cho ?

4. Talaya moma mvt, chishno ak o chimmi ha tok keyu ? micha yvmmvt kvnia ha ya, chishno chibbak o foka tuk keyu ? nanta katiohmi ho, ilvppa chi chukvsh anukaka isht chim anukfiela tuk oh cho ? Hatak o ish i holabi tuk keyu, amba Chihowa ak atuk oke ; achi tok.

5. Yvmohmi ma, Ananaius ashott anumpa ilvppa hahaklo mvt, aka itulvt fiopissa tok ; yohmi ma na yakohmi ka haklo kvt momvt nukhlakancha fehna tok.

6. Mihma hatak himita vhleha yosh wakayvt, nan abonullit isht kohcha cha, ont okla hohpi tok.

7. Mihma yummak atuk a hopaki kvt hvshi kanvlli isht vlpisa tuchina foka ho, tekchi vt nana kvt yvmohmi tuk a, ik akostininch hosh ant chukowa tok.

8. Mihma Pita yvt im anumpuli mvt, Yakohmi ho osapa ya hvsh kanchi tuk okmá, nanakmvt, is svm anolashke ; achi tok, mihma, Yau, yummak okvno ; achi tok.

9. Mihma Pita yashot, Katiohmi ho Chitokaka imi Shilombish a imoma ka hvsh pisa chi kvt, hvchim anukfila hvt ai achvfa tuk oh cho ? Chi hatak a hohpi tuk, micha chishno ma isht chi kohcha chi vhleha iyi vt okhissa ya asha ka, pisá ; im achi tok.

10. Yohmi ma mih makinli ho yummak ash ot iyi ituma ya ont itula mvt fiopissa tok ; mihma hatak himita vhleha yash ot ant abeha cha, yummvt illi tuk o pisa mvt, ishit kohcha cha, i hatak ont apotulit hohpi tok.

11. Mihma vbanumpuli iksa yvt moma, micha kaniohmi hosh na yakohmi ka haklo tuk vt momvt nukshopa fena tok.

12. Yvmohmi ma vbanumpeshi vhleha ibbak a nan isht ahoba, micha na fehna aien laua kvt okla itintakla ya isht a yvmohmi tok. Mihma momvt im anukfila hvt ai achvft Solomon im apishia nutaka chieya tok.

13. Mihma inla hokvto nukwia kvt hatak achvfa kia ik ibafohko ki tok ; yohmi kia okla hokvto yummma ahninch tok.

14. Mihma na yimmi vhleha hatak nakni, micha ohoyo puta aien laua kvt, laua hosh Chitokaka ya ai ibvlkhaha kvt i shahlit ia tok.

15. Yohmi hatuk o Pita yvt ayvt ont iakma shilombish ak illa kia kaniohmi ka pit o hoshontikacha hi a, abeka puta ka isht kohchvt hina puta isht onvt topa, micha topushi aien paknaka ont okla o kahpulli tok.

16. Mihma auet abilika tumaha talohmayvt fullota ka asht minti kvt laua hosh abeka puta, micha na shilombish okpulo puta isht issikkopa vhleha hatuk aien isht ayvt, Cheluselem a ai vla tok ; mihma momvt hlakofit taiyaha tok.

17. Yohmi ma na holitompa isht asha pehlichi, micha apeha tuk vt, (yummvt Satusi iksa yatuk osh,) momvt wakaya mvt, anukhobel fehna tok.

18. Mihmvt vbanumpeshi vhleha ha, okla ibbak isht ieshi cha, okla moma im aboha kullo yo pit apitta tok.

19. Yohmi tuk kia Chitokaka im enchil vt ninak a aboha kullo okhissa ya ant tiwit tahli cha, pehlichit kohcha mvt,

20. Oh ia cha, ai okchaya ilvppa isht anumpa ha mominchit tempel anukaka ya ont hielit okla ha isht hush im anumpohonlashke ; achi tok.

21. Mihma yvymma okla haklo mvt, onnahinli fehna tempel a ont abeha cha, nan ithvnanchit ahashwa tok. Yohmi kia na holitompa isht asha pehlichi vt apeha tuk ash aient ai vla mvt, nan apesa vhleha, micha Islael okla i hochitoka moma i howvt itahobi mvt, yummak ash isht vla chⁱ ho, aboha kullo a pit tihleli tok.

22. Yohmi tuk kia nan vlhtoka vhleha hash ot ai vla cha, aboha kullo anukaka ya, yummak ash ant ik a peso mvt okla falamvt ont anolit,

23. Aboha kullo yokvto vlhkama achukma bano, yohmi ma apistikeli yvt okhissa puta itikba kocha ya hielo ho, ont e pisa ho mvhli tuk, yohmi kia e tiwi mvt, hatak nana kia anukaka ya asha na ke peso kano ; ahanchi tok.

24. Yvmohmi ma na holitopa isht asha pehlichi i shahli micha tempel atoni, mikmvt na holitompa isht asha pehlichi vhleha aieno kvt, na yakohmi ka haklo mvt, nana ak o ilvppvt ont ai vlhpiesa hinla ka, ik ai akostininchot okla aiasha tok.

25. Yohmi ma achufa kvt ayvt okla hash ant im anohonli kvt, Yakeh ! hatak aboha kullo pit hush apitta tuk ash o tempel anukaka ya hielit, okla ha nan im abahanchishke, achi tok.

26. Yohmi ma nan atoni ash ot, nan vlhtoka vhleha hash itvpeha cha ia mvt, okla ha i nukshopa, yummak keyukmvt, tuli okla isht boa hinla hatuk osh, yummak ash o nan ik kanihcho hosh ont pehlichit vla tok.

27. Ont okla pehlichit vla mvt, nan apesa vhleha itikba ya hiohlichi tok : yohmi ma na holitompa isht asha pehlichi yvt im a ponaklot,

28. Hohchifo ilvppa isht im abuchit hvchik ahanto ka hi

a, kullochi fehnvt okla e chim apesa tuk keyu? Yohmi kash o Cheluselem a hvchim anumpa isht ai alotolit hush kaiyanchi; yohmi mvt hatak ilvppa im issish a pishno ak o isht pi onochi hvchi bvnnvshke; ahanchi tok.

29. Yohmi ma, Pita, micha vbanumpa isht vtta vhleha inla aien aien kashot afalaminchi mvt, Chihowa yak o il im antia kvt hatak a, il i shahlicha he tuk oke.

30. Hypin tikba puta in Chihowa yvt, Chisus yumma iti a takalichit hush bi tuk a, tanichi tok.

31. Yummak o Miko, micha Nan okchalinchi aien aien cha, ilekostininchi Islael a anukfohki, micha ai ashvchika' aien aien ma kashofa chj ka, Chihowa yvt ilap ibbak ishtimpak imma ya isht holitobli tok oke.

32. Ymohmi ka pishno ak osh nan ilvppa puta ka isht im a atokowvt anoli pia; yohmikma Shilombish Holitopa, yummma Chihowa yvt im antia vhleha ha ima tok a, yohmi akinli hoke; achi tok.

33. Yummak haklo mvt, okla anukhobel fehna mvt, vba chj kvt, isht anumpulit maya tok.

34. Mihma achfvt Falisi hatak, Kameliel hohchifo, nan vlpisa ikhananchi, okla momvt i holitopa cha tuk o, nan apesa vhleha itin takla ya hikia mvt, vbanumpeshi vhleha hash, chekosi takla ka kocha pit ashacha chj ka, miha tok.

35. Ymohmi mvt, Islael okla hvchia hvt hatak ilvppa imma yo, nana kanihcha chj ka, hush aiahni hokvto, ahah! isht hush il aiahnashke.

36. Himak nitak takla ka, Hlutas vt ilap ak osh hatak fehna mak o, mihvt ahanta na yummma hatak holhtina kvt tahlepa ushta fokvt iba kaha tok o; yummak ash o vbi ma, im antia vhleha hatuk ash ot momvt, ita fimimpt, ont aiok-pulokvt taha tok.

37. Chutvs Kalili hatak osh hatak ilvppak ash achakvt, okla holhtinvt maya nitak ash ahanta cha, okla lawa ka isht il akanvlichchi tok osh, yummak ash kia illi tok: yohmi ma kaniohmi hosh im antia tuk vt, momvt itatiapvt taha tok.

38. Ymohmi hoka, Hatak ilvppa nan isht hvchik ahalaio ho, peh asht ik itunowá; chim ahanchi lishke Anumpa, mi-

cha, nan isht vtta aienā ilvppvt hatak atuk okma, ont aiok-pulokvt taha chi hoka.

39. Amba yvmmma Chihowa yak atukmvno, ai okpvnit hvsh kancha he keyushke. Yvmmak keyukmv, Chihowa yak o itibi hosh hvsh ahashwa na hvchi ahayucha hinla hoke; im ahanchi tok.

40. Mihma, vlhpesa okla im ahni tok. Micha vbanumpa isht vtta vhleha hash i howa cha, fummit ashachi mvt, Chisvs hohchifo ha okla isht ik anumpolo ka chi ka, im apesvt taiyahli cha, kvnompit tihleli tok.

41. Yohmi ma yvmmma hohchifo pulla ho na hofahya ka isht ile pisa he a, ont ai vlhpiesa tuk vt, na yuhukpvt nan apesa vhleha itikba ya asht okla ia tok.

42. Micha nitak moma tempel anukaka, micha chuka taloha moma ka, nan im abuchi, micha Chisvs Klaist isht anumpuli aienā kvt okla ik isso tok.

CHAPTA VI.

Vbanumpeshi vhleha hvt hatak ilbvsha ithana, micha anumpa ha isht anumpuli aienā, 1. 5 Hatak vlhtoka untuklot vlhtoka tok.

1. NITAK yvmmak foka, nan ithvna vhleha hvt laua kvt isht i shaht taha ma, im ohoyo vlhtakla puta ka nitak moma nana iti hopela ya ahaksichi beka hatuk o, Klik okla hvt Heblu okla ha nanumachit aiasha tok.

2. Yohmi ma auahatklo kashot nan ithvna vhleha laua kash itahobi cha, Chihowa im anumpa ha il issa cha, ai im-pa yak o isht il ai ashwa he, vlhpesa keyushke.

3. Yohmi hoka il itibapishi vhleha ma ! hvsh ai itupeha ya hatak untuklo annoa achukma chatuk, nan imponna, micha Shilombish Holitopa anukfohka aienā ho hvsh atokoli na, yvmmak o nan ai isht vtta ilvppa e hiohlechashke.

4. Amba pishno ak okvo, vba pit anumpuli, micha anumpa isht vtta aienā kak o, kil isso kymohma chi hoke; achi tok.

5. Yohmi ma okla lawa kash ot momvt anumpa ha aiok-

panchi tok. Yohmi mvt Istefin hatak na yimmi, micha Shilombish Holitopa yvt anukfohka fehna, micha Filip, micha Pokolv, mikmvt Naikena, micha Taimon, micha Paminus, mikmvt Nikolis vbanumpa nukfohka Antiak ai vtta aie-na ho, okla atokoli cha,

6. Yvmmma puta kash o vbanumpeshi vhleha itikba hioh-lechi tok. Mihma okla vba pit anumpuli mvt, ibbak isht umbitepa tok.

7. Yohmi ma Chihowa im anumpa hvt isht i shahlit ia ma, Cheluselem a nan ithvna vhleha holhtina laua kvt i shahlit ishtia fehna tok; yohmi ma na holitompa isht ash-a lawa fena kvt ayimmika ya im antivt aisha tok.

8. Mihma Istefin vt ayimmika, micha isht ai ahlika aien-a kvt isht alota mvt, nan isht ahoba chinto, micha nafehna aien-a ka, okla itin takla ya a yvmihinchi tok.

9. Yvmohmi ma sinakak Laibatin okla i sinakak achi ho, ash-a yatuk, micha Sailini okla, micha Aleksantia okla, mik-mvt Silisia, micha Asia minti aien-a kaniohmi kvt, Istefin a itim anumpulit hieli tok.

10. Yohmi kia chukvsh, micha ahopoyuksaka aien-a ho isht ai anumpuli hatuk ash, okla nan isht a miha he keyu tok.

11. Yohmi mvt hatak lumvt tohno na, Yvmmak ashott Moses, micha Chihowa aien-a ka ik ahobalot isht anumpo-honli ka, e haklo kano; achi tok.

12. Micha okla puta, mikmvt i hochitoka vhleha micha holissochi vhleha aien-a kash okla ilhkolihihi na, okla i kohcha cha yvmmak ash ishi mvt, nan apesa vhleha ha isht im ona tok.

13. Micha hatak nana aholubi ya hiohlechi na, yvmmak ash ot, Hatak ilvpput aholitopaka ilvppa, micha nan vlhpisa aien-a ka, anumpa ik ahobalo isht mihachi kvt ik issosch-ke.

14. Chisus Nasalet ai vtta ilvpput ilvppa okpvna he, micha nan vlhpisa puta Moses vt hvp ima tok a inlucha he, ilvpput achi ho, okla e haklo kamo; achi tok.

15. Yvmohmi ma, itvnahvt maya kash ot momvt yvmmak

ash aiokchifeli fehnvt pisa ma, nashuka mvt enchil nashuka
yo chiyuhmi na, pisa tok oke.

CHAPTA VII.

Istefin a im asilhhuchi hatuk o isht il anumpuli.

1. **YUMOHMI** ma na holitompa isht asha pehlichi ashott, Nana kvt yakohmi ho mvhli cho ? achi tok.

2. Mihma yummak ashott, Hatak itibapishi li vhleha, mi-cha an tikba puta ma ! hush haiyaklashke. Pin tikba Eblaham vt Chalan a, ont ik vtto kisha hosh, Mesopotemia ak o anta moma ma, Chihowa holitopa yvt ant i haiaka tok.

3. Mihmvt yummak ash o, Chi kanomi vhleha i filummit, chi yakni a a kohehvut ayut, yakni chi pisachi la chi ka, ish lashke ; im achi tok.

4. Mihma Kaltia okla i yakni ash a kohchvt minti cha, Kalan ak o ant ai ahanta tok. Atuk o iki vt illi ma, yummak ash o a wihachit yakni ilvppa himonasi hush ai ahashwa ka, isht vla tok.

5. Ulla yvt ik im iksho kisha ma, ilap micha isht ai-unchululi aienka, yummvt immi ha he mak o, ima hi okvt, i miha tok nana kia, a binila hi a peh iyi putha a habli achufa kia, ilap a ik emo ki tok.

6. Micha Chihowa yvt yakohmichit anumpuli tok : Yumma isht ai unchululi vhleha hvt yakni inla ai itunowa he ; yohmikma okla yukachit ilvshahanchi na, afummi tahlepa ushta he.

7. Yohmikma oklushi nana ho i yukvt ahashwa tukma, yamma na kanichi la hi oke ; yohmi ha mvno, okla kocha wiha cha, ilvppa ant a si aiokpahancha hi oke ; Chihowa yvt achi tok.

8. Mihmvt hakshup twpa nan vlpisa ka ima tok. Atuk o Eblaham vt Aisak a ikbi cha, nitak isht untuchina ma, hakshup tbli tok. Atuk o Aisak vt Chekob a ikbi tok o, Chekob vt hatak piki hochitoka auah tuklo ka ikbi tok.

9. Yohmi tuk o, hatak iki hochitoka yash ot Chosef a i

nukkilli hatuk osh, nan isht chumpet Echip a pit kanchi tok; yohmi kia Chihowa yet awant anta tok.

10. Micha nan isht im a palvmmi puta ka mominchit ai isht kohehi cha, Echip miko Feleo a itikba ya aholitopa, mi-cha nan imponna aienvt ahanta chi ka, ima tok; yohmi na yummak ashon Echip yakni, micha in chuka moma pehlichi ikbi tok.

11. Yumohmi ma Echip yakni moma, micha Kenan aiena ka na hohchvfo, micha na palvmmi chinto aiena kvt onvtu-yula tok; yohmi ma hvpin tikba vhleha hashot nan ilimpa nana kia ik ahayucho ki tok.

12. Yohmi kia Echip a tanchi vt asha na Chekob vt ha-klo mvt, hvpin tikba vhleha ak o vmmoma ka pit tihleli tok.

13. Atuk o ont atukla kak o, Chosef vt itibapishi vhleha ha im il anoli tok. Yohmi ma Chosef i kanomi vhleha hatuk vt Feleo a im annoa tok.

14. Yohmi ma Chosef vt iki Chekob, micha i kanomi vhleha moma kvt, hatak pokoli untuklo akucha tahlapi ho, pit hoyo hosh, pit chuffichi tok.

15. Yohmi na Chekob vt Echip a ona tok osh, ilap ash, micha hvpin tikba vhleha aienvt illi tok.

16. Yumohmi na ishtivt Saikam a isht ona cha, Eblaham vt ahollopi Saikam iki, Ema ushi vhleha ha tuli holisso isht in chumpa tok a, ont fohki tok.

17. Yumohmi kash o Chihowa yet anumpa kullo Eblaham a nan isht ai im apihisa tok, nitak vt ai ona het maha-yaya ma, okla hashot Echip a laua kvt i shaht isht maha-yaya na,

18. Miko inla Chosef a ithana keyu hosh hikia tok.

19. Yummak ash osh hvpi kanomi vhleha ha haksichi mvt, hvpin tikba vhleha hash o ilbuushachi, yumohmi cha okcha-yet ik mayo ka chi ka, im vllosi a isht kampila beka tok.

20. Yummak foka ma Moses vt vta mvt, aiukli fehna, yumohmi cha iki in chuka ya hrshi tuchina ho, a pishi tok.

21. Yumohmi tuk o kocha kanchi ma, Feleo ushetik vt eshi cha, ilap ushi a chi ho hofantichi tok.

22. Yumohmi ma, Moses vt Echip okla nan ai ithana

puta ka mominchit ithaiyana, yvmohmi mvt anumpa puta, micha na fehna puta aienā ka isht anta imponna tok.

23. Yvmohmi tok osh hopaki kvt afummi pokoli ushta ont vlpiesa mvt, itibapishi Islael ushi vhleha h̄ i nowvt aya hi oka, chukvsh anukfoyuka tok.

24. Yvmohmi tok osh, achvft nan vlpesa keyu h̄o isht ilvsha na pisa mvt, yvmmak ash apelvchi, yohmi cha, issikkopa tuk a atobbit, Echip hatak ash vbi tok.

25. Yvma ibbak ak o Chihowa vt isht hlakoficha hi a, itibapishi vhleha h̄t okla akostininch hatuk a, im ahoba hatuk kia, okla ik akostininch ki tok.

26. Yvmohmi tuk o nitak ont atukla ma itibi hosh ashwa ma, yvmmak ashont i haiaka cha, itin nanaivcha chi hosh, Hatak, itibapishi hvchia hoke; na katihmi h̄o hvsh iti okpvni cho? ahanchi tok.

27. Yohmi kia in chuka panta hatak okpvni tuk ashott, Kvt hosh na pi pehlichi, micha na pim apesa aienā ka chikbi tuk o?

28. Pilashash Echip hatak ish bi tuk vt, is sa chomicha chi h̄o? achi mvt, naksi ka pit tobli tok.

29. Yohmi ma ilvppa ahanchi ka, Moses vt kvnia cha, hatak nowvt aya yosh, Matian yakni ya ahanta hosh, yvmmak o ushi tuklo ka ai ikbi tok.

30. Atuk o afummi pokoli ushta kvt ont taha ma, Chitokaka im enchil vt yakni haiaka nvnih chaha Saina ya bvfaha anuka luak libbi h̄o, ant im a haiaka tok.

31. Moses vt yvma pisa mvt, na pisa kvt okokko! aiahni tok; micha akostininch chi hosh bilika ona ma, Chitokaka im anumpa h̄t im vla kvt,

32. Uno akosh chin tikba vhleha ya in Chihowa sia, Eblaham a in Chihowa, micha Aisak ma in Chihowa, micha Chekob a in Chihowa sia mak oke; ahanchi tok. Yohmi ma Moses vt wvnihinch mvt, atokowvt pisa nukwia tok oke.

33. Yvmohmi ma Chitokaka ashott, Shulush a chiyi ish a shuelashke; ish a hikia yvmmvt yakni holitopa hoka.

34. Um okla vhleha Echip ai ahashwt ilvsha ka pisa kvt pihisa li: micha okla yahaya ka hahaklo li chatuk;

yvmo^hmi cha kocha weli la chⁱ hosh aka minti lishke. Yohmi ka mintí, chishno ak o himonasi a Echip a pit chi chvffichi lashke; im achi tok.

35. Moses ilvppa, okla shitlema cha, K^vta hosh na pehlichⁱ, micha nan apesa aien^a ka chikbi tok o? ahanchi tok ash fena akinli ka, na pehlichⁱ, micha na hlakofichi aien^a ka, enchil bvfaha an^uka ai i haiaka ka ibbak o, Chihowa yvt isht a pit chvffihinchi tok.

36. Mihma na fehna, micha nan isht ahoba puta aien^a ka, Echip yakni, micha okhvta humma, mikmvt afvmmi pokoli ushta ho yakni haiaka ya, isht a kaniminchi hosh, yvmmma pehlichit kohcha tok.

37. Moses ilvppak osh Islael ushi vhleha ha, Chihowa hvchin Chitokaka yvt hvsh itibapishi hatuk a, hopaii vno chohmi ho, ikbit hvchⁱ hilecha he; yvmmak o hvsh i haponakla hi oke; im ahanchi tok oke.

38. Ilvppak osh yakni haiaka okla ai itvna^h ka ibafok^a, enchil vt nvnih chaha Saina ya ai im anumpuli ka awant anta; micha hvpin tikba vhleha ma ibafok^a tok; yvmmak osh isht ai okchaya, nan vlhpisa puta ka hv^p ima chi kvt, ishi tok mak oke.

39. Yvmmak o hvpin tikba vhleha hvt im antia he keyu hosh, amba naksi ka pit tobli cha, chukvsh vt falamvt Echip a ia mvt,

40. Alon ash o Pi tikba ilhkola chⁱ ka, Chitokaka puta ka, pim ikbí; Moses ilvppa pi pehlichí Echip yakni ai isht pi kohchi ano, nana mak osh isht a kaniohmi tuk chishba, kil ithaiyano hoka, im ahanchi tok.

41. Micha nitak yvmmma foka ma, wak ushi okla ikbi cha, na holba toba yash nan isht aiokpvchi ya, isht im ai vla cha, ilap ibbak nan ikbi tuk a isht il ai yukpvt aiasha tok.

42. Yohmi ma vba fochik puta ka, okla aiokpvcha chⁱ mak o, Chihowa yvt issvt i filvmmi tok. Hopaii vhleha i holisso ha a holihiso kvt, Islael in chuka achvfa vhleha hvchia ma! afvmmi pokoli ushta ka yakni haiaka, nan vlhpoba nipi puta, micha nan isht ai okpvchi puta aien^a ka, isht hvs svr ahanla cho?

43. Amba Molak im vlhtipo a, micha Limfan chin Chihowa i fochik aieno, na holba hush aiokpucha chi mak osh, hush ikbi tok vt shoyulit hush aya cha tok. Yumohmi hoka wihachit Babulon misha pilla, huch isht aya la hi oke, achi hoka.

44. Yummak okvt Moses a i miht, kaniohmi ho pisa tuk vt, holba ho ikba he o, apesa tok mak o, hupin tikba vhleha hvt yakni haiaka ya isht ai atokowa vlhtipo vt in takali tok.

45. Atuk o hupin tikba vhleha hak kia, yummma ishi tok osh, Choshua a apehvt oklushi nan ik ithano, yummak o Chihowa yvt pin tikba vhleha itikba ya a kohchit tihlihinli tok, i yakni a isht chukowa tok o, ituyula na, Lewi vt ahanta nitak a oyuna tok.

46. Mihma yummak osh Chihowa itikba ai isht il ayukpa ahayuchi, yumohmi cha, Chekob in Chihowa ya aboha im atahli bvnna tok;

47. Yohmi tuk kia Solomon ak osh chuka ya im ikbi tok.

48. Yohmi kia Moma i shahli hvt tempel puta ibbak o isht ikbi yokvno, ai ahanta cha tuk keyu;

49. Uba yvt vrm aiasha okma, yakni vt saiyi ai o hikia yoke. Chuka nanta ho hvs svm ikba chi ho? mikma a foha li ak osh nanta ho?

50. Uno svbbak ak osh nana ilvppa moma ka ikbi tok keyu cho? Chitokaka yvt achishke; hopaii vt achi hoka.

51. Ikunla kullo, micha chukvsh mikmut haksobish aieno wishakchi ik tapo huchia hvt, Shilombish Holitopa ya i sunalit hush bilia. Huchin tikba vhleha hvt yohmi tok a, hush chiyuhmishke.

52. Hopaii vhliha ha katima kak o huchin tikba vhleha hvt ik ilbvshacho ki tok o? Micha Aiahli vt aya hi a, tikanli anoli vhleha, yummma okla vbi tok o mihi o himak a huchishno vt na haksichi, micha nan vbi aieno hush a toyuba tuk oke.

53. Micha enchil vhleha hosh nan vlhpisa ya auet tosholi

na, hush eshi tok ; yohmi kia huchik holitoblo cha tuk oke : achi tok oke.

54. Yohmi ma na yakohmi ka okla haiyaklo mvt, chukush vt nvhla tok ; micha yummak ash noti isht o shakanlich i tok.

55. Yohmi kia yummak okvt Shilombish Holitopa anukfohvut kvnia hatuk osh, vba ya pit ai okchifeli fehnvt hopokoyo mvt, Chihowa im aholitopaka, micha Chisus vt Chihowa im ibbak ishtimpak imma ya hikia aien a ho, pisa tok.

56. Micha, Uba yvt tiwa, micha Hatak Ushi vt Chihowa ibbak isht impak imma ya auet hikia aien a ho, pisa lishke ; achi tok.

57. Yohmi ma chitoli fehnvt okla tasali mvt, haksobish a akvummi cha, achufa chohmit o yihhleput tumaha ha ishit a kohchi cha, tul i shiit boli tok.

58. Yohmi ma nana atokowa anoli vheha hashot, ilap anchi a hatak himita Sal hohchifo ho, iyi ituma ont ashachi tok.

59. Micha Istein vt pit im payvt, Chitokaka Chisus ma ! Sa shilombish a ish ishashke ; ahanchi na, okla tul i shiit boli tok.

60. Yohmi ma huchukbihleput hikia cha, chitoli hosh, Chitokaka ma ! ai ashuchika ilvppa isht ish onochi na ; achi tok. Micha ilvppa ahanchi mvt, nusit kvnia tok oke.

CHAPTA VIII.

Filip vt Samelia ya vbanumpuli iksa ahilichi, 5. 26 Ehliopia hatak anumpeshi yo baptismochi.

1. **YUMMUT** illi ka Sal vt vlpesa ahni tok. Micha nitak yummak foka ma, vbanumpuli iksa Cheluselem ashwa tok a i palvmmichi fehna tok ; yohmi ma momvt ita fimimpvt Chutia yakni, micha Samelia aien a mominch i na, vbanumpeshi vleha hash illa tok.

2. Yohmi ma hatak hochukma yosh Istein a hohpit taiyahli mvt, okla isht yaiya fena tok.

3. Yohmi ma Sal vto, vbanumpuli iksa ya okpvnit, chuka moma iba chukowa cha, hatak puta, ohoyo puta aienka halvllit ishit, aboha kullo pit apihinta tok.

4. Yvmohmi hatuk o ita fimimpa tuk vhleha hash ot, anumpa ha isht anumpulit kanima moma itvnowa tok.

5. Yohmi ma Filip vt Samelia tumaha ha ona cha, Klaist a isht im anumpohonli tok.

6. Mihma okla hvt, yummvt na fehna ymihinchi ka haklo, micha pihisa aienan mvt, im anukfila ai achvft Filip vt nana ahanchi puta ka, haponaklo tok.

7. Shilombish okpulo puta a foyuka tuk vt chitolit tahnpanlv tawa ka a kocha wiha hatok o; micha palsi isht abeka tawa tuk, micha imomokpulo aienan tuk vt hlakofi tok.

8. Yvmohmi ma tumaha yumm a yukpa chinto tok.

9. Yohmi kia hatak achvfa Saimon hohchifo hosh, tikba ma tumaha yummak inli ka ai isht ahullot ahantvt, ilap ak osh hatak na fehna mak o, mihija cha, Samelia okla ha nukhlakashli tok.

10. Yummak o, chipunta, micha asvno aienan kvt momvt, Hatak ilvppvt Chihowa nan isht im ai ahlika chinto mak oke; ahanchi mvt, okla im antia tok.

11. Micha yummak osh isht ahullot, isht nukhlakahashli tok hopaki hatuk o, okla im antia beka tok.

12. Yvmohmi tuk kia, Filip vt Chihowa apehliechika, micha Chisvs Klaist hohchifo aienan nana puta ka isht ai anumpohonli na, okla yimmi mvt, hatak, micha ohoyo puta aienan kvt baptismoto tok.

13. Yohmi ma Saimon vt ilap ash kia yimmi akinli tok, micha baptismoto mvt, Filip a ibafohkv ayvt, na fehna, micha nan isht ahoba puta aienan kvt a kaniohmi na pisa mvt, nukhlakancha tok.

14. Yohmi ma vbanumpeshi vhleha Cheluselem maya tuk vt, Samelia vt Chihowa im anumpa ha ishi tuk o, haklo mvt, Pita micha Chan aienan ka okla pit in tihleli tok.

15. Atuk o, yummak ashot itonanchi mvt, okla Shilombish Holitopa anukfohka chj ka, vba pit isht anumpulit oklat tok.

16. Yummma foka ma, achufona kia yummvt ik onvtulo kisha ha tok; Chitokaka Chisvs hohchifo ha isht a baptismo tuk ak illa ha tok.

17. Yohmi mvt okla hash ibbak isht umbitehimpa ma, Shilombish Holitopa yut okla anukfohka tok.

18. Yvmohmi ma Saimon vt vbanumpeshi vhleha ibbak isht umbitepa ka, Shilombish Holitopa yut ai anukfohka ho, pisa mvt tvli holisso ant i weli cha,

19. Uno ak kia nan isht im ai ahlika ilvppa hvs sama na, kuna ho uno vt subbak isht umbitepa likma, Shilombish Holitopa yut ai anukfohkashke, ahanchi tok.

20. Yohmi kia, Pita yut, Chihowa yosh nan ima ya, tvli holisso yut isht vlhtoba hinla ka, chim ahoba tuk oka, chin tvli holisso yut chi awant aiokpuloka pit kyniashke.

21. Chi chukush vt Chihowa ya itikba ya ai vlhpiesa keyu hokvt; nan ilvppa kaniohmi kia, micha ahalaia kia ik chim ikshoshke.

22. Yvmohmi hoka, nan isht ik chi ai vlhpeso ilvppa ish ile kostininchashke; micha Chihowa pit ish im asihihla na, yohma he yobakma, chi chukush im anukfila yut chi kashofa hi oke.

23. Chishno vt basunlvsh homi, micha nan ai ashuchika abonunta aien aien chia hatuk o, akostininchli hoka; im achi tok.

24. Mihma Saimon vt afalaminchit, Chitokaka ya pit im ilbushvt isht hvs si anumpuli na, na yakohmi hush anumpuli tuk a achufona kia ant ik si onvtulo kashke; achi tok.

25. Mihma yummak ash ot, Chitokaka im anumpa ha atokowvt anolit, isht anumpohonli cha falama mvt, Samelia okla in tumahushi lawa ka vbanumpa isht ai anumpohonlit, Cheluselem a itvlachi tok.

26. Yvmohmi ma, Chitokaka im enchil vt Filip a im anumpulit, Wakaya cha, oka mahli pila irt, hina Cheluselem vttvt, Kesa ia bachaya chukushmi foka yymma ish onashke, im achi tok.

27. Mihma wakaya cha ia tok. Atuk o Ehliopia hatak, Kantisi ohoyo Ehliopia okla i miko im anumpeshi holitompa

hosh, yummak osh tvli holisso a mominchit i shoyuli yosh vba pit aiokpvcha chi hosh, Cheluselem a vla tok osh,

28. Falamvt ia kvt im iti chanvlli anyukaka binilit, Esaias hopaii i holisso ha itim anumpvli tok.

29. Mihma Shilombish vt, Filip a, Bilika ona cha, iti chanvlli ilvppa ont ibafohká; im achi tok.

30. Mihma Filip vt pit o malelit ona cha, Esaias hopaii i holisso itim anumpuli ka haklo mvt, Nan ish itim anumpuli kvt ish akostininchí cho? achi tok.

31. Mihma, Katiohmi li kak osh, hatak nana hosh um abuchi ho keyukma? achi tok. Mihmvt, Filip vt pit oiya cha, awant asha hinla ka; ahni tok.

32. Anumpa holisso holitopa ai itim anumpuli ka ilvppak a tok. "Chukfi vlhpoba chohmi ho yummva ai illi hvllat ishtia tok; micha chukfi vlhpoo-ushi yosh hishi im vmo in tikba hikia kvt, nan ik ayo chatuk a chohmit, yummvt itih ha ik wakummo ki tok:

33. "Ilbusha fena ma, nan ai vlhpiesa ka im ishi tok Im ilhfiopak a yakni a ai ishi tok oka; im ai itilaui kvt ahashwa tok a, kuta hosh anola hinla cho?"

34. Mihma anumpeshi vto, Filip a afalaminchi mvt, Chi ponaklo lishke; Kuta ho hopaii vt ilvppa isht anumpuli ho? Ilapo akinli hokmá, keyukmvt hatak inla yokmá, nanta ho? achi tok?

35. Mihma Filip vt itih ha wakummi cha, holisso mihi ash inli ho ai isht ivt, Chisus a isht im anumpohonli tok.

36. Yvmohmit hina fohkvut mahayvt okla mvt, oka nana kia ont a hieli tok. Mihma anumpeshi ashott, Yakeh! oka yoke; baptismo la hi a nanta kosh ai ataklvummi cho? achi tok.

37. Mihma Filip vt, Chi chukvsh mominchit ishit chi yimmi hokma, vlhpiesvshke, achi tok. Mihma afalaminchi mvt, Chisus Klaist vt Chihowa ya ushi yoka, sa yimmishke, achi tok.

38. Mihma iti chanvlli vt lumvt hikia chi ka, miha tok; micha Filip vt anumpeshi ash ita tuklot pit okvtahvt oka ya itonachi na, yummak ash baptismochi tok.

39. Yumohmi ma oka yash ai ashwut kochet okla ma, Chitokaka imi Shilombish vt Filip a isht ia na, anumpeshi ash ot himmakma ik peso ki tok: micha na yukpa hosh i hina foхват ia tok.

40. Amba Filip vto Asotus ak o antet haiaka tok; micha a hlopullit aya mvt, tvmaha moyuma ka vba isht ai anumpohonlit ayt Seselia ya vla tok oke.

CHAPTA IX.

Sal vt Tamaskus pilla ia hosh aya ho, Klaist vt im anumpuli, 1. 10

Ananaivs vt ayt im ona ma, baptismo tok. 20 Pal vt nukwaya iksho hosh Klaist a isht anumpohonli.

1. YUMOHMI ma, Sal vt Chitokaka i nan im ai ithana vhleha ha i nokowa, micha vbi aien a he fiopvt kohonchi kvt imoma mvt, na holitompa isht asha pehlichim ona tok.

2. Micha sinakak puta, Tamaskus asha ka, nakni okmá, keyukmvt ohoyo hokmá nana hosh, ilvppa chohmi kvt asha na, ahayuchikmvt talakehi o Cheluselem a pehlichit vla hinla kvt, yummak puta pit holisso ha, im ikba hi a, im asilhha tok.

3. Atuk osh ia hosh aya mvt, Tamaskus pit bilika ona tok; mihma tohwikelit vba minti kvt yummak ash o ashalika tommit a folupli tok.

4. Yohmi ma aka ont itula tok; micha anumpa hvt, Sal, Sal, nanta katihmi ho is svlbushali cho? im ahanchi na haklo tok.

5. Mihmvt, Chitokaka ma! kvta chia hoh cho? achi tok. Mihma Chitokaka ashott, Uno akosh, Chisus ish ilbushahanlika sia mak oke, Na halupa puta asvnalinchit ish hahahli kvt chi palvmmi hoke; achi tok.

6. Yohmi ma yummak ashott nukhlakanchvt wvnhinchimvt, Chitokaka ma! nanta hak o katiohmi la hi a, si sum ahni cho? achi tok. Mihma Chitokaka vvt, Wakaya cha, vt tvmaha ha ont ish chukowakmak o, nana ish kaniohma chi kvt, chim annoa chi hoke; im achi tok.

7. Yohmi ma hatak apehvt aya tuk ashot anumpa kuno haklo kia, hatak nana kia ik peso mvt, ik anumpolo hosh hieli tok.

8. Atuk o, Sal vt aka itolv̄t tani tok: micha nishkin vt fatuma mvt, hatak nana kia ik peso ki tok. Yohmi ma ibbak a halvlli cha ishtiv̄t, Tamaskvs a okla isht chukowa tok.

9. Yohmi ma ik hoponayo mvt, anonti ik impo, nan ik ishko aienvt ahanta na nitak tuchina tok.

10. Yumohmi ma hatak nan ithvna achvfa, Ananaivs hohchifo kv̄t Tamaskvs a anta tuk o: yummak ash o holhpokuna ka, Chitokaka yvt, Ananaivs, im achi tok; mihma, Yak anta lishke, Chitokaka ma! achi tok.

11. Mihma, Wakayut iwt hina Apissa hohchifo ka ish ona cha, Chutvs in chuka ya, Tasvs hatak Sal hohchifo ka, ish aponaklashke; yummak ash osh vba pit anumpohonli hoka.

12. Micha holhpokuna kv̄t, hatak Ananaivs hohchifo hosh ant chukowa cha hopokoya chi ka, ibbak a ant isht um bitepa na, pisa tuk oke: Chitokaka yvt im achi tok.

13. Yohmi ma Ananaivs ashot afalaminchi mvt, Chitokaka ma! hatak ilvppvt, chi holitopa vhleha Cheluselem aiasha ka kaniohmit nan isht okpuni ka, laua ho a haklo li chatuk.

14. Micha chi hohchifo pit hochifo vhleha mominchit takcha chi ka, na holitompa isht qsha pehlichi vhleha yvt im apesa tuk o, ilvppa anta hoke: achi tok.

15. Yohmi kia Chitokaka ash ot, Iá, nan isht um vtta holitopa, sa hohchifo ha shoyulit, miko vhleha micha okla nan ik ithano puta, micha Israel ushi vhleha aiena itikba ya hikia hi oka.

16. Micha uno sa hohchifo pulla ka, na palummi hochito kaniohmi kia isht ilbvsha chi ka, im anoli la chi hoka; im achi tok.

17. Mihma Ananaivs ash ot, iwt aboha ya ont chukowa tok; micha ibbak a isht umbitepa mvt, Itibapishi li Sal ma! ish minti ma, hina takla ya a chi haiaka tuk, Chitokaka Chisvs vt chishno vt ish hopokoyo cha, Shilombish Holi-

topa yvt chi anukfohka chi ho, auet sa chuffichi tuk oke; achi tok.

18. Yohmi ma chekosi makinli ho, na hakhlobish atuk o chohmit nishkin a mokohlit aka itula tok; yohmi ma ashali ka hopokoyo mvt, wakaya cha baptismo tok.

19. Micha nana imput in taha mvt hlampko tok; yohmi mvt Sal vt nan-ithvna vhleha Tamaskvs maya ka awant anta na nitak kanohmi tok.

20. Micha in chekosi makinli ho, Klaist a yummvt Chihowa Ushi atuk a, sinakak puta ka, isht ai anumpohonli tok.

21. Yohmi ma okla haklo kvt momvt anukhlakancha mvt, Ilvppak osh na hohchifo ilvppa pit hochifot Cheluselem ai asha tuk a ilbvshahanli cha, ilvppa aya kvt, yummvt talakchi yo, na holitompa isht asha pehlichi vhleha, isht im ona chi mak atuk keyu? achi tok.

22. Yohmi kia Sal vto hlampko kvt isht i shahlit ishtia, yohmi mvt atokowvt, ilvppak osh Klaist fehna mak oke; ahaya mvt, Chu okla Tamaskvs asha tuk a imaiyuchi tok.

23. Yumohmi kash o nitak kanohmi kvt taha ma, Chu okla hut, yumma vba chi kvt isht anumpulit maya tok.

24. Yohmi kia okla nan ahnit maya ka, Sal vt akostininch chi tok; mihma vba chi kvt nitak, micha ninak moyuma holihta okhissa puta ka okla atoni tok.

25. Yohmi ma nan ithvna vhleha hut nitak o ishit, kishi fohkit tvli holihta lapalint aka pit bohli tok.

26. Yumohmi na Sal vt Cheluselem a vla mvt, nan ithvna vhleha ha ibafohka bvnna tok. Yohmi kia momvt okla i nukshopa tok; micha yummvt nan ithvna yo ik im ahobo ki tok.

27. Yohmi kia Banabas ato eshi cha, ilaelit vbanumpeshi vhleha ya isht im vla tok; micha hina takla ya kaniohmit Chitokaka ya pisa tok, yohmi na im anumpuli tok, micha kaniohmit nukwaya iksho hosh, Chisvs hohchifo ha Tamaskvs a isht ai anumpohonli tok aienka, im anoli tok.

28. Yohmi ma Cheluselem a aht kocha, micha ant abeha aienka takla ahanta tok.

29. Micha nukwaya iksho hosh, Chitokaka Chisvs hoh-

chifo ha isht anumpohonli cha, Klik okla ma itim anumpohonli tok ; yohmi kia vbi bunnut okla aiasha tok.

30. Yohmi na itibapishi vhleha yvt akostininchu mvt, ilaelit Seselia isht vla cha, Tasus a pit chuffichi tok.

31. Yohmi na Chutia yakni vt moyuma, micha Kalili, micha Samelia aienka, vbanumpuli iksa puta kvt nuktanla mvt isht i shahlit ia tok ; mihma Chitokaka i nukshoyupa, micha Shilombish Holitopa ya isht ilai yukpa aienvt itunowa kvt, lauvt isht i shaiyahli tok oke.

32. Yakohmi tok ; Pita yvt mominchit hlopullit aya mvt, vbanumpuli vhleha Litti ai asha tuk ash kia, im vla tok.

33. Mihmvt yummma hatak achufa, Enias hohchifo kvt palsi isht abeka hosh topa itoyula na afummi untuchina tuk o, ont pisa tok.

34. Micha Pita yashot, Enias ma ! Chisus Klaist vt chi hlakofichishke. Tani cha, chishno inlit chin topa ha patali, im achi tok. Mihma chekosi tani tok oke.

35. Yohmi ma Litti, micha Salon aien asha tuk vt momvt yummma pisa mvt, filemvt Chitokaka ya im ai ona tok.

36. Yohmi ma nan ithuna achufa Tabihla hohchifo, yummvt toshowakmvt Takus achi ho, Chappa ya anta tok : oho- yo ilvppvt nan achukma a yvmohmi, micha na habenvchi aien biekvt ahanta tok.

37. Atuk o nitak yummma foka ma yakohmi tok ; yummvt abeka cha illi tok ; yohmi ma yummak ash okla achifvt tahli mvt, vba potvlhpo ya boyuhli tok.

38. Mihmvt Litti yvt Chappa ya pit bilika hatuk, micha nan ithuna vhleha hvt, Pita yvt yummma anta ka, okla haklo tuk osh anukwaya im vla hinla ka, pit im ahnit hatak tuklo ka pit tihleli tok.

39. Atuk o, Pita yash ot wakaya cha awant ia tok. Atuk osh vla ma, ilaelit vba potvlhpo ya okla ishit chukowa tok ; mihma ohoyo vlhtakla vhleha yvt momvt apehvt hiohmavt yaiya mvt, nafohka, micha anchi chohmi, Takus vt awant anta moma mvt ikbi tok a, haiakahanchi tok.

40. Yohmi kia Pita yvt mominchit kocha weli cha, hvchukbihlepvt hikia mvt, vba pit anumpuli tok ; mihmvt hak-

nip ai ittolə ka pit filema mvt, Tabihla, taní, achi tok ; yohmi ma nishkin a fatummi cha Pita ya pisa mvt, tanit binili tok.

41. Mihma ibbak pit ima cha wakayuchi tok. Micha vba pit anumpuli vhleha, micha ohoyo vlhtakla puta aienā kash hoyo cha, okchaya ho ima tok.

42. Yohmi ma Chappa okla hvt momvt yvymma akostin-inchi tok ; yohmi mvt lawvt Chitokaka ya i yimmi tok.

43. Mihma yakohmi tok ; Saimon wak hakshup hummu-chi ya awant Chappa ya ahanta na nitak kanohmi tok oke.

C H A P T A X.

Kanilis vt Pita ya pit hoyo, 1. 34 Pita yvt vbanumpa isht anumpuli. Shilombish Holitopa yvt haponaklo vhleha ha onvtoyula.

1. **HATAK** achvfa Seselia ya ahanta kvt, Kanilis hoh-chifo hosh trshka chipota aya achvfa, Itili okla achi ho, i kwpitvni ha tok.

2. Hatak achukma, micha in chuka-chvfa moma aienvt Chihowa ya i nukshompa cha, okla ha na habenuchi fehma mvt, Chihowa ya pit im anumpohonli na bilia tok.

3. Yvmmak ashon holhpokuna chohmit pisa ka nitak hrishi kanvlli isht vlhpisa ont isht chakkali foka ho, Chihowa im enchil vt haiaka achukma hosh mintit ant iba chukowa mvt, Kanilis, im achi tok.

4. Yohmi ma yvmmak ash atokowvt pisa mvt nukshopa cha, Chitokaka ma ! nanta hoh cho ? achi tok ; mihma, Uba pit ish anumpohonli, micha nan ish hopela puta aienā ka, Chihowa yvt ithaiyana he mak o vba ihiya hoke.

5. Yohmi hoka himak a, Saimon, Pita hohchifo ka pit hoyot, hatak a Chappa pit ish tihlelashke.

6. Yvmmak okvt Saimon wak hakshup hummu-chi in chuka mvt okhvta lapali ka yo talaia ho, awant anta hoke ; yvmmak osh nana ho ish kaniohma he tuk ma, chim anola hi oke ; im achi tok.

7. Mihma enchil, Kanilis a im anumpohonli tuk ash ot ia

ma, chuka nan isht im ai vtta ya tuklo, micha tvshka chipota nan isht im ai ashwa bilia ya ahli achukma achvfa ho aieninchit hoyo tok.

8. Micha nan okluha kash mominchit im anolit taiyahli mvt, Chappa ya pit tihleli tok.

9. Ont onna ma okla itvnowvt mahaya mvt, tvmaha hash pit bilika ona ma, hvshi kanvlli isht vlhpisa ont isht hannali foka ho, Pita yvt vba pit anumpula chi hosh aboha pakna pit oiya tok.

10. Atuk osh hohchvfo fehnvt taiyaha cha, impa he tuk osh ; amba okla atahlit isht maya ma, holhpokuna ho chohmi tok.

11. Micha shutik vt tiwa, yohmi ma, nan ai vlhpitta yosh nan tohbi chito wishakchi ushtvt ita shekonopa ho chohmi hosh aka i mintit, yakni ant onvtoyula ho, pisa tok.

12. Mihma anukaka ya nan-vlhpoa puta, hanalushta iliyuka yakni aiasha kvt moyuma, micha napoa puta, micha nana aka a balvlli puta, micha vba hushi puta aiena kvt ai asha tok.

13. Yvmohmi ma anumpa hvt mintit im vla kvt, Pita, tani cha, vbit vpá ; achi tok.

14. Yohmi kia Pita ashott, Yohma he keyushke, Chitokaka ma ! nana kvt ai vlhpesa keyu, kashofa keyu hokvno himonna kia, vpa li chatuk keyu hokvt ; achi tok.

15. Yohmi ma anonti anumpa hvt atukla ma, im anumpuli kvt, Nana ho Chihowa yvt kashofi tuk a, yvmmma vlhpesa keyu, chik hochifo kashke ; achi tok.

16. Hituchina ha yo iluppa yakohmi tok ; yohmi ma nana ai vlhpitta kash ot falamvt vba ia tok.

17. Pita yvt holhpokuna chohmit nana pisa tuk, yvmmvt nana isht akoniohmi hatuk a ik akostininch chohmi ai itin takla ma, hatak Kanilis vt pit tihleli tuk ash, Saimon in chuka ya a ponaklo tuk osh okhissa itikba ya hieli tok.

18. Mihmvt tahpvla cha a ponaklot, Saimon, Pita hohchifo kvt, yvmmak o antakmá, nanta cho ? achi tok.

19. Pita yvt holhpokuna tuk ash o anukfihinli fehna, Shilombish vt, Yakeh ! hatak tuchina kvt chi hoyoshke.

20. Yohmi hoka tanit pit akowa cha, nana kia isht ai anuktuklo iksho hosh awant ish iashke, yummva uno ak osh auet tihleli li tuk oka; im achi tok.

21. Yohmi ma Pita yash ot akowvt ivt, Kanilis vt auet in tihleli tuk hatak ash im ona mvt, Yakeh! uno ak osh hatak hush hoyo hatuk a sia mak oke. Nanta hosh a katiohmi ho ayut hush la cho? achi tok.

22. Mihma, Kanilis Kvpitvni hatak ahli, micha Chihowa ya i nukshohumpa cha tuk, micha Chu okla moyuma ka ai im annoa achukma hosh ahanta chatuk, yummak osh in chuka ya ish ona chi ka, chi hoyo cha, anumpa ha chi a hakla chi ka, Chihowa yvt enchil holitopa ya isht ai im anoli tuk oke; okla achi tok.

23. Yohmi ma i howvt aboha pit apitta na maya tok. Atuk o ont onna ma, Pita yvt wakaya cha awant ia ma, itibapishi vhleha kanohmi kvt Chappa ya asht apihut ilhkoli tok.

24. Atuk osh yummak atuk a onna ma, Seselia ya okla ont chukowa tok; yohmi ma Kanilis vt i kanomi vhleha, micha i kana fehna aiena ka hoyot itahobit tahli cha, asht pit hoyo tok.

25. Atuk osh Pita yvt ant chukowa ma, Kanilis vt ont afama cha, iyi ituma ya hlipiyvt ai okpvchi tok.

26. Yohmi kia Pita yvt, Hikiá, uno ak kia hatak sia akinli hoke, ahanchi cha halvllit tanichi tok.

27. Micha im anumponlit pit chukowa mvt, itahoba tuk vt laua hosh ai asha na pisa tok.

28. Yohmi mvt Chu hatak okvt okla inla takla aya hokmá, keyukmvvt ont ibafohka hokmá nana ka kaniohmit im ai vlpiesa keyu ka hush ithaiyanvshke; yohmi kia uno yokvto hatak nana kia ik vlpeso, micha okpulo a la he keyu ho, Chihowa yvt vm abahanchi tuk oke.

29. Yvmohmi hatuk o, sa hoyo makinli ho nana ak acho hosh, ayut huchim vla li hoke. Yohmi hosh huchi ponaklo lishke, nanta katiohmi ho is sa hoyo tuk oh cho? im achi tok.

30. Mihma Kanilis vt, Nitak ushta kash o nahullochit an-

ta li, hvshi kanvlli himak foka tok. Yohmi hosh hvshi kanvlli isht vlhpisa ont isht chakkali ho, vñ aboha anukaka ya vba pit ai anumpuli li tuk; yohmi ma hatak vt nafohka shohmalali fohka kvt sa tikba ya hikia tuk.

31. Mihmvt, Kanilis, vba pit ish anumpuli ka haklo, micha nan ish hopehinla chatuk a Chihowa yvt ithaiyana hoke.

32. Yohmi hoka Saimon, Pita hohchifo ka pit hoyot Chappa ya pit ish tihlelashke; yvmmak okvt okhuta lapali ka Saimon wak hakshup hummvchi in chuka yo anta hoke; yvmmak osh vlakmvt ant chim anumpula hi oke; achi tok.

33. Yohmi hatuk o ashalika pit chi hoyo li kuno; atuk o ish la kvt ish vlhpesa hoke, yvmohmi ma Chihowa yvt nana chim apesa tuk a, mominchit e hakla chi mak osh momvt himak a yakohmit Chihowa itikba ya e chiya hoke; achi tok.

34. Mihma Pita yvt itakha ya wakvmmi mvt Chihowa yvt hatak a kanimanchi keyu ka, ai ahlit akostininch lishke—

35. Amba oklushi moyuma ka kvna hosh yvmmma i nukshoyupa cha, ai vlhpiesa ka yvmohmi hokvt, im a holitopa chatuk oke.

36. Chihowa yvt Islael ushi vhleha ya anumpa auet emana Chisus Klaist pulla ho nuktanla hi a, isht ai im anuhumpa tok a, yvmmak osh moma in Chitokaka yoke.

37. Baptismo yo Chan vt isht anumpuli ha yak o, anumpa yvmmvt Kalili ai ishtia tuk osh, Chutia yakni a mominchit ai anumpvt hlopulli tok;

38. Kaniohmit Chihowa yvt, Chisus Nasalet ai vtta ya Shilombish Holitopa, micha nan isht im ai ahlika aienka isht ahummichi tok; Chihowa yvt awant aya hatuk o, yvmmak ashon nan achukma ka isht ahanta, micha nan isht-ahullo okpulo isht ilbvsha vhleha ya mominchit hlakofichit nohowa tok, hush ithaiyanushke.

39. Micha yvmmvt Chu okla i yakni, micha Cheluselem aienka nana ho a kanimihinchi tukma, moyuma atokowa anoli pia mak oke; yvmmak o okla iti a takalichit ubi tok.

40. Yvmmak ash nitak ont atuchina ma, Chihowa yvt tаничи cha, achukmalit haiakuchi tok.

41. Yohmi kia okla moma kak a tok keyu, amba nana

atokowa anoli vhleha, Chihowa yvt tikbanli atokohonli tok, illi tuk vt falamvt tani ha ya, nan itibai imput, ishkot maya tok, pishno ak a tok oke.

42. Mihma okla ha il im anumpula he, micha okchaya vhleha, mikmv̄t illi puta aienā nan im apesa ya he, Chihowa yvt atokoli ka ilap ak atuk a, atokowa il anohonla he, pim apesa tok oke.

43. Yummak o hopaii moma kvt, yumm̄a hohchifo pulla hatuk mak o, kvna ho kia i yimmi hokvt ai ashvchika puta kvt isht a kashofa ahayucha hi a, atokolit okla anohonli tok; achi tok.

44. Pita yvt anumpa ilvppa anumpohonli kvt moma ho, anumpa haklo yash Shilombish Holitopa yvt mominchit onvtuyula tok.

45. Yohmi ma hakshup tvptua na yimmi vhleha Pita ya apihvt vla tuk vt, okla nan ik ithano vhleha ak kia Shilombish holhpila kvt o folopha hatuk o,

46. Anumpa ilaiyuka okla anumpulit Chihowa ahnihinchi ka, okla haklo hatuk osh momvt nukhlakancha tok; Mihma Pita yvt afalaminchit,

47. Shilombish Holitopa yvt anukfoka tuk vhleha pishno akinli chohmi; yakohmi kvt ik baptismō ka chi ka, hatak nanta hosh oka ya im ataklvmm̄a hinla cho? achi tok.

48. Yohmi mv̄t Chitokaka isht a hochifot okla baptismā chi, i miha tok; yohmi ma awant anta na nitak kanohma chi ka okla im ahni tok oke.

CHAPTA XI.

Pita yvt oklushi nan ik ithano vbanumpa ont isht im anumpuli tuk o, nanumachi, 1. 19 vbanumpa yvt tvmaha kanohmi ka ai anumpa.

1. **YUMOHMI** ma vbanumpeshi vhleha micha itibapi-shi vhleha aienā Chutia maya tuk vt okla nan ik ithano vhleha hak kia Chihowa im anumpa ha ishi tuk a, okla haklo tok.

2. Yumohmi tuk o, Pita yvt Cheluselem a vla ma, hakshup tupa vhleha yatuk vt i chaput anumpulit,
3. Chishno vt hatak hakshup tupa keyu vhleha ya ont ish iba chukowa cha, ish ibai impa tuk oke; ahanchi tok.
4. Yohmi ma Pita yvt ai ishtia vmmona ka silhhit im anolit,
5. Chappa tvmaha ha vba pit anumpuli hosh ahanta li tuk osh, sa holhpokuna chohmit na pisa li ka, nan ai vlhpitta yvt mihinti kvt nan tohbi chito yo chiyuhmi hosh vhli ushta ka jshi ho vba ya ai aka mihinti tok, mihmvt vno ash fehna vm vla tok.
6. Yummak ash sa nishkin a isht atokoli li mvt, nana vm anukfihinla tok, mihmvt nan-vlhpoba iyushta puta yakni pakna aiasha, micha na-poa nukshopa, mikmvt nan aka bavelli puta, micha vba hushi aiena ka pihisa li tok oke.
7. Mihma anumpa hvt, Pita yvt wakaya cha, vbit vpá, vm ahanchi na, haklo li tok.
8. Yohmi kia vno ashott, Yohma he keyushke, Chitokaka ma! nitak nan ash nana kvt ai vlhpesa keyu, micha okpulo aiena kvt satakha ya fohka tok keyu chatuk oke; achi li tok.
9. Yohmi kia atukla ma anumpa hvt vba auet si afalaminchit, Nana ho Chihowa yvt kashofi tuk a, yumma ai vlhpesa keyu, chik acho kashke; achi tok.
10. Ilvppa yakohmi kvt hituchina ya tok; yohmi ma moma falaminchit vba isht maya tok.
11. Yumohmi ma, mih makinli ho hatak tuchina Seselia auet ai an tihleli tuk a, chuka ai vta li tuk ash, ai vla tok.
12. Yumohmi ma Shilombish vt, nana kia isht anukwaya ilsho hosh awant ia la he, a miha tok; yohmi ma il itibapishi hannali ilvpput si apehvt itunowa ho, hatak ash in chuka ont e chukowa tok.
13. Yohmi ma yummak ash ot kaniohmit enchil vt ilap im aboha anuka ya hikia na pisa ho, Hatak a Chappa ya pit tihlelit Saimon, Pita hohchifo ka pit ish hoyashke.
14. Yummak osh anumpa, chishno, micha chin chuka

achvfa moma aienvt isht hvchi okchaya hi a, chim anola hi oke, im achi tuk a, pim anoli tuk oke.

15. Yvmohmi ma anumpulit ishtia li makinli ho, Shilombish Holitopa yvt okla ha onvtuyula kvt, vmmona ka hvpishno a pi onvtula chash chiyuhmi tok.

16. Yohmi ma Chitokaka yvt, Chan okvto oka yo ishit baptismochi mvhlishke; amba hvchishno yokuto Shilombish Holitopa yo ishit hvchi baptisma hi yoke; achi tok a, im anumpa ha ithaiyana li kvno.

17. Yvmohmi ka Chihowa yvt, Chitokaka Chisvs Klaist i yimmi vhleha ha hvp ima tok, ai itilaui na holhpila ka ihima tuk a, vno ak osh nanta sia hatuk osh Chihowa ya ataklummi la hinla cho? im achi tok.

18. Na yakohmi ka okla haiyaklo mvt lumvt chieya cha, Chihowa ya aiokpahanchi mvt, Yohmikma Chihowa yvt okla nan ik ithano vhleha ak kia isht okchaya ile kostininchii ya ihima tumvshke; ahanchi tok oke.

19. Yvmohmi ma na palummi kvt Istein a isht atoba ma, okla ita fimimpa tuk vt itvnovt aya kvt Finisi, micha Saipilvs, mikmvt Antiak a pit vhlichit inla ka yano keyu, amba Chu vhleha ak bano ho anumpa ha okla isht im anumpohonli tok.

20. Micha kanimi kvt Saipilvs hatak, micha Sailini hatak aiena hatuk osh Antiak a ai vla mvt, yvmmak ash ot Klik okla ha im anumpulit Chitokaka Chisvs a isht anumpohonli tok.

21. Yohmi ma Chitokaka ibbak vt awant anta tok, holhtina laua hosh yimmi cha filemvt Chitokaka ya im ona tok.

22. Yvmohmi ma na yakomi kvt annovt, iksa Cheluselem ashwa tok haksobish a ont chukowa tok; mihma Banabas a yvmmvt ia kvt Antiak a ona chi ho okla pit chvffichi tok.

23. Yvmmak ash osh vla cha, Chihowa im isht il aiyukpa ka pihisa mvt na yukpa tok; micha chukvsh mvt kullo hosh Chitokaka ya isht asitia chi ka, mominchit atonohonchi tok.

24. Yvmmak okvt hatak achukma hosh, Shilombish Ho-

litopa, micha ayimmika aien a kvt anukfoyuka fehna hatuk oka; yohmi ma okla hvt l^awvt Chitokaka ya iba kaha tok.

25. Yohmi ma Banabas vt Sal a hoy a chⁱ hosh, Tasus a ia tok.

26. Atuk osh yummak ash ahayuchi mvt, ilauelit Antiak a isht vla tok. Mihma yakohmi tok, afummi achufa vlpiesa ka vbanumpuli iksa ya ibai itahobvt okla l^awa ka nan im abahanchi tok. Mihma nan ithuna vhleha hvt ummona ka Antiak ak o, Klaist okla a hohchifo tok.

27. Yvmohmi ma nitak ilvppa foka ma, hopaii vhleha Cheluselem minti kvt, Antiak a ai vla tok.

28. Micha yummak ash ot achufvt Akabus hohchifo hosh hikia cha, hohchvfo chinto kvt yakni mominchit a hlopulla chⁱ ka, Shilombish pulla isht ai anohonli tok. Yummvt Kilatus Sesa yvt ahanta nitak ak o ont ai ahli tok.

29. Yohmi ma nan ithuna vhleha yvt nana kvt kaniohmit im asha tukmvt ik kaniohmi kia, itibapishi vleha Chutia maya ka isht apeluchi ya pit i pila chⁱ kvt, hatak moma tok.

30. Yummak ash okla yohmi mvhli cha Banabas, micha Sal ita tuklo kak o ibbak fohkit, hatak tikba vhleha ya pit pila tok oke.

CHAPTA XII.

Helot vt vbanumpuli vhleha ha issikkopali.

1. YOHMI ma nitak yummak foka ma, Helot miko yvt vbanumpuli iksa yatuk a kaniohmi ho, ilbushala chⁱ kvt ibbak a o wel tok.

2. Micha Chemis, Chan itibapishi ha b^rshpo falaia ho isht vbi tok.

3. Micha yohmi ka Chu okla hvt im achukma ho, pisa hatuk osh achakalinchi mvt, Pita ya aieninchit isha chin tok; mihma p^rska ik shatvmmo vpa nitak a tok.

4. Atuk osh yummak ash hoklit ishi mvt, aboha kullo pit fohki cha, vbanvblit ont-ia issa ha yo okla ha isht i kohcha

chi mak o, ahni hosh, t̄shka chipota ushta bat aya ushta ho apesvcha chi ka, im issa tok.

5. Yohmi hatuk o Pita yashot aboha kullo ya fo ka tok; yohmi kia vbanumpuli iksa yvt yummma isht Chihowa pit im asilhha kvt, ik yokopo ki tok.

6. Atuk o Helot vt isht kohcha he tuk a, yummma ninak fenak akinli ka, Pita yvt tvli itatakvi tuklo hosh isht talaiyakehi ho, t̄shka chipota tuklo itin takla yo a nusi tok; yohmi ma apesuchi vt okhissa itikba ya hielit aboha kullo ya apesahanchi tok.

7. Yumohmi kash o Chitokaka im enchil vt im vla na tohwikeli kvt aboha kullo anukaka ya tommy tok: mihma yummak ash osh Pita ya naksi a isso cha, tanichi mvt, Tushpvt taní; achi tok; yohmi ma in tvli itatakvi yvt ibbak a a mokohli tok.

8. Mihma enchil ash ot, Il ai vskofachi cha, chi shulush a holó, im achi ma, yumihechi tok, mihma, Chim anchi a anchi cha, is siakaiyashke, im achi tok.

9. Mihma koheha mvt iakaiya tok; yohmi kvt enchil vt nana a yumihechi ka ai ahli mak atuk a, ik akostininchö ki tok. Amba nana mak o pisa ho im ahoba tok.

10. Ai atoni vmmna, micha atukla aienka ant itiachi mvt, tumaha pila ia tvli holihta okissa ya itvlachi ma, ilap akinlit in tiwa tok; mihma pit kohcha cha, hina achufa ho fokvt ayvt okla tuk o, enchil ash ot ashalika i filummi tok.

11. Yohmi ma Pita yvt falamvt kostieni mvt, Chitokaka yvt im enchil a auet chvffichi cha vno a Helot ibbak, micha Chu okla nana ahni tuk puta ka, a sa hlakofichi tuk a, himak a ai ahli mak o ithaiyana lishke; achi tok.

12. Micha nan im anukfihinla mvt Chan, Mak hohchifo ishki, Meli in chuka ya, yummma laua hosh itahobut vba pit anumpuli hosh maya na, vla tok.

13. Micha Pita yvt apishia okhissa ya ant sukoha ma, ohoyo himita Loti hohchifo hosh ont haponaklo tok.

14. Micha Pita im anumpa ho pit ithana mvt, na yukpa kvt apishia ya okhissa ya ik tiwo hosh, amba malelit ant chukowa mvt, Pita yvt apishia itikba ant a hikja ka, anoli tok.

15. Mihima, Ik chi hopoyuksoshke, im achi tok. Yohmi kia i shahlichit, yohmi tuk ash pulla ho mihiha tok; yohmi ma, Im enchil oka, okla achi tok.

16. Yohmi kia Pita ash ot sukoha kvt imoma tok; yohmi ma okla tiwi cha, pisa mvt nukhlakancha tok.

17. Yohmi ma nukehintot maya chi ka, ibbak pit i favummi mvt, kaniohmit Chitokaka yvt ilap a aboha kullo isht a kohchi tuk a, im anoli tok; mihmvt, Na yakohmi ka Chemis, micha il itibapishi vhleha aienā ka ivt oh im anoli, achi tok; mihmvt kohchvt ivt inla ho ona tok.

18. Atuk o onmvt taha makinli ho, tushka chipota vhleha ash ot Pita yvt nanta mak o a katiohmi tuk, ahnit nukhlakancha kvt chohmi tok keyu.

19. Yvmohmi tuk o Helot vt yummak ash hoyo tuk osh ik peso mvt, apesuchi vhleha yash achukmalit im asilhhvchi mvt, yummak ash o vba chi ka, apesa tok. Mihmvt Chutia ya vttvt iwt Seselia ona cha, yummak o anta tok.

20. Mihmvt Helot vt Taia, micha Saitvn aienā ai asha ka isht ik i yukpo fehna tok; yohmi kia miko im vba potvlpo apesuchi Blastvs a iti kana okla ikbi tok, micha ilap i yakni ya miko i yakni yak osh ai apelvchi atuk aienā hatuk oka, im anukfila mvt ai achvfa hosh im ai vla cha, nanaiya ka ai ahni tok.

21. Yvmohmi ma ai vlpisa tuk nitak o, Helot vt miko i na fohka ishit shemvt taiyahli cha, im aiasha holitopa paknaka ya binili cha, anumpa isht hikvt im anumpohonli tok.

22. Mihma okla hash ot tahpvlt, Ilvppvt Chihowa yak o im anumpa, hatak im anumpa yo keyushke; ahanchi tok.

23. Mihma isht aholitopaka ya Chihowa yak o pit ik im isso hatuk o, mih makinli ho Chihowa im enchil vt isso tok, mihma shushi yosh ai ahampa na fiopissa tok.

24. Amba Chihowa im anumpa hvto achakvt isht i shahlit ia tok.

25. Yohmi ma Banabas micha Sal ita tuklo kvt nan isht ahashwvt atahli mvt Chan, Mak hohchifo ka ilauint Chelusellem a gshwvt falamvt ia tok oke.

C H A P T A XIII.

Pal, Banabas ita tuklo kvt oklushi nan ik ithano, ya im ia. 42 Oklushi nan ik ithano vhleha yvt vbanumpa yimmi.

1. YOHMI ma iksa Antiak ahashwa ka kaniohmi kvt hopaii, micha nan im abuchi vhleha, Banabas, micha Simion osh Naika hohchifo, anonti Lusius, Sailini utta, micha Manevn, Helot na pehlichi ya iba hofanti tok, micha Sal chohmi kvt maya tok.

2. Okla Chitokaka pit aiokpuehit nahullochit maya ma, Banabas, micha Sal ita tuklo ka, a toksvli im ai atokoli li tuk isht ashwa chi ka, hvs svm atokolashke, Shilombish Holitopa yvt achi tok.

3. Mihma okla nahullochit vba pit anumpuli cha, ibbak a isht umbiteput taiyahli mvt, okla pit tihleli tok.

4. Yohmi ma Shilombish Holitopa yak osh pit tihleli hoka, iwt Silushi a itonachi tok osh, yumma ashwut peni vlhtot iwt Saipilvs a itonachi tok.

5. Micha Salemus a ont ashwa mvt, Chu okla i sinakak puta Chihowa im anumpa isht ai anumpohonli tok. Mihma Chan a il ai apelahanchi akinli tok.

6. Micha tashaiyi ya a hlopullit Pefus a itonachi mvt, hatak isht ahullo achvfa hopaii ilahobi, Chu hatak Bachisus hohchifo ho pisa tok.

7. Yummak okvt nahullo mikro hatak nan ithana, Sachis Paulus a awant anta tuk o, yummak ash ot Banabas, micha Sal aienka hoyo mvt, Chihowa im anumpa ha haklo bunna tok.

8. Yohmi kia Ilimus hatak isht ahullo ash ot, hohchifo hvt toshowakmvt yummak oka nahullo mikro a na yimmika ai i filvmmichi bunna kvt yummak ash im ataklvmmi tok.

9. Mihma Sal mvt, Pal hohchifo akinli hosh, Shilombish Holitopa yvt anukfohkv kwnia hosh, yummak ash atokolit pisa tok.

10. Mihma, Na haksichi, micha nan ik ai vlpeso aienka banot isht alotowa, nan isht ahullo okpulo ushi, ahopoyuksa

okluha in tunp ma ! Chitokaka i hina ai ahl*i* puta okp*u*ni kvt, ish issa he keyu cho ?

11. Mikma, yakeh ! himak a Chitokaka ibbak vt chi onvtula hoka, chi lvpakm*u*t hvshi a chik peso ho ahchiba chi hoke ; achi tok. Mihma chekosi makinli ho tohbi, micha okhlilika aienvt onvtula tok. Mihma kuna kia ibbak a halvlli cha isht aya chi ka, hoyot fullokahanchi tok.

12. Mihma nahullo miko vt Chitokaka im anumpa ha anukhlakancha cha, nana kvt yvmo*h*mi na pisa m*u*t yimmi tok.

13. Mihma Pal vt itvpeha yash aienvt Pef*u*s a a hotofi cha, okla mintit Pa*f*ilia yakni Pvki a ai vla tok. Mihma Chan vt i filummit Cheluselem a falam*u*t ona tok.

14. Amba Pvki a asht kohchvt okla ia m*u*t, Pisitia yakni Antiak a ai vla cha, nitak hullo a sinakak a ont chukow*u*t chieya tok.

15. Mihma nan vlhpissa, micha hopaii i holisso puta aienakash, itim anumpulit atahli ma, sinakak apehlichi vhleha yvt, Hatak, il itibapishi vhleha ma ! okla isht im anumpa he anumpa hvt hvchim ashakm*u*t hvsh anump

- u
- u

lashke ; achit auet im anoli tok.

16. Mihma Pal vt hikia cha ibbak a pit isht im alvmmi*u*, Islael okla, micha Chihowa ya i nukshohumpa vhleha hvchia ma ! hvsh haponaklashke.

17. Okla ilvppa Islael vhleha in Chihowa yvt pin tikba vhleha ya atokoli m*u*t, hatak nowvt aya chiyuhmi hosh Echip a okla ahashwa ma, yvmm*u*t holitobli tuk osh, ilap ibbak kullo pulla kvt yvmmak ash isht akohonehi tok.

18. Micha afummi pokoli ushta foka yakni haiaka okla nana a kanio*h*mi ka, ant ik yohmi, im ahni tok.

19. Micha Kenan yakni a oklushi untuklot ai imaiyachi m*u*t, i yakni atuk a, na shueli ho, isht ai i hopeла tok.

20. Micha yohmi ha ya nan apesa vhleha im a hiohlinchi na, afummi tahlepa ushta cha pokoli tahlapit aienakoka ho, Samuel hopaii vt vtta tok.

21. Atuk o i himmakma, miko okla asilhha tok. Mihma Chihowa yvt Sis ushi, Sal, hatak Benchamin isht atiaka yo, i hilechi na afummi pokoli ushta tok.

22. Atuk osh yummak ash ai ishi mvt, Lewi ak osh i mi-ko ya chi ho okla ha i hilechi tok; yummak o pit atokolit, Ilap vt, Lewi Chesse ushi, vno sa chukvsh fehna iakaiya hatak, micha vno nan ai ahni li ya mominchit ai ahlicha chi mak o ahayuchi lishke; achi tok oke.

23. Hatak iluppa isht ai unchululi yo Chihowa yvt ilap miha tok pulla hosh, okchalinchi Chisus a Isael okla ha i hilechi tok.

24. Yummvt ik lo kisha ho, Chan vt vmmona ka Isael okla moyuma ka ile kostininchit baptismo ya isht im anumpohonli tok.

25. Micha Chan vt anumpulit ahanta mvt, Kvta hak o sia huchim ahoba cho? Uno vto mih mak o sia keyu hoke. Amba siakaiyut minti kak o, yummma iyi i shulush a vno vt i hotofi la he si ahoba keyu hoke; achi tok.

26. Hatak itibapishi li vhleha ma! Eblaham isht attiaka ushi, micha kuna hosh huchi takla ashwa kvt Chihowa ya i nuksuhumpakma, huchishno ak o, ai okchaya isht anumpa ilvpput huchim aya hoke.

27. Cheluselem ai asha, micha i hochitoka aien a kvt, yummma, micha hopaii vhleha im anumpa nitak hullo moma ka itim anumpuli chatuk aien ka ik ithano hatuk osh, na palvmmi ka onochit yummak atuk a, ai ahlichi tok oka.

28. Micha kaniohmi ho yummak okvt isht ai illa he vhespa kvno, im ai akostininch keyu ho kakosh, illa he a ahnit, Pailvt a okla im asilhha tok.

29. Micha yummma isht a holihiso tok a mominchit ai ahlichit okla tahli mvt, iti ash ai ishit akvchi cha ahollopi anukaka ya bohyuli tok.

30. Yohmi kia illi tuk a Chihowa yvt tanichi tok.

31. Yohmi ma Kalili ya asht apehvt mintit Cheluselem a ai vla tuk vt yummma okla pisa na nitak kanohmi tok; mih mak osh yummma atokowvt okla ha im anoli yoke.

32. Yohmi hosh anumpa achukma pin tikba vhleha ima tok a isht e huchim anumpulishke.

33. Im vlla vhleha hvpia hak o, Chihowa yvt yummak ash isht pim ai ahlichi hosh Chisus a falamichit tanichi

tok. Yohmi kvt ataloa ont atukla ka, Suso chia hoke, himak nitak a chikbi lishke, achit aholisso akinli hoke.

34. Micha yummvt illi tok a falaminchit tanichi ka himmakma falamvt ahollopi a chukowa he keyu hatuk o yak ahanchi tok, Lewi i nan isht il aiyukpa ahli ka chima la hi oke.

35. Yvmohmi hatuk o anonti, Chi Holitopa ka ant nan toshbi ka ik pisá, ish im ahna he keyu hoke, inla ma ai ahan-chi hoke.

36. Lewi ak okvto Chihowa nan ahni pulla ho, im okla ha nan isht im ahantvt in taiyaha mvt, illi cha in tikba vhle-ha ha ibafokvt itoyulvt nan toshbi ma piesa tok oka.

37. Amba Chihowa yvt falaminchit tanichi tok, yummvtu nan toshbi nana kia ik peso ki tok.

38. Yvmohmi ka hatak il itibapishi vhleha ma ! hatak ilvppa pulla hatuk mak o, nan ai ashvchika puta isht kashofa yvt ishit hvchim anumpa hoka hvsh ithaiyanashke.

39. Micha Moses i nan vlpisa ak okmvno yvmma kani-ohmit isht hvsh ai i hlakofa he keyu ke tuk kia, na yimmi vt momvt yvmma pulla kano okluha isht ai i hlakofi hoke.

40. Yvmohmi hoka ahah ! hvsh ai ahnashke ; yvmmak keyukma hopaii vhleha i holisso ha isht ai anumpvt,

41. Na shitlema vhleha hvchia hvt ho pesa cha, okokko ! ahnit, ik hvchi nukhlakanchá ; hvchi nitak a nan isht vtta ya isht ahanta li ka, kvna kia ik hvchim anoli mak o, kani-ohmit nan isht vtta yvmma a hvchi yimma he keyu, achi kvt hvchi onvtula hinla hoke ; achi tok.

42. Mihma Chu okla hvt sinakak a a kohcha wiha ma, okla nan ik iñhano vhleha yvt anumpa yakohmi kash ot nitak hullo atuklakma isht im anumpa hinla kvt asilhha tok.

43. Yvmohmi tuk o itvnaha yash ot tisheli ma, Chu okla laua, micha himona vbanumpuli toba vhleha aieno kvt Pal micha Banabas ita tuklo ka apehvt aya tok. Mihma yvmmak ash ot im anumpulit, Chihowa im ai isht il ayukpa pulla ho ai itvnawa chi ka atohnohonchi tok.

44. Atuk o atukla nitak hullo ya tmaha chito achufa

kvt moma hosit Chihowa im anumpa hakla chi kvt itvna ha tok.

45. Yohmi kia Chu okla hvt okla laua ya pisa mvt, nukhobelvt alota mvt, Pal vt nana anumpuli ka ik ahobalot na miachit itachowvt maya tok.

46. Yohmi ma Pal, micha Banabas ita tuklo kash ot nukwaya iksho kvt isht i shahlit ia mvt, Chihowa im anumpa hvt tikba hvchishno ak o a hvchim anumpa he mvt ai vlpiesa tuk okvno; yohmi kia, yvmmak ash naksi ka pit hvsh bohli cha, okchayvt bilia he o ik chi ahobo kvt isht hvsh il anukfihinli hoka, okla nan ik ithano yak o pit il i file-mvshke.

47. Yakohmi ho Chitokaka yvt pim apihisa mvt, Okla nan ik ithano vhleha ya ish in tohwikela chi, yakni ont vhli fullota kvt isht ai okchaya he mak o, chi hilechi lishke; ahanchi tuk oke, achi tok.

48. Mihma okla nan ik ithano vhleha yvt iluppa haklo mvt, okla na yukvt Chitokaka im anumpa ha aiokpahanchi tok. Mihma okchayvt bilia he isht im vlpisa tok vto momvt yimm tok.

49. Yohmi na Chitokaka im anumpa hvt annovt yakni yumma mominchit a hlopulli tok.

50. Yohmi ma Chu okla hvt, vbanumpuli ohoyo holitompa vhleha, micha hatak holitompa tvmaha a sha tuk aienka atohnohonchi cha, Pal, micha Banabas ita tuklo ka isht ai ilbushaka ya ilhkolichi tok; micha i yakni a kohchit kanom pit tihleli tok.

51. Yohmi kia iyi hituk chubbi a sha tuk a on tahtuli cha, mintit Aikonium a itvlachi tok.

52. Mihma nan ithvna vhleha yvt na yukpa, micha Shilombish Holitopa aienka isht anukfohka tok.

hvt ahobvchi, 1. 19 Pal vt tvli isht boa, 21 Tumaha ilaiyuka hlo pullit aya mvt, falamvt Antiak a itvlachi.

1. MIHMA Aikonium a yokohmi tok; Chu okla i sinakak o ita tuklot ont chukowa cha, kaniohmit anumpohonli ma, Chu okla, micha Klik okla ai itupeha kvt laua hosh yimmi tok.

2. Amba Chu nan ik yimmo vhleha huto okla nan ik ithano a atohnochit, im anukfila ha itibapishi vhleha hash isht i nukkilichi tok.

3. Yumohmi hatuk o nukwayiksho kit Chitokaka ya isht anumpulit, yummak ash ahashwa na hopaki ma, yummak ash ot nan isht ahoba, micha na fehna puta aienan kvt yumma ibbak a isht ai yohma hi a ahni cha, im anumpa hanta ya isht ai ahliche tok.

4. Yohmi kia tumaha okla chinto kash ot ita kashapa tok; mihma kashapa kuto Chu okla hak o pit halanli ma, anonti kashapvt vbanumpa isht vtta vhleha yak a tok.

5. Atuk osh okla nan ik ithano vhleha, micha Chu okla ha pit aienan kvt i pehliche ka ai itupehvt, yummak ash ilbushachit, tvli isht bola chi kvt im anukfilvt maya ma,

6. Akostininchit okla mvt, tihlaiut Laikeonia yakni a tumaha Listi, micha Tabi ita tuklo, micha yakni auet folumpa ka ona tok.

7. Micha yummak o vbanumpa isht ai anumpulit okla tok.

8. Mihma Listi a hatak achvfa kvt ishki ikfoka anuka yakinli ho ai imomokpulo tok osh, iyi vt ik kullo hosh, nitak nana nowa tok keyu vt binili tok.

9. Yummak ash ot Pal vt anumpuli ka haklo tok; mihma yummak ash ot atokowvt pihisa cha, hlakofa he vt yimmi ka akostininchit mvt,

10. Chitoli hosh anumpulit, Wakayvt chiyi a apissvt isht ish hikiashke; achi tok. Mihma yummak ash ot mvt, mihma nowa aienan tok.

11. Mihma okla hash ot, Pal vt nana ymihinchi na pisa mvt, Laikeonia anumpa ho okla anumpulit chitoli hosh, Chi-

tokaka vhleha yvt hatak o chiyuhmit aka mintit ayvt hvp im vlvshke ; ahanchi tok.

12. Micha Banabas a Chupita hochifo mvt, Pal ak okvto anumpuli chito atuk o, Makulvs hochifo tok.

13. Mihma in tumaha itikba hikia Chupita ya na holitompa isht im vtta yvt, wak nakni chohmi, micha sita bita puta aienka ishit holihta okhisa ya vla kvt, okla ai itypehvt ubit isht aiokpucha he ahni tok.

14. Mihma vbanumpeshi vhleha Banabas, micha Pal ita tuklo kvt haklo mvt, im ilefohka ya ita hliluffit, okla mvt pit tihlaiyut okla ha iba chukowa cha, tahpvlt,

15. Hatak puta ma ! na katihmi ho hvchi yakohmi cho ? Pishno ak kia hatak hvchishno chohmi pia hoke, mih hosh nan ik ahobo yakohmi ka ai i filummit, Chihowa okchaya, vba shutik, micha yakni, micha okhvta, micha nana puta, yvmmma ai ahashwa ka aienka ikbi tok a, hvsh im ona he mak o, e hvchim anumpohonli hoke.

16. Yvmmak okvt nitak tikba ma, oklushi moma ka ilap o inli nana a kaniohmi a ant ik ai itanowá, ahni tok.

17. Yohmi kia ilap fehna isht ai atokowvt anoli a ik takohlichoh hosh ahanta tok keyu ; yohmi kvt nana ka achukmali hosh umba vba minti, micha na waya achukma nitak aienka auet hvp ihima cha, pi chukvsh a ilhpak, micha na yukpa aienka, isht alotohonli hoke ; ahanchi tok.

18. Micha ilvppa ahaya pulla hosh na kuni okla ha yokibli na, yvmmma okla nan ik im abo ki tok.

19. Yvmohmi ma Chu hatak kanomona Antiak, micha Aikonium aienka mintit vla cha, okla ha ant atohnochit, Pal a twli isht bolit, illi ho im ahoba cha hvllat tumaha ha isht kohehi tok.

20. Yohmi tuk kia, nan ithvna vhleha yvt afolublit hinli ma, tani cha, tumaha ha ant chukowa tok. Atuk osh nitak ont atukla ma, Banabas awant Tabi a ia tok.

21. Atuk osh tumaha yvmmma vba isht im anumpulit, micha lawa ho nan im abuchi mvt, salamvt anonti Listi, micha Aikonium, micha Antiak aienka kash itvlachit,

22. Nan ithvna vhleha im anukfila hlampkochi, micha ayimmi kvt achunancha ch̄i ho atohnochi mvt, na palvmmi laua ka il a hlopulli pulla hosh Chihowa apehliechika ya e chukowa hi oke; achi tok.

23. Micha vbanumpuli iksa moma pehlichi aiyuka atokolit hiohlechi cha, nahullochit vba pit anumpulit issa mvt, Chitokaka yummak o okla anukcheto tuk ash pit im issa tok.

24. Micha Pisitia hlopulli mvt, Pafilia itvlachi tok.

25. Micha anumpa hash Pvki a isht ai anumpuli cha, Atelia itonachi tok.

26. Atuk osh yummak o peni ai vlhtot Antiak yummak o toksula ch̄i ka Chihowa im aholitopaka hi o, pit im issa tok ash ai ahlichi tuk vt itonachi tok.

27. Micha itvlachi cha iksa ya itahobi cha, Chihowa yvt isht kaniohmihinchi tuk moma, micha okla nan ik ithano vhleha ya ayimmika okhissa ya ik tiwi tuk aienka, im anohonlit okla tok.

28. Micha yummak o nan ikhvna vhleha ya awant ahashwa na hopaki tok oke.

C H A P T A X V .

Hakshup t̄pa isht ai itachowa, 1. 6 Vbanumpeshi vhleha hv̄t isht itim anumpulit maya. 22 Ai apissalechit im anukfila ha tok.

1. MIHMA hatak kaniohmi Chutia mintit ai vla tuk vt, itibapishi vhleha ha nan im abvchit, Moses i nan vlhpisa ak o chohmit hakshup hv̄chi tapa keyukmvt, hv̄chi okchaya he keyushke; achi tok.

2. Yohmi na Pal, micha Banabas ita tuklo kvt yummak ash itachowvt itim inla fehna ma, Pal, micha Banabas anonti inlaka kaniohmi aienka kvt anumpa itachowa tok, ilvppak atuk vt vbanumpeshi vhleha, micha asonorchika vhleha aienka ka Cheluselem a im ona ch̄i ka, okla apesa tok.

3. Mihma iksa vhleha yvt pit apehv̄t aya na kohchvt ilhcoli mvt, okla nan ik ithano vbanumpuli toba tuk a anohon-

lit, Finis', micha Samelia aienā ka hlopulli tok; micha itibapishi vhleha ya mominchit yukpali chinto tok.

4. Atuk osh Cheluselem ash itonachi ma, iksa vhleha, micha vbanumpeshi vhleha, micha asanonchika vhleha aienā kvt aiokpanchi tok. Mihma Chihowa yvt ilapo a nana isht a kaniminchi tuk a mominchit anoli tok.

5. Yohmi kia Falisi iksa kariohmi na yimmi atuk vt wakaya cha, Hakshup a in tupli cha, Moses i nan vlhpisa ha holitobla he aienā ka im apesa he vlhpiesvshke; ahanchi tok.

6. Yvmohmi ma vbanumpeshi vhleha, micha asanonchika vhleha aienā kvt anumpa iluppa anukfillit pisa chi kvt itvnaha tok.

7. Atuk osh itachowa chuma nahā ma, Pita yvt wakaya mvt, Hatak itibapishi li vhleha ma! nitak hopaki kash Chihowa yvt hvpin takla ma auet ai atokoli ka, yvmmvt svtih ak o okla nan ik ithano vhleha yvt vba isht anumpa anumpa ka a haiyaklo cha, yimma hi a tok a, hvsh ithaiyanvshke.

8. Micha Chihowa yummak osh chukvsh puta ka ithaiyna kvt, aiokpanchi hosh Shilombish Holitopa ihima kvt hvpishno yo chash itilauechi hoke.

9. Micha hvpishno a yumma a pit im inluchi keyu, yimmi hatuk o chukvsh a i kashohufi hoke.

10. Yvmohmi ka nanta katihmi ho Chihowa hvchik a nukcheto hosh, nan ithvna vhleha ikonla ya ikonla abana yummma pin tikba vhleha, micha hvpishno aienā kvt e lauwi cha, e shala he keyu ka, yummma hvsh onochi cho?

11. Yohmi kia Chitokaka Chisvs Klaist achukma pulla hatuk mak o, pi okchaya kvt yummak inli il itilaaua he aiahnit pi yimmishke; achi tok.

12. Yohmi ma okla laua yvt lumvt chieyut, Banabas, micha Pal ita tuklo Chihowa yvt ilapo a, na fehna, micha nan isht ahoba puta aienā kariohmi ho okla nan ik ithano vhleha itin takla ya, isht a yvmihinchi tuk a anoli ka haklo tok.

13. Okla hut lumvt chieya ha yano, Chemis vt achakalinchu mut, Hatak itibapishi li vhleha ma! hus sa haponaklashke.

14. Chihowa yvt vmmona ka oklushi nan ik ithano a kaniohmit aiokpanchit okla ilap isht hohchifa chi ka akohchit ishi tuk a, Simion vt anohonli tok.

15. Micha hopaii vhleha im anumpa hvt ilvppak o ai achufushke.

16. Yakohmi ha ma falama lish, Lewi in chuka kinafa tuk a falaminchit ikbi la hi oke ; micha okpulo tuk a falaminchit ikbit hilechi la hi oke.

17. Yvmmvt hatak a kashampa, micha okla nan ik ithano vhleha moma sa hohchifo ha isht a hohchifo tuk puta kvt, Chitokaka ya okla hohoya chi ka, yummak osh na yakohmi moma ka yvmihchi mak osh Chitokaka yvt achishke ; achi holisso tok a.

18. Ummona pillvt isht auehinchi ka Chihowa yvt ilap nana a kaniohmi puta ka mominchit ithaiyana chatuk.

19. Yvmohmi hoka okla nan ik ithano atuk filemvvt Chihowa ya im onvt maya ka, kil anumpulicho ka he ak o, vno vt aiahni lishke.

20. Amba na holba toba puta isht ai okpulo, micha ohoyo himita itin lumaka, mikmvvt nana kvt nuksitvt illi puta, micha issish aienä ka ik ahalaio ka chi kak o pit iloh i holissochashke.

21. Nitak hopaki isht auehinchi ka, Moses i holisso ha tvmaha moma, kvna hosh isht ai anumpohonlikma, nitak hullo moma, sinakak a ai itim anumpohonli chatuk oka ; ahanchi tok.

22. Mihma vbanumpeshi vhleha, micha asonorchika vhleha, iksa vhleha moma ai itypeha kvt ilap ai itypeha akinli, hatak ai vlhtoka ho Pal, micha Banabas ita tuklo ka ai itupelinehit Antiak a pit tihlela he, vlpesa ahni tok Chutus osh Basabas hohchifo, micha Sailus itatuklo itibapishi vhleha ya moma i shashonli kak a tok.

23. Micha holissochit ibbak fohki kvt yakohmichi tok. Vbanumpeshi vhleha, micha asonorchi ka, micha itibapishi vhleha aienä kvt, itibapishi vhleha okla nan ik ithano a tok Antiak, Silia, micha Selisia puta aiasha ka pit aiokpvchishke.

24. Yvmohmi kvt hatak kaniohmi ilvppa isht ia tuk osh,

anumpa isht hvchi ataklymmiit hvchi shilombish okpanit, Hvchi hakshup vt tupa cha, nan vlhpisa ya hvsh holito-blashke, ahanchi tuk a e haiyaklo tok; yummak oka il atohno tuk keyu hoke.

25, 26. Chukvsh vt achufa chohmit itvnahvt e chieya mvt, hatak vlhtoka hvpin Chitokaka Chisus Klaist hohchifo pulla ka ilap im ilhfiopak a a kaiyanchei chohmi hatak o, pi holitopa Banabas, micha Pal ita tuklo ka ai itvpehvchit pit e hvchin tihlela he a, vlhpesa il aiahni tuk.

27. Yvmohmi hatuk osh Chutvs, micha Sailvs aienka pit e hvchin tihleli hoka, mihi yosh yummak ash fehna ka itih ho isht hvchim anohonla hi oke.

28. Yvmohmi ka Shilombish Holitopa, micha pishno il aienka kut nana kvt weki kvt ai vlhpesa ilvppa chohmi ka, ai i shahli ho e hvchi onoicha he keyu kak o vlhpiesa il aiahni tuk oke.

29. Yohmi kvt nipi na holba toba pit im issa tuk, micha issish, mikmvt nana kvt nuksitvt illi tuk puta, micha ohoyo himita itin lumaka aienka kak o, hvchik ahalaio kashke. Yvmak o hvchik il ahalaiacho hokmuto hvsh vlhpiesa hi oke. Hvchi achukmakashke; achi tok.

30. Yohmi na okla pit tihleli ma, Antiak a ai vla tok; micha okla laua ya itahobit tahli mvt, holisso hash ima tok.

31. Mihma yummak ash okla itim anumpuli mvt, nan im annoa kvt okla na yukpa tok.

32. Mihma Chutvs, micha Sailvs ita tuklo kvt, ilap mvt hopaai akinli hatuk okvt, itibapishi vhleha ha anumpa lawa ka isht atohnohonchi cha kullochi tok.

33. Atuk osh yummak osh ahashwa na ahchieba ma, itibapishi vhleha yvt aiokpanchi cha vbanumpeshi vhleha ha pit in tihleli tok.

34. Yohmi kia Sailvs vto yummak inli ahanta kak osh im vlhpiesa tok.

35. Pal ak kia, micha Banabas aienka kut Antiak a, inla laua ho ai itvpehvut mayvt Chitokaka im anumpa ha im abahanchi, micha isht im anumpohonli aienka tok oke.

36. Yummak atuk a nitak ont isht kaniohmi ma, Pal vt

Banabas ash, Anonti iwt t̄ymaha moma Chitokaka im anum-pa il ai anumpohonli tuk vt, il itibapishi vhleha ha i nowvt ayvt kaniohmi hosh ai ashakma e pisashke ; im achi tok.

37. Mihma Banabas vt Chan osh Mak hohchifo ka ilau-ehit aya lhi a ahni tok.

38. Yohmi kia Pafilia ai i filummi cha iba takla nan isht vttut ik ayo ke tuk ash, ilaelit aya ik ulhpeso, Pal vt ahni tok.

39. Mihma itachowa kut kullo fehna hatuk osh, iti filum-mit okla tok. Yohmi ma Banabas vt Mak a ilaeli cha peni fokhvt Saipilus a ona tok.

40. Mihma Pal vt Sailvs a hoyo cha itibapishi vhleha yvt Chihowa im aholitopa he mak o, pit im issa ma, ia tok.

41. Mihmvt yummak ashot iksa vhleha ya hlampkochit isht ayvt, Silia, micha Silisia aienan ka hlopulli tok oke.

• CHAPTA XVI.

Pal vt Timohli a hakshup tvpli, 1. 14 Litie vt vbanumpuli toba.

24 Aboha kullo apesvchi vt vbanumpuli toba.

1. YUMOHMI mvt Tabi, micha Listi aienan ka vla tok. Mihma yummak nan ithuna achufa Timohlius hohchifo hosh anta tok : Chu ohoyo na yimmi o ushi ; amba iki okuto Klik hatak a tok.

2. Yummak oka itibapishi vhleha Listi, micha Aikonivm aienan aiasha kut ahnichi tok.

3. Yummak osh takla aya hi a, Pal vt aiahni tok ; micha ishi cha hakshup tvpli tok, yakni koyofa yummak aiasha kvto Chu vhleha hatuk o, micha iki okuto Klik hatak a momvt ithana hatok oka.

4. Micha t̄ymaha puta a hlopullit aya mvt, nan ulhpisa vbanumpeshi vhleha, micha hatak asononchi aienan Cheluse-lem aiasha kut apesa tuk a, holitoba chi ka ihimvt okla tok.

5. Yumohmi ho iksa puta kut yimmi kut kullo hiohli ma, holhtina mvt laua kut nitak atukma, i shahlit ia tok.

6. Yumohmi ma Fichia, micha Kaleshi yakni aienan a hlo-

pullit okla, micha Asia a anumpa ha isht ai anumponla he keyu, Shilombish Holitopa yvt i miha tuk o,

7. Mishi a itvlachi mvt, Bihlinia chukowa bvnna tuk kia, Shilombish vt vlhpesa, ik im ahno tok.

8. Yohmi ma Mishi a ant itiachi mvt, Tloas a itulachi tok.

9. Mihma ninak o, Pal a nan isht ahoba yvt ant i haiaka tok. Masetonia hatak osh hikia cha, im asilhhvchit, Masetonia ak o vla cha ant pi apelá, ahanchi tok.

10. Mihma yvmmak oka vbanumpa ont isht il im anumpula he mak o, Chitokaka yvt auet pi hoyo tok pulla ka, pim anukfihinla mvt, nan isht ahoba ka pisa tuk a, in chekosi ma, Masetonia ya ia pi bvnna tok.

11. Yohmi cha Tloas a il a hotoffi mvt, auet apissalint mintit Samoleshi e la tuk osh,nitak atukla ka Niapolis a e la.

12. Micha yvmmma ashwut il ia mvt, Filippi, yvmmak okvt tumaha chito kvt Masetonia yakni koyofa yvmmma moma i shahli, okla wiha a binili a e la tok. Micha tumaha yvmmma il ashwa na nitak kanohmi tok.

13. Micha nitak hullo ma tumaha kohchvt iwt okhina lapali ka, yvmmak o vba pit ai anumpuli chatuk a, ont e chieya mvt, ohoyo hvt itahohumba ma il im anumpuli tok.

14. Mihma Chihowa aiokpanchi ohoyo achvfa Litie hohchifo, na humma lusbi kanchi, Hlaiataila tumaha vta yvt pi haklo tok ; mihi yo chukvsh o Chitokaka yvt tiwi na Pal vt nana isht ai anumpohonli ka anukfohka tok.

15. Micha ilap vt in chuka chufa aienvt baptismo mvt, asilhhvchit, Uno vt Chitokaka ya pit im ai ahli li ka hvchim ahobakmvt, an chuka ya ont hvsh chukowa cha hvsh ashwashke ; ahanchi mvt, pi atushpalechi tok.

16. Yakohmi tok, vba pit ai anumpuli ia hosh il aya ma, ohoyo himita achvfa kvt isht ahullo shilombish anukfoka hosh pi afama tok ; yvmmak okvt nan anoli ilahobit vlhtoba chinto i shahli vhleha isht im ahayuchi a tok.

17. Yvmmak ashott Pal, micha pishno aiena ka piakaiyvt aya mvt tahpvvt, Hatak yakohmi kvt Moma i Shahli Chihowa yako, in tvshka vhleha yosh ai okchaya hina hvpim abahanchi hoke ; ahanchi tok.

18. Mihmet iluppa yakohomi na nitak kanohmi tok. Yohmi kia Pal vt ik im vlpeso hatuk osh filema mvt, shilombish ash, Chisus Klaist hohchifo pulla ho, chishno vt yvma ish akohcha chi ka, chi miha lishke; im achi tok. Mihma yummak ashon mih makinli ho kohcha tok.

19. Yvmohmi ma i shahli vhleha yvt nan isht ai ahayunchi ashon kunia na pisa mvt, Pal, micha Sailus ita tuklo ka hokli cha, hvllat ishtirt nan vpa a kanchi a isht chukowvt, hatak pehliche vhleha ya isht im ona tok.

20. Micha ishtirt tvshka chipota i miko vhleha ya isht im ona cha, Hatak ilvppvt Chu okak osh hvpin tvmaha ha atak-laiyvmmi fenvshke.

21. Micha Lom okla pia hvt, nan vlpisa yvma il aiok-pvchi cha, e holitobla he pim ai vlpesa keyu ka pim abahanchishke; ahanchi tok.

22. Yohmi ma okla laua yashot im a svnali himona achvfa wakaya tok; mihma tvshka chipota i miko vhleha yashot im ilefohka ya okla i shueli mvt bola chi ka, okla apesa tok.

23. Mihma fuma lawa ho okla onochi mvt, aboha kvollo apesuchi a achukmalit apesahancha chi ka im apesvt tahli cha, aboha kvollo pit apitta tok.

24. Yvmmak ashon nana kvt yakohmit im vlpohisa mvt, aboha kvollo angakaka pilla pit apitta cha, iti iyi isht akvollo isht a kvollochi tok.

25. Yvmohmi tuk o ninak iklynna ma, Pal, micha Sailus ita tuklo kashot vba pit anumpulit, Chihowa pit aiokpvchit in talohowa tok; mihma aboha kvollo vlpinta tuk vt haiyaklo tok.

26. Mihma yakosi fena makinli ho, yakni winakuchi chinto na, aboha kvollo okhissa puta kvt tiwa ho pisa mvt, aboha kvollo vlhto a tihlaiyvt tamoa tuk a, im ahoba mvt i bospho falaia ya hvllat shufi kvt ile ba chin tok.

27. Mihma aboha kvollo apesuchi yvt nusi tuk vt okcha cha, aboha kvollo okhissa puta kvt tiwa ho pisa mvt, aboha kvollo vlhto a tihlaiyvt tamoa tuk a, im ahoba mvt i bospho falaia ya hvllat shufi kvt ile ba chin tok.

28. Yohmi kia Pal vt chitolit pit tahpulvt, Momut iluppa e maya hoka, nana kia chik ile kanihcho kashke; ahanchi tok.

29. Mihma pula ha pit hoyo cha, mvlet pit chukowvt wunihinchi hosh vla mvt, Pal, micha Sailvs ita tuklo itikba ya ant hlipia tok.

30. Micha pehlichit kohcha mvt, Hatak hvchia ma! sai okchaya chi kvto nanta ko katiohmi la chi cho? achi tok.

31. Yohmi ma, Chitokaka Chisus Klaist ak o ish i yim-mashke, mikmak osh chishno, micha chin chuka achufa aienvt chi okchaya hi oke; achit okla tok.

32. Micha Chitokaka im anumpa ha ilap, micha in chuka anuka ya maya tuk ash a mominchit isht im anumpuli tok.

33. Mihma ninak hvshi kanvlli isht vlhpisa mih makinli ho ishi cha, a fuma tuk a achifa tok; mihma ashalika ilap vt in chuka chufa momvt baptismo tok.

34. Micha pehlichit im aboha ya ishit chukowa mvt, ilh-pak a itikba in talohli mvt, in chuka chufa ya a moyumvt Chihowa ya yimmit na yukpa tok.

35. Yvmohmi tuk o onnvvt taha ma, tvshka chipota i mi-ko vhleha yvt anumpeshi a pit tihleli mvt, Hatak yummvt ant ik itiachi, ahanchi tok.

36. Atuk o aboha kvollo apesuchi yvt Pal a anumpa ilvppa im anolit, Tvhshka chipota i miko vhleha yvt ant ik ayá, auet hvchim aiahni tuk oke; yvmohmi hoka himak ano koh-chvt ivt, na yukput hvsh ayashke, achi tok.

37. Yohmi kia Pal vt, Anumpa vlhpisa yosh pi onvtula keyu ka, Lom hatak pia ho kak o haiakvchi hosh pi fahami cha, aboha kvollo ya pit pi apitta tuk; yohmi kash ot anonti peh luma hosh pi kohchi hoh cho? Yohma he keyu pul-lvshke. Amba ilapo inlit ai vla cha, isht pi kohchashke; im ahanchi tok.

38. Atuk o anumpeshi ash ot anumpa ilvppa tvshka chipota i miko vhleha yash ont im anoli tok. Mihma yummvt Lom hatak atuk o okla haklo mvt, nukshopa tok.

39. Mihmvt ai vla cha ant im asilhhvt, isht kohchi mvt, tvmaha ha a kohchvt okla hinla ka, im ahni tok.

40. Mihma aboha kvollo a a kohchvt ia mvt, Litie in chuka ont chukowvt okla tok; micha itibapishi vhleha ya pisa cha hopohlvlit tahli mvt, kohchvt itiachi tok oke.

C H A P T A X V I I .

Pal vt Hlessalonika ya vba isht ai anumpuli, 1. 10. Pal vt Belia ako ai anumpuli. 15 Pal vt Ahlens a ai anumpuli.

1. YUMOHMI kashot Amfipolis, Apollonia aienā ka hlopullit okla mvt, Hlessalonika yummak o Chu okla i sinakak vt hikia ho itvlachi tok.

2. Mihma Pal vt yummak o a yohmi atuk okvt ont iba chukowa cha, nitak hullo nitak tuchina ka Holisso Holitopa ya ai isht okla ha im anumpohonli tok.

3. Klaist vt issikkopa he, micha illi tuk osh falamvt tana hi vt ai vlhpiesa tok, isht i fahpullit im abvchit, yvmohmi ka Chisvs ilvppa vno vt isht hvchim anumpohonli li kak osh, yummvt Klaist mak oke; achi tok.

4. Mihma kanimi kvt yimmi mvt Pal, Sailvs ita tuklo kash iba kaha tok. Mihma Klik hatak vbanumpuli laua fehna, micha ohoyo holitompa aienā kvt kanomosi tok keyushke.

5. Yohni kia Chu okla nan ik yimmo hokvto anukhobela mvt, hatak haksi nan isht vtta ik im iksho kaniohmi ho pehliechit itvnnali cha, tvmaha okla ha mominchit nukhlakashlit, Chesvn in chuka ya o yihlepa tok; micha pehlichit kohchvt okla isht im vla chi hosh yummak ash hoyo tok.

6. Atuk osh yummak ash okla ik ahayucho mvt, Chesvn micha itibapishi vhleha kaniohmi ka-aieninchit, hvllat tvmaha apehlichi vhleha ya isht im ona cha, tahpvlt, Yakohmi kvt yakni a shot filimmi tuk vt ilvppak kia ai vlvshke.

7. Mihi yo Chesvn vt pehlichit ishi tuk; micha yakohmi kvt momvt Sesa i nan-vlhpisa ai ahalaia keyu ho, okla yvmohmit, miko inla Chisvs vt asha hoke, ahanchishke, achi tok.

8. Mihmvt okla puta, micha tvmaha apehlichi vhleha aienā kvt na yakomi ka haklo ma, nukhlakashli tok.

9. Mihmvt Chesvn, micha inla aienā anumpa nana ho im ai ishi kvt im vlhpesa mvt, asht ik itvnowá, okla im ahni tok.

10. Mihma itibapishi vhleha yvt ashalika ninak o Pal, Sailvs itatuklo kash Belia pit tihleli tok ; yummak ash itonachi mvt, Chu okla i sinakak o ont abeha tok.

11. Yakohmi kvt hochukma kvt Hlessalonika maya ka i shahli tok, im anukfila mominchit isht aiokpanchit anumpa ha ishi hatuk osh, micha yummvt yohmi ho mvli ho chishba, nitak moma Holisso Holitopa ya a hohoyo tok.

12. Yvmohmi hatuk osh okla yummvt laua hosh yimmi tok ; mihma Klik ohoyo holitompa vhleha, micha hatak aieno mvt kanomosi tok keyushke.

13. Yohmi kia Chu okla Hlessalonika asha kvt, Pal vt Chihowa im anumpa ha Belia ya isht ai anumpohonli ka pit akostininchu mvt, yummak ash kia okla ai vla cha, okla ha ant okpvni tok.

14. Mihma ashalika itibapishi vhleha ash osh Pal a okhvta ak o ia chohma chi ho, pit chuffichi tok. Amba Sailvs, micha Timohlius itatuklo kvt yummak inli ho ashwa moma tok.

15. Mihma Pal ilauet isht okla aya tuk vt Ahlens a isht ona tok ; micha Sailvs, Timohlius itatuklo kvt tushpa fehnvt im itonancha chi ka, pit i miha, anumpa ishi mvt, okla ilhkoli tok.

16. Yohmi ma Pal vt yummva pit hoyo hosh Ahlens a anta takla cha, tvmaha hvt na holba toba banot isht alotowa na, pihisa mvt im anukfila hvt ik vlhpeso ki tok.

17. Yvmohmi hatuk osh Chu okla, micha vbanumpa ahni vhleha aieno ka, sinakak micha kvna ho nana ai itatoba ai itafama hokvt nitak moma ai im anumpohonli beka tok.

18. Mihma hatak nan-imponna Epikulvs iksa, micha Istoit okla aieno kaniohmi kvt, yummva okla itim anumpuli tok. Mihma kanimi kvt, Anumpuli shahli ilvppvt nanta ko acha hinla ? achi ma ; kanimi kvt, Chisvs, micha falamvt tani aieno isht im anumpuli hatuk o, Yakni kaniman isht ahullo ho isht anumpuli ha chinishke ; achi tok.

19. Micha okla ilaelit ishtivt, Mas nvnih a isht ona mvt, Ilvppvt anumpa himona nana ho isht ish ai anumpuli hatukma, il ithyna hinla cho ?

20. Chishno yokut nan inla nana mak o pi haksobish a ant ish foyuki hoka. Yohmi hoka ilvppvt kaniohmi hatuk okma il akostininché hinlvshke ; ahanchi tok.

21. Ahlens okla moma, micha yakni inla hatak puta yvymma aiasha aiena kvt, nan inla yó keyu, amba na himona fehna anoli, keyukmvt haklo hokmá, nana hosh aiasha bilia hatok oka.

22. Yvmohmi ma Pal vt Mas nunih iklvnna ya hikia cha, Ahlens okla hvchia ma ! nana a kaniohmi puta ka na holba toba ya hvsh aiokpanchi fehna ho, hvchim akostininché lishke.

23. Ant ia li kvt hvchi na holba toba puta ka pihisa limvt, vba tula ya, Kvnna ik ithano Chihowa mak o, achi, ilvppak osh isht ai o holisso ka pisa li hokuno. Yohmi hoka hvsh ithana keyu hosh, pit hvsh aiokpahanchi chatuk, mihmak o, vno vt hvchim anohonli lishke.

24. Chikowa yakni, micha nana moma yvymma anyukaka aiasha aiena ka ikbi tok ; yvmmak okvt vba shutik, micha yakni aiena ka in Chitokaka yokut tempel puta ibbak a isht toba ya, ai ahanta keyu.

25. Micha nana hosh ik im iksho hatuk o, hatak ibbak vt im isht anta chatuk keyu ; yvmmak osh moma ka okchaya, micha im ilhfiopak, micha nana moma aiena ka ihima hatuk oka.

26. Micha issish achvfa ho, hatak oklushi moma yakni paknaka a mominchit aiasha hi a ikbi tok ; mihmvt nitak kaniohmi vlhpisa ho, micha kanima yó aiasha he puta ka, apesa tok.

27. Yvmmvt Chitokaka ya hoyo chi hatok ; yvmmak okvto eho moma ka hvpi mishemanchi keyu nana kia, yohma he yobakmvt, pasholit hoyo fehna cha, yvmmak oka ahayucha hinla hoke.

28. Hvphishno vt yvmmak o iloh ai okchaya, micha ilhkolit, iloh aiasha hoka. Hvchim ataloa ikbi kaniohmi kvt, Hvphishno ak kia yvymma ushi hvphia hoka, ahanchi akinli tok oka.

29. Yohmi ka Chihowa ya ushi vhleha pia hokvt, Chiho-

wa imma ya tuli holisso lakna okmá, keyukmvt, tuli h̄ta, keyukmvt tuli, hatak nan isht vtta imponna nana anukfilli hosh, na holba ikbi ya chohmi hoka, hypim ahoba he tuk keyu hoke.

30. Nan ik ithaiyano nitak yummak foka hokvno, Chihowa yvt tohmosonli hosh pihisa tok kia; amba himak okvno hatak okluha kanima moyuma ahanta kvt ile kostininchā he ak o, im apihisvshke.

31. Hatak a ilapo inlit atokoli tok, yummak o yakni a ai ahli banot nan isht im apesa he vt nitak a apesa tok okvt; illi tuk a tanichi hosh moma ka im ai ahlichi tok; ahanchi tok.

32. Illi falamvt tana he puta okla haklo mvt, kanimi kvt isht yopula tok; mihma kanimi kvt, Anonti himmakma ilvppa e chim a hakla hi oke; achi tok.

33. Yakohmi ho Pal vt okla iklvnnaaka ya, akohcha tok.

34. Yohmi kia hatak kaniohmi kuto yimmi cha, yummak ash ibakaha tok. Yumma iba takla kvt Taionishvs, Mas nvnih nan ai apesa, micha ohoyo Tamelis hohchifo hosh, anonti inla ai itypeha tok oke.

CHAPTA XVIII.

Pal vt Kolinhla, a ibbak isht a toksvli, micha vba isht ai anumpuli aienā, 1. 9 Holhpokuna hosh isht ai i yiminta.

1. NANA kvt a yakohmi ha ya, Pal vt Ahlens a akohchvt ia mvt, Kolinhla a vla tvk.

2. Micha Chu hatak achvfa Akuila hohchifo, Pantvs ai vtta tok vt, tekchi Plisilla ita tuklo kvt, Kilatius vt Chu vhleha yvt momvt Lom a akocha wiha chi ka, apesa hatuk o, Itili ya ashwut itvlachi tuk a cheki hosh ashwa na, pisa mvt yummak o im ona tok.

3. Micha ilap vt a toksvli itim ai achvfa hatuk okvt, takla ahantvt toksvli tok; yummak okvt isht vlhtipo ikbi im vlhtayak vhleha ha tok okvt.

4. Mihmvt sinakak a nitak hullo moma ai anumpulit, Chu vhleha, micha Klik okla aienā ka nukfokichi tok.

5. Atuk o Sailus, micha Timohlius ita tuklot Masetonia ashwut itvlachi ma, Pal vt chukvsh vt a yimihinta mvt, Chisus ak osh Klaist pulla mak atuk a, Chu okla ha im abahanchi fehna tok.

6. Mihma okla i sanalit ik ahobalot anumpuli ma, ilap im ilefohka ya wilohli mvt, Hvh issish vt hvchi noshkobo akinli ho onutulashke, vno vto sa kashofushke. Himmak pilla ano okla nan ik ithano vhleha ak o im aya la chi hoke ; im achi tok.

7. Micha yummak ash akohchvt ia mvt, hatak achufa Chvstus hohchifo, Chihowa aiokpahanchi in chuka ont chukkowa tok. Yumma in chuka yvt sinakak o bilikasi ho, talaia hatok.

8. Mihma Kispus sinakak apehlichika yvt in chukachufa moma ai itvpehvt, Chitokaka ya i yimmi tok. Mihma Kolinhla okla hvt haklo mvt, laua hosh yimmi cha baptismoto tok.

9. Mihma Chitokaka yvt ninak o, Pal vt holhpokuna chohmi ka im anumpulit, Chi nukshopa ná, amba anumpuli, micha lumvt chik asho kashke:

10. Uno vt chi awant aya li hoka ; hatak nana hosh chi onvtulvt chi hotopala he keyu hoke, tvmaha ilvppa okla lauvt um ai ashwa hoka ; im achi tok.

11. Mihma Chihowa im anumpa ha ai im abvchit ahanta na afvmmi achufa cha hvshi hannalit aienatok.

12. Atuk o Kalio vt Akaia i nahullo mikot ahanta ma, Chu okla hvt im anukfila ai achufa chohmit, Pal a o kinafvt ishit nana ai apesa ya isht ona mvt,

13. Nan-vlhpisa ya ai ahalaia keyu ka, Chihowa ya aiok-pucha chi ka, hatak ilvppvt okla ha atohnohonchishke, achanchi tok.

14. Mihma Pal vt ilap itih ha wakumma chi foka ma, Kalio vt, Chu okla hash nana kvt ik vlhpeso, keyukmvt, opulo fehna nana hatuk okmvno, vno vt hvchim aiokpanchi la hi a, ai vlhpiesa he tuk oke, Chu okla hvchia ma !

15. Amba anumpa, micha hohchifo puta, mikmvt hvchi nan-vlhpisa imma aienatok isht anumpa hatukmuno, hvchishno

akinli hosh yummuno isht hush ashashke. Üno yokuto nana yummma chohmi hokvno, non apesvt ahanta la he ke-yushke, im achi tok.

16. Mihmvt nana ai vlpisa asha tuk a kvnom pit tihleli tok.

17. Mihma Klik vhleha hut momvt sinakak apehlichi Soshlenes a, okla hoklit ishi cha, nana ai vlpisa itikba ya a boli tok. Mihma Kalio vt yummma puta ka nan isht ik ahno tok.

18. Yakohmi ha ya, Pal vt ahanta na nitak kanohmi tok ; atuk osh itibapishi vhleha ya aiokpuchit tahli mvt, Plisilla, micha Akuila aienka ai itapilhvt peni fohkv ayvt Silia ya ia tok; anumpa ha il onochi tok okvt, Kenklea pashi ai vmo tok.

19. Micha Efesus a vla mvt, yummak o ant ashachi cha ; amba ilapo vto vba isht ai anumpa chuka ont chukowa cha, Chu vhleha ya im anumpohonli tok.

20. Mihma takla anta na hopaka hinla ka, okla ahni ma, ilap ak osh ik haklo tok.

21. Micha okla ha aiokpuchi mvt, Ik kaniohmi kia, impa holitopa mihinti ilvppa Cheluselem ak o ai isht anta la chi hoke. Yohmi kia Chihowa ak osh ik yohmí ahni hokma, falamvt chim aya la he akinli hoke ; ahanchi tok. Mihmvt peni fohkv Efesus vttvt ia tok.

22. Atuk osh Sesalia ya ont atayali cha, pit oiyvt iksa vhleha ha ont aiokpuchit tahli mvt, Antiak a ia tok.

23. Mihmvt yummma ont anta na ha cha ia mvt, Kaleshi, micha Fiehia yakni aienka, nan ithvna vhleha moma hlampkochit abaiyvt ayvt hlopulli tok.

24. Mihma Chu achufa Apollos hohchifo, Aleksantia ai vta tok, hatak anumpuli imponna, micha Holisso Holitopa ya imponna fehna yosh Efesus a vla tok.

25. Hatak ilvpput Chihowa i hina yvt im vlbuchi ya tok ; micha chukvsh vt ai yimihinta hatuk osh, Chan i baptismo ak illa ho ithana hosh, achunanchit Chitokaka immi ya isht anumpuli, micha im abuchi aienka tok.

26. Micha nukwaya kvt iksho hosh, sinakak a ai anum-

pulit ishtia tok. Yummak ash o Akuila, micha Plisilla ita tuklo kvt haklo mvt, yummak ash pit hoyot ishi cha, Chihowa i hina ya achukmalit i shahlichit im anohonlit okla tok.

27. Micha Akaia ya ia ka bunna ma, nan ithuna vhleha yvt okla aiokpahancha ch^l ka, pit atohnochit, itibapishi vhleha yvt holissochi tuk o; yummak ash ot vla mvt, i nuk-haklo na yimmi tuk vhleha ya apelahanchi fehna tok.

28. Yummak okvt, Chisus ak osh Klaist mak a tok a okla itin takla Holisso Holitopa ya ai isht im abahanchit Chu okla ha anukfohki fehna tok oke.

CHAPTA XIX.

Pal vt ibbak isht umbitepaka Shilombish Holitopa yvt anukfohoka tok. 17 vbanumpa yimmi kvt laua.

1. ATUK o, yakohmi tok, Apollos vt Kolinhla a anta moma ma, Pal vt ibetvp pilla ka a hlopulli mvt, Efesvs a vla tok; micha nan ithuna kaniohmi ka ant pisa mvt,

2. Huchi yimmi tok takla kuto, Shilombish Holitopa ya hvsh eshi tok oh cho? im achi tok. Mihma Shilombish Holitopa yvt asha hokmá, nana kak kia, e haklo chatuk keyu hoke; okla im achi tok.

3. Mihma, Yohmi kuto, nanta ko ai isht huchi baptismo hatok o? im achi tok. Mihma, Chan i baptismo ak a tok; okla achi tok.

4. Mihma, Chan vto ile kostininchit baptismo yo isht baptismochi ho muhli cha, ilap iakayvt mihinti, Klaist Chisus mak o yimma hi a, okla ha im ahanchi tok; Pal vt achi tok.

5. Mihma ilvppa okla haklo mvt, Chitokaka Chisus hohchifo ha isht okla baptismo tok.

6. Mihma Pal vt ibbak a okla hash, isht umbitepa ma, Shilombish Holitopa yvt ant onvtoyula tok. Mihma anumpa ilaiyuka okla anumpuli mvt, vbanumpa aieno isht anumpuli tok.

7. Micha hatak vt moma kvt auahuklo foka hatok.
8. Micha sinakak ont chukowvt, nukwaya iksho hosh, Chihowa apehlichika imma ya isht anumpulit, anukfohkit-chit ahanta na hvshi tuchina tok.
9. Yohmi kia kaniohmi hokvto chukvsh kvlo taha cha, ik yimmo mvt, hina yvmmak ash na mihachit okla laua itikba ya ai anumpohonli ma, yvmmak ashot ai i filvmmi cha, nan ithvna vhleha hash a filamolechit eshi cha, Tailanus osh na-na aiikhvna i hikia ho, nitak moma ai anumpohonli tok.
10. Ilvppa yakohmi kvt imoma na afvmmi tuklo tok; yohmi hatuk o, Chu, micha Klik okla aien Asia ai asha tuk vt momvt Chitokaka Chisvs im anumpa ha haklo tok.
11. Mihma Chihowa yet nana kvt isht ahullo fehna kani-ohmi ka, Pal ibbak a isht a yvmihinchi tok.
12. Yvmohmi hatuk o, nantapvski puta, keyukmvt, tikba takohlichi kia, yvmma haknip a ai isht abeka puta ka isht im ohona; yohmi ma nan illi puta kvt ai i filamoli, micha shilombish okpulo aien kash ot akohoncha beka tok.
13. Yvmohmi ma Chu kaniohmi nan isht-ahullo okpulo kohchi ilahobit itanowa yvt, shilombish okpulo anukfoka vhleha ha, Chitokaka Chisvs hohchifo ha isht ai o hochifochit pisvt, Chisvs, Pal vt yvmma isht ai anumpohonli ka pulla ho, anumpa kvlo ai isht e chi onohonchishke; ahan-chi tok.
14. Yohmi ma Chu hatak Sifa hohchifo, na holitopma isht asha pehlichi o ushi untuklo hosh yvmma yohmi tok.
15. Mihma shilombish okpulo ash ot falaminchi mvt, Chisvs a ithana li, mikmvt Pal ano ithana li; amba hvchishno ak osh kvta hvchia ho? achi tok.
16. Mihma shilombish okpulo yvt a foka hatak ash ot yvmmak ash o mvlet, onvtulvt isht i shahlichit imaiyachi tok; yvmohmi na na fohka iksho micha ai okpulo kvt taha aien hosh, chuka yvmmak ash akohchvt yihlepa tok.
17. Yohmi ma Chu okla hvt moma, micha Klik puta aien Efesus asha tuk vt, ilvppa okla akostininch tok; mihma na nukshopa hvt mominchit onvtoyula ma. Chitokaka Chisvs hohchifo hvt holitopa tok.

18. Mihma na yimmi tuk vt laua hosh ai vlt ant il anolit, nana akaniohmi chatuk puta kvt anohonli tok.

19. Micha isht ahullo imponna vhleha hatuk aien a kak kia, laua hosh i holisso puta ka isht itahobi cha, hatak moma itikba ya a hukmi tok. Micha ai vlhtoba ya okla hotihna mvt, tvli huta boshulli tahlepa sipokni pokoli tahlapi tuk o, akostininch tok.

20. Chihowa im anumpa hvt kvlo kvt i shahlit ia fehna, yakohmi hosh imaiyachi tok.

21. Nana kvt a yakohmit ont ai issuchi ma, Pal vt Masetonia, micha Akaia aien ka hlopullikmvt, Cheluselem a ia hi vt chukush a isht ai ahni myt, Yumma ont anta li tukmvt, anonti Lom ma pisa li pulla akinlashke ; ahanchi tok.

22. Mihmvt im ai itapela tuklo Timohlius, micha Elastus aien ka Masetonia pit tihleli cha, amba ilapa vto Asia ya anta na ahchiba tok.

23. Mihma nitak yummfa fehna ma, hina yummfa okla hvt nanumachi fehna tok.

24. Hatak achvfa Temetius hohchifo, tvli huta ikbi, yummak osh Taiena ya tvli huta itombushi puta im ikbi yosh isht vlhtoba mvt chrbihasi keyu ho, hatak nan ikbi imponna vhleha ya isht im vla cha ;

25. Yummak ash, micha nan isht vta ai itim achvfa vhleha aien ka hoyot itahobi mvt, Hatak puta ma ! nan isht ai vta ilvppa pulla ho, nan isht il ahayuchi ka hvsh ithaiyanvshke.

26. Yumohmi ka Efesus ak o bano keyu, amba Asia a mominchi chiyuhmit Pal ilvppvt, ibbak isht toba yokuto chitokaka vhleha nana ho keyu hoke, ahanchi cha, okla laua ka anukfokichit filamolihinchi ka hvsh pisa, micha hvsh haklo aienvshke.

27. Yumohmi ka hvishno nan isht iloh ai vta ilvppak bano ho, ik ahobalo ka he fehna keyu ; amba nan isht ahullo ohoyo chito Taiena in tempel ak kia aienvt kalakshikma, anonti yummak o Asia moyuma, micha yakni puta kvt aiok-pahanchi yash isht aholitopa yvt ont ai okpulot kvnia hinla fehna hoke ; achi tok.

28. Mihma okla haklo mvt, anukhobelvt alota mvt, tahpulvt, Efesus okla in Taiena vt chinto hoke: ahanchi tok.

29. Mihma tumaha ha yahapa kvt alotvt kvnia tok. Micha Masetonia hatak, Pal apehvt nowvt aya Kaius, micha Alistakvs ita tuklo ka hoklit okla ishi mvt, im anukfila ai achufa chiyuhmit yihleprt, okla ai itahoba chatuk a pit abeha tok.

30. Mihma Pal vt okla ha pit iba chukowa bunna tuk ak o nan ithvna vhleha yvt vlhpesa, okla ik im ahno ki tok.

31. Mihma Asia hatak pehlichi vhleha kaniohmi, yvmma i kana yatuk vt, okla ai itahoba ya pit chukowa bunnvt ik peso ka hi a, ahnit pit im anoli tok.

32. Yvmohmi ma kanimi kvt nana ho mihakma, anonti inla mvt inla ho miha tok; itvna ha hak osh ai vlhpesa keyu hatuk o, micha moma chohmi kvt nana kaniohmi ho itvna ha hatuk vt ik ahostininchu ki tok.

33. Mihma Aleksanta ya okla laua akohchi ma, Chu okla hvt tikba pit hilechi tok; mihma Aleksanta yvt ibbak pit fahummi mvt, okla ha im isht il anumpuli bunna tok.

34. Yohmi kia yummak okut Chu atuk o, okla akostininchu mvt, momvt anumpa achufa, Efesus okla in Taiena yvt chinto hoke, tahpulvt ahanchi na hvshi kanvlli tuklo foka tok.

35. Mihma tumaha i holissochi yokvt okla ha yokopli mvt, Efesus hatak hvchia ma! Efesus tumaha hvt nan isht ahullo ohoyo chito Taiena, micha na holba toba Chupitá a mintit akatula tok aienka aiokpuchi a, hatak nanta hosh ik akostininchu kvt ahanta cho?

36. Yohmi ka ilvppa nana ho isht ai acha hi o keyu hoka, hvchishno yvt nukchintot hvsh maya cha, tushpvvt nana hvchik kaniohmo ka he tuk oke.

37. Hatak yakohmi kvt tempel puta wehpuli keyu mvt, anonti hvchi¹ nanisht ahullo ohoyo ma ik ahobalot na miha-chi o keyu hokak o, ilvppa isht hvsh la tuk oka.

38. Yvmohmi hoka Temetivs vt, micha hatak nan ikbi vhleha yvmma apeha kvt, hatak nana kia nana im a kanioh-

mi tuk in takanli hokma, nan vlpisa nitak vt asha, micha nan apesa vhleha mvt mayvshke; nan vlpisa iti onochit ik ashá.

39. Amba nana inla imma yo hvsh ai asilhhuchi hokma, yummak okuto itvnaha ai ahli ho ai vlpisa hi oke.

40. Itvnaha ilvppak atuk a nana ho isht il ai anola he mvt iksho; yohmi hokvt himak nitak nana ai vlpiesa mvt iksho ka, nan vlpisa yvt hupi onvtula he fehna hoka; achi tok.

41. Micha yakmichit anumpulit issa mvt, itvnaha yash tishelichi tok oke.

CHAPTA XX.

Pal vt Masetonia ona, 1. 7 Pal vt Chitokaka im opiaka impa holitbit antvt, vba isht anumpuli. 28 Pal vt iksa in tikba vhleha ha atohnochi.

1. ATUK o yahapa kash ot issa ma, Pal vt nan ithvna vhleha ya hoyo cha ai okpvchi mvt, Masetonia a ona chi hosh ia tok.

2. Atuk osh yakni puta yummak ash a hlopullit, im anumpohonli fehnvt aya tuk osh Klis a vla tok.

3. Micha yummak o ahanta na hvshi tuchina tok. Mihmvt peni fohkvt Silia ia chi foka ma, Chu vhleha hvt im aie chi ma, falamvt Masetonia pit hlopulli ka ahni tok.

4. Mihma apehvt Asia ona kvt Sopeta, Belia hatak, micha Hlessalonika okla Alistakvs, micha Sikvntvs, micha Tubi hatak Kaivs, mikmvt Timohlivs aienak, a tok; mikma Asia hatak vt Tikikvs, mikmvt Tafimvs aienak a tok.

5. Yakohmi kvt tikba ilhkoli tuk osh Tloas ak o ont ashwut pi hoyo tok.

6. Mihma puska ik shatvmmo vpa nitak vt ai issachi ha yo, peni vlbihvt, Filippi asht e minti kvt, nitak tahlapi ho Tloas a il im ai vla cha, yummak o il asha na nitak untuklo tok.

7. Mihma nitak hullo achufa nitak ahpi ho, nan ithvna

vleha hut paska kobahlichcha chi hosh itahoba ma, Pal vt onnakma kanima ia chi hatuk osh, im anumpuli mvt; anumpa hash isht mahaya na, ninak iklnna ona tok.

8. Mihma aboha vba potvlhpo ai itahobvt maya ka, vla hut lawa tok,

9. Mihma hatak himita achvfa Yutikus hohchifo hosh okisushi ya ashya tuk osh nusit kwnia tok; anonti Pal mvt anumpa ha falaiachi aiena hatuk o, nusit kwnia kvt akia cha, vba potvlhpo ont atuchina ho vttvt aka ont ittula cha, illi yo okla sholit wakeli tok.

10. Mihma Pal vt pit akowa cha, ont onvtuyulvt ishi mvt, Im ilhfiopak vt a fo ka moma hoka, ik hvchi nukhlakancho kashke, achi tok.

11. Yrmohmi hatuk osh falamvt oiya mvt, paska ya kobahlichit impa cha, anumpohonli hopaki, polaka onnvt taha ho, kohchvt ia tok.

12. Mihma hatak himita yashot okchaya ho, okla isht vla mvt, na yukpa kvt chohmi tok keyu.

13. Mihma tjkba iwt peni ya il ona cha, ilap vt aka ayvt ia kak o ahni cha, yvmmak o miha tuk oka, yvmma Pal ont ai isht e fohka chi, pim ahoba hosh peni fohkvt iwt Asvs a il ona tok.

14. Atuk osh yvmmvt Asvs a pi afama ma, ishit auet e fohki cha, mintit Mitilini ya e la tok,

15. Micha yvmma ast peni fohkvt, e minti tuk vt nitak atukla ma, Kaios, i chapaka e la tuk osh, anonti onna ma, Samvs e la cha, Tochilum a ant il ashwa tok; atuk osh onna ma mintit Mailitus a e la tok.

16. Pal vt Asia a antvt nitak i kwnia ik bvnno hatuk osh, yohma hinla yobakmvt, Pentekost nitak a Cheluselem a, ont anta chi hatuk osh, tushpvt aya hokvt Efesvs a peni fokvt ont ia he ak o, ahni tok.

17. Micha Mailitus ak o vttvt, iksa i pehlichi vleha ha Efesvs a pit hoyo tok.

18. Atuk o okla im ai vla ma, Asia ya vla li nitak vmona tok ai itin taiyakla kvt, nitak moyuma ka kaniohmi hosh hvchi awant ahanta li chatuk,

19. Chukvsh akanlosi bieka, micha nishkin okchi mihinti fehna hosh, Chu vhleha hvt aiechit maya na, na palvmmi puta sai onvtulvt, Chitokaka ya im antihiya li tok.

20. Micha hvchishno nan isht hvchim ai vlpesa puta ka hvchim a luhmi li tok keyu; amba hvchim anolit ai itvna, micha chuka puta, a hvchim abahanchi li tok.

21. Chu okla, micha Klik vhleha aienka, Chihowa ile kostininchit i falama cha, hvpin Chitokaka Chisvs Klaist a i yimmi aienka, im abahanchi li fehna chatuk a, hvsh ithaiyanushke.

22. Yvmohmi hosh himak a sa chukvsh vt pit a yiminta fehna hosh, yvmma nana a si akariohma hi a pit ithana iksho hosh, Cheluselem a ia lishke.

23. Amba Shilombish Holitopa ak osh tumaha moma ka ai anolit, talakchi, micha na palvmmi puta kvt an takalishke; ahanchi kak illushke.

24. Yohmi kia nan ilvppa puta kvt achufona kia ik sa folulechoshke, micha na yukpa hosh a nitak ma, micha nan isht vta Chihowa achukma ka anoli, vbanum-
pa im abuchi la he, Chitokaka Chisvs a ai im ishi li tuk vt atahli la chi kvt, vñ ilhfiopak a a holitopa ak ai ah-noshke.

25. Yvmohmi hosh himak a, Chihowa apehlichika ya isht hvchim anumpulit hvch itin takla ma aya li chatuk a, hvsh moyuma kvt himmakma sa nashuka ya hvsh pisa chi keyu ka, ithaiyana lishke.

26. Yvmohmi hoka hatak okluyuha im issish a, vno yvt nan isht ai ahalaia li keyu kvt, ai ahli mak osh himak nitak a hvchishno a hvchim anohonli lishke.

27. Uno vt Chihowa im anukfila puyuta ka hvchim anoli ka, sa nukwaya iksho chatuk okvt.

28. Yvmohmi hoka hvchishno akinli, micha nan iakaya vhleha moma, Shilombish Holitopa yvt mihi yo apesuchi puta hvch ikbi tok a, ahah! ahnit Chihowa im iksa puta ilap im issish akinli ho isht chumpa tok a, mominchit hvsh pehlichashke.

29. Uno vt kanima atia li ha ma, nashoba okpulo nan

iakaiya vhleha hash, i nukhaklo iksho mak osh, ant hvch iba chukowa he ; ilvppa vno vt ithaiyana li hoka,

30. Micha hvchishno hvsh ai itapeha yash inli hatak ak kia nan ikhvna vhleha ya filummichit il iakaiyvcha chi kvt, nan isht okpvni ya anumpulit hiohla hi oke.

31. Yvmohmi hoka, hvsh ile nuktahla chiké ; micha afvmmi tuchina ka nishkin okchi mihinti hosh, nitak micha ninak puyuta ma, moma nan im anolit ahanta li kvt, ak isso kv-mohmi chatuk a hvsh ithaiyanvshke.

32. Inta ! il itibapishi vhleha ma ! Chihowa, micha ilap o achukma isht anumpa aieno, yummak osh ai ahlichit hvchi hiohlicha hinla, mikmv̄t hochukma toba tok vhleha moyuma ka ai itin takla ya, ai vttvt hvch ima he vlpiesa mak o, yummma ibbak a pit hvchi fohki lishke.

33. Hatak nana kia in tvli hvta kia, mikmv̄t in tvli holisso lakna yokmá, keyukmv̄t ilefohka yokmá nana kia im anush-kunna li chatuk keyushke.

34. Ahli, ibbak ilvppak osh vno, micha si apehv̄t aya puta na pi bunna ka, nan isht ahanta chatuk a, hvchishno ak kia hvsh ithaiyanvshke.

35. Yakohmit toksahanli hosh ilvsha puta ka hvsh apehv̄cha he tuk, micha Chitokaka Chisus im anumpa puta, yummak okvt, Ima kak osh na yukpa kvt habena ka, i shahli hoke, achi tok a hvsh ithaiyana chi ka mominchit hvchim anohonli li chatuk oke ; im ahanchi tok.

36. Micha yakohmichit anumpulit taiyahli mv̄t, hvchuk-bihlepvt hikia cha, moma ka pehlichit vba pit anumpuli tok.

37. Mihma momvt nishkin okchi minti fehna mv̄t, Pal ikonla ya okla onvtuyula cha i suksowa tok ;

38. Himmakma i nashuka ya okla pisa he keyu, miha tok ; anumpa yummak o isht nukhaklo im atampa ha tok. Mihmv̄t apihvt peni ya okla ona tok oke.

1. MIHMA yakohmi tok, yvmmak ash pit il oka topli cha, i mokofvt auet apissanlit mihintit, Kous a e la tuk osh, nitak atukla ma Lotis a e la; atuk osh yvmmma ashwut Patela ya e la tok.

2. Micha peni vt Finishi ya ia hosh aya ka e pisa mvt, ont e chukowa cha, e maya tok.

3. Atuk osh Saipilvs vt auet pi haiaka mvt, yvmmak ash pim vlfvbeka imma yo talaia na, ont il ia mvt, Silia ya il ona cha, Taia yak o ont il ataya tok; peni na shali ka yvmmak o ont akohcha wiha chi hatuk o.

4. Micha yvmmma nan ithvna vhleha ya ont il ai ahayuchi mvt, il ashwa na nitak untuklo tok; yvmmak osh Pal a Cheluselem ik aiyo ka hi a, Shilombish pulla hatuk mak o, im achi tok.

5. Nitak yvmmak ash ot ont pin taiyaha mvt, pishno ash ot kohchvt pi hina fohkvil ia ma, momvt tekchi vhleha, micha im vlla puta aienut pi apehvt pisht aya na, tumaha ha ant e kohcha tok; mihma oka takchvka ya hvchukbihlevt e hieli cha, vba pit il anumpuli tok.

6. Atuk osh okla it aiokpuchit pin taiyaha ma, peni pit il vlhto ma, yvmmak ash ot falamvt, in chuka ilhkoli tok.

7. Atuk o peni fohkvil, Taia ash e minti tuk vt ont pim ai vhli mvt, Talimeis a e la cha, il itibapishi vhleha ya ant il aiokpachi cha, nitak achvfa ho takla il ashwa tok.

8. Atuk osh ont onna ma, Pal a apeha pia hatuk vto kohchvt vt, Sesalia ya e la tok; micha Filip vbanumpa isht vta, yvmmak osh untuklo kash aiena hatuk ash, in chuka ont e chukowa cha apehvt e maya tok.

9. Mihma hatak yvmmvt ushetik ohoyo himita ushta hosh im ashwa tuk osh, vbanumpa isht anumpuli tok.

10. Micha yvmmma il ashna na nitak kanohmi ma, hopaii achvfa Akebus hohchifo hosh Chutia mintit vla tok.

11. Micha yvmmak ashott ayvt pim vla mvt, Pal im vskofvchi yash ishi cha, ilap ibbak micha iyi aiena ka isht takchi mvt, Hatak vskofvchi ilvppvt immi yatukma, Chu vhleha Cheluselem aiasha kvt yakohmichit takchi cha, ishit okla

nan ik ithano ibbak a a fohka hi oke ; Shilombish Holitopa yvt achishke ; ahanchi tok.

12. Mihma ilvppa okla e haklo mvt, pishno ash ot yummak inli asha yatuk pit il aienvt, Cheluselem a ik aiyo ka hi a, okla il im ahni tok.

13. Mihma Pal vt afalaminchi mvt, Katiohmi ho hvsh ahni hosh yaiyvt sa chukvsh a hvsh kobvffi cho ? Sa talakcha he ak o illa keyu ; amba Cheluselem a Chitokaka Chisvs hohchifo pulla ka, isht a si ai illa chi aiena kvt vm vlhtaha hoke, achi tok.

14. Micha hakla he keyu ma, Chitokaka nan ahni yak osh ik yvmohmí, il ahni mvt, okla il issa tok.

15. Mihmvt nitak yakohmi kvt ont taha ma, il il apoyua cha, Cheluselem a pit il ilhkoli tok.

16. Mihma nan ithvna vhleha kaniohmi kvt Sesalia ya asht pi apehvvt ia akinli tok ; micha Nesvn Saipilvs vttva nan ithvna sipokni ka yo, yummak o il ibai ashwa chi ka, okla pisht ona tok.

17. Atuk o Cheluselem ash il ai ona ma, il itibapishi vhleha yvt na yukpa hosh pi aiokpuehi tok.

18. Atuk o onna ma, Pal vt pi awant Chemis a im ona ; mihma hatak tikba vhleha yvt momvt chieya tok.

19. Mihma yummak ash aiokpuchit tahli mvt, ilap vt nana isht ahanta ho, Chihowa yvt okla nan ik ithano vhleha itin takla ya, nana ai atahanli tuk puta kash o atokowa fehna kak o anohonli tok.

20. Mihma okla haklo mvt, Chitokaka ya okla aiokpahanchi mvt ; yummak ash o, Chu vhleha na yimmi kvt tahlepa sipokni kaniohmi hosh ai asha kvt, yummak okvt moyumvt nan-vlhpisa holitobli fehna ka, ish pihisvshke, il itibapishi ma !

21. Micha chishno vt Chu vhleha hosh oklushi nan ik ithano takla asha ka, mominchit Moses a okla issa chi ka, im abvchit im vlla puta ka hakshup tvpla he tuk keyu, mikmvt ilap nana a kaniohmi vlhpisa puta aiena ka, okla iakaiya he tuk keyu ka, ish i mihiha ho, okla im annoa tok.

22. Yohmi ka nanta mak oh cho ? Ish la tuk a, okla hakla chi hokvt, okla laua yvt itvnaha pulla chi hoke.

23. Yvmohmi hoka pishno yvt nana e chi miha, ilvppak o ik chi yvmohmi ; hatak anumpa holitopa ile onochi tuk ushta hosh pim ashwushke.

24. Yummak o pehliechi cha, takla nan iba hullochit, mi-cha chishno ak osh vlhtoba hvt ibafohkv^t chi kunia pulla na, okla noshkobo shafashke ; mina momvt chishno a nana a chi haiyaklo tuk vt peh pilla hatuk ; amba chishno ak kia ai vlhpiesvt ish aya cha, nan vlhpisa ya ish holitobli ka ithaiyanashke.

25. Amba okla nan ik ithano na yimmi vhleha imma kamo, nana yvmma chohmi ka ik holitoblo ka chi, amba nana ka na holba toba pit im issa tuk puta, micha issish mikmvt nana kvt nuksitvt illi puta, micha ohoyo himita itin lumaka aienakak o, okla ik ahalaio ka he yak o, okla pim anukfilvt pit il i holissochi tok ; im achi tok.

26. Mihma Pal vt hatak ash pehlichi cha, onna ma, nan iba hullochi mvt, vba nan isht pit aiokpvchi ya achvfa ai-yuka pit im isht aiokpachi ha ya chi ho, nahullochi nitak vt ont taha ka, anola chi hosh tempel a chukowa tok.

27. Atuk o nitak untuklo kash ot ont taha ahosi ma, Chu vhleha Asia minti tuk vt, yvmmt tempel anukaka ya asha na, okla pisa mvt, okla mominchit atushpvlihinchit yummak ash ibbak isht ishi mvt ;

28. Islael hatak puta ma ! pi apelá ; hatak ilvppak osh yakni ilvppa, okla, micha nan-vlhpisa aienakak i sunalit, hatak moyuma ka kanima mominchit ai imabvchi mak oke ; micha achakalechi mvt, Klik vhleha ma pehlichit tempel a ant isht chukowa cha, aholitopaka ilvppak ash aiokpvnishke ; achit tahpanhanla ha tok.

29. Tikba ka Tafimus, Efesus hatak vt yvmma awant tv-maha anta ho, okla pisa tuk osh, yvmma Pal vt ilauint tempel a chukowa tuk a, okla im ahoba tok.

30. Mihma tvmaha hash ot momvt wakaya ma, oklat yi-hlepvt itahoba tok ; micha Pal ash okla ishit tempel a a koh-chi ma ; chekosi makinli ho okhissa puta kash ot vlhkuma tok.

31. Micha okla vbi bunna hosh maya ma, tushka chipota aya-chufa i kupertu chito ya, Cheluselem vt momvt nan ik ai vlpeso bano ka annoa kut ayvt im vla cha ;

32. Yummak ash ot ashalika tushka chipota vhleha, mihma kupertu puta ka pehlichi cha, chufut iwt im ona tok ; mihma kupertu chito, micha tushka chipota vhleha aienka okla pisa mvt, Pal a boli mvt issa tok.

33. Mihma kupertu chito ash ot iwt ituma ona cha, yummak ash ishi mvt, twli itatakul tuklo hosh ishit talakeha chi ka miha tok ; mihmvt, yummvt kuna hatuk, micha nana ho kaniohmi aienka tuk a, asilhhuchi tok.

34. Mihma okla laua asha tuk vt tahpulut, kanimi kut kanimihchit miha ma, anonti kanimi kut inluchi tok ; mihma yummak ash yahapa hatuk o, ai atokowa ma ik ai akostincho mvt, yummak ash isht holihta kullo ont fohka chi ka, miha tok.

35. Atuk o yakohmi tok, okla hak osh okpulo ka fehna o, yummak ash yahapa hatuk o, ai atokowa ma, tushka chipota vhleha yosh sholit ishtia tok.

36. Okla laua yak osh, Yumma kania isht oh ia cha, ahayvt iakaiya hatuk o,

37. Atuk o Pal ash o holihta kullo ya, ont isht chukowa chi foka ma, yummak ash ot kupertu chito yash, Chim anumpuli la hinla cho ? im achi ma, yummak ash ot, Klik anumpa ya isht anumpula hinla ho ?

38. Chishno ak osh Echip hatak chia hosh, nitak tikba kash nan isht ish ataklaiyama cha, hatak bika vbi ya tahlepa si pokni ushtat pehlichit yakni haiaka ya, pit isht ish chukowa tok keyu ? achi tok.

39. Mihma Pal vt, Uno vt Chu hatak Tasus, Silisia yakni tumaha ai vtta, tumaha ik ahobo nana ho ai vtta sia keyu hoke : mi hosh okla ha im anumpuli la hi a um ahnikbano, chim ahni lishke ; achi tok.

40. Mihma yummak ash ot vlpesa im ahni ma, Pal ash ot pit atuyvt ia ya o hikia cha, okla ha ibbak a pit i fahvumi tok ; micha luma biekut okla aiasha ma, Heblu anumpa ho im anumpulit yak ahanchi mvt,

CHAPTA XXII.

Pal vt kariohmit vbanumpa nukfoka tok vt anoli, 1. 25 Pal vt fuma he tuk kia, Lom hatak atuk osh hlakofi.

1. HATAK il itibapishi vhleha, micha an tikba puta ma! himak a isht hvchim il anumpohonli li ka, hvsh hai-yaklashke.

2. Yvmmvt Heblu anumpa ho isht im anumpuli na, okla haklo mvt, isht i shahlit lumvt aiasha tok. Mihma yummak ashott,

3. Uno vt Chu hatak fehna sia, Tasvs, Siliisia yakni in tvmaha ak o ai vutta li tok nana kia, tvmaha ilvppa Kamiliel iyi itumaka yo ahantut sa hofanti ; micha hatak tikba vhleha i nan vlpisa ai apissali mvt, um vlbahanchi tok ; mihmvt Chihowa ya pit achunanchi kvt himak a nitak hvsh moma kvt, hvchi yvmohmi kak inli chiyuhmi li tok.

4. Mihma ilvppa yakohmi ka nakni, micha ohoyo aienka, illa he mak o, takchit aboha kullo pit apittut ilbushachi li tok.

5. Yohmi ka na holitompa isht asha pehlichi, micha hatak tikba vhleha hak kia momvt um ithaiyana hoke ; micha yummak o il itibapishi vhleha pit i holisso ka, im ai ishi li hosh, yvmma asha tuk vt talakchi ya Cheluselem a isht vla likma, na palvmmi pisa chi ho, Tamaskvs a ia li tok.

6. Atuk o yakohmi tok ; nowvt aya li mvt, hvshi vt tubokoli foka ho, Tamaskvs a ona la hosi ma, ashalika nan tohwikeli chito vba minti kvt ant tommitt si afolupli tok.

7. Mihma aka ont sa tula cha, anumpa hvt, Sal, Sal, nanta katiohmi ho, is sa palvmmichi cho ? um ahanchi na, haiyaklo li tok.

8. Mihmvt afalaminchit, Kvta chia hoh cho, Chitokaka ma ? achi li ma, Uno ak osh Chisus Nasalit ai vutta mihi yo ish i palvmmichi ka sia mak oke ; um ahanchi tok.

9. Mihma si apehvt aya tuk vt tohwikeli hokvno okla pisa mvhli cha, nukshopa tok ; yohmi kia anumpa auet um anumpuli hokvno okla ik haklo ki tok.

10. Mihma, Chitokaka ma ! nanta kō katiohmi la chī ho ? achi li tok. Mihma Chitokaka yash ot, Wakaya cha, Tamaskus a ish onashke ; mikma nana ish a kaniohma he a chim vlpisa tuk vt moyuma, yummak o a chim annoa hi oke ; vm achi tok.

11. Mihma tohwikeli yummma shohpakali tuk a ak hopanayo hatuk o, si apehvt aya tuk ibbak ak osh sa halvlli ho, ayvt Tamaskus a ona li tok.

12. Mihma hatak achvfa vbanumpuli nan vlpisa ya isht ai ahli, Ananaivs osh, Chu vhleha yummma ai asha ka moma ai im annoa achukma chatuk osh,

13. Ayvt vm vla cha hikia mvt, Itibapishi li Sal ma ! ish hoponayashke, vm achi tok ; mihma hvshi kanvlli makinli ho, vba chakalit ilap a pisa li tok.

14. Mihma, Hvpin tikba vhleha in Chihowa yvt, chishno vt ilap o nan ahni ka ish ithaiyana he, mikmvt Ahli yummma ish pisa cha, yummma itakha ai anumpa ma ish hakla hi a chi atokoli tuk oke.

15. Chishno vt nana ho ish pisa tuk, micha ish haklo tuk aieno kvt, hatak moyuma ka im anoli chia ha chī mak oka.

16. Yohmi kvt nanta katiohmi ho himak a ish ahchibali cho ? wakaya cha, baptismot, Chitokaka ya pit hochihifot, nan chim ai ashvchika puta kvt kashofvt chi kvniashke ; achi tok.

17. Atuk o yakohmi tok, falamvt Cheluselem ash vla lish, tempel anukaka ya vba pit ai anumpohonli li mvt, sa holhpokuna chohmi tok.

18. Mihma yummak ash ot vno ya, Nana isht is si ai anoli ka, okla chim aiokpahancha he keyu hoka, tushpa, micha Cheluselem a chekosi ish akohchashke ; vm ahanchi na pisa li tok.

19. Micha vno ash ot, Chitokaka ma ! chishno chi yimmi vhleha hatuk a aboha kvollo pit apittvt, sinakak puta ka, a fah^{am}i li tuk a, okla ithaiyanvshke.

20. Micha Istefin atokowa chi anolit im issish hlatapa ka, vno ak kia itomasi ya hikia li tuk osh, yummvt illa chi ka, vlpesa ahni li mvt, yummva vvit maya ka, im ilefohka ya ishi li tok oke ; achi li tok.

21. Mihma, Hopaki pillä, okla nan ik ithano vhleha aia-sha kak o pit chi chuffichi la chi hoka, ish ayashke; vm achi hokvno ; achi tok.

22. Mihma anumpa ilvppa vhli kano okla i haponaklo tok ; atuk osh chitolit, Hatak yvmmma chohmi ka, yakni a ai isht ho kanchi, yvmmak okvt okchayvt anta he vlpesa keyu hoka, okla achi tok.

23. Micha okla tahpvlt i na fohka puta kash shoelit kampilvt, lukfi pushi aienä ka pehlit vba pilvt maya ma,

24. Kvpitvni chito yvt yummak ash o holihta kullo ya isht onä chi ka, apesa mvt, anonti yummak ash fummi hosh, nan i ponaklo na, kaniohmi ho okla hvt isht anumpuli kvt yohmi fehna hatukma, ilap vt akostininchä chi kvt, miha tok.

25. Mihma wak hakshup aseta chuhla ka, okla ishit tak-chi ma, Pal ash osh kvpitvni hvt bilikasi hikia tuk o, Lom hatak, micha nan vlpisa yosh ai atokowa keyu ka, ish fum-ma he chim ai vlpesa ho ? im achi tok.

26. Kvpitvni vt ilvppa haklo mvt ivt, kvpitvni chito ya ont im anolit, Nana ish kaniohmi kvt, ahah ! ish ahnashke, ilvppvt Lom hatak oka ; ahanchi tok.

27. Mihma Kvpitvni chito ash ot vla mvt, Chishno vt Lom hatak chia ho ? vm anolí, im achi ma, yvmmak ash ot, Yau, achi tok.

28. Mihma kvpitvni chito yash ot afalaminchi mvt, Ilap inli nan ahni hosh aya ilvppa, vltoba chinto ho isht ishi li tok, achi tok ; mihma Pal ash ot, Amba vno vto si ai imoma yosh vtta li tok oke, achi tok.

29. Yohmi ma yvmmma nan i ponakla he tuk ash ot mih makinli ho, ai i filamoli tok ; mihma kvpitvni chito ash kia, yvmmak okvt Lom hatak atuk a akostininchä, micha takchi tuk aienä hatuk osh nukshopa tok.

30. Ont onna ma, kaniohmi ho Chu vhleha yvt anumpa ha onochi hatukma atokowa ka akostininchä bvunna hatuk osh, isht talakchi ya i hotuffi mvt, na holitompa isht asha pehlichi vhleha, micha i nan apesa vhleha moyuma kvt itv-naha chi ka, apesa tok. Micha Pal ash isht ona cha itikba ya ont hilechi tok oke.

CHAPTA XXIII.

Pal vt isht il anumpuli, 1. 10 Pal vt atukla aboha kyllo foka tok.
23 Pal vt nahullo miko Filiks a im ia.

1. MIHMA Pal vt hochitoka vhleha ya ai okchifelit pi-hisa mvt, Hatak il itibapishi vhleha ma! im anukfila ai achukma biekvt Chihowa itikba ma ai ahanta li himak nitak fenushke ; achi tok.

2. Mihma na holitompa isht asha pehlichi Ananaivs ash ot, yummma bilika hiohmaya tuk vt itih ha lsalicha chi ka, miha tok.

3. Mihma Pal ash ot, Chihowa yvt chishno ak o chissa chi hoka, holita kyllo tohbi chia ka ; nan vlhpisa yo nan isht um ai apesa chi hosh ish asha mvt, anonti nan vlhpesa ya ai vlhpesa keyu ka, svssa hi a ish miha cho ? im achi tok.

4. Mihma a bilika hiohmaya tuk vt, Chihowa i na holitompa isht asha pehlichi a chik ahobalo ho ? achi tok.

5. Mihma Pal ash ot, Ilah itibapishi ma ! yvmmak okvt na holitompa isht asha pehlichi ya, ak akostinincho ke tuk oke. Chim okla talaia pehlichi ya ik ahobalot ish anumpuli na, achi hosh holihiso hoka, achi tok.

6. Yohmi kia kashapa kvt Satusi okla yokma, anonti kashapa kvt Falisi yo akastininch mvt, itunaha itin takla ya tahpulvt, Hatak il itibapishi vhleha ma ! uno vt Falisi sia, Falisi o ushi sia hoke ; illi falamvt tana he isht a sai yimmi hatuk mak o, nan um ai asilhhvchi hoke ; achi tok.

7. Yvmihchit anumpuli ma, itachowa anumpa kvt Falisi vhleha, micha Satusi vhleha aien aien takla ya takakanli tok ; mihma okla laua yvt ita kashapa tok.

8. Satusi iksa yokvt falamvt tana hi vt takanli keyu, mik-mvt enhil, micha shilombish aien kvt iksho, achi hoka ; amba Falisi yokvto tuklonchit yimmit anoli hoke.

9. Mihma yahapa chinto kvt takali tok ; mihma holisso-chi vhleha, Falisi apehanchi kvt wakaya cha, anumpa ha isht ai isso fehnvt, Nan ik vlhpeso nana kia hatak ilvppa kil

ai akostininchoshke; amba shilombish okmá, keyukmvt en-chil okmá nana hosh im anumpuli tok okma, Chihowa ya kiloh itibo kashke; ahanchi tok.

10. Mihma okla itachowa chinto kvt takali ma, kvpitvni chito ash ot, Pal a okla iti hvlat nipli na ahni kvt, komunta mvt, ont afout mokofit im ishit, holhta kullo ya ant foka chi ho, tvshka chipota vhleha ya i miha tok.

11. Mihma yummak atuk ninak a, Chitokaka yvt ant a hikvt, Pal ma! na chi yukpashke, Cheluselem a is si ai anohonli hatuk okvt, chiyuhmit Lom ma atokowvt ish ai anohonla chi pulla akinli hoke; achi tok.

12. Atuk o onnvvt taha ma, Chu vhleha kaniohmi kvt iti-bai achvfvrt anumpa kullo ile onochit, Pal a okla vbi ho keyukmvt ik impo, micha nana kia ik ishko ka chi kvt, mihiha tok.

13. Mihmvt pokoli ushta ka atampa hosh anumpa yakoh-mi ka ikbi tok.

14. Mihmvt na holitompa isht asha pehlichi, micha aso-nonchika puta aienka im ai vla mvt, Anumpa kullo fehna ka il il onochi kvt, Pal a ke bokmvt nana kia ke po ka chi hoke.

15. Yumohmi hoka, himik a hvchishno, micha hochitoka vhleha hvsh ai itapeha kvt, yummak atuk ak o anonti achuk-malit i shahlichit im ai asilhhvcha chi ho chohmit, kvpitvni chito ya hvsh im anoli na, onna ha ma yummma isht hvchim ayashke, yohmikma yummvt ilvppa itomasi a ik lo ho e ba chi kvt pim vlhtaha yoke; achi tok.

16. Mihma Pal in tek ushi yvt, yummma im aiechit maya ka haklo mvt, ivt holhta kullo a ont chukowa cha, Pal a im anoli tok.

17. Mihma Pal vt kvpitvni vhleha ya achvfvrt pit hoyo cha, Hatak himita ilvppa ilauet kvpitvni chito ya isht im ona, yummak oka nanasi kia im anola chi kvt in takanli hoka; achi tok.

18. Mihma yummak ash ilaeli cha, kvpitvni chito ya isht im ona mvt, Pal aboha kullo fohka yak osh pit sa hoyo na vla li ho, hatak himita ilvppvt nanasi kia chim anola hi vt

im asha hatuk o, ilauet chim vla la hinla ka, um ahni tuk oke ; achi tok.

19. Mihma kupertvi chito yvt yummak ash ibbak a halvilli cha, naksika alumaka isht im ona mvt i ponaklot, Yummak osh nanta mak o is sum anola chi kut chin takanli hatuk o ? achi tok.

20. Mihma, Yummak oka achukmalit i shahlichit im asilhhvcha chi ho chohmit, onnaha ma, Pal a ilauet ai itvna ha ya isht ish ona chi ka, chim asilhha chi kut, Chu vhleha yvt itib ai achvfa tuk oke ;

21. Yohmi kia chishno vto vlhpesa, chik im ahno kashke ; yummak okut hatak pokoli ushta ka atampa hosh, yummak im aiechi kut ai asha hosh, yummvt anumpa kullo ya isht il onochit, yummak okla ik bokmvt nana kia vpt, ishkot ik mayo ka chi, isht il apesa tuk oke ; yohmi natuk osh himak a im vltahvt, anumpa falama ka auet chim a hoyot maya hoke ; achi tok.

22. Mihma kupertvi chito yvt hatak himita yash ant ik ia, im ahni mvt, nana ilvppa puta is sum anoli tuk vt hatak na-na kia, chik im anolo kashke ; im achi tok.

23. Mihmvt yummak ash ot kupertvi tuklot hoyo mvt, Nianak hushi kanvilli isht vlpisa ont atuchinakma, Sesalia ilhkola chi ka, tushka chipota tahlepa tuklo, micha issuba o binili tushka pokoli untuklo, mikma na halupa ishi mvt tahlepa tuklo ho hush atahlashke.

24. Micha Pal a, okla o binilichit achukmalit isht ayvt, nahullo miko Filiks a isht im ona chi ka, nan vlpaoa ma, hush atahlashke, ahanchi tok,

25. Mihmvt ilvppak o yakohmichit holissochi tok.

26. Kilatius Lisius vt nahullo miko holitompa fena Filiks a pit aiokpuchishke.

27. Hatak ilvppa Chu vhleha yvt ishi tuk ; micha okla vba he tuk o ; ilvppvt Lom hatak atuk o haklo li mvt, tushka chipota pehlinchit vla lish, okchalinchi li hokvno.

28. Micha kaniohmi ho okla anumpa onochi tuk okma, akostininch ka sa bunna mvt ilaelit ilap itvnahut maya ka iba chukowa li tuk.

29. Mihmvt yvmmak okvt ilap i nan-vlhpisa yak o anumpa hvt isht im atoba hatuk o, akostininchli li tuk; yohmi kia isht ai illikmá, keyukmvt talakchikmá nana he imma hokvto ik onvtulo ke tuk oke.

30. Micha Chu vhleha yvt hatak ash im aiechi hosh maya ka vm annoa mvt, ashalika pit chin chvffichi lishke, micha anumpa onochi vhleha mvt, yvmma nana ho isht a miha hi vt im asha tuk vt, chishno chi tikba yak o a miha chi ma, aieninchit im apesa li tuk oke. Chi achukmakashke; achi tok.

31. Mihma tvshka chipota vhleha yut, yvmmak osh im vlhpisa tuk okvt, Pal a ilaelit ninak o isht ayvt Antipetis a isht vla tok.

32. Ont onna ma yvmma apihvt ia chi ka, issuba o binili tvshka ya ashachi cha, falamvt holihta kullo ya okla ona tok.

33. Yvmmak ashott Sesalia ya ai vla cha, holisso hash nahullo miko ya ant ima mvt, Pal ma aieninchit ibbak fohki tok.

34. Mihma nahullo miko vt holisso hash pisvt issa mvt, ulhti nana ho vttvt aya hatuk a i ponaklo tok; Silisia ak atuk o akostininchli mvt,

35. Anumpa chi onochi vhleha ak kia ai vla hok mak o, chi haklo lashke; achi mvt Helot i nan ai vlhpisa chuka yak o, yvmmvt a fo ka chi ka, apesa tok oke.

CHAPTA XXIV.

Tatvlos vt Pal a anumpa onochi, 1. 10. Pal vt isht il anumpuli.

24. Pal vt nahullo miko tekchi ita tuklo ka Klaist isht im anumpuli.

1. **YVMMAK** atuk a nitak tahlapit taha ma, na holitompa isht asha pehlichi Ananaivs vt asononchika vhleqa, micha hatak anumponli achvfa Tatvlos hohchifo ho itapehvvt vla na, yvmmak osh Pal a nahullo miko a nan isht im anoli tok.

2. Yummak ash pit hoyo na vla ma, Tatvus vt anumpa onochit ishtivt, Filiks holitompa fehna ma! chishno ak atuk mak o nukchinto fehnvt il ahashwa chatuk, micha chishno vt nan chimponna pulla ho, nan isht im ai ahli achukma fehna kvt okla ilvppa ai i yvmohmi chatuk oke.

3. Nitak moma, micha kanima a mominchit yukpa fehna hosh, il aiokpanchi chatok oke.

4. Himmakma achakalechit ak chin takobecho ka chi na-na kia, nuktanla chia hv̄t, anumpa tilofasi ish pi haiyaklok-bano, chim ai ahni lishke.

5. Hatak ilvpput, Chu vhleha yakni paknaka aiasha ka mominchit ai itin takla ma, nan isht ataklaiyamvt nan itachowa ma atohnochit aya mvt, Nasalin iksa ya in tikba hika yo e pisa hatuk oka.

6. Tempel ma aieninchit yummvt ik akobalo bvnna ho, ilvppa il ishi kvt pishno pi nan vlhpisa yo, nan isht il im apesa chin tok.

7. Yohmi tuk kia kvpitvni chito Lisius vt ayvt ant pi kohcha cha, kullo fehnvt yummak ash pibbak a a kohchit eshi cha,

8. Yvmma anumpa ai ikbichi vhleha yvt ayvt chishno a chim vla chi ka apehisa tuk; yummak oka chishno inlit im ai asilhhvchi hosh, anumpa isht il ai ikbichi hatuk puta ilvppa ish akostinincha chi hatuk oke, ahanchi tok.

9. Mihma Chu vhleha hak kia pit ataklammvt nana kash yummvt yohmi tok oka, ahanchi tok.

10. Mihma anumpula chi ka, nahullo miko vt pit im abuchi ma, Pal ash ot, Okla ilvppa nan im apesvt ish ahanta afvmmi kanohmi ka, chim akostininchi li hatuk osh, na yupa fehna hosh isht ile anumpohonli lishke.

11. Uba pit aiokpvchi la chi hosh, Cheluselem ia li chash, nitak auah tuklo ka atampa keyu ka, ish ithaiyana hinla kama.

12. Yohmi ka tempel anukaka ya hatak nana kia ai itachowvt ahanta li, micha sinakak puta, micha tvmaha aiena ka okla ha ai ilhkolichit ahanta li, okla sa pisa tuk keyu.

13. Mikmvt nana ka anumpa ma himonasi a okla isht a sai onochi tuk vt atokola he keyu hoke.

14. Amba ilvppak o chim il anohonli li, vno nana puyuta nan vlhpisa holisso, micha hopaii vhleha i holisso aien, a holihiso tok moma ka, yimmit iksa inla yo okla achi hatuk oka, an tikba vhleha in Chihowa ya yakohmit aiokpahanchi li mvlhishke.

15. Micha, ahli mikmvt ik ai ahlo, moma illi yvt tana hi a, yvmmma ilap ak kia yohmi, okla ahni akinli hoka, vno vt Chihowa ya pit anukchieto lishke.

16. Yohmi hatuk o Chihowa, mikmvt hatak puta aien itikba ya chukvsh mvt yoshoba iiksho bilia hosh ahanta la chi kvt achunanchi li chatuk oke.

17. Yvmmak a tok a afvmmi kanohmit taha ma, na holhpila vm okla ha isht im aya li mvt, vba pit isht aiokpvchi puta aien ka isht vla li tok.

18. Mih ho yvmmak o Chu kaniohmi Asia minti kvt okla laua yokmá, keyukmvt a yahapa itin takla yokmá nana keyu, tempel anukaka yo, nahullochit vm. vlhtahvt anta li ka, sa pisa tok.

19. Yvmmak osh chi tikba ma, ant maya tuk osh nana kia isht sa mihacha hi vt im asha tukmvt acha he tuk.

20. Yvmmak keyukmvt ilvppa maya kak inli kia vno vt nan ai apesa itikba hikia li ka, nan ik vlhpeso nama kia vm ai akostininchi tukmvt, ik mihá.

21. Amba yvmmma itin takla hikia li mvt, illi tani yak o isht tahpahanli li tuk, anumpa achufa ilvppa illa tok o, himak nitak a hvchishno vt hvs svm asilhhvchishke; achi tok.

22. Mihma Filiks vt ilvppa puta haklot, na yakohmi puta kash achukma fena ai akostininchi mvt, Kvpitvni chito Lisius ak osh vla hokmak o nana hvchim a kaniohmi ya okluha hvchim akostininchi lashke; achi mvt, im acha-kalechi tok.

23. Micha kvpitvni hv Pal a apesvcha chi, yohmi kia foahacha he, mikmvt it ithvna ka vhleha yvt, nana ant isht im

vtta, keyukmvt im ai itanowut maya ka, ik im olabo ka hi a, im apesa tok.

24. Yvmmak atuk a i himak nitak kanohmi ho, Filiks vt tekchi Chu ohoyo Tusila ya ilaelit vla mvt, Pal a pit hoyo cha, Klaist a i yimmi imma ka im a haponaklot chieya tok.

25. Yohmi na yvmmak ash ot, ai ahli, mikmvt ile nuktalanli, micha nan-vlhpisa hi vt mihinti aienka isht anumpohonli ma, Filiks vt wvniinchu mvt, Himak okvno ish iashke, nitak vt vm vlhpiesa hok mak osh pit chi hoyo la hi oke ; achi tok.

26. Micha Pal vt vli holisso kia ima na, i hotofa hinla ka im ahoba tok ; yohmi hatuk osh chekosikma pit hoyo cha, itim anumpohonli beka tok.

27. Yohmi tuk kia yvmmak atuk a, afvmmi tuklo taha ma, Pashis Festvs vt Filiks vlhtobut hikia tok ; mihma Filiks vt Chu vhleha ya yukpali bvnna kvt, Pal vt talakchi na, issvt ia tok.

C H A P T A XXV.

Chu okla hvt Festvs itikba hielit, Pal a anumpa onochi.

1. YOHMI tuk o Festvs vt ulhti ha vla tuk a, nitak tuchina ont ia ma, Sesalia ya vttvt ivt Cheluselem a ona tok.

2. Mihma na holitompa isht asha pehlichi, micha Chu vhleha i hochitoka aienka kvt, yvmmma Pal a ai isht im anoli cha, nan im asilhha tok.

3. Micha im aiokpanchi cha, yvmmak ash Cheluselem a vla chi ka, pit hoyo na, takla im aiechit vba chi kvt, im asilhha tok.

4. Yohmi kia Pal vt Sesalia yak inli ho anta pulla he, micha ilapo akinli mvt chekosikma, yvmmma ia chi kvt, Festvs vt miha tok.

5. Yohmi hoka hatak vlhpisa hvchi takla maya kvt si apihvt ik ia cha, nan ik achukmo kvt a takanli hatukma hatak ilvppa ont ik atokoli ; achi tok.

6. Micha yummak ash takla ahanta na, nitak pokoli ka ont atampa ma, ivt Sesalia ya ona tok. Atuk osh ont onna ma, nan apesa aiasha ya om binili mvt, Pal a isht vla hi a, miha tok.

7. Atuk o yummak ash ot vla ma, Chu vhleha Cheluselem mintit vla tuk vt, afoluplit hiohmayvt anumpa laua, micha okpulo fehna ho, ai ikbichit Pal a onochi mvt, yummak ash ai atokolit ahlichia he keyu ki tok.

8. Mihma ilapo inlit isht il anumpulit ahanta mvt, Chu okla i nan vlhpisa, micha tempel, mikmvt Sesa yak okma nana kia, nana ka isht ai i yoshoba li iksho kumohmishke, achi tok.

9. Yohmi kia Festvs vt Chu vhleha ya yukpali bvnna kvt, Pal a afalaminchi mvt, Cheluselem a ish ona cha, satikba hikivt ilvppak atuk puta kvt nan isht chim vlhpisa hinla cho ? achi tok.

10. Mihma Pal ash ot, Nana um ai vlhpisa he ai vlhpesa mak o, Sesa vt ai asht nan apesa yo hikia lishke ; Chu okla hoka nana ik achukmo nana kia, ai i yvmohmi li iksho ka, chishno vt ish ithaiyana fehnvshke.

11. Uno vt anumpa kobvffi sia hokma, keyukmvt isht ai illa he vlhpiesa kaniohmi ho a si yvmohmi tuk okmvt, ik svollo ka hi a ak ahnoshke, Amba ilvppa puta kvt takali ho anumpa ma yakohmi kvt a sai onochi keyu hokmuno, hatak nana kia sasht ibbak ma ik fohko kashke, Sesa ya achakvlit pit im anoli li mak oke, achi tok.

12. Mihma Festvs vt nan itibai apesa vhleha ya itim anumpulit issa mvt, afalaminchit, Sesa yak o ish im anoli mak o ? Sesa yak o ish im iashke, achi tok.

13. Atuk o nitak kanohmit taha ma, mijko Ekilipa, micha Banisi ita tuklo kvt, Festvs a aiokpvchit aya hosh Sesalia ya itvlachi tok.

14. Micha yummak ash ant ashwa na nitak kanohmi ma, Festvs vt Pal nana im a kaniohmi ya, mijko im anolit, Hatak achvfa kvt talakchi na, Filiks vt issvt ia tok a ashvshke.

15. Mihi yo Cheluselem ont anta li ma, na holitompa

isht asha pehlich*i* vhleha, micha Chu in tikba vhleha aien*a*
kvt nan im apesakbano, ahnit vm anoli tok.

16. Mihma afalaminchit, Anumpa onvtula tuk vt anumpa
onochi ya nashuka bika ita sanali keyu, micha nana isht
a kaniohmi nan ash onvtula tuk vt, mihma isht il anumpula
he mvt, ik im vlhpeso kisha ka Lom okla hvt hatak nana
kia illi issa, im ai vlhpesa chatuk keyu hoke ; im achi li tuk.

17. Yohmi hatuk o ilvppa okla ai vla ma, ahchiba iksho
ont onna ma, nan apesa ai o binili ya o binili lish hatak ash
isht kohchvt vla ch*j* ka, apesa li tok.

18. Mihma anumpa onochi vhleha yut wakayut hieli mvt,
yakohma ch*j* ka ahni li tuk amo, achvfali kia isht ik onocho
ki tok.

19. Amba ilapo vba pit anumpuli isht a tobvt maya, mik-
mvt Chis*vs* illi tok, yummak o Pal ak osh yummvt okchaya
kak pulla, miha kak o ; yummak o anumpa isht onochi tok.

20. Mihma anumpa yamma chohmi ka, nan ai anukfilli ak
ithano hatuk osh, Cheluselem ak o ona cha, yummak o
ilvppa puta kash ot nan isht im ai vlhpisa hinlakma, nana ka
i ponaklo li kvno.

21. Yohmi kia Pal vt anumpa ha Akvst*vs* vt atoshowa
ka, hakla he pulla ho ahni ma, apesanchi tuk o Sesa ya pit
in chvffichi la he vt miha li tuk oke ; ahanchi tok.

22. Mihma Ekilipa ash ot Fest*vs* a, Uno ak kia hatak yum-
ma i haponaklo la hinla, im achi ma ; Onna ha mak o, ish i
haponaklashke ; achi tok.

23. Atuk o ont onna ma, Ekilipa, micha Banisi aien*a*
shema chinto fehna hosh itvlachi cha, kvpitvni hochitoka
vhleha, micha hatak holitompa vhleha tvmah*a* asha tuk a,
ai itapeha cha ai asht na haklo ya pit abeha ma, Fest*vs* im
anumpa ho Pal a isht kohchit vla tok.

24. Mihma Fest*vs* ash ot, Ekilipa miko, micha hatak pi
apehv*t* ilvppa hvsh maya kvt momvt hatak ilvppa, Chu okla
laua yvt moyumvt, yummak okvt himmakma okchayut ahanta
na ahchiba he vlhpesa keyushke, ahanchit Cheluselem, mi-
cha ilvppak inli aien*a* ka, ai vm vla beka tuk mak o, hvsh
pijisvshke.

25. Yohmi kia nana ho isht ai illa he vlpesa ka ymoh-mi tuk keyu ; micha ilapo akinli mvt anumpa ha achakalin-chit Akvstvs a im anoli mak atuk o, akostininchli li mvt, pit chuffichi ka um-anukfihinla tuk okano.

26. Mih hosh nana ho ymmma ai isht, a shahli ha pit i holissochi li fehna hi vt ik svm iksho : yohmi hatuk osh nana im asilhhvchi yak osh asht issa ha yokmvno, nanasi ka holissochi la he vt vm asha hinla kak osh kohchit hvchi tikba, micha chishno ak o fehna kak o chi tikbi ya ant hilechi lishke, miko Ekilipa ma !

27. Anumpa mvt isht ai onvtula ka atokowa ma anoli ka aieninchi ho keyu kvt, aboha kullo foka ya pit chufficha he vlpisa keyu ka, um ahoba hokvt ; ahanchi tok oke.

CHAPTA XXVI.

Pal vt Ekilipa a itikba hikivt kaniohmit aya chatuk puta kvt anoli, 1.
12 Pal vt vbanumpuli toba tok vt anoli.

1. MIHMA Ekilipa ashott, Chishno isht ish il anumpula chi kvt, chim vlpesushke, Pal a im achi tok. Mihma Pal ash ot ibbak a pit fahvmmi mvt, isht il anumpohonli tok.

2. Chu vhleha yvt anumpa isht a sai onochi tok imma puta ka mominchit himak nitak a, chi tikba hikivt isht il anumpohonli la chi kvt, na yukpvt um anukfihinlvshke, miko Ekilipa ma !

3. Chu okla i nan vlpisa puta, micha anumpa ai isht itachowa puta aiena ka, chishno vt chimponna pulla hatuk mak o; yohmi hoka achukmalit a haponaklokbano, chim ai ahnilishke.

4. Ulla sa tomba tok takla, yvmmvt ummona ka vno um okla talaia ai itin takla Cheluselem ak a tok oka, nana a kaniohmit mihinti li puta ka, Chu vhleha yvt momvt ithanvshke.

5. Ummona kash inli ho, svthanvt isht auehinchli tok, yummak osh vbanumpa isht pim iksa apissali kvt moma i shahli, Falisi yosh ahanta li tok a, anola hinla chishke.

6. Micha Chihowa yvt hvpin tikba vhleha ya anumpa ima tok a, a yimmi hatuk pulla hosh himonasi a hikiet nan um vlhpisa mak oke.

7. Anumpa tok yvmmak o pisa ka, aiahni hosh pim okla auah tuklo kvt nitak, ninak puyuta ka Chihowa ya pit aiok-pahanchi na bilia hoke. Na pit ai ahni yvmmak pulla ho, Chu vhleha yvt anumpa isht a sai onochi hoke, Ekilipa miko ma !

8. Chihowa yvt illi puta ka tanicha hi a, katiohmi ho ayimma he keyu nana ho hvchim ahoba cho ?

9. Uno vt Chisus Nasalet vtta hohchifo ha i sanalit nana ka lauachit a si yvmohma he tuk oka, ahnit il anukfilli li mvhli tok.

10. Mihmvt na yvmmak ash Cheluselem a ai yvmihinchi li akinli tok ; micha na holitompa isht asha pehlichi vhleha yvt um apesa hatuk o, vbanumpuli lauachit aboha kyllo pit apihinta li tok ; micha okla vba chi ka vno vt vlhpesa, ahanchi li tok.

11. Micha sinakak puta ka ai ilbvshahanchi li mvt, Chihowa pit ik ahobalot anumpula hi a, atushpalihinchi li tok ; micha yohmi ka i nukkilli li fehna hatuk osh issikkopali kvt, yakni inla tvmaha puta kak kia isht aya li tok.

12. Yvmmak o na holitompa isht asha pehlichi vhleha yvt atokowa, anumpa kyllo ai ahli achukma ka vma na, ieshi hosh Tamaskus a ia hosh aya li tuk o,

13. Ont tvbokolik fehna, hina takla ya, tohwikeli vba minti kvt shohmalali kvt hvshi a imaiya hosh, tommitt vno, micha si apehvt nowvt aya tuk aieno kash a folupli na, pi-hisa li tok oke, miko ma !

14. Mihma momvt aka ont pi kaha ma, anumpa hvt um anumpuli kvt, Heblu anumpa yo Sal, Sal ma ! nanta katiohmi ho is svlbvshali cho ? Na halupa puta ho pit ish hvhli kvt chi palvmmi hoke ; ahanchi na haiyaklo li tok.

15. Micha, Kuta chia hoh cho. Chitokaka ma ! achi li tok. Mihma, Uno akosh Chisus ish issikkopali a sia hoke.

16. Yohmi kia chishno a vbanumpa isht vtta, mikmvt nana ish pisa tuk ilvppa, micha nana chim ottvninchi likma,

yvmmma puta ka ish anohonla he aienka, chikbi la chi, apissali ilvppa pulla hosh chi haiaka li hatuk oka; wakayet chiyi a isht ish hikiashke.

17. Okla ha, micha oklushi nan ik ithano vhleha aienka akohchit chi hlakofichi li hatuk okvt.

18. Yvmmak oka i holhponayo ha fatummi, anonti ai okhlilika ya a filvmmichit tohwikelika ya isht onvt, micha Setvn apehlichi a akohchit Chihowa ya isht ish im ohona na, nan ai ashvchika puta isht a akashofa ka, micha vno a yim-mika pulla hosh isht kashofa tok puta ka, iba takla ai ahanta aienka ma, ahayucha chi mako himak a pit chi chvffihinchilishke; achi tok.

19. Yohmi ma vba mintit haiaka kash ik im antiot ahanta li tok keyushke, miko Ekilipa ma !

20. Amba ile kostininchicha filemvt, Chihowa ya okla im ona cha, ile kostininchicha yvt a yohmi ai vlpiesa ho yvmmohmit aiasha hi a, vmmona ka, Tamaskvs, mikmv Cheluselem, micha Chutia yakni afullota moma aiasha ka mominchit im anoli li mv, anonti oklushi nan ik ithano vhleha ma im anohonli li tok oke.

21. Yakohmi puta pulla hatuk mak o, tempel anukaka ya anta li ho, Chu vhleha yvt sashi cha, subi bvnvt maya tok.

22, 23. Chihowa yvt si apelahanchi hatuk mak o, hopaii vhleha, micha Moses aienka kvt nan a kaniohma he, Klaist vt illvsha he, micha yvmmak osh illi tani ka tikba he, micha okla hash, mikmv okla nan ik ithano vhleha aienka tohwekeli ka i haiavcha he a, ahanchi tok a, yvmmma nan isht inla yo miha keyu hosh asvno, micha chipunta aienka im anohonli kvt, himak nitak a sa moma hoke, ahanchi tok.

24. Yakohmihchit isht il anumpohonli ma, Festvs vt chitolit anumpulit, Pal, chi tasimboshke; holisso chimponna fehna kak osh isht chi tasimbo hoke; achi tok.

25. Mihma, Sa tasimbo ho keyushke; amba anumpa ai ahli, anumpa kostini yo anumpohonli li hoke, Festvs holtompa fehna ma !

26. Miko vt ilvppa puta ka ithaiyana ho, itikba ma hikiut

nukwaya ikshot anumpuli li akinlishke. Nana ilvppak okvt chukbika yo a ymohmi tok keyu hoka. A yakohmi puta kvt achufona kia in luma keyu ka, vno vt akostininchli li hoka.

27. Miko Ekilipa ma! hopaii vhleha im anumpa ha chi yimmi cho? Chi yimmi ka ithana lishke, achi tok.

28. Mihma Ekilipa ash ot Pal a, Ubanumpuli toba la hi a is si anukfokichi naha fehnvshke; im achi tok.

29. Mihma Pal vt, Chishno ak o bano keyu, amba himak nitak a sa haklo kvt moyumvt naha fehna cha, anonti fehra, vno ak o chiyuhmi hosh, amba talakchi yakohmi kano keyu hosh, hvsh aiasha hi a, Chihowa ya pit im asilhha li hoke; achi tok.

30. Yakmihchit anumpulit issa ma, miko vt, nahullo miko, micha Banisi, mikmvt apehvt chieya tuk aieno kvt wakaya tok.

31. Micha naksika onvt taha mvt, Hatak ilvpput isht ai illa he, micha isht a talakcha he ai vlhpesa nana ka, nana ho a kaniohmi kvt ikshoshke; achit itim anumpuli tok.

32. Mihma Ekilipa vt, Hatak ilvpput i holhtufa hinla tuk, Sesa ak o achakalit im anola chintuk keyu hatukmvt; Festus a im achi tok oke.

C H A P T A X X V I I .

Pal vt peni fohkvt Lom pila ia hosh aya, 1. 14 Mahli kvollo vt peni a onvtula. 39 Yakni a ont ahayuchi cha okla hlakofi.

1. **MICHA** peni fohkvt Itili ya il ona hi a ai vlhpisut taha ma, Pal, micha aboha kvollo fohka inla kaniohmi aieno ka, tvshka chipota Akvstvs ai itapeha i kypitvni, Chulius hohchifo ho ibbak fohki tok.

2. Mihma Hlessalonika tvmaha Masetonia hatak, Alistakvs vt piba fo ka hatuk o, Asia ya pit lapalika okla e maya chi mak osh pim anukfila hosh Atlemitivm peni yo pit il vlbeha mvt il ilhkoli tok.

3. Atuk osh ont onna ma, Saitvn a ont il ataya tok; mihi-

ma Chulius vt Pal a i kana fehnvt isht aya mvt, i kanomi vleha aiasha ka ona cha, impa hinla chohmi ka, im apesa tok.

4. Atuk o yummak asht il ilhkoli mvt, mahli hak osh ai isso hatuk o Saipilus a nutaka il aya tok.

5. Micha Silisia, mikmvt Pa~~f~~ilia aieno okhvta ha pit il a hlopulli mvt, Lishi yakni, Maila tumaha ha e la tok.

6. Mih ho yummak o Aleksantia peni yvt Itili ya ia hosh aya na, kypitvni hvt pisa cha, yummak o pishno ash pit pi apitta tok.

7. Mihma svlahvt il itvnowa na nitak kanohmi hosh, Naitus a ont kil i chapo kisha chiyuhmi ho, mahli hak osh pi a sanali hatuk o Salmoni i chapa ka Klit ak o nunta asht il aya tok.

8. Micha yummak ash ont kil aiyo chohmi hosh, peni ai ataya achukma hohchifo ho e la tok; yummak o bili~~k~~ka yo Lesi tumaha hvt talaia ha tok.

9. Atuk o ahchievt taha, micha nahullochi hvt ai issachi ha ya tuk o, himak okak heno peni isht aya ka ai achukma he keyu hatuk o, Pal ash ot nan i miha tok.

10. Mihmvt, Hatak puta ma! himak okhvta aya ka nana kvt ai okpulo kvt kvnijia fehna chishke, vlpoyak, micha peni aieno kak bano keyu; amba hvpim ilhfopak vt aieno chi ka akostininch lishke; im ahanchi tok.

11. Yohmi kia kypitvni hash ot, peni vt immi hatuk, micha isht aya pehlichi aieno kak o i yimmi kvt, Pal vt nana anumpuli tuk a, im i shahli tok.

12. Micha peni ai ataya yokvt hvshtula ya aiasha achukma keyu hatuk o, yummak asht achakvlit iwt kaniohmi kia yohma hinlakmvt, Finisi yummak okvt Klit peni im ai ataya yosh falvmmi im okvtula imma pit bachayakmvt, anonti oka mahli im okvtula imma ma pit hikia ho, ona cha hvshtula ya yummak o okla asha hi a, miha kak osh laua kvt i shahli tok.

13. Atuk o oka mahli hvt lomvt mahli ma, okla nan ahni tuk vt im vlpesa, im ahoba mvt, hotofi cha, Klit pit a bilikasit peni isht aya tok.

14. Yohmi tuk kia yummak atuk a hopaki keyu ho, mahli kullo fehna tobvt, Yulaklitv hohchifo hosh ai isso tok.

15. Mihma peni vt atapvchit kvnia cha, mahli ha a sana-lit ia he keyu ma, ant shalit isht ik ayá, il ahni tok.

16. Mihma shalit ishtia ma, yakni tashaiyi achufa Kilati hohchifo ho nutaka ona ma, penushi yak osh palvmmi ho isht e mihinti tok.

17. Yvmmak ash o okla hvlat ishi mvt, apelvchi kvt peni chito ash afohlit takchi mvt; anonti ik yohmokma, okchvnak ont ai issa hinla ka, nukshopa kvt na htva ha ai akvchi na shalit isht aya tok.

18. Atuk o mahli kullo ka e takakanlit aya fehna hatuk o, ont onna ma, peni a okla shohhvachli tok.

19. Atuk osh nitak ont atuchina ma, pishno pibbak akinli ho peni isht talakchi ya ishit kocha pit e kampila tok.

20. Micha nitak kanohmi ka, hvshi, mikmvt fochik nana kia ik haiako ma, anonti mahli kullo mvt atampa fehna hosh pi onvtuyula ma, pi okchaya he pit ahomba kash ot, momvt pi kvnia tok oke.

21. Yohmi kia okla ik impo ho hopakit taha ma, Pal vt wakayvt itin takla hikia cha, Holitopa vhleha ma! vno ak o hvs sa haponaklo tukmvt, Kilati a hvchik a hotofo ke tuk osh, nan okpulo, micha nan kvnia aien a ilvppa hvchik peso ka he tuk oke.

22. Yohmi kia hatak hvsh achvfon a kia im ilhfipak vt a kvnia chi keyu, amba peni ak illa chi hoka, hvchi yukpa hi a hvchi miha lishke.

23. Himak ninak a Chihowa yummak o immi sia hosh, mihi yo im atihiya li yatuk mak o, im enchil vt sa tuma ya hikivt,

24. Pal vt ik chi nukshopo kashke. Sesa itikba ya ish ona chi pulla hoke; mikmvt Chihowa yvt ai itapehvt peni isht hvsh aya ka, yvmma mominchit chima hoke; ahanchi tuk oka.

25. Yvmoohmi hoka holitopa vhleha yvt na hvchi yuk-

pashke; nana um annoa tuk fena kvt ont ulhpiesa chi ka, Chihowa i sai yimmi hoka.

26. Yohmi kia yakni tashaiyi kaniohmi ho, ont iloh o hlatapa chi hoke; achi tok.

27. Yumohmi tuk o ninak vt ont isht auah ushta mak o Atelia okhuta ha e fullokahanchi na, ninuk iklunna foka ma, peni isht aya vhleha hash ot yakni nana mak o pit bilika ona ho, im ahoba tok.

28. Micha oka ya apesa mvt, ashatupa pokoli tuklo ho akostininchu tok; atuk osh achakovlit vt mishema ona mvt, anonti apesa ma, ashatupa auah tahlapi na pisa tok.

*29. Mihmvt tvli hochito ka ont ai issa hinla kvt, okla nukshopa kvt, yakni yichifi ya ushtat peni hasimbish a pit ai okuchi mvt, onnakbano ahnit aiasha tok.

30. Mihma peni chito isht aya vhleha yash ot peni chito ya a kohcha wihut yihlepa chin cha, penushi yash okhuta ha pit oka talali mvt, yakni isht yichifi ya peni chito itikba ya pit ai oka kapulla hi a ahoba ma,

31. Pal vt, kvipitvni, micha tvshka chipota vhleha aienakash, Yakohmi kak osh peni chito anukaka ya maya ho keyukma, hvchi okchaya he keyushke; im achi tok.

32. Mihma tvshka chipota vhleha yvt peni ushi isht-talakchi ya chanlit hokofi na akia tok.

33. Atuk o onnvt mihinti ma, Pal ash ot, momvt impa hinla ka, im ahni mvt, Nahullochit hvsh ahashwa cha, nana kia hvchik impo mak o himak vt nitak ont isht auah-ushtvshke.

34. Yohmi hoka nanasi hvsh impa hinla ka hvchim ahni lishke. Ilvppak o hvsh ai okchaya chi mak okvt; hvsh achufona kia chi noshkobo ha pashi vt ai akia chi keyu mak oke; achi tok.

35. Yakohmihhit anumpulit tahli mvt, pvska ya eshi cha, moma itikba ya Chihowa pit ai aokpachi tok; micha tushtuli mvt, imvt ishtia tok.

36. Yohmi ma momvt yukpa chukma mvt, yummak ash kia okla impa tok.

37. Micha peni il əlhto kvt e moma kvt hatak tahlepa tuklo cha pokoli untuklo akucha hannali il aieno tok.

38. Micha impa kvt okla ont im vlpesa mvt, onush a okla okhvta pit oka hlahlit peni a shohhalali tok.

39. Atuk o onnvut taha ma, yakni ya okla ik ithano ki tok; yohmi kia okhvta filvmminchy yvt vhli hvt auet asha ho, okla pit pisa mvt, yohma hinla yobakma, yummma peni ya ont fohka chi kvt okla im anukfila tok.

40. Micha isht yichifi ya okla kohchit aiowa mvt, okhvta ha okla im ile kaiyanchit peni isht afana isht talakchi a hotofi cha, nan tohbi shvpha wishakechi fehna takali ya mahli ha pit a asanalichit vba takalichi mvt, oka vhli pillaka, okla ia tok.

41. Micha okhvta tuklo ai itafama ya pit vlhto cha, peni ash yakni ont on talali tok; mihma ibbisimma kuto a kvllot kvnia cha ilhkola he keyu hosh talaya ma, amba hasimbish pila hamo oka banvtha kvlo fena kvt okpunit kanchi tok.

42. Mihma tvshka chipota vhleha hash ot aboha kvlo vlpita yatuk a vba hinla, yummak keyukma, kanima mvt okshonullit kohcha cha, hlakofa hinla ka, anumpulit maya tok.

43. Yohmi kia kvpitvni hvt Pal a okchalinchi bvnna hatuk osh, okla nan ahni tuk a im olvbbi tok; mihmvt kanima hosh okyohla hinla kak osh tikba okhvta ha pit oka kahvt kocha ona chi ka,

44. Mikma inla kanimi kvt iti bvsya yo o binohli ma, kanimi mvt peni pahlahli yak o o binohla chi ho, miha tok. Mih hosh yakohmi tok; momvt nana kaniohmi iksho hosh yakni ya, okla onvt hlakofi tok oke.

CHAPTA XXVIII.

Pal, micha apehvvt aya tuk aieno kash okla nan ik ithano vhleha hvt i kana fehna, 1. 8 Pal vt yakni tashaiyi abeka aiasha tuk a lau ho hlakofichi. 16 Pal vt Lom a vla mvt, Chu okla ha vbi isht im anumpuli.

1. MICHА okla hlakofi mvt yakni tashaiyi vt Milita hohchifo hatuk o akostininchи tok.

2. Mihma okla nan ik ithano vhleha yvt pi kana kvt peh chohmi tok keyu; mihma uhumba hatuk, micha kapussa aiena hatuk oka, okla luak oti cha, mominchit pehlichit pishi tok.

3. Mihma Pal vt iti chipunta laua itahobit, sholit luak a ant itoyashachi ma, sinti okpulo fena yvt luak lvshpa ka vttvt kohchvt, ibbak a apakfoa tok.

4. Mihma sinti okpulo fehna yvt ibbak a a takanli na, oklushi nan ik ithano vhleha yash ot pisa mvt, Ik kariohmi kia hatak ilvppvt hatak bika vbi pulla tuk osh, okhvta hokvno i hlakofi tuk nana kia, na palvmmi ak okvto okchayvt ik antá, ahni keyu hoke; ilap bika itim achit maya tok.

5. Mihma sinti yash fahlit luak pit itvchi mvt, nan ik kanihmo ki tok.

6. Yohmi kia shatalikmá, keyukmvt ashalika illit aka itulakmá nana chi kak o, im ahobvt maya tok; yohmi tuk kia okla pisa na hopaki ho, nan ik i kanihmo ho pisa mvt, inlvchit im anukfila mvt, yummak ash nan isht-ahullo hoka, achi tok.

7. Yakni yummak oka yakni tashaiyi ya apehlichi Publivs hohchifo ho, im osapa yosh talohmaya tok. Atuk osh yvmmvt pi kana achukmvt pehlichit pishi na, nitak tuchina il ashwa tok.

8. Atuk o yakohmi tok, Publivs iki vt yvnha, micha issish ikfia aieno ho isht abeka hosh ittoyula tok; atuk o Pal vt yummak ash ont iba chukowa cha, vba pit anumpulit ibbak a isht umbitepa mvt, hlakofichi tok.

9. Ilvpput a yakohmi ma inlaka ak kia, yakni tashaiyi yummima abeka maya tuk vt ai vlt hlakehofi tok.

10. Micha yummak okvt nan isht a holitopa laua ka isht pi holitobi tok; micha kocha il ilhkoli ma, nana kia isht aya he vlpesa puta ka okla pi shaliichi tok.

11. Mihma hvshi tuchina kvt taha ma, Aleksantia peni yosh yvmmvt yakni tashaiyi yak o hvshula ya takanli tok; micha hohchifo mvt Kasta, mikmvt Palvks aieno hosh lapali ho, pit vltot il ilhkoli tok.

12. Micha Sailekus a ont il ataya cha, yvamma il ashwa na nitak tuchina tok.

13. Yvamma asht e minti mvt apakfomput mihintit Lichi-
um a e la tok; atuk o ont onna ma, oka mahlit mahli ma,
mintit nitak ont atukla ma, Putioli, ya e la tok.

14. Yvmmak o il itibapishi vhleha ya ant il ahayuchi ma;
takla e maya na nitak untukla chi ka pim ahni tok; yohmi
ma Lom pila imma pit il ilhkoli tok.

15. Mihma yvamma asht il ilhkoli ka, il itibapishi vhleha yvt
pi haklo mvt, Api Folvm, mikmvt Ai-impa chuka tuchina heli
ka ai vhli kak o, ant a pi afamvt itvnowa tok, Pal vt yvmma
pisa mvt, Chihowa ya, yakoke, pit im ahni mvt, ayiminta tok.

16. Atuk o Lom a okla il ai vla ma, kvpitvni hvt aboha
kvlo vlhpita yatuk a nan apesvchi i kvpitvni ha ont ibbak
fohki tok; amba Pal ano ik yohmi im ahni na, ilap bano
hosh isht aya tuk tushka chipota ya awant anta tok.

17. Atuk o yakohmi tok, nitak tuchina ont taha ma, Pal
vt Chu hochitoka vhleha ha hoyot itahobi tok; micha
itahoba ma, Hatak il itibapishi vhleha ma! vno vt okla ho-
ka, micha pin tikba nana a kaniohmi a puta kia nana im ai
isht a kaniohmi li kvt iksho nana kia, Cheluselem a vttvt
talakchi yosh Lom okla ha ibbak fohka li hokvno.

18. Atuk o yummak ashott okla achukmalit vm asilhhu-
chit taiyahli mvt, isht ai illa he vlhpesa mvt, si a takali keyu
hatuk oka okla a hotofa he tuk.

19. Yohmi kia Chu vhleha yvt yvamma a sanalit anumpuli
ma, vno vt ik kaniohmi kia, Sesa ya im anoli la hi vt, vm
anukfila ha tok; vm okla talaia ka nana ho isht ai atokoli
la hi vt vm asha ha tok o keyushke.

20. Yvmoohmi hatuk osh ilvppa a yakohmi pulla kak o
hvchi pisvt isht hvchitim anumpuli la chi hosh hvchi hoyo
li tuk oke; Israel nan pit ai ahni a tok pulla mak o, tvli ita-
takvli ilvppvt isht sa talaiyakchi hokvt; im ahanchi tok.

21. Mihma, Chishno a chi nanumachi holisso kvt Chutia
ya minti kvt ik pim vlo; yohmikma il itibapishi vhleha ak
kia ai vla kvt kanima mvt, nana ik achukmo nana kia chi
anolit anumpuli chatuk keyushke.

22. Yohmi kia chishno nana isht chim anukfila kano haklo ka il ahnishke; amba iksa ilvppak okvno na mihachi kvt kanima mominchi hoka, il ikhaiyanushke; okla im achi tok.

23. Micha nitak okla pit im apesa tuk o, laua kvt ai vtta ya okla ant iba chukowa tok; mihma yummak osh Chihowa apehlichika ya atokolit im anolit, Moses i nan-vlhpisa, mi-cha hopaii vhleha i holisso puta ka akohchit, Chesus a isht ai anukfohkichit ahanta na onnahinli tuk vt opia tok oke.

24. Yohmi ma nana kvt anumpa tuk puta ka kanimi kvt yimmi ma, anonti kanimi mvt ik yimmo ki tok.

25. Micha okla ik ai it achvfo mvt, Pal vt anumpa achvfa anumpulit, Shilombish Holitopa yvt hopaii Esaias a, ahli hosh ai isht anumpulit hvpin tikba vhleha ya,

26. Oh ia cha, okla ilvppa haklo hokvno hvsh haklo kia hrchik akostinincho ka hi oke; mikmvt pisa hokvno hvsh pisa kia, yakohmi hvchik ai ahno ka hi oke; hvsh in ahan-chashke.

27. Yummak keyukmvt nishkin a ishit pisa cha, anonti haksobish ma, ishit haklokmvt, anonti chukvsh a akostinin-chi cha inlv im anukfila na, hlakofichi la hinla ka, okla ilvppa chukvsh vt nusilhha fehnvt taha ma, anonti haksobish mvt haponaklo kvt in takobi ma, anonti nishkin a okla okhishta hoka; im ahanchi tok.

28. Yumohmi hoka, Chihowa yvt isht ai okchalinchi ya okla inla puta kak o ima ka, yummak okvto haponakla chi hoke, hvsh ithaiyanashke; achi ma, tisheli tok.

29. Yummvt anumpa ilvppa ahanchit ont issa ma, Chu vhleha yvt tisheli cha, ilapo bika yak o itim anumpuli fehna hosh maya tok.

30. Yumohmi ma Pal vt, ilap chuka puta tuk vt ahanta na, afvmmi tuklo vlhpiesa hlopulli tok; yohmi mvt kvna hosh i nowvt ayvt vla ka aiokpahanchi banot,

31. Chihowa apehlichika ya isht anumpulit, hatak nana hosh im alummi iksho ho, nana kvt Chitokaka Chesus Klaist a pit ai ahalaia putakma nukwaya iiksho hosh im abahanchi beka tok oke.

HOLISSO PAL UT CHUCH LOM

A HIKIA HO I HOLISSOCHI TOK.

CHAPTA I.

*V*banumpa yimmi Lom aisha ka Pal vt pit aiokprehi, 1; 16 *V*banumpa h̄t nana, micha nan v̄lhpiesa nana h̄q isht otaiyani; 18 na-nashvchi moma ka Chihowa yvt i nukkilli; 21 nan ik ithano oklanan im ai ashvchika yvt nana hatuk okma anoli.

1. PAL, Chisus Klaist in tishu, apostel toba kvt, Chihowa im vbanumpa isht vtta hi osh v̄lhtoka tok vt,
2. Yumma tikba pilla kash o Chihowa h̄t Holisso Holitopa yak o i hopaii vhleha h̄q isht ai anohonli kvt,
3. Ilap Ushi Chisus Klaist h̄vpin Chitokaka, yummvt haknip imma hokvno Lewi isht atiaka yo isht atoba kak atok;
4. Micha shilombish holitopa hokvno illi tuk osh falamvt tani kak osh Chihowa Ushi nan im ai əqli fehna kvt isht otaiyani ai oklyha tok:
5. Yummak atuk pulla mak o isht ai i kana, micha vbanumpa isht-ai vtta v̄lhtoka aienka il ai eshi ka, oklushi moyuma kvt vbanumpa h̄q im antia na ilap hohchifo h̄vt isht a holitopa hi atok:
6. Yummak o ibai achufut Chisus Klaist a im a hvchi v̄lhtohoka tok:
7. Lom aisha moyuma Chihowa i holitopa, vbanumpuli tohomba tok moyuma ka Piki Chihowa, micha Chitokaka Chisus Klaist ita tuklo nan isht i kana, micha nan isht it i nanaiya ita tuklo kvt hvchi anukfoyukashke.
8. Ummona ka Chisus Klaist ak atuk mak o hvsh moyuma ka hvch ithaiyanvt, na hvchi yimmi hoka annohqwut

yakni moyuma ka a hlopulli kak օ, an Chihowa յա yak oke, pit im ai ahni li hoke.

9. Yohmi ka yvmmak oka ilap Ushi im vbanumpa hak օ ai isht sa shilombish oka isht in toksahanli li kvt, anumpa ilbvsha anumpuli li puta kvt pit hvch ithaiyana bieka hosh, isht hvchi anumpohonli li kvt ak isso kamohmi hoka, Chihowa yak osh nan atokowa si anoli yoke.

10. Himak գ yohma he yoba tuk օ nitak vt ik hopako kia achukma biekvt այտ, Chihowa yak osh ai ahni pulla na hvchim ona la he ak osh asihjla lishke.

11. Yohmi ka hvchi pisa sa bunna fehna kvt, shilombish isht im achukma he yak օ hvchi հոպելա լի, nana ka isht hvchi hlampka hi atok.

12. Ilvpput nana ka hvch ibai yukpa li hokbano, na yimmi բիկա pia hatuk oka, achi li hoke.

13. Yohmi ka itibapishi li vhleha ma ! hvch im ona la hi okvt himonna վմ anukfihinla kvt, nan-վնi kaniohmi ka hvch itintakla յա ai ishi li kvt, Chentail inla vhleha հա ai ihishi li tok գ chiyuhmi ak inlikbano ahni li tuk kia, si ataklama na himak գ hvch ik ithano ka he ai ahni li keyu hoke.

14. Klik, micha Bulbaha vhleha, nan ithana, nan ik ithano aieno ka vbanumpa հա isht im anumpohonli la he վմ վլհ- pisa hoke.

15. Yohmi hoka, vno yokvto Lom hvsh ai asha kak kia, vbanumpa isht hvchim anumpohonli la chi kvt վմ վլհ- taha hoke.

16. Yohmi ka Klaist im vbanumpa հա ի sa hofahya he keyu hoke : yohmi ka yummak okvt Chihowa nan im ai ահli pulla hatuk ak օ kvna hosh yimmi puta hokvto isht ai okchaya hoke ; vmmona ka Chu hak osh ai yvmo hօ, anonti Klik vt ai yvmo hօ ak inlishke.

17. Yohmi ka yvmmak օ na yimmi ak atuk pulla kak օ Chihowa ի nan isht okchalinchi yvt na yimmi vhleha հա im otaiyani hoke ; holihiso kvt, Ai-վլհ-piesa yokvto na yimmi pulla kak osh isht okchaya hi oke, achi hoka.

18. Yohmi ka Chihowa vba yakni binili nan isht ի nukkilli yvt hatak vt Chihowa ik holitoblo, micha nan ai վլհ- piesa

keyu yvmohmi puta kvt anumpa ai ăhli ka ataklummi kak o onvtuyula hosh otaiyani hoka.

19. Yohmi ka Chihowa imma ka isht ithvna hinla ka ilap inli kvt isht otaiyani hoka, Chihowa yak osh i haiakvchi hatuk oka.

20. Yohmi ka yakni, micha nan okluha vba ai asha kvt toba tok takla ka nana nishkin isht pisa he keyu Chihowa immi puta ka akostininch fehna kvt nan okluha tohomba tok a Chihowa nan okluha im ai ăhli, micha okchayvt bilia yoka isht akostininch hatuk osh nan isht a miha hi vt ik im ikshoshke.

21. Yohmi ka Chihowa yoka ithana ha yokvt, Chihowa chohmichit ik holitoblo kish, yak oke ik im ai ahno, amba im anukfila kvt nan isht ik ahobo tobvt, chukvsh anukfila iksho yut okhlilit kvnia tok.

22. Yvmmvt hopoyuksa ilahobi hosh ik hopoyukso toba tok.

23. Micha Chihowa illa he keyu isht a holitopa ya kan-chit na holbvt toba hatak illa he, micha hushi, micha nam-poa iyi ushta, micha nana balali puta aienka holbvt toba ho holitobli tok.

24. Yvmohmi hatuk ak o Chihowa hokvt ilap inli chukvsh okpulo nan ai ahni puta kak atuk mak o na liteha ya a yvmohmit, ilap haknip puta kash inli isht ik iti hofahyali, im ai ahni tok ak inlishke:

25. Yohmi ka yvmmvt Chihowa i nan ai ăhli yoka holabi yo isht ai ikbi cha, natoba yak o aiokpvchit, in toksahanli kvt Nan ikbi ya i shahlichi tok: yvmmak okvto holitoput bilia yoke. Amen.

26. Ilvppak atuk pulla kak o Chihowa hvt ant ik yvmoh-mi ai ahni ho, hauisht ile hofahyali ilaiyuka ka ai yvmoh-mi tok. Yohmi kvt ohoyo hak kia nana ka ai yvmohma he atuk ash o ai inlvchit, ohoyo hvt ai yvmohma he atuk keyu ka yvmohmi tok.

27. Mihma nakni yak kia ohoyo hak o ai yvmohma he atuk vt issa cha, it i hauisht anukfilli kvt luhuwa fehna mvt, nakni vt nakni bika ka isht a hofahya yak o it i yvmihinch

hosh, ilap nan ai ashvchika isht vlhtoba ai vlhpiesa mak o ilap ash inli hosh ihishi tok.

28. Micha Chihowa hoka ithaiyana ka ik bvnno hatuk oka, Chihowa hvt ant ik yvmohmi ai ahni ho, im anukfila okpulo yoka nan isht ai ahni hosh, nan isht a hofahya he puta ka yvmihinchi tok.

29. Yohmi hosh nan ai vlhpiesa keyu, itin lumaka, nan okpulo anukfilli, nan anushkunna, inla chukvsh hotopali bunna, nan it i potvnno, hatak bika vbi, itachowa, it i hak-sichi, nan isht i nukkilli, inla lumvt na mihachi aiena ka isht ai alotowvt kwnia hatuk osh.

30. Inla ya ashakachit na mihachi puta, Chihowa i nuk-killi vhleha, na hofahyalit isht anumpuli, ilefehnvchi, ilauata, nan isht ik achukmo puta ihikbi, iki, ishki ita tuklo ik im antio,

31. Nan im anukfila iksho, nan it im vlhpisa kobvffit shahli, im vlla i hullo ik im iksho, it i hopohla himma keyu, it i nukhaklo ik im iksho :

32. Yvmmak okvt Chihowa i nan vlhpisa yvt, kwna hosh nana yvmmma chiyuhmi ka yvmihinchi hokvt isht ai illa he vlhpiesa achi ka ithana kia; yvmmma yvmihinchi kak bano keyu, amba kwna hosh yvmihinchik mak o isht im ai achuk-ma hoke.

CHAPTA II.

Kwna hosh nanashvchi hokvto nana ho isht apehpoacha hi vt ik im iksho, 1 : 6 mikmvvt Chu yokmá, keyukmvvt Chentail okmá, nana hatuk oh kia Chihowa i nan vlhpisa ha im a hlakofa he keyu.

1. **YUMOHMI** ka kcna chia hoh kia inla anumpa ish onochikmvvt, nan isht ile mihacha hi vt ik chim ikshoshke, hatak chia ma ! kwna chia hosh inla anumpa ish onochi hok-mvt, nana yvmmak ash inli ho ish ai yvmohmi chatuk okvt; nana ho inla ya ish onochi kut, chishno yash inli hosh anumpa ish il onochi hoke.

2. Yohmi kia ilvppa chiyuhmi yvmihchi puta hokvno

Chihowa yokut ai əhli mak ə nan vlpisa ya onochi hoka il ithaiynvshke.

3. Yohmi ka hatak chia ma! nana yumma yvmihinchi puta ka anumpa ish onochi mvt, yvmmak ash inli ho ish yvmihinchi kvt, Chihowa i nan vlpisa ya ish ai i hlakofa hinla, chim ahoba cho?

4. Micha Chihowa isht chi kana ya isht ish ile kostinincha he atuk vt chik ithaiyano hosh, isht chi kana fehnvt, chim ile salalit, na palvmmi chi onocha hi osh ile halanli aienka ish shitelama cho?

5. Amba chi chukvsh kullo nan ai ashvchika isht nuk-haklo keyu yak ə ish iakaiya hosh, Chihowa yokut nan ai vlpiesa apesa ka otaiyana he, micha ai ilbvsha nitak vt otaiyanikma, a chilbusha hi vt ish il im itvnahanhishke.

6. Yvmmak okvto hatak puta kvt ilap nana kaniohmi tok ak ə isht ai im atobba hi oke.

7. Yohmi kvt kuna hosh nuktaiyalvt achunanchit nan achukma yrmohmi kvt, isht a holitopa, micha isht annoa achukma, micha isht ai illa he keyu hohoyo hokvno isht ai okchaya bilia he im apesa hi oke.

8. Amba kuna hosh Chihowa ya i sanali, micha anumpa ai əhli ik holitoblo hosh, amba nan ai vlpiesa keyu a yvmoohmi yokvno, isht i nukkilli chinto kvt onvtuyula hi oke,

9. Micha hatak nan ik achukmo yvvhichi puta hokvno isht ai ilbvsha, micha isht anukhvmmi aienka hosh onvtuyula kvt; Chu ak ə tikba onvtuyula cha, Chentail ak kia onvtuyula hi oke:

10. Amba isht a holitopa, micha isht annoa achukma, micha isht it i nanaiya aienka hosh hatak nana achukma yvvhichi puta hokvno onvtuyula he; yohmi kvt Chu ak ə tikba onvtuyula cha, Chentail ak kia onvtuyula hi oke;

11. Yohmi ka Chihowa hokvto hatak puta ka it i shahshohliche kvt ik im iksho hoke.

12. Yohmi ka laua kaniohmi hosh vba nan vlpisa yvt ik im iksho hosh nan ashahanchi hokvto, vba nan vlpisa iksho ho ai okpulo kvt kuna mak inla he; mikma laua kaniohmi hosh vba nan vlpisa yvt in tonla hosh nan ashahan-

chi hatuk mvt, vba nan vlhpisa yak o nan isht ai im vlhpisa hi oke :

13. Yohmi ka vba nan vlhpisa ya haklo vhleha hak osh Chihowa itikba ya isht ai vlhpiesa ho keyu, amba vba nan vlhpisa ya yvmihinchi vhleha hak osh ai vlhpiesa hoke.

14. Yohmi ka Chentail vba nan vlhpisa ik im iksho vhleha hvt ilap nan anukfilli hosh nana a kaniohma he vba nan vlhpisa ya foka tuk a yvmihchi hokmvt, yvmmvt vba nan vlhpisa yvt ik im iksho ak inli kia, ilap ash inli hosh isht im il i nan vlhpisa yoke.

15. Yvmmak osh vba nan vlhpisa yvt nan i miha ka otuninchi kvt i chukvsh oka ai o holihiso ho, ilap nan isht il akostininchi yak kia nan atokowa ka ibai anohonli, mikma im anukfila puta kvt i himmak ano ilap ash inli hosh anumpa isht il onochi, isht il achukmali, kanimampo ka it im anohonli hoke.

16. Yohmi kvt Chihowa hokvt vm vbanumpa ak atuk pulla kak o Chisvs Klaist oka ishit hatak im anukfila luma puta tuk a nan im apesa he nitak yvmmak fehna ka yvmohma hi oke.

17. Yakeh! Chu chi hohchifo kvt, vba nan vlhpisa ya ish anukchieto hosh Chihowa ya isht ish ilauata ;

18. Micha vba nan vlhpisa ya isht a chim vlbuchi hatuk osh, nan ai ahni ka ish ithana, micha nan achukma i shahli ka ish holitobli hoke ;

19. Micha nishkin tamoa ya in tikba hika, ai okhlilika anukkaka aiasha ka im pula sia hoke, ai ahnit ish ile yimmi hokvt ;

20. Micha im anukfila iksho kostininchi, vlla chipinta nan im abuchi, nan ithana, micha nan ai ahli vba nan vlhpisa foka ka ai isht ithvna ish jshi hoke.

21. Yvmohmi ka chishno yvt inla nan ithvnanchi chia hokvt, chishno inli kvno chik il ithvnanco cho ? Hatak vt hukopa he keyu ho otvninchit ish anumpohonli hokak osh, chishno yvt ish hukopa cho ?

22. Hatak vt itin lumaka he keyu, ish ahaya hokak osh, ish itin lumaka cho ? Na holbut toba ya i yuwalut ish shi-

tilema hokak osh, Chihowa ya nana ish ima hi atuk vt ish ishi cho ?

23. Uba nan vlhpisa isht ish ilauata ho kak osh, vba nan vlhpisa yash kobvffit Chihowa ya isht chik holitoblo cho ?

24. Yohmi ka, Yohma hi o holihiso hatok oka, Chihowa hohchifo hvt Chentail vhleha ha ai i kullakshi kvt huchishno yak atuk pulla kak oke.

25. Yohmi ka vba nan vlhpisa yak o ish holitoblik mvno, hakshup tupa yvt isht ai achukma ai ahli ; amba vba nan vlhpisa ya, ish kobvffi yokmvno chi hakshup tupa yvt hakshup ik tapo hoke.

26. Yvmohmi ka hakshup ik tapo yvt vba nan vlhpisa yvt isht ai vlhpiesa kak o holitobli hokmvt, hakshup ik tapo yash ot hakshup tupa yo chohma hinla keyu ?

27. Micha hakshup ik in tapo yoh mak osh vba nan vlhpisa ya holitobli hokmvt, chishno yokvt holisso hvt chin tonla, micha chi hakshup tupa kia vba nan vlhpisa ya ish kobahafi ka, nan chim apesa hinla keyu ?

28. Yohmi ka paknali yokvto Chu keyu, micha nipi ai otvni kvto hakshup tupa keyu hoke.

29. Amba im anukfia anukaka yokvto Chu oke ; mikma hakshup tupa yvto chukvsh anukaka yak oke ; yummak oka hatak okvt ahninchi keyu, amba Chihowa yak oke.

CHAPTA III.

Chu okla nan isht im achukma kvt i shahli, 1. 9 Vba nan vlhpisa yvt nanashvchi Chu a isht im atokowa ; 20 hatak nana hosh vba nan vlhpisa ya isht ai vlhpiesa he keyu : moma kvt na yimmi ho isht ai vlhpiesa ; yohmi kia vba nan vlhpisa yvt akshot kvnia keyu.

1. YOHMI ka Chu hvt nanta isht i shahli ho ishi ho ? micha hakshup tupa ya nanta hak o isht im ai achukma ho ?

2. Ai okluha bieka ; vmmona ka Chihowa im anumpa hvt ibbak a foyuka hatok oka.

3. Yohmi ka kaniohmi kvt ik yimmo hatuk okma, nanta

katiohmi cho ? yummvt ik yimmo kak osh Chihowa yut nan
isht ai ahli yoka ik ai ahlecho ho ?

4. Ik ymohmo pullashke ; ahli, Chihowa hokvto ai
ahlikma, amba hatak moma kvto holabi ashke ; yohma hi o
holihiso hatok oka, Ish ai anumpohonli puta kvt ish ai ahla
hi atok, micha nana chim vlhpisakmv, ish imaiyacha hi
atok.

5. Yohmi ka nan ai vlhpiesa keyu e ymohmi kak osh
Chihowa hvt nan ai vlhpiesa ymohmi ka otvninchi hokmv-
no, nanta hak o il acha hinla ho ? Chihowa hvt na palvmmi
ka onochi kvt ik ai vlhpieso ho ? Hatak vt anumpuli chatuk
mak o anumpuli lishke.

6. Ik ymohmo pullashke ; yohmi hokmvno, Chihowa
hvt okla moyuma ka katiohmit nan im apesa hinla ho ?

7. Yohmi ka Chihowa nan isht ai ahli yekvt vno ak osh
holabi li kak o isht i shahlit otvni na ilap vt isht a helitopa
hokak o, nanta katiohmi ho nan ashuchi yo chiyuhmit nan
vm vlhpisa hinla ak inli ho ?

8. Amba nan ik ahlo isht a pi annoh^owa kv, nan ik
achukmo kak o e ymohmi na nana kvt isht ai achukmash-
ke, il achi ho kaniohmi hokak heto kullochit anohonli hatuk
a, nanta katiohmi ho ke ymohmo cho ? yummak ash nan
vlhpisa hvt onvtuyula he vt ai vlhpiesa hoke.

9. Yakohmi ka katiohmi ho ? isht a pim achukma kv
yvmma il i shahli ho ? Keyu kamohmi hoke ; yohmi ka
Chu, micha Chentail vhleha moyuma hokv ai ashvchika nu-
ta ai asha ka tikba kash il otvninchi tuk oke :

10. Yohma hi o holihiso hatok oka, ai vlhpiesa yvt iksho,
achvfa kia iksho hoke :

11. Achvfona kia nana ka akostininch kv iksho ; achvfa
kia Chihowa ya hohoyo kv iksho hoke.

12. Moyuma kvt naksika yo itvnoh^owa, moyuma kvt ita-
pihv isht ai achukma hi vt iksho ; achvfa kia nana achuk-
ma yumiichi kvt iksho ; achvfa kia iksho hoke.

13. Ishit nvlli yvt hatak a hollopi tiwa yoke ; isunlvsh a
isht haksihinchi ; asps nan isht vbi yvt itivlbi anukaka ya
foka hoke :

14. Inla ya nan okpulo im ai ahnit anumpuli, micha anumpa na hotopali aienā kvt itih ha lotowa hoke.
15. Iyi yvt issish a hlatahampla chi kvt pulki hoke.
16. Isht ai okpulo, micha isht ai ilbusha aienā kvt i hina ya foyuka hoke :
17. Isht it i nanaiya hina ya ik ithano chatuk oke.
18. Chihowa isht i nuksopa yvt nishkin itikba ya ik im iksho hoke.
19. Yohmi ka nana ho vba nan vlhpisa yvt achi kvt, kvna hosh vba nan vlhpisa i nuta ai asha kak o im achi ka il ithana ; yohmi na itih puta kvt vlhkuma hi atok ; micha okla moyuma kvt Chihowa itikba ya nan vlhpisa yvt ai onvtula hi atok.
20. Yumohmi hoka nan isht ai vttā vba nan vlhpisa yvt ai ahni kak o hatak nana kia itikba ya ai vlhpiesa he keyu hoke ; yohmi ka vba nan vlhpisa yak o ai ashvchika ya isht ithvna yoka.
21. Amba himonasi kano nan ai vlhpiesa kvt vba nan vlhpisa holitobli kak o keyu, Chihowa hvt atahli tok a otaiyani kvt, vba nan vlhpisa, micha hopaii vhleha hvt nan atokowa anohonli tok ak atok :
22. Yummvt Chihowa i nan ai vlhpiesa Chisus Klaist i yimmi kak o a minti mak osh moyuma ka im annohowa, micha yimmi moyuma, kvt anukfoyuka ; it im inla kvt iksho hoka :
23. Yohmi ka moyuma kvt nan ashvchi hatuk, micha Chihowa hvt ai ahnincha hi a ik ono hatuk oka :
24. Chisus Klaist vt isht vlhtoba ya atobbi tok pilla mak o, Chihowa isht i kana ya pilla isht ai im vlhpiesa hatuk oke :
25. Yummak oka im issish a anukchieto hokmak o, Chihowa hvt haiakuchi tok ; yohmi hosh Chihowa hvt na palummi onocha hi osh ile halanlit, tikba nan ai ashahanchi tok a i kashof kvt, nan isht ai vlhpiesa otvnincha hi osh ymohmi tok :
26. Yohmi hosh himonasi ya nan isht ai vlhpiesa ya otvnincha chi hosh ymohmi kvt, Chisus ak o i yimmi hokuno

nan ai ashvchika ya ai vlhpiesachi kvt, ilap vt ai vlhpiesa hi atok.

27. Yohmi ka nan isht ilauata yvt katimak o? Iksho kamohmishke. Nan vlhpisa nanta hak o isht ai akshu ho? nan isht vtta nan vlhpisa hak o? Keyu, amba na yimmi nan vlhpisa kak oke.

28. Yumohmi hoka hatak vt vba nan vlhpisa ya holitobli tok ak o keyu, amba na yimmi pulla kak osh isht ai vlhpiesa il ai ahnishke.

29. Chihowa hvt Chu ak illa in Chihowa ho? yummvt Chentail ak kia in Chihowa ak inli keyu ho? Ahli, Chentail ak kia in Chihowa hoke;

30. Yohmi ka hakshup tpa yvt i yimmi hatuk pulla mak o, micha hakshup ik tapo yvt yimmi hatuk pulla mak o ai vlhpiesacha hi vt Chihowa achufa illa hoka.

31. Yohmi ka na yimmi yatuk pulla kak o vba nan vlhpisa ya il akshochi ho? Ik yumohmo pullashke: amba vba nan vlhpisa yak o il ai ahliche hoke.

CHAPTER IV

Eblaham vt na yimmi hosh ai vlhpesa isht hohchifo, 1 : 18 na yimmi moma hokvno Eblaham vt iki; 26 na hvpim a yimmi ka yak kia ai vlhpiesa isht pi hohchifa chi.

1. YOHMI ka pik Eblaham vt haknip imma hokvno nanta hak o ahayuchi tok o, il acha hinla ho?

2. Yohmi ka Eblaham vt vba nan vlhpisa ya isht ahanta kak osh isht ai vlhpiesa hokmut, nan isht ilauata ishi; yohmi kia Chihowa itikba hokvno yumohmi keyu ki tok.

3. Yohmi ka Holisso Holitopa yvt nanta hak o achi ho? Eblaham vt Chihowa ya i yimmi kak osh nan isht ai vlhpiesa yvt immi toba tok.

4. Yohmi ka na toksahanli ka isht im vlhtoba kvt isht i kana yo keyu, amba aheka yoke.

5. Amba toksahanli yak keyu, amba nan ashvchi ya ai

vlhpiesachi yak զ i yimmi hokvto, ilap na yimmi ak osh nan isht ai vlhpiesa yvt immi toba hoke.

6. Yvmmma chiyuhmi ka hatak vt toksahanli keyu kia, nan isht ai vlhpiesa ya Chihowa hvt ima na nan isht ilai-yukpa ka Lewi ak kia isht anumpuli kvt,

7. Kvna hosh nan ik ai vlhpieso yvt i kashofa, micha ai ashvchika yvt im ompoholmo hokvto, na yukpushke.

8. Chitokaka yvt ai ashvchika ik im iksho yo chohmichi hokvno hatak yummvt na yukpushke, achi tok.

9. Yohmi ka nan isht ilaiyukpa ilvppvt hakshup tupa ak illa ho immi ho ? keyukmvrt hakshup ik tapo yak kia aieno ho ? Yohmi ka na yimmi yak osh Eblaham a nan isht ai vlhpiesa immi toba tok, il achi hoke.

10. Yohmi ka katiohmit immi toba tok զ ? hakshup tupa hayak atok զ ? keyukmvrt hakshup ik tapo kisha kak atok զ ? Hakshup tupa hayak atok keyu, amba hakshup ik tapo kisha kak atok.

11. Yohmi ka hakshup tupa yak osh nan isht atokowa, micha nan isht ai vlhpiesa isht ai ղli mak զ hakshup ik tapo kash inli hosh iши tok; yohmi kvt hakshup ik tapo kia, yimmi hokvno moyuma ka iki ya hi atok; yohmi ho yummak kia nan isht ai vlhpiesa yvt immi ak inla hi atok :

12. Yohmi kvt hakshup tupa iki, micha hakshup tupa kak illa keyu, amba pi ki Eblaham vt hakshup ik tapo kisha ak inli kash osh yimmi a nohowa tok ak զ iakaiya yummak okvno iki ya hi atok.

13. Yohmi ka Eblaham, micha isht atiaka yvt yakni moyuma kvt immi ha hi զ im issa kvt, vba nan vlhpisa ya holitobli tok ak atok keyu, amba na yimmi nan isht ai vlhpiesa kak atok.

14. Yohmi ka vba nan vlhpisa yvmmma anukchieto yak osh immi ha he yokma, na yimmi vt akshu toba, micha nan im issa tok a ai ahla he keyu hoke.

15. Yohmi ka vba nan vlhpisa yvto nân isht a palvmmi yoka; yohmi ka nan vlhpisa iksho hokvno, nan vlhpisa kobvffi iksho hoka.

16. Yvmohmi hoka isht i kana yak a hi atuk pulla kak o, na yimmi isht ai vlpiesa kak oke: yohmi ho yummak ash isht atiaka moyuma ka nan im issa tok ash im ai ahla hitok: isht atiaka vba nan vlpisa in tonla kash illa keyu, amba isht atiaka Eblaham e moyuma ka piki vt yimmi tok ak o chiyuhmi aienakak o im ai ahla hitok.

17. Yohmi ka, Oklushi lawa ka iki yo chikbi li tok; achi kvt holihiso hatok ak o yohmi hoke; Chihowa i yimmi tok yummak osh illi ya tanihinchi, micha nana kvt ik yvmohmo kisha kia, yohmi tuk ash inli ho chohmichit isht anumpohonli yummak o itikba ai yvmohmi hoke.

18. Yvmmvt yohma he ik ahobo fehna kia, yohmi pulla chi ahnit, oklushi lawa ka iki toba hi atuk vt yimmi tok; yohma hi o anuhumpa hatuk oka, Isht chi ai unchululi hvt yvmohma hi oke.

19. Yohmi kvt yimmi kvt ik kullo keyu hokvt, sipokni kvt afummi tahlepa achufa foka kia, ilap haknip vt himonasi kuno illi, micha Sela im oshvto yvt illi, ai ahni tok keyu.

20. Chihowa hvt nan im issa tok ash ik yimmot anuktuklo keyu; amba yimmi kvt kullo hatuk osh Chihowa ha holitohombli tok:

21. Micha nan im ihisa hatuk vt ai ahlicha he bano aienakak nukfoyska fehna tok.

22. Micha yvmohmi kak o nan isht ai vlpiesa yvt immi toba tok.

23. Yohmi ka yvmmvt immi toba tok a, holihiso kak osh ilap ak atuk illa hak hitok keyu:

24. Amba pishno ak kia pi holihiso ak inli tok; pin Chitokaka Chisus okvt illi tuk a falaminchit tanichi tok a il i yimmi hokmv, pishno ak kia pimmi toba hi atok oka,

25. Yvmmak ash ot pim ai ashuchika yak atuk pullamak o illa chi hosh im vlpiesa tuk osh, isht pi ai vlpiesa he mak o anonti falamvt tani tok.

C H A P T A . V.

Na yimmi ho isht a pi vlhpiesa hokmak osh nan isht i kana Chihowa il ibai ishi, 1; 8 in twnvp pia hatuk kia Chisvs im issish pulla ho il itin nanaiya tok; 10 il itin nanaiya hokvt hvpi okchaya chi pulla; 12 nanashvchi, micha nan illi itatuklo kvt Alvm ak o minti tok; yohmi hoka nan ai vlhpiesa micha nan okchaya itatuklo kvt Chisvs Klaist ako a minti hoke.

1. YUMOHMI ka na yimmi pulla yak o isht a pi ai vlhpiesa hatuk osh, pin Chitokaka Chisvs Klaist ak atuk pulla mak o Chihowa ya il it i nanaiya hoke.

2. Yvmmak atuk pulla mak o isht i kana il a hieli ilvppa na yimmi pulla kak osh e chukowa cha, Chihowa isht a holitopa ya il isha he ahnit, pi yuhukpvshke.

3. Micha yummak illa keyu, amba na palvmmi puta ak atuk mak o pi yuhukpa ak inlishke; na palvmmi yak osh nuktaiyalvt achunanchi ikbi hoka, il ithana hoke :

4. Mikmyt nuktaiyalvt achunanchi yak osh Chihowa immi ai a atokowa isht ai il ithana ikbi hoke; micha Chihowa immi ai atokowa isht ai il ithana yak osh ai okchaya pisa he ahni ikbi hoke :

5. Micha ai okchaya pisa he ahni yvt hofahyali keyu; Shilombish Holitopa yvt pi anukfoka hatuk osh Chihowa isht i hullo ya lauachit pi chukvsh anukaka ya pit fohobli hoka.

6. Yohmi ka hlampko ik pim iksho moma kak o ont ai vlhpiesa ma, Chisvs vt Chihowa ik holitoblo ya vlhtobvt illi tok.

7. Yohmi ka hatak vlhpesa yak ok mak o kanima kvt vlhtobvt illa he keyu chiyuhmi; amba hatak achukma yokvno kaniohmi kvt vlhtobvt illi kvt ik nukwiyo ka hinla chishke.

8. Amba Chihowa hokvto isht pi hullo otvninchi kvt, nan ashvchi pia moma kash o, Chisvs Klaist vt pi vlhtobvt illi kak a tok.

9. Yohmi ka himonasi hokvno im issish ak o isht a pi

vlhpiesa hokvt, yummak atuk pulla kak ő isht i shahli fehnvt na palvmmi mihinti ka il i hlakofa hinla hoke.

10. Yohmi ka in tvnv̄p pia moma kash ot, Ushi yvt illi tok pulla kak ő Chihowa ya isht a il it i nanaiya hatuk okmvt, il it i nanaiya ha yokvt, ilap okchaya pulla kak ő isht i shahli fehnvt isht a pi okchaya hinla hoke.

11. Micha yummak illa keyu, amba pin Chitokaka Chisvs Klaist ak atuk pulla kak ő Chihowa ya isht a pi yuhukpa fehna cha, yummak atuk pulla kak ő himonasi kvno isht il it i kana hoke.

12. Yvmohmi ka hatak achvfa nan ashvchi achvfa pulla ho ai ashvchika yokvt yakni paknaka yoka chukowa tok; micha ai ashvchika yak atuk pulla mak ő nan illi yvt yakni paknaka yoka onvtuyula tok; yohmi hatuk ő nan illi yvt hatak moyuma ka onvtuyula tok, moyuma kvt ashahanchi hatuk oka.

13. Yohmi ka vba nan vlhpisa yvt ik holisso k̄isha ho ai ashvchika yvt yakni paknaka ya a takali tok: amba nan vlhpisa yvt iksho hokvno ai ashvchika yvt onvtuyula he keyu hoke.

14. Yohmi kia Al̄v̄m ai ahantvt Moses ai ahanta ant ai v̄li Al̄v̄m nan ashahanchi tok a chohmi keyu moyuma kak kia nan illi yokvt i shaiyahli tok; yummak ash ot vla hi atok yummma isht vlhpisa hoke.

15. Amba nan ai ashvchika yash ő na hvlbina yvto ik chiyuhmo hoke. Yohmi ka achvfa hosh nan ashvchi kak ő moyuma kvt illi hokma, Chihowa hvt isht i kana, micha isht i kana yak ő isht a hvlbina yvt isht i shahli fehnvt, Chisvs Klaist, hatak achvfa, yummak atuk pulla kak ő moyuma ka in laua hoke.

16. Micha achvfa nan ai ashvchi tok ash ő na hvlbina yokvto chiyuhmi keyu hoke: yohmi ka ai ashvchika achvfa nan im vlhpisa kvt isht ai i palvmmi yatok, amba pilla na hvlbina yak okvto ai ashvchika lawa isht a kashofvt isht ai vlhpiesa yoke.

17. Hatak achvfa kash im ai ashvchika yak ő nan illi yvt hatak achvfa kash pulla kak ő isht i shaiyahli hatok okma;

isht i kana lawa, micha nan isht ai vihpiesa h

bina lawa ka ihishi hokak heto isht i shahli fehnvt, hatak achufa, Chisus Klaist ak atuk pulla mak o ai okchaya ya a mikot aiasha hi oke.

18. Yvmohmi ka achufa nan ashuchi kash pulla kak o isht ai i palummi yvt hatak moma kvt isht im vlpisa tok ash inli chiyuhmit, achufa i nan isht ai vlpiesa yak pulla kak o pilla na h

bina ai ashuchika i kashofvt isht ai vlpiesvt okchaya hi vt hatak moyuma ka im aya hatok.

19. Hatak achufa kash osh ik im antio pulla kak o moma kvt nan ai ashuchi vhleha toba tok ash inli chiyuhmit, achufa kash osh im antia pulla kak o lawa kvt ai vlpiesa toba hi oke.

20. Anonti ai ashuchika yvt lawa chi mak o, vba nan vlpisa yvt aya tok: yohmi kia ai ashuchika yvt lawa ma, isht i kana yvt isht i shahli fehnvt lawa tok.

21. Yohmi ka ai ashuchika yvt imaiyvt illihinchi tok ash inli chiyuhmit, isht i kana isht ai vlpiesa pulla kak osh isht i shahlit pin Chitokaka Chisus Klaist atuk pulla mak o, isht okchalinchi bilia hi atok.

CHAPTA VI.

Nanashuchi il ai ahanta he keyu, 1; 3 na baptismo pulla hosh yvmak ash il im illi hatuk okvt: 12 nan ahopoyuksa a yvmohma he osh pishno ak inli il im issa hatuk oka; himaka pilla ma nanashuchi yvt ik hvp i shahlo kashke: 22 nanashuchi atoksali isht im vltoba kvt nan illi.

1. YOHMI ka nanta hak o il acha hinla ho? Isht i kana yvt laua chi mak o, isht ai ashuchika ya e mahaya hinla ho?

2. Ik yvmohmo pullashke. Ai ashuchika ya il im illi ha yvt, katiohmi kak osh yummak ash inli ho il ai ahanta moma hinla ho?

3. Yohmi ka Chisus Klaist ak o im a baptismo kvt, illi tok a isht a pi baptismo ak inli hatuk a, hvch ik ithano ho?

4. Yvmohmi ka pi baptismo pulla kak osh illit il iba hol-

lopi hoke: yohmit Klaist illi tok vt Chihowa isht a holitopa yak pulla kak o falamvt isht a tani tok ash inli chiyuhmit, pishno yak kia himonvt toba yosh il itvnowa hi atok.

5. Yohmi ka ilap illi tok ak o isht a hoyulba hosh il iba hollokchi hatokmvt, illi tuk vt falamvt tani tok ak kia isht il a hoyulba ak inla hi atok.

6. Yohmi ka ai ashvchika haknip vt okpulot kvnia na himak a pilla hokvno ai ashvchika yvno il i yuka he keyu mak o, pim anukfila tikba yvt ititaiyukhvna yak o yvmmma ibai illi hatok, ilvppa il ithana hoka.

7. Yohmi ka kuna hosh ibai illi hokvto, ai ashvchika ya ai i mokofa hoke.

8. Anonti Klaist a il ibai illi hatok mvt, il ibai okchaya ak inla hi okvt, pi yimmishke.

9. Yohmi ka Klaist vt illi tuk vt, falamvt tani hatok okvt, himmakma illa he keyu: nan illi yvt himmakma imaiyacha he keyu ka il ithaiyanvshke.

10. Yohmi ka illi hokvto, himonna illa ho ai ashvchika pulla kak o illi hatok: amba okchaya hokvto, Chihowa hak o im ahantvshke.

11. Yvmmak inli ho chiyuhmit hvchishno yak kia ai ashvchika ya il im illi ho mvhli, hvsh il ahni, amba pin Chitokaka Chisus Klaist ak atok pulla mak o okchayvt Chihowa ya il im ahanta, hvsh il ahni ak inlashke.

12. Ai ashvchika yvt hvchi haknip illa hi a ik imaiyacho kj, im anukfila okpulo yvmmma hvch ik im antio kashke.

13. Hvchi haknip moyuma ka vlpesa ahnit, nan ik ai vlpieso isht a yvmoohmi yo chiyuhmit isht hvsh ashvchi ná; amba illi tok osh falamvt okchaya ho chiyuhmit, Chihowa ya hvsh il im issashke; micha hvchi haknip moyuma kvt Chihowa yak o nan isht ai vlpiesa isht i yvmoohmi mak o hvsh chiyumashke,

14. Yohmi ka ai ashvchika yvt hvch i shahla he keyu; yohmi ka nan vlpisa yak o nutaka hvsh anta keyu, amba isht i kana ya oke.

15. Yohmi ka katiohmi cho? nan vlpisa ya nutaka il

anta keyu; amba isht i kana nutaka yo il anta kak osh il ashvucha ch^ı h^o? ik yvmohmo pullashke.

16. Yohmi ka kvna h^o in tishu tobvt hvsh im antia hokmvt, kvna h^o hvsh im antia kvt, in tishu hvchia hokvt hvch ik ithano h^o? Ai ashvchika isht ai illi, keyukmvt im antivt isht ai vlhpiesa yak okmá, kanimampo yoke.

17. Amba ai ashvchika ya i yuka hvchia hatok ak inli kia, nan isht vlbvchi kaniohmi h^o hvchim vlbvchi hatok vt hvchi chukvsh ak o isht hvsh holitobli hatuk ak o, Chihowa ya yak oke, pit im ai ahni lishke.

18. Yvmohmi ka ai ashvchika ya hvsh ai i mokofa mak osh, nan isht ai vlhpiesa ya in tishu hvsh toba hatok.

19. Hvchim anukfila hvt ik hlampko pulla kak o, hatak anumpuli chatuk mak o chiyuhmit anumpuli lishke; yohmi kvt hvchi haknip moyuma ka vlhpesa ahnit, nan ik vlhpeso ya hvsh yvmohma ch^ı kak osh, na liteha, micha nan ik vlhpeso aienka i yuka hvsh toba tok ash inli chiyuhmit, himonasi hokvno hvchi haknip moyuma ka vlhpesa ahnit, ai ashvchika yvt ik hvchim iksho ka ch^ı kak osh nan isht ai vlhpiesa ya in tishu hvsh tobashke.

20. Yohmi kvt ai ashvchika ya i yuka hosh hvsh ai asha mvt, nan isht ai vlhpiesa yvt ik hvchim iksho ki tok;

21. Yohmi ka nana yakohmi puta kvno nan isht il ai yukpa nanta h^o hvsh ai ishi tok okak osh himonasi hokvno yummak a tok a hvsh i hofahya h^o? yohmi ka nana yakohmi puta ka ont im ai isht aiyopi hokvto nan illi hak oke.

22. Amba himonasi hokvno ai ashvchika ya ai i mokofa hatuk osh, Chihowa yak o in tishu hvsh toba hosh, ai ashvchika i kashofvt isht il ai yukpa hvsh ishi hoke: yummvt ont im ai ishtaiyopi kvt ai okchayvt bilia yak oke.

23. Yohmi ka ai ashvchika ya isht vltoba hokvto nan illi hak oke; amba pin Chitokaka Chisvs Klaist ak atok pulla mak o Chihowa i na hvlbina hokvto ai okchayvt bilia yak oke.

CHAPTA VII.

Okchayvt anta kak illa ho vba nan vlhpisa yvt onvtuyula, 1, 4 yohmi ka vba nan vlhpisa ya il im illi tok; 7 yohmi kia vba nan vlhpisa yvt nanashvchi keyu; 12 amba holitopa vlhpiesa, micha achukma; nan vlhpisa ya holitobli kvt ik onancho kak osh Pal vt nukhaklo tok.

1. ITIBAPISHI li vhleha ma! nan vlhpisa ya ithana vhleha hak o im anumpuli lishke; yohmi ka hatak vt okchaya takla ka nan vlhpisa yvt i shaiyahli hoka hvch ik ithano cho?

2. Yohmi ka ohoyo hvt i hatak ashakmvt, nan vlhpisa ya nutaka ahanta hatuk osh, i hatak vt okchaya takla ka i filumma he keyu; amba i hatak ak osh illi hok mvno, i hatak a i filumma he keyu nan vlhpisa yash o ai i mokofa hoke.

3. Yvmohmi hatuk o i hatak vt okchaya takla ho, hatak inla auwaya hokmvto, hauui hohchifa hi oke; amba i hatak vt illi hokmvno, nan vlhpisa yvmmak ash ai i mokofa hoke; yohmi hokvt hatak inla yo ik auwaya mak osh hauui toba he keyu hoke.

4. Yvmohmi hoka itibapishi li vhleha ma! hvchishno yak kia Chisvs Klaist haknip atuk pulla mak o nan vlhpisa ya hvsh im illi hoke: yohmi kvt inla yo hvsh auwaya kvt, illi tok vt falamvt tani tok yvmmak a hi atuk: yohmi hosh Chihowa yoka nan vnit hvsh i waya hi atok.

5. Yohmi ka haknip ak o i nutaka hosh il ai asha mvno, ai ashvchika anukfila puta kvt nan vlhpisa atuk pulla mak o yvmoht, haknip moyuma ka a toksahanli hosh isht illi ya vnit wahaya tok.

6. Amba himonasi kuno nan vlhpisa ya il ai i mokofa kvt, i nutakvt il ai asha hatok vt il im illi hatuk okvt; Chihowa ya holisso tikba ya tok ak o isht il a holitobla he atuk keyu, amba shilombish himona yo isht e holitobla he atuk oke,

7. Yakohmi hoka nanta hak o il acha hinla ho? vba nan

vlhpisa yak osh ai ashvchika yo? ik yvmohmo pullashke. Keyu, ai ashvchika ya ak ithano ke tuk osh, amba vba nan vlhpisa ak atuk pulla mak o ithana li tok; yohmi kvt nan vlhpisa yak osh, Chik anushkunno kashke, achi hatuk ke-yukma, nan anushkunna yo ithana la hi atuk keyu hoke.

8. Amba ai ashvchika yvt vba nan vlhpisa atuk pulla mak o nan-anushkunna ilaiyuka puta ka isht si anukfokihinch tok; vba nan vlhpisa yvt iksho hokvno ai ashvchika yvt illi yatok oka.

9. Yohmi ka vba nan vlhpisa ya ak ithano hokvto, himonna ka sai okchaya tok; amba vba nan vlhpisa nan ai ahni kvt vla mvno, ai ashvchika yvt okcha tok: mihma svilli tok.

10. Micha vba nan vlhpisa yummvt isht ai okchaya yosh vlhpisia tok ash osh, isht illi yo ahayuchi li tok.

11. Yohmi ka ai ashvchika yvt vba nan vlhpisa yak o isht okcha cha, sa haksichi tok; micha ymmak o isht svbi tok.

12. Yvmohmi hatuk o vba nan vlhpisa yvt holitopa, mik-ma nan vlhpisa nan ai ahni kvt holitopa, ai vlhpiesa, micha achukma hoke.

13. Yvmohmi ka nana achukma ymmak okak osh isht a svilla he an toba tok o? ik yvmohmo pullashke. Amba ai ashvchika yak atok yohmi ho ai ashvchika yvt otvna chi kak osh, nana achukma ka isht a svilla he vm ikbi tok; yohmi ho ai ashvchika yvt ik achukmo atampa fehna kvt nan vlhpisa nan ai ahni kak o isht ai otvna hi atok.

14. Yohmi ka vba nan vlhpisa yvto shilombish imma hoka il ithanvshke; amba vno yokvto haknip nan ai ahni i nuta sia, ai ashvchika ya i yuka sia hoke.

15. Yohmi kvt nana ho yohmi li kvt, vlhpesa ak ahno; yohmi kvt nana ho ai ahni li hokvto, yummvno ak yvmihcho; amba nana ho ak ahninchokmv, ymmak o yvmihchi lishke.

16. Yvmohmi kvt nana ka ak yvmihcho hokbano ai ahni lik mak osh yvmihchi li hokmv, vba nan vlhpisa yvt achukmushke, vno yvt ai ahni lishke.

17. Yakohmi hoka vno ak osh himmakma ymmma yvmi-

hinchi li kak keyu, amba ai ashvchika si anukfoyuka kak oke.

18. Yohmi ka vno ya sa foyuka, yummvt sa haknip anukkaka ya nana achukma kvt iiksho ka ithaiyana lishke: yohmi kvt nana achukma ai ahni hokvto si anukfoyuka; yohmi kia nana achukma yvmma yvmihinchi la he ak osh ak aha-yuchoshke.

19. Yohmi kvt nana achukma kuno yvmihchi la he ai ahni li kvt, ak yvmihchoshke; amba nana ik achukma kuno yvmihchi la he ak ai ahno kia, yvmvno yvmihchi lishke.

20. Anonti nana ka ak yvmihcho hok bano ai ahni lik mak osh yvmihchi li hokmvt, vno ak osh himmakma yvmma yvmihchi li kak keyu; amba ai ashvchika si anukfoyuka kak oke.

21. Yakohmi hoka nana achukma ka yvmihchi la he ai ahni likma, nana ik achukmo hokvt si anukfoyuka a bilia kvt, il akostininchli lishke.

22. Yvmohmi hoka Chihowa i nan vlhpisa ya um anukfila himona yak okvno isht i hullo lishke.

23. Yohmi kia sa haknip nan ai ahni hokvt inla hatuk osh, um a nukfila nana ai ahni ka in tanahampi, micha ai ashvchika nan ai ahni sa haknip foyuka kak o i yuka sahakbi ho, pisa lishke.

24. Uno hatak ilvsha fehna sia hoka, kuta hak osh isht ai illi haknip ilvppa a sa hlakoficha chi cho?

25. Pin Chitokaka Chisus Klaist atuk pulla kak o Chihowa ya yak oke pit im ai ahni lishke. Yakohmi hoka um anukfila hokvno Chihowa i nan vlhpisa yoka isht holitobli li; amba sa haknip okvno ai ashvchika nan ai ahni kak o isht i yuka sia hoke.

C H A P T A V I I I .

Klaist a kvna hosh ib ai achvfa cha, Shilombish nan ahni ho ahanta hokvto isht ai ilvsha he nan vlhpisa ya im ai i hlakofi, 1; 5-13 nan isht ahotopa he nana hosh haknip a atoba; 6-14 nan achukma nana hosh Shilombish a a minti, 17 mikma Chihowa im vlla toba

ka nana achukma nana hosh otvni; 29 nan isht ai okchaya hi vt Chihowa pulla ho tikba ma im vlpisa tok; 38 nan isht i hullo ya nanta hosh isht a pit i filamincha hinla ho?

1. YUMOHMI hoka Klaist Chisvs ibai achvfa, haknip nan ai ahni kak o yvmohmi keyu, amba Shilombish nan ai ahni kak o iakaiya vhleha hokvno himonasi ka isht ai i palumma he anumpa hvt im vlpisa keyu hoke.

2. Yvmohmi ka isht ai okchaya Shilombish nan ai ahni Klaist Chisvs a minti kak osh ai ashvchika nan ai ahni isht ai illi yo a sa hlakofichi hatok oke.

3. Yohmi ka vba nan vlpisa yet nana ka ik atahlo kvt, haknip ak atuk pulla kak o ik ai ahlo hatuk o, Chihowa hvt ilap Ushi ak inli ho ai ashvchika isht vltoba mak o hatak nan ashvchi haknip a hobachit auet kanchi hosh, haknip ak o ai ashvchika ya ai i palumminchi tok:

4. Yohmi ho pishno yokvno haknip nan ai ahni ka e yvmohomi keyu, amba Shilombish nan ai ahni kak o il iakaiya kak osh, vba nan vlpisa isht ai vlpiesa kvt pim ai ahla he atok oke.

5. Yohmi ka haknip nan ai ahni kak o iakaiya hokvto, nana puta haknip immi hak o i hullot anukfihinli chatuk: amba Shilombish nan ai ahni kak o iakaiya hokvto, nana puta Shilombish immi hak o i hullot anukfihinli chatuk oke.

6. Yohmi ka haknip nan ai ahni kak o isht ahanta hokvto isht ai illi yoke; amba Shilombish nan ai ahni kak o isht ahanta hokvto isht ai okchaya, micha isht it i nanaiya yoke:

7. Haknip nan ai ahni kak o isht ahanta hokvto Chihowa i nukkilli yoka; yohmi kvt Chihowa i nan vlpisa ya im antia keyu, micha yohma hi o keyu kamohmi mvhlishe.

8. Yakohmi hoka haknip nan ai ahni kak o i nutakvt ahanta hokvto Chihowa ya yukpala himma keyushke.

9. Amba haknip nan ai ahni kak o i nutakvt hvsh ahanta keyu, amba Shilombish nan ai ahni kak o i nutakvt hvsh ahanta hoke; Chihowa imi Shilombish ak osh hvchi anukfoyuka ho mvhlishe. Yohmi ka hatak nana hosh Klaist imi Shilombish a jishi keyu hohmvt, immi ho keyu hoke.

10. Micha Klaist ak osh hvchi foyuka hokma, hvchi hak-

nip okvto ai ashvchika yak atuk pulla kak o illi hoke; amba hvchi shilombish okvto nan isht ai vlhpiesa pulla kak o okchaya hoke.

11. Amba Chisvs vt illi tuk a falaminchit tanichi tok imi Shilombish ak osh hvchi anukfoyuka hokmvt, Klaist vt illi tuk a falaminchit tanichi hatok ak osh hvchi haknip illi im vlhtayak ilap imi Shilombish hvchi anukfoyuka kak o isht okchalinchi ak inla hi oke.

12. Yvmohmi ka itibapishi li vhleha ma! nan aheka vhleha pia kvt haknip nan ai ahni kak o il im aheka yosh haknip nan ai ahni kak o il iakaiya hi o keyu hoke.

13. Yohmi ka haknip nan ai ahni kak o hvsh iakaiya hokmvt, hvch illa hi oke; amba Shilombish ak atuk pulla kak o haknip nan a kaniohmi puta ka hvsh illihinchi hokmvt, hvchi okchaya hi oke.

14. Yohmi ka laua kaniohmi ho Chihowa imi Shilombish ak osh anukfohkit isht aya hokvno, Chihowa ak o ushi vhleha hoke.

15. Yohmi ka anonti isht a hvchi nukshopa chj hosh yuka im anukfila ho hvsh ishi hatok keyu; amba vlla im anukfila ho hvsh ishi hatok ak o, pishno vt Abba, Piki, il achishke.

16. Shilombish Holitopa ak inli hosh pimi shilombish a nan isht atokowa it ibai anohonli kvt, Chihowa im vlla vhleha pia ka anolishke,

17. Micha im vlla pia hokmvt, isha he ai vlhpiesa pia: micha Chihowa yak o im ai isha he vlhpiesa pia, micha Klaist ak o it ibai isha he ai vlhpiesa pia hoke: yohmi ka il ibai ilbvsha ho mvhli hok mak osh il iba holitopa hi atok.

18. Yohmi ka yakni paknaka ilvppa nan isht ai ilbvsha puta hokvto nan isht a holitopa pim otaiyana hi a pit it vlhpisa hi a ik ono, ai ahni lishke,

19. Nana toba tok puta hokvto Chihowa ushi vhleha hv^t isht otaiyana hi ak o pit hohoyo fehna hosh ai asha hoke.

20. Nana toba tok puta hokvto vlhpesa ik ahno kia, isht ai illa hi vt im vlhpisa tok: yohmi kia isht ai illa he im apesa kvt, isht a hlakofa he ahna hi a nukfokit yvmihchi tok.

21. Yohmi hoka nana toba tok ash puta kvt isht ai illa he i yuka hatuk vt ai i hlakofi cha, Chihowa im vlla vhleha hvt yuka keyut isht a holitopa yvt immi ak inla hi oke.

22. Yohmi ka nana toba tok puta moyuma kvt it ibai hijihvt, it ibai ilbahasha na himak a hoka, il ithaiyanvshke.

23. Micha yvmmak illa ho keyu, amba pishno ak kia Shilombish isht ai vni waya vmmona ka il ishi kvt, pishno ak kia e hijiha kvt vlla ai ahli e toba he, yvmmvt pi haknip isht a hlakofi yak o e hohoyo hoke,

24. Yohmi ka nana kvt pim vlhtaha tok vt il isha he il ai ahni kak osh isht ai okchayvt il ahanta hoke: amba nana ka il ishi hokvto, himmak o il isha he il ahna he keyu hoka: yohmi ka katiohmit hatak vt nana ka ishi kvt himmak o ishi la hi oka, ahni ho?

25. Amba nana ka e pisá keyu hosh il isha chi, il ai ahni hok mak osh nuktaiyalvt achunanchit e hohoyo hoke.

26. Yvmmak i chiyuhmit Shilombish ak kia ik a pi hlampko puta ka pi apelahanchi fehna hoke: nana ka il asilhha he tuk ai vlhpiesa kvt pishno ak inli kvt il ithana keyu hoka; amba Shilombish ash inli hosh isht a hijiha isht anumpa he keyu puta kak o pi anukfokihinchi hoke.

27. Yohmi kia chukvsh puta silhhit akostininchu yak okvto Shilombish vt nana ho pi anukfokihinchi ka ithana hoke: Chihowa nan ai ahni kak o Shilombish ash ot vbanumpuli ahli puta ka nana ka anukfokihinchi hokvt.

28. Yohmi ka nan okluha hokvt Chihowa i hullo vhleha, ilap nan ai ahni tok pulla mak o vlhtohoka tok vhleha hokvto, isht im ai achukma he mak o it ibai toksahanli ka il ithaiyanvshke.

29. Yvmohmi ka tikbanli ithaiyana tok okvto ilap Ushi yak o hoyulba he mak o tikbanli atokohonli mak inli tok; yohmi ho yvmmak ash ot itibapishi laua ka tikba vttahpi ha hi atok.

30. Anonti tikbanli atokohonli hatok okvto hoyo mak inli tok: mihmvt hoyo hatuk okvto ai vlhpiesuchi mak inli tok:

mihmut ai vlhpiesuchi hatuk okvto ilap isht aholitopa yo ib ai isha he im ai ahni tok.

31. Yakohmi kvno nana ilvppa puta imma hokvno nanta hak o il acha hinla ho? Chihowa hak osh pi kana hokma, kvta hosh pi sanala hinla ho?

32. Ilap Ushi fehna ka ik ilatombo hosh, amba pishno e moyuma hak atok pulla mak o pim issa tok vt, katiohmi ho yvymma pima hatuk vt nan okluha ka anonti pilla pima ak inla he keyu ho?

33. Kvta hak osh Chihowa im vlhtoka vhleha ha isht ai i palvmmi anumpa kia onocha hinla ho? Chihowa ak osh i kashof i hoke.

34. Kvta hosh nan vlhpisa onocha hinla ho? Klaist ak osh illi hatok; ahli, yvymma i shahli, yvymmak osh falamvt tani hatok osh Chihowa ibbak isht impak imma yo binilit, yvymmak osh isht pi anumpohonli hoke.

35. Kvta hak osh Klaist vt pi hullo ka pi filummicha hinla ho? Isht ai ilbvsha, isht a palvmmi, hatak bi ka yvt pi hotopali, isht a hohchvfo, haknip bieka, isht ai illa he, keyukmv t bushpo falaia yak a hinla ho?

36. Yohma hi o holihiso hatok oka, Chishno yak atuk pulla mak o nitak moma ka pi himbi na shohombishke, chukfi vlhpoba vba chi kak o e chiyuhmi hoke.

37. Yvymmak illa keyu, nan okluha ilvppa puta ka ilap pi hullo tuk pulla kak o im aiyachi yak kia il i shahli hoke.

38. Yohmi ka isht illa he, isht okchaya he, enchil vhleha, enchil vhleha i shahli, miko puta, himonasi nana ai asha puta, himak a pilla ai asha he puta;

39. Isht a holitopa fehna, ilbvsha fehna, keyukmv nana toba tok nana kia, pin Chitokaka Chisvs Klaist ak atuk pulla mak o, Chihowa il i hullo ka, pi filummicha himma keyu ka, sai yimmishke.

CHAPTA IX.

Pal vt Chu i nukhaklo, 1. 7 Eblaham isht ai unchululi moma kvt nan ai yukpa isha hi vlla keyu: 18 Kvna ho ahni hok mak osh

Chihowa yvt i nukhaklo; 28 Chentail vt yimma he; mikma nan ik yimmo kak osh Chu yvto ik holitopo ka he a tuk tikba anoa.

1. KLAIST ak o nan ai ahli ka isht ai anumpuli li kvt holabi li keyu, Shilombish Holitopa ak osh anukfokihinchi ho, isht akostininchli yak kia nan atokowa ka anohonli ak inlishke.

2. Yohmi kvt sa chukvsh anukaka ya isht a nukhaklo bilia, micha isht a weki chinto kvt a foyuka kak osh miha lishke.

3. Yohmi ka itibapishi li vhleha, vñ okla achvfa yak atuk pulla mak o Klaist a i filvmmiit sa kunia hi a, ahni la hinla hokbano.

4. Yvmmak osh Israel isht atiaka vhleha hoke: yvmmak o ushi isht a toba, micha Chihowa yvt holitopa fehnvt im otaiyani, micha nan it im vlpisa puta, micha vba nan vlpisa in tonla, micha Chihowa isht aiokpvehi, micha ai okcha-yvt bilia puta im issa tok aieno kvt immi hoke:

5. Mihmvt iki vhleha tikba chash ot immi, micha yummak o Klaist vt hatak haknip imma hokvno a minti tok osh, moma i shaiyahlit Chihowa holitopvt biliyshke. Amen.

6. Chihowa im anumpa hokvt aka itulvt kunia tok o chiyuhmi keyu hoke. Yohmi ka Israel vhleha hak osh moyumvt Israel okla keyu hoke.

7. Micha Eblaham isht atiaka vhleha hokak osh moyumvt im vlla vhleha keyu ak inli: amba Aisaak ak o isht chi ai unchululi hohchifa hi oke.

8. Yohmi kvt haknip imma im vlla vhleha hokvto, Chihowa im vlla vhleha keyu hoke: amba im issa tok vlla vhleha hak osh isht ai unchululi mak osh toba ho mak a chi hoke.

9. Yohmi ka nan im issa tok isht anumpa hvt ilvppak oke, Ulhpisa tok nitak ont ai vlpiesakma vla la hi oke, mikma Sela yvt ushi im vttta hi oke.

10. Micha yummak illa keyu; amba Lebeka yak kia achvfa piki Aisaak ak o isht ai i chakali hatuk o;

11. Yohmi ka vlla yokvt ik ashwo kisha hokvt, nana

achukma, nana ik achukmo nana kia ik yvmihcho kisha ak inli kia, nana ho yvmihchi tok ak o keyu, amba ilap ak osh hoyo hatuk o vlhtoka kvt Chihowa nana ai ahni tok vt ai ahla chi kak o;

12. Yummak ash o, Akni ak osh nakfish a i nutaka hi oke, im achi tok.

13. Holihiso kvt, Chekob ano i hullo li tok: amba Esau yokvno ak i hullo ki tok, ahanchi hatok oka.

14. Yakohmi ka nanta hak o il acha hinla ho? Chihowa hvt nana yvmihinchi kvt ik ai vlhpeso ho? ik ymohmo pullashke.

15. Yohmi ka, Kvna ho i nukhaklo la he ahni likmvt, i nukhaklo la hi oke; micha kvna ho i kana la he ahni likmvt, i kana la hi oke, Moses a im achi tok.

16. Yakohmi hoka yummak ash o, ilap nan aiahni hokmá, mvlihinli kak okmá, nana kak osh ishi ho keyu; amba Chihowa yak osh i nukhaklo kak o ymohmi hoke.

17. Yohmi ka, Chishno yak o nan isht vñ ai ahli yoka ai otvninchi la he, micha sa hohchifo hokvt yakni moma ka hlopullit ai annohowa he, ilvppak fehna kak atuk mak o ik ahantá chim ai ahni li tok, Feleo ya Holisso Holitopa yvt im achishke.

18. Ymohmi hoka kvna ho i nukhakla he ahnikmvt, i nukhaklo hoke: micha kvna ho kvlocha he ahnikmvt, kvlochi hoke.

19. Yakohmi ka chishno yokvt, Nanta katiohmi ho ik ahnincho imoma ho? Kvta hak osh ilap nan ai ahni ka i sanali hatuk o? is svñ acha chi hoke.

20. Yohmi ak inli kia, amba hatak chia ma! kvta chia hokak osh Chihowa ya i sanalit ish anumpuli cho? Nana toba tok vt ikbi tok ash o, Nanta katihmi ho yakohmichit chishno yvt is sakbi tok o? im acha hinla ho?

21. Lukfampo ikbi yvt lukfi ya kanimihcha hi vt im ai vlhpiesa keyu ho? lukfi yvmmuska miash inli ka achvfa kvto isht a holitopa, mikma achvfa kvto isht a kvllakshi ampo yo ikbi chatuk keyu ho?

22. Yohmi ka Chihowa hut ilap isht i nukkilli, micha ilap

nan isht ai ahli ya otvnincha he ai ahni kak osh, isht i nukkilli onvtuyula he nan ai vlhto okpulot kvnia he im vlhtaiyaha puta ka ilbvshala hi vt i svlaha fehna hatuk mvt:

23, 24. Micha ilap isht a holitopa lawa fehna ka i nuk haklo onvtuyula he nan ai vlhto puta, yvmmvt isht a holitopa pisa hi o tikbanli im ataiyahli hatok vt, pishno yak fehna ka pi hohoyo hatok; Chu okla hak bano keyu, amba Chentail okla hak kia ai isht otvnincha he ai ahni hatok okma, nanta katihmi cho?

25. Hosea yak o isht ai anumpohonli mvt, vñm okla vhleha hatok keyu ka vñm okla vhleha hochifa la he: micha a holitopa tok keyu kvt, a holitopa hi oke, ahanchi ak inli hatok oka.

26. Yohmi ka, Um okla hvchia keyu ai im ahanchi tok ash inli, yvmmak o Chihowa okchaya im vlla vhleha a hohchihifa he mak oke.

27. Esaias ak kia, Islael imma ka chitolit isht anumpohonli mvt, Islael im vlla vhleha holhtina kvt okhvta on talaka shinuk ai asha kak o chiyuhmi ak inli kia, kashapa hosh okchaya he mak oke.

28. Yohmi kvt ilap im anumpa ha ai ahlicha chⁱ kvt ai vlhpiesa hosh t^ushpa fehnvt yvmlicha hi oke: yohmi hosh Chitokaka vt yakni paknaka ya a yvmohma he vlhpisa tok anumpa ha ai ahlicha he mak oka.

29. Mikma Esaias vt tikba kash, Sabaolh in Chitokaka yak osh kashapa ka pim ashahanchi hatuk keyukma, Sotom atok ash inli ho e chiyuhmi, micha Komolah yak o chiyuhmit e toba hi atok oke, ahanchi tok.

30. Yakohmi ka nanta hak o il acha hinla ho? Chentail okla hvt nan isht ai vlhpiesa yak o achunanchit hohoyo hatuk keyu kvt, isht ai vlhpiesa na yimmi yak o ai isht ai vlhpiesa yak fehna ka ihishi hatok oke.

31. Amba Islael okla hokvto nan vlhpisa isht ai vlhpiesa ya achunanchit hohoyo kvt, nan vlhpisa isht ai vlhpiesa ya ik ai ono hatok oke.

32. Yohmi ka katiohmi hatok o? isht ai vlhpiesa yash o isht ai yimmi kak o keyu, amba nan vlhpisa yak o a mihintz

hi asho in chiyuhmit hohoyo hatok okvt. Isht ai ibetvbl
tvli yummma isht ibetvbl hatuk okvt.

33. Holihiso kvt, Yakeh! isht ai ibetvbl, micha isht ai
itula tvli yo Saion anukaka ya bohli lishke: yohmi ka kyna
hosh i yimmikmvt, hofahya he keyu mak oke, ahanchi tok
oke.

C H A P T A X.

vba nan vlhpisa, micha na yimmi yo isht ai vlhpiesa kvt itim inla ka
anoli, 5, 11 Chu yokma, Chentail okma nana hohkia, na yimmi kvt
momvt hofahya he keyu, 18 Chentail vt vbanumpa ha holitoblit
yimma he.

1. ITIBAPISHI li vhleha ma! sa chukush nan aiahni,
micha Islael oka anumpa ilbusha Chihowa ha isht im anum-
pohonli li kvt, okla okchaya he ak o ai ahni lishke.

2. Yohmi ka Chihowa ya ai yiminta fehna kia, ai ahli
ithana keyu ka atokowa im ithaiyana lishke.

3. Yohmi kvt Chihowa hvt nan isht ai vlhpiesa ya atai-
yahli tok a ithana keyu hatuk osh, ilap inli i nan isht ai
vlhpiesa yo ai ahlichi bunna kvt, Chihowa hvt nan isht ai
vlhpiesa ataiyahli hatok okvno ik im antio hatuk oke.

4. Yohmi ka na yimmi puta hokvto isht ai vlhpiesa he
mak o, Klaist ak osh vba nan vlhpisa nan ai ahni ka ai ahli-
chi yoke.

5. Yohmi ka Moses okvt vba nan vlhpisa isht ai vlhpiesa
ka isht anumpuli mvt, Hatak vt yummma puta ka yvmihin-
chik mvt, isht ai okchaya hi oke, achi tok oke.

6. Amba na yimmi isht ai vlhpiesa hokvto yakohmichit
anumpulishke: Chi chukush oka isht anumpulit, Kvta hak
osh vba yakni yoka ont chukowa hi o? achi kvt, Klaist a
ont ilaelit aka isht vla chi ho? achi ka, chik acho kashke.

7. Keyukmvt, Kvta hak osh ahofobi fehna ka ont chu-
kowa hi o? achi kvt, Klaist a falaminchit tanichi cha, isht
vla chi ho? achi ka, chik acho kashke.

8. Amba yvmmak ash ot nantuk achi? Anumpa hokvt
chi bilikasi, chitakha anukaka yak fehna, micha chi chukush

anukaka foka hoke ; achi kvt isht ai yimmi anumpa isht il anumpuli kak oke.

9. Chishno yokvt chitih fehna ka Chitokaka Chisvs oka isht otvninchit ish anumpuli, micha illi tuk a falaminchit Chihowa hak osh tanichi tok a chi chukvsh oka isht chi yimmi hokmvt, chi okchaya hi oke, yummvt achi hoke.

10. Yohmi ka hatak vt chukvsh ak o isht ai yimmi kak osh isht ai vlpiesa hoke ; micha itih hak o Klaist a isht otvninchit anumpohonli kak osh isht ai okchaya hoke.

11. Yomohmi ka Holisso Holitopa yvt, Kvna fehna hoh kia i yimmikmt, hofahya he keyu mak oke, ahanchishke.

12. Yohmi ka Chu, micha Klik ita tuklo ka nana kvt ai it im inla keyu hoke : yohmi ka Chitokaka moyuma i shaiyahli miash inli hosh ilapa i pahaya moyuma ka i nukhaklo kvt a chinto fehna hoke.

13. Yohmi ka kvna hoh kia Chitokaka hohchifo ha i pahayakmvt, okchaya hi oke.

14. Yohmi ka katiohmit yummva i yimmi hatuk keyu kvt i pahaya hinla ho ? micha katiohmit yummva haklo hatuk keyu kvt i yimma hinla ho ? micha katiohmit vbanumpa isht anumpuli yvt iksho ka, hakla hinla ho ?

15. Micha vltoka keyu kvt katiohmit vbanumpa ha isht anumpula hinla ho ? holihiso kut, Isht it i nanaiyuchi vbanumpa isht anumpohonli, micha na hochukma isht anohowa isht ai yukpa puta isht aya ka iyi yvt yakeh ! aiokli fehnvshke, ahanchishke.

16. Yohmi kia moyumvt vbanumpa ha im antia hatuk keyu. Yohmi ka Esaias vt, Chitokaka ma ! kuta hak osh pim anumpa ha yimmi hatuk o ? achishke.

17. Yakohmi hoka haklo kak osh isht a yimmi hoke : Chihowa im anumpa hvt isht anuhumpa pulla kak o a haklo hoke.

18. Yohmi kia haklo tuk keyu ho ? Ih ! ai ahli fehna ; yakni moyuma ka itih ola kvt im ohona tok ; micha anumpa puyuta kvt yakni hatak ai ahanta moyuma ka im ohona tok oke, vno vto achi lishke.

19. Amba Israel vt ithana hatuk keyu ho ? vno vto achi

lishke. Ümmona ka Moses vt okla ho keyu kia isht a chi nuktahlachi la hi oke, micha oklushi ik hopoyukso yo isht a chi nokowuchi la hi oke, achishke.

20. Anonti Esaias vt nukwaya iksho hosh, Sa hohoyo hatok keyu kvt si ahayuchi tok; si a ponahaklo hatok keyu ka im otaiyani li hatok, achishke.

21. Amba vm antia he keyu, micha a sanalit anumpuli okla hoka sabbak a pit i wiyeli li shohombishke, Islael okvno im ahanchishke.

CHAPTA XI.

Chihowa hvt Chu moma kak o kanchi hatuk keyu, 1; 7 kanimi kvto chukvsh kvlochi kia, kanimi kvto okchaya he vlhtoka tok: 16 vbanumpa anukfohka hi yokvno im ahna he vlpesa; 26 Chihowa yak osh ahnit imissa tuk atok oka, 33 Chihowa nan im anukfila yokvno kvna hosh hoyo kvt im ithvna he keyu.

1. YAKOHMI ka Chihowa hvt im okla fehna ka kanchit taiyahli hatok o? Ik yvmohmo pullashke; yohmi ka vno yak kia Islaelait Eblaham isht atiaka Benchamin iksa sia hoke, achi lishke.

2. Chihowa hvt im okla fehna tikbanli ithaiyana tok okvo kanchit taiyahli hatok keyu hoke. Holisso Holitopa yvt Elias ai isht anumpohonli ka chik ithano cho? Islael oka anumpa onochit Chihowa ya isht anumpohonli kvt,

3. Chitokaka ma! chi hopaii vhleha ha ahambi tok, chim alta puta ka iba kullit akahanchi tok; yohmi ka vno ak bano hosh ahanta li ma, vm ilhfiohpak a tvbli bahanvshke, ahanchishke.

4. Yohmi kia Chihowa hvt afalaminchit nanta hak o im achi ho? Hatak tahlepa sipokni untuklo hokvto Baal holbut toba ya ik i hvchukbihlepo atuk okvno vno vmmi yo ilatohomba li tuk oke, achishke.

5. Yummak ash inli chiyuhmit himonasi ak kia isht i kanvt isht ai vlhtoka tok vt kaniohmi kvt ai asha ak inli hoke.

6. Yohmi ka isht i kana yak okma, toksahanli tuk pulla yak o ai yvmohmi keyu hoke; yakohmi hokma isht i kana

yvt isht i kana keyu yoke. Amba toksahanli tuk pulla yak q ai yvmohmi hokma, isht i kana yak q ai yvmohmi keyu hoke: yakohmi hokma toksahanli yvt toksahanli keyu hoke.

7. Yakohmi ka katiohmi ho? Islael okvt nana hohoyo kvt ishi hatok keyu hoke: amba vltoka yak osh ishi hatok; mihma kashapa hokvto im anukfila hvrt kvllot kvnia tok oke;

8. Yohmi ka holihiso kvt, Chihowa hokvt im anukfila nosilhhvt kvnia, nishkin nan isht pisa he keyu, micha hak-sobish nan isht hakla he keyu puta aieno ho ihima hatok; ahanchi hatok ash q ihima na himak a nitak a ai vlvshke.

9. Mihma Lewi vt achi kvt, Ai impa yvt isht ai ibetvbla he, micha isht ai itula he, micha isht ai okpula he, micha isht ai im vltoba he aieno isht ai in tobashke.

10. Micha nishkin vt im okhlili cha, isht ik peso hosh hlipkvchit maya na biliashke, achishke.

11. Yakohmi hoka ibetvblu hatuk ak osh isht ai itulvt kvnia ho? Ik yvmohmo pullashke: amba isht ai itula hatuk pulla kak q isht ai okchaya yvt Chentail a im vla ho isht a nuktahlahancha chj hatok oke, achishke.

12. Yohmi ka yvmmvt isht ai itulvt kvnia kak q yakni moyuma kvt isht ai yukpa laua kvt im vla hokma, micha isht ik a lauwot taiyaha kak q Chentail vhleha ha isht ai yukpa lawa kvt im vla hokma; isht ai alotowa hokak heno isht i shahli fehna hi q keyu?

13. Yohmi ka Chentail hvchia ha hvch im anumpohonli il kvt, Chentail im apostel sia hatuk okvt, nan isht ai vttal ya holitobli lishke.

14. Yohmi hosh kaniohmit isht a nuktahlachit sa haknip ai achvfa kash kanimi kvno okchalinchi la hinla hokmv,

15. Yohmi ka yvmma kaiyanchi kak q yakni moyuma kvt isht ai it i nanaiya hokma, yvmmak ash i kanvt falaminchit ishi hokak heno nanta ha hi q? amba illi tuk vt falamvt isht ai okchaya kak a hi q?

16. Yohmi ka vnit waya vmmona kvt holitopa hokma, a moyuma kvt holitopa ak inli hoke: micha hakshish vt holitopa hokma, naksish puta kak kia yohmi ak inli hoke.

17. Mihma naksish kaniohmi kvt atvptovt kvnia hokma,

alif haiaka ai offo chia hash osh ish ibafohka hatuk ; micha yummak ash ibafoka hosh alif okchi, micha hakshish aienka ish ibai ishi hatuk okmvt ;

18. Naksish puta ka ik ahobalot chik im ilauato kashke ; amba ish ilauata hok mak osh chishno yak osh hakshish ish il ai ishi keyu, amba hakshish ak osh chishi hoke.

19. Yvmohmi ka, Naksish kaniohmi kvt kobahlit kunihiya kvt, vno yak osh iba fohka la he yak o yohmi hatok, ish acha chi hoke.

20. Ahli ; ik yimmo kak osh kobahlit kunihiya hatok ; amba chishno vto na yimmi kak osh isht ish a hikia hoke. Chik ilefehnacho kashke, amba ish il akanlosechashke :

21. Yohmi ka Chihowa hvt naksish fehna yash kanchi nukwiya tok keyu hokmvt, chishno yak kia chi kancha he yoba ká, ahah ! ish ahnashke.

22. Yvmohmi ka Chihowa hvt isht i kana, micha isht palvmmminchi ya ho pesá : aka itula tok ash isht palvmmminchi ; amba chishno yokuno isht chi kana, ilap isht i kana yash o ish a mahaya hokmvt ; yummak keyu hokmvo chishno yak kia chayvt chi tupa he ak inli hoke.

23. Yummak ash kia ik yimmo kak o keyu hokmvt, iba fohoka he ; Chihowa hak osh yummak ash falaminchit iba fohoka hi vt im ai ahli hoka.

24. Yohmi ka chishno yvt alif haiaka ai offo yo a tupa hosh alif achukma yash, ai yvmohmi chatuk keyu kia, ish ibafohka hatok okma ; naksish fehna yatok ilvppak heto isht i shahli fehnvt ilap immi yatuk ash inli ka ibafohoka hinla keyu ho ?

25. Yohmi ka itibapishi li vhleha ma ! Islael a kashapa hokvt im anukfila hvt kahanlo na Chentail vhleha isht ai alotowa yvt vla he yak atok, anumpa ai ahli ik otano chatuk ilvppa hvch ik ithaiyano hosh, hvchishno ash inli hosh ile yimmit hvsh ai asha hi a ak hvchim ai ahnoshke.

26. Yakohmikmvo Islael vhleha hvt moyumvt okchaya hi oke ; holihiso kvt, Nahlakofichi yvt Saion ak o a mintit kohcha hosh ai ashvchika ya Chekob a ai isht i kahancha hi oke, achi hatok oka.

27. Micha ai ashuchika yash ai isht i kanchi likmvt, ilvppak o nan it im apesa la he tok mak oke.

28. Ubanumpa hash imma hokvno, hvchishno yak atuk pulla kak o yummak ash ot tvnvp vhleha hoke; amba vltoka yash imma hokvno iki vhleha yash ak atuk pulla kak o i holitopa vhleha hoke.

29. Yohmi ka Chihowa hvt na habenahanchi, micha atokhonli aienā kvt inlvchit im anukfila he keyu hoke.

30. Yohmi ka hvchishno yokvto tikba pilla kash Chihowa ya hvsh i yimmi hatok keyu; yohmi kia yummak ash ot isht ik a yimmo pulla kak o isht i nukhaklo yash hvsh ishi hatok ash o;

31. Chiyuhmit ilvppak ash ot himonasi ka ik yimmo ak inli hatuk kia, isht hvsh i nukhaklo yak atuk pulla kak o ilvppak ash kia isht i nukhaklo ya ishi mak inla hi atok.

32. Yohmi ka Chihowa hvt yummak ash moyuma kvt ik yimmo ka he im ai ahni hosh moyuma ka i nukhakla he ak atok.

33. Yakeh! Chihowa hvt hopoyuksa fehna, micha nan ithana aienā kvt ataha hi vt ik im iiksho; nana apihsa ka akostininchit nana a kaniohmi puta ka silhhit ahayucha he keyu hoke.

34. Yohmi ka kuta hak osh Chitokaka im anukfila ha ithaiyana tok o? keyukmvt kuta hak osh nan i miha yatox o?

35. Keyukmvt kuta hak osh tikba ima hatok osh, anonti falamvt im vltoba hi atok o?

36. Yohmi ka nan okluha kvt yummak o a mihinti, micha yummak o isht a toba, micha yummak o immi mak osh tohomba tok; isht a holitopa yvt yummak o immit peh biliashke. Amen.

CHAPTA XII.

Chihowa ahnichit e yukpa la chi ka Chihowa nan isht i nukhaklo yash pi nukfokihincha hi a tuk, 1; 3 ilifehnvchit pishno ak inli ka isht ik pim anukfilo kashike; 6 amba kanima yo il a hikia na nanā

ka yvmohma he vlhpesa kvt a pi onutuyulak ma, mihi yo e yv-mohmashke; 9 iti hullo, micha nana ka il a yvmihcha he vlhpesa inla aieno ka pim apesa; 19 afalvminchit nana ka ik vlhpesalo ka hi okvno pim ahni keyu hoke.

1. YUMOHMI ka itibapishi li vhleha ma! Chihowa hvt isht i nukhaklo puta hak atuk pulla mak o hvchi haknip puta hokvno vba isht aiokpvchi okchaya, holitopa, Chihowa yvt aiokpancha he vlhpesa ho, yvmma isht hvsh ai ahanta he vlhpiesa hokvt, hvsh im issa he, hvchim ai ahni lishke.

2. Micha yakni ilvppak inli ka hvch ik hoyulbo kashke; amba hvchim anukfila hvt himonvt toba pulla hatuk mak osh inlv hush tobashke; yohmi hosh nan achukma, nan ai vlhpiesa, nan ai ahli Chihowa nan ai ahni ka hvsh akostininchashke.

3. Yohmi ka isht i kana ya vma hatuk pulla mak o, hatak hvch ibafoka puta ka ilap ash inli kvt isht il anukfilla he ai vlhpiesa ka isht i shahlichit isht ik anukfillo kashke, im achi lishke: amba il oktamblit Chihowa hvt hatak hikia aiyuka ka isht ai yimmi kaniohmi ho ima hatok ash o, hatak hikia aiyuka kvt isht il anukfillashke.

4. Yohmi ka pi haknip vt achufa kia, pit ai achufa hvt laua, micha pit ai achufa ilvpput moyuma kvt nan isht ai vta yvt miash inli keyu kash o:

5. E chiyuhmi hosh e laua kia, Klaist il ibai achufa kvto haknip achufa pia, micha achufa aiyuka kvt pit il it ibai achufa hoke.

6. Yvmohmi ka isht i kana yvt kaniohmi ho il ishi hatok ak osh na hvlbina puta kvt ilaiyuka ho il jeshi hokvt, Shilombish anukfoyukvt anumpuli isht ai vta yo e habena hatuk okmv, isht ai yimmi yak o ai itilaui ho yvmmak o isht il ahantashke.

7. Mikmv chvch nan isht im vta isht ai vta ya e habena hatok mv, yvmmak o isht il ahantashke; micha nan ithvnanchi yokmv, yvmmak o isht ahantashke.

8. Micha vbanumpa isht atohnochi yokmv, yvmmak o isht ahantashke: na hopela yokmv, im anukfila apissali hosh yvmihhashke: pehlichi yokmv, ai ahli achukmashke:

i nukhaklot nan isht im vutta yokmvt, aiokpanchi hosh yu-mihhashke.

9. Isht i hullo yvt isht il ahobi iiksho hashke. Nan ik achukmo ka ish i nukkillashke; nan achukma hoka ish asi-tiashke.

10. Itibapishi chiyuhmit it i kana fehnvt hvsh it i hul lashke; hvsh iti holitobli kvt hvsh it im i shahlashke.

11. Nan isht vutta kvt intakobi keyu; chukvsh isht ai yiminta fehnvt, Chitokaka yak o in toksvli hosh isht hvsh ahantashke.

12. Ai okchayvt bilia pisa la he ai ahnit, hvchi yuhupashke: na palvmmi hvsh pihisa kvt hvchi nuktaiyalashke: achunanchi hosh anumpa ilbvsha hvsh anumpohonlashke.

13. Ubanumpuli a bvnna ka hvsh i hopehinlashke: hatak ik ithano ya hvsh i kana fehnashke.

14. Hvch ilbushali ka isht im ai achukma he ai ahnit isht hvsh anumpohonlashke; isht ai okpula hi a hvch ik ai ahno hosh, isht ai achukma he ak o ai ahnit isht hvsh anumpohonlashke.

15. Nan isht ilaiyukpa ka hvsh ibai yukpashke; micha nukhaklokma, hvsh iba nukhaklashke.

16. Hvchim anukfila hvt ai achufvt hvsh it im anukfilashke. Isht a holitopa puta ka hvch ik hohoyo kashke: amba hatak ilbvsha yak o hvsh il itilauechashke. Hvchish-no inli hvch ik ile yimmo kashke.

17. Hatak vt nan ik achukmo hvchi yvmihchi ka nan ik achukmo yo hvch ik i falamincho kashke. Hatak moyuma itikba ya nana achukma puta ka hvsh yumihhashke.

18. Yohma he yobakma, hvsh a yvmohma he ai vlhpiesa kvt, hatak moyuma ka hvsh it i nanaiya hosh hvsh ahantashke.

19. A holitopa ma! hvch ik il ai okho kashke, amba ai vlhpiesa isht im atobbi yak o hvsh il im issashke; holihiso kvt, Ai vlhpiesa isht atobba hi okvt vmmi hatuk osh, afalaminchit atobbi la hi oke, Chitokaka yvt achi hatok oka.

20. Yumohmi ka chin tunvp vt hohchvfo hokma, ish ipetashke; itukshila hokma, nan ishko ish ipetashke; ilvppak

o ish yvmihchi hokmak osh luak tobaksi yo noshkobo ha
ish o fohabla hi oke.

21. Nan ik achukmo i nutvt chik il ai okho kashke ; amba nan achukma kak o nan ik achukmo ka isht ish imaiya-
hashke.

CHAPTA XIII.

Nan apesa ya im antia, mikmvt nana ka il i yvmohma he vlhpesa kvt
inla mvt asha ka isht anumpuli, 1, 8 vba nan vlhpisa yvt ahla hi a
holitobli, 11 atampli fehnvt impa, nan ishkot haksi aieno kvt ai
okhlili ka yo yvmohmi hatuk osh kanima yo vbanumpa hvt atoh-
wikel hokvno ai otaiyana he keyu.

1. SHIOMBISH puta kvt nan vlhtoka i shahli vhleha
ha im antiashke. Nan vlhtoka inla kvt iksho : amba Chihowa
ak osh ai ahni aik bano hoka ; nan vlhtoka puyuta ka
Chihowa hak osh vlhtoka he ai ahni hoke.

2. Yvmohmi hoka kuna fehna hoh kia nan vlhtoka yoka
i sanali hokvt, Chihowa hvt nan apesa tok a i sanali hoke :
mikmvt i sanali vhleha hokvto ilap inli isht ai ilbusha yosh
im vlhpisvt isha hi oke.

3. Nan vlhtoka vhleha hoka nan toksvli achukma yak osh
ai i nukshopa yo keyu hoke : amba nan ik achukmo toksvli
yak oke. Yakohmi ka nan vlhtoka yoka chishno yvt i nuk-
shopa la he, chik ai ahno cho ? Nan achukma kak o ish
yvmohmashke ; mikmvt yummak ash o ish im a holitopa
hi oke.

4. Nan isht chim achukma chi mak o yummvt Chihowa
nan isht im vtta hatuk oka. Yohmi kia nan ik achukme
kak o ish yvmihchi hokmvt, chi nukshopashke : yohmi ka
yummvt bushpo falaia ya peh pill aieshi ho keyu ; amba
yummvt Chihowa nan isht im vtta yosh nana ka ai ahlichit
nan ik achukmo yvmihchi ya isht ai i palvmmi ka onohonchi
mak oke.

5. Yvmohmi hoka isht ai i palvmma he ak bano kak o
keyu, amba isht il akostininch yak atuk pulla aieno kak o
ish im antia pullashke.

6. Yohmi ka ilvppak atuk pulla kak o noshkobo chumpa ya ish atobbi makinlashke: yummvt Chihowa nan' isht im vtta vhleha hatuk osh nana ilvppak fehna ka isht ahantut bilia hoke.

7. Yumohmi ka moma kvt ilap ai isha he ai vlhpiesa ka ish imashke: noshkobo chumpa ya kvna hosh isha he ai vlhpiesa kak o ish imashke: vlhpoyak isht ai vlhtoba kashampa kvnia he tuk a kvna hosh isha he ai vlhpiesa kak o ish imashke: kvna ho i nukshopa he, ai vlhpiesa kak o ish i nukshopashke: kvna ho holitoba he ai vlhpiesa kak o ish holitoblashke.

8. Hatak nana kia aheka yvt ik chin takanlo kashke: amba hvsh it i hulla he vto hvsh it in takanlashke; yohmi ka kvna hosh inla ya i hullo hokvto vba nan vlhpisa ya ai ahlichi hoke.

9. Yohmi ka, Chik it in lum^äko kashke, Chik bo kashke, Chik h^ükopo kashke, Chik aholvbecho kashke, Chik anush-kunno kashke; micha nan vlhpisa inla kvt takanli hok-mvt, anumpa kanomosi, Chin chuka panta hatak a ish i hullo kvt, chishno ish il i hullo kak i chiyuhmashke, achi ilvppak o foka hoke.

10. It i hullo yvt nan ik achukmo in chuka panta hatak a ik i yvmihcho yoke: yvmohmi hoka it i hullo yak osh vba nan vlhpisa ya ai ahlichi mak oke.

11. Micha ilvppak o hvsh yvmohmashke: mikmv^t himonasi ka nusi tuk vt pi okcha he hvshi kanvlli hvt ont ai vlhpiesa ka il ithaiyanashke; himonasi kvno isht ai pi ok-chaya yokvt pi bilika kvt pi yimmi hatok ano i shahli hoka.

12. Ninak vt ant ia^q hosi ma, nitak vt vla hosishke: yvmohmi hoka okhlili isht a toksvli puta ka e kaiyan-chashke: micha nan tohwikeli isht il atukkochi yak o e foyukashke.

13. Nitak itwnowa yak o chiyuhmit ai vlhpiesa hosh il itwnowashke: haksi, micha tasimbot tasali keyu, itiba nusit isht a haui keyu, itachowa, micha it i potvnnot hvch ik it i nukkillo kashke.

14. Amba Chitokaka Chisvs Klaist ak o hvsh foyukash-

ke ; micha haknip nan ai ahni okpulo puta ka im ai əhlichə
chi kvt haknip ə nana hvch ik atahlo kashke.

CHAPTA XIV.

Nana kvt ilim itim inla mak osh il iti shetilima he tok keyu, 1 ; 13
amba nana ka ahah ! il oh ahni na, nana ka il itim inla hoh kia, inla
maya kvt isht ik pim ai ibetvblo kashka ; 15 nana kvt yohmi ka
na laua ho isht mihvt Pal vt otvninchi hoke.

1. NA yimmi kvt ik ono ka hvsh i kana banashke ;
micha im anukfila anuktuklo atuk ə nana isht chik im apeso
kashke.

2. Yohmi ka achvfa hokvto nan okluha ka vpa hi atuk vt
yimmishke ; inla hokvto na yimmi kvt ik ono mv̄t, na waya
yak ə vpushke.

3. Yohmi ka vpa hokv̄t ik po hoka ik kanimancho kash-
ke ; micha ik po hokv̄t vpa hoka nan ik im apeso kashke ;
Chihowa ak osh i kana hatuk oka.

4. Kvta chia hokak osh hatak inla in tishu ha nan ish im
apesa hoh cho ? ilap i shahli ak illa ho isht im a hikia he,
keyukmv̄t isht ai im itula hi oke. Ahli, ai əhlit hikia hi
oke, Chihowa hak osh ai əhlichit hilecha hinla hoka.

5. Hatak achvfa hokvto nitak achvfa kvt inla ka i shahli,
ai ahnishke ; inla hokvto nitak moma kvt itilaui, ai ahnishke.
Hatak puyuta kvt ilap im anukfila fehna ka ai əhlit anukfo-
yukashke.

6. Kvna hosh nitak ə holitoblikmv̄t, Chitokaka yak ə i
holitobli hoke : mikma kvna hosh nitak ə ik i holitoblo hok-
mv̄t, Chitokaka yak ə ik i holitoblo hoke. Kvna hosh vpak-
mv̄t, Chitokaka yak ə in vpa hoke ; Chitokaka yak ə isht
aiokpvuchi ya ima hokv̄t : mikma kvna hosh ik pokmv̄t,
Chitokaka yak ə ik im vpo hoke : yohmi kia isht aiokpvuchi
ya Chihowa yak ə ima hoke.

7. E kania kvt pishno inli il im anta keyu hoke : micha
hatak nana kia ilap inli il im illi keyu hoke.

8. Pi okchayvt il ahanta kvt, Chitokaka yak ə il im ahan-
ta hoke ; micha pilli hokmv̄t, Chitokaka yak ə il im illi hoke ;

yumohmi hoka pi okchaya, pilli, kanimampo hoh kia Chitokaka yak o immi pia hoke.

9. Yohmi ka Klaist okvt illi tuk vt falamvt okchaya kvt, illi, micha okchaya it aieninchit in Chitokaka toba chi ilvppak fehna hatok oka.

10. Yohmi kia nanta katiohmi ho chitibapishi ha nan ish im apesa cho? micha nanta katiohmi ho ish itibapishi ha ish kanimanchi cho? e moyuma kvt Klaist nan apesvt ai o binili ka itikba ya e hiohla hi oka.

11. Yohmi ka holihiso kvt, Sai okchaya hoka iyikalaha puta kvt a hvchukbihlapa hi oke; mikma isunlvsh puta kvt Chihowa ha aiokpahancha hi oke, Chitokaka yvtachi hoke, achi hatuk oka.

12. Yakohmi hoka e moyuma kvt Chihowa hoka il im il anohonla hi oke.

13. Yumohmi hoka himak a pilla kvno nan it im apesvt kil ahanto kashke; amba hatak nana kia isht ai ibetvbla he, keyukmv^t isht ai itula he nana kia itibapishi i hina ya ik bohlo ka he ilvppak o hvsh im anukfillashke.

14. Yohmi ka nana kvt ilap ak inli kvt ik kashofo kvt iksho ka, Chisvs Klaist ak atuk mak o isht a sa nukfoyukvt, ithaiyana lishke: amba kuna hosh nana kvt ik kashofo ai ahni hokvno, yummvno nana kvt ik i kashofo hoke.

15. Ish itibapishi hvt nana ish pa ka isht ik im vlhpieso hokma, himak a i hullot ish nohowa keyushke. Yummak ash Klaist vt vlhtobvt illi hatok oka, chim ilhpak a isht chik okpano kashke.

16. Yumohmi hoka nana achukma isht ish ilaiyukpa kvt ik ai vlhpesot isht ik anumpo kashke.

17. Yohmi ka Chihowa apehlichika yokvt nan impa, nan ishko kak o keyu hoke; amba nan isht ai vlhpiesa, micha isht it i nanaiya, micha Shilombish Holitopa ai isht ilaiyukpa yak oke.

18. Yohmi ka kuna hosh nana ilvppak fehna ka Klaist a isht im antia hokvno Chihowa yvt ahninchi, mikmv^t hatak puta kvt vlhpesa ai ahni hoke.

19. Yumohmi hoka nana kvt isht ai it i kana puta, micha

nana ka isht it i hlampkohoncha he aienakak o e yummohmashke.

20. Yohmi ka nan vpa ak atuk mak o Chihowa hvt nana tokshanli tuk ash isht chik okpano kashke. Nan okluha kvt kashofa mvhli hoke: yohmi kia hatak nana hosh inla isht ai ibetvbl hq impa hokvto, isht ik im achukmo hoke.

21. Nipi vpa, oka paki ishko, keyukmvrt nana kia ish itibapishi hvt isht ai itulvt isht ai, ibetvblit isht ik a hlampko ka chiq ho, ai yummohmi kvt ik achukmo hoke.

22. Nana kash chi yimmi cho? Chihowa itikba yak o chishno illa hosh ish a ymmohmashke. Kvna hosh ilap vt nana ho vlhpiesa ahnit, ilap ash inli anumpa isht ik il onochohokvto, na yukpa hoke.

23. Yohmi ka kvna hosh anuktuklo hoh kia vpa hokmvto, anumpa onvtula hoke: nana hoh kia yimmi keyu hosh ymmihchi hokvto ai ashuchi yoka.

CHAPTA XV.

Hlampko kvt, ik hlampko ya nan ib ai isha he, 1; 2 pishno inli kil ile yukpalo, 3 Klaist vt yohmi tok keyu, 7 amba e moma ka Klaist vt pi kanvt nan pim anukfilli tok a chohmit it i kanvt il i tiholitoblicha he: 30 Pal vt Loman vbanumpuli vhleha hvt vba isht anumpula he im a sihlha.

1. **YAKOHMI** hoka pi hlampko hokvto ik hlampko hokvno nan il ib ai isha he atuk; micha pishno inli il ile yukpala hi atuk keyu hoke.

2. E moyuma kvt ilap in chuka panta hatak vt vbanumpa ha isht a hlampot im achukma chiq ka e yukpalashke.

3. Yohmi ka Klaist ak kia ile yukpali tok keyu hoka; amba holihiso kvt, Isht a hofahyali puta kvt chi onvtula hatuk vt sai onvtula hatuk oke, achi hatok oka.

4. Yohmi ka nana fehna hoh kia tikba pillakash holihiso kvt nana isht a pim vlbucha he mak o holihiso hatok oka; yohmi kvt Holisso Holitopa ak o nana ka isht a nuktaiyalvt achunanchit ai okchayvt bilia ya il isha he, il ai ahna hi atok oke.

5. Yohmi ka Chihowa hak osh hvchi atohnohonchit isht anuktaiyalvt achunanchi ya hvch ima na nana hvsh it im anukfilli kvt ai achvft Klaist Chisvs ak atok ak o hvsh chiyumashke.

6. Yohmi hosh hvchim anukfila hvt ai achvft, itih achvfa hosh Chihowa, pin Chitokaka Chisvs Klaist Iki yak fehna ka hvsh holitoba hi atuk oke.

7. Yvmohmi hoka Chihowa hvt isht aholitopa chi kak o Klaist ak kia pi kana hatok ash o, chiyuhmit hvsh it i kanashke.

8. Yohmi ka Chihowa isht ai ahli yak atuk pulla kak o Chisvs Klaist okvt hakshup tupa yak o nan isht im vta toba kvt, iki vhleha ha nan im ihisa tok puta ka ai ahliche chi kak atok oke, achi lishke.

9. Micha yohmi ho Chentail vhleha hvt ilap isht i nuk-haklo tok ak o Chihowa ya holitoba hi atok oke ; holihiso kvt, Ilvppak atuk mak o Chentail vhleba ha ibai achvft chi aiokpahanchi la he ; micha chi hohchifo ha isht talohowa la hi oke, achi hatok oka.

10. Micha anonti Chentail hvchia hvt um okla vhleha ha hvsh ibai okpahanchashke, Chitokaka yvt achishke.

11. Micha anonti, Chentail moyuma kvt Chitokaka ya hvsh aiokpahanchashke : micha okla moyuma kvt hvsh aiokpahanchashke, achishke.

12. Micha anonti Chesse ak o isht atiaka yosh ahanta he, micha yummak fehna hosh Chentail okla ha i shahlit mikot wakaya hi oke : yummak o Chentail okla hvt anukchieta hi oke, Esayas vt achishke.

13. Yohmi ka ai okchayvt bilia ya pisa he ai ahni ya in Chihowa yak osh isht ai yimmit ai isht it i nanaiya, micha ai isht il aiyukpa moyuma ka hvchi alotoli ho Shilombish Holitopa nan isht ai ahli yak atuk pulla mak o ai okchayvt bilia hvsh isha hi okvt, ai ahli fehnvt hvchi anukfoyukashke.

14. Micha itibapishi li hvchia hvt nana achukma bieka hosh hvchi anukfoyukvt, nan ithana isht a hvchi alotowa hatuk osh, nana ka hvsh it i miha he bieka ak inli ka, vno ak inli kvt hvchi yimmi li ak inlishke.

15. Yohmi ak inli kia itibapishi li vhleha ma ! Chihowa ak osh isht i kana ya vma hatuk oka, ik sa nukwayo kv̄t isht i shahli hosh isht hvsh ithana ch̄i kak o, nana a kaniohmi ka hvch̄i holissohonch lishke;

16. Yohmi hosh Chisvs Klaist nan isht im vtta yosh, Chihowa im vbanumpa ha Chentail okla hak o isht im ahanta la ch̄i hatok ; yohmi ho Chentail vt Shilombish Holitopa yak o isht a kashofa hatuk o vba isht aiokprchi ka ahnincha hi atok oke.

17. Yvmohmi hoka nan okluyuha, Chihowa hvt isht pit ahalaya ka Chisvs Klaist ak atuk pulla mak o, nana ka isht ilauata la hi vt ieshi lishke.

18. Chihowa imi Shilombish nan isht ai ahli yak atuk pulla mak o nan isht nukhlakancha, micha nan isht atokowa yo nana ka isht ai yvmohmit anumpohonli li ho, Chentail okvt im antia ch̄i ka, Klaist vt isht a si atoksvli hatuk keyu hokvno nana ai yvmohmi tuk ash achvfa kia isht anumpuli la he keyu hoke.

19. Yvmohmi hosh Chelusalem, micha isht ai apakfoypvt Illilikum a ont ai vhli itintakla ya Klaist im vbanumpa ya ai ahli fehnvt isht ai anumpohonli li hatuk oke.

20. Ahli, yakohmi hosh intolahpi hatak inla immi paknaka yo ai ikbi li yoba ná, ai ahni li kak osh kanima yo Klaist vt isht ik ai anumpo hokvno vbanumpa ya isht ai anumpohonli sa bunna fehna chatuk oke.

21. Yohmi kia holihiso kv̄t, yummak o isht im anumpa hatok keyu kia, okla pisa hi oke ; micha okla yummvt haklo hatok keyu kia, akostininchā hi oke, achi hatok oka.

22. Yohmi ka ilvppak atuk pulla kak o hvchim ona la hi atok vt, isht a si ataklvma fehna ak inli hatuk oke.

23. Yohmi kia himonasi hokvno ilvppa ai anumpuli la hi okvt ik sv̄m iksho hatuk osh ; micha hvchim ona sa bunna fehna tok a himak a afummi hvt laua fehna hatuk osh ;

24. Kanima kash inli ho nowvt ayvt Ispani yoka chūkowwa likmvt, hvchim ona la hi oke : yohmi kv̄t nowvt aya li hokvt, ont hvchi pisa la he ai ahni li : micha hvchi pisvt

kaniohmit vm vlhpiesa ha yokm^{vno}, nowut aya li kash acha-kalit pit hvs sa pila he chishke, ai ahni lishke.

25. Yohmi kia himonasⁱ hokvno vbanumpuli vhleha hak o i hopela la chi hosh Chelusalem ak o ia la chishke.

26. Yohmi ka Masetonia, micha Akaia okla aien^a kvt im vlhpiesa hosh vbanumpuli ilbvsha Chelusalem ai asha ka nan isht apelvchi kaniohmi ka i bohonli tuk oke.

27. Im vlhpiesa ai ahli fehna hosh yvmihchi tuk: yohmi hatuk o im aheka vhleha hokvt. Yohmi ka Chentail okla hvt nana Shilombish immi puta ka ibai ihishi toba hatuk mvt, anonti nana haknip immi puta ka yumm^a isht apelvcha hi okvt im ai vlhpiesa ak inlishke.

28. Yvmohmi hoka ilvppa isht vttvt vm vlhtaha, micha nan isht apehluchi ilvppak ash o im ai ahliche li ha yok mak osh, hvchin tvmah^a ha hlopullit Ispani yoka ont chukowa la hi oke.

29. Micha hvchim ona likmvt, Klaist im vbanumpa ai isht ilaiyukpa ai ahli fehna laua ka isht hvchim ona la hi okvt, ithaiyana lishke.

30. Yohmi ka itibapishi li vhleha ma! Chitokaka Chis^vs Klaist ak atuk puyula, micha Shilombish ak atuk mak o isht iti hullo yvt hvchi anukfoyuka hokvt, subai yichina fehna hosh anumpa ilbvsha Chihowa ya im anumpohonli kvt, isht hvs si anumpohonlashke.

31. Yohmi ho ik yimmo vhleha Chutia ai asha ka ai i hlakofi lashke: micha Chelusalem a nan i hopela la chi ishi li kash vbanumpuli vhleha hash ot aiokpahanchashke.

32. Yohmi ho Chihowa nan ai ahni pulla ho nan isht ilaiyukpa ya ieshit hvch im ona li hosh, nana ka hvch ibai yuhukpa li hokbano.

33. Yohmi ka nan isht it i nanaiya in Chihowa yak osh hvsh moyuma ka hvch iba foyukashke, Amen.

okla im ahna ch̄i ka im anoli ; 21 atuk osh nana ka yakmihchit na pit i mihihvt tahlı mvt, ishtaiyopichi kvt Chihowa ya aiokpanchi.

1. KLENKLEA chvch hikia ka nan isht im vtta, pin tek, Febi ya hush aiokpancha he pit hvchim ai ahni lishke :

2. Yohmi hosh Chitokaka yak o ai achvfa hoka vbanumpuli ai yvmohmi yak o chiyuhmit hvsh aiokpvchashke : micha nana hoh kia isht apelucha hi a bunna hokma, hvsh apelashke : yohmi ka yummvt laua ka apelahanchi chatuk ; micha vno ak kia aieninchit si apelahanchi chatuk oke.

3. Klaist Chisus a ibai achvft svb a toksahanli Akuila, micha Plissilla ita tuklo ka hvsh aiokpvchashke.

4. Yummak okvt um ilhfiopak ak atuk pulla kak o ilap ikunla fehna ka aka ya bohonli tok : yummak oka vno ak illa keyu, amba Chentail iksa hiohli puyuta aiena kvt yak oke, im ai ahnishke.

5. Yummak ash chiyuhmit yamma in chuka vbanumpuli iksa maya ka hvsh aiokpvchashke. Epenetus a holitopa fehna, yummvt Klaist i yimmi kvt Akaia ya ai yvmohmit nan vni vmonna hatok a hvsh aiokpvchashke.

6. Meli ya hvsh aiokpvchashke ; yummak okvt pin toksahanli fehna hatok oke.

7. A kanomi, micha svbai yuka Antonikvs, micha Chunia itatuklo, yummak okvt vbanumpeshi vhleha ha i holitopa yoka hvsh aiokpvchashke ; yummak okvt sa tikba Klaist ai ibai achvfa hatok mak oke.

8. Amplias Chitokaka ya ai achvfa a holitopa ya hvsh aiokpvchashke.

9. Ulbani Klaist ai achvft piba toksahanli, Stakvs a holitopa aiena ka hvsh aiokpvchashke.

10. Apelles, Klaist vt ahninchi ya hvsh aiokpvchashke. Alistobulvs in chuka chvfa ai achvfa ka hvsh ai okpvchashke.

11. A kanomi Helotion a hvsh aiokpvchashke. Nasissus in chuka chvfa Chitokaka ai achvfa ka hvsh aiokpvchashke.

12. Tlaifina, micha Tlaifosa itatuklo, Chitokaka in toksahanli ya hvsh aiokpvchashke. Pasis holitopa, yummvt

Chitokaka ya in toksahanli fehna chatuk a, hvsh aiokpuchashke,

13. Lufus Chitokaka im vlhtoka, micha ishki, micha yvmvnt vshki ya hvsh aiokpuchashke.

14. Asinklitvs, Flekon, Hemas, Patlobus, Hemes, micha il itibapishi vhleha hvt yvmma apehvt maya aienka hvsh aiokpuchashke.

15. Filolokvs, micha Chulia, Nelevs, micha in tek, micha Olimpas, micha vbanumpuli yvmma apehvt maya aienka hvsh aiokpuchashke.

16. It i suksowa holitopa yo isht hvsh it aiokpuchashke. Klaist in chvch vhleha hokvt hvchi aiokpuchishke.

17. Yohmi ka itibapishi li vhleha ma ! nan vlbuchi hvsh ihvna kash i sanalit isht it i filvmmichi ; micha isht ibetvblichi aienka ihikbi hokvno, yakohmi hvsh ahni pulla cha, hvch ik ahilaiyo kashke.

18. Yohmi ka ilvppa chiyuhmi puta hokvto Chitokaka Chisvs Klaist ak o in toksvli keyu hoke, amba ilap ikfoka yak inli hoke : mikmvt anumpa achukma putā, micha isht ahninchia numpa puta aienka kak o nuktwhlv ahah ! ik ahno chukvsh puta ka isht haksichi hoke.

19. Yohmi ka isht hvsh im antia yokvt hatak moyuma ka im anohowa hoke : yvmohmi hoka hvchishno yak atuk pulla kak o sai yukpvhshke : yohmi ak inli kia nana achukma kak o hvch imponna cha, nan ik achukmo hokvno ik hvch imponna hok bano hvchim ai ahni lishke.

20. Mikma nan isht it i nanaiya in Chihowa yak osh Setan oka chekosikma chiyi nuta ya a litola chi hoke. Pin Chitokaka Chisvs Klaist isht i kana yvt hvchi anuk foyu kashke. Amen.

21. Timohlius svba toksvli, micha Lusivs, micha Chasson, micha Sosipata a kanomi aienka kvt pit hvchi aiokpuchishke.

22. Tetivs sia holisso ilvppa holissohonchi kash ot Chitokaka ibai achvfa hvchia ha pit hvchi aiokpvhchi lishke.

23. Uno, micha chvch moma aienka ka nan im atahli-Kaivs ash ot pit hvchi aiokpuchishke. Elastvs, tumaha in

tvli holisso sholi, micha il itibapishi Katus aienā kvt pit hvchi aiokpvchishke.

24. Pin Chitokaka Chisvs Klaist isht i kana yvt hvsh moyuma ka hvchi anukfoyukashke. Amen.

25. Yohmi cha Chisvs Klaist vt nan abahanchi tok v̄m v̄banumpa ak atuk na luma ituyula chatuk yakni toba tok itin takla ka isht ik anumpo chatuk osh isht anuhumpa ak atuk puyula mak o isht a hvchim ai ahlichā he im ai v̄lhpiesa hatuk,

26. Micha Chihowa okchayvt bilia yvt nan apihisa hatuk mak o hopaii vhleha hvt holissohonchi tok o, oklushi moyuma kvt na yimmit isht im antia chj mak o, im otaiyani hatok:

27. Chihowa hopoyuksa achvfa bano kash ot Chisvs Klaist ak atuk pulla kak o isht a holitopa yvt immit biliashke. Amen.

HOLISSO VMMONA PAL VT

KOLINHLA CHUCH

A HIKIA HO I HOLISSOCHI TOK.

CHAPTA I.

vbanumpuli Kolinhl a sha tuk a Pal vt pit ai okpvchi, mihmvt Chihowa ya aiokpvchi, 1; 10 itibachvft maya he i miha; 12 itakashapvt maya tuk a nan i miha. 18 Aka a nahopoyuksa yvt nan isht a hopoyuksa ka; 21 nan ik ahobo vbanumpa isht anumpuli kak o Chihowa yvt isht okpaninchi: 26 na hopoyuksa, micha nan i shahli aien a kak osh vlhtoka keyu, amba ik hopoyuksa, ik hlampko, aien a kak osh vlhtoka.

1. PAL, Chihowa nan ai ahni atuk pulla mak o Chisvs Klaist im apostel vlhtoka tok, micha il itibapishi Soshlenes ita tuklo kvt,

2. Chihowa in chuch Kolinhl a hikia, Chisvs Klaist ak atuk pulla kak o isht a kashofvt, vbanumpuli vlhtoka tok, micha pin Chitokaka Chisvs Klaist vt yvmma, micha pishno il ita tuklo ka pimmi hatuk o hohchifo ha anukchietot hoyot kanima moma ai asha aien ka pit i holissohonchishke.

3. Isht i kana, micha isht it i nanaiya aien Piki Chihowa, micha Chitokaka Chisvs Klaist ita tuklo ka a mihinti kvt hvchi anukfoyukashke.

4. Yohmi ka Chisvs Klaist ak atuk pulla kak o Chihowa hvit ilap isht i kana ya hvch ima hatuk oka, an Chihowa ya hvchishno yak atuk pulla mak o yak oke im ai ahni li biliushke.

5. Yohmi ho nan okluha kvt yvmmak o isht a hvchin

laua hosh isht anumpuli puta, micha nan ithana puta kvt isht a hvchim aienushke.

6. Yakohmi hosh Chisvs Klaist nan isht atokowa yash osh hvchishno a isht ai ahli hatuk oke.

7. Yohmi hosh na hvlbina nana kia ik ai ono ho hvsh ishi tuk keyu hatuk osh; pin Chitokaka Chisvs Klaist vt otaiyana hi a hvsh hohoyo hoke.

8. Yummak ash inli hosh hvchi ai ahlihinchit ont ai vhli ka isht hvch ona hi oke: yohmi ho pin Chitokaka Chisvs Klaist i nitak fehna ka anumpa isht a hvchi onvtula hi vt iksho ka hi oke.

9. Chihowa hut ai ahli yoke, yummak o ilap Ushi pin Chitokaka Chisvs Klaist a ai ib ai eshi isht a hvchi vlhtoka hatuk oke.

10. Yohmi ka itibapishi li vhleha ma! nana a miha chufa ho isht hvsh anumpula he, mikmvt ai it i filvmmi puta kvt ik hvchim iksko ka he; amba nana hosh ai ahni kvt hvchim anukfila hut ai ahli fehnvt hvsh it ibafayuka he mak o, pin Chitokaka Chisvs Klaist isht a hochihifo hosh hvchim ai ahni lishke.

11. Itibapishi li vhleha ma! nan itachowa yvt hvchin tak-la a takali ka, Kloe in chuka chufa yosh vmt anoli hatuk oke.

12. Yohmi ka hvsh moma kvt, Uno ak osh Pal ai achufa sia; anonti, Uno mvt Apollos ai achufa sia; mikma, Uno vto Sefas ai achufa sia; yohmik ma, Uno vto Klaist ai achufa sia; hvsh achi ilvppak o achi lishke.

13. Klaist vt ita kvshkoa ho? hvchishno atuk mak o Pal ak osh ititaiyukhvna ai illi tok o? keyukmvt Pal i hohchifo ho isht hvchi baptismo tok o?

14. Hvsh kanima kia ak hvchi baptismocho hosh Klispvs, micha Kaius ita tuklo bano tok a yak oke, Chihowa ha im ai ahni lishke.

15. Yohmi hatuk o uno ak inli a hohchifo ho isht baptismochi li tok a, hvsh kanima kia hvsh acha he keyushke.

16. Mikmvt Stefanvs in chuka chufa ak kia baptismochi li tok; inla yano baptismochi likmá, nana tuk vt ak ithanoshke.

17. Baptismochi la hi o, Klaist vt si atokoli tok keyu hoka, amba vbanumpa isht anumpuli la he ak atok: anumpa hopoyuksa ya he atuk keyu, yohmi hokma Klaist im ititaiyukhvna yvt nan ai ahla he keyu hoke.

18. Ititaiyukhvna isht anumpuli yokvt kyna hosh ilvshut illa chi yummak o ik im ahobo yoke: amba okchaya chi pishno ak okvno Chihowa nan isht im ai ahli yoke.

19. Nan imponna isht a hopoyuksa yokvno okpvni la chi, mikmvt nan ithana nan isht akostininch yano akshochi la chi, achi hosh holihiso hatok oke.

20. Katima yak o na-hopoyuksa yvt anta ho? katima yak o na-holissuchi yvt anta ho? yakni ilvppa nan isht ai it i ponaklo yvto katima yak o maya ho? yakni ilvppa isht a hopoyuksa ya Chihowa hvt ik ahobalecho hatuk keyu?

21. Nan isht a hopoyuksa hosh Chihowa hvt nan atahli tok kia, yakni vt ilap hopoyuksa kak osh Chihowa ya isht ik ithano ma, vbanumpa isht anumpuli ik ahobo kia, kyna hosh yimmi hokvno mihi yo Chihowa hvt vlhpesa, ahnit isht okchalinchi yoke.

22. Chu okla hvt nan isht atokowa asihihla, mikma na hopoyuksa yo Klik vto hohoyoshke:

23. Yohmi kia pishno vto Klaist ititaiyukhvna ai illi tok a isht il anumpohonli ka, Chu okla hokvno isht ai im ibetv bli yokmvt, anonti Klik okvno nan ik im ahobo yoke;

24. Yohmi kia Chu okla, mikmvt Klik okla ita tuklo ka kanima hosh vlhtoka hokvno mihi yo Chihowa nan isht im ai ahli, micha Chihowa nan isht im ahopoyuksa Klaist a isht il im anumpohonlishke.

25. Chihowa nan isht ik im ahobo yvt hatak okvno hopoyuksa kvt i shahli hoka; micha Chihowa yvt isht ik a hlampko ahoba kia hatak okvno hlampko kvt i shahli loke.

26. Itibapishi li vhleha ma! hvchishno vto hvchi vlhtoka hokvto yakni pakna a hopoyuksa yvt ik lauwo, nan isht ai ahli ishi kvt ik lauwo, hatak holitompa aien a kvt ik lauwo hosh vlhtoka ka hvsh pisvshke:

27. Yohmi kvt ilap hopoyuksa ya hofahyala chi kvt

Chihowa hvt yakni ilvppa nana ik ahobo puta ka atokoli hatuk; micha nana hlampko yummma hofahyala chi kvt yakni ilvppa ik a hlampko yo Chihowa hvt atokoli hatuk:

28. Mikmvt nana kvt yakni ilvppa ik a holitopo, micha nana kvt yummma ik aij ahobo aienka, Chihowa hvt atokoli hatuk; ahli, yohmi kvt nana ashata tuk a akshocha chi kvt nana kvt iksho ke tuk a atokoli hatuk:

29. Yohmi ho hatak nana kia Chihowa itikba ya ai ilauata he atuk keyu hoke.

30. Yohmi kia hvchishno vto yummak atuk mak o Klaist Chisvs a hush ibai achufa ka yummak o Chihowa pulla kak o isht pi a hopoyuksa, micha isht pi ai vlhpiesa, micha isht pi a kashofa, micha isht pi ai vibi yoke:

31. Yohmi ka holisso hatuk oka, Kvna kia ilauata hokmvt, Chitokaka yak o isht ik ilauatá.

CHAPTA II.

vbanumpa isht anumpohonli ka Chihowa nan isht im ai ahli yosh ai ibafouyuka tuk a, Pal vt achi, 1. 14 Im anukfila himona hatak keyu hokvto vbanumpa ha ik akostinincho.

1. YOHMI ka itibapishi li vhleha ma! kaniohmi kash hvchim ona li kvt, Chihowa isht atokowa yo hvchim anohonli la chi kvt, isht ahnincha he anumpa hokma, keyukmvt isht ahnincha he hopoyuksa hokma, nana ho isht hvchim aya li hatok keyu hoke.

2. Nana ka a hvchim ai ithuna la he ahni li hatok keyu, amba Chisvs Klaist, micha yummak osh ititaiyuhuna ai illi tok ak bano hatok ak oka.

3. Yohmi mvt isht a hlampko iksho, mihmvt komunta, micha wunihinchi fehna hosh hvchin takla ya ahanta li tok.

4. Mihamvt anumpuli li, micha vbanumpa isht anumpuli li aienka kvt, hatak hopoyuksa nan isht yukpali anumpa hatok keyu, amba Shilombish, micha nan ahli yo otvninchit isht anohonli li tok:

5. Yohmi ka na hvchi yimmi kvt hatak nan isht im a

hopoyuksa yo a minta chi hatok keyu, amba Chihowa nan isht ai ahli yak a he atok.

6. Yohmi kia vbanumpa ithana ahli yokvno na hopoyuksa yo isht il im anumpulishke: yohmi kia yakni ilvppa isht a hopoyuksa yak keyu; mikmvt yakni ilvppa i miko vhleha isht a hopoyuksa, yummak okvt ont ik ai iksho ka he ak atuk keyushke.

7. Yohmi kia Chihowa isht im a hopoyuksa yummvt luma hatok a yvmma isht pi a holitopa hi o, yakni vt ik tobo kisha ma, Chihowa hvt apesa tok ak o isht il anumpohonlishke.

8. Yakni ilvppa i miko vhleha achvfa kia ilvppak ash ik ithano ki tok: okla ithana hatuk okmvt, a holitopa in Chitokaka ya ititaiyukhuna ai vba he atok keyu hoke.

9. Yohmi kia kuna hosh yummak i hullo hokvno mihi yo Chihowa hvt nana ka im ataiyahli tok a, yummak oka hatak nishkin vt ik pesokma, anonti haksobish vt ik haklokma, hatak chukvsh ak kia ik anukfohko hoke, achi hosh holihiso hatuk oka.

10. Yohmi tok o Chihowa hvt ilap imi Shilombish pulla ho yummak ash isht a pim otvninchi hatuk: Shilombish ak osh nana puta ka silhhit ithana hokvt, ahli, Chihowa nana im a kaniohmi a hofobi kak kia ai yvmohmi yoke.

11. Kvta hosh hatak nana im a kaniohmi puta ka ithana cho? hatak shilombish yummvt ilapa anukfoyuka ak illa keyu? yummak i chohmi ho Chihowa nana im a kaniohmi puta ka hatak nana hosh ithana keyu ho, amba Chihowa imi Shilombish ak illa hoke.

12. Yohmi ka yakni nana isht ai im anukfila yo il ishi hatuk keyu, amba Chihowa hatuk mak o nana puta ka il ishi hatuk vt il ithana chi pulla hosh Shilombish Chihowa a minti ho il ishi hatuk oke.

13. Nana puta yummak isht il anumpohonli kvt yummak hatak nan isht im a hopoyuksa yosh abvchi anumpa keyu, amba yummak oka Shilombish Holitopa yosh abvchi anumpa ho Shilombish nana im a kaniohmi ya Shilombish anukfoyuka vhleha ho il ithvnahanchishke.

14. Hatak chukvsh ik kashofo hokvto Chihowa imi Shilombish nana im a kaniohmi puta ka ik ithano yoke; yummak okvt ilap a nana ik ahobo hokvt: mikmv̄t ithana he keyu, yummak ash o Shilombish osh abuchi hoka.

15. Yohmi ka kvna hosh Shilombish anukfoyuka hokvto nana puta ka anukfillit akostininch, yohmi kia ilap okvno hatak nana hosh im akostininch keyushke.

16. Kvta hosh Chitokaka im anukfila ha ithaiyana cha, mihi yosh nan im abucha hinla cho? Yohmi kia pishno yokvto Klaist im anukfila yo il ieshvshke.

CHAPTA III.

Pishukchi vt vlla chipunta yak o immi, 1 : 3 kaniohmi ho itakvshko hatuk a haknip imma im anukfila hatuk vt otvni. 7 Kvna hosh hokchi, mikma kvna hosh oka o foechi itatuklo kvt nana keyu: 14 Chihowa ak osh wayachi. 16 Vbanumpuli yvt Chihowa in tempel; 19 yakni nan isht ahopoyuksa yokvto Chihowa i nahopoyuksa keyu.

1. YOHMI ka itibapishi li vhleha ma! Shilombish anukfoyuka ho chohmichit hvchim anumpohonli la he keyu, amba haknip nan ai ahnit Klaist ibai achvfa vlosi yo hvchi chohmichi lishke.

2. Pishukchi yo isht hvch ipeta li tok, ilhpak kvlo atok keyu; tikba kamo isht a hvchim vlpesa tok keyu kvt himonasi ak kia, isht a hvchim vlpesa keyu momvshke.

3. Haknip nan ai ahni hvchia moma hoka iti potvnno, micha itachowa anonti iti filamohli aieno kvt hvch itin takla aiascha hoka, haknip nan ai ahni mak o hvchia moma, micha hatak im anukfila yo chohmit hvsh itvnohōwa keyu?

4. Hvsh kanima kvt, Uno vto Pal ai achvfa sia; anonti inla mut, Uno vto Apollos ai achvfa sia, hvsh achi hokvt haknip nan ai ahni hvchia mak o keyu?

5. Yohmi ka kvta hosh Pal okmá, anonti kvta hosh Apollos o? amba vbanumpa isht vta yummak atuk mak o hvsh moma ka Chitokaka yvt hvchi anukfohki tuk mak o, hvchi vimmi tuk oke.

6. Hatak moma kvt yohma he mak o Chitokaka yvt ape-sa tok o, Uno ak osh na-hokchi li tok, Apollos vto oka on hlali tok; amba Chihowa yokvto offochi hatuk oke.

7. Yohmi ka kuna hosh hokchi, mikma kuna hosh oka isht on hlali hokvto na kanihma he keyu, amba Chihowa yummak osh offochi yoke.

8. Yohmi ka kuna hosh na hokchi, anonti kuna hosh oka isht on hlali ita tuklo kvt itibai achvfa yoke: yohmi ka moma kvt ilap na toksvli isht ai vlhpiesvt vlhtoba ak illa ho isha hi oke.

9. Chihowa immi hosh itiba toksvli vhleha pia hoke. Chihowa nan im ahollokchi hvchia, micha aboha Chihowa hvt atahli tuk mak o hvchia hoke.

10. Chihowa hvt ilap nan isht i kana yummak vma tuk mak o aboha ikbi imponna hopoyuksa yo chohmit in tolahpi ya bohli li hatuk, mihma inla yosh yummak ash o ai itvbuni hoke. Yumohmi hoka hatak moma kvt kanimihehit yummak ash o ai itvbuni kvt ahah! ahnashke.

11. Intolahpi yummvt Chisus Klaist, yummak osh itola ha ya, hatak nana hosh inla ya bohla he keyu hoka.

12. Yohmi ka hatak kuna kia intohlapi ilvppa pakna ya tvli holisso lakna yokmá, tvli huta yokmá, tvli ai vltbi chito yokmá, iti yokmá, hvshuk okmá, onush vpi yokmá, nana ho isht itvbuni tuk okmá;

— 13. Nana vlhtaha tuk aiyuka kvt otaiyana hi oke: nitak yummak osh otvinincha he, luak o isht otaiyana hi oka; ymohmi ka hatak a im a toksvli aiyuka kvt kaniohmi hatuk oh kia, luak osh imomaka pisa hi oke.

14. Yummak ash pakna ai itvbuni tuk a hatak nana hosh atoksvli tuk ak o ik okpulokma, mihi yosh nan vlhtoba ya isha hi oke.

15. Kuna hosh atahli tuk a lua hokma, yummak osh i kvniyt ilvusha hi oke: yohmi kia ilap okvto okchaya he, yohmi kia luak o a hlopulli kak inli ho chohma hi oke.

16. Chihowa in tempel hvchia, yohmi hatuk o Chihowa imi Shilombish vt hvchia chukyt anta ka hvch ik ithano cho?

17. Kvna kia Chihowa in tempel a litehlikma, mihi yo Chihowa hvt ishit kancha he ; Chihowa in tempel vt holitopa yoka, tempel yummak o huchia hoke.

18. Kvna kia ik ile haksecho kia. Huchi kania hosh yakni ilvppa hopoyuksa ho ilahobikmt, yummvt hopoyuksa chi kvt yakni ilvppa ik ahobo yo ik tobä,

19. Yakni ilvppa isht im a hopoyuksa yokuto Chihowa ya isht ik im ahobo yoka. Yummak oket hopoyuksa ya ilap nan isht imponna ak inli ho isht ishi yoke, achi hosh holisso tok oka.

20. Mihmvt anonti atuklanchi mvt, Chitokaka yvt hopoyuksa im anukfila puta, yummvt ai ahlí ik ono ka ithaiyana hoke, achi tok.

21. Yvmohmi hoka kvna kia hatak puta ho isht ik ilauato kia, nana moma kvt huchimmi hoka ;

22. Pal ak okmá, keyukmt Apollos, keyukmt Sefas, keyukmt yakni ilvppa, keyukmt ilhfiopak okchaya, keyukmt nan illi, keyukmt nana kvt himonasi asha, keyukmt nana kvt asha he moma kvt huchimmi yoke.

23. Mikma huchishno vto Klaist immi huchia ; mikma Klaist vt Chihowa immi hoke.

CHAPTA IV.

Kaniohmit Klaist im vbanumpa isht vta ya il ahnicha he tuk 1 ; 7 nana ka e habena tuk keyu kvt il i shi keyu. 9 Apostel vhlehvvt yakni pakna ik ahobo yo isht vlpisa, 16 yummak o il im antia he tuk.

1. KLAIST in tishu vhleha, micha, nan ahlí Chihowa hvt otvninchi tok puta nan im apesvchi vhleha mak o, chiyuhmichit hatak puta kvt isht pi anukfillashke.

2. Anonti nan apesvchi vhleha nan isht im vlpisa kvt hatak yummvt ai ahlí hi ak oh chatuk oke.

3. Yohmi kia huchishno, keyukmt hatak inla nana kia nana ho isht hv̄s sv̄m anukfillit hv̄sh apesa kia, vno yokuto

yummvt vm iskitinosi fehna hoke; ahli vno ak inli kvt isht il anukfillit nan apesa li keyu hoke.

4. Uno ak inli kvt nana ho isht il akostininchli keyu kvt; yohmi kak osh ilvppak o isht si ai vlpiesa hi o keyu; amba kvna hosh nan isht si anukfillit apesa hokvto Chitokaka yak oke.

5. Yvmohmi hoka Chitokaka yvt ik lo kisha ka tikbalinchit nan isht anukfillit hvch ik apeso kashke, yummak osh ai okhlilika ya nana kvt a luma puta tuk a otvnninchikmvt, anonti chukvsh im anukfila puta hatuk ma haiakahancha hi oke; yvmohmi ha ya hatak moma kvt nana ai isha he vlpiesa tuk vt Chihowa ya im ai isha hi oke.

6. Yohmi ka itibapishi li vhleha ma! yvmma puta kash hvchishno pulla hatuk mak o, vno, mikmvt Apollos, ita tuklo li kak o isht il onochi li: yohmi ka nana kvt holisso tok a shahlichit hatak o isht ik hvchim anukfilo hosh pishno ak o hvsh pim ai ithvnashke; yohmi hosh hvsh achvfonia kia achvfa ka ish ile fehnvchit, anonti achvfa ka hvch ik i sanalo kashke.

7. Kvta hosh hvch iti shashohlichit hvchim apesa tok o? Nanta ho ish ishi hosh yvmma chik habeno tok o? yohmi ka ish habena hatuk mvt, nanta katiohmi ho chik habeno ke tuk ak inli ho chohmit isht ish ilauata cho?

8. Himak ano na hvchi fihopa, himak ano na hvchin laua, ik piksho ho mikot hvsh mayvshke; yohmi ka hvsh mikot hatuk o mrhli hokbano ahni li, yummak atuk mvno pishno ak kia e hvch iba mika he atuk.

9. Illa he isht im vlpisa kak o chohmit vbanumpeshi ishtaiyopi pishno a Chihowa hvt pi atokoli tuk a vm ahoba hoka; yakni moma, mikmvt enchil vhleha, mikmvt hatak puta itikba a yopissa e toba tok oka.

10. Klaist atuk mak o ik pi ahobo ma, amba hvchishno vto Klaist a isht hvchi a hopoyuksa hoke: ik pi hlampko ma, amba hvchishno vto hvchi hlampkoshke: hvchi holitopa ma, amba pishno vto ik pi holitoposhke.

11. Pi hohchahafot, pi tukshihinla, micha haknip bieka, mihma pi pvsahha; yohmi ho ai vta ahli yvt ik pim iksho na ant himakvshke.

12. Mihmvt pishno pibbak ak inli ho isht toksahanli hosh ont pi a hoyublishke. Isht pi atukhlakahafa kia, i kanvt il anumpohonlishke : pi palvumihinchi kia, vlpiesa il ahnishke.

13. Ik ahobalot na pi achi kia, i kana hosh il im anumpohonlishke ; yakni pakna im a liteha ak inli ho a pi chiyuhmi, mikma nana moma isht liteha chukvlhpvsh ak o e chiyuhmi na ant himakvshke.

14. Hvchi hofahyali la he osh ilvppa puta ka holissochi li keyu, amba tm vlla a holitopa hvsh chiyuhmi kvt ahah ! hvsh ahana chi kak o hvchi miha lishke.

15. Klaist nan isht ithvnanchi tahlepa sipokni pokoli hosh hvchim ai asha hoh kia, hvch iki vt ik lauwoshke ; Klaist Chisus osh nan apelvchi ho vbanumpa pulla ho isht hvchi tobachi li tuk oke.

16. Yvmohmi hovt hvs siakaiya hi a hvchi miha lishke.

17. Ilvppa yakohmi kak o Timohliws, svso a holitopa, Chitokaka im ai ahlit achukma ya pit hvchi kanchi li ka, mihi yosh kanima moma iksa a hiohli puta ka Klaist isht abvchit, nana a kaniohmi li puta ka anolit hvchi anukfohki-cha hi oke.

18. Yohmi ka ak hvchim ono ka he im ahobvt, hvsh kanimi kvt isht hvsh ilefehcvcvchishke.

19. Yohmi kia Chitokaka yvt vlpesa ahnikma, chekosi hvchim ona la chi hoke : yohmi kvt ilefehnvchi vhleha hatuk yummak ash im anumpa hak a chi keyu, amba nan ai ahl yak o ithana la chi hoke.

20. Chihowa im apehliechika yokvt anumpa ho keyu, amba nan isht ai ahl yak oke.

21. Nanta ho hvsh ahni ? fuli yokmá, keyukmvt i hullo, micha chukvsh im anukfila yohbi hokmá, nanta ho ieshi hosh hvchim ona la chi cho ?

CHAPTA V.

Hau i mvt Kolinhla chvch a ibvlhkahvt maya kak osh hofahyalichi,
1; 10 nan ibetrblichi okpulo yokvno hofahyalit kano pit kancha
he vlpesa.

1. ITIN lumaka yvt hvch itin takla ya asha kvt anohowa fehna hoke; yohmi ka kvna kia iki tekchi atuk a itauwaya, nan itin lumaka chohmi kvt Chentail okla ak kia ai yumohmi fehna chatuk keyu hoke.

2. Yohmi ka kvna hosh na yakohmi ka yvmihchi tuk vt hvch itin takla ya a filvmma chi ka, ik hvchi nukhaklo kish, isht hvsh ile fehnvhishke.

. 3. Sa haknip ovno isht a hvchi filvmmi li mvhli; yohmi kia sa shilombish ovno isht hvch ibafokvt hvch itin takla ahanta li ka chohmit, kvna hosh na yakohmi ka yvmohmi tuk mihi yo nana im apesa li mashkoshke.

4, 5. Kaniohmi ho pin Chitokaka Chisvs Klaist i hohchifo ho isht itvnahvt hvsh chiyakma, sa shilombish vt a hvch iba foyuka na pin Chitokaka Chisvs Klaist nan isht im ai ahli pulla hatuk mak o, kvna hatuk ash haknip isht ai im ilvusha tok osh Chitokaka Chisvs Klaist i nitak vla hokvno imi Shilombish okuto okchaya chi ka, Setan ak o hvsh im issashke.

6. Nan isht hvsh ilauata ka ik achukmoshke. Nan isht shatvmmi iskvtnosi kia na yummuska moma ka yummichi ka hvch ik ithano cho ?

7. Yvmohmi ka ik yvmmo hvchia hokvt, na yvmmuska himona mak o hvchia ha chi kvt, nan isht shatvmmi tikba yash isht ile filvmmichit hvsh kanchashke. Klaist vt na pim vbanvblit ont ia yvt vlhtobvt illi tok oka.

8. Yomohmi hoka impa holitopa isht kiloh ai ashá; yohmi kvt nan isht shatvmmi tikba yash o keyu, mikmut isht iti nukkilli, micha nan ik ai vlhpeso aienka isht shatvmmi yak o keyu, amba nan ilahobi keyu hosh ai ahli i puska ik shatvmmo yak ashke.

9. Itin lumaka vhleha ha hvch ik itiba chvfo ka chi ho, holisso ha hvchi holissochi li tuk oke.

10. Yohmi kak osh yakni ilvppa ai itin lumaka vhleha, mikmut nan anushkunna atampa vhleha, micha na wehpuli vhleha, mikmut na holbut toba aiokpvchi vhleha aienka hvch ik itupeho kumohma he ak atok keyu; yohmi hokmut yakni ya hvsh a kohcha he ak osh hvchim vlhpesa hoka.

11. Yohmi tok kia kuna hosh itibapishi hohchifo hatuk vt itin lumaka, keyukmvt nan anushkunna atampa, keyukmvt na holbut toba aiokpuchi, keyukmvt inla isht itukhlakafa, keyukmvt oka homi ishko, keyukmvt na wehpuli okmá, nana hokvno hvch ik itibai achufokmvt, yvmmma chohmi kash impa kia hvch ik itibai impo ka hi o himak a hvchi holissochi lishke.

12. Kuna hosh iksa ibafokha yatuk keyu yvmmak kia nanta ho isht im apesa la he vlpesa ho? iksa ibafokha yvmmak atuk okvno hvsh im apesa keyu ho?

13. Amba kuna hosh iksa ibafokha keyu hokvno Chihowa yosh nan im apesa yoke. Yumohmi hoka hatak nan ashvuchi yvmmak ash ai il i filvmmichit hvsh kanchashke.

CHAPTA VI.

Obanumpuli vt nan vlpesa isht it onocha he keyu, 1; 9 nan ik vlpeso vto vba apehlichi ka ai ahanta he keyu. 15 Hvpi haknip vt Klaist a ibachufa, 19 mikmvt Shilombish Holitopa in tempel oke.

1. HUSH kanimi kvt inla ya nana hvsh iti kaniohmikmvt, nan ik vlpeso itikba yo ont nana hvchim vlpesa hi osh hvsh ahni cha, amba na yimmi vhleha itikba yokvno keyu ka hinla hatuk o?

2. Na yimmi vhleha hut yakni moma nan im apesa hi a hvch ik ithano cho? yohmi ka yakni a nan hvsh im apesa hi okmvt, nana kvt iskvutinosi hokvno hvsh apesa he hvchi vlpesa keyu ho?

3. Enchil vhleha ha nan iloh im apesa hi a hvchik ithano cho? yohmi hokvt okchaya ilvppa nana im a kaniohmi yokak heno il i shaiyahlichi fehna hinla keyu ho?

4. Yohmi ka okchaya ilvppa nana im a kaniohmi yo nan isht hvchim vlpesa chi hokmvt, kuna hosh iksa im a holitopa keyu mihi yosh na hvchim apesa chi ka, hvsh atokoli chatuk oh cho?

5. Hvchi hofahya chi ho hvchim anumpuli lishke. Hatak hopoyuksa kvt hvch itin takla ya iksho ho? achufa kia

itibapishi vhleha nan iti kaniohmi ka im apesa he keyu kvt iksho ho? yohmi ho mvhli ho?

6. Yohmi kia itibapishi achufa kvt itibapishi atuk a anumpa onochi cha, nan ik yimmo vhleha itikba yo nana im vlhpisa chi kvt ohonvshke.

7. Yomohmi hoka himonasi kia anumpa itonochit nan im vlhpisut hvsh maya hokvt, nana hvsh ashuchi fehnvshke. Nanta katiohmi ho nan ik vlhpeso ka hvchi onocha he hvch ik im ahno hosh? nanta katiohmi ho nana ka ik vlhpesachot hvchim isha hi a vlhpesa hvchik im ahno hosh?

8. Yohmi keyu, amba hvch itibapishi ak kia ai vlhpiesa keyu ho na hvsh im ishi kvt, nan hvsh ashuchi hoke.

9. Ik vlhpeso vhleha hokvt Chihowa im apehlichika yvt ai immi ha he vlhpesa keyu ka hvch ik ithano cho? hvch ik ile haksecho kashke; itin lumaka vhleha, naholvvt toba aiokpvchi vhleha, micha haui vhleha, micha nakni haui vhleha, micha nakni bika iti hauichi vhleha,

10. Micha hvkopa vhleha, micha nan anushkunna atampa vhleha, micha oka homi ishko vhleha, micha inla isht ituk-hlakafa vhleha, micha na wehpuli vhleha, aieno hokvno Chihowa im apehlichika yvt ai immi toba he vlhpesa keyu hoke.

11. Yohmi ka hvsh kanimi kvt yummma chohmi hvchia hatuk oke. Yohmi tuk kia hvchi ahchifa hatuk, mihmvt hvchi kashofa hatuk, yohmi kvt Chihowa imi Shilombish pulla ho Chitokaka Chisus i hohchifo ho isht a hvchi vlhpiesa hoke.

12. Nana puta kvt isht um ai vlhpesa, yohmi kia nana puta kvt isht um ai achukma keyu; nana puta kvt isht um ai vlhpesa, yohmi kia yummma kanima kak oh kia i yuka la he keyu hoke.

13. Il impa hut takoba yak o immi hoh chatuk oke, mik-ma takoba yato ilimpa hak o ai immi hoh chatuk oke: yohmi kia yummak ash o it aieninchit Chihowa hut iksho-kecha chi hoke. Yohmi ka haknip okvt haui yak o ai im vlhpisa keyu, amba Chitokaka yak oke: yohmikma Chitokaka yvt haknip a nan im atahli yoke.

14. Yohmi kvt Chihowa hut Chitokaka ya tanichi hatuk

okvt anonti pishno a ilap nan isht im ai ahli yo isht pi tani-cha he ak inli hoke.

15. Yohmi ka hvchi haknip vt Klaist a ai it immi ha hvch ik ithano cho ? yohmi hatuk a Klaist a ai it immi hash ishi lish, anonti haui yo ai it immichi la chi cho ? ik yvmohmo pullashke.

16. Yakeh ! kvna hoh kia haui yo ibafohka kvt, yvmmvt haknip achvfa ka hvch ik ithano cho ? tuklo tuk kia haknip achvfa toba hi oke, achi hoka.

17. Amba kvna hosh Chitokaka ak o ibafokkakmvt, shilombish achvfa hoke.

18. Hau i y ili filummichit hvsh m lelashke. Kvna kia nan ai ashvchika moma ka yvmihchi hokvto, haknip okvno nana kanihchi keyu hoke : amba kvna hosh itin lumaka hokvto, ilap haknip ak inli ho okpanit nan ashvchi hoke.

19. Yakeh ! hvchi haknip vt Shilombish Holitopa mihi yosh hvchi afoka, yvmmak osh Chihowa a minti ho hvsh ieshi, yvmmak o in tempel hvchia hosh, hvchishno ak inli kvno keyu kvt hvch ik ithano cho ?

20. Nan ai vlli ho isht hvsh ai vlhtoba hatok : yvmohmi hokvt hvchi haknip, micha hvch imi shilombish, yvmmak okvt Chihowa immi hoka, Chihowa y isht hvsh holitoblashke.

CHAPTA VII.

Nan itauwaya imma ka miha, 1 ; 4 mikmvt ik iti lumako ka hi a itau waya hi a miha : 10 nan itauwaya kvt pilla ik ahobot itimokofa he keyu : 18 moma kvt ilap nan im vlpisa kvt vlpesa ahnit ahi kia he ; 25 ohoyo himithoa itauwaya ka nan isht anumpuli.

1. YUMOHMI ka nana ka hvs sa holissochi tok imma kak oke. Hatak vt ohoyo ha ik potolo kak osh im achukma hoke.

2. Yvmohmi kia itin lumaka iksho ka chi kak o, hatak moma kvt ilap tekchi ak inli ho ieshikma, anonti ohoyo moma kvt i hatak ak inli ho ieshashke.

3. I hatak vt ohoyo ha isht ai im vlpesa ka imashke : mikma tekchi atuk ak kia i hatak a mihinlohimchashke.

4. Tekchi vt ilap haknip ak ő immi hő keyu, amba i hatak ak oke; mikma i hatak ak kia mihi yo chohmit ilap haknip a immi keyu, amba tekchi ak oke.

5. Isht im ai vlpiesa hatuk ash hvch ik it im esho kashke, amba anumpa ilbusha hvsh anumpuli fehna chi hosh chekosi itin takla yo hvsh it im ahni hok mak ashke; atuk osh nan isht il ai oktambli ik hvchim iksho ki Setan vt imomaka hvchi pisa hinla ka, atuklant hvsh it im onashke.

6. Yohmi kia uno nana um anukfila hosh ilvppa isht hvchim anumpuli lishke, yohmi kvt nana isht um vlpiesa tuk keyu hoke.

7. Hatak puta kvt uno ak inli chiyuhma he ak ő ahni lishke. Yohmi kia hatak moma kvt Chihowa i nan hulbina ya isht im vlpiesa cha, achufa kvt ilvppak ő isht ai im vlpiesakma, anonti inla yvt yummak ő isht im vlpiesa yoke.

8. Yvmohmi ka nan ik itauwayo kisha, micha i hatak illi vhleha aieno kvt, Uno ak inli chohmit maya hinla hokmuto, im achukmushke, achi lishke.

9. Yohmi kia okla il oktampla he keyu muto, okla itauwayashke: itauwaya kak osh lua hi a im i shahli hoke.

10. Anonti itauwaya vhleha hokuno im apesa lishke; yohmi kia uno ak keyu, amba Chitokaka yak oke; Tekchi atuk vt i hatak atuk a ik i filummo kashke.

11. Yohmi kia anonti tekchi atuk vt filummi hokmuto, inla ik auwayo hosh antashke: keyukmvt i hatak atuk ash ő i kanvt i falamashke; mikma i hatak vt tekchi a ik kancho kashke.

12. Yohmi ka inlaka yano uno ak osh anumpuli li, Chitokaka yak keyu; iloh itibapishi kuna kia tekchi ik yimmo, yohmi kia yummak ash ő awant anta kvt im achukmakma, yummak ik kancho kashke.

13. Anonti ohoyo hvt i hatak osh ik yimmo, yohmi kia yummak ash awant anta kvt im achukmakma, yummak ik kancho kashke.

14. I hatak vt ik yimmo yvt tekchi atuk pulla mak ő isht im a kashofa yoke; mikma tekchi nan ik yimmo yvt i hatak atuk mak ő isht im a kashofa yoke; yummak keyukma hv-

chim vlla yvt ik kashofo ka he tuk; amba himak ano holitopa hoke.

15. Yohmi kia ik yimmo yvt filvmmi hokmvt, filvmmi ayashke. Yvmmma chohmi hokvno il itibapishi yokmá, pin tek okmá, nana hash osh i yuka he keyushke; yohmi ka Chihowa hvto iti nanaiya he ak o pi atokli tuk oke.

16. Tekchi chia ma! chi hatak a ish okchalinchikmá nana chi kvt nanta ish ithana cho? mikma hatak chia ma! chi tekchi a ish okchalinchikmá, nana chi kvt katiohmit ish ithana cho?

17. Yohmi kia Chihowa hv̄t kaniohmichit hatak moma ka i hopehinla hatuk, Chihowa yvt moma achufalechit atokoli tok; yohmi hoka yummak o ik ai itvnowá. Yohmi ka chvch hiohli moma ai yvmohma chi mak o apihsa lishke.

18. Kvna kia hakshup tupa yvt vbanumpa nukfohka ho? Yohmi hokmvt hakshup ik tapo yo ik tobo kashke. Kvna kia hakshup ik tapo yosh vbanumpa nukfohka ho? yohmi hokmvt hakshup tupa keyu kashke.

19. Hakshup tupa yokvto nana keyu, mikma hakshup ik tapo yokut nana keyu, amba Chihowa i nan vhpisa holito-hombli kak oke.

20. Hatak moma kvt kaniohmit antvt vbanumpa anukfohka tuk vt, yummak inli ho anukfoyukvt isht ahantashke.

21. Yuka chia hosh vbanumpa chi nukfohka ho? yohmi hokmvt na yohmi chik ahno kashke; yohmi kia yuka keyu ish toba hinla hokmvt, yummak o ish yvmlhchashke.

22. Kvna hoh kia yuka hosh Chitokaka isht anukfoyu-kakma, mihi yosh Chitokaka immi yuka keyu hoke; yummak ash inli ho chohmit kvna hosh yuka keyu yosh vbanumpa anukfohkokmvt, mihi yosh Klaist in tishu yokvt.

23. Nan ai vlli yo hvsh ai vibi hatuk; hatak i yuka ho hvchia keyu kashke.

24. Itibapishi li vhleha ma! hatak moma kvt kanima yo hikvt anukfohka tuk mvt, Chihowa im antihiyvt yummak inli ho antashke.

25. Yvmoymi ka ohoyo himithoa hatak haleli keyu vhleha imma kak a he tuk okvno Chitokaka i nan vhpisa yvt ik

svm ikshoshke : yohmi kia ai ahla chi hosh Chitokaka nan isht i nukhaklo ahayuchi tuk mak o, chohmit vno vm anukfila ha ima lishke.

26. Yohmi kia himonasi yokvno nan isht palvmmi ak atuk mak o ilvppak okvt achukma, ahni li ; na yakohmi ka hatak vt yohmi kak o achukma, achi lishke.

27. Tekchi a ish a talaiyakchi ho ? i holhtoyufa he, chik, ahno kashke. Chi tekchi a ish i holhtoyufa ho ? tekchi a chik hoyo kashke.

28. Yohmi kia anonti ish itauwaya hokmvt nana ish ashvchi tuk keyu hoke : mikma ohoyo himita hatak haleli keyu yosh hatak auwaya hokmvt, nan ashvchi tuk keyu hoke. Yvmohmi ak inli kia yvamma chohmi kvt haknip nan isht ik im vlhpieso ka he ; yohmi kia hvchi kanvt nana kaniohma hi okvno ak hvchim analoshke.

29. Yohmi ka itibapishi li vhleha ma ! ilvppak o achi lishke : nitak vt ik falaio yosh takanli hoke ; tekchi im asha vhleha yatuk vt, ik im iksho chiyuhmashke.

30. Mikma kuna hosh yaiya kia, yaiya tuk keyu chiyuhmashke ; mikma kuna hosh yukpa kia, yukpa tuk keyu chiyuhmashke ; mikma kuna hosh chumpa kia, ik esho ke tuk chiyumashke.

31. Mikma kuna hosh yakni ilvppa nan isht ai ahanta kia, ik vlhpesachot ahanta ik chiyuhmo kashke. Yakni ilvppa nana a kaniohmi yokvto ont ikshot ihiya hoka.

32. Yohmi hoka nan isht im anukfilvt ik hvchi komunto ka he ak o hvchim ai ahni lishke. Kuna hosh itauwaya keyu hokvto, kaniohmit Chitokaka ya yukpala chi kvt, nana kvt Chitokaka ai immi hak o anukfihinli hoke.

33. Amba kuna hosh itauwaya yokvto, kaniohmit tekehi a yukpala chi kvt, nana kvt yakni ai immi hak o anukfihinli hoke.

34. Hatak im asha, mikmvt ohoyo himita hatak haleli keyu hokvto, it im inla hoke : ohoyo hatak auwaya keyu hokvto ilap haknip, micha im anukfila ita tuklo ka isht ik ashvcho ka chi kvt, nana kvt Chitokaka ai immi hak o anukfihinli hoke : amba hatak im asha yokvto, kaniohmit i hatak yukpala chi kvt, nana kvt yakni ai immi hak o anukfihinli hoke.

35. Yohmi ka hvchishno isht ai hvchim vlhpesa hi q ilvppa anumpuli lishke: yohmi kvt nan isht atakluma yo isht hrchi onochi la chi hatuk keyu; amba nana kvt ai vlhpiesa kak atuk; yohmi ka nan isht fitekvchi ik im ikshot, Chitokaka ya im antihiyvt nan isht hvsh im ahantashke.

36. Yohmi ka hatak kvna hosh ilap ushetik hatak haleli keyu hatuk a ilap inli hosh ik vlhpesalo kvt anukfillikmvt, yummak ash osh hofantit taha ha ya tuk okma, anonti yv-mohma he vlhpesa hoka, nana ho iki ash osh ahnikmvt nanashvchi keyu hokvt, yvmihchashke: yohmi ho hatak auwayashke.

37. Yvmohmi kia yvmohma he vlhpesa keyu hokmuno, iki ash osh ilap chukvsh isht ile kullochit ilap nan ahni hosh ahlichia hinla hosh, anonti yakohmashke, ahnit ilap chukvsh a anukfoyuki hokmvt, ushetik hatak haleli keyu kash ot imoma hosh im anta he ahnikmvt, vlhpesa ho yvmihchi hoke.

38. Yvmohmi hoka kvna hosh ushetik hatak haleli keyu ha hatak auwayvchi kvt vlhpesa ho yvmihchi hoke; yohmi kia kvna hosh ushetik hatak haleli keyu ya hatak auwayachi keyu kak osh, vlhpesa kvt i shahli ho yvmihchi hoke.

39. I hatak vt okchaya moyuma ka tekchi vt nan vlhpisa pulla ho isht a talaiyakchi hoke; yohmi tuk kia i hatak ash osh illi hokmuno, Chitokaka immi kvna hoh kia ahnikmvt, auwaya hi vt i holhtofa hoke.

40. Yohmi ka Chihowa imi Shilombish vt a si anukfoyuka ak inli ka vñ ahoba hoka, vno vñ anukfila ha yummak ash osh iakaiyvt peh anta hokmvt, yvmmvt yukpa kvt i shahli hoke.

CHAPTA VIII.

Naholbvt toba puta ka nan isht aiokpvchi ka isht anumpuli, 1; 9 kvna kia na kil ibetvblicho kashke.

1. YOHMI ka na holbvt toba isht aiokpvchit nana ka im issa tok imma hokuno, nana ka iloh ithaiyana kvt il

ithanushke. Nan ithana yvt ile chahvchi, amba nan i hullo yokuto nan achukmali yoke.

2. Yohmi ka kuna kia nana ka ithana im ahoba hokmvt, nana ka kaniohmit ithana he tuk ash osh ik ithano kisha hoke.

3. Amba kuna hosh Chihowa ya i hullokma, mihi yosh yummva im a holitopa hoke.

4. Na holbvt toba puta isht aiokpuchit nana ka im issa tok yummak o vpa hatuk imma tok okvno, na holbvt toba yvt yakni pakna ya nana ho keyu; micha Chihowa inla yvt iksho, amba achvfa kak illa ka iloh ithanushke.

5. I shahli hohchifo kvt ai asha kvt vba shutik ak okmá, keyukmvt yakni pakna yak okmá, nana ho ai asha kvt, i shahli hrt laua cha, anonti chitokaka mvt laua hoke.

6. Amba pishno yokvno Chihowa achvfa, Iki, yummak osh nan ai ahni pulla ho nana moma kvt toba hoke; mikma pishno vt yummak o immi pia hi osh il in toba hoke; mikma Chitokaka Chisvs Klaist achvfa yummak atuk mak o nana moma kvt ai asha, mikma pishno mvt yummak atuk mak o il ai ashvshke.

7. Yohmi kia nan isht ithaiyana yash hatak moyuma ka anukfoyuka keyushke: kanimi kvt na holbvt toba ya nana ho chohmichit isht ai i yimmi cha, na holbvt toba yash nana ho im issa tuk ash o yummak o ai vpt maya na ant himakovshke: yohmi mvt nan isht il ai akostininch i yvt ik ono hatuk osh ai okpuloka hoke.

8. Yohmi ka il impa hatuk mak o Chihowa hvt pi ahninch i ho keyu: il impa hoh kia, kaniohmit il i shahli keyu hoka; mikmvt kil impo kia kil a lauwo keyu hoke.

9. Yohmi kia ahah! hvsh ahni na na hush a kaniohma he vlpesa ilvppak ash ot kuna hosh ik hlampko, yummak ash o ibetvblich i yo ik kaniohmi kia ik tobo kashke.

10. Kuna chia hosh nana hash isht ithaiyana kia, na holbvt toba in tempel anukaka ya ish ai impa na kuna hosh chi piesakmvt, yvmmvt nan isht il akostininch i hvt ik hlampko hatuk okmvt, na holbvt toba nana ho im issa tok yummak ash o vpa hi vt i shahlit anukfohka keyu ka hinla ho?

11. Yohmi ka nana ish ithana pulla tuk ash o chitibapishi ik hlampko yvmmak o Klaist vlhtobut illi tok a ai okpuloka chi cho ?

12. Yohmi ka hvsh itibapishi vhleha ha yakohmiechit hvsh im ashvchi cha, nan isht il akostininch*i* ik hlampko yash hvsh hotopali kvt, Klaist ak o hvsh im ashvchi hoke.

13. Yvmo*h*mi ka ilhpak vt itibapishi li ha ibetvblich*i* hokma, itibapishi li hash ak ibetvblecho ka chi kvt, yakni vt talaia moma ka nipi nana kia vpa la he keyu hoke.

CHAPTA IX.

Vbanumpa isht vtta yvt nan isht il apelacha hi okvno im atahla he otvninch*i*, 1: 18 yohmi kia ilap vt kvna kia nana ka iwekechi tok keyu. 21 Okchayvt il anta ilvppvt nan iti timiya pvlhki ho chohmi.

1. APOSTEL sia keyu ho? yuka keyu sia keyu ho? pin Chitokaka Chis*us* Klaist a pisa li tuk keyu ho? Chitokaka hvsh ibai achvfa ka yvmmvt na hvchi atahli li tuk mak keyu?

2. Inla yokvno im apostel sia keyu hok mak heto, hvchishno yokvno hvchim vbanumpeshi sia mvhlishke: Chitokaka hvsh ibai achvfa kak osh vbanumpeshi si vlhtoka hatuk a isht ahliche hvchia hoke.

3. Kvna hosh ik yimmot si a ponaklo tuk yvmma im afalaminchi li ka ilvppak oke;

4. Impa, micha nan ishko ita tuklo kvt isht a pim vlhpiesa keyu ho?

5. Ohoyo pin tek a ilaelit aya kvt, apostel inla vhleha, mikmv*t* Chitokaka itibapishi vhleha, micha Sefas aien*a* ka chohmit pim ohoyo, pin tek a ilaelit il aya hi vt pim vlhpiesa keyu ho?

6. Yohmikmv*t* Banabas ita tuklo li kak bano hosh ke toksulo ka hi vt pim vlhpiesa keyu ho?

7. Kvta hosh kaniohmi hoh kia itotinowa kvt ilap inli hosh nan i kunia ho? kvta hosh pakvpi a hollokchi ya ikbi tuk vt, yvmma nan ai vni ka ai vpa keyu ho? keyukma

kvta hosh nan vlhpoba apistikeli kvt anonti nan vlhpoba ya i pishukchi ya ik ishko ka hinla?

8. Hatak o chohmit ilvppa puta ka achi li ho? vba nan vlhpisa yak kia yummak inli ho achi ak inli keyu ho?

9. Wak toksvli yummvt na nihechi ka, Itakha ya chik takcho kashke, achi hosh Moses i nan vlhpisa ya holisso hoke. Chitokaka yvt wak toksvli ya nan im atahli ho?

10. Yohmi ka pishno ak illa puyulla hatuk mak o achi tok o? pishno puyulla mvlhi hatuk mak o ilvppvt holisso hatuk: yohmi ka kvna hosh yakni patoffi kvt, nawaya pisa he ahni hosh yakni patuffashke; mikma nan isht ilai yukpa pisa he ahni hosh kvna kia nanihechi kvt, na pisa he ahni tuk ak o ibai isha hi oke.

11. Nana kvt shilombish imma ko e huchim a hokchi hatuk okma, nana kvt haknip ahalaia imma e huchim ai vma chi ka, nana kvt a fehna ho?

12. Inla yvt ilvppa hvch ibai isha hi vt vlhpesa hokma, pishno yokak heto isht a pim vlhpiesa keyu ho? yohmi kia nana vlhpesa ahnit ilvppak ash o isht kil il apelacho hatuk: amba Klaist im vbanumpa ha kil ataklammo ka chi kvt, nana moma ka ik yvmohm i il ahni hoke.

13. Kvna kia nana kvt holitopa imma kak o isht vtta kvt, yummvt nana kvt tempel a ai immi hak o ai vpa; mikma kvna hosh alta ya nan isht ai vtta kvt, yummvt alta ya nan ai ibai ishi ka hvch ik ithano cho?

14. Yummak inli ho chohmit kvna hosh vbanumpa isht anumpuli kvt, yummvt vbanumpa ha ai isht il apelacha hi o, Chitokaka yvt apesa tok.

15. Yohmi kia ilvppa puta kash achufona kia isht il apelachi li tuk keyu: yohmi mvnt nana kvt vm ai yvmohma chi kvt ilvppa puta kash holissohonchi li tuk keyu: kvna kia nan isht il a holitopa li ya ik ahobalecho ka he atuk a, illi kak osh achukma kvt yvmma vm i shahliskke.

16. Vbanumpa isht anumpohonli li hoh kia, nan isht il aholitopa la hi vt ik svn iksho kamohmishke: nana kvt ai vlhpiesa mak osh si onvtuyula hoka; ahli, vbanumpa ha isht anumpohonli li keyukmvnt, nan vm a palvmmi hoke.

17. Ahni li hok mak osh ilvppa yvmohmi li hokmvt, nan vlhtoba kia ieshi li hoke; amba ak ahno hok mak osh ilvppa yvmihchi li hoh kia, vbanumpa isht ai vtta hi okvto si vlhtokowa hatuk oke.

18. Yohmi ka nanta hosh nan isht vm vlhtoba yo? ahli, vbanumpa ho isht anumpohonli li kvt, Klaist im vbanumpa hash nan ak ai illecho ka chi hatuk; yokmi hokvt vbanumpa isht vm ai vlhpiesa hatuk a ak vlhpiesa hatuk a keyushke.

19. Achufona kia i yuka sia keyu, yohmi kia i shahlichit asitvbi la chi kvt, vno ak inli hosh moma ka il im i yuka-hanchi li hoke.

20. Yohmi hokvt Chu okla ha asitvbi la chi kvt, Chu okla hokvno Chu ak inli ho toba li hatuk; mihmvt kvna hosh nan vlhpisa ya ai i nutaka atuk a asitvbi la chi kvt, nan vlhpisa ai i nutaka hokvno nan vlhpisa ai i nutaka ak inli ho toba li hatuk;

21. Kvna hosh nan vlhpisa a keyu ka asitvbi la chi kvt, nan vlhpisa a keyu hokvno nan vlhpisa a keyu ak inli ho toba li hatuk; yohmi kia nan vlhpisa ik im ikshot Chihowa ik im antio ka hi o keyu, Klaist i nan vlhpisa yosh onvtyula hoka.

22. Ik hlampko ya asitvbi la chi kvt, ik hlampko hokvno ik hlampko ak inli ho toba li hatuk; yohmi kvt ik kaniohmi kia kanimi ka okchalinchi la chi kvt, hatak moma ka nana moma ka in toba li hoke.

23. Yohmi kvt vbanumpa ha hvch ibai ishi la chi kvt, vbanumpa pulla kak o ilvppa yakohmi li hoke.

24. Kvna hosh ai itin timiya ai yihlepa chi hatuk okvt, moma kak osh yihlepa kia, nan isht a holitopa hi okvno achvfa bano hosh ishi chatuk a hvch ik ithano cho? Nan isht a holitopa hi ya hvsh isha chi kvt, yvmmak inli ho chohmit hvsh malelashke.

25. Yohmi ka hatak moma kvt i shahliche he ahnit ile lushummi hokvto, yvmmvt nana moma ka il ai oktampli hoke. Yohmi kvt iachuka okpula hi o isha chi kvt, okla ilvppak o yakohmi hoke: pishno yokvto nan okpula he keyu kak oke.

26. Yvmohmi hoka ik im ai ono keyut, yakohmit mali-hinli lishke: kvna hosh mahli ho ihisso ho chohmi keyut, itihimbi lishke.

27. Yohmi kvt sa haknip imaiyachi li, yohmi mvt yuka-hanchi lishke: yummak keyukmvt ik kaniohmi kia inla ya vbanumpa isht im anumpohonli li haya tuk vt, vno ak inli kak osh ak ai ahlo ka hinla hoke.

CHAPTA X.

Chu okla nan isht im vlhpisa holitopa, 1. 7 Chu okla nan isht im apalvmi tok a nan isht il ithana he tuk. 21 Chitokaka im ai impa ya Setan o im ai impa kiloh ikbo kashke. 24 Il itibapishi im anukfila ha il itim ahnicha he tok.

1. YAKOHMI ka itibapishi li vhleha ma! pin tikba vhleha hvt kariohmit moma kvt hoshonti ha ai i nutakvt ayvt, anonti momvt okhvta ho a hlopulli tok a hvch ik ithano ka hi a, hvchim ai ahni li keyushke.

2. Yohmi ka Moses a im antia chi kvt hoshonti, micha okhvta ita tuklo kash o isht a baptismto tok.

3. Mihma il impa shilombish imma a miha chvfa ho momvt vpa tok.

4. Mihmvt nan ishko shilombish imma a miha chvfa ho momvt ishko tok. Tuli chito shilombish imma yummak ash okla ai ishko tok a yummak ash ot iakaiya tok oka; yohmi ma Tuli chito yummvt Klaist mak atok oke.

5. Yohmi kia yamma kashampa laua ka Chihowa vt isht ik i ahno fehna tok; illit yakni haiaka ya okla a fimimpa tok oka.

6. Yohmi ka nana yakohmi kvt nan isht a pim vlbvcha hi atuk; yvmohmi hokvt okla nan anushkunna tok ak inli ho chokmit nan ik vlhpeso puta ka kil anushkunno ka he atuk oke.

7. Okla hvt binohmayvt imvt, nan ishkot wakaya cha, a hihihvchi tok, achi kvt holisso hoka; kanima kvt yohmi hatok a chohmit nan holvt toba aiokpvchi hvchia keyu kashke.

8. Mihmvt kanimi kvt itinlumäka tuk osh, nitak achufa ka tahlepa sipokni pokoli tuklo acocha tuchinvt ak-akoha tok vhleha hä chohmit kil itinlumäko kashke.

9. Mihmvt kanimi kvt Klaist imomaka pisa tuk osh, sinti o isht ai illi tok vhleha hä chohmit Klaist a imomaka ke peso kashke.

10. Mihmvt kanimi kvt ik im vlpesot na mihachi tuk osh, nan okpuni o isht ai okpuloka tok vhleha hä chohmit, na hvch ik mihacho kaskke.

11. Yohmi ka isht a pim vlbvcha hi a ilvppa puyuta kvt yummak ash o ai i yummohmi tok: yohmi tuk osh yummak atok vt isht a pim achukma chi mak o holisso ma, yakni ont ai vhli hvt pishno ak o pim vlvshke.

12. Yummohmi hoka kvna hosh, Hikia li, ahni kvt, mihi yosh ik itulo ka chi kvt ahah! ahnashke.

13. Nana imomaka pisa nana hosh hvchi onvtula he keyu; amba hatak moma ka ai onvtuyula chatuk chohmi kvt yummak oke; yohmi kia Chihowa yvt ai ahli, yummvt nan hvsh a lauecha he ont ia hokuno imomaka hvchi pisa hi a ahna he keyu hoke; amba yummak ash hvsh a lauecha chi ka nana imomaka pisa yvt hvchi ontuyulakma, a hlakofa he ataya ya hvchim ikba he ak inli hoke.

14. Yummohmi hoka a kana a holitopa vhleha ma! na holbvt toba ai okpuchi hvsh i filvmmashke.

15. Hatak hopoyuksa yo hvchi chohmichit anumpuli lishke; nana ho achi li ka anukfillit hvsh akostininchashke.

16. Isht ishko holitopa mihi yo Chihowa isht il aiokpvchi kvt, yummvt Klaist im issish a isht itibai ishi keyu ho? Puska e boshullichi ka, yummvt Klaist haknip a isht itibai ishi keyu ho?

17. Pishno vt pi laua kia, puska achufa, anonti haknip achufa pia hoke; puska achufa yvmma momvt iloh itibai ishi hokvt.

18. Israel okla haknip imma hokuno ho pesá; kvna hosh vba nan isht aiokpvchi nipi yo ai vpa kvt, yummvt alta ya itibai ishi keyu ho?

19. Yohmi ka nanta ho achi li ho? na holbvt toba

yvmmvt nana hoke; mikmvt na holbut toba nana hq isht aiokpvcha chi hq imma ka yvmmvt nana hoke, achi li hq ? keyú.

20. Amba nana hq Chentail okla hvt vba isht aiokpvchi kvt, nan isht a hullo okpulo yak o isht aiokpvchi kvt, Chihowa yak okvno keyu, achi li hoke: yohmi hokvt nan isht a hullo okpulo ya hvsh ibai isha hi o, hvchim ahni li keyushke.

21. Chitokaka im isht ishko, mikmvt nan isht ahullo okpulo im isht ishko it aieninchit hvsh ai ishka he keyushke: mikmvt Chitokaka im ai-impa, mikmvt nan-isht ahullo okpulo vhleha im ai-impa it aieninchit hvsh ibai achvfa he keyushke.

22. Chitokaka ya il anukhobelvchi na pi nuktwhla hinla hq ? yvmma hlampko kvt il i shahli hq ?

23. Nana moma kvt isht vm ai vlhpiesa, yohmi kia nana moma kak osh isht achukma he keyu; nan moma kvt isht vm ai vlhpiesa, yohmi kia nana moma kak osh achukmalechi keyu hoke.

24. Hatak kuna kia ilap nan isht im ai vlhpiesa he ak banö hq ik hoyo kashke; amba hatak moma kvt inla nan isht im ai vlhpiesa he yak ashke.

25. Nipi a chumpa ya nana hosh a kunia tuk a, yvmma nan isht il akostininch pulla kak o nana ik a ponaklot, hvsh pashke.

26. Yakni moma, micha awaya moma kvt Chitokaka immi hoke.

27. Kanimi kvt na yimmi keyu hosh ont hvsh ibai impa he hvchim ahni hokma, ia hi a hvsh ahni hokmvt; nana hosh hvchin tikba ya talaiakma nan isht il akostininch pulla kak o nana ik a ponaklot, hvsh pashke.

28. Yohmi kia kuna hosh, Na holbut toba isht aiokpvcha hi o ilvppa im issa tok a hvchim achikma, na hvchim anoli tuk yvmmak pulla, mikmvt nan isht il akostininch aiena pulla kak o hvshpa ná; yakni micha ai immi moma aiena kvt Chitokaka immi hoke.

29. Nan isht il akostininch achi li ka, chimmi ak o keyu,

amba yummak ash oke; nan isht *vm* ai *vlhpisa* hosh yummihchi li ka, nanta katiohmi *hq* inla nan isht il akostininchhi hosh si onochi *hq*?

30. Chihowa nan isht *i* kana pulla *hq* ibai ishi li hokmvt, yummak oka yak oke isht ahni li ka, nanta katiohmi *hq* nan ik *vlhpeso* *yo* isht a si anumpa cho?

31. Yumohmi hoka hvsh impa, keyukmvt na hvsh ishko, keyukmvt nana *hq* hvsh yummihchi hokmvt, Chihowa isht a holitopa *chj* *hq*, mominchit hvsh yummohmashke.

32. Achufona kia Chu ak okmá, keyukmvt Chentail ak okmá, keyukmvt Chihowa in chvch ak okmá, nana kia hvch ik ibetvblico kashke.

33. Hatak moma ka nana moma ka yukpali *kvt*, vno nan isht *vm* ai *vlhpiesa* *hi* *o* hoyo li keyu; amba lawa yummvt okchaya *chj* ka, isht im ai *vlhpiesa* *hi* *o* hoyo li ka hvsh chiyuuhmashke.

CHAPTA XI.

Chihowa aikpahanchi *a* nana *kvt* ik *vlhpeso*, micha Chitokaka im opiaka impa ma ik ahobalo aienka im alvmmi, 1. 23 Chitokaka im opiaka impa *vlhpisa* *vmonpvt* isht a minti tok *a* im anoli; mihmvt kaniohmit okla holitoba hi tok *a* im otninchi.

1. UNO vt Klaist *a* iakaiya sia akinli *hq* chohmit, siakaiya hvchia hashke.

2. Yumohmi ka itibapishi li vhleha ma! nana moma isht hvsh svthaiyana, mikmvt nan *vlhpisa* holitopa moyuma ka hvch ichima li tuk *a* hvsh holitobli hoka, hvchi ahninchi lishke.

3. Yohmi ka hatak moma *i* noshkoboka *yvt* Klaist ak okma; anonti ohoyo *ha* *i* noshkoboka *yvt* hatak ak oke; mikma Klaist *i* noshkoboka *yvt* Chihowa yak oka, hvsh ithana he ak *o*, hvchim ahni lishke.

4. Hatak moma *kvt* anumpa ilbusha anumpuli, keyukmvt Shilombish *o* anukfoyukvt anumpuli *kvt*, noshkobo *hvt* im *o* hlipia hokmvt, ilap noshkobo *ha* hofahyali hoke.

5. Amba ohoyo moma *kvt* noshkobo *o* hlipia keyu hosh,

anumpa ilbusha anumpuli, keyukmvt Shilombish o anukfouyvt anumpuli hokmvt, noshkobo yash o hofahyali hoke; yummak okvt noshkobo i shafa yak inli ho chiyuhmi hoka.

6. Ohoyo hvt noshkobo ompoholmo keyukmvt, pashi ak kia vlmashke; yohmi kia pashi vimo, keyukmvt shafa kak okmá, nana ka ohoyo hvt isht a hofahya hinla hokma, noshkobo hvt ompoholmashke.

7. Chihowa ya a hoyulba na isht a holitopa hoka, hatak vt noshkobo ha nan o hlipela he vlpesa keyu mvlhishke: amba hatak a isht im a holitopa yokvto ohoyo ak oke.

8. Hatak vt ohoyo ak o a toba tok keyu, amba ohoyo ak osh hatak ak atok oka.

9. Mikmvt hatak vt ohoyo ak atuk pulla mak o toba tok keyu, amba ohoyo ak osh hatak ak atok oke.

10. Yvmohmi kak o ohoyo hvt enchil vhleha ak pulla kak oka, noshkobo hvt ompoholma he vlpesa hoke.

11. Yohmi kia ohoyo hvt iksho ka hatak vt anta he keyu, mikma hatak vt anta he keyu, mikma hatak vt iksho ka ohoyo hvt anta he keyu, Chitokaka yvt im ahni hoke.

12. Ohoyo hvt hatak ak o a toba yatuk o, yummak inli ho chohmit hatak vt ohoyo pulla kak o atoba hoke; yohmi ka nana puta kvt Chihowa ak o atoba hoke.

13. Hvchishno ak inli hosh anukfillit ho pesá; ohoyo hvt noshkobo ompoholmo keyu hosh Chihowa im ilbushvt anumpuli yummvt vlpesa ho?

14. Hatak vt pashi vt falaia hokmvt, ishit hofahya ka nan isht anukfilli kak oh kia nan hvchi ithvnanchi keyu ho?

15. Amba ohoyo hvt pashi vt i falaia hokmvt, isht im a holitopa hoke; ilap pashi vt noshkobo isht ompoholma hi o ishi tok oka.

16. Yohmi kia kuna hosh a sanali kak o bvnna ahoba kia, pishno yukvto yummma chohmi kvt ik pim iksho chatuk; mikmvt Chihowa in chvch a hiohli kvt yummma chohmi kvt ik im iksho chatuk oke.

17. Yohmi ka achukma i shahli kak o keyu, amba okpulo i shahla chi hosh mintit hvsh itvnaha kak o, ak hvchim ahnincho ilvppak osh hvchim anoli lishke.

18. Übanumpuli iksa yosh ant hush ai itvaha kvt, nana vmonna ka ita kvshkvt hush maya ka haklo lishke: yohmi kvt sai yimmi chohmishke.

19. Yohmi ka hvch ik itibachvfo kak ə pulla chi, yohmik mak ə kvna hosh ai ahli hok mak osh hvch itin takla ya otaiyana hi oke.

20. Yohmi ka a miha chufa ہ ant hush ai itvaha, ilvppak osh Chitokaka im opiaka impa ya vpa ہ keyu hoke.

21. Hush impakmut, hush moma kvt hvchim opiaka impa yatuk kak illa ہ tikba hush ishishke: yohmi hatuk ə achvfa kvt hohchufokma, anonti inla yato nan ishkot haksishke.

22. Yakeh! ai impa he, mikmut ai ishka he aieno chuka yvt ik hvchim iksho ہ? keyukmut Chihowa in chuch hush shitilema cha, anonti kvna hosh nana kvt ik im iksho ke tuk yummak ash kia hush hofahyala chi hosh hush yohmi ہ? Nanta ہ hvchim achi la chi ہ? ilvppak ash ə isht hvchi ahninchi la chi ہ? isht hvchi ahninchi li keyushke.

23. Chitokaka ya im ishi li tuk mihi یо hvch ihima li; yohmi ka Chitokaka Chisus vt tvnvp ibbak fohka chi ninak yummak inli mvt pvska ya ishi tok.

24. Mihmut yummak ash ot vba pit isht aiokpvchi cha, pvska yash boshullichi mvt, Ieshi cha, ho vpá; ilvpput sa haknip osh hvchi boshulli hoke: hvs svthana chi kvt ilvppak ə hush yvmihchashe, achi tok.

25. Yummak ash inli ہ chohmichit opiaka impa ishi hayosh, isht ishko ash kia yummak ash ot ishi mvt, Ilvpput nan vhpisa himona vñ issish ə isht ai ahli toba hoke; ilvppak ə hush yvmihchi cha, yummak ash hush ishko aiyukakmut, hvs svthahanashke.

26. Pvska ilvppa hush pa aiyuka, mikmut isht ishko ilvppa hush ai ishko aiyuka aieno kvt, Chitokaka illi tok a hush otvnhinchi na yummak atuk vt vla hayashke.

27. Yvmohmi ka kvna hosh yohma he ai vhpiesa keyu hosh, pvska ilvppak ash vpa chi, mikmut Chitokaka im isht ishko ilvppak ash ai ishka chi aieno hokmut, mihi yosh Chitokaka haknip, micha im issish ita tuklo ka ik holitoblot nan isht i palvmmi mak a hi oke.

28. Yohmi ka hatak okvt anukfillit ik ile pisá : yvmohmi cha mihi yosh pwska yash ik pá, mikmut isht ishko yash ik ai ishkó.

29. Kvna hosh ai vlhpiesa keyut yvmmak ash vpa, micha ishko aieno kvt Chitokaka haknip ash ik akostincho hokvt, mihi yosh ilap nan isht im vlhpisa hi ə yvmmak ash vpa, micha ishko aieno hoke.

30. Iluppa yakohmi kak ə ik sitopo, micha abeka aieno kvt laua hosh hvchim ai asha ; mihma laua kvt nusi hoke.

31. Pishno ak inli kvt il il akostininchí hatuk okmvt, nan isht pim vlhpisa hi atuk keyu.

32. Yohmi ka nan isht pim vlhpisa kvt, yakni ya ai itv-pehut ik pi palvmmo ka chi kvt, isht pi achukma chi hosh Chitokaka ya il im afvma hoke.

33. Yomohmi hoka itibapishi li vhleha ma ! hvsh impa chi hosh hvsh itvnahakmvt, it i hullot hvsh iti hoyashke.

34. Yvmohmi ka itvnahvt nan isht hvchim vlhpisa chi kvt, kvna hosh hohchvfo hokvto, mihi yosh in chuka yak ə ik ai impá. Nana inla ka yatuk okvno ona lik mak osh, apoksiachi la hi oke.

CHAPTA XII.

Shilombish na holhpela hokvto il ai yuka, 1 ; 7 yohmi kia moma kvt nan isht ai yukpa he vlhpesa bano. 12 Haknip ə ai ibachvfa yvt ai it im il aiyuka bano, yohmi kia ilap bika it im vlhpesak mvt, haknip ma im ai vlhpiesa chatuk ; 29 yohmi hoka na pi hvlbena kvt il aiyuka kia, isht il itapela he tok.

1. YUMOHMI ka itibapishi li vhleha ma ! Shilombish imma ka hvch ik akostininchó ka hi ə ak hvchim ahnoshke.

2. Chentail hvchia hvt na hvsh anukfoyuka hosh na hol-bvt toba ik anumpulo puta iluppa hvsh im ohona kvt hvsh ithaiyanushke.

3. Yumohmi ka hatak nana kia Chihowa imi Shilombish anukfoyuka hosh anumpuli kvt, Chisus ə na kallakshi yo hochifa he keyu hoke : yohmikma hatak kvna kia Chisus vt Chitokaka yoke, acha he keyu, amba Shilombish Holitopa yak osh anukfoyuka hok mak ahinla ka hvch ithvnanchi lishke.

4. Yohmi ka na h̄lbina ilaiyuka kvt ai asha ; yohmi kia Shilombish mihi ash inli hoke.

5. Mikma nan isht vtta mvt im ilaiyuka ; yohmi kia Chitokaka yokvto mihi ash inli hoke.

6. Mikma na toksvli mvt im ilaiyuka hoke ; yohmi kia Chihowa mihi ash inli hosh ilvppa moma ka hatak moma ka anukfohkichi hoke.

7. Yohmi ka Shilombish nan isht otvni ho hatak moma kvt isht ai vlhpiesa hi osh habena hoke.

8. Shilombish pulla ho na hopoyuksa anumpa ha achvfa kvt anukfoyuka hoke ; inla yato Shilombish yvmmak inli ho nan ithana anumpa ha anufoyuka hoke.

9. Inla mvt Shilombish mihi ash inli pulla ho na yimmi ha ishi : mikma inla mvt Shilombish mihi ash inli pulla ho na hlakofichi h̄lbina ka ishi hoke.

10. Inla yvt na fehna puta yvmihcha hi vt ishi ; inla mvt Shilombish anukfoyukvt nan ithvnancha hi vt ishi ; inla mvt chukvsh im anukfila puta akostininch yo ishi ; inla mvt anumpa ilaiyuka anumpula he vt ishi ; inla mvt anumpa ilaiyuka toshola hi vt ishi ka Shilombish pulla kak oke.

11. Shilombish achvfa mihi ash inli kak osh hatak moma ka kanimi ho im ai ahni aiyuka hosh na yakohmi puta kash im it a kvshkolit anukfohkichi hoke.

12. Haknip okvto achvfa, yohmi kia yvmmma ai immi hokvto in laua ; mikma haknip achvfa yvmmma ai immi moma kvt laiyawa kia, haknip achvfa hoke ; yohmi ka Klaist ak kia ilvppak inli ho chohmi hoke.

13. Shilombish achvfa pulla ho momvt isht il a baptis-mot haknip achvfa e toba ; Chu, keyukmvt Chentail pia hokmá, yuka, keyukmvt yuka keyu yo pia hokmá, nana tuk kia momvt Shilombish achvfa il ibai ishi yo e toba hatuk.

14. Haknip vt ai immi im achvfa keyu, amba laua hoka.

15. Iyi yvt, Üno vto ibbak sia keyu hokvt, haknip ai immi sia keyu ; achi hokmvt, yohmi kia yvmmvt haknip a ai immi keyu ho ?

16. Mikma haksobish vt, Üno vto nishkin sia keyu hokvt,

haknip ai immi sia keyu hoke; achi hokmuto, yohmi kia yummvt haknip a ai immi keyu ho?

17. Yohmikma haknip moma kvt nishkin okma, katima yak osh na haklo ya hinla ho? moma kak osh na haklo yokma, katima yak osh na huwa ya hinla ho?

18. Yohmi ka himonasi yokvno Chitokaka yvt yakohma hinla, ahni mak osh, ai immi hash achvfa aiyukali mominchit haknip ash ai iba fohkichishke.

19. Yohmi ka moma kak osh ai immi achvfa hokmvno, katima yak osh haknip a hinla ho?

20. Yohmi ka himonasi yokvno ai immi yvt laua: yohmi kia haknip okvto achvfa hoke.

21. Yohmi ka nishkin vt ibbak a, Nana ka ak chi svbun-noshke, im acha he keyu: keyukmvt anonti iyi yash o, Nana ka ak chi svbunnoshke, noshkobo hvt im acha he keyu hoke.

22. Keyú, yvmma i shahli, haknip ai immi ilvppak ash osh ik hlampko fehna ahoba kia ai vlhpiesa hoke.

23. Yohmi ka haknip ai immi ilvppak ash kanima ka holitopa ik lauwo pim ahoba kia, ilvppak ash o holitopa, i shahli fehna il ima hoke: mikmvt a pim alumaka imma hokvno i shahlichit e shemvchi hoke.

24. Isht a pi aiokli imma hokvno shema yvt isht im ai vlhpesa keyu hoke: yohmi ka Chihowa hvt haknip a iti fohkit apoksiachi mvt, kanimi kvt ik alauwo ke tuk ash holitobli kvt i shahlichit fehna hoke.

25. Yohmi na haknip ash ita kushkoa iksho ka hi atok; amba ai it immi hash osh ahah! it im ahna he ak atok oke.

26. Yohmi ka haknip ai immi achvfa hatuk vt ilbusha hokma, haknip ai immi moma kak osh ibai ilbusha hoke: mihma ai immi achvfa kvt holitopa hokma, moma kvt ibai yukpa hoke.

27. Yohmi ka Klaist haknip o hvchia, micha yummak ash o ai immi ka a kashampa ai yuka hvchia hoke.

28. Yohmi ka Chihowa hvt kanimi ka atokolit chvch a hiohlichi; vmmona ka apostel, atukla ka Shilombish anukfoyukvt anumpuli; atuchina ka vbanumpa isht ithvnanchi;

mikmvt na fehna puta yvmihchi, mikmvt na hlakofichi holhpela, nan apelvchi, chuch pehlichi, anumpa ilaiyuka anumpuli puta kak oke.

29. Moma kak osh apostel o? keyukmvt moma kak osh Shilombish anukfoyukvt anumpuli yo? keyukmvt moma kak osh vbanumpa isht ithvnanchi yo? keyukmvt moma kak osh na fehna puta yvmihchi yo?

30. Moma kak osh na hlakofichi holhpela ha ishi ho? keyukmvt moma kak osh anumpa il aiyuka anumpuli ho? keyukmvt moma kak osh anumpa ilaiyuka tosholi yo?

31. Yohmi ka na holhpela puta achukma i shahli kak o ishi ka hvsh ahni fehnashke. Yohmi kia na fehna kvt i shahli ho hvchim anoli lishke.

CHAPTA XIII.

Shilombish holhpela moma kvt nan i hullo kvt aien akeyu hokvto
nan ik ahoba, 1; 4 nan i hullo im anukfila nan a kaniohmi.

1. **HATAK** im anumpa ilaiyuka puta, mikmvt enchil puta im anumpa ho isht anumpuli li hoh kia, nan i hullo yvt ik svm ikshokmvt, tvli lakna ohonla, keyukmvt tvli kvsakusahahanchi ak inli ho holba li hoke.

2. Yohmi ka Shilombish anukfoyukvt anumpuli na holhpela ka ieshi li, micha nan ik otano ki tok moma ka akostininchli li, micha nan ithana moma ka ieshi li, yohmi cha na yimmi moma ma ieshi li, yohmi hokvt nvnih hochito puta ka kanvllichi la hinla kia, nan i hullo yvt ik svm iksho hokmvt, nana ho sia keyu hoke.

3. Yohmikmvt nana vm asha moma kash ilbusha ya im iti yopelachi li, micha sa haknip mvt lua chj ho im issa li; yohmi kia nan i hullo yvt ik svm iksho hokmvt, nana ho isht vm ai achukma keyu hoke.

4. Nan i hullo yvt na hotopali ya i svlaha, micha nan i kana yoke; nan i hullo yvt nana potvnnnot i nukkilli keyu; nan i hullo yvt ilap inli ka isht ilauata keyu, ile chahvchi keyu.

5. Ilefehnvchi hosh inla yā hofahyali keyu, ilap immi yo hoyo keyu, nan ik kanihmo ka nokowa keyu; nan ik vlh-peso anukfilli keyu.

6. Nan ik vlhpeso isht ai yukpa keyu, amba nan əhli yo isht ai yukpa yoke.

7. Nana moma ka ompohomo, nana moma ka yimmi, nana moma kvt vlhpesa chi, ahānit a yimmi, nana moma kvt ant ik sv̄m ai yohmí, ahāni.

8. Nan i hullo yokvto nitak nana ont ai iksho ka he ke-yu: amba Shilombish anukfoyukv̄t anumpuli yokmá, nana hatuk kia yummak okvto ont ai iksho ka hi oke; anumpa ilaiyuka ithaiyana yokmá, nana tuk kia yummak okvto ont issa hi oke; nan ithana yokmá, nana hatuk vt ont akshot kvnia hi oke.

9. Ik onancho hosh il ithaiyana hosh, anonti ik onancho hosh Shilombish anukfoyukv̄t il anumpuli hoke.

10. Yohmi kia nana ont ai əhli yumm̄t vla chi, yohmi hokmvno nana ik ono yummak atuk vt ont ai ikshot kvnia hi oke.

11. Ulla sa tomba mut, vlla yo chohmit anumpuli li tok; vlla yo chohmit nana akostininchí li tok; vlla yo chohmit nana anukfilli li tok; yohmi tok kia hatak ont toba li mut, vlla nana im akaniohmi yash kanchi li tok.

12. Himonasi yokvno ik onanchot a pisa yo hlopullechit e pisa: yohmi kia yummak fokak mak o nashuka bīka il iti pihiṣa hi oke: himonasi yokvno ak onancho hosh ithana li; yohmi kia himmak o himonasi yā svthaiyana kak inli ho chohmit ithaiyana la hi oke.

13. Yohmi ka himonasi yokvno na yimmi, ai okchayvt biliia pisa he ahni, nan i hullo, tuchina ilvppak ash osh takali hoke: yohmi kia ilvppak ash moma i shahli hokvto nan i hullo yak oke.

achukmvt i shaht ia chi ka ita tuklo ka a yemihcha hinla ;
34 chvch itvnahvt maya ka ohoyo hvt anumpula he keyu im
vlhpisa.

1. NAN i hullo ya achunanchit iakaiyvt, ishi ka hvchi bunnashke : mikmvt Shilombish imma ka anukfoyuka chi ka hvchi bunnashke : yohmi kia Shilombish anukfoyukvt hvsh anumpula he ak osh ahni kut hvsh i shahlichashke.

2. Kvna hosh anumpa inla yo anumpuli hokvto, hatak o im anumpuli keyu, amba Chihowa yak oke : kvna hosh im akostininch keyu hoka ; yohmi kia Shilombish anukfoyuka hosh yummak ash ot nana luma hatok puta ka anumpuli hoke.

3. Amba Shilombish anukfoyukvt anumpuli hokvto, hlampkohonchi, mikmvt ai okchaya he ahna chi ka i mihihha, mikmvt hopohlahanli, aiena hosh hatak puta im anumpuli hoke.

4. Kvna hosh anumpa inla yo anumpuli hokvto, ilap illa isht achukmali hoke ; amba kvna hosh Shilombish anukfoyukvt anumpuli hokvto, chvch a hlampkohonchi hoke.

5. Hvsh moma kut anumpa ilaiyuka hvsh anumpula he ak o hvchim ahni li ; yohmi kia Shilombish anukfoyukvt hvsh anumpula he ak o hvchim ahni li kut i shahlichi li : kvna hosh anumpa ilaiyuka anumpuli ka, chvch vt achukmvt i shahlit hlampka chi ka, yummvt tosholi keyukma, kvna hosh Shilombish anukfoyukvt anumpuli kak osh holitopa kut i shahli hoke.

6. Yohmi ka itibapishi li vhleha ma ! nana otvninchi, keyukmvt nana ithvnanchi, keyukmvt Shilombish anukfoyukvt anumpuli, keyukmvt nana abvchi nana hosh anumpa ilaiyuka anumpuli la chi hosh hvchim ona li hokmvt, nanta ho isht hvchi yukpali la hinla ho ?

7. Yohmi ka nana kut fiopa iksho hosh ohonla kut, oskula hokma, keyukmvt hap okmá, nana ka ai ola kak osh it im ilaiyuka keyukmvt, katiohmi kak osh oskula yokmá, keyukmvt hap okmá, nana ho ai ola kut otaiyana hinla ho ?

8. Isht puſa yvt ola kut ik haiako hokma, kut a hosh itiba chi kut il atahla hinla cho ?

9. Yummak inli ho hvsh chiyuhmi kut anumpa akostin-

cha he kullo keyu ho hush anumpuli keyukma, katiohmi kak osh nana hosh anumpa tuk vt otvna ch_i ho? mahli ak o hush ai anumpuli ha ch_i hoka.

10. Anumpa ola ilaiyuka laua kvt yakni pakna ai asha, yvmohmi chatuk; yohmi kia achufa kvt nana ho miha keyu kvt iksho hoke.

11. Yvmohmi ka anumpa ola ka yvmmak o miha ka ak akostininchokma, kyna hosh anumpuli yvmmak ash o im bvlbaha sia mak a hi oke; mikma kyna hosh anumpuli yvmmak ash ot am bvlbaha mak a hi oke.

12. Yvmmak inli ho chohmit Shilombish imma ka ahnit hush achilita hokvt, chvch a hush hlampkohoncha he yak osh hush anukfillashke.

13. Yvmohmi hoka anumpa inla y_o kyna hosh isht anumpuli hokmvt, yvmmak ash toshola ch_i kvt vba ik asilhhá.

14. Anumpa inla y_o vba isht anumpuli li hokma, sa ch_ukvh ak osh vba asilhha hoke: yohmi kia vm anukfila hokvto inla y_a nan im vni keyu hoke.

15. Yohmi ka katiohmi kak a ch_i ho? ch_ukvh o vba isht anumpuli la he, micha vm anukfila ho vba isht anumpuli la he: mikmvt ch_ukvh o isht taloa la he, micha vm anukfila ho isht taloa la hi oke.

16. Yvmmak keyukma, Chihowa isht ish aiokpvchi kia, kyna kia nan ik ithano im ai o binili binili hatuk vt, nana ho ish achi ka akostininch keyu kvt, katiohmi kak osh yvmmak ash osh yak oke ahnit, vba pit ish aiokpvchi ka, Amen acha hinla ho?

17. Ahli hosh yak oke vba pit ish aiokpvchi ho mvhli; yohmi kia inla yokvno hlampkohonchi keyu hoke.

18. Anumpa inla anumpuli li kvt, hush moma ka huch i shahliche li kvt, an Chihowa y_a yak oke im ahni lishke.

19. Yohmi kia chvch itvnaha ka inla maya ka vm anumpa ola ka nana isht im abuchi la ch_i kvt, vm anukfila anumpa akostininch tahlapi anumpuli li kak osh, anumpa inla tahlepa sipokni pokoli anumpuli ka vm i shahliche.

20. Itibapishi li vhleha ma! nana akostininch kvt vlla chipunta y_o huch ik tobo kashke: yohmi kia nana ik ai vlh-

peso hokvno vllosi yo hvsh tobashke; yohmi kia nana akos-tininch hokvno hatak o hvsh tobashke.

21. Anumpa im inla, mikmvt itivlbi inla hatuk o okla ilvppa isht anumpohonli la chi: ilvppa moma yvmohmi hoh kia okla ik sa haponaklo ka chi, Chitokaka yvt achi hoke, achi kvt nan vlhpisa ya a holisso hoke.

22. Yohmi hoka anumpa inla anumpuli yvt na yimmi vhleha ha isht im atokowa keyu, amba kvna hosh yimmi keyu kak oke; yohmi hoka Shilombish anukfoyuka kvt anumpuli kak o kvna hosh yimmi keyu yummak o achuk-mali keyu, amba kvna hosh yimmi kak oke.

23. Yvmohmi hoka chvch moma kvt miha chvfa ho ant ai itvnaha cha, momvt anumpa inla anumpuli aiyuka hokma, anonti nan ik ithano, mikmvt nan ik yimmo aienak kak kia ai vlakmvt, tasimbo yo hvchim acha hinla keyu?

24. Amba moma kak osh Shilombish anukfoyukvt anumpuli hokma, anonti na yimmi keyu, keyukmvt nan ik ithano yosh vla hoh kia yimmit, momvt anumpuli ka ahli ahnit anukfohka, yummak ash ot moma kak o nan isht ai im vlhpisa hoke.

25. Yohmi ka yakohmi hosh chukvsh isht im anukfila anukaka yvt otaiyani yoke: yakohmi hok mak osh hlipia cha, yummak ash ot Chihowa ya aiokpvchishke, mikmvt Chihowa hvt hvch iba takla ho mvhli hatuk a anola hi oke.

26. Yohmi ka itibapishi vhleha ma! nanta katiohmi ho? ant hvsh itvnahakmvt, hvsh moma kvt ataloa yokma, anumpa tosholi ak okma, nana ho hvsh ishi aiyuka hosh ant hvsh itvnahvshke. Isht achukma hi o nana moma kvt yvmoh-mashke.

27. Hatak kvna hosh anumpa inla yo anumpuli hokma, tuklo, keyukmvt tuchina kvno ont ik aiyo, yohmik mak o it iakaiyashke; mikma achvfa kak osh tosholi ashke.

28. Amba tosholi iksho hokmvno, ai itvnaha ya lumvt binilashke: yohmi cha Chihowa, ilapo ak inli ita tuklonchit im anumpulashke.

29. Shilombish anukfoyukvt anumpuli vhleha hvt tuklo,

tuchinakma, nana kvt anumpulikma, inla yokvto ahli hq? ahnit anukfillit pisashke.

30. I bilikasi binili yvmmak ash o nana kvt im otvni hokma, vmmona kash ot nuktanlv̄t binilashke.

31. Momvt ithana cha, anonti moma kvt isht im ai achukmvt isht i shahla chj ka, Shilombish anukfoyukvt hvsh moma kvt it iakaiya hosh hvsh anumpula hinla hoke.

32. Shilombish anukfoyukvt anumpuli vhleha im anukfila puyuta kvt Shilombish anukfoyukvt anumpuli vhleha hash o i nutaka yoke.

33. Shakapvt nan iti ataklv̄ma he Chihowa hvt ahni keyu, amba vbanumpa anukfohka ahli im ai itvnaha moma kak o chohmit iti nanaiya yak oke.

34. Iksa itvnahvt maya ka hvchim ohoyo hvt lumvt binohmayashke; yvmmak okvt anumpula he im vlhpesa keyu hoka; amba im antia he ak osh im vlhpesa hoka, nan vlhpisa yut yvmmak o achi ak inli hoke.

35. Yohmi ka nana hq ithvna bvnna hokmvt, chuka ak inli kak o i hatak a ai im aponaklashke: iksa itvnahvt maya ka ohoyo hosh anumpuli hokvto nan isht im a hofahya hoka.

36. Yakeh! Chihowa im anumpa hvt hvchishno ak o a kohchvt minti hatok o? keyukmvt hvchishno ak bano hq hvchim ona hatuk o?

37. Hatak kvna hosh ilap inli kvt Shilombish anukfoyukvt anumpuli yokma, keyukmvt Shilombish holhpela ka isht anukfoyuka hq mihi yosh im ahobakmut, pit hvchi holissochi li tuk yvmmvt Chitokaka i nan vlhpisa mak atuk a akostininchit, ahli ahnashke.

38. Amba kvna hosh ik akostinincho hokvto mihi yosh nan ik akostinincho kvt imomashke.

39. Yvmohmi ka itibapishi li vhleha ma! Shilombish anukfoyukvt anumpula he ishi ka bvnvt hvsh achilitashke; mikmvt anumpa inla anumpuli ka hvch ik im alammo kashke.

40. Nana moma kvt ai vlhpiesa, micha ai itiakaiyvt anuktanla mak o yvmohmashke.

CHAPTA XV.

Ilit falamvt e tani pulla hi a, Klaist vt illit falamvt tani tok ak o isht anoli, 1: 21 Klaist vt illit falamvt tani tok a nana kvt isht a yv mohmi: 36 falamvt e tana he nana akaniohmi: 51 Klaist vt vlak ma, okchayvt anta tuk vt inlv̄t toba he.

1. YUMOHMI ka itibapishi vhleha ma! vbanumpa yvmmak o hvchim anumpohonli li yvmmma hvsh ishi tuk osh, anonti mihi yo anukfoyukut hvsh mahaya ka, yvmmak inli ho hvch im anohonli lishke:

2. Yvmmak o hvchi ai okchaya, nana ka isht hvchim anumpuli li tuk a ithaiyanvt hvsh ieshi hokmvt, nana ka ik onancho keyut hvchi yimmi hatuk okmvt.

3, 4. Holisso Holitopa nana achi tok mak o nana pim ai ashvhchika puta kak o Klaist vt kaniohmit isht ai illi; yohmi cha yvmmak ash ot hollopi tuk osh, anonti nitak ont atuchina ma Holisso Holitopa nana achi tok mak o yvmmak ash ot anonti tani tok, yvmmak o vno ak kia si anukfoyuka hatuk osh, mihi yo tikbanli hvchim anohonli li tuk oke.

5. Mihma yvmmak ash ot Sefas a i haiaka, yohmi mvt auah tuklo kash i haiaka tok.

6. Yohmi ha ya tuk osh himona achufa yvmmak ash osh itibapishi tahlepa tahlapi ont ia ka i haiaka tok: yvmmak atok a akashampa laua kvt okchaya na ant himakushke, yohmi kia kanimi kvt nusit akakoha tok.

7. Yohmi ha yo yvmmak ash ot Chemis a i haiaka tok; yohmi mvt apostel vhleha hash mominchit i haiaka tok.

8. Yohmi mvt moma ont ishtaiyopi ka ai vlhpiesa keyu ho chohmi, vno ak kia yvmmak ash ot a haiaka tok.

9. Apostel vhleha moma ik alauwo sia, yohmi kvt apostel hohchifa he si vlhpiesa keyu, Chihowa in chvch a ilbvshali li tok okvt.

10. Yohmi kia Chihowa nan isht i kana pulla ho kanima a hikia li kvt yvmmak o hikia sia mak oke; mikmvt yvmmna nan isht i kana yvmmvt si anukfoyuka kvt ik ai ono ke tuk keyu hoke: yohmi hokvt toksvli hoyubli kvt yvmmak ash

moma ka i shahlichi li : yohmi kia vno ak keyu, amba Chihowa nan isht i kana mihi yosh a svbai achvfa kak atuk oke.

11. Yvmohmi hoka vno yak okmá, keyukmv̄t yvmmak okmá, e nana hosh yvmihchit il anumpohonli ma, yvmohmit hvchi yimmi hatuk oke.

12. Yohmi ka Klaist yvmmvt illit falamvt tani tuk vt isht anumpa hokma, katiohmi ho hvsh kanimi kvt illit falamvt tana hi vt iksho, hvsh achi cho ?

13. Yohmi ka illit falamvt tana hi vt iksho hatuk ; yohmi hokma Klaist vt ik tano ki tok oke.

14. Yohmi ka Klaist vt ik tano ki tok ; yohmi hokma vbanumpa isht il anumpuli ka isht ai achukma he keyu, mikma nan isht hvchi ai yimmi ka yvt isht ai achukma he keyu ak inli hoke.

15. Ahli, yohmi ka Chihowa isht atokowa ik ahlo il otvni hoke : Chihowa yut Klaist a tanichi tok a isht il atokoli tok okvt : yvmmak ash ik tanicho ke tok, illi yvt falamvt tana he keyukma.

16. Illi yvt tana he keyu, yohmi hokma Klaist vt ik tano ki tok oke.

17. Yohmi ka Klaist vt ik tano kitok okma, na hvchim ai yimmi ka yvt ik ai ahlo ; na hvchim ai ashvchi ka hvsh a hikia momvshke.

18. Yohmikma kuna hosh akakohvt Klaist a iba nusi tuk vhleha yvmmvt aiokpuloka mak oke.

19. Okchaya ilvppak bano kak osh Klaist a il ai okchaya chi il anukchieto hatuk okmv̄t, pilbvsha kvt hatak moma ka il i shahlishke.

20. Yohmi ka himak vno Klaist vt illit falamvt tani tok, micha kuna hosh nusi tuk vhleha yvmmak ash nan vni vmmona mak o toba hoke.

21. Hatak puyulla hatuk mak o nan illi hvt aya tok, hatak pulla kak o illit falamvt tani vt a minti tok.

22. Alvm atok puyulla mak o momvt illi ka, yvmmak inli ho chohmit Klaist pulla atuk mak o momvt falamvt okchaya yo toba hi oke.

23. Yohnri kia hatak moma kvt ilap nan isht im ai vlh-piesa kak a hi oke : Klaist ak osh nan vni vmmoma hoke : i himmak o Klaist immi hatuk vt, yvmmvt mintikma, tana hi oke.

24. Mikma apehlichika, nan vlhtoka, micha nan im ai ahli aiena ka ai akshochi ha yosh apehlichika ya yvmmak ash ot Iki Chihowa mak o ibbak fohka hi oke ; yohmik mak o ai vhli hvt vla hi oke.

25. Yvmmak okvt mikot ahanta pullvt, in tvnvp vhleha moma ka ilap iyi nuta ashachi ha ya hi oke.

26. Tvnvp ishtaiyopi mak osh yvmmvt ont ik ai iksho ka chj kvt nan illi ak oke.

27. Nana moma ka yvmmak ash ot iyi nuta ya ashachi tok oke. Yohmi ka nana puta kvt yvmmak ash ai i nutakvshke, yvmmvt achi kia, nana moma ka yvmmak ash ai i nutakvchi tok ilap ak bano hosh keyu kvt otaiyanishke.

28. Yohmi ka nana moma kvt yvmmak ash o ai i nutakvt taha, yohmik mak o Ushi ilap ak kia nana moma ka ai i nutakvchi tok yvmmak ash o ai i nutaka he ; yohmi ho Chihowa ya moyuma kvt nana moma ka isht ai okpahanchit isht im antia hi oke.

29. Yvmmak a he keyukma ; illi tuk ak o vlhtoba hosh baptismo tuk, yvmmvt nanta ho katiohma hi o ? illi yvt tana he keyu kvmohmi hokma ; nanta katiohma ho illi atuk pulla ka isht a baptismo hatuk o ?

30. Mikma nanta katiohmi ho hvshi kanvlli moma ka isht a pi palummi ya il a hikia cho ?

31. Nan isht ilaiyukpa yummma hvchishno pulla hatuk mak o pin Chitokaka Klaist Chisvs isht im ai eshi li kak osh ai ahlichit anohonli li mvt, nitak moma ka sahanlishke.

32. Hatak o chohmit nampoa nukshopa puta ka Efesus ak o ai itihimbi li tuk vt, illi yvt tani keyukma, nanta hosh isht um ai achukma hinla ho ? onnaha ya hyp illa chj hokvt, imvt, nan ishkot keho mayá.

33. Hvch ik ile haksecho kashke : nan ik vlhpeso a chukbuli yokvto im anukfila achukma puta tuk a im okpuni yoke.

34. Yohma he ai vlpiesa hoka oh okeha, micha na hvch ik ashvcho kashke; kanimi kvt Chihowa nan isht im ithaiyana ik im iksho hoka. Hvchi hofahya ch̄i ho iluppa hvchim anumpuli lishke.

35. Yohmi ka katiohmi hosh illi yut tani ho? mikmvt haknip vt katiohmi ho yummak ash ot isht kohcha ho? hatak kanimi kvt acha hi oka.

36. Im anukfilla iksho chia ma! nana ka ish hokchi tuk a illi yo keyukmvt, yummak ash ot okchaya yo keyu hoke.

37. Mikma nana ish hokchi kvt nan vpi yummak a hi o ish hokchi keyu, amba onush okmá, keyukmvt nihi inla yokmá, nana kia nihi ak bano hoke:

38. Yohmi ka Chihowa yut yohmi ai ahni mak osh, nan vpi ya ch̄i ka ima hoke; mikmvt nihi moma kvt ilap im vpi ya ch̄i ka ima hoke.

39. Nipi moma kvt nipi mihi achufa keyu hoke; yohmi ka hatak nipi vt inlak ma, inla mvt nampoa nipi, inla mvt nuni nipi, inla mvt hushi nipi yak oke.

40. Uba imma na haknip ilaiyuka, aka imm̄a na haknip ilaiyuka aienā kvt ai asha hoke: yohmi kia vba imma isht im a holitopa yokvto achufa, mikma inla mvt aka imma nan isht im a holitopa yak oka.

41. Hvshi yut nan isht im a holitopa yut achufa, inla mvt hushi ninak aya nan isht im a holitopa, anonti inla mvt fočik puta isht im a holitopa yut asha hoke; isht a holitopa hokvno fočik achufa kvt fočik inla ya it im inla hoke.

42. Illit falamvt tani kvt yummak inli ho chiyuhma hi oke. Toshba hi osh hollohvokchi tuk vt, ik toshbo ka hi osh taiyani hoke.

43. Ik holitopot hollohvokchi tuk vt, holitopa hi osh taiyani hoke: ik hlampkot hollohvokchi tuk vt, nan ai ahlahé mak osh taiyani hoke.

44. Ilhfiopak haknip hollohvokchi tuk vt, shilombish imma haknip osh taiyani hoke. Ilhfiopak haknip, mikmvt shilombish imma haknip ita tuklo kvt qashvshke.

45. Yvmohmi kak o hatak vmmona Alum vt shilombish

okchaya yosh toba tok; Alum ishtaiyopi kuto Shilombish okchalinchi yo toba tok, achi hosh holihiso hoke.

46. Yohmi kia shilombish imma kak osh vmmona tuk keyu, amba haknip imma kak atok oke: atuk o i himmak o shilombish imma kak atok oke.

47. Hatak vmmona kut yakni yo a toba hatuk osh, yakni imma kak oke. Hatak atukla kuto vba minti Chitokaka ak oke.

48. Yakni ai immi atuk ash o, chohmit kuna hosh yakni ai immi hokvto yummak inli ho chohmi hoke: mikma vba ai immi hokvto, yummak ash inli ho chohmi hoke.

49. Yohmi ka yakni ai immi kash o holba ka iloh ieshi hatuk a, chohmit vba ai immi kash o holba ka iloh iesha he ak inli hoke.

50. Yohmi ka itibapishi li vhleha ma! nipi, micha issish ita tuklo kuto Chihowa im apehlichika yvt ai immi ha he vlhpesa keyu; mikma nan toshba hi okvto nan ik toshbo ya ai immi ha he vlhpesa aiena keyu hoke.

51, 52. Yakeh! nana a luma hatuk a hvch im anoli lishke; moma kak osh hvpi nusa chi keyu, amba ai ishtaiyopi isht pufa yvt nana olakma, yakosi itin takla, nishkin mochukli ai itin takla ho, moma kvt inlv e toba hi oke: nana ola hvt ohonla he, mikmak o illi atuk vt ik toshbo ka hi osh tana he, mikma inlv e toba hi oke.

53, 54. Na toshba he ilvppak ash osh nan toshba he keyu ho isht a foyuka pulla he, mikma nan illa he ilvppak ash osh nan illa he keyu ho isht a foyuka he: yvmohmi ha yok mak o, nan illi hash o ont imaiyachi na ik ai iksho ka hi oke; ahanchi hosh holisso tok vt yummak ash ot ont ai ahla hi oke.

55. Nan illi ma! katima yak o nan isht ish nhli yo? ahollopi ma! katima yak o nan isht ish imaiyachi ho?

56. Nan illi i nan isht nhli vt nana ashvchi ak oke; mikma nan ashvchi isht imi hlampko yvt nan vlhpisa yak oke.

57. Yohmi kia hvpin Chitokaka Chisvs Klaist pulla hatuk mak o nan isht imaiyachi ya Chihowa yvt hvp ima hoka, Chihowa ya yak oke; im ai ahni lishke.

58. Yvmohmi hoka itibapishi li a holitopa vhleha ma!

hush kullo cha ik huchi fitekacho kish, vltoba iksho ka hi osh Chitokaka hush in toksvli keyu kvt hush ithaiyana hokvt, Chitokaka im atoksuli ya lauachit hush toksahanlashke.

CHAPTA XVI.

Nan ik im iksho a kaniohmit apelacha he, mikmvt vbanumpa hvt i shaht holitopvt mahaya chi ka, nanasi isht apelacha he im anoli ; 13 i kanvt nan i mihvt tahli mvt, isht aiyopichi kvt vbanumpa ha yakoke ahani tok.

1. YOHMI ka na yimmi əqli nan im itahobi imma hokno, chuch Kaleshi a hiohli kak o nana im apesa li tok a, chohmit hush yumihehi ak inlashke.

2. Ona li ha yo nan itahobi kvt ik ai iksho ka ch̄i ka, wek nitak vmmmonakma achvfa hush aiyuka kvt, Chihowa hvt nan im ilayak a ataiyahli ka, it ilaeuechit ishit hush il im bohonlashke.

3. Atuk o ona likma, kuna ho vlhpesa hush ahni hokma, mihi yosh nana hush habenuchi tuk ash Chelusalem isht ona ch̄i ka, holisso ha im atahli lish, pit yuhli lashke.

4. Yohmi kia ia li kak o vlhpesa hinla hokma, yummak ash ot si apihvt ia ch̄i hoke.

5. Yohmi ka Masetonia yakni ya a hlopulli li ha yosh, huchim ona la ch̄i hoke, Masetonia yakni ya a hlopulli li mak okvt.

6. Yohmikmvt huch ibai anta la ch̄i, əqli, hush tula yak kia huch ibai anta la ch̄i chishke ; yohmi ho anowa hopaki kanima yo ia la ch̄i ka hvs si apelucha hi oke.

7. Himonasi ya nowvt aya li hokvto, huchi pisa la he keyu ; amba Chitokaka yvt ik yohmi ahni hokma, ont huch ibai anta li hopaka he keyu, ahni li hoke.

8. Yohmi kvt Efesus ak o anta li Pentekost ai onak mak a ch̄i hoke.

9. Okhissa yvt chito, mikmvt v̄m ai əhla hi vt an tiwa, mikma a sanali vt laua hoke.

10. Yohmi ka Timohliüs vt ona hokmvt, nukshopa ikshot huch iba takla anta ch̄i ka hush pisashke : vno vt yummak inli chohmit, yummvt Chitokaka im atoksuli li ya toksahanli hoke.

11. Yvmohmi ka kuna kia ik shitelemo kashke: amba yvmmvt ayvt vñl chij ka, i kanvt hvsh apelvhashke: itibapishi li vhleha takla vñl hi a hoyo li hoka.

12. Il itibapishi Apollos okvno iloh itibapishi vhleha ha ai itvpikhvshim ona he ak o ahni li fehna tuk; yohmi kia himonasi yokvno ona hi vt ik ahno kumohmi tuk; yohmi kia ona he im ai vlhpiesa onakma, ona chij hoke.

13. Okchut oh il apistikelí, ai yimmika ya kvllot ieshit hvsh hikiashke, hatak ahli il otvninchit, hvsh hlampkashke.

14. Nana hvsh a kaniohmi puta kvt nan it i hullo mak o ik ai yvmohmí.

15, 16. Stefanas in chuka chufa, yvmmak osh Akaia ya nan ai vni vmonna yosh, na yimmi ahli vhleha ha apelvcha chij kvt okla il im issa tok; yohmi ka itibapishi li vhleha ma! yvmma chohmi, micha na piba toksvli, micha toksvlit hoyubli ayuka ka hvsh im antia chij ka, hvch it i kanvt hvchi atohno lishke.

17. Stefanas, micha Fatunatus, mikmvñt Akaikus aiena kvt ai vñl ka sai yukpushke; nana ka hvch ik onancho ke tuk a okla onanchit atahli hoka;

18. Sa chukvsh, micha hvchishno aiena chukvsh a okla yukpali hatuk: yvmohmi hoka yvmma chohmi vhleha ha i kanvt hvsh ithaiyanashke.

19. Asia yakni chvch maya kvt pit hvchi aiokpvchishke. Akuila micha Plissilla ita tuklo kvt, ilap in chvch maya ka aiena kvt, Chitokaka ibai achufa hvchia hoka pit hvchi aiokpvchi fehnvshke.

20. Itibapishi moma, kvt pit hvchi aiokpvchishke. Sük-sowa holitopa yo hvsh it aiokpvchashke.

21. Uno Pal nan isht aiokpvchi ka vno subbak isht holis-sohonchi lishke.

22. Kuna hoh kia Chitokaka Chisus Klaist a holitobli keyukmvñt, mihi yosh Anahlema, Malanahla mak ashke.

23. Hvpin Chitokaka Chisus Klaist nan isht i kana yosh hvchi anukfoyukashke.

24. Klaist Chisus ibai achufa hvchia ka nan isht i hullo li yvt mominchit hvchi anukfoyukashke. Amen.

HOLISSO ATUKLA PAL VT

CHUCH KOLINHLA

A HIKIA HO I HOLISSOCHI TOK.

CHAPTA I.

Pal vt ilap nan isht im apalvmi ka isht hopohghla kvt achi; mihmvt vbanumpuli Kolinhla ai asha ka nan isht hopohla tok ash inli ho isht hopohlahan li kvt Chihowa ya yak oke im ai ahni, 1 ; 15 nana hosh kaniohmi ho ik im vlo ki tok vt anoli; 23 i kana kak a tok.

1. CHIHOWA nan ai ahni atuk pulla mak o Chisus Klaist im apostel Pal, micha il itibapishi Timohli ita tuklo kvt Chihowa in chuch, yvmmvt Kolinhla a hikia, mikmvn na yimmi ahli moma yvmmvt Akaia moma ka ai asha ka aieninchipit aiokpvchi kvt,

2. Piki Chihowa, micha Chisus Klaist ita tuklo nan isht i kana, micha isht it i nanaiya ita tuklo kvt hvchi anukfoyukashke, hvchim ahnishke.

3. Pin Chitokaka Chisus Klaist Iki, Chihowa, nan i nukhaklio fehna Iki, micha nan isht anuktanla moma in Chihowa yvt holitopashke.

4. Yummak osh nan isht il ai ilbusha moma ka pi nuktalahanli; yohmi ho pishno vt Chihowa hak o nan isht im anuktaiyala ya isht a pi nuktaiyala cha, kvna hoh kia ilbaiyasha hokma, e nuktalahanla hinlvshke.

5. Klaist pulla hatuk mak o nan isht ilbusha yvt pim a laua; yohmi hokvt Klaist pulla hatuk mak o nan isht a pi nuktaiyala yak kia lauvshke.

6. Yohmi ka nan isht a pilbaiyasha hoh kia, hvchishno

ano nan isht hvchim ahopohla, micha nan isht hvchim ai okchaya chi kvt, nan ilbusha yvmmak o pishno vt isht a pilbusha tuk ak inli chohmi ka isht a hvch ilbusha hokmak osh nan isht hvchim ai ahli hoke; anonti pishno vt isht a pi nuktaiyala hok mak heno, yvmmvt nan isht a hvchim a hopohla, micha hvchim ai okchaya mak oke.

7. Yohmi ka nan ilbusha puta ka hvsh ibai ishi, yohmi hatuk okvt na hopohla ma hvsh ibai isha chi ka il ithaiyana kak osh nan isht e hvchim anukfilli kvt kullo fehnvshke.

8. Illoh itibapishi vhleha ma! nan isht a pilbusha yvmmvt Asia yakni ya a pi onvtula; yohmi mvt pim isht hlampko hash imaiyachi na na pi weki fehna mvt; okchaya he yak kia kil ahno ke tuk a, hvch ik akostinincho ka hi a e hvchim ahni keyu hoka:

9. Yohmi ka illa he anumpa il il ai eshi, yohmi kvt pishno ak inli ka il anukchieto he keyu; amba illi tanichi Chihowa yak a hetuk oke.

10. Yvmmak osh nan illi chinto fehna kash a pi hlakofichi tuk osh, a pi hlakofichi moma: yohmi kvt yvmmak ash osh pi a hlakofhineha chi ka yvmmak o il anukchieto hoke.

11. Hatak laua pulla kak o nan isht i kana pi onvtuyula tuk a, hvchishno ak kia itapelvt anumpa ilbusha isht hvsh pi anumpohonli; yohmi ho pishno pulla kak o yak oke Chihowa ya im ahni kvt laua hi oke.

12. Isht il il akostininchi isht im ai atokowa kvt haknip immà isht hopoyuksa keyu, amba Chihowa nan isht i kana pulla hatuk mak o nan anukfila apissali achufa, micha Chihowa anukfoyuka ai ahli hosh yakni paknaka il ai ahanta hatuk: yohmi hokvt hvchishno yak heno i shahlichit il a hvchi yvmoohmi, ilvppak osh nan isht il il aiyukpa hoke.

13. Nana ka hvsh it im anumpuli; micha ahli hvsh akos-tininch fehna tuk yvmmak keyukma nana inla yo e hvchi holissochi keyu hoke; yohmi hoka ahli ahnit, akostininchit mahayvt ont ai vhli ka hvsh ona hi a hvchim ai ahni lishke:

14. Chitokaka Chisus i nitak vt vlakma, nan isht pim ilai-yukpa hvchia ha chi kvt, yvmmak inli ho chohmit nan isht

hvchim ilaiyukpa pia ha chi ka, hvsh kanimi kvt ahli hvsh pi akostininch ak inli tuk oke.

15, 16. Yohmi ka yakohmi tok ak o na yimmi hosh atukla ma nan isht ilaiyukpa ka hvsh isha hi a tikba hvchim ona la he ahnit, anonti ont iwt, Masetonia yakni ona li tuk mvt, anonti Masetonia yakni yash o akohcht atuklant hvchim aya li hok mak osh, Chutia imma aya la chikma, hvs si apelvcha hi a vm anukfila tuk oke.

17. Yvmohmi kvt yakohmit vm anukfila mvt, vm anukfila hvt fitekuchi hosh yvmihchi li tuk o? yummak keyukmvt vno vto yau, yau, mikmvt keyu, keyu, achi la hi osh nana ka ahni li kvt, haknip nan ai ahni ho isht anukfilli li tuk o?

18. Yohmi ka Chihowa hvt ai ahli yatuk o, pim anumpa nan isht e hvchim achi tuk a yau yatuk osh anonti keyu, yatuk keyushke.

19. Uno, mikmvt Silfanus, micha Timohlius aien a pulla kak o, Chihowa Ushi Chisus Klaist, yummvt hvchim anuhumpa kvt, yau yatuk osh, anonti keyu yatuk keyushke, amba yummak okvt yau yatuk oke.

20. Yvmohmi atuk pulla mak o Chihowa hvt nana im ihisa tuk moma kvt yau okma, anonti yummak atuk mak o Amen oke, yohmi kak o pishno ma Chihowa nan isht im a holitopa yoke.

21. Yvmohmi ka Klaist a iloh ibai achvfa chi ka, hvpi hlampkohonchi cha, na pi a hummi kvt, yummvt Chihowa ak oke.

22. Mihmvt ilap immi pia ha chi ka, yummak ash osh pi ai ahliche mvt, ai okchayvt bilia e pisa he pim ai ahliche kvt, Shilombish a pi anukfohkechi tuk oke.

23. Yvmohmi hoka hvchim kanvt na hvchim anukfilli la chi kak osh, Kolinhla ya ak ono kisha hatuk a Chihowa hvt vmi shilombish a atokowvt vm ithana ya chi ka hohoyo lishke.

24. Na hvchi yimmi ka il i shahli hatuk keyu hoka, amba na hvchim ai yukpa apelvchi pia hoke; na yimmi pulla hatuk mak osh hlampkot hvsh hikia hoke.

CHAPTA II.

Nana hosh kaniohmi kak ə ik im ono ki tuk vt anoli, 1 ; 6 Chvch a a kohcha tok ə i nukhanklot i kvshofa hi ə im ahni ; 10 ilap ak kia i kvshofi tuk ə chohmachi : 15 kanima yo vbanumpa isht anum-pohonli ka Chihowa yvt im ai okpanchi.

1. YOHMI ka vm anukfila kvt na nukhaklo hosh, atuk-la ma ak hvchim ono ka chi, ilvppak ə vno ak inli kvt vm anukfila hatuk oke.

2. Hvchi nukhaklochi li, yohmi hokma kuta hosh na sai yukpala hinla ho? amba vno yak atuk mak ə kuna hosh nukhaklo tuk yummak inli kak a hinla keyu?

3. Yohmi ka ona likmvt, kuna ho ibai yukpa la hetuk, yummak ash ot nana a kaniohmi ka isht a nukhaklo la hinla kak osh, ilvpput mihi ash inli ka isht hvchi holissochi li hatuk oke : hvsh moma nan isht hvchim ai-yukpa yvt vno a nan isht vm il aiyukpa ak inli hoke, ai ahnit hvsh moma ka hvchi yimmi lishke.

4. Na nukhaklo fehna, chukvsh ilbaiyvshvt nishkin okchi mvt laua aieno hosh isht hvchi holissochi li hatuk ; hvchi nukhakla he yak atuk keyu, amba nan isht i hullo yummma isht hvchi hoyullo li fehna hatuk a hvsh ithaiyana chi kak atuk oke.

5. Yohmi kia kuna hosh na nukhaklochi tuk okmvt, vno ak illa ho si anukhaklochi tuk keyu : hvsh moma ka ak hvchi kullo ka chi kak osh ilvppa hvchim achi lishke.

6. Hatak yummma chohmi kuno nan vlhpisa ilvppak ə laua kvt im apesa tuk a, im ai vlhpiesa hoke.

7. Yohmi tuk a yummma chohmi kash i kashofit hopohlvli kak ə hvsh ahna he tuk oke ; yummak keyukma yummma chohmi kash ot na nukhaklot isht ai i palummit kwnia hinla hoke.

8. Yvmohmi hoka nan isht hvsh i hullo kvt yummak ash ə hvsh im otvnincha chi kak ə hvchim ai ahni lishke.

9. Ilvppak a he mak ə holissochi li akinli hatuk ; nana

moma ka ai im antia huchia hokmá, nana ka huch imoma ka ithvna la chi hatuk oke.

10. Kuna ho nana ka hush i kashofi hokma, vno ak kia i kashofi li hoke; nana hatuk o i kashofi likmut, huchishno pulla kak o Klaist vlhtoba hosh yvmihchi li hoke.

11. Yvmmak keyukma Setan vt pi haksicha hinla, yvmma nan ahni ik vlhpeso ya kil ithano keyu hoka.

12. Yohmi ka Klaist im vbanumpa isht anumpohonli la chi hosh, Tloas a ona li ma, Chitokaka yut nan ai ahni ho, okhissa yut an tiwa tok.

13. Itibapishi li Titus a ak ahayucho hokut, vñm anukfila nuktula ik svñm iksho ki tok: yohmi ka okla yvmmak ash aiokpvchit issa li mvt, yvmma a kohchr Masetonia yakni ya ia li tok.

14. Yohmi hoka, yak oke ahnit, Chihowa ha kiloh aiokpvchi; yvmmak osh Klaist pulla hatuk mak o il imaiyacha chi ka pi apelahanchi; mikmut kanima moma ka pishno pulla atuk mak o ilap a nan isht im ithvna i na balama otvnihinchishke.

15. Pishno vto Klaist ibai achufa pia hosh kuna hosh okchaya chi, micha illa chi aiena kak o Chihowa i nan isht balama champuli pia hoke.

16. Achufa kano, illi bitema nan isht ai illa he i pia hoke, mikmut inla yano okchaya na balama nan isht ai okchaya pia hoke. Yohmi ka kvt hosh ilvppa puyuta ka isht im ai vlhpiesa cho?

17. Laua hvt Chihowa im anumpa ik ai ahlecho ya e chohmi keyu; amba chukvsh ai ahli, yohmi kvt Chihowa im vlhtoka kvt, Chihowa itikba yo Klaist i hohchifo isht il anumpohonli hoke.

C H A P T A III.

Pal vt vbanumpa isht anumpohonli ho Kolinhlia vt vbanumpa anukfohka kak o yvmmak ash Chihowa hvt pit pila hatuk a otvninch tok, 1; 6 vbanumpa anumpula chi ka Chihowa yak osh ataiyahli tok a tuk, 12 vbanumpa hak osh holitopa kvt Moses nan apesa tok a i shahli.

1. PISHNO ak inli kvt atuklanchit il il ahninchit isht il ia ho? keyukmvt inla maya ka chohmit, isht hvsh pi kana he holisso puta ka il isha he pim vlhpesa ho? yummak keyukmvt holisso isht ai i kana ya e hvchim ai isha hi vt vlhpesa ho?

2. Hvchishno ak osh pi holisso hvchia hosh pi chukvsh a a holihiso tuk osh, hatak moma ka im otaiyanit im ai it anuhumpa hoke:

3. Pishno yatuk mak o hvchishno vt Klaist i holisso toba tuk otaiyanit hvsh anohowa kvt, isht holissochi oka yo isht holihiso tok keyu, amba Chihowa okchaya imi Shilombish ak atuk; tvli patvssa yo a holihiso tok keyu, amba chukvsh nipi ak atuk oke.

4. Yohmi hatuk o Klaist pulla hatuk mak o Chihowa yak osh yvmihchi tuk a pi yimmishke.

5. Pishno ak inli nana ka ai isht anukfillit isht im ai ahla he il ahni kak osh pishno ak inli kvt il ona chi keyu hoke: amba Chihowa ak atuk mak o nana ka pim ai ahlit il ona chi hoke.

6. Nan it im vlhpisa himona nan isht im vta ai ahla he mak o yummak osh pi atokoli ak inli tok: holisso tikba yak o nan isht im vta ho keyu, amba Shilombish ak oke; holisso tikba yash okvto vbi yoka, amba Shilombish okvto okchalinchi yoke.

7. Yohmi ka twli yo ai in chawa holisso isht ai illa he isht ai vta yvt holitopa; yohmi ho Moses yvma nashuka yvt shohpalali hoka, Islael ushi vhleha hvt nashuka yash o atokowut pisa he keyu ki tok; yummak ash ot ont ai iksho ka hi atok oke;

8. Katiohmi hosh Shilombish nan isht ai vta yokak heto holitopa kvt i shahla hetuk keyu ho?

9. Isht a palvmma he nan vlhpisa isht ai vta yvt holitopa hokma, nan isht ai vlhpiesa isht ai vta yokak heto holitopa kvt i shahli fehna he tuk keyu ho?

10. Nana kvt yakohmit holitopa tok ilvppak ash ot na holitopa yummvt i shahli pulla kak o holitopa kvt ik alauwo ki tok.

11. Nana kvt ont ai iksho kak osh holitopa tok okma, nana kvt takali kvt holitopa i shahli fehna hinla hoke.

12. Yvmohmi hoka yvmohma chi ahnit na pi yimmi hosh anumpa otaiyani fehna ho isht il anumpuli hoke.

13. Yvmohmi kvt Moses atok ano chohmi keyu, ymmak okvto Islael ushi vhleha hvt nan vlpisa yummak ash ot kvnia kia, a hlopullichit ai vhli pit atokowvt pisa keyu kak o, isht ompoholmo yo ilap nashuka yash isht ompohomo tok.

14. Yohmi kia yvmma im anukfila hash ot lpa yatok ; himak nitak ak kia Testament sipokni im ai itim anumpuli hokvno nan ompoholmo mihi ash inli kvt ik i kvnio kisha hosh takali hoke ; yohmi kia yummak ash ot Klaist ak o ont isht ai akshot kvnia hoke.

15. Yohmi ka himak ak kia Moses a ai itim anumpuli ka, nan ompoholmo yashot i chukush a on hlipia hoke.

16. Yvmohmi tuk o Chitokaka ya pit ai i filemt im onakma, nan ompoholmo yash o isht i kancha hi oke ;

17. Yohmi ka Chitokaka yvt, Shilombish yummak ash oke : yohmi ka kanima yo Chitokaka imi Shilombish vt a otaiyanikma, mihi yo ai yuka keyu mak oke.

18. Yohmi ka nashuka ompoholmo keyut a pisa yo il a pihsa chohmit Chitokaka im aholitopa ya e pihsvt, ymmak ash inli ho hoyulba chi hosh momvt inlv e toba kvt, Chitokaka imi Shilombish vt a pi yvmihchi kak o, holitopa kvt i shahlit il a mahaya hoke.

CHAPTA IV.

Ai ahli, achilita hosh vbanumpa ha isht anumpohonli tuk vt otvninchi, 1; 7 mihmvt nan im apalvni puta tuk vt Chihowa yosh isht aholitopa he, 12 chvch nan isht im a chukma he ; 16 mikmvvt ilap nan isht il ai yukpvt im a bilia hi a tuk a, achi.

1. YAKOHMA chi mak o, nan isht i nukhaklo il ishi hatuk mak osh, nan isht ai vta ilvppak ash o isht il ahanta kvt, pin takobi keyushke.

2. Isht a hofahya he nan isht im alumta puta ka e kanchi

mvt; i kostinit nan isht akanomi ya il ai itvnowa keyu, Chihowa im anumpa ha ik ahlechot il inlvchi keyu; amba Chihowa itikba ya nan ai ahli ya il otvninch ka, hatak moma nan isht il akostininch yvt ahli, pim ahni hoke.

3. Yohmi kia pim vbanumpa hvt luma hokmvt, okpula he vhleha hak o in luma hoke.

4. Klaist, yummvt Chihowa Hoyulba ka, im vbanumpa holitopa in tohwikeli hvt on tomma chi keyu ka, na yimmi keyu yummak ash o im anukfila puta ka yakni ilvppa i shahli yosh lvblich hatuk oke.

5. Ubanumpa isht il anumpuli kvt, pishno ak inli ho isht il anumpuli keyu, amba Klaist Chisus Chitokaka yak atuk: yohmi hokvt pishno yokvto Chisus pulla hatuk mak o hvchin tishu pia hvt il otvninchishke.

6. Tohwikeli hvt ai okhlilika ya a kohchvt tomma chi ka, Chihowa yummak osh im apesa tok okvt, Chihowa im aholitopa nan isht ithaiyana im a tohwikeli hvt Chisus Klaist i nashuka a minti mak o pima chi hosh pi chukvsh a a tomni hatuk oka.

7. Yohmi kia nan isht ai ahli chinto fehna kvt pishno ak o keyu, amba Chihowa ak o immi ha chi ka, nan ilayak holitopa ilvppak ash o nan ai vlhto okfulush toba ho isht il ieshi hoke.

8. A palummi bano hosh pia folubli kia, atukonofvt pi komunta keyu kisha; atia he pim oktvpa, yohmi kia isht apeluchi yvt ik pim iksho ka chi kil ahno hoke.

9. Inla yvt pi palummichi, yohmi kia Chihowa hvt ik pisso; aka il itula; yohmi kia ik pi okpulo hoke.

10. Chitokaka Chisus vt isht illi mak o pi haknip a isht ieshit il aya bilia; yohmi na Chisus okchaya yosh pi haknip a ai otvna chi hatuk oke.

11. Chisus vt okchaya kvt illa he pi haknip a isht ai ota-hana chi ka, Chisus pulla hatuk mak o okchayvt il anta kvt, illa he pim vlhpihisa na bilia hoka.

12. Yohmi hoka nan illi yosh pi a toksahanli, yohmi kia nan okchaya yosh hvchi a toksahanli hoke.

13. Na yimmi im anukfila, Na sai yimmi yvmohmi hosk

anumpuli li hoke; achit holisso tok a yummak inli ho il ieshi hosh na pi yimmi ak inli, yvmohmi hokvt il anumpuli hoke.

14. Chitokaka Chisvs a tanichi tok yummak osh Chisvs pulla hatuk mak o pi tanicha he ak inli, mikmvt hvchishno a a pit aieninchit pi hiohlicha hi a il ithaiyana hoke.

15. Nana puta kvt hvchishno pulla hatuk mak o ai yakohmi ka, laua kvt yak oke ahnit, aiokpvchi pulla ho nan isht i kana laua kvt Chihowa yvt isht a holitopa chj hoke.

16. Yakohmi hoka pin takobi keyu hoke; yohmi kia hatak pi pakna yokvto tikambit mahaya kia, hatak anyukaka yokvto nitak osk nitak ma himonvt tohombushke.

17. Yakosi itintakla ho na pim a palvmmi shohvla kia, na holitopa weki bilia nan imaiya fehna ka pim atahli hoke:

18. Nana puyuta yummvt otaiyani yak o e pihisa keyu, amba nana kvt otaiyani yak keyu; nana puta yummvt otaiyani yokvto a bilia keyu; amba nana puta yummvt otaiyani keyu kak osh a bilia yoke.

C H A P T A V.

Aiokchaya bilia pisa he anukfoyuka ahli, 1; 9 mihmvt Klaist im ai asha holitopa nan apesa itikba hikia chj kvt ithaiiana, yohmi mvt im a holitopa he ahnit toksahanli; mihmvt ib ai achvfvt nohowa, micha inla mvt okchaya chj ka anukfokihinchi.

1. ULHTIPO yakni pakna a pim aboha ilvppak okvt ont a yuhla kia, ibbak isht atoba tok keyu, vba a holitopa ya a bilia chuka, Chihowa hvt ikbi tok a, pin talaia kvt il ithaiyana hoka.

2. Ilvppak ash o il a foyuka kak osh ilbushvt e hihjha kvt, pim aboha, yummvt vba a minti mak o, isht e fohka he ahni fehnvt, e hohoyo hoke:

3. Yakohmit e foyuka muhli hokmvt, haknip biekvt il otaiyana chj keyu.

4. Ulhtipo ilvppa il ai ahanta hokvto, nan i weki tikabit ilbushvt e hihjha; yohmi kia ik fohko ka hi ak o il ahni keyu, amba isht il a foyuka he ak oke; yohmi ho nana kvt

illa he imma hatuk okvto nan okchaya kak o ont ai iksho kak a chi hatok a il ahni hoke.

5. Yohmi ka nana kvt ilvppak a chi ka a pi atahli tuk vt Chihowa ak oke; yummak osh ai okchayvt bilia yvt pim ai ahla chi ka, Shilombish a pihima ak inli hoke.

6. Yvmohmi hoka yvmohmi pulla chi ai ahni fehna kvt, haknip o il ai anta takla hokvto, Chihowa ya i filvmmi hosh il anta kvt il ithaiyana hoke.

7. Na yimmi pulla kak osh il itunohowa, pisa kak o keyu hoka.

8. Yvmohmi pulla chi il ahni fehna, yohmi hokvt haknip a ai i filvmmi cha, Chitokaka yak o il ibai achufa hi ak osh pim i shaiyahli hoke.

9. Yvmohmi hokvt ibai achufa kak okmá, keyukmvt i filvmmi kak okmá, nana kia yummak ash e yukpala chi kvt e toksahanli hoke.

10. Ilap haknip aiyuka nana kvt ai yvmohmi tuk a nana achukma hokmá, keyukmvt okpulo hokmá, nana hoh kia, yvmma yvmihchi tuk isht vlhtoba mak o moyuma kvt il isha chi kvt, Klaist im o binili nan ai apesa itikba ya e moma kvt ont il ai otaiyana chi pulla hoka.

11. Yvmohmi hoka Chitokaka isht im anukshopa hi a ithaiyana hosh, hatak puta kvt hlakofa he ahnit il in tohono; yvmohmi hokvt Chihowa ho il im otaiyani pulla; yohmi hokvt nan isht hvsh il akostininchí ma e hvchim otaiyani ak inli, ahni li hoke.

12. Isht hvsh pi ahninchá hi a pishno ak inli kvt atukla ma isht e hvchim atahli keyu; amba chukvsh ak o keyu; ilap nashuka yo isht il aiyukput ilauata vleha yvmma hvchishno vt i nan hvsh ok acha hi vt hvchi anukfoka chi kak osh, pishno ak o nan isht hvsh il aiyukpa kvt hvsh il auata chi kak o, e hvchim ahani hoke.

13. Pishno ak inli kak osh il il atampli fehna hokmá, nana hoh kia, Chihowa nan isht im a holitopa chi kak oke: keyukmvt pim anukfila nuktaiyala hokmá, nana kia hvchishno nan isht hvchim achukma chi kak oke.

14. Klaist nan isht pi hullo yak osh a pi anukfoyukvt pi

ai yimilihinchi hatuk oka ; yohmi ka achvfa kvt moma ka im illi hatok, yohmi hokma, moma kak osh illi yoke, ahnit yahohmichit isht pim anukfila hoka.

15. Yohmi ka moma kak o im illi hatuk oka, kvna hosh himmak ma okchayvt ahanta kvt, ilap nan ahni banot ahanta he keyu, amba vlhtoba hosh illi tuk osh, anonti falamvt tani tok yummak o holitoblich hosh ahanta he vlhpesa hoke.

16. Yohmi ka himak a pilla ka haknip imma hatak nana kia il ithaiyana chⁱ keyu : ahli, yohmi kia haknip imma Klaist okvno il ithaiyana tok : yohmi tok kia himak a pilla kvno yummak ash il ithaiyana chⁱ keyu mak oke.

17. Yvmohmi ka hatak nana hosh Klaist a ibai achvfa hokmv, mihi yosh nana toba himona yoke : na sipokni atuk vt ont ai ikshot kvnia na, yakeh ! nana puta kvt himonvt toba hoke.

18. Yohmi ka Chihowa yummak osh Chisvs Klaist pulla hatuk mak o ilap a isht a pit i nanaiyuchi tok ; mihmvt nan isht it i nanaiyuchi isht ai vta yo pi atokoli tuk mak osh, nana yakohmi puta ka yvmihchi yoke.

19. Yohmi kvt Klaist pulla h Chihowa hut yakni a ilap a isht il i nanaiyuchi kvt, yummak ash nan im ai ashuchi puta kash o isht in takalihinchi keyu ; yohmi mvt nan isht it i nanaiya im anumpa ha pi anukfoyuki hatok.

20. Yvmohmi hoka Klaist vlhtobvt im anumpa isht a ya pia hoke ; yohmi ka pishno pulla hatuk mak o Chihowa hut i kanvt hvchim anumpohonli chiyuhmi ma ; pishno mvt Klaist vlhtoba hosh e hvchim asilhha ka Chihowa ya hvsh i nanaiyashke.

21. Yummak atuk mak o Chihowa nan isht im ai vlhpiesa e toba chⁱ ka, yummvt nan ashuchi ithaiyana tok keyu ka, yummak ash o Chihowa yvt nan ashuchi yo pim ikbi tok.

micha toksahanli aiena kvt anoli; 14 Chihowa okchaya yø in temple a tuk okvt, na holbvt toba putananakaniohmi ik vlhpeso puta ka ai i filvumma chi ka i miha.

1. YUMOHMI hoka pishno vt nan itiba toksvli pia hosh, Chihowa nan isht i kana hvsh habena kvt, pilla hvsh habena chi keyu ho i kanvt hvchin tohono li hoke.

2. Ai okpancha he nitak vt takali ma chi hahaklo li tok ; anonti isht ai okchaya nitak vt takali ma chi on chvfut chi apelahanchi li tok, yummvt achi hoka : yohmi hoka yakeh ! himonasi ya aiokpahancha he nitak vt takali hoke ; yakeh ! himonasi yak osh isht ai okchaya he nitak vt takali hoke.

3. Ubanumpa isht ai vta yvt ik hofahyo ka chi ka, nana kia isht ai ibetvubli ya kil i bohonlo hosh ;

4. Nuktaiyalvt achunanchi fehna, nan apalummi puta ka isht ai atukonufvt a hlakofa he keyu ;

5. Fahama, aboha kvlo ma fohoka, nukkillit yahapa puta, toksahanlit hoyubli, nusi mvt ik im iksho, hohchahafo,

6. Chukvsh kashofa, nan ithaiyana, i kanvt nuktaiyala, svlahvt nokowa, Shilombish Holitopa, ilahobi keyu hosh nan it i hullo,

7. Nan ahli isht anumpa, Chihowa nan isht im ai ahli, isht impakimma, mikmvt isht afubekimma ita tuklo kvt nan isht ai vlhpiesa i nan isht tanampi isht ai im vlhtaiyaha ;

8. Nan isht holitopa, anonti nan isht ik holitopo, nan ik achukmo isht annoa, anonti nan achukma isht annoa ; na haksichi yø chiyuhmi, yohmi kia ai ahli bieka ;

9. Ik ithano yø chiyuhmi, yohmi kia otaiyani achukma ; illa he im ai vlhpihisa, yohmi kia yakeh ! pi okchaya moma ; kostina hi osh nan i palummi, yohmi kia illi keyu ;

10. Na nukhaklo yø chiyuhmi, yohmi kia na yukpa bieka ; ilbvsha yø chiyuhmi, yohmi kia lawa ka nan in lauahanchi ; nan ik im iksho kamohmi ho chiyuhmi, yohmi kia nana moma kvt ai immi ; nana kvt a pi yakohmi hokvt, Chihowa nan isht im vta vt kanoihma hetuk a chohmit nana moma ka isht il ai otvnhinchi hoke.

11. Kolinlian hvchia ma ! pitakha yvt hvchi wakama, pi chukvsh mvt hvchim a chinto fehna hoke.

12. Pi chukvsh a ai iskitinosi ho hvsh pim a foyuka keyu, yohmi kia hvchi chukvsh okvno iskitinesi ho hvsh a pi foyuki hoke.

13. Yohmi ka mihi ash inli chohmi ho hvsh pi falamin-chi cha, hvchi chukvsh a hvsh pin chitolashke; um vlla chipunta chohmi ho im anumpvli li hoke.

14. Na yimmi keyu vhleha hokvno it ibai achvft ikunla abana isht ik hvch abanaiyo kashke: nanta ho nan vlpesa kvt nan ik vlpeso ya it ibai ieshi ho? nanta ho tohwikeli hvt okhlili ha isht ai it ibai achvfa ho?

15. Yohmikma Klaist vt Belial a nanta ho isht ai itiba ola achukma ho? mikma na yimmi yvt nan ik yimmo ya nanta ho isht ai it ibai achvfa ho?

16. Yohmikma Chihowa in tempel vt na holbvt toba puta ka nanta ho isht ai it ibai achvfa ho? Chihowa okchaya in tempel hvchia hoka; yohmi ka Chihowa hvt, Yummak oka ai ahanta la chi, mikmvlt a nohowa la chi: yohmi cha in Chihowa sia hokma, anonti ilap vt um okla ha chi hoke, achi tok oka.

17. Yumohmi hoka yummma a kohchvt hvsh mintashke; yohmi cha oh i filummí, mikmvlt nana kvt ik kashofo ka hvsh potoli na; yohmik mak o hvch i kanvt hvchi ieshi la chi hoke, Chitokaka yvt achishke.

18. Yohmikmvlt hvch Iki toba likma, anonti hvchishno vt svso vhleha, svstek vhleha hvsh toba hi oke, Chihowa nana moma i shahli hvt achishke.

CHAPTA VII.

Nan ashvchi ik im iksho ka he i miha, 1; 2 Klaist im vbanumpa ishi ai ahli yatuk ilap a okla aiokpancha chi ka i miha; Ilap nan im ai ashvchika isht ilekostininchá hi a i holisso vmonna kvt nukfokichichi tok o, Titus vt ant im anoli ilvppak o nana kvt i palvemi ak inli kia isht hopohohla tok vt pit im anoli.

1. YUMOHHMI ka a kana holitopa vhleha ma! nana hash yakohmiehit pimihisa ka, haknip, micha hvpim anukfila nan isht ai liteha puyuta ka isht kiloh il a kashofí,

Chihowa ha holitohomblı pulla hosh ont ai ahlit nan ai ashvchi ka ik pim iksho kashke.

2. Pi kanvt hush il anukfoyukashke; hatak nana kia kil v̄lhpesalo hatuk keyu; hatak nana kia il ai okp̄nichi hatuk keyu; hatak nana kia haksichi hosh nan il im ishi hatuk keyu.

3. Anumpa hv̄chi onochi la hi osh ilvppa anumpuli li keyu; hv̄ch ibai illi hokmá, okchayvt hush ibai ahanta hokmá, nana li vt pi chukvsh a hv̄sh pim a foyuka hoke, tikba kash achi li tuk oka.

4. Yohma chi ahnit, na yimmi chintot hv̄chim anumpuli li hokvt otvninchi li fehnvshke; nan isht hv̄chi ilauahanta li chinto hoke; na hopohla ma isht v̄m alotowa kvt, na pim apalvmmi a moma ka isht a sai yukpa v̄m atampa fehna hoke.

5. Masetonia yakni ya ant e chukowa ha yatuk a pi haknip vt ik foho kvmohmi; yohmi hoka a.pi afolubli moma ka nan isht a pi palvmmi; kocha ya ai itihimbi ma, pi anukaka ma, pi nukshohumpushke.

6. Yvmohmi kia Chihowa hvt kv̄na hosh im anukfila akanlosi puta hokvno nuktalali, yvmmak osh Titus vt ayvt vla pulla ho pi nuktalali tuk.

7. Yohmi kvt yummvt ayvt vla kak bano keyu, amba na nuktanla mihi yo yvmmak ash ot isht hv̄chi anuktanla pulla tuk osh, nan isht hvs sa hullo kullo, mihmvt na hv̄chi nukháklo, hv̄chim anukfila ha kullochit isht hvs si atakali aienā ka yvmmak ash ot ant pim anoli hoka: yohmi hoka nan isht sai yukpa v̄m i shahli fehna tuk oke.

8. Yohmi kvt hv̄chi holissochit isht hv̄chi nukháklochi li tuk vt sa nukháklo tuk kia, himak ano sa nukháklo keyushke; holisso yvmmak ash ot na hv̄chi nukháklochi kia, hushi kanvlli achvfa ho chohmi tok a akostininchli li hoke.

9. Himonasi ya sai yukpushke, na hv̄chi nukháklo kak keyu, amba na hv̄chi nukháklot hush ile kostininchli kak atuk oke: pishno ak atuk mak o nana kia isht hv̄chi ai okpulo ka chi kvt, Chihowa nan ai ahni ho na hv̄chi nukháklo tuk oke.

10. Chihowa nan ai ahni ho na nukháklo yokvto anukfohka cha, okchaya chi hosh ile kostininchí kvt nukhákla himma keyu hoke: amba yakni yo nan isht a nukháklo yokvto illa hi osh anukfohka hoke.

11. Chihowa nan ai ahni ho na hvchi nukháklo tuk vt ilvppak fehna ka ho pesá; tushpvt anukfohkv tana isht hvsh ahanta tuk, ahli, na hvchi onvtula tuk ash hvsh il im i kanvllichi tuk, ahli, ile shitilemvt nan ai ashvchi hvsh i nukkilli tuk, ahli, na hvchi nukshopa tuk, ahli, yvmohmi pullabano ahni fehnvt hvchi anukfoyuka tuk, ahli, nan a mosholit hvsh ahanta tuk, ahli, ik vlpeso mak o i sanalit hvsh i nukkilli tuk, yohmi hokvt nan ilvppak ash hvsh ai iti kashofa kvt nana ilvppa puta kak o isht hvsh il otvninchishke.

12. Yvmohmi ka hvchi holissochi li tuk vt kyna hosh nan ik vlpeso ka yvmihchi tuk, mihmvt kyna hosh ik vlpesot nan i palvmmi tuk pulla kak o yvmihchi li tuk keyu; amba Chihowa itikba yo tushpvt anukfohkv isht e hvchim ahanta ka hvchim otaiyana chi kak atuk oke.

13. Yvmohmi hoka nan isht hvchi nuktanla ka isht a pi nuktaiyala hoke; ahli, yohmi hokvt Titus yummvt im anukfila hvt hvsh moyuma kak o nan isht a nuktanla tuk okvt, na yukpa kak o pishno vt na pi yukpa pim atampa tuk oke.

14. Hvchishno pulla hatuk mak o isht im ilauata li tuk oh kia, sa hofahya keyu; yohmi ka ai ahli ho nana moma isht e hvchim anumpuli kvt, Titus itikba yo na yukvt il ilauata ha tuk a, yummak ash ot ai ahli bieka hoke.

15. Yohmi ka nukshohumpa, micha wvnihinehi aieno hosh yummak ash hvsh aiokpvchi cha, nana ka mominchit hvsh im antia tuk a ithaiyana momvt, yummak ash ot im anukfila isht hvchi kana kvt in laiyawa atampa hoke.

16. Yvmohma hoka nana moma ka hvsh ai ahli ka hvchi yimmi li kak osh na sai yukpa hoke.

mi ka hobacha he. 8 Chihowa nan isht i kana anukfoyuka pulla hosh; 14 Klaist a iakaia pulla hosh yv̄mihcha he; mikm̄t nana ka yv̄kmichi kvt ilap shilombish nan im achukmali pulla ka, achi.

1. YUMOHMI ka itibapishi li vhleha ma! Masetonia yakni chvch a hiohli ka Chihowa hvt ilap nan isht i kana yo ihima ma,

2. Nan imomaka pisa chinto a palvmmi kak o nan isht im il aiyukpa kvt l̄awa, yohmi mvt ilbvsha fehna yatuk vt ilap nan ahnit nan itahobi kvt, lauachi fehna tuk a isht e hv̄chim anolishke.

3. Nan isht il ilauechi, ahli, nan isht il ilauecha hi a im atampa ak inli kia, yv̄mihcha he ahnit, ilap inli nana im anukfila hatuk o atokowa anoli li hoke;

4. Nan isht i kana yash il ishi cha, na yimmi ahli vhleha isht im ia ka ibachvft il apelvcha hi a, okla ai ahni fehnvt pim asilhha tuk oke.

5. Yohmi kvt ilvppak o okla yv̄mihchi tuk, yohma he ahnit pim anukfila tuk keyu; yohmi kia na tikba Chitokaka yoka okla il im issa cha, anonti Chihowa nan ai ahni pulla ho pishno ma pim il issa tuk oke.

6. Yohmi hatuk o nana ka isht wakaya hatuk okvt, Titvs ak osh nan isht i kana hv̄sh bohla he yv̄mmak ash kia hv̄chi ai itahobit tahla hi a, il im ahni tuk oke.

7. Yumohmi hoka na yimmi, micha anumpuli imponna, micha nan ithana, micha tushpt anukfohkvt nana ka isht ahanta, mikm̄t hv̄sh pi hullo aienā, nana moma ma isht a hv̄chim v̄lhtaiyaha laua ka, chohmit nan isht i kana ilvppak kia hv̄chin lauashke.

8. Nan v̄lhpisa yo isht anumpuli li keyu, amba inla tushpt anukfohkvt nan achunanchi yak oke; yohmi kvt na hv̄shi hullo ai ahli kak o otr̄ninchī la he ak atuk oke.

9. Hv̄pin Chitokaka Chisvs Klaist, yv̄mmak okvt nan in laua yatuk kia, hv̄chishno pulla kak o ilbvsha yo toba tok; yv̄mmvt nan ilbvsha pulla hatuk mak o na hv̄chin laua chi hatok vt hv̄sh ithana hoke.

10. Yohmi ka tikba kash isht hv̄sh wakaya kvt, nana ka hv̄sh yv̄mihcha he ak illa keyu, amba afummi achvfa foka

kash yohmikbano ahnit, hvchi anukfoyuka ak inli tok, ilvp-pvt nan isht hvchim vlhpesa hoka, vno nana anukfilli li kvt anoli lishke.

11. Yohmi hoka himonasi ya nana kvt ai yvmohma he yatuk ash hvsh yvmihchashke: yohmik bano ahnit hvchim vlhtaiyaha hatuk okvno na hvchim asha ka isht hvsh ai ahlichi kvt, hvchim vlhtaiyaha ak inlashke.

12. Im anukfila ak osh nan tikba yohmikbano ahni ha yatuk okvno, hatak yvmmvt nana ho ishi tuk ash isht vlhpisa ho ima kvt isht ai vlhpesa hoke, amba yvmmak ash ot nana hash ik isho ke tuk ak osh isht ik im ai vlhpiso chatuk keyu.

13. Hvchishno ak osh na hvchi weki, nan inla yvto nan ik ahalao ka hi o miha li keyu.

14. Amba ai itilaushke, yohmi hoka himonasi ano na hvchin laua yak osh ilbvshvt na bvunna yak o apelvcha chi; yohmi tukma ilap nan in laua yak kia ilbvshvt na hvchi bvnnakma hvchi apelvcha chi; yohmikma nana kvt ai itilaui kvt;

15. Kvna hosh nana ka lauachit itahobi hatuk kia, atampa kvt ik im iksho hoke; mihma kvna hosh ik lauachot itahobi hatuk kia, ak im ono keyu, achi hosh holisso ka chohmi hoke.

16. Yohmi ka achilitvt nana yvmmak ash isht hvchim vtta chi ka, Titws im anukfila ha Chihowa hvt anukfohki-chechi tuk a yak oke, im ahni lishke.

17. Yvmmak ash osh nan in tohono li ka aiokpanchi fehna mvhli hatuk; yohmi kvt ilap inli nan im anukfila kvt achilitvt, ila tu^{sh}pa fehnvt hvchi maya hatuk oke.

18. Yohmi ma vbanumpa pulla hatuk mak o chvch hi-ohli moma ka im a holitopa il itibapishi ha, tuklonchit pit e pila hatuk.

19. Yohmi kvt yvmmak bano hatuk keyu, amba Chitokaka yvmmak ash inli kvt isht a holitopa chi, mikmvt nana kvt yohmikbano ahnit hvchim vlhtaiyaha tuk vt otaiyana chi ka, nan isht i kana ilvppak okvt pishno pulla hatuk mak o ai yvmohma tuk a yvmmak ash ieshit pi takla nowvt aya chi kvt, chvch vhleha ho yvmmak ash ot ai im vlhtokowa ak inli tuk oke.

20. Nan isht i kana laua ilvppak ash yakohmichit isht il ahanta na kuna kia nan isht ik pi mihacho ka chi ka, ilvppa ahah! il ahani tuk oke.

21. Chitokaka itikba ak illa keyu, amba hatak puta itikba yak kia, nana kvt vlhpiesa ho isht iloh il otvnincha hetuk oke.

22. Yohmi kvt himonna imomaka e pihisa na nana lawa ka achunanchi yatuk il itibapishi, mihmak o ibafokit pit e pila tuk; yohmi ka hvch*i* yimmi chinto kvt nana ka achunanchi i shahli fehna ch*i* pulla hoke.

23. Hvchishno yatuk mak o kynia kia Titus a a ponakla he yoba ká, yummak okvt vma itapela, micha na svba toksvli yoke; yummak keyukmvt hvp itibapishi vhleha hash a ponakla he yoba ká; yummak okvt Klaist nan isht a holitopa ch*i* ka, chvch hiohli puta ho ai im vlhtoka vhleha hoke.

24. Yvmohmi hoka nan isht hvsh i hullo, mikmvt hvchishno a nan e hvch*i* yimmit isht il ilauata hatuk ash atokolit ahlichi kvt, chvch hiohli puta, mikmvt ilvppak ash aie-na ka hvsh im otvninchashke.

CHAPTA IX.

Achakalinchi mvt peh pilla nan ima he ako anukfokichi, 1; 6 na holokchi nihi yo isht ita pesa hosh na hokchi tok aiyuk ali kak osh vma he, achi; 7 aiokpanchit nan ima kak o Chihowa yvt holitoblich; 10 pilla nan isht i kana lauachi ya Chihowa hvt ilap nan isht i kana ya lauachit ima.

1. **UBANUMPULI** ahli vhleha nan isht im ahanta he imma yummak ash okvno, nan isht mihvt hvch*i* holisso chi la he vma vlhpesa keyu.

2. Yohmik bano ahni kvt hvchim vlhtaiyaha hatuk, mihma Akaia ai asha kak kia afvmmi achufa foka kash nana kvt im vlhtaiyaha hatuk, mihi yash o Masetonia ai asha ka isht im ilauata li hatuk; yohmi hatuk o na hvsh a mosholi kvollo kvt laua fehna ka yimitvchit anukfohkiechi ka ithaiyana lishke.

3. Yohmi ka ilvppak ash o hvchim vlhtha ch*i* ka, achi

tuk mak osh il itibapishi vhleha ha pit tihleli li tuk oke ; yohmi ka nan isht e hvch ilauwaiyata tuk ash o ont ik ai ahlo keyu ka chi kak atuk.

4. Masetonia hatak ash ot si apihvt ona yoba cha, nana kvt ik hvchim vlhtaho ke tuk o ont ahayuchi na, na yimmit isht ilauwaiyata tuk mihi yo ai isht a pi hofahya hinla kvt, hvchishno ak a he okvno il achi keyu.

5. Yohmi ka il itibapishi vhleha hash ot tikba hvchim aya cha, nan isht hvsh i kana he vt isht anuhumpa tuk ash, tikbanli atahla he vlhpesa ahnit, i miha li tuk ; yohmi ka pilla nan isht i kana yummak a he ash ot vlhtaiyaha kvt, nan il ahayuchi bunna yo ik chohmo kashke.

6. Yohmi ka kvna hosh ik lauacho hosh hokchi hokvto, mihi yosh ik lauacho hosh vma chi ak inli hoke ; mikma kvna hosh lauachi hosh hokchi hokvto, mihi yosh lauachi hosh vma chi ak inli, ilvppa achi lishke.

7. Kvna kia ilap im anukfila hak o na tikba nan isht ik ahni ha yosh hatak moma kvt nan ik imá ; isht nukhaklo keyu, mikmvt yohma hi atuk ahni kak o keyu ; aiokpanchit nan ima yak o Chihowa yvto i hullo hoke.

8. Yohmi ka Chihowa hvt nan isht i kana moma ka isht hvchim a lauacha hinla kvt im vlhpiesa hoke ; yohmikma nana moma ka isht hvch im vlhtaiyaha biekvt, na toksvli achukma moma mvt isht a hvchin laua hi oke.

9. Yummvt na fimm hatuk ; micha yummvt ilvsha yo nan ima hatuk aieno kvt, nan ai vlhpiesa ho yumihchi tuk a takali na bilia hi hoke.

10. Yohmi ka kvna hosh na hokchi a na nihi im atahli yak osh hvchim ilimpa chi puska ma ik atahanli, micha hvchi na nihi hollokchi tuk ash ik ibakanli, mikmvt na hvsh a kaniohmi ai vlhpesa im vni ya i shahlichit ik ibafokoi ; achi hosh holisso hoke.

11. Nana ka lauachit hvsh ima chi kvt, nana moma isht a hvchin laiyauwa ka yummak osh pishno pulla hatuk mak o, lawa kvt Chihowa ha yak oke im ai ahna chi ka, nukfohkihinchishke.

12. Nan isht apehlvchi ilvppak oka isht ahanta kvt vba-

numpuli ahli vhleha nan ik im iksho kash o nan im atahli illa keyu, amba Chihowa ha lauachit yak oke im ai ahni vhleha ha isht a laiyawa ak inlishke.

13. Klaist im vbanumpa ha im antia hvsh il anohonli; yohmi mvt ilap, micha hatak moma ka nan isht hvsh apelvchi na nan isht apelvchi ilvppak ash o imomaka pihisa pulla hosh Chihowa ya okla holitoblichishke.

14. Yohmi mvt vba isht hvchi anumpohonli pulla hosh Chihowa nan isht i kana fehna kvt hvchi anukfoyuka chi ka, ai ahnit isht hvchi hullo hoke.

15. Chihowa nan isht i kana yvt anumpa ho isht annoa he keyu hoka yak oke im ai ahni lishke.

CHAPTA X.

Klaist im apostel atuk osh nana kvt vlhtoka, mikmvt shilombish imma isht im ai ahli kvt anumpuli.

1. YUMOHMI kvt Klaist chukvsh yohbi, micha chukvsh nukhobeliksho pulla ho, vno Pal sia hvt hvchi kanvt hvchi tohono lishke; hvchi takla antakmvt, im anukfila akanlosi, amba hvchi filvmmikmvt, hvchi nukwaya iksho sia mak oke.

2. Yohmi kvt haknip imma nan ahni ho nana ka e yummichchi tuk a kanimi kvt pi ahobachi, yummak okvno nukwaya ikshot i kullo li kvt hvchi takla ont anta li hokmuto, nukwayet ak hvchi kullo ka he ak osh hvchim asilhha lishke.

3. Yohmi kvt haknip o il ai ahanta kia, haknip imma nan ahni yo ai isht e tanahampi keyu.

4. Nan isht e tanampi yokvto hatak osh nan isht tanampi yo chohmi keyu, amba Chihowa pulla hatuk mak o kullo ai ahli hosh nan a holista kullo puta hatuk a yuhlichi yoka.

5. Nan anukfilli ik vlpeso puta, mikmvt nan anukfilli chaha, yummak okvt Chihowa nan ithana ya i sanalit ilap inli ile chahvchi moma ka ishit e kanchi, mikmvt Klaist a im antia chi ka, nan isht pim anukfila moma ka e yukahanchi yoke.

6. Yohmi ka na hvsh im antia he tuk vt ont a hvchim ai

ahlikma, nan ik im antio moma kuno nana kvt isht ai im vlhpiesa mak o isht il i yvmihcha he vt pim vlhtaha hoke.

7. Nashuka yo chohmichit nana ka hvsh pihsa ho ? Kvna kia Klaist immi sia, ahnit ilap inli il anukchieto hokmv, atuklant ilap ak inli hosh ilvppak ash ik anukfilli, yummak ash ot immi sia, ahni ka, yummak inli ho chohmit pishno kia Klaist immi pia, il ahni hoke.

8. Yohmi kvt nana a pi vlhtoka tuk pulla ho nana ka j shahlichit isht ilauwaiyata li ka isht ik hvchi okpulo hosh, achukma i shahlit hvsh mahaya hi o, yummak ash Chihowa yvt pima hatuk oka, sa hofahya he keyu hoke.

9. Yohmi kvt holisso ho isht a hvchi nukshopli la he, ahni li tuk a ik si ahobo ka chi kvt, ilvppak o yvmihchi li hoke..

10. I holisso hokvto weki, micha kullo, yohmi kia ilap haknip fehna otaiyani hokmvto ik kullo, micha im anumpa mvk ik ahobo hoka, yummak ash ot achi.

11. Yvmmma chohmi tuk ak osh ilvppa ik anukfilli, yohmi ka il i filummik mak osh holisso pulla ho anumpa yakohmi ka e yvmihchi kvt, pishno fehna il otaiyani hokmak heto, nan isht il anta kvt, yummak ash atuk ak inli ho e chohma hi oke.

12. Kanima kvt ilap inli il ahninchit vhleha, yvmmma pishno vt isht il iba hotehnachit, isht il it apesa keyu ; yohmi ka ilap inli ahninchit nan isht il apesa vhleha, micha ilap inli ka isht il it apihisa vhleha aieno hokvto hopoyuksa keyu hoke.

13. Yohmi ka nan isht a pim vlhpisa ya ont atampa hokvno nan isht il ilauwaiyata he keyu ; amba nan isht vlhpisa pulla yummvt hvchishno ak kia hvchim ona he, nan vlhpisa yo Chihowa yvt pim apesa tok ak oke.

14. Ik hvchim ono ke tuk ak inli ho chohmit nan isht a pim vlhpisa ya pit il atamplit il ile mahampli keyu ; Klaist im vbanumpa isht anumpohonli ak inli hosh hvchishno a e hvchim ona hatok :

15. Nan a pim vlhpisa, yash pit atamplit hatak inla im a pilesa yokvno nana ka isht il ilauwaiyata he keyu ; amba na hvchi yimmi hatuk vt i shahlit hlampko na nan isht a pim

vlhpisa hash o, hvchishno pulla ho isht a pi chito fehna he ak o il ahni.

16. Yohmikmvno hvsh ai asha ka misha vbanumpa isht il anumpohonli kvt, hatak inla nan isht im ai vlhpisa ai vlh-taiyaha ho isht kil ilauwaiyato ka ch̄i hatuk.

17. Yohmi ka kvna hosh ilauwaiyata hokvto, mihi yosh Chitokaka yo isht ik ilauwaiyatá.

18. Kvna hoh kia ilap inli il ahninchik kak osh mihi yosh holitopa keyu, amba kvna ho Chitokaka ak osh ahninchik mak oh chatuk oke.

CHAPTA XI.

Kolinhlia ya i hullo pulla hosh ilap inli il ahnichit vbanumpeshi moma i shahli ka ili tilauechit anohonli: 9 vbanumpa ha pilla isht im anumpohonli hatuk, vba nan vlhpisa imma nan achi ka ai itilaui.

1. NAN isht ilauwaiyata li kanomosi ka ant ik yohmi, hvs sv̄m ai ahnikbano hvchim ahni li; yohmi ka ant ik yohmí, hvs sv̄m ahna ch̄i pulla hoke.

2. Chihowa anukfoyukut nan isht i hullo mak o isht hv-ch̄i huhulo li hokvt: ohoyo himita hopoyuksa q̄hli hatak haleli keyu chohmi mak o, hvch ishit Chisvs a im otvninchi la hi mak osh, i hatak achufa ch̄i ka hvch it im apobvchi li hatuk.

3. Yohmi tuk kia sinti okvt ilap kostini pulla kak osh If a haksichi tok a, chohmit na hvchim anukfila hash ot sha-naia na nan anukfilli apissali achufa, yummvt Klaist ak o ai achufa yash o hvsh i filvmma hinla ka, sa nukshohumpa hoke.

4. Kvna hoh kia Chisvs inla yvmmma isht il anumpuli tuk ash keyu ho isht anumpulit aya, micha Shilombish inla yvmmma hvchi anukfoyuka tuk ash keyu ho hvchi anukfoyuka, yummak keyukmvt vbanumpa inla yvmmma hvsh aiokpvchi tuk ash keyu ho hvsh aiokpvchi hokmvt, ant ik yohmí, hvsh im ahni vlhpesa hoke.

5. Apostel moma i shahli fehna kak kia ik alauecho sia keyu, v̄m aboha hoka.

6. Yohmi ka anumpuli hokvt ik imponno sia, yohmi kia nan ithana kak o keyu ; yohmi kvt hvch itin takla ya nana moma ka achukmalit isht e hvchim otaiyani hatuk oke.

7. Nan isht hvchi holitopa chi ka il akanlosechi lish, Chihowa im vbanumpa ha pilla isht hvchim anumpohonli li kak osh nan ashvchi li hatuk o ?

8. Hvchi apelvchit nan isht hvchim ahanta la chi kvt, chvch hiohli inla yo nan im ihishi li kvt, ilap ak osh nan atobbi ho ishishi li hatuk.

9. Yohmi kvt hvch iba takla ahantvt na sa baiyunna kia kuna hosh na hvchi kwnia tuk keyu ; nana kvt ik svm ono ke tuk okvno itibapishi li vhleha Masetonia minti hosh um atahli tok ; yohmi hoka nana moma ka isht ak hvchim ile wekecho ke tuk ; yohmi hokvt yummak o a si yvmohma chi mak oke.

10. Klaist nan isht im ai ahli yvt a sa nukfoyuka hosh, nan isht ilauwaiyata li ilvppa kuna hosh Akaia afullota anta kvt, svssacha he keyu hoke.

11. Nanta katiohmi ho ? hvchi hullo li keyu kak o ? Chihowa hvt ithaiyanvshke.

12. Amba anumpa si onochi bunna kia, anumpa isht si onocha hi vt ik im iksho ka he ; micha nana ka isht ai ilauata hatuk vt pishno ak inli ho chohmit otaiyana chi kak o, a kaniohmit ahanta li hatuk vt, yummak o ai yvmohmit ahanta la chi hoke.

13. Yvmma chohmi kvt vbanumpeshi ahli keyu hoke ; na haksichi yosh Klaist nan isht im vtta ilahobi hoke.

14. Ilvpput a yakohmi ka anukhlakancha he vlhpesa keyu ; Setan ak fehna ak kia inlv tobvt a tohwikeli ka im enchil ilahobi chatuk oka.

15. Yvmohmi hoka yummak ash in tishu vhleha ak kia inlv tobvt, nan isht ai vlhpiesa in tishu vhleha ha holba hokvt na fehna keyushke ; yvmma im ishtaiyopi yvt ilap vt nana a kaniohmi chatuk ak inli ho chiyuhma hi oke.

16. Hatak nana kia im anukfila iksho ik si ahno kashke : yummak keyukmv im anukfila iksho si ahni hoh kia, vlh-

pesa vm ahní; vno ak inli kvt iskv̄tinosi ka isht ilauata lishke, anonti achi lishke.

17. Ilvppa puta anumpuli li kvt Chitokaka ak o iakaiya hosh anumpuli li keyushke; amba im anukfila iksho yo chohmit nukwaya iksho hosh isht ilauata ilvppa anumpuli lishke.

18. Lawa kvt haknip imma ka isht ilauata kak o, vno ak kia isht ilauata li ak inla chi chishke.

19. Hr̄chishno vto hv̄chi hopoyuksa kak osh, im anukfila iksho a yukpa hosh ant ik yohmí, hv̄sh im ahni hoka.

20. Hatak okvt yuka ho hv̄ch ikbi hokmá, keyukmv̄t vput hv̄chi tahli hokmá, keyukmv̄t nana hv̄chim ai ishi hokmá, keyukmv̄t ile chahhv̄chi hokmá, keyukmv̄t hv̄chi nashuka ya isso hokmá, nana kia ant ik yohmí, hv̄sh im ahni hoke.

21. Ik ahobo hatuk osh isht a hofahya hi o chohmichit anumpuli lishke. Yohmi ak inli hoh kia kanima kvt nana ka isht ik nukw̄ayo kvt asha hokma, nan im anukfila iksho chohmit anumpuli hosh, vno ak kia isht ik sa nukwiyo ak inlishke.

22. Heblu okla ho ? vno ak kia yummak o sia hoke. Islael okla ho ? vno ak kia yummak o sia hoke. Eblaham ak o isht atia ho ? vno ak kia yummak o sia hoke.

23. Klaist in tishu ho ? im anukfila iksho chohmit anumpuli li kvt, yummak oka i shahli li hoke; yumma i shahlichit toksvli li hoke, atampa ho sa fahama hoke, aboha kullo foħoka li chatuk, a svlli naha kvt laua chatuk oke.

24. Chu okla ha pokoli ushta chi ma achvfa hosh iksho ho tahlapi ha im a sa fahama tok.

25. Hituchina ha fuli isht sa fahama tok, himonna ka tvli isht sa boa tok, hituchina ha, peni fohkvt aya li tok a okpulo tok, ninak achvfa nitak achvfa aienā ka okhuta pakna takakanli li tok.

26. Anowa hopaki kia himonna a nohōwa li, oka kia isht vm a palv̄mmi, na wehli kia isht vm a palv̄mmi, a yakni achvfa okla hak kia isht vm a palv̄mmi, vbanumpa ik ithano ma isht vm a palv̄mmi, tv̄maha anukaka kia isht vm a pa-

lvmmi, yakni haiaka kia isht *vm* a palvmmi, micha itibapishi li ilahobi vhleha kia isht *vm* a palvmmi;

27. Hoyohambli, na hotohompa, himonna_q nusi *vm* okpo-honlo fehna, himmonna_q hohchvphot, ituk shihinla, micha kapussa ka, haknip bieka aienā hosh isht *vm* a palvmmi hatuk.

28. Nana ilvppa moyuma kvt kochanli a mintit a si onv-tohonla ma, nitak moma ka chvch hiohli puyuta nana isht anukfilli mvt a si onvtohonla hoke.

29. Kvta hak osh ik hlampko na vno ak osh sa hlampko ho? kvta hak osh ibetvbl na vno ak osh ik sa nuklibisho ho?

30. Nana ka isht ilauata la he vlhpesa hokmvt, nāna kvt isht a ik sa hlampko imma kak *o* isht ilauata la chī hoke.

31. Chihowa pin Chitokaka Chisvs Klaist *Iki*, holitopa bilia yak osh, holabi li keyu ka ithaiyana hoke.

32. Hatak pehlichi miko Aletas nutaka ahanta tuk vt Tamaskvs *a* si ai yukachi bvnna kvt, Tamasenes tvmaha ha_q tvshka chipota atonichi tok.

33. Yohmi na kishi ho fohkvt tvli holihta okhissushi a hlopullit aka ona hosh yummva ibbak *a i* hlakofi li tok.

C H A P T A X I I.

Isht il anumpohonli mvt vba atuchina ka nana kvt auet im atokovt im otvni tok vt anoli, 1, 9 yohmi kia nan isht ik hlampko ak *o* isht aholitopa hi vt ahni, *iki* nan *i* kana mak *o* chohmit im *aya* chī kvt im anoli.

1. **NANA** ka isht ilauata la he okvto *vm* vlhpesa keyu ak inli chishke. Nana ka Chitokaka yvt sa pisachit *vm* otvninghi tok ak *o* isht anumpuli li la chī hoke.

2. Afummi auah ushta atampa kash hatak Klaist ibai achufa ka ithanali tok; yummvt haknip *o* a fohka hokmā nana tok chishba, ak ithanoshke; keyukmv̄t haknip *a* ai *i* filummi hokmā nana tok chishba, ak ithanoshke; Chihowa ak osh ithana; yummak atuk ash *o* hoklit vba ont atuchina ka isht ona tok.

3. Hatak yvymma chohmi ka ithana li tok, haknip o a fohka hokmá, haknip a ai i filvmmi hokmá nana tok chishba, ak ithanoshke; Chihowa ak osh ithana hoke.

4. Yvmmak ash o hoklit Palatais a isht ona na, anumpa he keyu puta hatak okvt anumpula he vlhpiesa keyu ho haklo tok.

5. Yvymma chohmi kak o isht ilauata la chi hoke: yohmi kia vno ak inli hokvno isht ilauata la he keyu, amba nan isht ik sa hlampko puta kak a hi oke.

6. Isht ilauata ik sa bvnna hoh kia, vm anukfila hokvto iksho ka he keyu hoka; ahli ho miha la hi okvt; yohmi kia ilolambi lishke; keyukma hatak kvna kia sa kaniohmi ho sa pisa, micha a sa haklo kvt, isht i shahlichit isht si anukfilla hinla hoke.

7. Micha nana vm otvni apakna pulla ho isht chahvt ak atapo ka chi kak o, kvti haknip shamvlli, Setan in tishu mak o ahama kvt, isht chahvt ak atapo ka chi kak o, ishit sahaso ya chi hatok.

8. Ilvppa pulla kak o Chitokaka ya hituchina ha im asilhha li kvt, ilvppak ash osh vm a filvmmma chi kak atuk oke.

9. Mihma, Nan isht vm i kana yvt isht chim vlhpesa hoke; nan vm isht hlampko yvt ik hlampko yak o isht im ai vlhtaha yoka, vm achi tok. Yvmohmi hoka Klaist isht i hlampko yvt si onvtuyula chi ka, nan isht ik sa hlampko isht ilauata li kak osh vm vlhpesa chi hoke.

10. Yvmohmi hoka Klaist pulla kak o nan isht ik sa hlampko puta, nan isht sa hofahyali puta, nan isht hotopa puta, na palvmmi atukonofa a hlakofa he keyu puta kak o, isht il ai yukpa li hoke, ik sa hlampko hok mak osh, sa hlampko hokv*t*.

11. Isht ilauahanta li kak osh ik hopoyukso yo toba lishke; hvs si atobliche tuk oka; ahninchit isht hvs si anumpula he vlhpesa tok oka: nana ho si ahomba keyu kia, apostel vleha i shahli fehna kak kia asha ka hikia li keyu hoka.

12. Apostel isht atokowa yvt huch itin takla ya ai

yvmohmi kvt, nan nuktaiyalvt achunanchi, nan isht atokowa puta, nan isht nukhlakushli puta, na fehna yvmihchi puta aieno moma ka, isht ai yvmohmi mvhli tok.

13. Nanta hak o chvch inla puta ka isht hvch ik a lauwot tuk oh cho? nana ka ak hvchij kvlo ilvppak atuk ak o? uno fehna kvt hvchim ashvchi li tok ilvppak atuk ash hvs sa kashofashke.

14. Yakeh! ont isht atuchina mak o hvch im ona la chi kvt vmlhtahvshke: yohmi kvt hvchij kvlo la chi keyu; na hvchimmi hak o keyu, amba hvchishno yak o hoyo li hokvt. Ulla yak osh iki micha ishki ita tuklo ka nana im ahayucha he vlpesa keyu, amba iki micha ishki ita tuklo kak a hetuk oke.

15. Micha hvchishno pulla kak o a lushumichit ik si ataha kia sai yukpa fehna hi oke: hvchij hullo li kvt isht i shahlichi li fehna kia, ik lauwot hvchim a holitopa li hoke.

16. Yohmi kia ant ik yohmi, hvchij kvlo li tok keyu: yvmohmi kia i kostini li hatuk osh, a haksichit hvchim ishi li tuk o, achi hoke.

17. Hvchij pila li tuk yvmmak ash o kanimi ka nan isht hvch im ai ishit il ahayuchi li tuk o?

18. Titus vt hvchim ona he, ahni lish, itibapishi ma aieninchit pila li tok. Titus vt na hvchim ai ishit il ahayuchi tuk o? anukfila achvft il itvnowa tuk keyu? ataya achvfa ho il ai itvnowa tuk keyu?

19. Anonti nana isht hvchim il il a miha, hvchim ahoba cho? Klaist a iba foyuka hosh Chihowa itikba ya il anumpulishke, yohma kvt nana moma e yvmihchi kvt, pi holitopa fehna vhleha ma! isht hvsh a hlampka he ak oke.

20. Yvmmak keyukma ona likmvt, itachowa, it i potvnno, it i nokowa, it i nukhobel, ashaka nana a mihachi, iti shukshout na mihachi, ilefehnvchi, itakvshko, hvsh aieno cha vlpesut hvsh maya na, hvchi ahayuchi la hetuk ash osh keyu ho hvchi ahayuchi li, yohmikmvt a kaniohmi li hvs sa pisa hetuk ash o keyu hosh, hvchim otaiyani la he ka, ahnit sa nukshohumpa:

21. Yohmi ka anonti ona likma, an Chihowa yvt a hvchim

itin takla a si akanlosechi na nan ai ashuchi mashko tuk vt na liteha, micha na hau, micha chukvsh nan isht hau aienka yvmohmi tuk vt, i filvmmmit ik ile kostininch kisha tuk o isht yahaya li yoba ná.

CHAPTA XIII.

Nan ibetvblichi vhleha hvt ile kostininch keyu ka nana im apesa hi vt miha, 1; 5 nana ka a yimmi hatuk vt il imoma ka pisvt ik ono kisha ho nan a kaniomhi atuk vt falamvt il a chukmala hi a achi.

1. ILUPPUT isht atuchina mak o hvchim aya lishke : Nan atokoli tuklo, tuchina itih ho anumpa moma kvt isht ai ahlashke.

2. Tikba hoka hvchim anoli li tok osh, anonti atukla mak o hvchi takla anta li chohmit tikbanli hvchim ano li lishke ; yohmi kvt himak a ik saksho hatuk osh tikba ka yoshuba tok ash, micha inla moma aienka pit i holissochi li, yohmi kvt anonti ona likmvt, apoanchi la he keyu hoke.

3. Klaist vt isht si a hvchim anumpohonli tuk a atokowa hush hoyo hoka, yummvt hvchishno yokuno ik hvchi hlampko keyu, amba hvchi ai a hlampko hoke.

4. Ik hlampko hosh ititaiyuhuna a takalit illi tok kia, Chihowa imi hlampko pulla ho okchaya hoka, pishno ak kia yvma iba chafut ik pi hlampko ; yohmi kia Chihowa imi hlampko yvt hvchi onvtula chi pulla ka, yummak ash iba chafut pi okchaya chi hoke.

5. Ai yimmi ka yoka hush ibai achvfakma, nana kvt hvchishno inli hush ile pisashke ; hvchishno inli imomaka hush pisashke. Hvchishno inli hvch ik ithano cho ? Chisus Klaist vt hvch iba foyvka ka, ik ai ahlo hvchia keyukmvt.

6. Yohmi ka pishno yvt ik ai ahlo pia keyu ka, hush ithana chi ka sa yimmishke.

7. Micha Chihowa ya pit im asilhha li kvt, nan ik vlpeso ka ik hvchi yvmohmo ka he ak oke : il ai ahli kvt isht il otvna he ak keyu, amba ik ai ahlo yo pia e chiyuhmi kia, hvchishno yokuto nana achukma kak o hush yvmohma he ak oke.

8. Anumpa ahli il i sanali kvt nana e kanihma he keyu, amba anumpa ahli ya il apeluchi yak oka.

9. Ik pi hlampkokmvt, hvchi hlampko kak o, pi yukpa hokvt: anonti ai ahlit hvchim vlhtaha he ilvppak kia e hvchim ai ahni hoke.

10. Yvmohmi ka ik saksho hosh ilvppa puta ka hvchi holissochi lishke, ilvppak atuk keyukmvt ont hvch iba takla anta likmvt, Chitokaka isht im ai ahli isht hlampkochi la he, micha isht okpvni la he ak keyu ho vma tok ak o anumpa ishit halupvchi la hetuk yoba ká.

11. Ishtaiyopi ka itibapishi li vhleha ma! na hvchi yuk-pashke. Ai ahlit hvchim vlhtahashke, ahopohla achuk-mvt hvchim anukfila achivfvt, it i nanaiyvt hvsh ai ashashke; mikma Chihowa holitoblit nan isht it i nanaiyvchi yosh hvchi anukfoyuka chi hoke.

12. Suksowa holitopa yo isht hvsh it aiokpvchashke.

13. Ubanumpi yimmi ahli puta kvt pit hvchi aiokpv-chishke.

14. Chitokaka Chisvs Klaist nan isht i kana, micha Chihowa isht i hullo micha Shilombish Holitopa ai itibai achufa aieno kvt hvsh moyuma ka hvchi anukfoyukashke. Amen.

HOLISSO PAL vt

CHUCH KALESHAN

YAKNI A HIOHLI HO I HOLISSOCHI TOK.

CHAPTA I.

Hatak keyu, amba Chihowa pulla hosh vbanumpa isht anumpula chi ka atokoli tok a Pal vt achi, 1: 6 Kaleshan vbanumpuli vt chekosi vbanumpa ha i filami kak o okokko ! ahnit miha; 11 hatak o keyu, amba Chihowa yo vbanumpa ha im ai ithvna ; 14 nana ka ik vltoko kisha kvt hatak kaniohmi hatuk vt anoli, 17 ymmak atuk vt ont i himmak o im anukfila kaniohmi kvt anoli.

1. PAL apostel sia kvt hatak kaniohmi ho nan a si vltoka tok keyu, mikmvt hatak nan ahni hatok keyu, Chisvs Klaist, micha Iki Chihowa, yummvt illi tok a falaminchit tanichi tok ita tuklo kak atok :

2. Yohmi ka itibapishi li vhleha si apehvut maya kvt, momvt chvch Kaleshan yakni hiohli ka pit hvchi aiokpvchi lishke.

3. Iki Chihowa, micha hvpin Chitokaka Chisvs Klaist ita tuklo nan isht i kana, micha isht it i nanaiya ita tuklo kvt hvchi anukfoyukashke.

4. Yvmmak okvt Piki Chihowa nan ahni tok mak o yakni ik achukmo ilvppa a pi a hlakoficha chi hosh, nan il aiashvchi pulla kak o yummak okvt il im issa tok.

5. Chihowa Piki yummak osh holitopvt bilia cha biliashke. Amen.

6. Chekosi fehna ho Klaist isht i kana isht hvchi hohoyo

tok a i filummit, vbanumpa inla yo hush eshi ka, okokko ! ahni lishke.

7. Yummvt vbanumpa keyu ; amba kanimi kvt hvchi anuktuklochi cha, Klaist im vbanumpa ha shanaiyvchi bvnna kvt ashushke.

8. Yohmi kia pishno, keyukmvt vba yakni enchil ak ok-má nana hosh vbanumpa inla isht e hvchim anumpohonli tuk a keyu ho isht anumpulikmvt, okpulot taha he ik im vlhpisá.

9. Tikba ka e hvchim achi tok a, anonti himak a mih mak inli ho hvchim achi lishke ; Hatak nana kia vbanumpa hush eshi tok a inla yo isht anumpulikmvt, okpulot taha he ik im vlhpisá.

10. Himak a hatak ak osh, keyukmvt Chihowa ak osh a kana he ahni li cho ? hatak o yukpali sa bvnna ho ? hatak ak o yukpali li momakmvt, Klaist in tishu sia ha he keyu hokvt.

11. Amba itibapishi li vhleha ma ! hatak nan ahni keyu ho vbanumpa isht anumpohonli li tuk vt hvch ithvnanchi lishke.

12. Hatak o im ai ishi li tuk keyu, micha im ai ithvna li tuk keyu hokvt ; amba Chisvs Klaist ak osh vm otvninchi hatuk.

13. Nitak chashpo ma kaniohmit Chu okla im vbanumpa anukfoyukvt ayvt, atablichit Chihowa in chvh a ilbvshalit, chukilissuchi li ;

14. Yohmi kvt Chu im vbanumpa ithvna li kvt, vm okla achvfa ai itilaui li laua ka i shaiyahlit, an tikba vhleha im anumpa vlhpisa ik holiso atok a amosholi li fehnvt im antia li tok a, hush haklo tuk oka.

15. Yohmi tok kia Chihowa yummak osh hushki im oshvto ya ai ishit sa kohchi cha, isht i kana isht sa hoyo tok,

16. Yohmi kvt vlhpesa ahni cha, Ushi ya si ai otvninchi kvt, vbanumpa ik ithano vhleha ha vbanumpa isht im anumpohonli la chj ak atok ; yohmi mak inli ho hatak nana kia it im anumpuli li tok keyu.

17. Mihmvt Cheluselem a iwt apostel vhleha sa tikba tok

ə ont pisa li tok keyu ; amba Alabia yak օ ona li tok osh, anonti falamvt Tamaskus ə ona li tok.

18. Atuk osh afvmmi tuchina ma Pita ya pist ia hosh Cheluselem ə ona li tok ; mihmvt ibai anta li nitak auah tahlapi tok.

19. Yohmi kia apostel vhleha inla yano ak peso, Chemis Chitokaka itibapishi ak illa tok.

20. Chihowa itikba yo hikivt nana puta hvch i holissochi li kvt, holabi li keyu ka ho pesá.

21. I himmak օ Silia, micha Silisia foka ka ona li tok.

22. Micha Chutia chvch puta Klaist ibafayouka yvt sa na-shuka ya ik peso kisha tuk atok.

23. Amba chashpo ka pilbushali tok yummak ash ot himak ano ai yimmi ka tikba ka okpvni tok vt isht anumpo-honli ka haklo kak illa tok.

24. Micha vno ak atuk mak օ Chihowa ya holitobli tok.

C H A P T A II.

Atukla ma Cheluselem ə ia tok, nana kvt yvmmma akaniohmi tok ə anoli, 1 : 11 Antiak ə anta mvt, nana ka a yohma he vlpesa keyu kvt Peta yvt yohmi na Pal vt im alvmmi, mihmvt na yimmi kak keyu hokma, kyna hosh nan vlpiesa he keyu ka im anoli.

1. YOHMI tok ə i himmak afvmmi auah ushta ma anonti vno, Banabas ita, tuklot Titus ə ilauinlit Cheluselem ə il ia tok.

2. Yohmi ka Chihowa yak osh vñm otvninchi na ona lish, vbanumpa Chentail vhleha hə isht im anumpohonli li tuk vt isht im anumpuli li tok ; yohmi kia vbanumpa tosholit əya li tuk ə peh pilla ná, anonti himmakma vbanumpa tosholit əya li kia peh pilla ná, ahni li hatuk osh luma hosh hatak annoa achukma kak օ im anumpuli li tok.

3. Yohmi ka Titus vt si awant əya tuk vt, Klik atuk օ, hakshuk typa he i mihiha kia, ik yvmohmo ki tok.

4. Yohmi ka yvmmvt itibapishi ik əhlo takla iba chukowa kvt, Klaist Chisvs puyulla ہ a yuka keyut il ahəshwa ka pim

akostininchā chī hosh lumvt piba chukowa tok ; yohmi kvt falaminchit pi yukacha chī hatok ; yohmi tuk kia ik yohmo ki tok oke.

5. Ubanumpa ahli yvt hvchin tonla chī kak o, yvmmak ash o hvshi kanvlli achufa kia i nutakvt il a kanvlli tok keyu.

6. Amba, kvna hosh holitompa vhleha ahoba kvt, nana ho kaniohmi yoh kia, yvmmak okvto nan isht vñ a kaniohmi keyu ; Chihowa yvt hatak a nashuka yak o pisa keyu ; holitompa ahoba yvmmak ash o it im anumpuli li tok a na-na isht abafohki tok keyu.

7. Amba hakshup ik tapo vbanumpa in tosholi la hi vt si vlhtoka ma, hakshup twpa vbanumpa in toshola hi vt Pita ak osh vlhtoka tok a pisa mvt ;

8. Pita ya hakshup twpa vbanumpa in toshola he atokoli tok mak osh vbanumpa isht ai ahliche tok, anonti mih mak inli hosh vbanumpa Chentail a in tosholi li ka isht ai ahliche tok oka.

9. Yohmi ka Chemis, Sefas, micha Chan aienä kvt pehlichika yo ahoba hatuk osh isht i kana vma tok a pisa mvt, uno, micha Banabas, il ita tuklo kvt il iba holhtina chī kak o, ibbak isht impakimma ya pima tok ; yohmikma vbanumpa ik ithano yak o im anumpulit il iakma, ilap vt hakshup twpa vbanumpa in toshola chī hatok.

10. Ilvusha ma il ithana he pim ahni tok ; yvmmak okvno uno ak kia aiokpanchit achunanchi li tok.

11. Yumohmi tok kia Pita yvt Antiak a ant anta ma, atokowvt im asanali li tok, nan ik vlhpeso yohmi tok ak oka.

12. Chemis vt tohno tok a ik lo kisha kano, Pita yvt Chentail a ibai impa tok ; yohmi tok kia ai vla ma, hakshup twpa ya i nukshopa hatuk osh, kohchut il a filemmi tok.

13. Mihma Chu inla ak kia nan il ahobi tok ; yohmi kak o Banabas ak kia nan il ahobi ka iba takvt yumohmi tok.

14. Yohmi kia yohmit vbanumpa ieshit ai vlhpiesvt itv-nohowa keyu ho pisa li mvt, momvt haklo ho, Pita ya, Chishno vt Chu chia hoh kia, Chentail nana a kaniohmi ka ish yumohmi cha, Chu nana a kaniohmi ka chik yumohmo

ho kak osh, nanta katiohmi ho Chentail vt Chu chohmit ahanta he ish im ahni cho ? im achi li tok.

15. Pishno vt Chu yosh il vtta tok, yohmi kvt Chentail nan ashvchi pia keyu,

16. Hatak vt vba nan vlhpisa iakaiya kak osh isht ai vlhpiesa keyu, amba Chisus Klaist i yimmi hok mak osh isht ai vlhpiesa ka ithaiyana hosh, vba nan vlhpisa yak o keyu, amba Klaist i yimmi mak o isht a pi vlhpiesa chi kvt, Chisus Klaist il i yimmi tok ; vba nan vlhpisa iakaiya hokvno hatak nana hosh isht ai vlhpiesa he keyu hoka.

17. Yohmi ka Klaist ak o isht ai vlhpiesa pi bunna hokvto, pishno vt nana ashvchi pia moma hatuk vt otaiyani ; yohmi ka Klaist vt nan ai ashvchi in tishu ho ? ik yvmohmo pullashke.

18. Nana ka okpuni li tukvt anonti ikbi likmvt, nan vlhpisa kobvffi toba li hoke.

19. Uba nan vlhpisa pulla ho vba nan vlhpisa ya im illi li kvt, Chihowa yak o ai okchaya la he atok.

20. Klaist a ititaiyukhvna iba takalit svlli hoke : yohmi kia si okchaya hoke ; yohmi kvt uno ak o keyu, amba Klaist ak osh okchayvt sa foyuka hoke ; himak a okchayvt haknip a halaia li moma hokvto, Chihowa Ushi, yummvt a hullot si vlhtobvt illi tok a i yimmi li hosh si okchaya hoke.

21. Chihowa nan isht i kana ya akshuchi li keyu ; nan isht ai vlhpiesa hvt vba nan vlhpisa yak o isht atoba, yvmak okmvno Klaist vt pill a illi tok.

CHAPTA III.

Vbanumpa ha i filvmmi ka nan i miha ; 6 kvna hosh yimmi hokvto nan ai vlhpiesa ; 9 mikmvt Eblaham a ibaiyukpa ; 10 na laua ho isht miha hosh ilvppa anoli.

1. **I**M anukfila iksho Kalesan okla ma ! hvchi nishkin a pisa yo Chisus Klaist vt ititaiyukhvna atakalit illi tuk vt hvchi tikba ya ai anohowa tok a, kvta mak osh hvchi yoshubli na vbanumpa ahli ya hvsh im antia he keyu cho ?

2. Ilvppak illa ho hvchi ai ithvna sa bvnnushke ; vba nan vlhpisa ya hvsh iakaiya kak osh Shilombish Holitopa ya hvsh ieshi tok oh cho ? akchu ? haklot hvchi yimmi kak atuk o ?

3. Hvchim anukfila iksho fehna kvt hvsh yvmohmi cho ? Shilombish o anukfoyukut isht hvsh ia kash ot, himak ano haknip o isht a hvchi vlhtaha cho ?

4. Nan laua ho isht hvchi ilbaiyasha ka peh pilla ha tok o ? peh pilla keyu hatok pulla hoke.

5. Yvmohmi ka Shilombish a hvch ima cha, hvch itin takla ya na fehna puta ka ai yvmihchi kvt, vba nan vlhpisa ya hvsh im antia tok ak o ? akchu ? vbanumpa haklot a hvchi yimmi kak atuk o ?

6. Yvmmak inli ho chiyuhmit Eblaham vt Chihowa ya i yimmi tok : mihmvt nan isht ai yimmi kvt ai vlhpiesa im vlhpisa tok.

7. Yvmohmi ka hvsh ithaiyanashke, yimmi puyuta yvmak okvto Eblaham im vlla vhleha yoke.

8. Mihma Holisso Holitopa yvt Chihowa yvt vbanumpa ik ithano ya na yimmi pulla kak o isht ai vlhpiesacha hi a tikbanli pisa kak osh, Eblaham a vbanumpa ha isht im aqum-pulit, Chishno ak o okla moma kvt na yukpa hi oke, achi tok.

9. Yvmohmi hoka kvna hosh yimmi yokvto, mihi yosh na yimmi Eblaham a iba t^äklvt na yukpa hoke.

10. Uba nan vlhpisa anukchieto aiyuka hokvto, na hotopa anumpa hrt onvtonla bieka hoka : holisso kvt, Kvna kia vba nan vlhpisa holisso atakali puta ka achunanchit ik im antio aiyuka hokvno, na hotopa anumpa hrt onvtuyula hoke achi hoka,

11. Amba hatak kvna kia Chihowa ai itikba yokvno vba nan vlhpisa ya isht ai vlhpiesa he keyu kvt otvnishke ; Hatak vlhpesa yokvto yimmi pulla kak osh isht ai okchaya hi oka.

12. Yohmi ka vba nan vlhpisa yvt ai yimmi ka yokvno ahalaiia keyu, amba, Hatak vt yvmmma yvmihchi hokvto, yvmmak o isht ai okchaya hi oke.

13. Klaist vt pi vlhtobvt na hotopa onvtula toba cha, vba

nan vlhpisa isht a hotopa ya a chumpvt pi falaminchi tok ; holisso kvt, Kvna kia iti a atakalikmv̄t, na hotopa anumpha hosh onvtula hoke, achi hoke.

14. Yvmohmi ho Chisvs Klaist pulla hatuk mak o Eblaham nan isht aiyukpa yvt Chentail a onvtula chi hatok ; yvmohmi ho pi yimmi pulla kak osh, Shilombish pim issa tok a il isha chi hatok.

15. Itibapishi li vhleha ma ! hatak nana a kaniohmi yo anumpuli lishke : peh hatak nana it im vlhpisa yoh kia kvlochi hama, hatak kvna hosh akshochi, micha ibafokha he keyu.

16. Yohmi ka Eblaham, micha im isht atiaka yak o nan im ihisa tok ; Lava nana ho ahobvchit isht atiaka vhleha, achi keyu ; amba achvfa chohmichit, Chim isht atiaka yak o, achi yvmmvt Klaist ak oke.

17. Yohmi ka ilvppak o achi lishke, Nan itim vlhpisa Klaist isht anumpha yvmmma Chihowa yvt kvlochi ha ya, avvmmi tahlepa ushta pokoli tuchina ha yo vba nan vlhpisa toba tok vt akshocha he keyu, yohmi kvt nan im issa tok a ik ai ahlecho ka he atok keyu.

18. Uba nan vlhpisa im antia pulla kak o nana ai isha he vlhpesa kvt ai yvmohmi hokma, nan im issa yak keyu hoka ; yohmi kia Chihowa yvt nan im issa tuk osh Eblaham a ima tok.

19. Yohmi ka vba nan vlhpisa yvt nanta ho katiohmichi hatok oh cho ? Nan vlhpisa kobvff pulla kak o vlhpisa tok o, isht atiaka yvmmma nana im ihisa tok vt vlak mak a he vlhpisa tok ; yohmi ka enchil vhleha hosh iti takla hikvt tosholi ya i nutaka hosh nan vlhpisa ya anolit haiavuchi tok.

20. Yohmi ka ititakla hikvt tosholi vt achvfa ho ititakla hikvt tosholi chatuk keyu, amba Chihowa yvto achvfa hoke.

21. Yohmi kvno nan vlhpisa yvt Chihowa nan isht im issa tok a i sanali cho ? ik yvmohmo pullashke ; nan vlhpisa ima tok intonla kvt okchalincha hinla hokma, nan vlhpisa pulla kak o isht ai vlhpiesa hi atok o mvhljishke.

22. Holisso Holitopa yvt moma ka nan ai ashvchi i nutavchit ompohomo hoke ; yohmi ho Chisvs Klaist i yimmi

pulla ho nan ai yukpa im issa tok a kuna hosh i yimmikmvt isha hi atok.

23. Yohmi kia ai yimmi ka yvt ik lo kisha ma, vba nan vlpisa ya il i nutakvt il ai ashvt, ai yimmi ka yvt himmak o haiaka he yak o il anukchieta hi a pi atoblichitok.

24. Yvmohmi ka vba nan vlpisa yvt pi kostininchich yosh Klaist a pisht im ona na, na yimmi pulla hosh isht ai vlpiesa hi atok.

25. Yohmi tok kia ai yimmi ka yvt ai vla ha yokuno, kostininchich ya il i nuktaka keyu hoke.

26. Klaist Chisvs a i yimmi pulla hosh hvsh moma kvt Chihowa im vlla hvchia hokvt.

27. Klaist a ishit hohchifot hvchi baptismoto tok aiyuka hokvto, Klaist a isht hvsh foyuka hoke.

28. Chu okmá, Klik okmá, nana kvt iksho; yuka yokmá, yuka keyu yokmá, nana kvt iksho; nakni okmá, ohoyo hokmá nana kvt iksho, amba hvsh moyuma kvt achvft Klaist Chisvs a hvsh ibafoyuka hoke.

29. Yohmi kvt Klaist a immi hvchia hokmvt, Eblaham isht atiaka hvchia, micha nan im issa tok a ai isha he vlpesa hvchia hoke.

C H A P T A I V.

Nan vlpisa i yuka pia hatuk a Klaist akosh na pi hlakofichi; mikmvt Chihowa ushi vhleha pikbi, 1; 6 yvrmma i chykvsh okvno Chihowa yvt ilap ushi imi shilombish o auet nukfokihinchich. 22 Akah micha Sela itatuklo kvt nan isht vlpisa.

1. ANONTI ibai isha he vlpesa kvt, vlla moma hokvto, nana moma kvt immi hoh kia, yuka ha nan isht inla keyu hoke, achi lishke.

2. Amba kostininchich, micha apesvchi ya i nuta kvt ahanta na, iki vt im apesa tok nitak a ona chatuk oke.

3. Yvmmak inli ho chiyuhmit, pishno ak kia vlla pia momo mvt, yakni nan ai ithvna ai ishtia vmmona ya i nutakvt yukvt il ashwa tok.

4. Yohmi tok kia nitak ont vlpesa kvt vla ma, Chihowa

yvt Ushi vt pila na, nan vlhpisa i nutaka toba hosh ohoyo ho a toba tok.

5. Uba nan vlhpisa i nutakvt asha tuk a falaminchit pi chumpa na, Chihowa ushi vhleha e toba chi hatok.

6. Yohmi tok a ushi vhleha hvchia hoka, Chihowa yvt Ushi imi Shilombish a hvchi chukvsh a anukfohki na Abba Iki achit tahpahanla hoke.

7. Yvmohmi hoka himak a pilla ka yuka chia keyu, amba ushi mak o chia hoke; yohmi kvt ushi chia hokmvt, Klaist pulla hatuk mak o Chihowa immi ha ai isha he vlpiesa chia hoke.

8. Yohmi kia tikba ma Chihowa hvch ik ithano mvt, chihowa nana keyu ka hvsh i yuka tok.

9. Yohmi tok kia, himak a Chihowa ya hvsh ithana ha ya, yvmmak keyukmvt, Chihowa yak osh hvch ithana ha ya, katiohmi ho anonti nan ai ithana ai ishtia vmmona isht hlampka he keyu, micha isht ai yukpa he keyu ka falamvt i nutakvt yuka hvchi bvnna cho ?

10. Nitak il aiyuka, micha hvshi talali, micha afvmmi vlpisa aienka hvsh holitoblishke.

11. Peh pilla ho hvchin toksvlit isht a svlbusha tuk yoba ka ahnit, ahah ! hvchim ahni lishke.

12. Itibapishi li vhleha ma ! hvchishno ak inli chohmi li hokvt, vno ak o hvsh chohma chi ka hvchim asilhha lishke : nan ik vlpeso hvs sa yumihchi tok keyu kumohmi hoke.

13. Ummona hoka haknip ik hlampot hoyubli hosh kaniohmit vbanumpa ha hvchin tosholi li tok a, hvsh ithanvshke.

14. Micha imomaka pisa li yvt sa haknip a afoyuka ka ik shitlemot hvch ik sa kancho ki tok ; amba Chihowa im enchil chohmichit, Klaist Chisus mak o, chohmichit hvs sashi tok.

15. Yokmi kvno nan isht aiyukpa ya isht hvsh anumpuli tok mvt? hvsh yumihcha hinla nana hokmvt, hvchi nishkin a hvsh kohchi cha, hvs suma hinla tok a, atokowa hvchim anoli lishke.

16. Yvmohmi ka ahli ho hvchim anoji li kak osh hvchin tnvvp o toba li cho ?

17. Hvchi hullo fehna ahoba kia vlpesa keyu hoke; ahli, hvchi atakluma he ahni na hvch ik sa hullo hosh, ilap ak o hvsh i hulla chi kak atok oke.

18. Yohmi kia nana achukma hokvno i hullo fehnvt bilia kak o vlpesa hoke; micha hvchi takla anta li kak bano keyu.

19. Um vlla chipunta vhleha ma! ohoyo vlla esha chi nukhvmi ka a hvchim a chohmi li tuk atok o Klaist vt a hvchi atobak mak a chi hoke.

20. Himak a hvchi takla anta lish, vñ anumpa ha inlanchi la he sa bunnvshke; a hvchi anukfilli la he ak ithanoshke.

21. Uba nan vlpisa ya i nutaka hvchi bunnna kvt, vba nan vlpisa ya hvchik haklo ho? oh vñ anoli

22. Holisso kvt, Eblaham vt ushi in tuklo tok; achufa kvt ohoyo yuka yak o ushi yokma, achufa kvt ohoyo yuka keyu yak o atok, achi hoka.

23. Yohmi ka ohoyo yuka ushi yvt haknip nana a kani-ohmi chatuk a chiyuhmi tok; amba ohoyo yuka keyu ushi yvt im issa tok ak atok.

24. Yvmmvt nan isht vlpisa yoke: ilvppvt nan it im vlpisa tuklo yoka; achufa kvt nvnih chaha Sainai a tobut yuka ikbichi, yvmmvt Akah yak oke.

25. Akah ilvppvt nvnih chaha Sainai yosh Alabia yak o hikia hosh, Chelusalem vt himak a talaia ka isht vlpisa hosh, im vlla puta ka il ai eshit yuka hoke.

26. Amba Chelusalem vba yokvto yuka keyu hosh, e moma ka hvp ishkí yoke.

27. Holisso kvt, Ulla ik chim iksho, vlla ish eshi chatuk keyu ma! chi yukpashke; vlla esha chi chi nukhvmi chatuk keyu ma! chitolit ish tahpahanlashke; ohoyo vltakla ya tuk kia vlla in laua kvt hatak im asha tuk kak kia, i shahli hokvt, achi hoka.

28. Yohmi ka itibapishi li vhleha ma! pishno vt Aisaak atok a, chohmit nan im issa tok ak o im vlla pia hoke.

29. Yohmi ka nitak yummva haknip o kaniohmi chatuk a chohmit ai vtta yvt Shilombish ai vtta ya ilvshali tok a, chohmit himak ak kia yvmohmi hoke.

30. Yumohmi ka Holisso Holitopa yut nan tuk achi ho? Ohoyo yuka, micha ushi ita tuklo ka kohchit ish kanchashke: ohoyo yuka ushi vt ohoyo yuka keyu ushi ya nana ibai isha he vlpesa keyu hoka.

31. Yumohmi hoka itibapishi li vhleha ma! ohoyo yuka im vlla pia keyu, amba ohoyo yuka keyu ak oke.

C H A P T A V .

Klaist pulla hatuk mak o yuka keyu toba tok vt yummak fehna ho ai itanohowa chi ka i miha, 1; 3 Chu okla nan im vlpisa yokvno ik im antio ka chi, amba nan i hullo pullvt itanohowa he; 19 haknip imma atoksvli kvt kaniohmi ka anoli; 22 mihmvt shilombish imma nan vni ka anoli.

1. YUMOHMI hoka a yuka keyu ho Klaist vt pisht ona tuk a kvllot hvsh hielashke, micha anonti yuka ikunla im abana ilvppa isht hvch ik il onocho kashke.

2. Yakeh! Pal sia hosh hakshup hvchi tupa hokma, Klaist vt nan isht hvchim ai achukma he keyu ka hvchim achi lishke.

3. Anonti hatak moma kvt hakshup tupa yummak okuto, nan vlpisa moma ka yumihscha he aheka in takanli ka atokolit im anoli lishke.

4. Kvna hvchia hosh nan vlpisa yak o isht hvchi ai vlpiesa hokma, Klaist vt nana isht hvchim ai achukma keyu; isht i kana ya i filvmmi hvchi tula hoke.

5. Yohmi ka Shilombish pulla hatuk mak o na yimmi hosh isht ai vlpiesa hi a il esha he ahnit, e hohoyoshke.

6. Chisus Klaist imma hokvno hakshup tupa yokmá, hakshup ik tapo yokmá, nana hoh kia nana a kanihma he keyu hoke; amba ai yimmi ka i hullo isht atoba yak oke.

7. Ulhpesa hosh hvsh maleli tuk; anumpa ahli ya hvch ik im antio ka chi ka, kvt a hosh hvchi ataklvmmi tuk o?

8. Hvchi anukfohki na vlpesa hvsh ahni ilvppvt hvchi hoyo tok ak o a minti keyu hoke.

9. Isht shatvmmichi iskvtnosi kia yummuska ya mominchit shatvmmichi chatuk oke.

10. Chitokaka pulla kak o hvchi yinmi li kvt, nana inla hvch im anukfila he keyu ak oke ; amba kuna hatuk oh kia mihi yosh hvchi anuktuklochikmvt, nan vlhpisa yvt onvtula hi oke.

11. Yohmi ka itibapishi li vhleha ma ! uno yvt hakshup tupa ya isht anumpuli li moma hokak osh, nanta katiohmi ho nan ilbvsha yvt si onvtula moma cho ? yummak okma ititaiyukhyna isht ai ibetvbl vi yokopa hoke.

12. Hvchi anuktuklochi vhleha hatuk vt chvch a a tupt kuniakbano ahni lishke.

13. Itibapishi li vhleha ma ! a yuka keyu yo hvch isht ona tuk oke ; a yuka keyu yvto haknip yukpali keyu, amba it i hullot it apelahanchi yak oke.

14. Anumpa achvfa ho vba nan vlhpisa a moma kvt isht ai ahli hoka ; yummvt ilvppak oke, Chin chuka panta hatak a ish i hullo kvt chishno ak inli ho chim itilauashke.

15. Amba iti koblit, vput hvsh ititahli hokmvt, iti okpunit hvch ik iti tahlo ka chj kvt, ahah ! hvsh ahnashke.

16. Yohmi ka Shilombish iba foyukvt hvsh ayashke ; yohmi hokmvt, haknip nan ahni okpulo ya hvch ik ai ahlecho ka chj hoke.

17. Haknip nan ahni kvt Shilombish a im i sanalikma, Shilombish nan ahni kvt haknip a im i sanali hoke ; micha ilvppvt it im inla hoke : yvmohmi ho nana yvmihcha he hvsh ahni kia hvsh yvmihcha he keyu hoke.

18. Amba Shilombish ak osh hvch isht aya hokma, nan vlhpisa ya hvsh i nutaka keyu hoke.

19. Yvmohmi ka haknip atoksvli otwni yvmmvt ilvppak oke : Hau toba, itin lumaka, na liteha, hau anukfilli,

20. Na holba aiokpvchi, ikhish isht yushpakama, iti nukkilli, itachowa, iti shahshohlechi, anukhobela, iti yichina, ita kvshkovt nan vlhpisa i sanali, vbanumpuli iksa iti filamohli,

21. It i potvnno, hatak bika vbi, okishko shahli, okishkot tussahvt aya, micha yummma chohmi puta ka tikba ma hvchim anoli li ak inli tok kia, himak a atuklant hvchim

anoli li ka, ilvppa yvmihchi puta kvt Chihowa im apehli-chika yo isha he vlhpesa keyu hoke.

22. Amba Shilombish o isht ai vni hokvto, I hullo, na-yukpa, it i nanaiya, nuktaiyalvt nokowa sylaha, anukfila yohbi, nana achukma yvmohmi, na yimmi,

23. Il aiokha bunna keyu, ahah! ahnit il oktampli; yvmma chohmi ka onvtonla kvt nan vlhpisa yut ik-shoshke.

24. Yohmi ka kuna hosh Klaist a immi hokvto haknip, micha haknip nan isht i hullo, micha nan ai ahni okpulo ya haknip ash aieninchit ititaiyukhvna a takalichit illichi hoke.

25. Shilombish ak o il ai okchaya hokmvt, Shilombish a iba foyukvt il iba nohowa mak inlashke.

26. Nana ik ahobo a holitopa ya ahnit it i nokowvchit, it i potvnnnot kiloh ai ashо kashke.

CHAPTA VI.

Kvna hosh nana kvt ik im vlhpeso ka i kanvt nan im anukfilla he, micha nan i weki ka ib ai isha he i miha, 1 ; 6 vbanumpa isht anumpuli yoka nana ka isht im vttvt apelacha he i miha : nan vlhpisa chinto nitak yvmmak okvno momvt nan im vlhpisa hi a anoli.

1. ITIBAPISHI li vhleha ma! hatak kvna kia nan ai ashvchi ka iba chukowa hokma, Shilombish anukfoysuka hvchia hv, chukush isht i nukhaklot yvmma chohmi kash falaminchit hvsh hilechashke; hvchishno kia nan ai ashvchi hvchi ai itula hinla kvt, hvsh il anukfihinlashke.

2. Nana isht a hvchi weki puyuta ka hvsh iti shaiyalashke; yohmi hosh Klaist i nan vlhpisa ya hvsh ai ahli-chashke.

3. Hatak vt nana keyu kia, na sa fehna ahni hokmvt, ilap inli hosh ile haksichi hoke.

4. Amba hatak puyuta kvt ilap nan isht ai vttva yak o yakohmi ahnit, pisashke; yvmohmi hosh inla yo ai yukpa keyut, ilap ak inli tuk ak osh nan isht il ai yuhukpa chi hoke.

5. Hatak puyuta kvt ilap i shahpo illa ho shaiyala he oka.

6. Kvna hosh vbanumpa ha isht im vlbuchi hokmvt, nan im abvchi yvmmak ash nana hochukma puta ka it ibai eshashke.

7. Hvchik ile haksecho kashke; Chihowa hvt isht ik si yopulá, ahni keyu hoke; hatak vt nana ho hokchi tuk mvt, yvmmak o vma hi oke.

8. Kvna hosh haknip ak o i hokchi hatuk okvto, haknip ak o isht okpula hi o vma hi oke; amba kvna hosh Shilombish ak o i hokchi hatuk okvto, Shilombish ak o ai okchaya bilia yo vma hi oke.

9. Yohmi kvt nana achukma isht il ahanta kvt ik pin takobo kashke; pi tikambi keyu hokmvt, nitak ont ai vlpiesakma, il ai vma hi okvt.

10. Yohmi hoka hatak moma ka nana il im ai achukma la hi vt pin takalikmvt, e yvmihchikmvt, na yimmi in chuka chufa vhleha yokak heno i shahlichit il i yvmihchashke.

11. Holisso chito kvt, kaniohmi ho vno sabbak ak inli ho pit isht hvchi holissochi li tuk a hopesá.

12. Haknip ak o isht otvni achukma he ahni aiyukali hokvto, hakshup tvpa he ak o hvchim ahnishke; yvmmak keyukmvt Klaist ititaiyukhvna ai illi pulla hatuk mak o na palvmmi pisa hinla kak illa kak osh yvmoohmi hoke.

13. Yohmi ka hakshup tvpa vhleha ilap inli kak kia vba nan vlpisa ya holitobli keyu: yohmi kia hvchi hakshup tvpa he hvchim ahni kvt, hvchi haknip ak o isht ilauata he ahni hoke.

14. Amba vno yokvto isht ak ilauato pulla he, pin Chitokaka Chisvs Klaist ititaiyukhvna atakalit illi tok ak banashke: yvmmak atuk pulla mak o yakni vt ititaiyukhvna vm ai illi, mikmvt vno yvt yakni a im ai illi li hoke.

15. Klaist Chisvs imma hokvno hakshup tvpa, micha hakshup tvpa keyu aieno kvt nana keyu, amba himonvt toba ak illa hoke.

16. Laua kvt kaniohmi hosh anumpa vlhpisa ilvppak ash im antivt aya, micha Chihowa im Islael aieno hokvno isht i nanaiya, micha isht i nukhaklo ita tuklo kvt onutuyulashke.

17. Chitokaka Chisvs pulla hatuk mak o sa haknip a na misa laua ka isht shaiyali li hoka; himak a pill a mnno hatak nana kia ik si ataklammo kashke.

18. Itibapishi li vhleha ma! pin Chitokaka Chisvs Klaist isht i kana yvt hvchimi shilombish a anukfoyukashke. Amen.

HOLISSO PAL VT

CHURCH EFESUS

A HIKIA HO I HOLISSOCHI TOK.

CHAPTA I.

Pal vt Efeshan okla pit ai okpvchi, 1 ; 4 vbanumpuli vhleha hvt yakni vt ik tobo kisha mak o vlhtahvt Chihowa im vlla vhleha toba tok, 11 Klaist pulla ho nan ai yukpa ai immi ha he im vlpisa 13 Shilombish Holitopa yo isht ai ahlit kullo ; 17 mihmvt Chitokaka Chisvs Klaist im a holitopa vba ya pisa hi mak o vba anumpo-honli.

1. **P AL**, Chihowa nan ai ahni ha tuk pulla mak o Chisvs Klaist im apostel vt vbanumpuli ahli Efesus ai asha, micha Klaist Chisvs i yimmi aienka pit aiokpvchishke.

2. Piki Chihowa, micha Chitokaka Chisvs Klaist ita tuklo nan isht i kana, micha isht it i nanaiya ita tuklo kvt hvchi anukfoyukashke.

3. Chihowa pin Chitokaka Chisvs Klaist Iki, yummak osh Chisvs ak atuk mak o vba nana ishit pi yukpahanli yvt holitopashke :

4. Yohmi hosh yakni in tolahpi vt iksho pilla ma, Klaist a pi atokoli kvt, i hullot nan ai ashuchi iksho, micha liteha iksho hosh yvmmma itikba il aya he ak atok oke.

5. Yvmohmi kak osh vlpesa ahni pulla tuk mak osh, Chisvs Klaist atuk mak o ilap im vlla e toba he ak o, tikbanli pi atokoli tok,

6. Yohmi kvt isht i kana chinto yvt isht annohowa he,

yummak pulla ho Holitopa achufa yamma a pi ahninchitok.

7. Yummak ash pulla im issish o isht a pi vltoba mvt, isht i kana yvt chinto pulla hatuk mak o nan pim ai ashuchi yvt pi kashofa hoke :

8. Yohmi kvt hopoyuksa biekvt im anukfila chinto hosh, isht i kana yamma chitolechit pihima tok oke ;

9. Yumihcha he il ai ahni tok vt vlpiesakma ahni pulla hosh, im anukfila luma hatok a pim otvninchi kvt ;

10. Yummvt nitak vt ont ai vlpiesakma, nana puta vba ai asha, micha yakni pakna ai asha aienka itahobit achufalechit, Klaist yamma fehna ka i nutakacha he ak atok :

11. Yummak inli pulla ho il ai isha he vlpesa e toba hi osh, ilap nan ahni bieka hosh nana moma ka yumihchi chatuk im anufila ho, tikbanli pi vltoka tok :

12. Yohmi kvt na t_kba Klaist a il anukchieto tuk pishno ak o im a holitopa yvt a pi annohowa chi hatok.

13. Hvchishno ak kia anumpa ahl vbanumpa isht hvsh ai okchaya hvsh haklo hayvt, yummak ash hvsh anukchieto tuk ak inli; hvchi yimmi ha yosh, yummak ash nana im ihisa tok Shilombish Holitopa yamma isht hvchim ai ahl tok,

14. Yummak okvt nana il ai isha he vlpesa ka il isha he atokowa isht vlpisa hosh mahaya tuk o falaminchit chumpvt a pim atahli tok a il ishi na, yamma im a holitopa yvt isht annohowak mak a he oke.

15. Ymohmi ka uno yak kia Chitokaka Chisvs a hvsh i yimmi, micha vbanumpa yimmi ahl moma ka hvsh i hullo ka, haklo li hayvt,

16. Yak oke ishit hvchi ahni li kvt, issa li keyu mvt, micha anumpa ilvusha anumpuli likmvt, isht hvchi anohonli li hoke ;

17. Yohmi ka pin Chitokaka Chisvs Klaist in Chihowa, na holitopa puta Iki vt Shilombish isht a hopoyuksa, micha isht otvninchi hvch ima na yamma ithaiyanvt hvsh mahaya he ;

18. Nan isht hvsh anukfilli i holhponayo yvt in tohwikeli

na, ai okchaya hush pihisa hi o huchi atokoli kvt kaniohmi, micha vbanumpa yimmi ahli ya isht a holitopa chinto il ai isha hi vt kaniohmi,

19. Micha ilap nan isht im ai ahli chinto a yvmihchi kvt, na yimmi vhleha pia ha ilap nan isht im ai ahli chinto fehna ka isht pi yvmihichi kvt kaniohmi aienka, hush a kostininchha he ak atuk oke.

20. Yummak ash o yvmihchi hosh, Klaist illi tuk a falaminchit tanichit, vba a holitopa ilap ak inli ibbak isht impakimma yo binilichit,

21. Hochitoka puta, nan vltoka puta, nan im ai ahli, nan i shahli puta, micha na hohchifo moma yvmmvt yakni ilvppa a hohchihifo kak bano keyu, amba yakni yvmmvt vla chi aienka i shaiyahli yak oke:

22. Yohmi kvt nana moma ka yvmma iyi nutakuchi, mihmvt chuch im ai achukma chi ka nana moma i noshkobo ha chi ka atokoli tok,

23. Yummak ash ot ilap haknip oke, ilvppak osh kanima moma alotoli a isht alota mak oke.

CHAPTA II.

Im anukfila kaniohmi yosh il vutta tok, 1; 3 Chihowa nan isht i kana pulla ho kaniohmit pim anukfila ka anoli; 10 nan achukma ka e yvmihcha he e toba tok; 13 Klaist il im antia hokmvt, vba imma nan im vltaha hash il ahanta cha, Chihowa im okla achvfa mak o pia ha hi a tok.

1. YOHMI kvt na yoshiba, micha nan ai ashuchi isht huchi illi yatuk a, huchi okchalinchi tok oke.

2. Ilvppa chiyuhmi ka chashpo ma hush ai itvnowa kvt, yakni ilvppa ai yvmoohmi cha tuk a yvmoohmit shutik takla i miko, shilombish vbanumpa ik im antio puta anukfoyukvt isht aya kak o, iakaiya hosh hush itvnowa tok oke:

3. Yohmi kak o pishno ak kia chashpo ma iba t^äkl^a pi haknip im anukfila ik achukmo iakaiyvt, haknip nan ai ahni, micha chukvsh nan ai ahni aienka ho e yvmoohmi tuk oke;

yohmi kvt chukvsh okpulo vmmona il ishi tok moma kvt im ai anukkilli pi onvtonla kvt, inla yak inli chohmi hoke.

4. Yohmi tok kia Chihowa nan i nukhaklo chinto im ai vlhtayak pulla hosh, nan isht i hullo chito ho isht pi hullo hatuk osh,

5. Nan ai ashvchi isht pilli moma kia, Klaist iba taklan-chit hvpi okchalinchi tok oke ; isht i kana pulla ho hvchi okchaya hoke ;

6. Micha Chisvs Klaist ibafokkit wakayvchit, vba a holitopa puta pi binilichi tok oke ;

7. Yohmi hosh himak a pilla ma Klaist Chisvs pulla ho pi nukhaklo tuk vt, isht i kana chinto fehna ka isht otw-nincha chi hatok.

8. Na yimmi kak osh isht i kana pulla ho hvchi okehaya hoke ; yohmi kvt ilvppvt hvchishno na hvsh ahni kak keyu, Chihowa na hvch ima kak oke.

9. Nan toksvli kak keyu, yvmmak keyukma kvna kia isht ilauata yoba na.

10. Yvmma im a toba hvphia kvt, nan toksvli achukma isht il ahanta hi osh Klaist Chisvs ak o il a toba tok ; yvmma il ai itvnowa hi o Chihowa hvt tikbanli apesa tok.

11. Yvmoohmi ka nitak chashpo ma haknip i nuta yosh Chentail hvchia ma, nipi hakshup tupa ibbak isht toba hoh-chifo yvmmak okvt hakshup ik tapo hvchi hochifo hoke.

12. Yohmi kvt yvmma foka mvno Klaist ibafoyuka keyut, Islael okla ai achvfa hvsh ahalaia keyu, micha nan im issa tok isht it im vlhpisa hvch ik ahalaio, aiokchaya pisa he ahni ik im iksho, Chihowa ik ithano yosh yakni a hvsh ai asha tok.

13. Yohmi tok kia himak ano Chisvs Klaist pulla hatuk mak o hvchishno vt tikba mvno hvsh mishemanchi tuk vt, Chisvs im issish o isht hvsh a bilika kvt hvsh ithaiyanashke.

14. Yvmmak osh pit i nanaiyvchi yosh, e tuklo ka achvfa pikbi cha, holinta nan isht pit i filvmmichi yatuk a ishit kanchi tok oke ;

15. Yohmi kvt nan isht it i nukkilli nan isht vlhpisa yvt im vlhpisa tok, haknip isht ilvusha cha, ishit kanchi tok :

yohmi hosh tuklo ka hatak himona achufa il ai ikbi cha, it i nanaiyvcha chi hatok :

16. Yohmi kvt ititaiyukhvna pulla ho tuklo ka haknip achufa-isht ikbit, yvmmak o it i nukkilli tuk a ai illiche cha, Chihowa ya it i kanvcha chi hatok :

17. Atuk osh mishemanchit hvsh ai asha, micha bilika ai asha aieno tuk a, anumpa isht it i nanaiyuchi isht anumpulit hvchim aya tok oke.

18. Yvmmak atuk pulla ho Shilombish achufa hosh pi anukfohkichi ho, il ita tuklo kvt Uba Iki il im ohona hokvt.

19. Yakeh! yohmi ka himak a pilla ma ik ahalaio okla inla yo hvchia keyu, amba vbanumpuli ibai okla, micha Chihowa in chuka chufa hvchia hoke.

20. Yohmi cha apostel, micha hopaaii puta kvt in tolahpi yokma, Chisvs Klaist ak inli hosh noshkoboka chukbika tvli yo, onvtula hosh hvsh it abana hoke.

21. Yvmmak o ai it abana iti fohka achukma kvt, Chitokaka ibafoyukvt tempel holitopa tobvt isht mahaya hoke.

22. Yvmmak o hvchishno ak kia hvsh ai it abana cha, Chihowa im aboha imi Shilombish a foyuka hvsh toba hoke.

C H A P T A III.

Chentail vt vbanumpa habena he atok, 1; 9 Pal vt im anumpohonla he vt vhltoka; 14 mihmvt Chihowa nan i hullo tok a okla akostininchia chi ka vba asihihla; 20 mihmvt nan isht aiokchaya chinto vt yakohmi ha tuk o Chihowa ya yako ke im ai ahni.

1. ILUPPA pulla kak o Pal sia hv Chentail hvchia hatuk mak o Chisvs Klaist i yuka sia hoke.

2. Chihowa nan isht i kana vhlpisa ishit hvchim anumpuli la chi ho vma tok a, hvsh haklo mvhli tok a;

3. Yvmmvt Chihowa im anukfila luma hatok a kaniomichit vm otvninchi tok a, anumpa ik lauwo ka tikba ka hvchi holissochi li tok oke.

4. Yvmmak o hvsh itim anumpulikmvt, Klaist im anukfila luma hatok a ithana li ka, hvsh akostininchia hinla hoke;

5. Yvmmvt nitak tikba ma hatak ushi vhleha ha im an-

noa tok a ohmi keyu hq, himak ano Shilombish vt apostel holitopa vhleha, micha hopaii puta aienka im otvninchi hoke;

6. Yvmohmi na Chentail vt vbanumpa pulla hq iba tak-lvt nan ai isha he vlpesa toba, micha haknip ai achvfa toba cha, Klaist pulla hq nan im ihisa tok a ibai isha he atok :

7. Chihowa yvt ilap nan isht im ai ahli vma ai yvmihinchi pulla hosh, ilap nan isht i kana vma pulla hq, vbanumpa isht vtta toba li tok oke.

8. Uno vt vbanumpa yimmi moma ik lauwo ka ik a lauwo sia hoh kia, isht i kana ilvppa vma na Klaist nan isht ykpali kvna hosh ithvnvt hlopullicha he keyu a, Chentail a isht im anumpuli la hi atok.

9. Micha im anukfila luma hatok a itibai achvfa kvt kaniohmi ka hatak moma ka pisachi la hi atok ; yvmma yakni tobahpi a minti ka Chihowa hvt Chisvs Klaist nana moma ka isht ikbi tok vt, luhmit ieshi tok ;

10. Yvmohma hi o himak ano hochitoka ilaiyuka, nan vltoka ilaiyuka, vba a holitopa ai asha kvt, chvch pulla atuk mak o Chihowa a hopoyuksa chinto kvt im otaiyana hi atok.

11. Yohmi kvt Chisvs Klaist pin Chitokaka isht yvmih-chha he im anukfila bilia tok mak osh yvmihchishke.

12. Mihi yo i yimmi kak osh pi nukwaya keyut, pi hakla chj ahnit, pi anukfoyukvt il im ohona hoke.

13. Yohmi ka hvchishno ak atuk mak o nan isht svlbvsha ka, yvmmvt nan isht a hvchi holitopa hokvt hvchi chukvsh isht ik hvchim ello kashke.

14, 15. Ilvppa pulla kak o pin Chitokaka Chisvs Klaist, yvmmak o chuka chvfa vba yakni a ai asha, micha yakni ai asha a moyuma kvt ai a hohchifo Iki a i hvchukbehlipa li kvt,

16. Isht im a holitopa chinto fehna ka hvch ima na, imi Shilombish vt chukvsh isht hlampko isht hvchi hlampko-honchi ;

17. Micha na hvchi yimmi hq Klaist vt hvchi chukvsh a

anukfoyuka he yohmi lishke; yohmi ho nan isht i hullo a akshish a tobvt a hvchi kullo hosh,

18. Übanumpuli ahli puta iba taklyt a pvtha, micha afalaia ka, micha hofobi, micha chaha aienā ka hvsh akostinincha hinla hoke.

19. Micha Klaist vt nan isht pi hullo ka ai ithvna he atampa ka hvsh ithvna hosh, Chihowa isht alotowa moma kvt isht hvchi alotowa he ak atok.

20. Yvmmak osh ilap im isht hlampko isht pi hlampkohonchi kvt, nana ho il asilhha, keyukmvt nan il anukfilli moma atampa fehna ka pim atahla hinla,

21. Mihi yosh Klaist atuk pulla mak o chvch isht a holtopa na nitak ataha iksho, yakni ataha iksko kashke. Amen.

CHAPTA IV.

Itib achvfa he i miha, 1; 7 Chihowa hvt 11 in chvch vt nan isht hlampkot i shaht māhaya chī ka im okla ha shilombish holhpela il aiyuka ihima ka anoli; 17 nan a kaniohmi tikba yatuk a nakxi ka bohli; 28 nana a kaniohma he vlpesa ka yvmihchi, micha nan ik vlpeso moma ka mokofo chī ka i miha.

1. YUMOHMI ka Chitokaka atuk mak o yuka sia hvt hvsh a yvmohma he hvchi vlhtoka tuk vt, ai vlpiesvt hush ayut,

2. Chukvsh akanlosi, micha chukvsh yohbi, micha anukhobela svlahvt, iti hullot, it im i nuktaiyalvt;

3. Shilombish ai isht itibai achvfvnt nan isht it i nanaiya isht iti talakchi kak o hvsh ai ahna he, hvchim asilhha lishke.

4. Yohmi ka haknip achvfa, micha Shilombish achvfa hosh aiasha, yvmmak inli ho chohmit hvsh a yvmohma he hvchi vlhtoka tok vt, ai okchaya pisa he hvsh ai ahni kvt achvfa hoke.

5. Chitokaka yvt achvfa, na yimmi mvt achvfa, baptismo mvt achvfa,

6. Moma Iki achvfa, yvmmvt nana moma i shahli; nana moma a hlopulli, hvsh moyuma ka hvchi foyuka hoke.

7. Yohmi ak inli kia e moma ka nan isht i kana pima kvt, Klaist i na hvlbina kaniohmi ho pi anukfohki kak oke.
8. Yvmohmi kak o vba ia mvt, yuka lawa yukachit isht ayut, na hvlbina puta ka hatak puta ka ima tok, achishke.
9. Yohmi ka vba ia tok, achi kvt nanta hoh cho ? amba yummvt tikba ma vba mintit aka yakni vla tok ak inli keyu ?
10. Uba minti tok mihi yo ak inli hosh vba shutik paknaka pill a ona kvt, nana moma alotowa chi kak atok.
11. Micha kanimi kvt apostel ; micha kanimi kvt hopaii ; micha kanimi kvt vbanumpa tosholi ; micha kanimi kvt iksa apesvchi ; micha kanimi kvt nan ithvnanchi aien aya chi ima tok :
12. Yohmi kvt vbanumpa yimmi vhleha ha ai ahlich he, vbanumpa isht vtta he, Klaist haknip ithvnanchit hlampkohoncha hi ak atok oke.
13. Yvmohomi na e moma kvt mahayvt nan ai yimmi ka, micha Chihowa Ushi ai ithvna aien a ka ont il ai achvft, hatak im ahli e tobvt, Klaist vt a kaniohmit ai alotowa fehna ka e chiyuhma hi oke :
14. Yvmohmi hosh himak a pill a vlla pia keyu hosh, oka piakvchi ka chohmit, anumpa il aiyukali mahli chohmi hatak vt nan isht i kostini o isht haksicha chi kvt, isht im aiihinchi ka ibafokvt ke fullokancho kashke.
15. Amba i hullo hosh anumpa ahli anumpulit, nan okluha ka isht im a hofantit mahayvt, Klaist yummvt noshkoboka ya e chiyuhmashke.
16. Yvmmak o haknip moma kvt ai itifohka achukma, micha hakshish puta isht iti talakchi hosh moma kvt nana a kaniohma he vlpisa kvt, ahlit yohmit it apelachi hosh haknip isht a chitot isht it i hullot mahaya hoke.
17. Yohmi ka ilvppa achi li mvt, anonti himak a pill a Chentail inla im anukfila ik ahobo,
18. Im anukfila okhlili, micha chukvsh vt okpulo fehna hatuk osh, nana ik ithano anukfoka kak osh, Chihowa im ai okchaya i filvmmmit yoshubvt aya ;
19. Chukvsh sulahbot atvpa, na hau i atampa, na liteha puta asitvt isht ahanta ka hvch ik ai itvnowo ka he

mak օ, Chitokaka pulla hatuk mak օ atokolit hvchim anoli lishke.

20. Amba hvchishno vt ywmohma hi osh Klaist գ hvsh ithvna tuk keyu hoke :

21. Yohmi ka hvsh ի haponaklo չա, Chisvs im anumpa ղli յօ isht hvchim vlbuchi tuk okmvt ;

22. Tikba ma nana hvsh a kaniohmi tok vt hatak sipokni, yummvt na haksichi chukvsh okpulo isht yoshuba aien a kuno, naksika hvsh bohlashke :

23. Micha chukvsh isht hvsh anukfilli vt himonvt tobashke :

24. Micha hatak himona, yummvt Chihowa holba tobvt nan ai vlhpiesa, micha nan ai ashvchi ik im iksho ղli mak օ isht hvsh foyukashke.

25. Yohmi hokvt na holabi puta naksika bohlit anumpa ղli in chuka panta hatak գ hatak moma kvt im anumpulashke ; haknip il itib achrfa hokvt :

26. Hvchi nokowa kia, ik hvchi yoshubo kashke ; hvsh nokowa moma na hvshi vt ik okvtulo kashke.

27. Micha nan isht a hullo okpulo յա hvchik ի kanullo kashke.

28. Kvna kia hukopa tuk vt, himmak ma ik hukopo kashke ; amba ik pilesa cha nana achukma kak օ ibbak isht tokşahanli hosh, kvna kia ilbvshakma ima hi vt nan ahayuhashke.

29. Anumpa liteha yvt chitih հ ա ik kohchot, amba nana kvt achukma isht hlampka he, micha haklo puta kvt isht im achukma he ak ashke.

30. Micha Chihowa imi Shilombish Holitopa, yummak օ hvsh ai okchaya he nitak pit isht hvchim vlhpisa kvt, hvchik nukhaklocho kashke.

31. Chukvsh homi, micha it ի nokowa, micha nukhobela, micha itachowa, micha anumpa ik achukmo nanumachi, micha nan ik achukmo puta aien a kvt naksika itonlashke.

32. Micha it ի kanvt, chukvsh na hih isht iti ahnit, Chihowa hvt Klaist ak atuk mak օ hvchi kashofi tuk գ chohmit, hvsh it ի kashohofashke.

CHAPTA V.

Chihowa ya im antivt nan ai i hullo yo ai itanohowa he, 1; 3 im anumpa liteha hosh itanowa beka tuk vt naksika bohla he; 18 nan ishkot haksa he imma ka ik ahalaio ka he, amba shilombish holitopa yo isht anukfoyukut im vltaha he nan i miha; 22 Ohoyo hrt kanihmit ahanta he, ilap i hatak a im antia he; 25 Klaist vt chvch a i hullo ka chohmit hatak vt im ohoyo ha i hulla he nan isht miha.

1. YUMOHMI hoka vlla holitopa yo chiyuhmit Chihowa ya hvsh iakaiyashke.

2. Micha Klaist vt pi hullo cha, pishno ak atuk mak o nan ashvchi isht vltoba, Chihowa nan i balama, isht il im issa tok a chiyuhmit, ai it i hullot hvsh ai itvnowashke.

3. Amba hau i toba, micha nana liteha puta, nan anushkunna atampa vbanumpa yimmi vt yohma he vlpiesa keyu ka, himonna kia yohmi tok achit ik hvchi annowo kashke.

4. Micha anumpa isht a hofahya, anumpa makali anumpuli, na yopula, a yvmohma he ai vlpiesa keyu ka hvch ik anumpulo hosh, amba Chihowa ya yak oke im ai ahni kak osh hvchim i shahlashke.

5. Hatak hau i nana kia, hatak ik kashofo, hatak nan anushkunna atampa, yummvt na holbut toba aiokpuchi, ilvpput Klaist, micha Chihowa im apehlichika nan ai isha he vlpiesa keyu ka hvsh ithana hoke.

6. Hatak nana kia anumpa ik achukmo isht ik hvchi haksecho kashke: ilvppa puyuta pulla kak o Chihowa nan isht i nukkilli yvt vbanumpa ik im antio hatak puta ka onvtuyula hoke.

7. Yvmohmi hoka ymmak okyno hvchishno vt na hvch ik iba taklo yashke.

8. Tikba ma hvchi okhlili tok kia, himak ano Chitokaka hvsh a tohwikeli hokut, tohwikeli vlla yo chohmit hvsh itvnowashke.

9. Shilombish isht ai vni hokvto nana achukma bieka, micha nan avlhpiesa yvmohmi, micha anumpa ahli yak oke.

10. Yohmi cha nana ho Chitokaka yvt aiokpanchikma, hvsh akostininchka hi oke.

11. Micha okhlili ka a toksvli nan ik vno hvch ik iba taklo hosh, amba ik im ahninchot hvsh im alvmmashke.

12. Alumaka ho nana kvt ai yvmohmi tuk a isht anumpuli illa kak kia, isht hofaya he vlhpesa hoke.

13. Yohmi ka atokowa otvni kvt nan tohwikeli ak o isht otvni hoke: nana hosh nana ka otvninchikmvt, yvmmak osh tohwikeli hoke.

14. Yvmohmi kak o, Nusi tuk chia kvt, chi okchashke, micha illi tuk chia kvt falamvt ish tanashke, mikma Klaist vt tohwikeli chima chi hoke, achi hoke.

15. Yohmi ka im anukfila iksho chohmi keyut, amba hopoyuksa chohmit ahah! ahnit hvsh itvnowashke.

16. Nitak vt ik hvch_i kvnio hosh nan isht hvsh il im ahantashke; nitak hvsh ai ahanta kvt ik achukmo hoka.

17. Yvmohmi hoka ik hopoyuksa yo hvchia keyu hosh, amba Ckitokaka im anukfila hvt kaniohmi ka hvsh akostinchashke.

18. Micha oka homi isht ik hvchi hakso, yvmmvt im ila-yak isht yopomo yoke; amba Shilombish ak o isht hvchi alotowashke.

19. Uba isht taloa, micha Shilombish imma isht taloa aienka isht il ai anumpohonlit, chukvsh isht in champulit Chitokaka ya hvsh in talohowashke.

20. Nana puta ka pin Chitokaka Chisvs Klaist isht hohchihifot Chihowa, yvmmvt Iki mak oka, yak oke ai ahnit, il aiokpahanchashke.

21. Chihowa i nukshohompa hosh hvsh it im antiashke.

22. Tekchi vhleha ma! Chitokaka chohmichit hvch_i hatak a hvsh im antiashke.

23. Klaist vt chvch a i noshkobo ya yvmmak inli ho chohmit hatak vt ilap tekchi a i noshkoboka yoka: micha yvmmvt haknip ai okchaya mak oke.

24. Yvmohmi ka chvch vt Klaist a im antia ka yvmmak inli ho chohmit, tekchi vhleha hvt nana puta ka ilap i hatak a isht im antiashke.

25. I hatak vhleha ma! hvchi tekchi a hvsh i hullo kvt, Klaist vt chvch a i hullo hosh, il im issa tok ak inli ka, hvsh chiyuhmichashke :

26. Yvmohmi kvt oka isht achifut vbanumpa isht kashofut na hullochi cha,

27. Chvch holitopa, na liteha lapali iksho, shinowa, yvmmma chohmi nana kia iksho ho ilap itikba hilecha chi hatok ; ahli a holitopa, imomokpulo keyu ho ilap itikba hilech, chi hatok.

28. Yvmmak inli ho chiyuhmit, hatak puta kvt ilap haknip chiyuhmichit, tekchi vhleha ha i hulla he vlhpesa hoke. Kvna hosh tekchi a i huhullo kvt, ilap a i hullo hoke.

29. Kvna kia ilap haknip a i nukkilli chatuk keyu hoka ; amba Chitokaka yut chvch a i yvnihchi ak inli ho chohmit, apovchit hiahnit ilaueli hoke.

30. Pishno vt yvmmma haknip, nipi micha foni aienka ai achvfa pia hoka.

31. Ilvppa pulla kak o hatak vt iki, micha ishki ita tuklo ka issa cha, tekchi ak o asitia he, mikmvt tuklo ilvppvt nipi achvfa hi oke.

32. Ilvppvt na fehna chinto hoke : yohmi kia Klaist, micha chvch ita tuklo yvmmak o isht miha lishke.

33. Yohmi ak inli kia hvchishno hvsh puta aiyukali kvt ilap inli chiyuhmit hvchi tekchi a hvsh i hullashke ; mikma tekchi vt yohmi ahnit, i hatak a holitoblashke.

CHAPTA VI.

Vlla yut ishki, micha iki ita tuklo ka im antia he vt vlhpesa, 1 ; 5 yuka hvt i shahli ha im antia he vt vlhpesa : 9 mikma i shahli hvt ai vlhpiesa mak o i yuka ha i yvmohma he vlhpesa ; 10 na pi okchaya ilvppvt il itihimbi ; 13 vbanumpuli vt nan isht ile atukkochi, 18 yohmi ka kanimihchit ilvppak ash isht aya he anoli.

1. ULLA vhleha ma ! Chitokaka ak o hvch iki, micha hvch ishki ita tuklo hvsh im antiashke ; ilvppak osh vlhpesa hoka.

2. Chiki, micha chishki ita tuklo ka ish holitoblashke, ilvppvt anumpa vlhpisa nan im issa ya apatoa vmmona.
3. Yohmi hosh chim achukmvt hopaki ho yakni paknaka ish ai ahantashke.
4. Mikma iki hvchia hvt hvchim vlla ya hvch ik nokowvcho kashke: amba Chitokaka yak o anukfohkí, micha nan ai ahni yak o a fohkit hvsh hofantihinchashke.
5. Yuka vhleha ma! yakni ilvppak inli haknip isht hvchi nahullo ya i nukwiyyt wvnihinchit, chukvsh apissali kvt, Klaist ak inli ho chohmichit hvsh im antiashke.
6. Yohmi kvt hatak yukpali yo chohmit, nishkin pisa bano toksvli keyu; amba Klaist in tishu ho chohmit hvchi chukvsh fehna Chihowa nan ai ahni ya hvsh yvmihinchashke:
7. Yohmi kvt aiokpanchit yuka a toksvli toksvlit, Chitokaka yak o i yvmihchí, hatak ak o keyu;
8. Nana achukma nana ho hatak kvna kia yuka hokma, yuka keyu hokmá, nana hoh kia yvmihchikma, yummak atuk mak inli ho Chitokaka ya im a habena hi a hvsh ithaiyanashke.
9. Mikma i nahullo hvchia hvt i nokowvt anumpuli iksho hosh, yummak inli ho hvsh i yvmihinchashke: hatak iti shahshohlechit anukfilli keyu hosh, vba yakni hvchim i Shahli yvt binili ka hvsh ithaiyanashke.
10. Ishtaiyopi ka itibapishi li vhleha ma! Chitokaka a hlampot im a hlampko chinto yo hvsh a hlampakashke.
11. Nan isht ahullo okpulo isht a yoshubli a im i sanalit hvsh hikia hinla kvt, nan isht il atukkochi Chihowa yvt atahli tok a moyuma ka hvsh fojukashke.
12. Nipi, micha issish o im i sanalit il itibi keyu, amba miko vhleha, nan vhltoka, hochitoka, yakni ai okhlili ka ilvppa pehlichi vhleha, shilombish okpulo vba itunowa puta aienakak oke.
13. Yumohmi ka nitak ik achukmo ka im ai i sanalit hikia, micha hvsh atahli hayvt, hvsh hikia hinla kvt, nan isht il atukkochi Chihowa yvt atahli tok a moyuma ka hvsh il ai eshashke.

14. Yvmohmi ka anumpa ai ahli isht vskofaiyachit nana isht ai vlpiesa ikkishi alata ho foyukvt,

15. Micha vbanumpa it i nanaiyvchi nan isht im vlhtai-yaha ma hvch iyi isht hoyulo hosh hvsh hikiashke.

16. Nan okpulo yamma im iti naki ishit hulohushmi puta ka isht hvsh mosholicha hinla kvt, moma pahnaka ya telihpa na yimmi ka mak o hvsh il ai eshashke.

17. Noshkobo isht ompoholmo ai okchaya, micha Shilombish i bvshpo falaia, ymmvt Chihowa im anumpa mak oka hvsh ieshashke.

18. Shilombish anukfoyuka hosh anumpa ilvusha puta im anumpohonlit, asihihla hosh achunanchit ahah! ahani, micha vbanumpa yimmi puta ka isht hvsh asihihlashke:

19. Micha vno ma isht hvs si anumpohonlashke: yohmi na itih kohchit anumpuli la hi a vma na vbanumpa luma ya tok a anohonli la chi kvt, nukwaya ikshot svtih ha wakumi lashke.

20. Yamma pulla ho Uba Miko im anumpeshi talakchi sia hoke: si yvmohmi kia nukwaya ikshot anumpuli la he vlpesa hokvt, anumpuli la hi a vba isht hvs si anumpohonlashke.

21. Amba nana vm a kaniohmi, micha nana isht anta li aieno ka hrsh akostininchha chi ak inli kvno, Tikikvs itibapishi a holitopa, micha Chitokaka nan im isht vta ai ahli ak osh nana moma ka hvchim anola chi hoke.

22. Yvmohma chi kak o yamma hvchi pila li tuk oke; yohmi na nana pim a kaniohmi ka hvsh ithana chi hatuk; mikma hvchi chukvsh a hopohlva chi hoke.

23. Iki Chihowa, micha Chitokaka Chisvs Klaist a minti na yimmi ka isht ai it i hullo, micha it i nanaiya aieno kvt itibapishi vhleha ha hvchi anukfoyukashke.

24. Chitokaka Chisvs Klaist i hullo ai ahli moyuma ka nan isht i kana yut anukfoyukashke. Amen.

HOLISSO PAL vt

CHUCH FILIPPI

A HIKIA HO i HOLISSOCHI TOK.

CHAPTA I.

Filippi chuch hikia ka pit aiokpvchi, 1. 6 Na toksuli achukma isht wakaya tok vt Chihowa hvt isht ai ahlichit im atahla chi ka yimmi. 12 Lom aboha kvllo afoyuka ka nan isht im anukfila he nana hosh akaniohmi tuk a anoli. 22 Klaist pulla kak o okchaya kak okma, keyukmvt illi kak okma nana hi vt im vhltaiahvt anta tok vt anoli.

1. PAL, micha Timohlius, ita tuklo Chisvs Klaist in tishu hvt vbanumpa yimmi əhli vhleha Chisvs Klaist ibafouka Filippi ai asha, bishop puta, micha chuch nan isht im vutta puta aieno ka pit aiokpvchi kvt,

2. Piki Chihowa, micha Chitokaka Chisvs Klaist ita tuklo nan isht i kana, micha isht it i nanaiya aieno kvt hvchi anukfouyukashke, hvchim ahnishke.

3. Hvchi anukfilli li aiyuka kvt an Chihowa ya yak oke im aiahnit,

4, 5. Nitak na hvchi yimmi tok vhlit mintit ant himak ak o hvchim ilayak iti hopinhinlv, vbanumpa isht hvsh apelvchi kak o, anumpa ilvusha isht hvchi anumpuli li puta kvt chukvsh yukpvt isht hvchi asihihla li biliushke.

6. Ilvppa fehna ka sai yimmi hatuk osh, Nan toksuli achukma isht a hvchi wakaya kvt, ai ahlichit Chisvs Klaist i nitak a hvch isht ona he, ilvppa fehna ka sai yimmi hatuk oke.

7. Yvmohmit hvsh moma ka ilvppa hvchi anukfilli la he vlhpesa, sa chukvsh isht hvch ithaiyana li hokut; vbanumpa isht anumpuli li, micha ai ahliche li hosh sa talakchi aienka nan isht i kana hvs svb ai ishi hoka.

8. Chisvs Klaist hiahnit isht i hullo chohmit hvchi sa palata fehna ka, Chihowa yvt atokolit si anoli yoka.

9. Micha ilvppa asihihla lishke; yummvt Chihowa im anumpa ithanvt, hvsh akostininchu puta kak osh hvsh it i hullo kvt, chitot isht i shahlit hvsh mahayashke.

10. Yvmohmi hosh nana kvt it im inla ka imoma ka pisvt, achukmaka vlhpesa ahnit, ai ahli, isht im ai ibetvbla he ik-sho hosh Klaist i nitak a hvsh onashke.

11. Yvmohmit Chisvs Klaist ak atuk mak o nan ai vlhpiesa isht ai vni isht a hvchi alotowa na, Chihowa yvt isht a holitopvt isht anumpa he yak oke.

12. Yohmi ka itibapishi li vhleha ma! nana vñm a kaniohmi tuk a vbanumpa hvt isht i shahlit isht atoba tuk a hvsh ithana he, hvchim ai ahni lishke.

13. Yvmohmi ka Klaist pulla ho sai yuka kvt miko atoni tushka chipota i holihta, micha kanima moma ka ai otvnishke.

14. Mihma itibapishi li vhleha laua kvt sai yuka kak o Chitokaka anukchieto kvt, isht i shahlit nukwaya keyu fehnvt, nukshopa mvt iksho hosh vbanumpa ha isht anumpohonlishke.

15. Kanimi kvt isht a potvno, micha nan isht an chowa aienka bunna hosh Klaist a isht anumpulikma; anonti kanimi kuto a kana he ahni hosh yohmi hoke.

16. Achvfa kvt nan isht an chowa kak o ahni hosh Klaist a isht anumpulit, chukvsh ahli keyu hosh, sai yuka ka ai vbechit svlbvshali bunna hosh:

17. Amba achvfa kuto holitobli hosh, vbanumpa afout isht anumpuli la he si vlhtoka tuk a ithana hatuk osh, yohmi hoke.

18. Yohmi kuno ik kaniohmi hoh kia peh ilahobi hokmá ahli hokmá, nana kia Klaist vt isht anumpa hoke; yohmi na yamma a sai yukpa ahli hosh, a sai yuhukpa chi hoke.

19. Anumpa ilbusha isht hvs si anumpohonli; micha Chisus Klaist imi Shilombish vt si apelahanchi aienā, ilvp-pak osh isht si okchaya hi a ithana li hokv,

20. Yummak a he ahni li fehna kvt, nana kia isht sa hofahya he keyu, amba nukwaya iksho kumohmit ai yv-mohmi chatuk vt, a moyuma chi ho si okchaya hokmá, svlli hokmá, nana kia Klaist vt sa haknip a isht a holitopa hi a ahni li hoke.

21. Uno yak okvto si okchaya kvt Klaist ak okmv, anonti svlli hoh kia nan isht vm ai achukma hoke.

22. Yohmi kia haknip ak o ai anta li hokmvt, a tok-svli li nan ai vni ket ilvppak oke; yohmi kia kanimampo ahni la hinla kvt ak ithanoshke.

23. Yakni issut ia lish, Klaist a ont ai ibachufa li, yvm-mak ok mak o i shahli fehna hoka sa bunna hatuk osh, nan a mia tuklo isht a svb bikeli hoka:

24. Yohmi kia haknip ai anta li kak o achukma kvt isht hvchim i shahli hoke.

25. Micha ilvppa sai yimmi ahli hatuk osh, nana a hvchi yimmi kvt i shahlit a hvchi yukpa kvt isht i shahla hi ak o hvsh moyuma ka hvchi takla ahanta la chi kvt, ithana lishke.

26. Yohmi ka uno pulla, micha hvchim ona li kak o Chisus Klaist a isht hvsh il ai yukpa kvt i shahla he ak oke.

27. Nana hvsh a kaniohmi kvt Klaist im anumpa ak o isht ai vlpesa kak banashke: yohmi na onvt hvchi pesa li hokmá, keyukmv kanima aya li ik saksho hokmá nana kia na hvchim a kaniohmi puta yvmmvt shilombish achufa, im anukfila achufa hosh vbanumpa ai yimmi ka hvsh it iba fofovrt kyllot hvsh hieli ho hahaklo lashke.

28. Micha nana hoh kia hvchim i sanali puta ka ik hvchi nukhlakancho kashke: yohmikmuno yummak okvto ai ok-puloka hi yosh isht ai im atokowa, amba hvchishno ano isht ai okchaya he Chihowa a minti mak osh isht hvchim atokowa hoke.

29. Hvchishno vto Klaist pulla kak o yvmma hvsh i

yimmi kak bano keyu, amba yummma pulla kak o nan isht hush im ilbusha he hvchim vlpisa hoka :

30. Yohmi kvt anumpulit iti kahanlot isht svlbvsha yummma hvs sa pisa tok, anonti himak a si onvtuyula ka hvs sa hahaklo ka ymmak inli hosh hvchi onvtuyula hoke.

CHAPTA II.

Klaist a iakaivt im anukfila iti bai achvft il akanlosichi banot aisha hi a i miha, 1; 12 ilap nan isht aiokchaya a toksahanlit pva ho chohmit yakni a im a tohwikela hi a im achi.

1. YOHMI ka Klaist atuk pulla mak o ahopohla yvt aisha hokma, i hullo kvt a nuktanla yvt aisha hokma, Shilombish ai itiba chufa yvt aisha hokma, chukvsh isht i nukhaklot hi ahni yvt aisha hokma,

2. Hvchim anukfila hvt itilauit nana a miha chufa holitolbit, chukvsh achufa cha, hvchim anukfila ai achufa hosh nan a sai yukpa ya isht hvs svr alotolashke.

3. Anumpa isht itachowa shahli, keyukmvt ilefehnvchi nanasi kvt ik vlhtaho kashke; amba chukvsh akanlosi hosh moyuma kvt inla yvt achukma kvt ilap a i shahli ho anukfillashke.

4. Hatak moma kvt ilap immi kak o bano keyu, amba hatak moma kvt inla immi ak kia anukfillashke.

5. Klaist Chisvs anukfoyuka tok akinli nan anukfila ilvp pvt hvchi anukfoyukashke.

6. Yvmvmt Chihowa hoyulba yatuk osh, Chihowa ya ile itilauechi kvt na wehpuli ya he ahni tok keyu.

7. Yohmi kvt il a kohchichit yuka ohmi ho il aieshit hatak chohmi hosh toba tok oke.

8. Micha hatak ohmi hosh haiaka mvt, il akanlosechit im antia kvt, ititaiyukhvna a takalit illi yoh kia isht illi kak atok.

9. Yvmohmi hatuk o Chihowa hvt holitoblich fehna mvt, hochifo kvt na hohchifo inla moma ka i shahli ho imia tok oke :

10. Yvmohmi ka Chisvs hohchifo ha vba yakni aiasha,

micha yakni paknaka aiasha, micha yakni nutaka aiasha puta kvt i hvchukbihlepa he;

11. Micha hatak isunlvsh puta kvt Iki Chihowa yvt isht a holitopa he mak o, Chisvs Klaist vt Chitokaka ya he, achit anohonlashke.

12. Yvmohmi ka a holitopa vhleha ma! hvs svm antia chatuk vt hvchi takla anta li kak bano keyu, amba himonasi yokak heno ik saksho ka i shahlichit hvs svm antia kvt, nukshumpvt wvnihinchi hosh hvchishno inli aiokchaya ya hvsh atahlashke.

13. Chihowa ak osh ilap nan isht im vlpesa hosh ai ahni kak o ahnit, hvsh yvmihcha chi ka hvchi a toksahanli hoke.

14. Nana moma ka ik ahninchot na miha keyu, micha anumpa ita chowa mvt iksho ho hvsh yvmihhashke.

15. Anumpa nana kia hvchi onvtonla keyu, nan okpuni keyu, na liteha lapanli keyu hosh okla shanaiowa, micha nan ai ashvchi ai ititakla yo yummma i pvla tohwikeli chohmit yakni paknaka ya hvsh ai ashvshke.

16. Micha anumpa okchaya ya hvsh otvninghi na Klaist i nitak a pilla ho chahafa li tok keyu, micha pilla ho toksuli li keyu kvt sai yukpashke.

17. Ahli, na hvchi yimmit vba isht hvsh il ai okpvchi, micha nan isht hvsh ai ahanta aieno ont aiahla chi kak o, il imi kanchi li hokmvt, sai yukpvt hvsh moma ka hvch iba yukpa li hoke.

18. Yvmmak inli kak o yukpvt hvs svbai yukpa mak inlishke.

19. Yohmi kia chekikma Timohlius a hvchi pila la chi, yvmohmi hosh hvchi a kaniohmi ka akostininch lish, sai yukpa chi kvt, ahnit Chitokaka Chisvs a anukchieto lishke.

20. Nana a hvchi a kaniohmi ka anukfihinli fehna kvt hatak inla im anukfila yvmmak inli ohmi ho ik svm iksho hokvt.

21. Moma kvt ilap immi ak o hoyo mvt, nana kvt Chisvs Klaist immi hokuno ik hoyo hokvt.

22. Amba yummma imomaka pisa tuk a hvsh ithana;

yummak okvt ushi yosh iki iba toksvli chohmit vbanumpa
isht svb a toksahanli tuk oke.

23. Yumohmi ka yummak o chekosikma sa kaniohma chi
ka pisa likmvt, pila la chi ahni lishke.

24. Yohmi kvt vno yak kia chekosikma ona la chi, ahnit
Chitokaka ya anukchieto lishke.

25. Yohmi ak inli kia Epaflotitus, itibapishi li, itiba tok-
svli li, micha tvshka chipota sv bika, micha hvchim anumpa
shahli, micha nana a sa bunna tuk a isht vm anta chatuk,
yummak o hvchi pila la he vlhpesa ahni li tuk oke.

26. Hvchi palata fehnvt, ilap vt abeka tuk a hvsh haklo
tuk ak o nan a nukhaklo kvt chukvsh a alota fehna tok.

27. Abeka ho mvlit illi na ha fehna tuk, yohmi kia
Chihowa hvt i nukhaklo tuk: yohmi kvt yummak bano
keyu, amba vno ma a nukhaklo tuk: yummak keyukma
svlbusha kvt it vlbehkvcha he atuk oke.

28. Yumohmi kak o ahni fehnvt hvchi pila li tuk oke;
yohmi na anonti hvchi pisa likmvt, hvchi yukpакma, vno vt
a nukhaklo kvt ik lauwo ka he ak atuk oke.

29. Yumohmi hoka Chitokaka ibafoyuka ka chohmichit
chukvsh yukpa biekvt hvsh aiokpvashke; mikmvt yummak
chohmi kash hvsh holitohomblashke:

30. Klaist ak o in toksvli pulla kak osh ilap im ilhfiopak
a na fehna ik ahno hosh, illi na ha fehna kvt, isht hvs si ape-
lacha he tuk ik ono ka vm atahla chi kak atuk oke.

CHAPTA III.

Nan i hullo cha, nan abvchi ik ahlo yokvno ahah! im ahna hi a i mi-
ha, 1; 8 Klaist pulla ha tuk mak o nan okluha ka ik ahobo ahna
he: 18 haknip imma nan ahni ho iakaiya yokvno i filvmmma he
nan i miha.

1. ISHTAIYOPI ka itibapishi li vhleha ma! Chitokaka
ya hvsh ai yukpashke. Nana kvt mihi yo ash inli ho hvchi
holissochi li kvt, vm ahchiba keyu mvlhi, amba hvchishno
yak osh isht hvchi a hlampka chi kak oke.

2. Ofi ya ahah! hvsh im ahnashke, nan ik vlhpeso yu-

mohmi yā ahah! hvsh im ahnashke, tublit kanchi yā ahah!
hvsh im ahnashke.

3. Pishno ak okvto hakshup tupa shilombish anukfoyu-kvt Chihowa holitoblich, micha Chisvs Klaist ai yukpa pia, yohmi kvt haknip a ai anukchieto keyu pia hoke.

4. Vno ak kia haknip a ai anukchieto la hinla tuk ak inli hoke. Kvna kia haknip a ai anukchieta hinla kvt ishi ka ahnikma, vno vt i shahli li hoke.

5. Nitak ont isht untuchina ma hakshup sa tupa tok, Is-lael isht ai unchululi, Benchamin apelhichi, Heblu ai ahli sia hoke: vba nan vlhpisa yak okmvno Falisi yo sia hoke.

6. Amosholi hosh chuch a i palvmmichit, vba nan vlhpisa isht ai vlhpiesa yummak okmvno anumpa nana kia si onv-tula he keyu ki tok.

7. Yohmi tok kia nana isht ahayuchi li yatuk vt, yvmmvt Klaist pulla kak o a kvnia, ahni li tuk oke.

8. Ahli mvhlishke, yohmi kvt Klaist Chisvs an Chitokaka ithana achukma fehna kak o nana puta kvt peh ik ahobo ahni lishke; yvmmma pulla kak o nana puta kvt isht a kvnia, mikmvt yummak ash o chopilhkvsh a chohmichi li, yvmoh-mit Klaist a asitvbi li,

9. Mikmvt yvmmma ibafoyuka la he, micha vno ak inli kvt vba nan vlhpisa yummak o isht ai vlhpiesut il ai eshi li keyu, amba yvmmvt Klaist a i yimmi kvt nan ai vlhpiesa na yim-mi pulla kak o Chihowa a minti yak oke:

10. Yvmohmi ka Klaist, micha yvmmvt illit tani tok nan isht im ai ahli, micha yvmmvt ai ilvusha tok a iba takla kvt kaniohmi aiena ka ithana lish, yvmmvt illi tok a hoyulba la chi kak a hetuk oke.

11. Ik kaniohmi kia illit tani ka ona li yoba ná, ahni li hatuk osh.

12. Himak okvno ona li mashko ahni li keyu, micha himak ak kia ai ahlit sa taha ahni li keyu; amba achunanchit iakaiya li, yvmohmi hosh yummak a he ak o Klaist Chisvs vt si atokoli tok yummak ash ieshi la he ak atuk oke.

13. Itibapishi li vhleha ma! ont ishi li tuk il ahni li keyu hoke; yohmi kia nana achvfa ilvppak o yohmi li, nana

puta olbul ai asha ka vmi haksi cha, nan tikba asha kak ç svbbak a pit wielit,

14. Achunanchit ai v̄lbi ya māhaya li, nan v̄lbi yvmmvt Klaist Chisvs pulla kak o Chihowa yvt vba et a hohoyo kak oke.

15. Yohmi ka ai ahli aiyuka pia hokvto, yakohmit pim anukfilashke; yohmi ka nana ka kaniohmit hvchim anukfila kvt inla tuk okma, Chihowa yvt ilvppak oh kia hvchim otv-nincha chi koke.

16. Yohmi kia iloh ai ona mashko hatuk okuto, yvmmak ash inli ho kiloh ai itvnowa cha, nana yvmmak ash inli ho iloh anukfihinlashke.

17. Itibapishi li vhleha ma ! it apehvt na sa hobachi hvsh tobashke, micha pishno a hobachi hvsh ahni kvt yakohmit aya vhleha ha hvsh holitoblashke.

18. Lauvt aya kvt yvmma himonna hvchim anohonli li chatuk osh, anonti himak a nishkin okchi mihinti hosh, yvmmvt Klaist im ititayukhvna in tvnvp vhleha hoka, hvchim anoli lishke.

19. Yvmma ont im ishtayopi kvt aiokpuloka he, yvmma i shahli yvt ilap takoba ak inli, micha nan isht hofahya isht ile holitobli, yvmmvt yakni paknaka nana a halaia kak o asia-tia yoke.

20. Uba yakni okla ai achvfa pia hoka ; yvmmak o a minta hi o pi Okchalinchi Chitokaka Chisvs Klaist a e hohoyo hoke.

21. Yvmmvt imi hlampko ho isht yvmihchit nana puta ka imaiyachit il aiesha hinla hokvt, ilap haknip holitopa ya hoyulba chi ka yvmmak ash ot pi haknip akanlosi ya inlv-chia hi oke.

C H A P T A ' I V .

Chitokaka ya a kvollo fehnvt itanowa he i miha, 1 ; 4 vbanumpuli ahli mak osh aiasha he im apesa ; 10 ilap a i kana tuk a na yuk-pvt yak oke pit imi ai ahni fehna.

1. YvMOHMI ka itibapishi li a holitopa, micha i palata li, isht sai yukpa, micha isht sa holitopa hvchia ma ! kvllot

hikiet Chitokaka ya hush ibai achufashke, holitopa fehna vhleha ma !

2. Yuotias a ilbusht im asilhha li, micha Sintichi ma ilbusht im asilhha li ka, yummvt im anukfila it ibai achufa hosh Chitokaka ya ibafoyukashke.

3. Mikmvt chishno itiba toksvli li ahli ak kia chim asilhha lishke, ohoyo yummvt vbanumpa ha isht svba toksvli tuk, micha Klement, micha svba toksvli vhleha inla aieno, yuma hohchifo hut holisso okchaya a takali ka, ish apelahan-chashke.

4. Chitokaka ya hush ai yukpa na biliashke ; micha anonti, Na hvchi yukpushke, achi lishke.

5. Nana ka isht hush il oktampli yut hatak moma ka im otaiyanashke. Chitokaka yut vla hosi hoke.

6. Nana kia isht ik hvchi ataklaiyamo kashke ; amba nana puta ka anumpa ilbusha anumpulit asihihlt aiokpahanchi hosh nana a hvchi bvnna kvt Chihowa ya im annohowashke.

7. Micha Chihowa im isht it i nanaiya, yummvt im anukfila moma i shahli yut hvchi chukvsh, micha hvchim anukfila aieno ka Klaist Chisus pulla hatuk mak o atohona chi hoke.

8. Ishtaiyopi ka itibapishi li vhleha ma ! nana hosh ahlikma, nana hosh holitopakma, nana hosh ai vlpiesakma, nana hosh kashofakma, nana hosh aioklikma, nana hosh annoa achukmakma, nan ai vlpesa inla yut ashakma, anonti aiokpancha he vlpesa kvt ashakma, ilvppa puta kash hush anukfihinlashke.

9. Nana puta yummva hvs svn ai ithvna, micha hush ishi, micha hush haklo, micha hvs si a pisa aieno tuk vt hush yumohmashke ; yohmikma Chihowa im isht it i nanaiya yut hvch ibafoyuka chi hoke.

10. Yohmi kia himak ano polaka hvs si anukfilli tuk vt anonti okcha i shahli ka Chitokaka ya isht a sai yukpa fehnvshke ; yummak a hi o isht hvs si anukfilli tuk kia, hush ai yvmihcha hinla kak osh ik hvchim iksho ki tok oke.

11. Nana kvt ik svn ono kak osh ilvppa achi li ho keyu : kaniohmi ho a hikia li hoh kia, yummak oka si a nuktaiyala he vt ithvnt tahli li tuk okvt.

12. Kaniohmit nana ka ik sum iksho hosh aya li kvt ithana li, micha kaniohmit nana an laua hosh aya li kvt ithana li hoke ; kanima moma, micha nana puta ka sa kaiya, micha sa hohchrfo, micha nan an laua, micha nana ik sum ono aieno hosh aya li kvt ithana li hoke.

13. Klaist pulla hosh sa hlampkohonchi kak o, nana moma ka yvmihchi la hinla hoke.

14. Yohmi ak inli kia ai vlpiesa ho yvmohmit nana vm a palummi ka hvs svb anukhaklot hvs si apela tok oke.

15. Yvmohmi ka Filippian vhleha huchia ma ! vbanumpa hvt anumpa vmmona ka Masetonia ya akohchvt ia li ma, chvch nana kia nana isht apela he vma na ishi la hetuk ash imma ka yvmohmi keyu ma, amba huchishno ak illa tuk vt hvsh ithaiyanashke.

16. Hlessalonika ya anta li ma, himonna ka pit hvs sa pila tuk osh, anonti nana ka a sa bvnna tuk a pit hvs sa pila tuk oke.

17. Na hvlbina sa bvnna kak o keyu ; amba nana achukma hvsh yvmohmi tuk isht ai vni kvt hvchin laua he kak o ahni lishke.

18. Yohmi kia nana moma ka ishi lish, nan an laua hoke ; si alotowa hoke, Epaflotitus ibbak fohkit nana balama vba nan isht aiokpuchi Chihowa hvt vlpesa ahni ya et hvs sa pila tuk a, vm vla tuk oke.

19. Yohmi ka an Chihowa holitopa fehna kvt Chisus Klaist pulla kak o nana a hvchi bvnna moma ka hvchim atahla hi oke.

20. Yohmi ka Chihowa, micha Piki yak osh holitopa na biliyt biliashke. Amen.

21. Ubanumpa yimmi Klaist Chisus ibai achvfa vhleha ha hvsh aiokpuchashke. Itibapishi li vhleha hvt si apihvt maya kvt hvchi aiokpuchishke.

22. Ubanumpa yimmi moma kvt pit hvchi aiokpuchi ; mihma Sesa in chuka chvfa yokak heto pit hvchi aiokpuchi fehnushke.

23. Pin Chitokaka Chisus Klaist isht i kana yvt hvsh moyuma ka hvchi anukfoyukashke. Amen.

HOLISSO PAL OT

CHUCH KOLOSSI

A HIKIA HO I HOLISSOCHI TOK.

CHAPTA I.

Na yimmi əhlit maya pulla kak ə Chihowa ya ai okpahanchi, 1 : 9
nan isht i kana anukfohkvt i shahlit mahaya he isht anumpohonli ;
14 Klaist holitopa he isht anumpuli ; 21 mihmvt nana ka Klaist vt
im ataiyahli tok ə im anoli.

1. PAL, Chihowa nan ai ahni hatuk pulla mak ə Chisus
Klaist im apostel sia, micha Timohliüs pitibapishi ita tuklo
kvt,

2. Ubanumpa yimmi əhli vhleha, il itibapishi əhli Klaist
ə ibafoyuka Kolossi ai asha ka pit aiokpuchi kvt, Piki Chi-
howa, micha Chitokaka Chisus Klaist ita tuklo nan isht i
kana, micha nan isht it i nanaiya ita tuklo mak osh hvchi
anukfoyukashke, hvchim ahnishke.

3. Chihowa, micha pin Chitokaka Chisus Klaist Iki ya
yak oke, im ahnit, vba isht e hvchi anumpohonli na bilia
hoke ;

4. Yohmi kvt Klaist Chisus ə hvsh i yimmi, micha vba-
numpa yimmi vhleha hə hvsh i hullo ka e haklo ha yokvt,

5. Ai okchaya bilia hvsh isha he vba hvch in tuyula pulla
kak ə e yohmishke ; yummak oka vbanumpa əhli isht ai
anumpa ho tikba kash hvsh haiyaklo tuk vt ;

6. Mihi yosh hvchim vla tuk ak inli chohmit, yakni mo-
ma ka im əya cha, nan vnit waya kvt, nana ka hvsh haiya-

klot, Chihowa nan isht i kana ahli hvsh ithaiyana nitak atuk taiyakla kvt, nan vnit hvsh waya kak inli ho chohmi hoke.

7. Yvmmak ash inli ho Epaflas, tishu pi bika pi holitopa ya hvsh im ai ithvna tuk; yvmmak okvt Klaist im vbanum-pa isht vtta hvchim ahli mak oke:

8. Yvmmak inli kak osh Shilombish a ibai achufut hvsh it i hullo ka pim anoli tok.

9. Yakohmi kak o nitak yamma fehna ka e haiyaklo tuk taiyakla kvt, anumpa ilbvsha isht e hvchi anumpohonli kvt il issa keyu, mihmvt hvchi hopoyuksa bieka, micha shilombish im ahalaia ka ithvnut, Chihowa nan ai ahni ka hvsh ithana ka isht hvchi alotowa he ak o, il ai ahni hoke:

10. Micha nan toksuli achukma puta ka isht ai vni, micha Chihowa nan isht im ithana ya isht i shahlit isht ia hosh, Chitokaka ya ai im vlhpiesvt nana moma ka isht yukpali cha;

11. Chihowa imi hlampko holitopa isht hlampko fehna hosh, nukchintot achunanchit, nan ilbvsha yvt onvtuyula kia nuktaiyalvt vlhpesa ahnit yukpa banot;

12. Ubanumpa yimmi yvt vba atohwikeli ai isha he vlhpesa hosh ai asha ka ai il iba takla hi a pi ai atahli tok, Piki yvmmma yak oke hvsh im ai ahna he ak o, il ai ahni hoke;

13. Yvmmak okvt aiokhlili ka isht im ai ahli ya a pi a hlakofichi mvt, anonti kanvllichit ilap Ushi holitopa im apehlichika ya pisht ona tuk oke;

14. Yvmmak o im issish isht vlbi ai okchaya, nan ai ashvchi isht kashofa mak o il eshi hoke:

15. Yvmmvt Chihowa ya pisa he keyu ka hoyulba kvt, nana toba tok puta ka Uttahpi yoke.

16. Yvmmak atuk mak o nana moma toba kvt nana vba aiasha, micha yakni paknaka ai asha, nana ka pisa he, micha nana ka ik peso ka he, miko yohmá, nan i shahli yokmá, hochitoka yokmá, nan vlhtoka yokmá, aieno mikmvt nana moma kvt yvmmak atuk mak o toba kvt, yvmmak ash o in toba tok.

17. Yohmi ka yvmmak ash osh nana moma ka in tikba yoke, mihma yvmmak o nana moma kvt a takala he atok vt ont ai yvmoohmit isht ai it im vlhpesa hoke.

18. Yohmi ka yummak osh chuch haknip a i noshkobo yoke: yummvt nana moma ka ai in tikbvt holitopa cha, ai isht ia vmmona illi tuk osh falamvt tani vhleha ha im Ut-tahpi yoke.

19. Iki vt ulhpesa ahni kvt, yummak ash o nan isht ai ulhtaha yut afoyuka he, ahni tok:

20. Yohmi kvt ititaiyukhuna issish a hlatapa tok pulla ho it i nanaiyvichi ikbi cha, yummak pulla ho nana moma ka isht il ai i kanvcha hi vt ahni tok; yummak pulla ho nana yakni ai asha yokmá, nana vba yakni aiasha yokmá, nana kvt yvmohmi hoke.

21. Yohmi ka hvchishno vt tikba kamo ik ahalaio yosh nana ashvchi toksvlit hvchim anukfila isht in tanampi atuk kia, himak ano hvch il i kanvchi tuk oke,

22. Ilap haknip nipi illi kak o himak ano hvch il i kanvchi tuk; yvmohmi hosh nan ai ashvchi iksho, micha liteha a lapali iksho, micha anumpa nana kia hvchi onvtula he keyu ho ilap a itikba ya hvchi hilecha hi atok:

23. Nan ai yimmika ya a kvllot nan anukfilli fitikuchi iksho, micha nana ka yohma he ahni, vbanumpa a takali yummva hvsh haiyaklo ma, yummak ash ot okla moma shutik nuta aiasha ka im anuhumpa tuk a hvch ik i filummo ka chi mak o, Pal sia hvt vbanumpa isht vtta toba li tuk osh;

24. Himak a hvchishno pulla kak o, nan isht a palvmmi puta kvt sai yukpa hoke; micha Klaist ai ilbvsha tok a sa haknip isht svlbvsha kvt ik ono kisha ka, haknip yummvt chuch pulla kak oka, isht alotolit isht mahaya li hoke.

25. Hvchishno pulla ho Chihowa hvt nana ai ahnit vm apesa kvt, Chihowa im anumpa mominchit isht anumpuli la he ak o vbanumpa isht vtta si atokli tok.

26. Anumpa yummvt nitak bilia kash, micha hatak chashpo asha ka in luma hatok kia, himak ano vbanumpa yimmi puta ka im otvni yak oke.

27. Yummak ash o Chihowa hvt anumpa luma hatok ilvppak ash isht a holitopa chinto kvt Chentail ai itintakla otvni kvt kaniohmi ka im otvnincha he ai ahni tok; yummvt Klaist hvchi anukfoyuka a holitopa isha he isht ai ahni yoke.

28. Yumma isht il anumpohonlit e hopoyuksa biekvt, hatak moma kvt ahah! ahna hi a il im ahanchi mvt, hatak moma ka il im abahanchi hoke; ymohmi hosh Chisvs Klaist pulla hatuk mak o hatak moma ka ai ahlichit e hilecha chi hatuk.

29. Yummak a chi mak osh uno ak kia imi hlampko isht sa hlampkohonchi fehna kak o amosholit toksahanli li hoke.

CHAPTA II.

Ai vlpiesa banot chvch a ai asha he i miha, 1: 8 hatak nan im anukfila, micha nana kvt Klaist a isht a hvch a filvmmicha hi okvno hvsh i filvmma he anoli.

1. **HUCHISHNO**, micha Laotisea ai asha, micha laua kvt kaniohmi hosh sa nashuka ya ik peso kisha puta ka anukfihinlit, isht svlbvsha fehna ka hvsh ithaiyana hi a hvchim ahni lishke:

2. Ymohmi ho chukvsh vt it i hullot itrshekonompa hosh chukvsh vt hopohohlashke: ymohmi hosh ai yimmi ahli isht ai yukpa chinto ka ai ahlit ithana he, yohmi hosh Chihowa yummvt Iki, micha Klaist isht anumpa luma hatok ma otvnhincha he ak atok;

3. Klaist ak o na hopoyuksa, micha nan ithana ita tuklo im isht ilaiyukpa moma kvt a luma hoke.

4. Micha hatak nana kia anumpa isht yimmichi isht hvchi haksicha hinla kak o ilvppa achi lishke.

5. Haknip okvno isht ik saksho kia, shilombish okvno isht hvch ibafoyukvt ai vlpiesa hush ymohmi, micha Klaist a i yimmi ka a kvllot hvsh hieli ka hvchi pihisa li kvt sai yukpa hoke.

6. Ymohmi ka Klaist Chisvs Chitokaka ya hush i yimmi hatuk okvt, ymohmit hvsh iba nohowashke:

7. Micha hakshish atobvt kvllot ontalaivt a hvchim ai vlbvchi tok mak o, ai yimmika a kvllot im ai vltaha fehnvt, yak oke hvsh ai ahnashke.

8. Ahah! hvsh ahnashke, keyukma hatak nana kia hatak

im anumpa chashpo isht auehinch iakaiya, micha yakni nan ai ithvna isht ia vmmona iakaiya cha, Klaist a ik iakaiyo yvt anumpa inla, micha anumpa isht haksichi aienka isht hvchi okpvnichi na.

9. Klaist ak osh Chihowa yvt akaniohmi ka isht alotowa kvt:

10. Hochitoka, micha nan vlhtoka puta i noshkoboka yummak o isht hvchim ai vlhtaha hoke:

11. Yummak pulla ho hvchishno ak kia ibbak o hakshup isht tupa keyu ho hakshup isht hvchin tupa tok: yvmohmi hosh Klaist hakshup tupa pulla ho haknip nan isht ashvchi yash naksika hvsh bohli tuk oke:

12. Na baptismo ho hvsh iba hollopi tuk, Chihowa yvt toksvit yummvt illi tuk a falaminchit tanichi tok ak o, hvchi yimmi hosh yummak ash awant hvsh tani hoke.

13. Yohmi kvt hvchishno vt nana hvsh ai ashvchi isht illi, micha hvchi haknip hakshup ik tapo atuk a nana hvsh ai ashvchi puta ka hvchij kashofi cha, yummak ash iba taklvchit hvchi okchalinchi tuk oke:

14. Nan isht vlhpisa ibbak isht holisso a kashofi tok, yummvt pi sanali, micha pim ai vlhpiesa keyu hosh pi ai ititakla hikia tok a ishit kanchit, im ititaiyukhuna ya ahonvhlichi tok oke:

15. Yumma pulla ho hochitoka, micha isht im ai ahli puta aienka wehpulit, haiakovchit pisachit isht ai yukpa tok.

16. Yvmohni hoka hatak nana kia impa ak ok mā, nan ishko ak okmā, impa holitopa nitak ak okmā, hvshi talali ak okmā, nitak hvillo puta ak okmā, nana kia nan isht apesvt ik hvchi onocho kashke.

17. Yummvt nana kvt vla he isht vlhpisa yoke: amba haknip okvto Klaist ak oke.

18. Hatak nana kia ilap ahnit il akanlosechit, enchil vhleha ha aiokpvchit nana pisa chatuk keyu kvt, afvnalit haknip im anukfila isht ilefehnvchi, yvmohmit noshkoboka ya halvlli keyu kvt, na hvsh asitvba he tuk a, ik hvchim esho kashke.

19. Yummak o haknip moma itachakli, micha hakshish

aiana kvt isht ai iti talakchit isht hlampkot, Chihowa hvt ahni ho tebt ia hoke.

20. Yohmi ka yakni ai ithvna isht ia umimona ai i filummit, Klaist a hvsh ibai illi tok okmvt, nanta katihmi ho yakni hvsh ibafayuka chohmit, nan isht vlpisa hatak vt ape-svt ithvnanchi ka hvsh i nutaka cho?

21, 22. Ilvppa chohmi ka, Ish potoli na; vput ish pisa na; ish pvshohli na, moma kvt ieshi kvt okpula he bieka hoka.

23. Nana yummma puta hokvt hopoyuksa ahoba ho mvhli, ilap ahnit vba aiokpvchit il akanlosechit hahnip a ilbushali; yohmi kia holitoblich keyu, peh haknip ak o im achukmali hoke.

CHAPTA III.

Pim anukfila nan isht hih il ahni a kanima yo il a bohla hi a pim anoli, 1; 5 na liteha isht im anukfila puta ka illicha he vlpesa ka i miha; 9 nan ahl anumpuli; 12 i kanvt nan iti nanaiyachi; 14 vba isht talohovt isht i shahlit hvsh iti hlampkochashke; 18 hatak im ohoyo; 10 hatak ohoyo im asha; 20 vlla, 21 iki 22, yuka aiana kvt nan a kaniohma hi vlpesa ka isht anumpuli.

1. YOHMI ka Klaist a hvsh iba tani tuk okmvt, Klaist vt a binili vba Chihowa ibbak isht impakimma nana ai asha kak o hvsh hohoyashke.

2. Hvchim anukfila ha nana kvt vba ai asha kak o hvsh onochi cha, nana kvt yakni paknaka ai asha kak o keyu kashke,

3. Hvch illi; yohmi hosh hvchi okchaya yvt Klaist a iba lumvt Chihowa ya ibafayuka hoke.

4. Klaist yummvt il ai okchaya yosh haiaka, yohmikma hvchishno ak kia a holitopa hosh yummak ash awant hvsh haiaka hi oke.

5. Yvmohmi ka hvchim i nana kvt yakni ai asha ka hvsh illihinch; haui toba, chukvsh liteha, anushkunna atampa, haknip nan ahni okpulo, nana ahayuchi bunna atampa, yummvt na holbt toba aiokpvchi yoke.

6. Na yakohmi pulla kak ə Chihowa nan isht i nukkilli vt nan ik im antio hatak puta ka onvtuyula hoke:

7. Yumma chohmi ka hvchishno ak kia chashpo ma hvsh ibafoyuka kvt hvsh ai itvnowa tok.

8. Yohmi tuk kia himak okvno hvchishno vt nokowa, nukhobela, i nukkilli, ik ahobalot anumpuli, anumpa isht hofahya, hvch itih hə akocha ilvppa moma kak kia hvsh kanchashke.

9. Hvsh it i holabi ná, hatak sipokni ya shufit nana a kaniohmi chatuk puta ka hvsh kanchi cha;

10. Hatak himona yo isht hvsh foyuka tuk okut, yummak okut nan ithana ka isht a himonvt, Ikbi tok a hoyulba hosh himonvt toba tok:

11. Yummak oka Klik, micha Chu yo keyu, hakshup tvpa, micha hakshup ik tapo yo keyu, Bulbaha, micha okla nukshopa yo keyu, yuka, micha ik yuko yo keyu, amba Klaist vto nana moma ka im i shahli, micha moma ka ibafoyuka hoke.

12. Yumohmi hoka Chihowa im vlhtoka nan ashuchi iksho, holitopa hvchia' hokvt hiahni, i kana, anukfila akanlosi, chukvsh yohbi, anukhobela svlahvt nuktaiyala aienakak ə hvsh foyukashke.

13. Hatak kvna kia isht itachowa im ashakmvt, itin lumut hvsh it i kashofashke; Klaist vt hvchi kashofi tok oka, yummak inli ho chohmit hvsh yumohmashke.

14. Micha ilvppa moma paknakachi kvt nan isht i hullo, yummak osh ai vlhtaha ai ahli ka isht iti talakchi yoka, isht hvsh foyukashke.

15. Micha it i nanaiychi Chihowa a minti vt hvchi chukvsh a foyukvt nana hvchim apesashke, yummak a he ak ə haknip achvfa hvsh toba chi hosh hvchi vlhtoka tok oke: micha yak oke, hvsh ahnashke.

16. Klaist im anumpa hvsh a chitot hvchi foyuka na isht a hvchi hopoyuksashke; vba isht taloa, micha shilombish imma isht taloa aienakak isht it im abvchit, isht it i nukfohkit, nana aiokpahancha he hvchi chukvsh a foyukvt Chitokaka ya hvsh in talohoashke.

17. Micha anumpa hokmá, na kaniohmí hokmá, nana hoh kia hvsh yvmoymikmvt, Chitokaka Chisus hochihifot yvmak atuk mak o Iki Chihowa ya yak oke im ai ahnit, mominchit hvsh yvmyihinchashke.

18. Tekchi vhleha ma! Chitokaka im ai vlpiesa mak o hvchi hatak a hvsh im ile nutakvchashke.

19. I hatak vhleha ma! hvchi tekchi a hvsh i hullashke; yohmi kvt chukvsh homit hvch ik i kyllo kashke.

20. Ulla vhleha ma! nana moma ka hvch iki, micha hvch ishki ita tuklo ka, hvsh im antiashke; ilvppak osh Chitokaka ya im ai achukma ahli yoka.

21. Iki vhleha ma! hvchim vlla vhleha ha hvsh nokowvchi na; yohmikma im ai ahli la he keyu ahnit, chukvsh iella hinla yoba ka.

22. Yuka vhleha ma! hvchi haknip i nahullo vhleha ha nana puta ka hvsh im antiashke; nishkin pisa toksvli hatak ak o yukpali chohmi keyu, chukvsh achufa ai apissali hosh Chihowa ya hvsh i nukshoyupashke.

23. Yohmi kvt nan toksvli nana ho hvsh yvmyihchikmvt, chukvsh ai ahlit Chitokaka pulla, micha hatak keyu ho hvsh i yvmyihchashke.

24. Chitokaka yak o ai isha he ai vlpesa isht hvchim vltoba he vt hvsh ithaiyanashke: Chitokaka Klaist ak o hvsh in toksahanli hokvt.

25. Amba kvna hosh nan ik vlpeso yohmikmvt, nan ik vlpeso yohmi tuk ak osh isht im vlpesa hi oke: iti shahsholichit kvna kia im anukfilli kvt iksho hoka.

CHAPTA IV.

Nan i shahli vt nana a kaniohma he vlpesa ka achi, 1. 2 Vba a sihihla bilia he im achi; 5 chvch ik ibafoko itanowa ka nan vlpesa biekvt im itvnohowa he; 10 nana ka i shahlit mahaya he ahnit im achi.

1. I NAHULLO vhleha ma! hvchi yuka vhleha nan isht im vlpesa, micha nan isht im itilaui aienka hvsh

imashke; micha hvchishno ak kia hvchi shahli hvt vba yakni binili ka hvsh ithaiyanashke.

2. Anumpa ilvusha anumpohonlit, yummak ash o ai okchut yak oke hvsh ahashke.

3. Yohmi mak inlit Klaist im anumpa luma yatok, micha yvmmma pulla kak o sa talakehi ak inli tuk vt isht anumpuli la he, okhissa ya Chihowa yvt pin tiwa hi a, isht hvsh anumpohonli mak inlashke.

4. Yvmohmi ho anumpuli la he vlpesa hatuk vt, otvninchich lashke.

5. Kocha ai asha ka i hopoyuksvt itvnovrt, nitak ik hvchi kvnio hosh nan isht hvsh il im ahantashke.

6. Hvchim anumpa puta kvt Chihowa nan isht i kana ai ibafouka biekvt hvpi ho isht yvmmashke; yohmi hosh kaniohmit hatak puta anumpa falama ka hvsh ima he vlpesa kvt hvsh ithaiyana hoke.

7. Nana vma kaniohmi ka Tikikvs, ilvppvt itibapishili holitopa, micha vbanumpa isht vta ai ahli, micha tishu sabika Chitokaka ibafouka yak osh hvchim anola chi hoke.

8. Yvmmvt yvmohma chi kak o hvchi pila li tuk: yohmi ka nana hvchim a kaniohmi ka akostininchich cha, hvchi chukvsh a hopohvla chi kak atuk;

9. Micha Onesimvs itibapishi li ai ahli holitopa, yvmmvt hvchishno ak inli ka aieninchit hvchi pila li hatuk. Yvmmak osh nana moma ilvppa a kaniohmi ka hvchim anola chi hoke.

10. Alistakvs, subai yuka yvt pit hvchi aiokpvchishke: micha Makvs, Banabas in tek ushi mvt pit hvchi aiokpvchishke; yummak oka isht anumpa vlpisa ha hvsh ishi tuk vt hvchim onakma, hvsh aiokpvchashke.

11. Micha Chisvs, yvmmvt Chvstvs hohchifo hvt pit hvchi aiokpvchishke; yakohmi kvt hakshup tvpa yoke. Ilvppak illa hosh Chihowa im apehlichika a suba toksahanli yosh nan isht sa hopohohla yatuk oke.

12. Epaflas, yvmmvt hvchishno mak inli, Klaist in tishu hosh pit hvchi aiokpvchishke, micha Chihowa nan ai ahni moma ka a kvllot ai ahli hvsh hikia hi a anumpa ilvusha achunanchit isht hvchi anumpohonli bilia yoke.

13. Hvchishno, micha Laotisea ai asha, micha Hielapolis ai asha aienā ka hvchi anukfihinli fehna ka im atokowa anoli sia hoke.

14. Luk, alikchi holitopa, micha Temas, ita tuklo kvt pit hvchi aiokpvchishke.

15. Itibapishi vhleha hvt Laotisea aiasha, micha Nimfas, micha in chuka chvfa chvch ai asha aienā ka pit hvsh aiok-pvchashke.

16. Micha holisso ilvppa hvsh it im anumpulikmvt, anonti Laotisea chvch ak kia ai it anumpa hi a hvsh apesashke : mikmvt holisso Laotisea a minti ak kia hvsh it im anumpulashke.

17. Micha Achippvs a Chitokaka yak o vbanumpa isht ai vtta ish im ai eshi tuk vt ahah ! ahnit ish ai ahlichashke, hvsh im achashke.

18. Uno subbak ak inli ho Pal sia hvt pit isht hvchi aiok-pvchi lishke. Sa talakchi ka hvsh ithaiyanashke. Isht i kana yut hvch anukfoyukashke. Amen.

HOLISSO VMMONA PAL VT

CHUCH HLESSALONIKA

A HIKIA HQ I HOLISSOCHI TOK.

CHAPTA I.

Chuch Hlessalonika a hikia ka ithanvt vba isht anumpohonlit yak oke im ai ahni, 1 ; 5 mihmvt Chihowa anukfoyuka ahli ahnit i yimmi kvt isht anumpuli.

1. PAL, micha Silfanus, micha Timohlius aien a kvt Hlessalonian chuch Iki Chihowa, micha Chitokaka Chisus Klaist ibafayuka ya pit hvchi aiokpvchi kvt, Piki Chihowa micha Chitokaka Chisus Klaist ita tuklo nan isht i kana, micha nan isht it i nanaiya ita tuklo kvt hvchi anukfoyukashke hvchim ahnishke.

2. Anumpa ilvusha il anumpulikmt, e hvchi anohonlit, Chihowa ya yak oke hvsh moma ka isht e hvchim ahani hoke ;

3. Pin Chitokaka Chisus Klaist ibafayukvt na hvchi yimmi kvt na hvsh yumihchi, micha na hvsh i hullo aien a kvt na hvsh toksahanli, micha ai okchaya pisa he ahnit nuktaiyalvt hvsh achunanchi aien ka Chihowa Piki itikba ya ithaiyanvt e bilia hoke :

4. Micha itibapishi li vhleha ma ! Chihowa i holitoput im ai vrhtoka hvchia ka il ithaiyanak oke.

5. Pim vbanumpa hvrt anumpa illa hosh hvchim aya tok keyu, amba nan isht ai ahli, micha Shilombish Holitopa ai

itibafoyuka aienā na na hvchi yimmi fehna tok ; yvmohmit hvchishno ak atuk mak o kaniohmit hvchi takla il aya tok a hvsh ithaiyana ak inli hoka.

6. Yvmohmi cha nan isht ai ilbusha lawa kia, Shilombish Holitopa ai yukprt vbanumpa ha hvsh aiokpvchi cha, pishno, micha Chitokaka ya im antia hvsh toba tuk oke :

7. Yvmohmi hokv na yimmi moma Masetonia, micha Akaia aienā ai asha kvt im ai ithvnvt iakaiya hi o hvchia hoke.

8. Hvchishno ak o mvhli ho Chitokaka im anumpa annoa kvt Masetonia, micha Akaia ak bano keyu, amba kani-ma moma kak kia, Chihowa hvsh i yimmi kvt annovshke ; yohmi ka pishno vt nana il acha he vlhpesa keyu hoke.

9. Micha yvmmma chohmi puta kak osh pi anoli kvt, kaniohmit e hvch iba chukowa tok ; micha kaniohmit Chihowa ahli okchaya ya hvsh im antia chi hosh, na holba ya i filummit Chihowa hvsh im ona tuk a anoli hoke.

10. Yohmi cha Ushi Chisvs vt illi tuk a falaminchit tanichi tok a, mihi yosh vba yakni minta chi ka hvsh hohoyo ka, yummak osh nan isht i nukkilli minti ka pi ahlakofichi tok mak oke.

CHAPTA II.

vbanumpa hv̄t kaniohmit Hlessalonika ya ai anuhumpa ma, kaniohmit okla aiokpvchi tok a anoli, 1 ; 18 pisa ka bvnna fehna, yohmi kia nana hosh kaniohmi kak o ik im ono kvt anoli.

1. ITIBAPISHI li vhleha ma ! hvchishno ak kia kaniohmit e hvch iba chukowa ma, yvmmvt pilla tok keyu ka, hvsh ithaiyana hoka :

2. Yohmi ka tikba ka pilbusha, micha Filippi okla hv̄t pi hofahyali aienā tok a hvsh ithaiyanvshke ; yohmi ha ya pin Chihowa pulla ho a nukwaya keyut, achunanchit a lushtummit vbanumpa ha isht e hvchim anumpohonli tok.

3. Vbanumpa isht e hvchim anumpohonli kvt, anumpa yoshubli, micha chukvsh litehli, micha i kostinit haksichi atok keyu hoka ;

4. Amba Chihowa ak osh vlpesa ahnit vbanumpa ha pibbak fohki tok oka, yvmohmit il anumpuli hoke: hatak ak o e yukpali keyu, amba Chihowa pi chukvsh a pisa yak oke.

5. Micha nitak nan ash o na fehnvchit il anumpuli tuk keyu, nan isht ahayuchi bvnna hosh, nan il ilahobi ha tuk keyu ka hvsh ithana hoke: Chihowa mvt pisa yoke.

6. Micha hatak ak o a holitopa e hoyo tuk keyu, hvchishno, micha inla yak oh kia tok keyu, Klaist im apostel pia hvt hvchi wekit na hvch im a hoyocha he vlpesa kia, e yvmohmi tuk keyu.

7. Amba hvchi takla il ashwa mvt, ik kvllot, vlla ilaueli vt ipetvt hofantichi chatuk a e chohmi tuk oke:

8. Yvmohmi hosh hiahnit e hvchi palata fehna hokvt, vlpesa ahnit Chihowa im anumpa ak bano keyu, amba pimi shilombish ak kia aieninchit e hvch ima hinla tuk, hvsh pi holitopa fehna hoka.

9. Itibapishi li vhleha ma! toksahanlit hoyvblit pilvusha tok a hvsh ithana hoke; achvsona kia e hvchi weka chi keyu kvt, ninak, micha nitak, aiena ka toksahanlit Chihowa im anumpa ha isht e hvchim anumpohonli tok.

10. Hvchishno, micha Chihowa ak kia kaniohmit chukvsh kashofvt ai vlpiesa, micha anumpa onvtula he iksho ho na yimmi vhleha hvchia ha hvchi takla il ashwa tok a atokolit pi anoli hvchia hoke.

11. Atohnochit, micha hopohlvlit iki yosh im vlla im anumpuli ak inli ho e chohmi tuk a hvsh ithaiyana,

12. Yohmi hokvt vba apehlichika holitopa ya hvsh esha chi ka, Chihowa, yummak osh hvchi hoyo tuk a, hvsh im ai ahla he ak atuk.

13. Chihowa im anumpa ha hvsh pi haponaklo mvt, im anumpa nana ho chohmichit hvsh ishi keyu kvt, amba ai ahli hoka, Chihowa im anumpa hoke, yummvt na yimmi hvchia puta ka ai ahli hvchi atahli tuk ilvppa pulla aiena kak o Chihowa ya yak oke il im ahni kvt, il issa keyu hoke.

14. Itibapishi li vhleha ma! hvchishno vt Chihowa in hvch puta Klaist ibafoyuka hosh Chutea aiasha ka, iakai-

ya hush toba tuk oke; hvchishno ak kia Chu okla hvt yvmihchi tok a, hvchim okla hvt chohmichit hvch ilbvshali tok oka:

15. Yvmmvt Chitokaka, micha ilap i hopaii puta atuk ak kia vbi tok osh, pishno ma pilbvshali tuk oke: mihmvt Chihowa yo yukpali keyu mvt, hatak moma ka im inla hoke:

16. Il im anumpuli na Chentail vt okchaya chi ka pim alvmmi hoke; ilap nan ashvchi alotola chi kak osh yvmohmi bilia chatuk okvt, nan isht i nukkilli vt onvtula kvt ont im ai okluha hoke.

17. Yohmi ka itibapishi li vhleha ma! nitak ik hopako ka nashuka yokvno hvchij filvmmichit pi ai ishi tuk, chukvsh ak okvno keyu, yvmohmi ho isht i shahli fehnvt hvchi nashuka ya pisa pi bvunna fehna tuk oke.

18. Yvmohmi kak osh himonna, micha a tukla foka ka e hvchim ona he, Pal fehna sia hvt vm anukfila tuk; yohmi tuk kia Setan vt pi ataklvmmi tok.

19. Yohmi ka nanta hak o il isha he il ahni ho? nanta hak o isht pi aiyukpa yo? nanta kak osh pim iachuka isht pi aiyukpa yo? Pin Chitokaka Chisus Klaist vt vlakma itikba ya hvchishno yak a he keyu?

20. Hvchishno ak o isht pi a holitopa, micha isht pi aiyukpa yoka.

CHAPTA III.

Timohli a pit i pila kv^t Tlessalonian a i hullo; micha nan ai vhlpiesa ho okla yvmohmi ka isht yukpa kv^t, otvninchi hatok, 1; 10 vba isht anumpohonli, micha im ona hi a ahni fehna aienat.

1. YVMOHMI hoka pi nuktaiyala he keyu kit taha mvt, Ahlens a pishno bano hosh il ashwa he vlhpesa il ahni tok.

2. Micha Timohlii, pitibapishi, Chihowa nan isht im vtta, Klaist im vbanumpa a piba toksvli, vt hvchi ai yimmi ka ya a hvchi hlampkohonchit hvchi hopohlvla chi ho, e pila tuk oke:

3. Yohmi na hatak kvna kia nan ai ilbvsha yakohmi ka isht ik a shanaiowo kashke; hvchishno ak kia yakohma hi vt isht pim vlhpisa tok a hvsh ithanvshke.

4. Hvchi takla il ashwa mvhli mvt, nan isht ilbvsha ya e pisa hi vt tikbanli hvchim anoli tok fehna kvt ant ai yvmohmi tuk a, hvsh ithaiyanvshke.

5. Yakohmi kak o sa nuktaiyala he keyu kit taha mvt, na nukpvlich i vt kaniohmit haksichi tuk yoba ká, yohmi na e toksvli tuk vt peh pilla ná, ahni li hosh, hvchi ai yimmi ka akostininch la chⁱ hosh pila li tuk oke.

6. Yvmohmi tuk kia himak vno Timohli^s vt hvchi a kohchvt pim vla cha, a hvchi ai yimmi, micha hvsh iti^j hullo annoa achukma ka isht pim vla, mihma hvsh pithaiyana a bilia, hvchi pisa pi bunna ka, hvchishno mvt pi pisa hvchi bunna fehna ak inli tuk a, e haklo tuk oke.

7. Yvmohmi kvt itibapishi li vhleha ma! a pilbvsha putt nana kvt pim atukonofa kia a hvchi yimmi ka pulla kak o isht pi a hopohla tuk oke.

8. Chitokaka ya ibafoyuka kvllot hvsh hielikma, himak a pi okchaya mak okvt.

9. Hvchishno pulla kak o pin Chihowa itikba ya na yukpa puta isht pi aiyukpa kvt, yak oke ahni katohmi ho hvchishno pulla kak o anonti Chihowa ya il ima hinla?

10. Ninak, micha nitak moma anumpa ilbvsha achunan-chit il asihihla kvt, yummvt hvchi nashuka ya e pisa cha, na hvchi yimmika yvt nan ik ai ono ketuk a il ai ahlicha he ak oke.

11. Yohmi ka Chihowa ilap vt Piki, micha pin Chitokaka Chisus Klaist vt il atia chⁱ ka apissvlichit pisht hvchim onashke.

12. Mich^a Chitokaka yvt hvsh it i hullo ka i shahlit isht ia, micha hatak moma hvsh i hullo ka i shahlit isht ia, a chinto ka hvchim ahnashke; pishno e hvchⁱ hullo ka hvsh chohmashke:

13. Yvmohmi ho pin Chitokaka Chisus Klaist vt vbanumpha yimmi puta pehliechit vlakma, nan ashvchi ikshot,

anumpa hvchi onvtula keyut, Chihowa, Piki mak o itikba
ya hvsh hiela hi o, mihi yosh hvchi chukvsh a hlampkohon-
chashke.

CHAPTA IV.

Chihowa anukfoyuka kvt i shahlit mahaya hi a atohnohonchi, 1 ; 9 iti
hullo, 11 nuktanlut ilap nan isht ai vtta he tok akbano ho ahni ;
14 illit falamvt tani, mikmvnt anonti Klaist vt minta hi a isht anum-
puli.

1. YUMOHMI ka anonti itibapishi li vhleha ma ! Chito-
kaka Chisvs puyulla ho isht e hvchim anumpohonli kvt,
yummvt kaniohmit ayvt Chihowa ya hvsh yukpala hi osh
hvsh pi a haponaklo tok vt, ymohmit chitot isht i shahli
felnvt hvsh mahaya he ak o e hvchim asilhhvshke.

2. Chitokaka Chisvs pulla ho anumpa vlpisa nana ho e
hvch ima tok a hvsh ithaiyana hokvt.

3. Nan ashvchi ik hvchim iksho ilrppak osh Chihowa im
anukfila hoka, yummvt na haui hvchik ahalaio ka he ;

4. Micha hvsh moyuma kvt nan ashvchi iksho, micha ho-
litobli hosh, kaniohmit im ai vltto ya iesha he vt ithana hi
ak oke.

5. Haknip nan ai ahni isht haui toba keyu hosh, Chentail
vt Chihowa ik ithano ka ik chohmo kashke :

6. Hatak nana kia atablit itibapishi ha nana hoh kia ik
haksecho kashke ; Chitokaka yvt yummva chohmi ka im
apesvt na hotopa onocha he oka, yummva chashpo ma ahah !
hvsh im ahna he, atokolit e hvchim anoli tok.

7. Chihowa yvt a liteha yo a pi atokoli tok keyu, amba
nan il ai ashvchi iksho ka hi ak atuk oke.

8. Ymohmi ka kyna kia shitemakmt, hatak o shitem-
ma keyu, amba Chihowa yummvt ilap Shilombish Holitopa
ya pima tok ak oke.

9. Amba itibapishi it i hulla he imma hokvno isht hvchi
holissochi la hi a hvsh ahna he keyu : hvchishno ak inli hosh
it i hulla hi okvto Chihowa yak o hvsh im ai ithvna tuk oka.

10. Yohmi kvt il itibapishi moma Masetonia moma ai asha
ka hvsh i ymohmi mvhl hoke : yohmi kia il itibapishi vhle-

ha ma ! isht i shahlit hvsh mahaya hi ak o e hvchim asilh-hvshke.

11. Micha na fehna ahnit nuktaiyalvt, nana ilap isht ai vtta he bieka ho yvmihchi, micha ilap ibbak ak inli ho isht toksahanla hi ilvppak o e hvchim apesa tok ak oke :

12. Yvmohmi hosh kocha ashka ai vlhpiesa ho hvsh i yvmohmi cha, nana kia ik hvch im ono kvt iksho kashke.

13. Yohmi kia itibapishi li vhleha ma ! nusi vhleha ak okvno hvch ik im ithano ka he ahni li keyu, inla yvt nana ai okchaya pisa he ik ahno yo, chohmit ik hvchi nukhaklo ka he ak oke.

14. Chisvs vt illi tuk osh falamvt tani tok a pi yimmi hokma, yvmmak inli ho chohmit kvna hosh Chisvs a ibafoyukvt nusi tok okvno Chihowa hvt iba tanicha hi oka.

15. Chihowa im anumpa pulla ho ilvppa e hvchim achi hoka, yvmmvt Chisvs vt vlakma, pishno vt pi okchayut il asha tuk vt, nusi tok a il in tikba he keyu hoke.

16. Chitokaka yvt ilap ak inli hosh na shakapa, enchil i miko im anumpa ola, micha Chihowa im isht puwa chinto ohonla ho a pehliechit vba mintit vla hi oka ; mikma Klaist a ibafoyukvt illi tuk vt tikba tana hi oke.

17. Yohmi mak inli ho pi okchayut il ashakvt, hoshonti ataya shutik takla Chitokaka ya il ai afama chj ka, yvmmak ash aieninchit pisht ia hi oke : yvmohmi ho Chitokaka takla ya il ashakna bilia hi oke.

18. Yvmohmi hoka, anumpa ilvppa puta kak o isht hvsh it i hopohlahanlashke.

C H A P T A V.

Nan vhlpisa chinto nitak a kaniohmit Klaist vt vla he anoli, 1 ; 12 nan im abvchi, micha nana ka achukma he bano ho ahnit, apesahanchi puta ka holitoba he i miha ; mihmvt nan inla isht ai im anukfila he vhlpesa ka aieninchit achi.

1. Y OHMI kia itibapishi li vhleha ma ! himak a pilla nitak nan a kaniohma he puta imma hokvno isht hvchi holis sochi la hi a hvsh ahna he keyushke.

2. Chitokaka i nitak vt hukopa yosh ninak o aya ho chohmit vla hi okvno, hvchishno ak inli kvt hvsh ithana fehna hoka.

3. Achukma bieka, tvnvp vt iksho, okla ahanchikma, yohmikmak o yohma chi ik ahno takla ho na palvmmi kvt onvtula kvt, ohoyo vlla esha chi kvt nukhvumi ka chiyuhma hi oka; mikma hlakofa he keyu hoke.

4. Yohmi kia itibapishi li vhleha ma! hukopa yo chohmit nitak yvmmvt hvchi sakka chi ka, ai okhlilika yo hvsh aya keyushke.

5. Hvsh moma kvt atohwikeli ka im vlla hvchia, micha nitak im vlla hvchia hoke; ninak, micha ai okhlileka yo pia keyu hoke.

6. Yvmohmi ka inla yo chohmit ik hvpi nuso kashke: amba okchut ahah! il ahnashke.

7. Kuna hosh nusi hokvto ninak ak o nusi; mikma nan ishkot haksi hokvto ninak ak o haksi hoka.

8. Amba nitak o pia hokvto ahah! ahnit, na yimmi ikkishi alata, micha nan i hullo ma isht hvsh foyuka, micha noshkobo isht ompoholmo ai okchaya pisa he ahni ya il ieshashke.

9. Chihowa yvt ai i nukkilli yo a pim apesa tok keyu, amba pin Chitokaka Chisvs Klaist pulla ho ai okchaya il isha chi hatok oka.

10. Yvmmvt pi vlhtobut illi tok, yohmi ka pi okcha hokma, pi nusi hokma, nana kia iba takla il ahanta hi atok.

11. Yvmohmi hoka hvsh yvmohmi ak inli hatuk vt, it im anumpulit iti hopohlahanlit, hvsh iti hlampkohonhashke.

12. Micha itibapishi li vhleha ma! hvchin toksahanlit, Chitokaka pulla ho hvchi pehliechit, ahah! hvsh ahna he hvchi anukfohki ya, hvsh ithaiyana he;

13. Micha toksahanli pulla kak o holitoblit hvsh im anukfilli fehna hi a e hvchim asilhhvshke. Micha hvchishno bika hvsh it i kanashke.

14. Yohmi ka itibapishi li vhleha ma! ilapunla yvt isht im ahleka hinla ka hvsh im anoli, chukvsh ielli ma hvsh hopohlahanlit, chukvsh ik hlampko hvsh hlampkohonchit,

hatak puta ka chukvsh isht hvsh i nuktaiyala he ak o e hvchi nukfohkishke.

15. Yohmi ka hvsh ahni na kuna kia nana ik achukmo ka nana ik achukmo mak inli ho hatak nana kia ik i yvmihcho kashke; amba hvchishno ak inli, micha hatak puta ka isht im achukma kak o hvsh iakaiya na biliashke.

16. Hvchi yukpa na biliashke.

17. Anumpa ilvsha hvsh anumpuli kvt hvch ik isso kashke.

18. Nana puta ka yak oke, hvsh ai ahnashke; Klaist Chisus pulla kak o Chihowa hvt ilvppa hvchim ai ahni hoka.

19. Shilombish a hvsh mosholichi na.

20. Shilombish anukfoyukvt anumpuli ka hvsh shitilema na.

21. Nana moma ka imomaka hvsh pisashke; nana kvt achukma ka kvlochit hvsh ieshashke.

22. Nana ik achukmo ahomba moma ka ik hvchi ahalaio kashke.

23. Mikma it i nanaiya yvt a mihinti Chihowa ak inli hosh ai okluhvchit hvchi kashofashke; micha Chihowa ya im asihijla li kvt, hvchi shilombish, micha hvchim anukfila, micha hvchi haknip aieno kvt anumpa onvtula ikshochit hvchi ieshit, pin Chitokaka Chisus Klaist vt ai vla hi a hvch isht onakbano ai ahni lishke.

24. Nana miha kvt ai ahlichi yosh hvchi hoyo kvt, yvmvt yvmihcha chi ak inli hoke.

25. Itibapishi li vhleha ma! anumpa ilvsha isht hvsh pi anumpohonlashke.

26. Hvsh itibapishi puta ka suksowa holitopa yo isht hvsh ai okpvchashke.

27. Chitokaka pulla ho holisso ilvppa il itibapishi holitopa vhleha ha hvsh im it anumpohonla he ak o hvchi miha lishke.

28. Pin Chitokaka Chisus Klaist nan isht i kana yvt hvchi anukfoyukashke. Amen.

HOLISSO ATUKLA PAL vt

CHUCH HLESSALONIKA

A HIKIA HO i HOLISSOCHI TOK.

CHAPTA I.

Hlessalonian okla hvt vbanumpa anukfohka ai əhli ahnit, yinamit miha, 1; 7 nan i pvlammit maya ka vba afoha he isht hopohlahanli; mihmvt nana kvt isht ai vhlpiesa ho nan vlpisva pvlammi kvt i nukkilli vhleha ha onvtuyula he isht miha.

1. PAL, micha Silfanus, micha Timohlius pia hvt Chvch Hlessalonika a hikia Piki Chihowa, micha Chitokaka Chisus Klaist ibafoyuka ka pit il aiokpuchi kvt,

2. Piki Chihowa, micha Chitokaka Chisus Klaist ita tuklo nan isht i kana, micha isht it i nanaiya ita tuklo kvt hvchi anukfoyukashke, e hvch im ahnishke.

3. Hvchi ai yimmi ka yvt chitot isht i shahli fehna, micha hvsh moma kvt hvsh it i hullo kvt laua fehna hoka, itibapishi li vhleha ma! isht ai vlpiesa ho hvchishno pulla kak o Chihowa ya yak oke il im ai ahni na bilia hi atuk oke:

4. Yvmohmi kvt pishno vt ai ilbusha, micha na palummi puta aieno kvt hvchi onvtuyula kvt, hvchi nuktaiyalvt, na hvchi yimmi kak o, Chihowa in chvch puta ka a hvchi anolit isht e hvch ilauata hoke.

5. Yummak okvt Chihowa hvit ai vlpiesa apesvt onochi ka isht otvni, yohmi ho Chihowa im apehlichi ka ya hvsh isha he vlpiesa ka hvchi ahna hi atok, yummak a he mak o hvch ilbaiyvsha hoka.

6. Chihowa hvt hvch ilbvshali ya i falaminchit na palvmmi ho onocha hi vt vlhpesa;

7. Micha livchishno vt hvch ilbvsha kvt, hvsh pibafoha hi a hvchim ahna hi vt vlhpesa hoka, nitak yummfa fehna Chitokaka Chisvs vt enchil hlampko puta ka il ai eshit,

8. Uba mintit luak libbi biekvt haiakvt, Chihowa ik ithano, micha Chitokaka Chisvs Klaist im vbanumpa ik im antio aieno ka isha he vlhpesa mak o im apesvt onochikma;

9. Yummak okvt Chitokaka, micha nan isht im ai ahli holitopa itikba ai i filvmmmit na palvmmi a bilia isht im vlhtobvt ilbvsha he;

10. Yummak okvt vla cha, vbanumpa yimmi puta ka isht a holitopa he, mikma i yimmi puta kvt okokko! ahnit aiokpahancha he nitak yummak ok mak o yakohma he, atoklit il anoli tok a hvchi yimmi tok oka.

11. Yumohmi hoka anumpa ilbvsha isht e hvchim anumpohonli na bilia kvt, pin Chihowa yvt nan isht ilaiyukpa ilvppak ash hvsh isha hi a vlhpesa hvchi ahni cha, ilap nan isht i kana aiokpancha he achukma moma, micha ai yimmi a toksuli nan isht im ai ahli aieno ka isht hvchim atahli hokban il ai ahni hoke.

12. Yumohmi ka pin Chitokaka Chisvs Klaist hohchifo hvt, hvchi a holitopakma, pin Chihowa, micha Chitokaka Chisvs Klaist nan isht i kana pulla ho yummak ash hvchi a holitopashke.

CHAPTA II.

Nan ai ahli ya a kvllot iesha hi a i miha; nan ai ahli laua kvt ai i filvmma he, mikma Klaist i sanali vt Chitokaka yvt ik lo kisha ka, otaiyana hi a anoli; 15 vba isht anumpohonli.

1. YOHMI ka itibapishi li vhleha ma! pin Chitokaka Chisvs Klaist vt vla he, micha il im itvnaha he ak o isht e hvchim asilhhushke.

2. Yohmi ka chekosi, shilombish tikbanli anoli yokmá, vbanumpa tosholi yokmá, pi holisso hak okmá, nana hoh

kia Klaist i nitak vt auet olanlosi hvchi chohmit, hvchim anukfila hvt ik shanaiwot ik hvchi komunto kashke.

3. Hatak nana kia kaniohmit ik hvchi haksecho kashke : vbanumpa ha i filvmmiit ik a^{sho} kisha, micha nan okpvni ushi, hatak nan ashvchi yummvt ik haiako kisha ka, nitak yummvt vla he keyu.

4. Yummak okvt Chihowa hohchifo, micha i shahli ikbit aiokpvehi puta ka i sanalit ile chahvchit, il i shahliche yoke : yohmi hosh yummvt Chihowa chohmit, Chihowa in tempel a binilit, Chihowa ile miht ile haiakvchi hoke.

5. Hvchi takla anta li moma mv^t, ilvppa puta ka hvchim anoli li tok a hvch ik ithaiyano ho ?

6. Yohmi ka himak ano nitak vt im vlhpiesakmv^t otvna hi a, nana hosh halvlli ka, hvsh ithaiyanvshke.

7. Na luma chito ik vlhpeso yvt tobvt isht ia mashko hoke : himak a halvlli kvt halahanla chi ; atuk o yummak ash o ishit i kanvllichik mak a hi oke.

8. Mikma yohmikmak o nan ashvchi yummak ash ot otvna hi oke ; yummak oka Chitokaka yvt itih ilhfiopak isht illicha he, micha shohpakali hosh ant haiakakmv^t, yummak ash o akshocha hi oke.

9, 10. Yummak okvt Setan nanakaniohmi yo iakaiya kvt, nan isht im ai ahli, nan isht atokowa puta, micha na holabi isht nukhlakancha, mikmv^t nan ik vlhpeso isht yoshubli aie-na ho il ai ishit illi na bilia he puta ai itin takla ya ayvt otaiyani yummak a he oke ; okchaya hi atuk kia vbanumpa ahlika ya holitoblit ik yimmo tok okvt.

11. Mikma yakohmi kak o Chihowa yvt nan isht a yoshuba kullo kvt ik onvtula im ahni na na-holabi kia i yimma he :

12. Yumohmi pulla hosh anumpa ahli ik yimmo hosh, amba nan ik vlhpeso aiokpanchi tuk vt momvt nan im vlhpisvt na hotopa hi atok.

13. Yohmi kia itibapishi li Chitokaka i holitopa hvchia ma ! hvchishno pulla kak o Chihowa ya yak oke il im aiahnit bilia he vlhpesa hoke. Shilombish isht a kashofa, micha anumpa ahli yimmi pulla hosh hvchi okchaya he ai vmona ka hvchi atokoli tok oke :

14. Yummak a hi o pin Chitokaka Chisus Klaist isht a holitopa ya hvsh isha hi a, yummak ash ot pim vbanumpa isht hvchi hohoyo tok oke.

15. Yumohmi hoka itibapishi li vhleha ma ! kvllo t hvsh hielashke, micha anumpa vlhpisa puta vbanumpa toshowa hokmá, keyukmut pi holiso hokmá, nana ho hvsh ai ithvna tuk vt hvsh ieshashke.

16. Mikma pin Chitokaka Chisus Klaist ilap inli, micha Piki Chihowa, yummvt pi hullo, micha nan isht i kana pulla hosh chukvsh isht a nuktaiyala bilia, micha nana isha he ahni achukma ya pihima tok vt,

17. Hvchi chukvsh a hopohlvi cha, anonti anumpa achukma puta, micha nan toksvli achukma aienka isht a hvchi hlampkohonhashke.

CHAPTA III.

Vba isht anumpohonla hi a im a sihlha, 1 ; 6 nan ai vlhpiesa ik shanaiowo ka he i miha ; nan in takobi, micha nan ik vlhpeso aienka ik ai itapeho ka he, 16 isht aiyopichi kvt vba asihlha.

1. ISHTAIYOPA ka itibapishi li vhleha ma ! anumpa ilvusha isht hvsh pi anumpohonli na Chitokaka im anumpa yvt mvlighinlit ayt, holitopa kvt, hvchim ai yumohmi kak inli ho chohmashke :

2. Yohmi ho hatak ik vlhpeso, micha hatak nan ashvchi atampa aienka il i hlakofa he ak o, hatak moma kvt ai yimmi ka ishi keyu hoka.

3. Yohmi kia Chitokaka yvt na mihvt ai ahlich, yummak osh hvchi hlampkochi cha, nan okpulo ya hvchi a filummit chit hvch iesha hi oke.

4. Micha hvchishno pulla hokvno Chitokaka ya isht il anukchieto kvt, nana e hvchim apesa tok a hvsh yumihchi kvt, anonti hvsh yumihinch chi mak oke.

5. Mikma Chitokaka yvt hvchi chukvsh a apissulechi na Chihowa ya hvsh i hullo, Klaist atok a chiyuhmit nuktaiyalvt hvsh achunanchashke.

6. Yohmi ka itibapishi li vhleha ma! pin Chitokaka Chisvs Klaist a hochihifot isht e hvchim apesa kvt, itibapishi kvna hosh ai vlhpesa keyu ho aya, micha anumpa vlhpisa pim ai ishi tok ak keyu hokvno, hvsh i filummaslike.

7. Hvchishno ak inli kia kaniohmit hvsh pi ahobacha he vlhpesa kvt hvsh ithanvshke: hvchi takla il ashwa mvt, ai vlhpesa keyu ka a pi yvmohmi tok keyu:

8. Micha pill a hatak inla i puska e pa tok keyu, amba ninak, micha nitak moma ka toksvlit, hoyublit pi palvmmi tok, yvmmvt hvsh kanima kia nana kvt ik hvchi kvnio ka chi kak atok.

9. Yohmi kvt e yvmohma he vlhpesa keyu nana tok keyu: amba hvsh piakaiya hi o e hvchim ile haiakvchi hatuk oke.

10. Hvchi takla il ashwa mvt kvna kia toksvla he keyukmvt impa he vlhpesa keyu, ilvppak oka e hvchim apesa tok.

11. Kanimi kvt hvchi takla ai vlhpesa keyut aya mvt, toksvla he keyu kvmohmit, nan isht ahalaia keyu kia isht vttvt fullakahanchi ka e haklo hoka.

12. Yvmma chohmi puta kvt nuktanlv ahanlv, toksvlit, ilap i puska vpa he ak o im apesvt, pin Chitokaka Chisvs Klaist puyulla mak o il in tonohonchishke.

13. Yohmi kia itibapishi li vhleha ma! nana achukma ka hvsh yvmohmi kvt ik hvch in takobokashke.

14. Micha hatak nana hosh pim anumpa holisso ilvppa ik im antiokma, yohmi hvsh ahni cha, takla hvch ik ayo kihofahyashke.

15. Yohmi kia hvchin tnvvp o ahnit hvchik anukfilo hosh, amba itibapishi ha chohmichit nana hvsh i mihashke.

16. Chitokaka it i nanaiyvchi ilap ak osh ik kaniohmi kia isht it i nanaiya ya hvch ima na biliashke. Chitokaka yvt hvsh moma ka hvch ibafoyukashke.

17. Pal sia hvt subbak fehna ho isht hvchi aiokpvchi li ka, yvmmvt a holisso puta ka isht ithvna mak oke: yakohmi ho holissochi lishke.

18. Chitokaka Chisvs Klaist nan isht i kana yvt hvsh moyuma ka hvchi anukfoyukashke. Amen.

HOLISSO VMMONA PAL VT

T I M O H L I Y A

I HOLISSOCHI TOK.

CHAPTA I.

Timohli a pit aiokpvchi, mihmvt nana ka isht atokoli tok vt isht i mihija, 1; 5 nana ho isht ai vlpiesa hosh nan vlpisa yatuk a anoli; 11 ilap vbanumpa nukfoka tok vt anoli.

1. PI Okchalinchi Chihowa, micha ai okchaya bilia e pihisa he ahnit il anukchieto, Chitokaka Chisvs Klaist ita tuklo ka im anumpa pulla ho, Chisvs Klaist im apostel Pal vt;

2. Nan ai yimmi pulla ho svso fehna Timohli ya pit aiokpvchi hoke; Isht i kana, isht i nukhaklo, micha isht it i nanaiya aieno kvt Pi ki Chihowa, micha pin Chitokaka Chisvs Klaist ita tuklo ka a mihinti kvt chi anukfoyukashke.

3. Masetonia ya ia li mvt, Efesvs a ish anta cha, kuna kia nana inla isht ik abacho ka ch^j ka,

4. Mikmvt anumpa ik ahobo, micha in tikba ai unchululit isht auehinchⁱ isht annoa ataha iksho, yvmmak ovvt Chihowa holitobli nan isht ai yimmi i shahlichit nukfohkich^a he keyu hosh, iti posilhhvchit ai asha hi a anukfohkich^a yvmmak oka isht ik ahanto ka ch^j ka, ish im apihisa he chim ai ahni li tok a, ish yvmihchashke.

5. Uba nan vlpiesa yokuto chukvsh kashofa, micha im anukfila achukma, micha na-yimmi ai ahli aieno hosh it i hulla he ak o, hoyo hoke:

6. Kanimi kvt ilvppa puta kak o i filummit, naksika ia cha, anumpa nan ik ahobo anumpuli hoh mak osh ;

7. Ilap okvt nana ho okla miha, micha nana ho kvlochit miha aien a kvt akostininch keyu kia, vba nan vlhpisa ithunanchi o toba bunna chatuk oke.

8. Yohmi ka hatak okvt ai vlhpiesuchi hosh isht vtta hokma, vba nan vlhpisa yvt achukma hoka il ithanvshke .

9. Uba nan vlhpisa yvt hatak vlhpesa yak o in toba tok keyu, amba vba nan vlhpisa ik ahninchot ik im antio, Chihowa ik holitblo, nan ashvchi, Chihowa ik im antio, vbanumpa ik ahobalo, iki puta vbi vhleha, ishki puta vbi vhleha, hatak bika vbi vhleha.

10, 11. Hau put, kuna hosh ilap inli kvt nakni bika isht ile litehli vhleha, hatak bika hukopa vhleha, holabi vhleha, anumpa kvlo il onochit ik ahlo vhleha, mikmvt ilap inli isht ilaiyukpa Chihowa im anumpa holitopa, isht vm atokowa tok, nan ai ahli yumm*ma* i sanali kia yvmohmi vhleha aienak atok, ilvppa il ithaiyanvshke.

12, 13. Yohmi ka tikba ma vbanumpa ik ahobalo, micha na yimmi vhleha i palvmmihinchi, micha chukvsh hotopahanli sia yatuk kia, ai ahli la he vm ahnit, pin Chitokaka Chisus Klaist mihi yosh sa hlampkohonchi cha, vbanumpa isht im vtta yo sa hilechi tok; yohmi ka nan ik yimmot nan ak ithano hatuk osh, nana ka yvmihchi li tuk osh nan isht i nukhaklo a ahayuchi li tuk vt, yak oke im ahni lishke.

14. Yohmi ka pin Chitokaka nan isht i kana yvt lawa fehna hatuk o, Klaist Chisus ai ibafoyuka hosh na sai yimmi cha, nan isht i hullo li tok oke.

15. Nan ashvchi vhleha yumm*ma* uno ak osh moma i shahli li yatuk a, okchalincha chi hosh Klaist Chisus vt yakni pakan vla tok, anumpa ilvpput ai ahli fehna ka vlhpesa ahnit, aiokpancha he vlhpiesa hoke.

16. Yohmi ka nan ashvchi moma i shahli uno yak atuk osh nan isht i nukhaklo ya ahayuchi li tok, ilvppak o himak a pilla ai asha kvt yumm*ma* i yimmi cha, ai okchayvt bilia isha chi ka, Chisus Klaist vt uno ak o nan isht ahobvcha he ak osh ilap nan isht i svlahvt i nukhaklo ya otvnhincha chi ha tok.

17. Yohmi ka Miko okchayut a bilia, illa he keyu, na holhponayo hvt pisa he keyu, Chihowa hopoyuksa yak bano kak o ahninchit holitohombli na bilia hosh ik biliá. Amen.

18. Tikba nan atokowa isht a chi anoli kvt, tikbalichit isht chi otvnihinchi yummak atuk pulla mak o, tvshka ahli achukma hosh ish tanahampa chi ka, svso Timohli ya nan isht ish ahanta he ilvppa chi atokoli lishke :

19. Ilvppak ash im ai ahli achukma kvt isht il akostininchachi achukma ka ish ieshashke : yakohmit isht il ithaiyana he tuk ash osh kanimi kvt kanchi kuto, nan ai yimmi ka yash o it a yuhli yoke.

20. Yohmi ka kanimi kvt Himeneus, micha Aleksanta ita tuklo kak atuk ; yummvt vbanumpa ik ahobalot nan ik mihacho ka chi ka yummak o ithuna chi ka, Setan a im issa li tok oke.

CHAPTA II.

Hatak moma ka vba isht anumpohonla he, mihmvt nana kvt kaniohmi kak o yakohma hi a anoli, 1 ; 9 kaniohmit ohoyo hvt shema he : 12 ohoyo hvt vba anumpa isht anumpula he keyu, yohmi kia na yimmi ahli hokmvt, okchaya he.

1, 2. YOHMI hoka nana ish a yvmohma he vmmona kvt, Chihowa hvt hatak puta ka i nukhaklo ka yak oke pit im ai ahnit, anumpa ilvusha ish anumpuli kvt, Chihowa hvt hatak puta i kanvt, miko vhleha, micha nan vlhtoka vhleha aienka hopoyuksiacha he ak o ish im asihihla he chi atohno lishke ; yohmi kvt Chihowa ya e holitobli, micha hatak nana il ai it i kaniohmi puta kvt ahli achukma hosh il ahanta hok mak osh pi okchaya takla kvt, it i hullot it i kanvt il ahashwa hinla hoke.

3. Ilvppak okvt achukma hoke ; yohmi ka pi Okchalinchi Chihowa hvt pisa kvt ahninchit hoke :

4. Yummak okvt hatak puta kvt vbanumpa ahli yoka nukfoysuka cha, okchaya he ak o im aiahni hoke :

5. Yohmi ka Chihowa hvt achvfa, micha hatak, Chihowa ita tuklo it i nanaiyvchi yvt achvfa, hatak Klaist Chisvs ak oke.

6. Yummak okvt moma ka vlhtoba mak osh ilap inlit il

im issa kvt, anumpa ahli ilvpput ont ai vlpiesakma anohowa hi a tok oke.

7. Yummak atuk mak o apostel, micha vbanumpa isht vutta ita tuklo ka si vlhtoka tok oke ; yohmi kvt anumpa ahli, micha na yimmi imma aien a Chentail okla im abuchi sia hosh, holabi keyu hosh Klaist isht anumpa ahli mak o anumpuli lishke.

8. Yohmi ka anuktuklo, micha anukhobela aien iksho hosh, ibbak mvt kashofa achukma bieka hosh vba pit welit, kanima moma ka hatak puta kvt anumpa ilvusha ai anum-pohonla hi a im ai ahni lishke.

9. Anonti yummak ash inli ho chiyuhmit, ohoyo puta kvt ilefoka ai vlli chito, pvl, tvli holisso lakna aien ka isht ik shemo ka he, micha pashi aien ka yikyuachit ik shemacho ka he ; amba im anukfila puta kvt ile oktamplit, hatak ma ik ai okchifelo hosh nuktanlv, ilap isht a shema he ai vlpiesa ka isht shema he im ai ahni lishke.

10. Amba ohoyo puta kvt Chihowa holitobli kvt, si anuk-foyuka ahnit il anoli kvt, ai ymohma he vlpiesa, nan isht vutta achukma kak o ymohmashke.

11. Ohoyo hvt ai ahlit im antivt, lumvt maya hosh nana ka ithvnashke.

12. Yohmi ka hatak a ohoyo hvt i shahlit, nana ka im abvchit ahanta he ak im alnoshke ; amba lumvt ai asha he im ai ahni lishke.

13. Yohmi ka Alvm ak osh If a tikba toba hatok oka.

14. Mihma Setan vt Alvm a haksichi tok keyu, amba ohoyo hak o haksichi na ai ashvchika ya ymohmi tok.

15. Yohmi kia vlla ishi kvt okchaya he, yohmi kvt na yimmi kvt ik isso hosh, i hullo, micha chukvsh kashofa ho isht holitoblit, ile oktampli hok mak osh okchaya hi oke.

CHAPTA III.

Bishop, micha iksa nan isht im vutta, micha im ohoyo aien kvt nana hosh im vhltaiyaha he, 1; 15 Chihowa in chvch, micha nan ai ahli vt ai vlbuchi ka isht im anumpuli.

1. ANUMPA ilvpput ai ahlishke, yohmi kvt hatak kuna hosh bishop nan ai isht vtta ishi bvnna kmvt, nan ai isht vtta achukma ho ishi bvnna hoke.

2. Yohmi ka bishop vt anumpa ik achukmo nana kia onvtula he keyu, tekchi achvfa i hatak, nana ka ahah ! ahni, ile oktampli, nana a kaniohmi mvt achukma, hatak ik ithano moma ka i kana, nana im abvchi kvt imponna,

3. Oka homi ishko shahli keyu, na fahama keyu, ai vlpiesa keyu isht a hofahya he nan isht ahayuchi bvnna keyu; amba nuktanlv, ik itachowo, tvli holisso i hullo keyu;

4. Yohmi kvt ilap in chuka chvfa ya pehlichi kvt imponna, im vlla vhleha hvt im antia achukma chi ka yopunla keyu hosh im anukfila nuktanla achukma hosh nana im apihashke :

5. Yohmi ka hatak in chuka chvfa pehlichi ik ithano kvt, katiohmit Chihowa in chvch a apesvchi imponna hinla ho ?

6. Himona vbanumpuli toba keyu hashke ; yohmi hatuk mvt ilefehnvchi isht a wakayvt hikia hokmvt, nan isht ahullo okpulo nan isht ilvsha im vlpisa tok a chiyuhmit im vlpisa hinla hoke.

7. Anonti vbanumpuli keyu aiasha im annoa achukma kvt ieshashke ; keyukmvt isht a hofahya, micha nan isht ahullo okpulo nan isht haksichi aieno ka pit itula hinla hoke.

8. Anonti chvch nan isht im vtta yvt yopunla iksho hosh im anukfila nuktanla achukmashke, im anumpa tuklo keyu, oka homi ishko shahli keyu, ai vlpiesa keyu isht a hofahya he nan isht ahayuchi bvnna kvyu ;

9. Nan ai yimma hi tt vbanumpa a luma hatok a im anukfila kashofa achukma hosh isht ieshashke.

10. Yvmmak ash o tjkba imomaka pisashke ; yohmi kvt anumpa ik achukmo onvtuyula iksho hok mak osh, chvch nan isht im ai vtta ya isht vttashke.

11. Tekchi ak kia yopunla keyu hosh im anukfila nuktanla, hotopali bvnvt na-mihachi keyu, nana ka ahah ! ahni, nana moma ka ai ahli banashke.

12. Chvch nan isht im vtta yvt tekchi achvfa i hatak osh,

im vlla vhleha, micha ilap in chuka chufa ya ai vlhpiesa hosh pehlichashke.

13. Yohmi ka chvch nan isht im vtta nan-ai isht-vtta isht vtta ai ahli yummak osh ilap isht hohchifo achukma ka ishi hoke; yohmi cha Klaist Chisus isht ai yimmi kvt nukwaya iksho hosh anukfoyukvt ahantvshke.

14, 15. Chekosikma chim ona la chi, ahni li; yohmi kia anta li hopaki hokma, Chihowa im aboha anukaka, yummvt Chihowa okchaya in chvch okvt, vbanumpa ahli ka in tonik, micha in tolahpi yoka, ish a kaniohma he puta kvt ish ithaiyana he mak o, ilvppa puta ka pit chi holissochi lishke.

16. Mikma moyuma kvt ilvppa ai ahli ai ahnishke; vbanumpa nan otvninchi kvt na chinto fehna; yohmi kvt Chihowa hvt haknip o isht otvnit, Shilombish Holitopa ka isht ai ahlit, enchil vhleha ha im a haiakvt, Chentail vhleha ha isht im anuhumpa tok, mihma yakni paknaka ya ai i yihimi tok o, vba a holitopa ka ik chukowá im ai ahni na pit chukowa tok.

CHAPTA IV.

Nan ai yimmika ya i filvmmmit akakoha hi a tikbanli anoli, 1; 6 nana ka a yvmohma he vlhpiesa ka mominchit yvmihcha hi a anumpa vlhpisa il aiyukali isht i miha.

1. SHILOMBISH Holitopa yvt otvninchi fehna hosh anoli kvt, himak a pilla ka kaniohmi kvt vbanumpa yimmi tuk vt issa cha, shilombish na yoshubli im antvt, nan isht ahullo okpulo vhleha imma isht vlbuchi ka yimmit,

2. Nan ilahobi holabi hosh anumpohonli kvt, isht il akostininchi mvt tvli lvshpa isht lvt yikotvt kvnia hatuk osh;

3. Nan-itauwaya im olvbichi, micha ilhpak kaniohmi ka ik po ka he aiena ka im apihisa he; ilhpak yummak oka anumpa ahli ithana, micha i yimmi aiena hokvto yak oke ai ahnit, habena he mak o, Chihowa hvt ikbi tok oke.

4. Yohmi ka Chihowa hvt nana moma ikbi tok a achuk-

ma bano, yak oke ai ahnit habena hokuto, ik ahnincho ka hi a nana kvt ikshoshke.

5. Yohmi ka Chihowa im anumpa, micha anumpa ilbvsha ita tuklo atuk mak o yummak ash ot isht a pim vlhpiesa hoke.

6. Ilvppak o itibapishi vhleha hvt ithaiyana he mak o ish nukfoyuki hok mvt, Chisvs Klaist im anumpa isht vtta achukma chia mak a he, na yimmi, micha nan vlbuchi achukma ita tuklo isht anumpa ka isht chim vlbuchit a chi anukfoyuka hoke.

7. Anumpa kyllakshi shukanumpa, ohoyo sipokni nan anoli chohmi ka chik ahnincho hosh, amba Chihowa holitolbit isht ahantashke.

8. Haknip nan isht vtta isht ai achukma hokuto mishema he keyu hoke: amba Chihowa holitobli nana moma ka isht im ai achukma kvt, yakni paknaka nan ai isht ai yukpa, micha yakni inla vla he mihinti ita tuklo ka isht ai yukpa he im issa hoke.

9. Anumpa ilvppvt ai ahli fehna ka, vlhpesa ahnit, ai okpancha he vlhpiesa hoke.

10. Yohmi ka ilvppak osh yohma chi ho, e toksvlit pi hoyvblit, isht a hofahya anumpa aieno kvt pi onvtohonla kvt, Chihowa okchaya ak o il anukchieto ka; yummak osh hatak moma okchalinchi, yumma i yimmi hok mak henahli fehna hosh okchalinchi yoke.

11. Ilrppa puta ka im apesut ish im abahanchashke.

12. Chi himita kak o isht ik chi yukpo kvt kvna kia ik anto kashke; amba nan ish a kaniohmi, ish anumpuli moma, ish i hullo, chukvsh nan isht ish ai ahni, na chi yimmi, haui imma anukfila iksho, ilrppa puta ka ish yvmohmi pulla na na-yimmi vhleha hvt chim ai ithvnvt chiakaiyashke.

13. Holisso it im annmpulit nan atohnochit, vbanumpa im abvchit isht ish ahanta na ona lashke.

14. Na hvlbina chimmi ha he nitak hopaki pilla kash anohowa tok o, vbanumpa isht vtta vhleha hvt ibbak chi onochi na chim ai ahli tok vt, chi anukfoyuka kvt isht chik ahanto ki ná.

15. Ilvppa ish anukfihinli cha, chim anukfila ha a mominchit isht ish ahantvt, nana ka i shahlit ish mahaya ka nana moma ka ai otnashke.

16. Ahah! ish il ahnashke, micha nana ish abahanchi kvt ahah! ish ahnashke: yohmi kvt yvymma achunanchit isht ish mahayashke: ilvppak o ish yvmohmi hokmak osh, ish ile okchalinchikmvt, anonti inlv̄t chi haklo aienā ka ish okchalincha hinla hoke.

C H A P T A V.

Hatak ilaiyuka ka kanimihcbit nan i miha he anoli, 1: 5 ohoyo i hatak illi ya nan isht i miha: 17 iksa nan isht im vtta, 23 Timohli abekoma chohmi aienā ka nan isht miha, 24 kanimi ka nan im ashvchika yvt tikba iwt nan vlhpisa ka ona, mikma kanimi nan im ashvchika yvt himmak o iakaiwt nan vlhpisa ka ona.

1. **HATAK** asvnochi ka anumpa kullo isht chik im alvmmicho hosh, amba iki chohmichit i kanvt nana ish i mihashke; micha hatak himita vhleha hokvno itibapishi chohmichit i kanvt nana ish i mihakmvt,

2. Ohoyo sipokni vhleha hokvno ishki chohmichit i kanvt nana ish i mihakmvt, anonti ohoyo himita vhleha hokvno hauj imma anukfilli iksho hosh, in tek chohmichit i kanvt nana ish i mihashke.

3. Ohoyo i hatak illi vhleha hvt i hatak illi ahlī pulla ka ish holitoblashke.

4. Amba ohoyo i hatak illi kariohmi kvt im vlla, keyukmvt ipok vhleha hvt ashakmvt, vmmona nan ithvna kvt, in chuka mayrt nana achukma ka yvymohmashke; micha ipokni, ishki chohmi ka falaminchit im atobbashke: ilvppvt achukmushke, yohmi kvt Chihowa itikba ya ai vlhpiesa hoke.

5. Yohmi ka ohoyo i hatak illi ahlī pulla, micha vlhtakla hokvto, Chihowa ak o anukchieto kvt, nitak, ninak ita tuklo ka anumpa ilvsha anumpohonlit a bilia hoke.

6. Amba ohoyo i hatak illi yvt haknip nan isht ai yukpa isht ai yukpvt ahanta hokvto, okchaya takla kvt illi yoke.

7. Yohmi ka ilvppa puta ka ish im apihisa na anumpa ik achukmo kvt ik onvtulo kashke.

8. Amba kanimi kvt ilap immi, micha ilap in chuka chvfa a fehna aieno ka ik im atahlo hokmvt, vbanumpa ha ik holitoblo kvt, nan ik yimmo ak kia ik achukmo kvt i shahli hoke.

9. Ohoyo i hatak illi yvt afvmmi pokoli hannali ka ik ono hokvto, ik iba holisso kashke,

10. Yvmmvt hatak achvfa tekchi atok, nan isht vtta achukma ka isht annoa achukma, vlla achukmalit hofanti-hinchi, hatak ik ithano nowvt aya ka nan im atahanli, vbanumpuli holitopa iyi kia im achihiifa, ilbusha ya apelanhanchi, nan isht vtta achukma puta ka achunanchi biekvt isht ahanta cha tuk mak osh iba holissashke.

11. Amba ohoyo i hatak illi himita vhleha hokvno ish im olvbichashke; yummak okvto Klaist im antia ik bunnot, yakni paknaka nan isht ai yukpa ahnit isht iakmvt, hatak auwaya bunna hinla hoke :

12. Yvmmak okvt na yimmi vmmona tuk vt issa hokvt, isht ilbusha anumpa hvt onvtuyula hoke.

13. Mikmvt anonti nan isht vtta intakobi kvt, chuka abaiyvchi banot itvnohowa; micha nan isht vtta intakobi kak bano keyu, amba anumpa chukushpali aieno, micha inla nana im a kaniohmi kak bieka isht ahantvt, nana isht anumpula he vlpesa keyu kia isht anumpuli hoke.

14. Yohmi hoka ohoyo i hatak illi himita vhleha hvt hatak auwayakmvt, vlla ishki tobvt, chuka apesvchit anta kvt, nana ik achukmo nana kia yvmo hmi na vbanumpa i sanali vhleha hvt hofahyalit isht ik anumpulo ka he, im ai ahni lishke.

15. Himak a kaniohmi hokvto naksika filvmmi Setan a iakaiyvt ia mashko hoke.

16. Yohmi ka hatak, keyukmvt ohoyo na yimmi kani-mampo kvt ohoyo i hatak illi yvt i kanomi hvt asha hokmvt, yvmmak apelanhanchi na chvch ak okvto nan isht ik i kunio kashke; amba ohoyo i hatak illi ahlil pulla hokvno apelvchashke.

17. Iksa pehlichi vhleha hvt achukmalit iksa pehlichi kak osh holitopa kvt i shahlikma, anonti vbanumpa ithvnanchit isht anumpuli hokak heto i shahli fehnvt holitopashke.

18. Yohmi ka Holisso Holitopa yvt achi kvt, Wak toksvli vt onush nihechi ka itih ha chik takcho kashke: micha, Na toksvli vt im vlhtoba he ak osh ai vlhpiesa hoke, achishke.

19. Ubanumpa isht vta yvt nan ik achukmo kia yvmohmi tok annoa ka ik chi yimmo kashke; amba nan atokowa anoli tuklo, tuchina kanima hosh anoli hok mak ashke.

20. Amba ashvchi hatuk o mvhli hokvno, momvt pisa ho, ish im alvmmichashke, yohmi na inla asha kvt nukshopa mak inlashke.

21. Nana chim apihisa li kvt, Chihowa, micha Chitokaka Chisvs Klaist, micha enchil vlhtoka vhleha aienka itikba hikia li hosh, ilvppa ish holitobli kvt it i shahshorechit, hatak achufona ho i kana i shahlichit nana isht chik im ahanto ka he ahni lishke.

22. Hatak kvna kia himak fokalechit ibbak onochit, inla nan ai ashvchi ka chik iba taklo kashke: yvmohmi kvt a kashofa hosh ish ahantashke.

23. Himmakma oka kapussa chik ishko hosh, amba chikfoka ak atuk pulla mak o, micha chi abeka shahli aienka hokvt oka-paki kanomosi ka ish ishkashke.

24. Hatak kaniohmi nan ai ashvchi yvt tikbanli otvni, nan ai vlhpisa itikba ya ohona hoke; mikma hatak kaniohmi hokvno iakaiya hoke.

25. Anonti hatak kaniohmi nana achukma a yvmohmi kvt tikbanli otvni akinlishke; mikma ik yohmo ke tuk vt luma he keyu hoke.

CHAPTA VI.

Yuka hvt nana ka isht ahanta he vlhpesa ka anoli, 1: 3 ilap vt nan isht ithvnachi tuk a keyu ho kvna hosh isht ithvnachi hokvno i filvmma he. 6 Chihowa anukfoyuka hokvto nan il ahayuchi,

10 twli holisso i hullo kvt nan ik vlhpeso yo hakshish; 11 nana ho Timohli vt i filvmmi cha, anonti nana ho im antia he: 17 nan inlava ya nana ho im acha hi a im achi.

1. YUKA puta ikunla abana nuta ahanta kvt, ilap i na hullo isht a holitopa he vlhpiesa ka isht holitobli na Chihowa hohchifo, micha im vbanumpa aien a kvt isht ik kvllaksho kashke.

2. Mikma i na hullo vbanumpuli yosh ash a hokvt itibapishi hokvt, isht ik i ahno ka he vlhpesa keyushke; amba i na-hullo yvt na-yimmi, micha Chihowa i holitopa, micha nana isht ai yukpa vba minti ka it ibai ishi yoka, aiokpan-chit nana ka isht im ahantashke. Ilvppa puta kak o im abvchit ish atonohonchashke.

3. Yohmi ka hatak kanima hosh nana inla ho abvchi, micha isht ai achukma anumpa Chitokaka Chisus Klaist im anumpa, micha Chihowa holitobli nan isht vlbahanchi aien ka vlhpesa ik ahnot,

4. Ilefehnuchi isht alotvt, nan ithana keyu, amba tasimbot nan isht a ponaklo ak bano isht anumpohonli, micha anumpa isht itachowa aien yvmmak o a minti hosh nan it i potvnno, it i nukowa anumpa, kanimanchit isht anumpuli, anukfila okpulo,

5. Micha hatak im anukfila ik achukmo, micha vbanumpa ahli kvt ik im iksho cha, nana ahayuchi kak osh Chihowa holitobli im ahoba hosh, it i kvllot anumpuli aien hoke; yvmma chohmi ka ish il i filvmmichashke.

6. A nuktanla hosh Chihowa holitobli kvt nana a fehna ahayuchi hoke.

7. Yohmi ka yakni ilvppa nana il ishi hosh e la tok keyu; yohmi kvt nana ishit il ia he keyu kvt ai ahlishke.

8. Yohmi kvt nan ilhpak, micha ilefoka aien il ishi kvt, yvmmak oka isht pim ai vlhpiesashke.

9. Amba nan in laua he ak bano bunna fehna hokvto, nan isht hokli, nan isht anukpvl, micha anukfila ik hopoyukso, micha anukfila okpulo isht ile okpuni aien ka chukowa, yvmmak ash ai okpuloka chinto ka hatak a okai ahambi hoke.

10. Yohmi ka tvli holisso i hullo kak osh nan ik achukmo moma ka hakshish isht a toba hoke; yvmmak o kaniohmi kvt anuksitivt hohoyo kak osh, vbanumpa ha i filummi cha, nan isht a nukhaklo laua ka isht ile nvhlit ile hlopulli-hinchi tok oke.

11. Amba chishno Chihowa immi chia ma! ilvppa puta kano ish i filummashke: micha ai vlhpiesa yvmohmi, Chihowa holitobli, na yimmi, i hullo, nuktanlv tachunanchi, anukfila yohbi aieno hak o ish hohoyashke.

12. Na-yimmi isht itibi achukma yvmmak o isht ish itihimbashke; ai-okchayvt bilia ak o kvllo hosh ish ieshashke, yvmmak o chishno ak kia isht chi vlhtoka tok, micha nan atokowa anoli lawa ka itikba yo vbanumpa yimmi isht anoli achukma ka ish il apesa tuk mak oke.

13. Chihowa yvmmak osh nana moma ka ik okchayá, im ahni na okchaya, micha Chesus Klaist, yvmmak okvt Pontius Pailat itikba hikia mvt, ai atokowa ahli achukma ka il anoli tok ita tuklo itikba ya hikia li hosh nana chim apihisa li kvt;

14. Chishno yvt na-liteha iksho, anumpa ik achukmo chi onvtula he kia iiksho hosh, nan vlhpisa ilvppa holitoblit ish ahanta na pin Chitokaka Chesus Klaist okvt haiakashke:

15. Ai yvmohma he apesa tok nitak yvmmma ilap ak bano hosh ithana hosh yvmmak oka haiakucha he; yohmi kvt ilap ak osh nayukpa Miko ak bano, miko moma ka i Miko, micha chitokaka moma ka in Chitokaka yoke.

16. Yvmmak okvt ai illa hi vt ik im iiksho, micha tohwikel yvmmak oka hata nana hosh ai ona he keyu ho anukaka ai ahanta hoke; yohmi ka yvmmak oka hata nana hosh pisa chatuk keyu, micha pisa hi o keyu; yvmmak okvt isht a holitopa, micha nana moma isht imaiya bilia ita tuklo kvt immi hashke. Amen.

17. Himonasi im ilayak laua aiasha ka nana ish im apihisa kvt, im anukfila chahvt ik ai ashok ka he, micha im ilayak aí ahli keyu ka ik anukchieto hosh, amba Chihowa okchaya, yvmmak osh nana isht pim ai achukma he moma ka lauachit pihima kak ashke:

18. Yohmi kvt nana achukmvli kvt nan isht vtta achukma ka isht ahanta fehna kvt, hopela hi vt im vlhtaha, habenvcha he vt ahni kvt;

19. Nitak himak a pill a mihinta he ak pulla tuk mak o im ilayak achukma ilap immi mak osh intolahpi bohonli na ai okchayvt bilia ya isha he mak o, ish i mihihashke.

20. Timohli ma! nana chim vlhpihisa tok vt ish holitobli kvt, vbanumpa isht ik ahalaio isht anumpa, isht ik ahobo anumpa, micha nan ithana ahli keyu it i chilitvt isht it im anumpuli aienka chik ahalaio kashke.

21. Yohmi ka kaniohmi kvt yummak o iakaiya miha hosh, vbanumpa ha i shanaiyvt ashvchi tok oke. Isht i kana yvt chi anukfoyukashke. Amen.

HOLISSO ATUKLA PAL vt**T I M O H L I Y A****I HOLISSOCHI TOK.****C H A P T A I .**

Timohli i hullo kvt Pal vt isht anumpuli, 1 ; 6 Chihowa nan isht i kana anukfoyuka tok vt i shahlichit isht im anukfihinla hi na im achi.

1. CHIHOWA nana ai ahni ho Chisus Klaist im apostel Pal vt ai okchaya Chisus Klaist vt ataiyahli tok a anohonla chi hosh iso i holitopa fehna Timohli ya aiokpuchishke ;

2. Nan isht i kana, isht i nukhaklo, micha isht it i naiya aiena kvt Iki Chihowa, micha pin Chitokaka Chisus Klaist ita tuklo ka a mihinti kvt chi anukfoyukashke.

3. Chihowa ya yak oke im ai ahni li kvt, an tikba vhleha hvt kaniohmit aiokpahanchi beka tok a chiyuhmit anukfila kashofa ho isht aiokpahanchi li kvt, ak isso hosh nitak, ninak moyuma ka anumpa ilbusha anumpohonli likmvt, chithaiyna lishke :

4. Yohmi kvt chi nishkin okchi mihinti tok a ithaiyana li mvt, chi pisa sa bunna fehna, yvmoohmit sai yukpa ai ahli fehna hokbano ai ahni lishke ;

5. Yohmi kvt na yimmi ai ahli kvt chi anukfoyuka ka ithaiyana li mvt, chipokni Lois ak o vymmona ka yummvt anukfoyuka tok osh, anonti chishki Yunis a anukfoyuka tok osh, chishno ak kia chi anukfoyuka ka sai yimmi akinlishke.

6. Yvmoohmi hoka srbbak chi onochi li tok ak o nana

Chihowa ish i habena tok vt chi anukfoyuka, yummma achukmalit ish okchvla chi mak o chim anohonli lishke.

7. Yvmohmi ka anukfila isht nukshopa keyu, amba isht hlampko, mikmvt isht i hullo, mikmvt isht a hopoyuksa aienan anukfila ho Chihowa hvt pima tok oka.

8. Yohmi ka pin Chitokaka im anumpa atokowa, mikmvt yummma atuk pulla mak o yuka sia aienan ka chik i hofahyo hosh; amba vbanumpa ak atuk pulla mak o nan isht palvummi puta ka Chihowa hvt chi hlampkohonchi mak o isht ish ibai ilvashashke;

9. Yummak osh pi okchalinchi cha, vba nan isht ilaiyukpa holitopa ho il iesha he mak o pi atokoli kvt, pishno nan il ai isha he ai vlhpiesa kak o yohmi keyu, amba ilap nan isht im anukfihinla hosh, yakni ik tobo pilla kash inli ho ilap isht i kana ya Chisus Klaist ak atuk pulla mak o pihiima kak a tok oke:

10. Amba pi Okchalinchi Chisus Klaist vt vla kak osh himonasi kvno isht i kana ya otvninchichi kvt, nan-illi ho imaiyachit kanchi cha, ai okchaya micha ai illa he keyu aienan ka vbanumpa ak pulla kak o isht otvninchishke:

11. Yummak atuk pulla mak o vbanumpa isht vtta, micha apostel, micha Chentail vleha nan im abvchi aienan si vlhtoka tok oke.

12. Yummak atuk pulla mak o na-palvummi puta ilvppa aienan ka pihsa li; yohmi ak inli kia sa hofahya he keyu; kvna ho i yimmi li hatuk vt ithana li hokvt; mikma nana ka isha chi ho ibbak fohki li tok a iши na nitak yummma ona he bano ka i sai yimmishke.

13. Anumpa ai ahli achukma is si a haklo tok vt, Chisus Klaist isht i yimmi, micha isht i hullo aienan ka kvllo ish ieshashke.

14. Shilombish Holitopa pi anukfoka kak osh chi apihinla na nana achukma ish iesha chi ho chima tok a ish ieshashke.

15. Chishno yokvt ilvppa ish ithana; yohmi kvt Asia ai asha tuk vt moyumvt a filvmmitt kvnia tok: yummma iba foka kvt Fichellvs, micha Hemochenes ita tuklo kak oke.

16. Onesifolv in chuka chvfa yoka Chitokaka yvt i nuk-

naklok bano, yummak okvt sai yukpahanli beka tok oka, mi cha yukvt sa talaiyakchi ka ik sa hofahyo ki tok.

17. Amba Lom a ont anta mvt, achunanchi fehna hosh sa hohoyo cha, si ahayuchi tok.

18. Chitokaka yokvt vlhpesa im ai ahni na nitak yummak oka Chitokaka yvt i nukhaklo ka ahayuchi hok bano; micha Efesvs a ont anta li ma, nana lawa kaniohmi ka isht si apelhanchi tok a, chishno yokvt ish ithana fehnvshke.

CHAPTA II.

Timohli vt achunanchit Chitokaka in tishu ai ghla chj ka Pal vt i maha, 1; 16 nana ho ahah! ahna he; 24 mikmvt Chitokaka in tishu hvt kaniohmit ai vlhpiesvt im anukfila he im anoli.

1. YOHMI ka svso chia hvt Chisvs Klaist nan isht i kana yoka isht ish hlampakashke.

2. Nan-atokowa anoli lawa itikba yo chishno yokvt nana ka is si a haiyaklo tok vt, yummak oka hatak ai ahli achukma inla ai asha ka nan im abveha he ai vlhpiesa ak inli kak o ish imashke.

3. Yohmi ka Chisvs Klaist in tvshka achukma chia hokvt na palvmmi ish pihisa kvt, vlhpesa ish ai ahnashke.

4. Hatak kvna kia tvshka toba hokvto, yakni ilvppa nana a kaniohmi ka isht ataklvma keyu hoke: tvshka atokoli tok ak o yukpala chj hosh yvmohmi hoke.

5. Mikma it i shahliche a bunna hosh hatak vt achunanchi ak inli mak osh, nan vlhpisa yak o holitoblit achunanchi keyu hokvto, iachukola he keyu hoke.

6. Yakni okchali yvt vmmona ka toksvli ha yak osh nawaya yoka ai vpashke.

7. Nana chim ahanchi li ka ish anukfihinlashke; mikmvt nana moma ka ish ithaiyana chj ka Chitokaka yvt chi anukfohki hokbano.

8. Um vbanumpa hak atuk mak o Lewi isht ai unchululi Chisvs Klaist vt illi tuk vt, falamvt tani tok a ish ithaiyanvshke :

9. Yummak atuk pulla mak օ nan-ishtakanomi yo chiyuhmit na-palvmmi ka pihisa li hosh, polaka sa talaiyakchi tuk oke: yohmi kia Chihowa im anumpa hokvto talakchi keyu hoke.

10. Yohmi ka ai-okchaya pisa he vltoka tok vhléha atuk pulla kak օ na-palvmmi puta pihisa li kvt, yummak kia Chisus Klaist vt ai-okchaya ataiyahli tok ա, micha nan isht a holitopa aieno ka isha chj ka si yvmohmi hoke.

11. Ilvppvt anumpa ai աhli yoke: il ibai illi hokmv̄t, il ibai okchaya chj ak inli hoke.

12. Nuktanlv̄t il achunanchi hokmv̄t, il iba mika he ak inli hoke: Klaist ա ak ithanoshke, il achikma, ilap ak kia ik pithano ak inla hi oke:

13. Kil i yimmo kia, ilap okvto ai աhlit ahanta: yohmi kvt ik ile holitoblo ka he keyu hoke.

14. Ilvppa puta ka ithana chj mak օ ish ithvnanchashke: yohmi kvt anumpa illa nan isht achukma he keyu, amba haklot maya kvt isht ai okpula hi okvno isht itachowvt ik ai asho ka hi օ, Chitokaka itikba ya anumpa ai աhli ka isht ish im apihisashke.

15. Ulhpiesa chi ahni հօ Chihowa itikba ya ish hikia chj kvt ish achunanchashke; yohmi kvt ish a toksvli tuk vt isht chi hofahya he keyu hosh anumpa ai աhli yoka, moyumv̄t ai isha he ai ulhpiesa ka, ish ita kushkolashke.

16. Yohmikmv̄t vbanumpa isht ik ahalaio isht anumpa, isht ik ahobo anumpa puta kuno ish apakfopashke; yummak okv̄t Chihowa ik holitoblo i shahli ka ikba hinla hoke.

17. Mikmv̄t im anumpa hvt kanka yo chiyuhmit okpahanā hi oke: yummak oka iba foka kvt Himenevs, micha Filetvs ita tuklo kak oke.

18. Yummak okv̄t nan ai աhli ka i filvmmi kvt, illi falamv̄t tani yvt ant ia tok ahanchi kak atok; mihmvt na yimmi kaniohmi ka okpuni hoke.

19. Yohmi kia Chihowa im intolahpi yvt kvollo ai աhli hoke: anumpa ilvppak osh ai օ holisso kak օ, Ilap immi ka Chitokaka yvto ithana hoke. Mikmv̄t Klaist hohchifo hochihifo kvt moyumv̄t nan ai ulhpiesa keyu ka i filvmmashke.

20. Yohmi kia chuka chinto anukaka ya nan ai vlhto tvli holisso lakna, micha tvli hvta isht a toba aienak bano hosh fo^{ka} chatuk keyu, amba iti, micha lukfi isht a toba kak kia aienak inli chatuk; yohmikma kaniohmi kvto isht a fehnakma, kaniohmi kvto isht a kvllakshi chatuk oke.

21. Yohmi ka ilvppak ash kvna hosh ai i filummi hok muto, nan ai vlhto holitopa hosh kashofvt, i shahli ha isht im ahanta chi kut im vlhtaha hosh, nan toksvli achukma puta ka isht ahanta chi kut im vlhtaha hoke.

22. Haui anukfila himita immi ha tushpv^t isht i filummi mak inlashke; amba nan ai vlhpiesa, nan ai ahli, it i hullo, micha it i nanaiya aienak ish ymohmi kv^t, chukvsh kashofa Chitokaka isht a hochihifo kak o ish ibai achufashke.

23. Amba isht a hopoyuksa he keyu anumpa tasimbo yokvno chik ahalaio kashke; mikmvt yummak okut itachowa ikbi yoka ish ithanashke.

24. Mikmvt Chitokaka in tishu hokvt itachowa he vlhpesa keyu, amba hatak moma i kana, nan im abuchi kut imponna, nan im okpulot isht ilvusha kia, nuktanla aienak vlhpesa:

25. Im anukfila yohbi hosh vbanumpa i sanali vhleha yoka nan im abuchi vlhpesa; yohmik mak o Chihowa hut nukfohki na ile kostininchit, vbanumpa ai ahli ka achukmalit ithana yoba na:

26. Yohmikmvt nan isht a hullo okpulo i nan isht hokli ya ai i hlakofa hinla; yummak osh ilap ai ahni hosh yummak ash o yukahanchi hatuk oke.

C H A P T A III.

Nan ik vhlpeso nitak vt vla hi a tikbanli anoli, 1; 6 vbanumpa in tnvnp vhleha ha otvninchi; 10 Timohli vt ilap ak o nan im ai ithvnvt iakaiya he isht miha; 16 mihmvt Holisso Holitopa ya ahnichit isht anumpuli.

1. **ILUPPA** ish ithana mak inlashke: yohmi kv^t nitak ishtaiyopit mahayakma, nitak yummvt nan isht a palvmmi alotowa hi oke.

2. Yohmi ka hatak vt ilapunla he, tuli holisso i hullo, nan isht ilauata, ilefehnvchi, vbanumpa ik ahobalo, iki, ishki ita tuklo ik im antio, Chihowa ya yak oke ik im ai ahno, Chihowa ya ik holitoblo,

3. Im vlla i hullo ik im iksho, nan it im vlhpisa kobuffi, inla aholvbechi, ile oktampli ik ithano, anukfila yohbi iksho, hatak hochukma moyuma ka ik i hullo,

4. Ilap i yimmi tuk kia haksichi, ahah! ik ahno, anukfila chaha, haknip nan isht ai yukpa yak bano ho i hullo kut Chihowa ya im i shahli;

5. Chihowa ya holitobli ilahobi kia, ai ahli ka ona hosh yohmi keyu ka he: yvamma chiyuhmi hokvno ish i filum-mashke.

6. Yohmi ka iluppa chiyuhmi kak osh chuka ya chukowvt, ohoyo im anukfila iksho, ai ashvchika isht ompo-holmot kvnia, anukfila ik achukmo ilaiyuka ka im antivt ahantvt;

7. Nana ka ithahānūt bilia kia, anumpa ai ahli kvno achukmalit ithvna he keyu puta ka yukahanchi hoke.

8. Yohmi ka Channes, micha Chambles ita tuklo kut Moses a i sanali tok oka, ilvppak ash kia hatak im anukfila okpulot kvnia, na yimmi kut ai vlhpesa keyu hosh anumpa ai ahli ya i sanali mak inlishke.

9. Yohmi kia himak a pilla ma achakalit ia he keyu; yohmi kut Channes micha Chambles ita tuklo atok a chiyuhmit, yummvt nana a kaniohmi kut ai vlhpiesa keyu kut hatak puta ka im otvna chi mak inlishke.

10. Amba nana abahanchi li, kaniohmit ahanta li, nan isht v̄m anukfihinla, nan isht ai ahanta la he tuk vt ai ahli li, nan ilbusha pihisa li kut sa nuktaiyala, nan i hullo li, nuktanvt achunanchi li,

11. Antiak, Ikonium, Lista aiena ka ahanta li ma, kani-mihchit a sa hotopahanli na svlbahasha, nan isht ilbusha kaniohmi ho pihisa li tok a chishno yokvt ish ithana fehnvshke: yohmi kia Chitokaka yokvt yvamma moyuma ka a sa hlakofihinchi tok oke.

12. Ahli mvhli, Chisv̄s Klaist ibai achvfa hosh Chihowa

im ai ahli bunna moyuma kut nan isht a hotopa he pihisa pulla hi oke.

13. Amba hatak ik vlhpeso, micha na yoshubli aieno kvt
nan ai vlhpesa keyu yohmi kut i shahlit mahaya hi oke:
yohmi kut ilap vt yosuhumba hatuk osh inla ya yosuhumba
hi oke.

14. Amba nana ka chishno yvt ish ai ithvna tuk vt, ai
ahlit chi yimmi hatuk okvt ish mahayashke: yohmi kut
kuna ho ish im ai ithvna tuk vt ish ithaiyanushke.

15. Mikmvt yamma ish ithana kut vlla chi tomba kash
inli hosh Holisso Holitopa ak o ish ai ithvna tok; yummak
okvt chi hopoyuksacha hinla ho Chisus Klaist a i yimmit
isht chi okchaya hi oke.

16. Holisso Holitopa moma ka Chihowa hvt nukfohkichi
ho holissohonchi tok oka; nan isht vlbuchi, nan isht ai
atokowa, nan isht kostininch, nan ai vlhpiesa aieno isht
pithvnanchi achukma hoke.

17. Yohmi hatuk o hatak Chihowa immi hvt ai ahli hosh,
nan toksuli achukma puta ka isht ahanta chi kut im vltaha
achukma hinla hoke.

CHAPTA IV.

Ai ahlit nan a kaniohma he vhlpesa kut yvmihcha chi ka i miha, 1;
6 ai illa he nitak vt im atikeli, mihmvt vba achukma ka pisa chi
im ai ahli kut im anoli; 9 chekosi im vla chi ka i miha; 16 nan
i palvmmi vmmona ka nana kut kaniohmit onotuyula tok a anoli.

1. CHIHOWA, micha Chisus Klaist yummak osh ilap
apehlichika ishit haiakakmvt, okchaya, micha illi tok aieno
ka nan im apihisa he itikba ya hikia hosh na chi miha
lishke.

2. Yohmi kut vbanumpa ha isht ish anumpohonlashke,
yohmi kut nitak ai yvmohma he ai vlhpiesa, ai vlhpiesa
keyu aieno ka ish achunanchashke; ai atokolit im anumpo
honlit, im alvmminchit nuktaiyala hosh nana ka ish im aba-
hanchit ish atohnohonchashke.

3. Yohmi ka vbanumpa ai ahli ka haklo ik bunno ka hi a

nitak vt vla hi oke : haksobish yauohlichi i^{sh}i cha, ilap im anukfila okpulo ilaiyuka im antia kak osh nan-abuchi l^awa ka il im itvnahanla hi oke :

4. Mikmvt vbanumpa ai a^hli ka haksobish a isht i filum-mit kwnia cha, anumpa ik ahobo yak o haklo bvnna toba hi oke.

5. Amba chishno yokvto nan okluha ka ahah ! ahnit, nan ilbusha chi onvtuyula kia chi nuktanlv^t, vbanumpa isht anumpuli y^vt n^an isht ai v^tta he tuk a isht ahantv^t, vbanumpa isht ish ahanta hi atuk vt ish ai a^hlichi fehnashke.

6. Yohmi ka svlla chi kvt anumpa hv^t si onvtula ho, a svlla chi kvt atukonofushke.

7. Itibi achukma ka itihimbit atahli lishke, nan isht ai ahanta la hi atuk vt atahli lishke, vbanumpa sai yimmi kvt ai a^hli hosh achunanchi lishke :

8. Yohmi hoka himak a pilla ma nan isht ai vlpiesa ia-chukoli la he vmmiit ituyula, yvmmma nan ai a^hli apesa, Chitokaka y^vt nitak yummak fehna ka vma hi oke : yohmi kvt vno ak bano ho vma he keyu, amba ilap vt vla ka i hullo moyuma aienka ima hi oke.

9. Chekosi chim vltaha pulla cha, ai ahanta li ka ish lashke.

10. Yohmi ka Temas vto himonasi yakni ilvppak inli kak o i hullo hatuk osh, svssvt ia tok : yohmi tuk osh Hlessalonika ya ia tok : Klesens vto Kaleshi yak o ia ma, Titus vto Talmasia yak o ia tok.

11. Luk ak bano hosh si awant anta hoke ; Mak ano ilau-elit ish lashke ; yvmmak okvt vbanumpa isht ai v^tta ya a si apela hinla hoka.

12. Yohmi ma Tikikvs ano Efesvs a ia chi ho tohno li tok.

13. Nowvt aya anchi chito ya Kapvs Tloas anta ka ibbak fohki li tok a ish mintikmut, isht is svn vlashke ; yohmik-mvt holisso moma, micha tvlhko holisso yokak heno isht ish la pullashke.

14. Aleksanta tvli lakna nan isht ai ikbi y^vt nan ik achuk-mo ilaiyuka si onohonchi tok : ilap nana a kaniohmi tok ak o Chitokaka yokvt isht im atobbashke.

15. Yvmmak oka ahah ! ish im ahni mak inlashke ; yvmmak okvt pim anumpa moyuma ka i sanali fehna hatuk oka.

16. Ummona isht il anumpuli li kuno hatak achvfa kia si awant hikia tok keyu ; amba hatak moma kvt svssvt ia tok ; yvmma yvmohmi tok vt isht ik onvtuyulo hok bano ai ahnit, Chihowa ya im ilbvsha lishke.

17. Yohmi kia Chitokaka yvt si awant hikia tok ; micha sa hlampkohonchi na vbanumpa isht anumpohonli li chatuk vt ai ahli fehnvt vno ak o isht ai otvni ho, Chentail moyuma kvt haiyaklo tok : yohmi ma koi chito itakha ya sa koh-chi tok.

18. Yohmi ka Chitokaka yvt nana a kaniohmi ik achukmo moyuma ka a sa hlakfihinchi cha, sai okchalinchit ilap vba apehlichika ya isht sai ona hi oke : yvmma isht a holitopa yokvt immit biliashke. Amen.

19. Pliska, micha Akuila, micha Onesifolvs in chuka chvfa aiokpvchí.

20. Elastvs vto Kolinhla yak o anta tok ; amba Tlofimvs vto abeka hosh Miletum ak o itonla ho issvt minti li tok.

21. Chim vlhtaha pulla cha, ik hvsttulo kijsha ho ish lashke. Eubulvs vt pit chi aiokpvchishke, micha Putens, Linus, Klautia, micha itibapishi moyuma kvt pit chi aiokpuchi mak inlishke.

22. Chitokaka Chisvs Klaist vt chimi shilombish a ibafoyukashke. Isht i kana yvt chi anukfoyukashke. Amen.

HOLISSO PAI vt

TITVS A

I HOLISSOCHI TOK.

CHAPTA I.

Titus a pit aiokpuchi, mihmvt nana kaniohmi h_o Kleti a anta he im ahni tuk vt anoli, 1; 6 vbanumpa isht vtta yvt kaniohmit nan im ai vhltaiyaha he; 11-nan ik vlhpeso anumpulit nan ithvnanchi itakha yvt issa he isht anumpuli.

1. **P**AL, Chihowa in tishu, micha Chisvs Klaist im apostel okvt, vbanumpa h_a anohonli na okchayvt bilia he Chihowa hvt im ahni tok vhleha hvt yimmi cha, anumpa ai ahl_i ka achukmali fehnvt ithvnvt, Chihowa h_a isht a holitoba hi atok;

2. Yohmi cha ai okchayvt bilia pisa he ai ahna hi atok, yvmmak oka Chihowa holaba he keyu yvt, nana puta kvt ik tobo pilla kash inli h_o, im ihisa tok;

3. Yohmi tok osh ont ai vlhpiesa ma nan im ihisa tok vt vbanumpa isht anumpohonli h_o isht otvnihinchi; yvmmma vno ak osh isht anumpohonli la he um vlhpisa kvt, Chihowa pi Okchalinchi nan apihisa tok mak o yvmohmishke.

4. Yohmi kvt nan isht a pi yimmi pulla kak o svso, Titus a, pit chi aiokpuchi lishke: Nan isht i kana, i nukhaklo, micha isht it i nanaiya aieno kvt Piki Chihowa, micha pi Okchalinchi Chitokaka Chisvs Klaist ita tuklo ka a mihinti kvt chi anukfoyukashke.

5. Kleti a ish anta he chim ai ahni li kvt ilvppak atok ; nana kvt ik vltahо puta tuk a achukmalit isht ish ahanta kvt, chim apesa li hatuk oka, vbanumpa isht vtta ya tumaha puta ka ish ai atokohonlashke.

6. Kanimka anumpa ik achukmo kvt onvtonla he keyu, ohoyo achvfa i hatak, im vlla mvt vbanumpa yimmi nan isht yopomo anumpa kia onvtonla he keyu, micha ilapunla keyu hok mak o ish atokolashke.

7. Yohmi ka bishop vt Chihowa nan im apesuchi yatuk osh, anumpa ik achukmo kia onvtula he keyu ho pullashke : ilap ai ahni keyu, nokowa shahli keyu, oka homi ishko shahli keyu, na-fahama keyu, ai vlpiesa keyu isht a hofahya he nan isht ahayuchi bunna keyu ;

8. Amba hatak ik ithano i hullo, hatak achukma puta ka i hullo, kostini, ai vlpiesa, Chihowa holitobli, ile oktampli ;

9. Mikmvt anumpa ai ahli im vlbahanchi kash o kvllot halvlli hosh, nan isht vlbuchi ai ahli ka isht im abahanchit, vbanumpa i sanali vhleha ha nan i mihvt im alvmminchimak inlashke.

10. Yohmi ka ilapunla, nan ik ahobo isht anumpuli, micha na haksichi yvt laua fehna hosh ai asha hoka, mikmvt hakshup tvpa vhleha hokak heto laua hoke :

11. Yvmma itih hvt vlkuma pullashke, yvmmak osh chuka chvfa moma ka ai ahli ka i filvmmihinchi kvt, ai vlpiesa keyu isht a hofahya he nan isht ahayuchi bunna kak osh, yohma hi atuk keyu kia nana ka abahanchishke.

12. Ilap ai achvfa, ilap i hopaii atuk ak inli hosh na miha kvt, Kletian vhleha hvt holabi kak bano chatuk, nampoa okpulo, intakobi, isikopa aieno hoke, achi tok.

13. Anumpa atokowa ilvpput ai ahli hoke ; yohmi hoka vbanumpa yimmi kvt ai ahla chi mak o, hotopalit ish im alvmminchashke :

14. Yohmikmvt Chu im anumpa ik ahobo, micha anumpa ai ahli ka i filvmmi hatak nan apihisa aieno ka chik im antio kashke.

15. Yohmi ka kashofa hokvno nan okluha kvt i kashofa hoke ; amba ik kashofo, na yimma he keyu hokvno nana kia

ik i kashofo hoke ; amba nan ahni, micha isht il akostininch
aiena kvt litehvt kvnia hoke.

16. Yohmi kvt Chihowa ha ithana, miha kvt il otvninchi
ak inli kia, nana a kaniohmi puta kvt isht ik holitoblo, na
yimma he keyu, mikmvt nan toksuli achukma puta ka ik ai
ahlo hoka i yuwala he vlhpesa hoke.

C H A P T A II.

Nana ho isht anumpulit abahancha hi a, mikmvt kaniohmit ai vlhpies-
vt aya hi a Titus a im apesa, 1 ; 9 yuka, micha hatak moma kvt
nanakaniohma he vlhpesa ka anoli.

1. AMBA chishno yokuto nan okluha kvt nan isht vlbv-
chi achukma ka isht ai ahli kak o isht ish anumpohon-
lashke ;

2. Yohmi kvt hatak asvnochti puta kvt ahah ! ahni, yo-
punla iksho hosh im anukfila weki achukma, kostini, vba-
numpa yimmi, it i hullo, nuktanlv tachunanchi aienan kvt ai
ahlashke :

3. Mikma ohoyo asvnochti puta kvt vbanumpuli yokut ai
yvmohmi vlhpiesa kak o yvmohmi mak inlashke ; inla aho-
lvbechi keyu, oka homi yoka i yuhuka keyu, nana hochuk-
ma ka abahanchashke :

4. Yohmi kvt Chihowa im anumpa hvt ik kvllaksho ka
chi ka, ohoyo himita puta kvt ile oktampli, i hatak i hullo,
im vlla ya i hullo aienan ;

5. Mikmvt kostini, haui anukfila iksho, ilap in chuka an-
tvt, nan isht ahanta, hochukma, ilap i hatak im antia achuk-
ma aienan chi ka im abahanchashke.

6. Hatak himita puta mvt ile oktampla chi ka nan ish i
mihija mak inlashke.

7. Nan okluha ish a kaniohmi kvt nan toksuli achukma
puta isht ai ithuna yo ish il otvnihinchashke : nan ish aba-
hanchi kvt ai ahli kak bano, yopunla keyu hosh anukfila
weki achukma hosh ish im abahanchashke ;

8. Yohmi kvt anumpa achukma isht ai i sanala he iksho

ho ish abahanchashke ; yohmi na kvna hosh ch̄i sanali hatuk mvt, nan ik achukmo nana kia isht chi anumpula he iksho kvt hofahyashke.

9. Yuka puta kvt ilap i na-hullo yoka im antia, micha nan okluha ka isht ai yukpali, a sanalit ik anumpulo ka he ;

10. Micha ik hukopo, amba nan okluha ka ai ahli achukma he ; ymohmi cha Chihowa pi Okchalinchi im anumpa ha nan okluha ka isht a holitobla ch̄i ka ish i mihihashke.

11. Yohmi ka Chihowa isht i kana yak osh ai okchaya ishi kvt hatak puta ka im otvni tok oka,

12. Yummak osh pim abahanchi kvt, Chihowa isht ik holitobla puta, yakni ilvppak inli anukfila okpulo ilaiyuka ka isht kil ahanto ka he, amba ile oktampli, hatak bīka it im ai ahli achukma, micha Chihowa ya holitobli hosh himonasi yakni ilvppa il ahanta he ;

13. Mikmvt ai okchayvt isht il ai yukpa bilia, micha Chihowa Chitokaka, pi okchalinchi Chisus Klaist vt isht a holitopa ieshi hosh haiaka hi a pit hohoyot il ahanta he ;

14. Yohmi kvt yummak ash osh ai ashvchika puta ka a pi hlakofihinchi cha, pi kashofi na ilap immi okla holitopa fehna e toba cha, nan toksvli achukma puta ka a yiminta hosh isht il ahanta he mak o, pi vlhtoba hosh illi tok.

15. Ilvppa puta kak o ish anumpulashke, yohmi kvt Klaist im anumpa ai ahli ka nan isht a miht ish im olahambashke. Yohmi na hatak nana kia ik chi shitlemo kashke

CHAPTA III.

Nana ho ithvnancha he, mikmvt nana ho ik ithvnanco ka he aien
ka Titus a im avchi, 1; 12 im vla hi a pit i miha.

1. MIKO, nan apesa, nan vlhtoka vhleha moyuma ka im antia achukma, nan toksvli achukma puta ka isht ahanta ch̄i kvt im vlhtaha he,

2. Hatak nana kia kyllakshichit isht ik anumpulo, it i nokowt ik itachowo, amba anukfila yohbi, hatak moma ka i kana aien he mak o, ithana ch̄i ka ish im anohonlashke.

3. Yohmi ka pishno ak kia tikba hokvno nana kil ithano, Chihowa kil im antio, pi yoshubvt, anukfila okpulo ilaiyuka, micha haknip isht ai yukpa aieno ka i yuhukvt, hotopali bvnna, it i potvnnno aieno isht il ahanta kvt, nan isht ik pi ahobo fehna hosh it i nukkillit il ahanta tok.

4. Yohmi tok kia Chihowa pi okchalinchi yvt hatak isht i kana, micha isht i nukhaklo aieno kvt otaiyani ha yano,

5. Nan ai vlhpiesa isht ahantvt il atahli tok ak o keyu, amba pi nukhaklo kak osh himona toba isht vlchchihifa kvt, Shilombish Holitopa yak o himona isht a toba ho isht a pi okchalinchi tok oke;

6. Yohmi kvt yvmmak ash o Chisus Klaist pi okchalinchi yvt nan atahli tok ak pulla kak o, lauachi fehna hosh pi o fojobli tok :

7. Yohmi na isht i kana yo isht a pi vlhpiesa hosh, ai okchayvt bilia il isha he pim ai vlhpiesa hosh e toba hinla hoke.

8. Anumpa ilvppvt ai ahli yoke, yohmi kvt nana yvmmak ash puta ka kullochi fehna hosh isht ish anumpohonla he chim ai ahni li; yohmi na Chihowa i yimmi tok vleha hvt ahah ! ahnit, nan toksvli achukma puta ka achunanchit isht ahantashke. Nana ilvppa puta kvt achukma, micha hatak a isht im achukma hoke.

9. Nan isht a ponaklo isht ik ahobo, in tikba ai unchululit isht auehinchi isht annoa, nan isht itachowa, micha Chu i nan vlhpisa isht itachowa aieno ka chik ahalao kashke; yvmmvt nan isht ik ahobo, micha nan isht ai achukma hi vt iksho hoka.

10. Hatak kvna hosh vbanumpuli iksa i sanalit it a kvshkoli bvnna hokma, vmmona, micha atuklant ish im olabi ha yoka yvmihi chi kvt imoma hokma, chik aiokpancho kashke.

11. Yvmma chiyuhmi hokvto ai ahlki ka i filvmmmit kvnia hosh, nan ashahanchi kvt, ilap inli kvt ik ai ahlko kvt otvnnchi hoka ish ithaiyanashke.

12. Tikikvs, Atemas, kanimampo ka pit chim pila li hokma, Nikopolis ak o anta li hoka ik kaniohmi kia ish la pulashke : hvstula ya yvmmak o anta la chi hoke.

13. Nan vlhpisa imponna Senas, micha Apollos ita tuklo kvt im vlhtaha achukma cha, nana a bunna kvt ik im iksho ka chi ka ish im atahli cha, auet ish pilashke.

14. Mikma pimmi yokvt nan isht ai vni ik im iksho hosh ik anto ka chi kvt, nana ka ai yvmohma he ai vlhpiesa nan toksvli achukma puta ka achunanchit isht ahanta chi kvt, moyumvt ithvna mak inlashke,

15. Si apiha kvt moyumvt pit chi aiokpvchishke. Na yimmi pia ha pi hullo ka moyuma ish aiokpvchashke. Isht i kana yvt hvsh moyuma ka hvchi anukfoyukashke. Amen.

HOLISSO PAL VT

FILEMON A

I HOLISSOCHI TOK.

Filemon a pit aiokpvchi, mihmvt na yimmi, micha nan isht i hullo aieno kvt anukfoyuka ka haklo mvt, na yukpa; yohmi hosh in tishu Onesimus a nana ka i kashof i cha, atuklanchit i hullot aiok-pvcha ch*ı* ka ahni fehnvt miha.

1. PAL, Chisus Klaist ak atuk pulla mak o yuka, micha il itibapishi Timohli yvt pi holitopa, il itiba toksvli Filemon,

2. Mikmvt pi holitopa Affia, micha tvshka il itilaui Achip-pvs, micha chvch chin chuka asha aieno ka pit hvchi aiok-pvchishke :

3. Nan isht i kana, micha isht it i nanaiya ita tuklo Piki Chihowa, micha Chitokaka Chisus Klaist aieno ka a mihinti kvt hvchi anukfoyukashke.

4. Anumpa ilbvsha anumpohonli likmvt, chithaiyana li kvt,

5. Chitokaka Chisus Klaist oka ish i yimmi, micha vbanumpuli vhleha ha ish i hullo aieno ka hahaklo li kak osh, Chihowa ya yak oke im ai ahni lishke.

6. Na yimmi chi anukfoyuka kvt ai ahli fehnvt otahani na Chisus Klaist isht a holitopa he mak o, nana achukma puta kvt chi anukfoyuka ka ai ithaiyana hokbano, ai ahnit asilhha lishke.

7. Yohmi ka chishno ak atuk pulla mak o vbanumpuli vhleha chukvsh vt yuhukpa hoka, isht ish i hullo ka isht a pi nuktvla, micha isht a pi yukpa chintoshke, itibapishili ma !

8. Yohmi ka Klaist immi sia hokvt nana ka nukwaya iksho kamohmi hosh a chim ai vlhpiesa ka chim apesa la he vlhpiesa kia,

9. Pal sipokni, micha Chisvs Klaist ak atuk pulla mak o yuka ma aieno mih sia hash osh, isht i hullo li pulla atuk mak osh chim asilhha li kak osh vm i shahlishke.

• 10. Yuka hosh anta li mvt, tobachi li tok svso, Onesimvs ak atuk pulla mak o chim asilhha lishke.

11. Yvmmak okvt tikba hokvno nan isht chim ai achukma iksho ki tok kia, himonasi kvno chishno, micha vno il ita tuklo ka isht pim ai achukma fehnvshke.

12. Yvmmak oka falaminchit pila lishke; sa chukvsh chiyuhmi hoka i kanvt ish ishashke.

13. Yvmmak okvt si awant antvt, vbanumpa ak atuk pulla mak o yuka hosh anta li ka, chishno ak a he tuk mak o chi vlhtoba hosh nana kia isht vm ahanta he im ai ahni la he vlhpesa kia;

14. Yohmi kia chishno chim anukfila keyu ka, nana kia yvmoohmi la he ak ai ahno: yohmi na nana achukma ish yvmoohmi kvt ik kaniohmi kia ish yvmohma hi atuk o keyu, amba chishno inli chim anukfila kak ashke.

15. Yohmi ka yvmmak okvt hvshi kanvlli achvfa chohmi itin takla ho chi filvmmi na yvmmak ash ish ishi na bilia hi atuk yoba ká;

16. Yohmi ka yuka keyu, yuka kano i shahli, vno yvt itibapishi li a holitopa ho fehna, amba chishno yokak hen^o a chimmi, micha Chitokaka ibai achvfa hokvt chi holitopa kvt i shahli fehna hinla keyu?

17. Yohmi ka chibai achvfa li ka is si ahni hokmvt, vno ak a he tuk ma chiyuhmichit i kanvt ish ishashke.

18. Nana kia chim okpvni tok, micha aheka kia chin takanli hokma, vno ak o aheka is svm ikbashke.

19. Pal sia hvt vno svbbak ak inli ho isht holissochi li kvt, atobbi la he mak oke; yohmi kia is svm aheka kvt chishno yak fehna kak kia is san takanli ak inli ak chim achoshke.

20. Ahlishke, itibapishi li ma! Chitokaka ish ibai achvfa

hoka nana isht chi a sai yukpashke; Chitokaka ish ibai achufa hokut is sa nuktalalashke.

21. Is sum antia hinla ka chi yimmi li, micha nana achi li ka i shahli ak inli ish yvmihcha chi ka ithana li aienatuk osh, chi holissochi li tuk oke.

22. Yohmi kia ai-vtta la chikma, aieninchit is sum atah-lashke: yohmi kvt anumpa ilbusha ish anumpohonli hatuk mak o chim ona la he ai ahni lishke.

23. Chisus Klaist ak atuk mak o yuka sa bika Epaflas vt pit chi aiokpuchishke.

24. Makus, Alistachus, Temas, Lukas it ibai toksvli li vhleha aienatuk pit chi aiokpuchishke.

25. Pin Chitokaka Chisus Klaist isht i kana yvt chi Shilombish a ibafoyukashke. Amen.

HOLISSO PAL VT

HEBLU OKLA HA

I HOLISSOCHI TOK.

CHAPTA I.

Klaist vt Iki Chihowa ya itilaui kvt annoa, 1: 4 enchil puta i shahli fehna; 14 enchil vhleha hvt nan isht ai vtta ka anoli.

1. CHIHOWA hvt nitak chashpo ilaiyuka, micha a kaniohmi mvt ilaiyuka hosh pin tikba vhleha hopaii vhleha ak o isht ai im anumpohonli kvt,

2. Polaka ilvpput ai ishtaiyopi mak o ilap Ushi yo isht a pim anumpohonli kvt, yvmmak osh nana moma ka iesha he im ai vlpiesa mak o atokoli tok; micha vba yakni, micha yakni ilvppa a moyuma ka yvmmak ash o isht ai ikbi ak inli tok:

3. Yvmmak ash osh Chihowa isht a holitopa shohmalali, micha Chihowa mih fehna yatuk, micha nan okluha ka im anumpa kullo ai ahli kak o isht ieshi hosh ai ashvchika isht a pi kashofa hi a ataiyahli tok osh, Nan okluha imaiya vba chaha moma i shahli ka a binili im isht impak imma ak o binili tok.

4. Nan iesha he im ai vlpiesa hatuk vt ieshi hatuk osh, ilap hohchifo isht a holitopa kak osh enchil vhleha ha i shahli fehna hatuk osh kaniohmit holitopa kvt yvmma i shahli fehna hoke.

5. Nitak nanta kash o enchil vhleha ha achufona kia, Chishno yvt svso chia mak o himak nitak a chi tobachi

lishke ; micha anonti ilap vt, Üno yak o Suso hachi, mik-mvt, vno yvt Iki sia hachi hoke, im achi tok o ?

6. Micha anonti, Tobahpi yash o yakni paknaka ya isht vla mvt, Chihowa im enchil vhleha hvt moyumvt aiokpa-hanchashke, ahanchishke.

7. Mikmvt enchil vhleha hano isht anumpuli kvt ilvppak o achishke, Yummvt im ehchil vhleha yokuno mahli chiyuh-michit, mikmvt in tishu hano luak libbi chiyumichi hoke.

8. Amba Ushi yokuno ilvppak o im achishke, Chihowa ma ! ish ai o binili holitomba kvt hikia bilvt peh biliushke : nan ai vlhpiesa tvbi yak osh ish apehlichika yoka in tvbi yoke :

9. Chishno yokvt nan ai vlhpiesa kak o ish i hullo cha, nan ik vlhpeso yokuno ish i nukkillishke ; yohmi ka Chihowa, chin Chihowa yak osh nan isht ai yukpa bilia ya laua i shahli ho isht chi ahummii kvt, ish ai itilaui tuk a i shahli chikbi tok.

10. Micha Chitokaka chishno yak osh vmmona kash inli ho yakni ilvppa intolahpi ka ish boyuhli tok ; mihmvt nana moma vba shutik ai asha ka, chibbak ak osh ihikbi tok.

11. Yummak okvto ont ai okpulo kvt taha kia, Chishno yokvto ish ahanta he ; mikma yummak okvto moyumvt sipokni kvt na fohka yo chiyuhma hi oke :

12. Mikma anchi yak inli ho chohmichit ish pohla he ; mikma yummak ash ot inlv toba he : yohmi kia Chishno yokvto mih yash inli chia, micha chim afvmmi hokvt ont ataha he iiksho hoke.

13. Yohmi kia nitak nanta kash o enchil vhleha achufona kia, Subbak isht impak-imma ak o ish a binili na chin tvnvph vhleha hoka chiyi ai o hikia yo ikbi li hayashke, im achi tok o ?

14. Yummak ash ot moyuma kvt nan isht ahanta shilombish osh ai okchaya pisa he im ai vlhpiesa vhleha yummak o nan isht im ahanta chi vlhtoka yo keyu ?

CHAPTA II.

Klaist a il im antia he tuk, 1; 9 pi okchalincha chi kut hatak o toba tok oka; 14 yohmi kut nana kut a yakohma he vlpesa tok mak osh hatak o toba tok.

1. YOHMI hoka nana e haiyaklo tuk puta kut ahah! ahni fehna hosh il anukfihinla hetuk, e yvmohmi keyukmvt, nitak kanima ka pi kvnia hinla hoke.

2. Yohmi ka enchil vhleha hvt anumpa anumpohonli tok a ai ahlit kullo hatok okma, micha kvna hosh anumpa yvm-mak ash o kobahaf, micha ik im antio puta ka isht vlhtoba kut isht ai vlhtoba he vlpiesa ho ihishi tok okma:

3. Ai-okchaya chinto yakohmi ka kil anukfihinlokmut, katiohmit pi hlakofa hinla cho? yvmma vmmona ka Chitokaka yak osh isht anumpohonli tok o, anonti yvmma i haponaklo tok puta kut ai ahliche mak osh pim anohonli tok:

4. Chihowa hak kia atokowa ibai anohonli kut, nan isht atokowa, nan isht anukhlakushli, micha nan isht ai ahli ilai-yuka, micha Shilombish Holitopa na hopela aiena ka ilap im anukfihinla hosh isht ai ahliche tok:

5. Yohmi ka yakni talia he isht il anumpuli ka, enchil vhleha hokuno i nutaka apihisa tok keyu hoke.

6. Amba achufa kut kanima ka atokoli hosh ai anumpuli kut, Hatak vt nanta ho yvmmak oka chishno yokut isht chim anukfihinla ho? micha hatak ushi yoka, chishno yokut ish i nohowa ho? ahanchi tok.

7. Yvmmak oka enchil vhleha hokvno lumvt ik lauwo ho ish ikbi tok osh, isht a holitopa chinto ka isht ish iachukolechi, micha nan okluha chibbak vt ihikbi tok a i shahli ho ish ikbi tok:

8. Chishno yokut nan okluha kut iyi nuta aiasha cha, im antia hi a ish apesa tok. Yakohmichit moyuma ka im i nutakuchi ha yokut, nana kia ik im i nutakacho ka achufa kia iksho ki tok. Yohmi kia nan okluha kut ik im i nutako kisha ho himonasi ka e pihisvshke:

9. Yohmi kia Chisvs, yummak okvt enchil vhleha ha lumvt ik lauwo hosh toba tok kia, nan-illi isht ilbvsha ka pihsa kak osh isht a holitopa chinto ka isht iachuka ka e pihsushke; yohmi na Chihowa isht i kana pulla hatuk mak o yummak ash ot hatak moyuma ka vlhtoba hosh illa hi atok.

10. Yummak pulla hosh nan okluha ka ihikbi tok, mih fehna kash inli atuk pulla mak o nan okluha kvt toba tok, yummvt yvnihcha he im ai vlhpiesa hosh ushi vhleha laua ka isht a holitopa ka pehlichit isht ohona kvt, yummak ash isht ai okchaya i kupertvi hvt nan isht ilbusha puta ka pihsa hosh isht ai ahla hi a im apihisa tok oka.

11. Yohmi ka na-kashof, micha nan ai ashvchika i kashofa aieno kvt it ibai achvfa hoke; yakohmi hoka ik hofahyo hosh itibapishi vhleha hochihifo kvt,

12. Itibapishi li vhleha ha chi hohchifo ha otvninchit im anohonli la chi; itibapishi li vhleha ha ai iklvnna hikivt talahowvt chi aiokpahanchi la chi hoke, ahanchishke.

13. Mikmut anonti, Yummak o anukchieto la chi hoke, achishke. Anonti, Uno, micha vlla vhleha ha Chihowa hvt ahama tok oka pisá, achishke.

14. Yohmi hoka vlla vhleha hash osh haknip, issish aieno ka ibai ishi hatuk o, ilap ak kia anonti yummak ash ibai ishi tok ak inli hoke: yohmi na vlhtobvt illi pulla hosh nan-illi ishi, yummvt nan isht ahullo okpulo ak atuk a imaiyachi cha;

15. Yummvt nan-illi i nukshopa kak osh, okchaya takla kvt yuka tobvt kvnia chatuk a mominchit hlakoficha hi atok.

16. Yohmi ka ahlishke, yummvt enchil vhleha ha halanli tok keyu; amba Eblaham isht ai unchululi hak o halanli tok.

17. Yumohmi ka nan okluha ka ai yumohma he ai vlhpiesa hosh itibapishi vhleha ak inli ho chiyuhmit toba hi atok; yumohmi hosh i kana fehnvt na-holitompa isht vta chinto ai ahli fehna hosh Chihowa nan isht im ahanta kvt, okla puta nan ai ashahanchi tok isht vlhtohomba he ikbi mak osh isht ahanta hi atok.

18. Yohmi ka ilap ak kia imomaka pisa kvt, na-palvmmi pihiſa hatuk okvt, kvna hosh imomaka pisa hokvno apelvcha hi vt ithana hoke.

CHAPTA III.

Klaist vt holitopa kvt Moses a i shahli, 1 : 7 yohmi hoka kil i yim-mokmvt, Islael chukvsh kullo vt na palvmmi isht onvtula he im vlpisa tok a i shahlit pi onvtula he bano hoke.

1. YUMOHMI hoka itibapishi holitopa vhleha vba nan isht ilaiyukpa et annohowa ka ibai iſhi hvchia ma ! Apostel, micha Na-holitompa isht vta chinto, Chisvs Klaist a il ithai-yana, il il apihiſa tok a hvsh anukfihinlashke.

2. Moses vt ilap in chuka ai achufa moyuma ka im ai ahli bano tok a, chiyuhmit yummak ash osh ilap a atokoli tok a im ai ahli bano tok.

3. Yohmi ka hatak ilvppt isht a holitopa i shahli ho isht a holitopa kvt Moses a i shahli kvt, chuka yoka kvna hosh ikbi tok ak osh holitopa kvt, chuka yash i shahli chatuk a chiyuhmi hoke.

4. Yohmi ka chuka toba moyuma ka ikbi vt aſha bano chatuk ; amba nana moma ihikbi tok vt Chihowa ak oke.

5. Yohmi ka tishu ho chiyuhmit Moses vt ilap in chuka ai achufa moyuma ka im ai ahli bano kvt, nana isht anuhumpa he mak o atokolit anohonli tok :

6. Amba Klaist vto Ushi yosh in chuka achufa pehliechi ho chiyuhmit ai ahli tok ; yohmi ka ai okchaya ya na-yuk-put e hohoyo hosh Chisvs Klaist il anukchieto kvt, achunanchi ai ahli hosh ai vhli ka il ona hokmvt, yummak ash in chuka pia hoke.

7. Yumohmi hoka Shilombish Holitopa yvt ahanchi kvt, Himak nitak oka im anumpa hoka hvsh haiyaklo hokmvt,

8. Hvchi chukvsh oka hvch ik kullocho kashke : yohmi kvt isht a nokowvchi, yumohmit nana ka imomaka pisachi hosh yakni haiaka itvnowa tok a hvch ik chiyuhmicho kashke.

9. Nitak yummak ash hvch iki vt ik sai yimmo kvt imo-

maka sa pisuchi tok; micha nana a kaniohmi li puta ka pihisa na afvmmi pokoli ushta tok.

10. Yvmohmi hoka okla yvmmak ash isht vm ahchibut kvnia tok: mihmvt, Yvmmvt chukvsh anukaka ya isht ashvchi bilia, micha vm anumpa vlpisa puta ka ik ithanoshke, achi li tok.

11. Yohmi kvt sa nukhobela hosh anumpa kullo il onochit anumpohonli li hoka, Um afoha yoka chukowa himma keyu mak oke.

12. Itibapishi li vhleha hvsh ahah! hvsh ai ahnashke, chukvsh okpulo, nan ik yimmo Chihowa okehaya ya isht hvsh ai i filvmma hinla kvt, hvsh kanima ka ik hvchi anukfoyuko kashke.

13. Amba himak nitak achi itin takla kak o nitak puta ka nan it i mihvut hvsh iti hlampkohonchi pulla ho, hvsh kanima kia nan ai ashvchi isht a haksit ik hvchi kullo kashke.

14. Yohmi ka na pi yimmi vmmona tok vt ai ahli biekvt mahayvt ont ai vhli ka il ona hokmvt, Chisus oka ibai achvfa vhleha e toba hoke.

15. Himak nitak achi itin takla kak o, Himak nitak oka im anumpa hoka hvsh haiyaklo hokmvt, isht a nokowvchi yvmohmi tok a, chiyuhmit hvchi chukvsh oka hvch ik kullocho kashke.

16. Yohmi ka kaniohmi kvt haklo hayvt nokowvchi tok: yohmi kia Moses vt pehlichit Echip a kohchi tok a moma hosh yohmi tok keyu hoke.

17. Amba afvmmi pokoli ushta ka kuta hak o isht im ahchibut kvnia tok o? nan ashvchi tuk osh haknip illi vt yakni haiaka ya ai itohonla ak atok keyu cho?

18. Yohmi ka kuta hak osh im afoha yoka chukowa himma keyu ho anumpa kullo il onochit anumpohonli tok o? amba ik i yimmo ke tuk vhleha ak atok keyu cho?

19. Yohmi ka ik i yimmo pulla kak osh chukowa he keyu ki tok a echo pisushke.

CHAPTA IV.

*V*banumpuli a-foha he v̄lhtaha tok a na yimmi pulla hokmak osh isha he, 1: 12 Chihowa im anumpa hvt aiahli fehna; 14 Na holitompa chinto isht pim v̄ta ȳt Klaist Chisvs Chihowa Ushi, 16 nan isht ai i kana ai o binili holitompa nukwaya keyu hosh il ohonashke.

1. **Y**UMOHMI hoka im afoha e chukowa he pim issa tok a takali moma hoka, h̄sh kanima kvt h̄ch ik ono ahoba hinla ka, ahah! il ai ahnashke.

2. Isht ai yukpa anumpa yash ot pishno ak kia pim annohowa kvt, yummvt im annohowa tok ash o chiyuhmi tok: yohmi kia anumpa im annohowa kvt nan isht im achukma tok keyu kvt, anumpa hahaklo yummak okvt na yimmi ya ibafoki keyu ak atok.

3. Yohmi ka, Si anukhobel a hosh anumpa kvlo il onochit anumpohonli li hoka, yummak okvt vm afoha yoka chukowa he keyu, ilap vt achi tok: yohmi ak inli kia pishno il i yimmi hatuk okvto yakni toba vmmona pilla kash nan toksvli puta kash ot ont v̄ltaiyaha tok im afoha yoka e chukowa hoke.

4. Ilap vt yakohmichit nitak isht untuklo ka ai atokowa kanima ka isht anumpuli tok: yohmi kvt Chihowa hokvt ilap a toksvli puta hoka ataiyahli kak osh nitak isht untuklo hokvno foha tok.

5. Mihmvt ilvppak o, Um afoha yoka chukowa he keyu, anonti achi tok.

6. Yakohmi hoka afoha yoka kaniohmi kvt chukowa chi pulla ka takanli moma hoka, yohmi ka isht ai yukpa anumpa im annohowa vmmona tok v̄leha hokvto afoha yoka ik chukowo kvt na-yimma he keyu kak atok.

7. Anonti Lewi ak o isht ai anumpulit nitak kaniohmi ho atokolit, Himak nitak a ahanchi, nitak yummak atok a hopakit taiyaha, achi hoka, Himak nitak a vm anumpa h̄sh haiyaklo hokmv̄t, huchi chukvsh oka h̄ch ik kvlocho kashke.

8. Yohmi ka Choshua vt yummak ash afoha ya ima ha-

tok okma, i himmak okvno nitak inla ho isht anumpula hi atok keyu hoke.

9. Yv̄mohmi hoka Chihowa im okla v̄leha hokvto afoha yvt in takanli hoke.

10. Yohmi ka kvna hosh Chihowa im afoha yoka ont chukowa hokvto, ilap inli toksvli kash issa kvt, Chihowa hvt ilap toksvli tuk vt issa ak inli tok ash inli ho chiyuhmi hoke.

11. Yohmi hoka afoha yv̄mma e chukowa ch̄j kvt il achunanchi fehnashke; ik yimmo hosh itohonla tok ash o chiyubmit hatak kvna kia ik itulo kashke.

12. Yohmi ka Chihowa im anumpa hvt okchaya, micha isht ai ahli fehna, micha halupa kvt bvshpo falaia itahlakla halupa yak kia i shahli hosh hlopullichit bvshli kvt, ilhfipak, micha shilombish ita tuklo ka it i filvmmichi, anonti itachakli, micha lupi ita tuklo ka it i filvmmichi, micha chukvsh anukaka nan isht ahni, micha nan isht anukfilli puta ka akostininchit nan im apesa yoke.

13. Nana toba moma kvt achufa kia itikba ya ik im ai otano kvt iiksho; amba nana ka il it i kaniohma ch̄j yv̄mma i holhponeyo hokvno nan okluha kvt ik ompoholmo i bieka hoke.

14. Na-holitompa isht v̄tta chinto pim anta, Chihowa Ushi, Chisus okvt v̄ba yakni oka ona tok oka, nana ka il il apihisa tok vt il ai ahlashke.

15. Yohmi ka na holitompa isht v̄tta chinto nan isht a pilbvsha ka ik piba nukhaklo ka hi osh pim anta keyu; amba nana a kaniohmi puta ka imomaka pisa kvt, pishno ak inli ho chiyuhmi kia ai ashvchi yak osh ik im iksho ki tok.

16. Nan isht i nukhaklo il ishi cha, ont ai v̄lhpiesa pi apela ch̄j ka isht i kana il ahayucha ch̄j kvt, isht ai i kana ai o binili holitompa nukwaya keyu hosh il onashke.

CHAPTA V.

Chihowa yvt Klaist a holitobli; mikmv̄t na holitompa isht v̄tta i shahli yo atokoli, 1; 14 Heblu okla hvt nan ai ahli ilvppa ithvna he tuk vt a haksichi ka Pal vt nan i miha.

1. YOHMI ka na holitompa isht vtta chinto puta hatak a a kohchit ihishi ka, hatak ak atuk pulla mak o nana Chihowa immi ha isht ahanta chi kvt, vlhtoka tuk osh nan ai ashvchi isht vlhtoba he puta, micha na hvlbina aienka isht im ona hi atok :

2. Ilap ak kia nan isht ai ibetvbla hi vt isht apakfoyupa ak inli hokvt, nan ik ithano, micha yoshuba vhleha aienka yummvt i nukhakla he bano hoke.

3. Mikmvt nana kvt ai yakohmi hokvt, ilap nan ai ashvchi isht vlhtoba he yak kia, aieninchit okla nan ai ashvchi isht vlhtoba hi a isht im ona hi atok oke.

4. Hatak nana kia ilap ak inli kvt nan isht a holitopa ilvppa isha he keyu, amba Alon atok a chohmichit Chihowa ak osh atokoli hok mak oke :

5. Yohmi ka Klaist ak kia ilap ak inli hosh na holitompa isht vtta chinto toba chi kvt isht ile holitoblich tok keyu : amba, Chishno vt Suso chia ho himak nitak oka chi tobachi lishke ; im achi kak atok oke.

6. Anonti, Chishno yokvt Melkisetek atok a chiyuhmit na holitompa isht vtta hosh ish ahanta na bilia hi oke, inla kania ka ai achi ak inli tok.

7. Yummak ash ot hatak haknip ieshit yakni paknaka iluppa ahanta mvt, nishkin okchi mihintit, chitoli fehna hosh pa~~hay~~vt, nan-illi im a hlakoficha hinla ka im ilvusha fehnvt anumpohonli tok : yohmi ka Chihowa ha holitobli hatuk mak o, Chihowa hvt i haponaklo tok :

8. Yummak ash ot Ushi atuk ak inli kia, na palummi pihisakak osh im antia kia isht ithvna tok :

9. Mihmvt nana kvt ai ahlit im vlhtaiyaha kak osh, im antia puta hokvno ai okchayvt bilia ya im atahli yoke :

10. Yohmi kvt Melkisetek atok a chiyuhmit na holitompa isht vtta chinto hosh Chihowa hak o im ai vlhtoka tok.

11. Melkisetek ash isht il anumpula chi kvt pin laua : yohmi kia nana ka akostininch huchi svlaha hoka, tosholi ka kyllo hoke.

12. Yohmi ka yummak atok a hopakit taiyaha hoka nan im abvchi yosh hvsh ahanta he vlhpiesa kia, kanima kvt

Chihowa im anumpa ai isht ia vmmona ka anonti hvchim abvcha hi a vlhpesa pulla hoke : yohmi kvt ilhpak kvlo vpa chatuk okvno hvch ik chohmo, amba pishukchi ishko chatuk ak o chiyuhmi ho hvsh tobvshke.

13. Yohmi ka pishukchi ishko puta hokvto nan isht ai vlhpiesa anumpa hoka akostininch a hi a ik ona, vllosi yokvt.

14. Amba ilhpak kvlo vt asvnochi vhleha hak o im ai vlhpiesa hoke ; yvmmak ash ot nana ka ai yvmohomi kak osh im anukfila isht toksahanli hosh nan achukma, ik achukmo ita tuklo ka isht akostininch a hoke.

C H A P T A VI.

Nan ai yimmika ya ai i filvmmiit aka ik kaho ka chi, 1: 11 amba kvllot hiela chi: 12 nana ka achunanchit nuktaiyalvt Chihowa ya aikpvcha chi ka i miha : 13 Chihowa im anumpa hvt ahli hoka.

1. **Y U M O H M I** hoka Klaist ai isht vlbuchi vmmona hokvno e boyuhli cha, ai ahli fehnvt itikba il ia hosh nan toksvli isht ai illi ai i filvmmiit ile kostininch a, micha Chihowa isht i yimmi ;

2. Baptismo nan isht vlbuchi, micha ibbak onohonchi, micha illi tok vt falamvt tani, micha hatak puta nan im vlhpisut bilia he aien a ka intolahpi ka atuklanchit keho bohlo kashke.

3. Micha Chihowa ak osh vlhpesa ahni hokma, ilvppa e yvmohma he mak oke.

4. Yohmi ka kvna hosh himonna ha im vlbuchit, na-hvlnina vba yakni minti ka akostininch a, micha Shilombish Holitopa ya ibai ishi tok okvto,

5. Mikmvt Chihowa im anumpa achukma, micha vbanumpa nitak nan isht ai ahla he aien a ka anukfoyuka ha yak okvto,

6. Yvmmak ash osh vbanumpa ha i filvmmi hokv kaniommit atuklant himonvt toba cha, ai isht ile kostininch a hinla kvt iksho kamohmi hoke ; yohmi kvt ilap ash inli hosh Chihowa Ushi ya himonvchit ititaiyukvna ya ai vbi kvt, otvnninchit hofahli hokv.

7. Yohmi ka yakni ak osh uhumba aiyuka ka ai ihishko

hosh yakni a toksvli yummak atuk vt ai isha he vlhpiesa ho offohonchi cha, nan isht ai yukpa Chihowa a mihinti ka ishi hoke :

8. Amba bafvlli halupa ilaiyuka offohonchi hokvno nan ik ahobo hatuk o, isht ai okpuloka he anumpa hvt onvtuyula hosi ; yvmmvt ont im ishtaiyopi hokvto lua he mak oke.

9. Yakohmichit il anumpuli hoh kia, amba holitopa vhleha ma ! hvchishno yokvno nana achukma i shahli, micha ai okchaya nana kvt ai ahalaia kak o a hvchi ymohmi ka, pi yimmishke.

10. Yohmi ka Chihowa hvt ik ai vlhpeso hokmá, nanta tuk osh nan toksvlit holitoblit ilap hohchifo imma ka nan isht hvsh im ahanta tuk a imi haksa he keyu, vbanumpuli vhleha ha nan isht hvsh im ahanta tuk osh, isht hvsh ahanta kvt imoma hoka.

11. Mikmv̄t ai okchaya ishi la he ai ahn̄it, ai ahlit hvchi yimmi hosh ont ai vhli ka hvsh ona chi kvt, nana hvsh a kaniohmi kash ot moyuma kvt hvsh achunancha he e hvchim ai ahnishke.

12. Yohmi hosh ik hvch intakobo kashke ; amba kaniohmi kvt na yimmi kak osh nana ka nuktaiyalut hohoyo hosh, nana im ihisa tok ash ont ieshi vlhpesa tok ak o hvsh hoba-chashke.

13. Yohmi ka Chihowa hvt Eblaham a nana ka im ihisa hokv̄t ilap inli ho ai isht anumpa kvlo il onochi kvt, i shahli kanima ai isht anumpa kvlo il onocha he keyu kak atok,

14. Ahlishke yukpahanlit chi yukpali la he, mikmv̄t lauahanchit chi lauachi la hi oke, ahanchi tok.

15. Yakohmit nana ka nuktaiyalut hohoyo hatuk osh, nana ka im ihisa tok ash ishi tok.

16. Yohmi ka hatak okv̄to i shahli ho ai isht anumpa kvlo il onohonchi chatuk vt ai ahlit ; micha nan isht ai ahlitchi anumpa kvlo il onochi kak osh itachowa puta hokvno ont im ai vhliche chatuk bano hoke.

17. Ymohmi ka Chihowa hokv̄t nana ka im ihisa tok a ont isha he im ai vlhpiesa vhleha hoka ilap nana im anukfihinla tok vt kaniohmit ai inla himma keyu ka, achukmalit i

shahlichit im otvninchi bvnna hosh, anumpa kvllo yo il onochit isht ai ahliche tok :

18. Yohmi ka nana kaniohmit ai inli himma keyu tuklo yummak oka Chihowa hokut isht a holaba himma keyu hoka, vba isht il aiyukpa pim ihisa tok ash il isha chi hosh a hlakofi yo il o chahafa kvt, nan isht a nuktaiyala chinto il iesha he ak atok.

19. Nana pim ihisa tok ash il isha he il ai ahni kak osh, isht a kvllo ai ahli kanvlla he keyu yo shilombish vt im itilaui, micha yummak osh, aholitopa fehna isht omphoholmo anukaka yoka chukowa mak oke.

20. Yummak oka pin tikba-heka, Chisvs vt chukowvt, Melkisetek atok a chiyuhmit na holitompa isht vtta chinto bilia toba tok oke.

CHAPTA VII.

Melkisetek atok a chohmit Klaist Chisvs vt nan isht vtta holitompa, 1,
11 Alon na holitompa isht vtta yatok a i shahli fehna.

1. YOHMI ka Melkisetek ilvppvt Salem i miko, Chihowa holitopa fehna i na holitompa isht vtta yosh, Eblaham vt miko vhleha ont vbit falamut aya ma yummak ash ot ont afama mvvt, yukpali tok.

2. Yummak ash o Eblaham vt moyuma ka a kashapa ont isht pokoli ka ima mak inli tok : vmonna hoka toshowakmvvt, Nan ai vlpiesa i miko, mikmvvt anonti yummva achakaya kvt Salem i miko, yummvt nanaiya i miko achi hoke,

3. Iki iksho, ishki iksho, isht ai unchululi iksho, nitak ai isht ia vmonna tok vt iksho, micha im ilhfipak vt ont ai vhli tok vt iksho, amba Chihowa Ushi yak o chiyuhmi hosh na holitompa isht vtta yosh ahantvt bilia hoke.

4. Yohmi ka hatak ilvppvt a chinto kaniohmi ho, iki chinto Eblaham ash ot nana ka in tvnvp a im ai ishi tok ash achukma i shahli kak o a kashapa ont isht pokoli ka ima tok a, hvsh anukfillashke.

5. Yohmi ka Lefai ushi vhleha atuk vt na-holitompa isht

vtta vlhtoka kvt, okla yummvt itibapishi; micha Eblaham ak o isht atiaka yak inli kia, vba nan-vlhpisa in tonla hatuk osh, a kashapa ont isht pokoli ka im ai ishi beka mvhlishke:

6. Amba yummak ash o ilap okvto ai isht unchululi ho keyu kia, a kashapa ont isht pokoli ka Eblaham a im ai ishi mvt, nana im ihisa tok ash o yukpali tok.

7. Mikmvt i shahli hak osh ik lauwoka yukpali hoka ik ai ahlo, acha hi yvt ikshoshke.

8. Mikmvt ilvppak okvno hatak vt illa he kia a kashapa ont isht pokoli ka ishi; amba yummak okvno yummvt ishi kvt okchayvt ahanta ka, nana kvt isht ai atokowa hoke.

9. Yohmi ka Lefai yokvt a kashapa ont isht pokoli ka ihishi kia, Eblaham ak o isht ai unchululi hokvt, a kashapa ont isht pokoli ka Eblaham a ibai atobbi ak inli tok, yummma chiyuhmi achi la hinla ak inli hoke.

10. Yohmi ka Melkisetek vt yummak ash o afama ma, yummvt iki ikfeksa anyukaka yak o foka moma hatok.

11. Yohmi ka Lefai na-holitompa isht ai vtta yokvt ai ahli bieka hatok okma, yummak o okla hvt i nuta ai asha hosh vba nan vlhpisa puta ka ihishi hatok oka, Melkisetek atok a chiyuhmit na holitompa isht vtta inla hokvt na katihmi ho vlhtoka he vlhpesa moma ho? micha Alon na holitompa isht ai vtta yatok a chiyuhma he keyu ho?

12. Yohmi ka na holitompa isht ai vtta inla hosh vlhtoka hatuk o, anonti nan vlhpisa yash ot inlv^t toba he vlhpiesa hoke.

13. Yohmi ka yummma nana puta ilvpput isht anuhumpa hokvto, oklushi inla ho ibai achvfa hatok; yummak okvto hatak achvfa kia alta ya nan isht ai vtta beka tok keyu hoke.

14. Yohmi ka Chuta yak o pin Chitokaka yvt a tobvt kohcha tok vt ai atokowa; oklushi yummak oka na holitompa isht ai vtta imma nana kia Moses vt isht anumpuli tok keyu hoke.

15. Mikmvt nana ai atokowa hokvt i shaiyahli fehna imoma ka, Melkisetek atok a hoyulba hosh na holitompa isht vtta inla kvt hikia hoke,

16. Yummak okvto haknip nan im vlhpisa imma ho isht

vlhtoka tok keyu, amba okchayvt bilia im ai vlhpiesa hatuk osh vlhtoka tok oke.

17. Yohmi ka yummvt atokolit anoli hosh, Chishno yokvt na-holitompa isht vtta Melkisetek atok a chiyuhmit bilia chia hoke, ahanchi tok.

18. Yohmi ka nan vlhpisa yummak ash osh nana ka isht ai achukma, ai ahli ka ik ono hatuk osh akshu tok vt ai ahlishke.

19. Nan-vlhpisa yummak ash okvto nana kia ai ahliche tok keyu hoke: yummak atuk mak o nana achukma i shahli ho pim ataiyahli hosh vla hatok pulla kak o, Chihowa i bili-kasi ka il ona hoke.

20. Mihma yummak ash ot anumpa kvlo il onoyuchi keyu iksho ho yummak ash ot na holitompa isht vtta toba tok oka:

21. Yohmi ka anumpa kvlo il onochi kia iksho ho yummvt na holitompa isht vtta vhleha tohomba tok oka: amba ilvppak okvno anumpa kvlo il onochi hosh nana im ahanchi kvt, Chitokaka yak osh anumpa kvlo il onochi kvt, inlv im anukfila he keyu mak osh, Chishno yokvt na holitompa isht vtta Melkisetek atok a chiyuhmit bilia chia hoke, ahanchi tok:

22. Yakohmi hosh Chisus okvt nan it im vlhpisa achuk-ma i shahli yoka ai ahliche toba tok oke.

23. Yohmi ka yummak ash okvto na holitompa isht vtta yvt lawa mvhli tok: yohmi kvt yummak okvto nan illi ak-atuk pulla mak o ahantvt bilia beka tok keyu hoke.

24. Amba hatak ilvppak okvto okchayvt bilia hatuk osh na holitompa isht ai vtta inla himma keyu ho ieshi hoke.

25. Yumohmi hokvt anonti ilap ak o anukchieto hosh Chihowa hoka im ohona hokvno mominchit okchalincha he banu hosh, yummak oka apelvchit isht anumpohonli hosh ahantvt bilia hoka.

26. Yohmi ka na holitompa isht vtta chinto, yummak okvt ai ashvchika ik im iksho, nan ik okpano, na liteha iksho, nan ashvchi vhleha ha ai i filvmmi, micha chaha kvt vba yakni yak kia i shahli, yummak chiyuhmi hosh pim ahanta he ai vlhpiesa hatok:

27. Yohmi ka na holitompa isht vtta pehlichi chinto vhle-ha hokvto nitak moma ka ilap nñan ai ashvchi isht vlhtoba ka tikba pit im issa ha yosh, okla nan ai ashvchi isht vlhtoba ka pit im issa beka tok o, yummak okvto chiyuhma he im vlhpesa keyu, nan ai ashvchi isht vlhtoba il im issa mak osh ilvppak oka himonna ma yvmohmi tok okvt.

28. Yohmi ka nan vlhpisa yummak ash ot hatak ibetvbla he im vlhtayak kia na holitompa isht vtta chinto atokohonli; amba anumpa kvollo isht ai ahli tok ash ot vba nan vlhpisa yummak ash ot toba ha yak o, Ushi ya atokoli ho, yummvt na holitompa isht vtta ai ahlit bilia he mak oke.

CHAPTA VIII.

Klaist ak osh na holitompa isht vtta i shahli bilia, yohmi ka Klaist vt vla ha yokvno Alon isht ai unchululi kvt na holitompa isht vtta vlhtoka he keyu mak oke, 1 : 7 yummak inli chohmit Chihowa yvt nan vlhpisa himona ikbi ha yokvno Isael vt Echip a kohchvt minti ma, nan vlhpisa toba tok vt kashofvt taha hoke.

1. NANA isht il anumpohonli kash puta ka ilvppak osh moma i shahlishke : Na holitompa isht vtta chinto yakohmi hosh vba yakni Chihowa Chitokaka yvt a binili kak o isht impak imma yo pi binili hosh ;

2. Vba aholitopa, micha vltipo ai ahli fehna ka hatak ak atok keyu, amba Chitokaka yak osh ikbi tok, yummak o nan isht ai ahanta hoke.

3. Yohmi ka na holitompa isht vtta chinto puta kvt na hvlbina, micha nan ai ashvchi isht vlhtoba puta aieno pit im issa chi hosh vlhtoka chatuk oka ; hatak ilvppak kia anonti nana im ai asha tuk osh pit im issa he im vlhpiesa hoke.

4. Yohmi kvt yakni ilvppak o ahanta hokmvt, na holitompa isht vtta ya hi o keyu, vba nan vlhpisa yak atuk pulla mak o na hvlbina pit im issa hosh na holitompa isht vtta vhleha hvt ai asha hoka :

5. Yummak okvt nan isht ahanta kvt vba yakni nana ai asha kak o isht vlhpisa, micha isht a hoyulba mak o isht ai yumihchi hoke : yohmi ka Moses vt vltipo ya ikba chikma,

Chihowa hvt nan i miha kvt, Ahah! ahnit nan isht a holba nunih paknaka chim ai otni tok ak o chiyuhmi ho nan okluha ka ish ikbashke, achi tok oka.

6. Yohmi tok kia himonasi hokvno yummak okvt nan it im vlhpisa achukma i shahli, nana achukma i shahli annohowa puta isht ai ahli tok a, it i nanaiyuchi yosh nan isht ai vtta holitopa i shahli fehna ho ieshi mak inlishke.

7. Yohmi ka nan it im vlhpisa vmmona yummvt nan isht ik ono iksho hatok okma, anonti atukla kvt ai yvmohma hi ya hoyta hi atok keyu hoke.

8. Yohmi ka yummvt nan isht ik ono ka pisa kak osh Chitokaka yvt achi kvt, Yakeh! Islael in chukachvfa, micha Chuta in chukachvfa aiena ka nan it im vlhpisa himona im apihisa la he nitak vt vla hi oke,

9. Iki vhleha hoka ibbak halvllit pehliechit, nitak kaniohmi kash Echip yakni yoka a kohchi li mvt, nan it im vlhpisa im apihisa li tok okvno chiyuhma he keyu; yummak okvt nan it im vlhpisa im apihisa li tok ash foyukvt mahaya keyu hatuk o, ak ahnincho ki tok, Chitokaka yvt achishke, im ahanchi tok.

10. Yohmi ka nan it im vlhpisa ilvppak o nitak himak a pilla mak o Chuta in chukachvfa yoka im apihisa la hi oke; yohmikmvt a nan vlhpisa puta yoka anukfokihinchi likmvt, chukvsh oka ai o holissohonchi la hi oke; mikmvt in Chihowa sia hahe, mikma vm okla hahi oke. Chitokaka yvt ahanchishke.

11. Yvmohmikma hatak puta kvt in chuka panta, micha hatak puta kvt itibapishi aiena ka nan im abvchit, Chihowa hoka ish ithaiyanashke, im ahancha he keyu; moma ik lauwo, micha moma i shahli aiena kvt svthana hi oka.

12. Yohmi ka ik vlhpeso ai yvmohmi puta ka i nukhaklo la he, mikmvt nan ai ashvchi, micha vba nan vlhpisa kobahafi puta ka himak a pilla ak ithaiyano ka he mak oke.

13. Nan it im vlhpisa himona yummak achi kak osh, vmmona tok vt sipokni yo chohmichi hoke. Yohmi ka nana kvt okpulot sipoknit isht ai aiena hokvto, ont ik ai iksho kamohma chi kvt vlhtaiyaha hoke.

CHAPTA IX.

Vba nan-vlhpisa yokvto issish a hlatahampla hi a im apesa 1; 11 amba Klaist vt ilap issish, micha ilap fehna isht a hlakofa hi o ile kanchi tok vt mihi yosh holitopa fehna: 15 nan vlhpisa himona ai ahlichi hosh Klaist vt illa he vlhpiesa hatok.

1. YOHMI ka nan it im vlhpisa vmmona yvmmak ash ot Chihowa aiokpvchi nan isht vlhpisa puta, micha aholito pa yakni ilvppa ahalaiya aienka i shi tok vt ai ahlischke.

2. Yohmi ka vlhtipo yokvt toba tok: vmmona yvmmak anukaka yak o pvla ai o hikia, micha ai impa, micha pvska otvni aienka kvt asha beka tok, yvmmak osh aholitopa hohchifo hoke.

3. Mihma nan-tvnna isht ompoholmo vba takali atukla mish asha ka, vlhtipo yokvto aholitopa moma i shahli hohchifo hoke:

4. Yvmmak oka anukaka ya na balama aluachi tvli holisso lakna isht toba, micha nan it im vlhpisa yash im itombi yokvt tvli holisso lakna yosh isht ompoholmot apakfoyupa, yvmmak o tvli holisso lakna nan ai vlhto manna yosh vlhto, micha Alon in tvbi yvt bikobli tok, micha tvli patvssa tuklo nan it im vlhpisa yvt ai o holihiso tok aienka kvt foyuka hosh taloha tok :

5. Mihma paknaka ya Chelubim holitopa vhleha hut isht ai i kana ai o binili ya o hoshontikahanchi tok, yvmmak oka himonasi ka achvfa aiyukut isht il anumpula he keyushke.

6. Yohmi ka nana puta kvt yakohmit vlhtaiyaha ha yak o, na holitompa isht vtta yak osh vlhtipo vmmona anukaka yak o chukowvt, Chihowa aiokpvchit a hlopulli beka tok :

7. Amba atukla hokvno na holitompa isht vtta chinto kak osh ilap bano hosh afvmmikma himonna ho chukowa kvt, issish ik esho keyu hosh yvmmak o ilap nan ai ashvchi, micha okla nan ai ashvchi aienka isht vlhtoba mak o pit im issa beka tok :

8. Shilombish Holitopa yak osh vlhtipo vmmona yash

ot hikia imoma hokvno, aholitopa moma i shahli anukakaka a chukowa yokut ik otano kisha ho ilvppak o otvninchi tok :

9. Yummak osh nitak yummak fehna ka nan isht vlhpisa hatok ; yummak ash o na hvlbina, micha nan ai ashuchi isht vlhtoba ita tuklo ka im ihisa tok : yohmi ka yummma isht ahanta hokvno yummak okut nan isht il akostininchi imma hokvno nuktvla ai ahli yo im ikba he keyu hatok.

10. Yummak okut nan ilhpak, micha nan ishko puta, micha il achifa ilaiyuka, micha haknip imma nan isht vlhpisa puta aienak illa hosh im vlhpihisa na nan ai vlhpesa nitak vt vla hi atok.

11. Amba Klaist vt vla hokut vlhtipo chito, micha vlhta ha achukma kvt i shahli, ibbak isht a toba keyu, yummma achi kvt nan toba ilvppak o chohmi keyu, na holitompa isht vutta chinto hosh nana achukma vla chi puta ka isht ahanta kvt ;

12. Issi kosoma, micha wak ushi issish o keyu, amba ilap im issish ak inli ho isht a pi vlhtombet bilia ya isht a pim ataiyahli ha yosh, aholitopa yoka himonna achufa chukowa tok.

13. Yohmi ka wak nakni, micha issi kosoma issish, micha wak tek himita hullushmi hituk chubbi ya ik kashofo ka ai o fimimpa kak osh kanimihchit haknip a kashofe hatok okma ;

14. Shilombish okchayvt bilia anukfoka pulla hatuk osh isht ik ai ono kia iksho hosh Klaist vt Chihowa yoka pit il im issa tok ; yummma im issish okak heto i shahliche fehna hosh nan a kaniohmit isht ai illi ya a hvchi filvmmichit, isht hush il akostininchi yoka hvchi kashofichi na Chihowa okchaya yoka hvsh holitobla hinla hoke.

15. Yohmi ka yummak okut nan it im vlhpisa ummona nuta ai ashvt nan ai ashahanchi tok vt isht vlhtoba chi mak o, illi pulla hatuk mak osh nan it im vlhpisa himona yoka ai ahliche toba ho, im annohwowa tok puta hokut ai okchayvt bilia isha he im ai vlhpiesa im ihisa tok a isha hi atok.

16. Nan it im vlhpisa yvt tobakma, nan it im vlhpisa isht ai ahli kvt illi kak o pulla chatuk mak inlishke.

17. Yohmi ka nan it im vlhpisa isht ai ahli yash osh ok chaya imoma hokvno isht ik ai ahlo kamohmi, amba illi ha yak o isht ai ahli chatuk oke.

18. Yvmohmi hoka nan it im vlhpisa vmmona hokvt issish iksho ho isht ai ahli tok keyu hoke.

19. Yohmi ka Moses okvt vba nan vlhpisa vt nana apihisa ka mominchit okla puta ka isht im anumpohonlit taiyahli mvt, wak ushi, micha issi kosoma ushi issish ita tuklo, oka kapussa, micha chukfi hishi humma, micha hissop aien ho ieshi cha, holisso, micha okla moma aieninchit isht o fimmii mvt,

20. Ilvppak osh nan it im vlhpisa issish mak o Chihowa yokvt huchim apihisa tuk oke, achi tok.

21. Anonti yummak ash ot vlhtipo, micha Chihowa isht aiokpvchi ai-vlhto aien ka issish isht o fimmii mak inli tok.

22. Yohmi ka vba nan vlhpisa yak atuk pulla mak o nan okluha kvt moma chohmit issish isht a kashofa hoke; micha issish hlatahampa keyu hokvno nan ai ashvchika isht a kashofa iksho hoke.

23. Yohmi hoka nana vba ai asha puta ka isht vlhpisa puta kvt ilvppak ash o isht a kashofa hi atuk; amba nana vba ai asha yummak oka nan ai ashvchika isht vlhtoba achukma kvt ilvppak ash o i shahli ho isht a kashofa hi atuk oke.

24. Yohmi ka Chisus vt aholitopa puta ibbak isht a toba, yummak o ai ahli fehna ka isht vlhpisa hatok ak o chukowa tok keyu; amba pishno ak atuk pulla mak o Chihowa itikba ya himonasi kuno ai otaiyana chi kak osh vba yakni fehna ka chukowa tok:

25. Na holitompa isht vtta chinto yokvto aholitopa yoka afummikma in issish o isht chukowa beka tok, chiyuhmit himonna ilap ash il im issa hi atok keyu hoke:

26. Yohmi tok okma, yakni intolahpi toba vmmona tok takla ka himonna ihinla hi atok pulla; amba himonasi kuno himonna achufa ho yakni ont ishtaiyopi yak o ant ai otaiyani kvt, nan ai ashvchi isht kanchi mak osh ilap il im issa hosh illi tok.

27. Yohmi ka hatak puta kvt himonna ho illa hi vt im vlhpihisa tok; amba misha pilla hokuno nan im vlhpisa nitak osh vla hi oke:

28. Yumma chiyuhmit Klaist ak kia lawa nan im ai ashvchi isht kancha chi mak osh himonna ma il im issa tok: yohmi kvt yummma hohoyo vhleha hokuno nan ai ashvchi ik im iksho hosh atukla okchalincha chi hosh otaiyana hi oke.

C H A P T A X.

Vba nan-vlhpisa ho na nipi vba isht aiokpvchi hokuno nan ashvchi isht kancha he keyu, 1: 10 amba Klaist haknip osh himonna ha nan vlhtoba hosh illi ha yokuto nan ashvchi ya isht kanchi; 19 achunanchit nan ai yimmika ya kyllot ieshit Chihowa ya aiokpahancha he i miha.

1. YOHMI ka vba nan vlhpisa yokvt nana achukma puta vla he ak o isht vlhpisa hatok; yohmi kvt nana yummak o isht a holba ai ahli keyu hokvt, nan ai ashvchi isht vlhtoba puta yummma afummikaiyuka ka pit im ihisa na bilia mak o isht ahanta vhleha hoka nuktalalit ai ahlicha himma keyu hoke.

2. Yohmi tok okma, ilvppak oka pit im issa kvt issa hi atok keyu? yohmi ka aiokpvchi yakohmi vhleha hokvt himonna kashofa ha yokvt, nan ai ashvchi puta isht il akostininch yrt ik im iksho ka hi atok oka,

3. Amba nan ai ashvchi isht vlhtoba yummak ash o afummikma anonti nan ai ashvchi isht ai otaiyani beka tok.

4. Yohmi ka wak-nakni, micha issi kosomushi issish aienan kvt nan ai ashvchi puta ka isht kancha he keyu kamohmi hoka.

5. Yumohmi hoka yakni ilvppa vla mvt, Nan ai ashvchi isht vlhtoba, micha vba isht aiokpvchi aienan hokuno chik ahno tok; amba haknip o is svm ikbi tok, achi tok:

6. Nan ai ashvchi isht vlhtoba lua yokuno isht a chi yukpa tok keyu hoke.

7. Yohmi hatuk oka, yakeh! nan isht si annohowa ho-

lisso a foyuka hoka nan ish ai ahni tok a ataiyahli la chi hosh vla li hoke, Chihowa ma! achi li tok.

8. Tikba kash nan ai ashvchi isht vlhtoba, micha vba isht aiokpvchi, micha nan ai ashvchi isht vlhtoba lua aienai lvppla vba nan vlhpisa yak atuk pulla kak o isht ahanta hoka, chik ahno mvt, anonti yummak isht a chi yukpa keyu ki tok, achi tok.

9. Yohmi mvt, Yakeh! nan ish ai ahni tok a ataiyahli la chi hosh vla li hoke, Chihowa ma! achi kvt, nana vmmoma kash o isht kanchi hosh nan atukla kash o ai ahlichia chi hatok.

10. Nan ai ahni tok yummak atuk pulla kak o Chisus Klaist vt himonna achvfa ma, haknip a im issa tok ak o isht a pi kashofa hoke.

11. Yohmi ka na holitompa isht vtta puta kvt nitak moma ka hikvt nan isht ahanta kvt, nan ai ashvchi isht vlhtoba mih ash inli, yummvt nan ai ashvchi isht kancha himma keyu ka, himonna pit im ihisa chatuk :

12. Amba hatak ilvpput o nan ai ashvchi isht vlhtoba achvfa ka, im issa ha ya tok vt, Chihowa ibbak isht impak imma ak o binilit bilia hoke :

13. Himak a pill a mahaya hokvno in tvnvp vhleha hokvt ilap iyi ai o hikia yo toba he, ai ahnit ahanta hoke.

14. Yohmi ka nan ai ashvchi isht vlhtoba achvfa ho kashofa vhleha yummak okvno isht nuktalalit ai ahlichit bilia hatok.

15. Yummak oka anonti Shilombish Holitopa yak kia nan atokowa pim anoli hoke; yohmi kvt anonti tikba ka achi ha yak osh,

16. Nan it im vlhpisa ilvppak o nitak yummak i himmak okvno it im apihisa likmvt, chukvsh fehna ka a nan vlhpisa yoka nukfohkihinchi la he, micha im anukfila fehna ka ai o holissohonchi la he;

17. Mikmvt nan im ai ashvchi, micha vba nan vlhpisa kobahafi tok puta ka himak a pill a ma ak ithaiyano ka hoke, Chitokaka yvt achishke, achi tok.

18. Yohmi ka ilvppa isht a kashofa kvt asha hokvno,

anonti nan ai ashvchi isht vlhtoba himmakma im issa he iksho hoke.

19. Yumohmi hoka itibapishi li vhleha ma! Chisvs im issish ak atuk pulla kak o nukwaya iksho hosh aholitopa fehna ka e chukowa hoke:

20. Yohmi kvt aholitopa isht ompoholmo takali yummma achi kvt haknip ak oke, yummak atuk pulla kak o hina himona, micha okchaya holitoblichit pim apesa tok o e chukowa hoke.

21. Yohmikmt na holitompa isht vta chinto Chihowa im aboha i shahli hosh pim ahanta hokvt;

22. Chukvsh ai ahli, micha i yimmi ai ahli fehna, pi chukvsh mvt issish o fimmvt, isht il il-akostininch i achukmo ka ai i filummit, pi haknip okvt oka kashofa achukma isht vhlchifa tuk aieno ho isht i bilikasi il onashke.

23. Nana pim ihisa tok vt ai ahli yoka, nana pi yimmi il il apihsa tok vt shanaia iksho hosh il ai ahlashke:

24. Micha nana ka isht it anukfilli hosh iloh it i hullot, micha nan isht vta achukma puta ka e yumohma chi kvt, il itaiyimitachashke:

25. Kaniohmi kvt ai yumohmi chatuk a chiyuhmit il itv-naha he tuk vt kil isso kashke: amba nana ka it i miht, nitak yummvt vla hosi ka hush pisa kak osh, i shahliche fehnvt hush yumohmashke.

26. Yohmi ka nan ai ahli ka il ithaiyana ha yokvt, pishno inli pim anukflla hosh il ashvchi hokmvno, nan ai ashvchi isht vlhtoba yvt himmakma takanli keyu hoke;

27. Amba isht a nukshobla he na palvmmi vlpisa, micha isht i nukkilli luak aieno ka hohoyot ahanta he; yummvt vbanumpa ai ahli i sanali vhleha hoka okpunit tumola he ak osh takanli hoke.

28. Moses i nan vlpisa yoka ik holitoblo hatuk vt nan atokowa anoli tuklo, tuchina, kanima kvt pisa ho isht i nuk-haklo kia iksho ho, illi hatok oke.

29. Yohmi ka kvna hosh Chihowa Ushi yoka iyi nuta bohlit a hvhlhinch, micha nan it im vlpisa issish yummak o isht a kashofa tok ash osh nana ik holitopo isht ahobuchi,

micha nan isht i kana Shilombish Holitopa ya nan isht ik ahobalo hatuk okvto, nan isht ilbusha yvt i shahli katiohmi ho isht ilbusha he; hvchim ahoba ho ?

30. Yohmi ka, Ai vlpiesa isht atobba hi okvt vmmi hoke, ilvppak ash achi tok yummak okvno il ithana; falaminchit atobbi la he, Chitokaka yvt achishke. Mikma anonti, Chitokaka yvt im okla vhleha hoka nan im apesa hi oke, achi kvt takanlishke.

31. Chihowa okchaya yoka nan im vlpisa chi hosh ibbak a foyuka kvt nana ka isht a nvkshopa he vlpesa hoke.

32. Yohmi kia nitak tok ash o hush ithaiyanashke, yummak amo nana ka hush ithaiyana ha yokvto, na palvmmi chinto puta ka it i kahanlot isht hvch ilbahasha tok :

33. Yohmi kvt isht a hofahya, micha na palvmmi puta hvchi onvtuyula hosh okla a yopissa mak o hush tohomba kvt hvchi yvmohmi ; micha kanimikma yvmma yvmohmi puta kash o ibai achvfa hush tohomba kvt chiyuhmi mak inli tok oke.

34. Yohmi ka yuka talakchi yosh ahanta li ma, hvs svba nukhaklo tok ; micha hvchim ilayak puta ka hvchi wehpohonli kia, vlpesa ahnit huchi yukpa kvt nana okpula he keyu, micha achukma i shahli hosh vba aholitopa yoka hvchin tuyula kvt, hush il ithana hatuk okvt.

35. Yvmohmi hoka na yimmi hvchi anukfoyska kash osh hvch ik kancho kashke : yummak osh nan isht vlhtoba nan isht il aiyukpa chinto ho ieshi hoke.

36. Yohmi ka nuktaiyalvt achunancha he hvchim vlpiesa ; yohmi hosh Chihowa nan ai ahni tok a hush ataiyahli ha yosh, nana auet hvchim ihisa tok ash hush iesha hi atok.

37. Himak a pilla chekosi fehnakma vla hi atok vt, vla chi kvt svlaha hosh vla chi keyu hoke.

38. Yohmi ka ai vlpiesa yokvto na yimmi pulla kak osh okchaya chi ; amba hatak nana hosh falama hok mno, sa shilombish vt isht im ai yukpa hi vt iksho hoke.

39. Amba pishno vto falama cha, nan isht ai ilbusha bilia pihiisa he vhleha yummak okvno il ibai achvfa keyu, amba na yimmi cha, shilombish okvt okchayvt bilia yummak o il ibai achvfa hoke.

C H A P T A XI.

Na yimmika yvt nana hatuk a anoli, 1 ; 7 nayimmi isht ai vni kvt vbanumpuli t^{ik}ba ash ot nan im anukfila na otni tok a anoli.

1. N A yimmi kak osh nana il isha he ai ahnit e hohoyo ka nan isht pim ai ahli yoke ; micha nana ke peso ka nan isht ai atokowa yoke.

2. Yummak atuk pulla kak o hatak tikba vleha hokvt nan annoa achukma ka isht ai atokowa tok oka.

3. Na pi yimma pulla kak osh yakni puta kvt Chihowa im anumpa hak o isht a toba tok a isht il akostininch hoke ; yohmi hatuk o nana puta e pihisa kvt nana puta otaiyani kak o isht atoba tok keyu.

4. Na yimmi pulla kak osh Ebel okvt vba isht aiokpuchi achukma kvt Ken immi ya i shahli fehna ho Chihowa hoka ont im issa tok ; yummak ash o nana ka ai vlpiesa kvt isht atokowa kvt, i na hvlbina puta ka Chihowa hokvt atokolit im aiokpanchi tok ; micha yummak atuk pulla kak o illi tok kia anumpuli kvt imomvshke.

5. Na yimmi pulla kak osh Enok vt toshowa kvt nan-illi ik peso ka chⁱ kak atok ; micha Chihowa ak osh tosholi hatuk oka, iksho ki tok : ik toshowo kisha kvt Chihowa yoka yukpali tok, nan isht atokowa ilvppak o ishi hatok okvt.

6. Amba na yimmi iksho hokvno kaniohmit yukpala himma keyu hoke ; yohmi hoka kvna hosh Chihowa im onakmvt, yummak osh ahanta, micha yummak okvt ilap o achunanchit hohoyo puta hokvno nan im atobbi aienka yimmi pullashke.

7. Noah yoka Chihowa hvt nana im anohonli ma, nana ka ik peso kisha ak inli kia, nukshopvt holitobl hokvt, i yimmi pulla hosh in chuka-chvfa yvt isht ai okchaya hi a peni chito ya i ikbi tok ; micha yummak ymohmi kak osh okla puta ai asha tok ash na palvmmi vlpiesa hvt onutula he vlpiesa ka isht otninchi tok ; micha na yimmi isht ai vlpiesa iesha hi vlpiesa hosh toba tok.

8. Eblaham okvt yakni inla yvmmma i himmak o immi tobvt isha hi o, iwt ona chi ho i howa ma, yimmi pulla kak osh im antia tok; micha yvmmak o ia li, ahni keyu kia, kohchvt ia tok.

9. Na yimma pulla kak osh yakni im issa tok ash ont ahanta kvt, yakni vt immi keyu ho chiyuhmi hosh Aisaak, micha Chekob ita tuklo, yvmmvt nan im issa tok mihi ash iesha he im ai vlpesa ak inli ka ai itapehvt vlhtipo anukaka yo ahashwa tok:

10. Tvmaha chito intolahpi yvt kvlo achukma yvmmak oka Chihowa hak osh apesvt bohli, micha ikbi yak o hohoyo hatok okvt.

11. Na yimmi pulla kak osh anonti Sela ilap inlit isht hlampko ishi hosh chakali cha, vlla sholi tok, ai yvmoohmi chatuk a ont iwt kvnia kia, yvmmak ash ot nan im issa tok a ai ahli yoke ahnit i yimmi hatok okvt.

12. Yvmoohmi hoka achufa, yvmmvt illi ak o chiyuhmi kia, laua kvt fochik vba shutik ai asha ka itilaui, micha shinuk a holhtina iksho okhuta ontalaka ai asha kak o chiyuhmi hosh a toba tok.

13. Ilvppvt momvt yimmi imoma hosh illi tok; nan im ihisa tok a ishi tok keyu; amba yvmmvt hopaki fehna moma ho pihsa kvt, yvmma yimmi ai ahli fehnvt anukfoyuka hosh, yakni paknaka ai asha kvt, peh nowvt aya, ai anta na hopaka he ik im iksho yosh il anohonli tok.

14. Kvna hosh yvmma chohmi ka achi hokvto, ai ahanta he yakni yo hoyo kvt otvninchi fehna hoka.

15. Yohmi ka yakni yvmma a kohchvt minti tok vt anukfihinli hatok okmvt, a falama hi vt takanli akinli tok mvhlishtke.

16. Amba himonasi kvno yakni achukma i shahli, yvmmvt vba yakni yak o bunna hoke: yvmoohmi hoka in Chihowa isht a hohchihifo kvt, Chihowa hvt hofahya keyu, yvmmak oka tvmaha chito yo im ataiyahli hatok okvt.

17. Na yimmi pulla kak osh Eblaham okvt nana ka imomaka pisa ho, Aisaak a im issa tok; micha nana im

ih̄isa puta kash ishi hatuk okvt ushi yummak i bieka tuk vt im issa tok.

18. Yummak o isht anumpa hosh Aisaak ak o chi unchululi kv̄t isht a toba hi oke, achi tok.

19. Chihowa yokvt, illi tuk kia, falaminchit tanicha he bano hoka, ai ahni pulla hatuk mak osh yummvt illi tuk a chiyuhmichit falaminchit ishi tok.

20. Na yimmi pulla kak osh Aisaak okvt Chekob, Esau ita tuklo kv̄t i himmak nana im akaniohma hi oka im anolit yukpali tok.

21. Na yimmi pulla kak osh Chekob okvt illit isht mahaya mvt, Chosef ushi a ita tuklont yukpali tok; mihmvt in tv̄bi wishakchi ak o on hlipia hosh Chihowa ha aiok-pv̄chi tok.

22. Na yimmi pulla kak osh Chosef okvt illi mvt, Islael im vlla vhleha hōkv̄t wihvt itenowa hi oka isht anumpuli tok; micha ilap foni yoka kanimiheha hi oka im apesa tok.

23. Na yimmi pulla kak osh Moses okvt vttahpi mvt, vlla aiokli fehna ho iki, ishki ita tuklo kv̄t pisa hatuk osh, luhumi na hvshi tuchina ona tok; micha miko i nan vlp̄pis ya i nukshopa tok keyu.

24. Na yimmi pulla kak osh Moses okut asvnot taiyaha mvt, Feleo ushetik ushi isht a hohchifa he ik ai ahno kv̄t;

25. Chihowa im okla vhleha hak o na palvmmi isht ibai ilv̄sha kak osh nitak kanomosi takla, nan ai ashvchika ai isht ilaiyukprt ahanta hi atuk vt im i shahli tok:

26. Yohmi kv̄t Klaist a i yimmit isht a hofahya yak osh nan isht ilaiyukpa chinto kv̄t Echip anukaka nan im ilayak puta ai asha ka im i shahli tok; nan isht vltoba nan isht ilaiyukpa yak o hohoyo tok okvt.

27. Na yimmi pulla kak osh yummak ash ot Echip a issa kv̄t, miko yokvt isht i nukshopa tok keyu yohmi kv̄t nishkin vt pisa he keyu yummak okvno pisa kash chiyuhmit nuktaiyalvt achunanchit ahanta tok.

28. Na yimmi pulla kak osh yummak ash ot vbanvblit ont ai, micha issish isht o simmi aieno ka holitobl na, vttahpi ahambi yummvt ik halelo ka chi hatok.

29. Na yimmi pulla kak osh okla hut okhvta humma yvt yakni shila chiyuhmi ho a hlopulli tok; yvmmma Echip okla hokvt hobachi hosh okai illit taiyaha tok.

30. Na yimmi pulla kak o Cheliko tvli isht a holihta yokvt okla apakfohompa na nitak untuklo ma aka itula tok.

31. Na yimmi pulla kak osh Lehab ohoyo hau i yatuk vt, yimma he keyu vhleha hoka ibafokvt illi tok keyu, na tikba pisa vhleha hoka i kanvt ilap in chuka yoka ik chukowá, im ahni hatok okvt.

32. Micha himmakma nanta hak o achi la chi? Yohmi kvt Keteon, Balak, Samson, Chefli, Lewi aiena, micha Samuel, micha hopaii vhleha aiena ka isht anolit ont taiyahli la he keyu hoke:

33. Yvmmak okvto na yimmi pulla kak osh apehlichika puta imaiyachi, nan ai vlpiesa ka yvmihinchi, nana im ihisa tok a ihishi, koi hochito itakha ya akummi aiena tok;

34. Luak libbi isht lua mosholihinchi, bushpo falaia halupa ai i hlakohofi, tikambi tuk vi hlampko, itibi kvt kvllo t isht i shahlit mahaya, oklushi inla in tushka chipota ya falaminchit tihlihinli aiena tok.

35. Ohoyo vhleha ha im illi tuk vt anonti falamvt okchaya na ihishi tok; mihma inla yvt a hlakofa he im issakia, vlpesa ik ahno hosh nan isht a hotopa; issikkopa pihsa, yohmi kvt falamvt tani achukma i shahli ho isha he ak atok:

36. Mihma inla yvt isht ik ahobalo anumpa okpulo fehna, micha fuma isht a hotopa fehna puta, mihmvt anonti talakchit aboha kullo fohoka aiena ka isht ai imomaka pihsa tok:

37. Okla tvli isht bohowa, bushut ita hokohofa, isht ai imomaka pihsa, bushpo falaia isht ai ihinli: chukfi vlpoba hakshup, micha issi kosoma hakshup aiena ho foyukvt yakni haiaka ai itvnowa, nana ik im iksho kamohmi hosh, nan ilbushvt issikkopa aiena tok;

38. Yvmmak oka yakni yvt immi ha he ik ono hatok;

yakni haiaka nvnih anyka, micha teli chiluk, micha yakni chiluk anyka aienā ka okla ashvt itvnowa tok.

39. Mihmvt ilvpput moyumvt na yimmi pulla kak osh nana annoa achukma ka isht ai atokowa kia, nana im ihisa tok a ik isho ki tok.

40. Chihowa hak osh nana inla achukma ho pim ataiyahli ka, okla pibai achafa keyu kvt ai ahlit im vlhtaha hi atok keyu hoke.

CHAPTA XII.

Chihowa anukfoyukvt achunanchit nayimmi ka il ai itvnowa he achi, 1 ; 22 kvna hosh nan vlhpisa himona aiokpvchi kvt isht ai yukpa ahalaia he vlhpesa ka anoli.

1. YUMOHMI ka nan atokowa anoli puta kvt hoshonti chinto ka chiyuhmit yakohmi hosh isht a pi apakfoyupa ak inli hokvt, na weki puta, micha nan ai ashuchi yut nan isht ahomba iksho isht a pi apakfoyupa a moma ka naksika e boyuhli cha, a mvllela he pit tikba ituyula ka nuktaiyalvt achunanchit e mvllihinlashke,

2. Chisus nan isht a pi yimmi ka pi nukfohkichi, micha atahli, yummak osh nan isht ilaiyukpa yvt itikba auet takali kak osh vlhpesa ahnit, ititaiyukhva ya takalit, nan isht a hofahya nan isht ik im ahobo tok osh, Chihowa ai o binili holitompa isht impakimma yak o binili ka hvsh pihi-sashke.

3. Yohmi ka hvchim anukfila hvt tikambit vm ai ahla he keyu, ahnit taha yoba hinla kvt, nan ashuchi vhleha hvt ilap a i sanahanli kia yummak oka vlhpesa ai ahni tok a hvsh anukfihinlashke.

4. Hvchishno yokuto nan ai ashuchika ya i sanali kullo fehnvt hvsh ilafoa na issish isht ik hlatapo kishvshke.

5. Micha isht a nuktula he anumpa hvt hvchim anumpuli kvt vlla yo chohmichit, Svso ma ! Chitokaka i nan isht kostininchikma, vm ai ahla he keyu, chik ai ahno kashke, achi ka chimi haksi tok o ?

6. Yohmi ka Chitokaka yut kuna ho i hullo hokvto kostininchı hoke; micha ushi puta ka ahninchı hokvto yvmmi hoke.

7. Hvchi kostininchı ka nuktaiyalvt vlpesa hvsh ahni hokma, Chihowa hak osh ushi yo chohmichit hvchi yvmichı hoke; ushi nanta ho iki vt kostininchı keyu ka anta hatuk o?

8. Amba nan isht kostininchı yvmmak oka moyuma kvt ibai ishi chatuk bano, yvmmvt ik hvchim iksho hokvto, ushi vhleha hvchia keyu, amba iki iksho hvchiq hoke.

9. Mihmvt anonti piki vt haknip ashı pishno chohmi hosh pi kostininchı chatuk; mihma yvmma e holitobli tuk vt shilombish puta Iki yokak heno i nutakvt il ai asha cha, pi okchaya he ak osh pim i shahla hinla keyu ho?

10. Yohmi ka yvmmak okvto nitak kanomosi takla ho ilap ai ahni hosh pi kostininchı chatuk mvhlishke: ambal yvmmvto nan isht pim ai achukmvt, ilap nan ai vlpiesa kak o il ibai isha he ak atok oke.

11. Yohmi ka himonasi ka isht a kostininchı hokvno isht ai yukpa he ik ahobo, ambal nukhaklochi; yohmi ak inli kia yvmma isht ai yvmo hosh hvleha hokvno i himmak o nan isht ai vlpiesa nan vni achukma ka i wayuchi hoke.

12. Yohmi hoka hvch ibbak vt aka pit takali ka ho wakeli, micha hvch iyikalaha ik hlampko ka apissulechit ho hilechı;

13. Micha hvch iyi ya hina apissa ho hvsh im ikbashke, keyukma hanali okpulo yvto tahlofa hinla hoke; ambal yvmmvto ik yohmo hosh hlakofi kak o ahni fehna hetuk oke.

14. Achunanchit hatak puta ka it i nanaiyvt, nan ai ashvchi iksho ya hvsh ieshashke, yvmmvt iksho ka hatak nana kia Chitokaka ya pisa he keyu hoke.

15. Nana ka ahah! hvsh ai ahnashke, keyukma hatak kanima kv Chihowa yut isht i kana ya i hlakofi yoba na; mikmvt na homi okpulo hakshish kia offot kohcha cha, hvchi ataklummi na lawa kvt isht ai okpula hinla hoke.

16. Anonti hatak hauı, micha vbanumpa ik ahobalo ka-

nima kvt, Esau yokvt ilhpak himonna vpa yokak o vttahpi nana kvt ilap ai immi hatuk vt kanchi tok a, chohma hinla kvt anta yoba ká.

17. Yohmi ka kaniohmit i himmak okvno nana isht ai yukpa he anumpa tok a isha he ai ahni kia, vlhpesa ik im ahno tok a hvsh ithana; yohmi ka im anukfila ha inlvcha he yummak o achunanchit nishkin okchi mihinti hosh asihjla ak inli kia, ik ahayucho ki tok.

18. Yohmi ka nvnih yummma potola hinla, micha luak isht luhuwa, hoshonti lusa, micha okhlilika, micha apeli chinto aieno ho hvsh ona keyu,

19. Yohmi kvt isht-pufa yvt ohonla, micha anumpa vlhpisa puta isht anumpohonli ma, yummma okla hvt haiyaklo mvt, anumpa yummvt himmakma ilap a isht ik im anumpo ka chi ka asilhha tok:

20. Yohmi kvt nana im anuhumpa kvt kaniohmit vlhpesa ahnit okla haponakla he keyu hatok; yohmi ka nan vlhpoba yak oh kia nvnih ha Haleli hokmvt, yummvt tvli isht bovt illa hi atok, keyukmvt iti falaia tvli halupa achaka yo isht bahvt hlopulla hi atok:

21. Micha na pisa yummvt isht a nukshopa fehna he vlhpiesa hatuk o, Moses vt, Sa nukshopa fehna hosh sa wnnihinchishke, achi tok:

22. Amba hvchishno yto nvnih Saion, micha Chihowa okchaya in tumaha chinto, Chelusalem vba talaia, micha enchil vhleha, a holhtina iksho kamohmi, itahoba chinto ai asha,

23. Micha vttahpi im iksa hohchifo hvt vba a holitopa yak o a holihiso, micha Chihowa moyuma ka nan im apesa, micha hatak vlhpiesa puta imi shilombish vt ai ahli toba tok,

24. Micha Chisus nan it im vlhpisa himona ya ai-ahliche, micha issish nan isht o fimmi, yummak osh Ebel vt a ymohmi tok a nana achukma i shahli ho isht anumpuli aieno ho hvsh ona hoke.

25. Ahah! ahnit yummvt anumpuli ka hvch ik i hapnaklo ki na. Yohmi ka yakni paknaka ai anumpuli ka ik i

haponaklo mut hlakofi tok keyu ka, yummvt vba a holitopa yak o auet anumpohonli ho il i filummi hokak heto, pi hlakofa he keyu fehna hoke :

26. Yummak o im anumpa hosh nitak yummak ash yakni ya winalihinchi tok; amba himonasi kuno yummvt nana anoli kvt, Anonti himonna ha yo yakni ak bano keyu, amba vba yakni yak kia winalihinchi li mak inli, achishke.

27. Mikma, Anonti himonna ha yo achi, anumpa ilvppvt nana puta kvt winakahancha hinla kvto, toba hatuk osh, ont akshot taha chi ho isht otvni na nana puta kvt winakahancha he keyu kak osh ash moma chi hatok.

28. Yumohmi ka apehlichika yummvt aksha he keyu mak o il ishi hokvt, Chihowa yvt isht i kana yoka il ieshi pulla hosh, holitoblit i nukshopa ai ahli ai vlhpiesa hosh Chihowa yoka nan isht il im ahantashke.

29. Pin Chihowa yokvt luak nan okpunit kahanchi yoka.

CHAPTA XIII.

Nana ka a yvmihcha he vlhpisa kaniohmi ka anoli, 1 : 7 im vbanum-pa isht anumpuli vhleha ha holitobla he i miha: 9 nan ithvnanchi inla hokvno ik i haponaklo he, 16 vbanumpa hvt holitopa, hi ahnit nan isht apelvchi: 17 nan vlhpisa ya im antia he aienka i miha: mihmvt isht aiyopichi kvt vba isht anumpuli.

1. ITIBAPISHI it i hullo kvt mahaya pullashke.

2. Hatak ik ithano ya i kanvt apelvcha he tuk vt ik hvchimi hakso kashke; ymma ai yumohmi kak osh kani-ohmi kvt ik ithano kia, enchil a aboha ya ik chukowá im ahni cha apelvchi tok oka.

3. Talakchi puta ka ibai achvfa ho chiyuhmit, micha na palummi isht ilbusha ymma puta ka hvchimashke; hvchishno yak kia hvchi haknip vt hvchi shilombish ai itifoka moma hokvt.

4. Nan itauwaya yokvt hatak moma ka isht im ai vlhpiesa, micha topa yvt okpulo keyu kvt isht a holitopa hoke; amba itauwaya yvt ik it im ai ahlo puta, micha hau i puta aienka kuno Chihowa hvt nan im apesa hi oke.

5. Nana hush it i kakiohmi kut nana it im anushkunna kut ik huchim iksho kashke; micha nana kaniohmi hosh huchim asha hokmvt isht huchim vlhpiesashke; yummvt, Chissvt ia la himma keyu, micha huchi kanchi la himma keyu, ahanchi tok oka.

6. Yvmohmi hoka Chitokaka yak osh na si apela yoke, micha hatak vt nana ho sa kanimihcha hinla hokvno i sa nukshopa he keyu, pi nukwaya iksho hosh il acha he bano hoke.

7. Huchi pehlichi yummak oka hush itaiyanashke; yummak osh Chihowa im anumpa hoka isht huchim anumpohonli tok; yummvt na yimmi tok ak o hush hobachi cha, nana a kaniohmi tuk ash ai vhli ka hush anukfihinlashke.

8. Chisus Klaist okvt pilashash kaniohmi tuk vt, himak nitak a mih ash inli, micha peh bilia yoke.

9. Nan isht vlbuchi ilapissa, micha ilaiyuka ka isht huchi filemoa na; Chihowa hut isht i kana hak o chukvsh vt isht ai ahli ka nana achukma hoke: nan ilhpak ak keyu, yummak okvt yumma isht ai ahanta kia nana im achukmali tok keyu hoke.

10. Pishno vto alta yvt pi hikia; yvmohmi ka vltipo chash o nan isht ai ahanta yummak okvt ai impa im ai vlhpesa keyu hoke,

11. Yvmohmi ka anonti nan vlhpoba yummak o issish o isht nan ai ashvchika ak pulla kak o na holitompa isht vttva chinto yvt a holitopa ya ishit chukowa ho, nipi ash ot abinanchi ka misha yo a hulukmi beka tok.

12. Yvmohmi ka Chisus ak kia ilap im issish ak o okla isht kashofa chj kak osh, holihta isht vlhkuma misha yo ai ilbushvt illi tok.

13. Yohmi hoka ilap vt nan isht hofahya tok chiyuhmi ho ieshi hosh, abinanchi yak o kiloh ia cha kiloh im ona.

14. Iluppak okvno tumaha chito talaia bilia hi vt ik pim iksho, amba himmak vla he achvfa kak o e hoyo hokvt.

15. Yohmi ka yummak atuk pulla kak o Chihowa isht a holitopa he pitivlbi isht a waya ka yummak o pit il im ihisvt bilia cha, ilap hohchifo ha yak oke ai ahnit, il aiokpanchashke.

16. Micha nana achukma isht ahanta cha, vbanumpa nan isht apelvcha he aienā tuk vt hvchimi haksi ná : nana isht it i hullo yvymma chohmi kak o Chihowa yokut isht im vlhpesa fehna hoke.

17. Hvchi pehliechi ka holitoblit hvsh im antia pullashke ; hvchimi shilombish isht im anukfihinla kvt, nana il anohonli pulla chi ho chiyuhmit, na yukpa hosh yvymohmi hokbano, nan isht a nukhaklo keyu, yvmmak okma nan isht a hvchi yukpa he keyu hoka.

18. Anumpa ilbusha isht hvsh pi anumpohonlashke ; yohmi kvt nan okluha ka ai isht il akostininchí achukma ho il ieshit ai vlhpiesa kak bano hosh il ahanta he il ai ahnishke.

19. Yohmi kia ilvppak o yohmik bano hvchim ahni li i shahli hokvto, chekosi a holhtofa cha, falamut hvchim ona li hok bano, ai ahni lishke.

20. Yohmi na nan it i nanaiyvchi Chihowa yvmmak osh nan it im vlhpisa bilia issish ak atuk pulla kak o Chukfulhpoba apesvchi chinto, pin Chitokaka Chisvs okvt illi tuk a falaminchit tanichi tok okvt,

21. Ilap nan ai ahni ka hvsh yvmyihcha chi ka nan toksvli achukma puta ka hvchi anukfohkhinchit isht hvchim ai ahlichí ho, ilap nan isht im vlhpiesa fehna ka Chisvs Klaist ak atuk pulla kak o hvsh yvmyihinchashke ; yvmmak pulla kak o isht a holitopa yokut immi bilivt peh biliashke. Amen.

22. Mikmut itibapishi li vhleha ha nan isht atohnochi anumpa achukma ka vlhpesa ahnit hvsh aiokpvchi hokbano hvchim ai ahni lishke : anumpa kanomosi hvchi holissochi li tuk okvt.

23. Yohmi ka il itibapishi Timohli vt ik ia im ahni na ia tuk oka hvsh ithanashke ; yvmmvt chekosikma vla hokma, awant ont hvchi pisa la chi oke.

24. Hvchi pehliechi puta, micha vbanumpuli moyuma ka hvsh aiokpvchashke. Itali okla hut hvchi aiokpvchishke.

25. Isht i kana yokut hvsh moyuma ka hvchi anukfoyukashke. Amen.

CHEMIS

I HOLISSO HOKE.

CHAPTA I.

Na pi palvmmi kvt nan isht il aiyukpa he tuk, 1 ; 3 mikmv̄t nan isht il ahopoyuksa Chihowa ya il im asilhha he tuk; 13 nan isht a pi palvmmi kvt na pim ashvchika yvt Chihowa yak o a mintishke, il acha he keyu; 22 vbanumpa ha im antia yo hvpia hashke. 27 Vbanumpa nukfohka ahli kvt nana ha tuk a anoli.

1. CHEMIS, Chihowa, micha Chitokaka Chis̄s Klaist in tishu hvt Islael isht atiaka akvshkhoa auah tuklo kvt ita fimimpvt kanima moma maya puta ka, pit aiokpvchi hoke.

2. Itibapishi li vhleha ma! nan isht imomaka pisa ilaiyuka puta ka hvsh pihisakmv̄t, na yukpali i shahli nana kak o hvchim itilauashke :

3. Na hvchi yimmi nan isht imomaka pisa yak osh nuktanlv̄t achunanchi ya anukfohkichi hoka hvsh ithaiyanashke.

4. Yohmi kia hvchishno vt hvchi aiahlit hvchi vlhtaha ka nan isht ik ai ono kvt ik hvchim iksho ka hi a, nuktanlv̄t achunanchi yak osh a kaniohmi he tuk vt ont aiahli pullashke.

5. Hvsh kanimi kvt isht a hopoyuksa hi vt ik hvchim iksho hokmv̄t, Chihowa hak o, yvmmak osh hatak moma ka ai okpanchit ima, micha nan isht ik mihacho chatuk ak o, im asilhhashke. Yohmikma yvmmak oka ima he bano hoke.

6. Yohmi kia na yimmi hosh nan isht anuktuklo nana kia ikshot asilhhashke; kuna hosh anuktuklo hokvto, okhuta oka

banvtha ho mahli hvt shalit isht ia na poakahanchi kak o, chiyuhmi hoka.

7. Yohmi hokvt hatak yummak okvt Chitokaka ya nanasi kia im a habena hi a ik im ahobo kashke.

8. Hatak im anukfila tuklo yvt nana a kaniohmi puta kvt fitikahanchi hoke.

9. Il itibapishi hvt ilbusha yatuk osh holitopa kvt na yukpashke.

10. Yohmikma nan in laua yatuk osh akanlosit toba kvt na yukpashke: yohmi kvt yummak okvt ont iksho kvt haiyukpulo pakanli ak o chiyuhma chi hokvt.

11. Hvshi vt na hushma he lvshpa ka il ai ishit kohcha mak inli hosh haiyukpulo puta ka bvshechikma, pakanli asha tuk vt chilofa na pisa aiokli tuk vt okpulo chatuk; yohmi ka hatak nan in laua ahanta kak kia yummak inli ho chiyuhmit nana a kaniohmi yatuk vt ont ai iksho ka hi oke.

12. Hatak nana hosh nan isht imomaka pisa ya pisa cha, ai ahli hlopulli hokvto na yukpushke; yummak okvto ai ahlit hlopulli ha yokvto, ai okchaya iachuka holitompa Chitokaka yvt, kuna hosh ilap a holitoblikma, ima hi vt miha tok mak o isha hi okvt.

13. Hatak nana kia nan isht anukpuli pisa hokvt, Chihowa hak osh sa nukpvlechi ho, ik acho kashke; Chihowa hvt nan ik vlpeso ya ishit nukpula he keyu, mikmv^t ilap vt hatak nana kia isht nukpvlecha hi o keyu hoka.

14. Amba ilap chukvsh nan ahni yak osh halvllit ishit mahayut yukachi hok mak o, hatak moma kvt nukpuli hoke.

15. Yohmi tuk mak o chukvsh nan ahni ash osh chakali mv^t, nan ai ashvchika yo cheli hoke; atukma nan ai ashvchika ash osh ont ai vltaha hokvto, nan illi ho ikbi hoke.

16. Itibapishi li a holitopa vleha ma! hvch ik yoshubo kashke.

17. Na hvlbina achukma, micha na hvlbina ai ahli puta hokvto vba ak o a minti; yohmi kvt yummak okvt inlv^t takohli, micha ilaiyuка kia ik im iksho, nan tohwikeli puta Iki ak o a minti hosh aka vla hoke.

18. Immi ha hi osh ikbi tok puta nan i wayahpi e chiyuhma hi o, ilap ahni hosh anumpa ai ahli yo ishit tobahan-chi tok.

19. Yohmi hoka itibapishi li a holitopa vhleha ma ! hatak moyuma kvt tushpa hosh haponaklokmvt, svlaha hosh anumpuli cha, nukhobela mvt svlahashke :

20. Hatak nukhobela im anukfila hvt Chihowa holitobla hi a nukfohkichi chatuk keyu hoke.

21. Yohmi hoka na liteha okpulo puta, micha nan ik ai vlhpeso ilaiyuka puta ma mominchit naksika hvsh bohli cha, anukfila yohbi hosh anumpa hollokchi, yvmmak osh hvchim i shilombish puta okchalincha hi vt im vlhpiesa ka hvsh ihishrashke.

22. Yohmi kvt anumpa ha haklo illvt hvchishno inli isht hvchik ile yoshublo kish, amba holitoblit im antia yo hvchia hashke.

23. Kvna hosh anumpa ha haponaklo kia, holitoblit im antia keyu hokmvt, yvmmvt hatak osh a pisa ya ilap nashuka ak inli ka ai il a pisa ka chohmi hoka.

24. Yvmmak ash ot ilap inli ka ile pisa cha, kanima iak-mvt, mih mak inli ho hatak kaniohmi atuk ash osh imi hak-si chatuk oka.

25. Amba kvna hosh a yuka keyu nan vlhpisa ahli ka pi-hisvt achunanchi hokvto, yvmmvt anumpa ha peh haklot imi haksi keyu hatuk osh, amba holitoblit na toksvli isht ahanta hokvto, hatak mihi yosh yakohmit ahanta kvt nan isht ilai yukpa hi oke.

26. Hatak nana hosh hvchi takla anta kvt vbanumpuli yo ahoba kia, ilap isunlush a ik apesacho hosh, amba ilap chukvsh ash inli ka haksichit ahanta hokvto, hatak ilvppvt vbanumpa yimmi kvt im ahli keyu hoke.

27. Na yimmi ahli, litcha ikshot, Iki Chihowa itikba takali kvt, vlla vlhtakla vhleha, micha ohoyo i hatak illi puta aienka nana kvt im a palvmmmit aiasha ka, i nowvt aya, mikmvt yakni a isht ik ile litehacho aienka ilvppak oke.

CHAPTA II.

Obanvmpuli vt nan in laua ya holitobli cha, anonti itibapishi ilbusha ya kanimanchi ka vlhpesa keyu, 1; 13 amba i hullet it i nukhakla he tuk; 17 na yimmi kvt isht ai vni kvt ik im iksho hokvto illi yoke; 21 Eblaham na yimmi kvt yvmmma chohmi tok keyu.

1. ITIBAPISHI li vhleha ma ! pin Chitokaka Chisvs Klaist Chitokaka holitopa ya hvsh i yimmi kvt, hatak oka iti shahsholechit isht holitoblit hvch ik ahanto kashke.

2. Hatak vt na fohka hochukma ho fohka cha, tuli holisso lakna ibbak ushi abeha abehkvchi hosh, hvchim ai itunaha ya vla ma; anonti hatak ilbusha mvt nafohka hlipa ya fohka hosh vla ;

3. Yohmi hokma nafohka hochukma ho fohka kak ash o hvsh holitobli cha, yvmmak ash o, Aiasha achukma ilvppak o binili, hvsh im achi: mikmvt ilbusha ash o, Yvmmak o ish hikiashke; keyukmvt ai asha li nutaka ilvppak o ant ish ashashke, hvsh im achi ;

4. Yohmi kvt yvmmut hvchishno inli hvsh il iti shahsholechi, micha anukfila ai vlhpesa keyu nan isht im anukfilli yo hvsh toba ho keyu ?

5. Itibapishi li a holitopa vhleha ma ! hvsh haponaklashke; yakni pakna ilvppa ilbushvt aiasha kvt ai yimmi ka yo nan isht ai in laua chi, micha kvna hosh ilap a holitobli tuk ma, vba apehlichika yo ima hi vt miha tok mak o immi ha chi ka, Chihowa hvt atokolichi tok keyu ?

6. Amba hvchishno yokvto ilbusha ya hvsh kanimanchishke. Hatak nan in laua vhleha hvt hvchishno a hvch ilbushachit, nan ai apesa kia hallvlit hvch isht ohona chatuk keyu ?

7. Na hohchifo holitopa yvmmak o isht a hvchi hohchifo hatuk ash ik ahobalot okla nanumahanchi keyu ?

8. Uba nan vlhpisa i noshkoboka, Holisso Holitopa vt, Chin chuka panta hatak a ish i hullo kvt chishno inli kak o ish itilauechashke, achi kak o, hvsh ai ahlichi hokmvt, vlhpesa ho hvchi yvmoohmi hoke :

9. Amba hatak puta ka iti shahsholechi hosh hvsh ah-ninchi hok mvto, hvsh ashvuchi; yohmikmt nan vlhpisa kobvffi mak o nan vlhpisa yash ot isht a hvchi atokowa hoke.

10. Kvna hosh nan vlhpisa ya mominchit ai ahlichi hosh, anonti achvfona ka kobvffi hokvt, mominchit kobvffi mak oke.

11. Hvsh iti lumaka na, achi mvt, anonti kvna kia ish bi na, achi ak inli tok oka. Yohmi ka hvch ik iti lvmako hoh kia, hatak a ish bi hokmvt, nan vlhpisa kobvffi o ish toba hoke.

12. Hvsh anumpuli, micha nana hvsh a kaniohmi puta kvt, a yuka keyu nan vlhpisa ho kvna hosh nan isht im vlhpisa hi vt kaniohma he vlhpiesa ka, hvsh chiyuhmashke.

13. Kvna hosh inla ya ik i nukhaklo ke tuk okvto, ilap mvt i nukhaklo iksho ho nan im vlhpisvt na palvmmi pisa he; mikma nan i nukhaklo yokvto nan im vlhpisvt im a palvmmi a ik i nukshopo hoke.

14. Itibapishi li vhleha ma! hatak vt ai yimmika yvt anukfoka miha kia, na toksvli kvt ik im iksho hokvto, yummvt nanta ho isht im ai achukma hinla ho? Ai yimmika illa kvt yummva okchalincha hinla ho?

15. Iksa ibafokha itibapishi, in tek kania hosh nipi bano cha, nitak yummva nana vpa he kia ik im iksho;

16. Yohmikma hvsh achvfona kvt yummak ash o haknip a nan isht apelvcha he ai vlhpesa ka hvsh ima keyu nana kia, Hvchi libishvt, hvchi kaiya hosh na yukput hvsh itvnowashke, hvsh im achi ka, nanta ho isht ai achukma hinla cho?

17. Yohmi ka ai yimmika yak kia yummak inli ho chohmit, na toksvli hvt ik im iksho ho, yummak illa hokmvt, illi hoke.

18. Ahli, kvna kia, Chishno vto ai yimmika yosh chi nukfoka ma, anonti vno vto na toksvli ak o isht ahanta lishke; nana ka isht ish ahanta keyu hosh nan isht a chi yimmi ha is sum otvninchikma, anonti vno vto nana ka isht ahanta li hosh nan isht a sai yimmi kvt chim otvninch lashke.

19. Chihowa hvt achvfa ka hvchi yimmi kvt, vlhpiesa ho hvchi yvmohmishke: nan isht ahullo okpulo vhleha ak kia yimmi cha, wvnihinchi hoke.

20. Yohmi kia ai yimmika yokvt, na toksvli hvt ik im iksho yokvto, illi mak atuk a, hatak ik hopoyukso chia hvt akostininchı ka ish ahni cho ?

21. Pin tikba Eblaham vt ilap ushi Aisaak a alta pakna vba isht ai okpvchit isht ahanta kak osh isht ai vlhpiesa tok keyu ?

22. Yvmmak okvt nan ishi ahanta ka ai yimmika yokvt kaniohmit ibai isht ahanta tok, micha nan isht ahanta pulla ho ai yimmika yvt isht ai ahlit kvnia tok a ish akostininchı cho ?

23. Micha Eblaham vt Chihowa ha i yimmi tok ; mihmvt yvmmvt nan ai vlhpiesa ha isht im vlhpisa tok, achi Holisso Holitopa vt ont ai ahlili tok ; mihma yvmmak ash osh Chihowa i kana isht hohchifo tok.

24. Yohmi hoka na yimmi illa kak keyu, amba nana ka isht ahañta kak o pulla hosh hatak vt kaniohmit isht ai vlhpiesa ka hvsh akostininchishke.

25. Yohmi ka yummak inli chohmi hosh ohoyo haui Lehab vt nan isht ahanta ilvppa pulla hosh okla yakni pisvt aya tuk a pehlichit ishi tuk osh, hina inla ha pit tihleli hosh isht ai vlhpiesa tok keyu ?

26. Hatak haknip vt, shilombish vt iksho hokvno, illi yo chatuk a, na yimmi hak kia nan isht ahanta kvt ik im iksho hokvto, illi ak inli hoke.

C H A P T A III.

Ai o walampi hosh inla ya na kil i miho ka he tok, 1; 5 pisunlvsh a il im alvmmashke, haknip a ai achvfa kitinosi kia, nan achukma hokmā, ik vlhpeso chinto hokmā, nana ka yvmihcha he bano; 13 na hopoyuksa ahlili hokvto im anukfila yohbit nanaiya, nukhobela kvt ik im iksho chatuk.

1. ITIBAPISHI li vhleha ma ! nan isht vlhpisa chinto 1 shahli mak osh pi onvtula hinla ka hvsh ithana kvt, nan ithananchi a lauvt hvch ik tobo kashke.

2. E moma kvt nana ka il ai ibetvblt kvt laua hoke. Hatak nana hosh anumpa ha isht ik ibetvblt hokmvt, mihi yosh hatak ai ahli, micha haknip a mominchit apesahancha hinla hoke.

3. Yakeh! pim antia chi ka issuba itih ha kapali a e fohki chatuk; micha haknip a mominchit e fullolichi hoke.

4. Yakeh! anonti peni hochito, yummvt na hochito fehna ho mahli kullo hosh shalit isht ihiya kia, apesuchi mak osh kanima ho ia hi a ahnikma, isht afana yvt iskvtnosi kia fullolichi chatuk oke.

5. Yummak inli ho chohmit isunlvsh vt nana iskvtnosi ak inli kia, nan aiaka mak o ai isht il atambli chatuk: mikma yakeh! lvak vt iskvtnosi kia iti laua chinto luachi chatuk.

6. Yohmi ka isunlvsh vt luak, micha ai ashuchi yakni mak oke: yohmi hosh isunlvsh vt pi haknip a ibai achvfa hatuk osh haknip a mominchit okpahani; micha yummvt ai okpuloka luak mak o isht libbi hatuk osh, hatak isht ai unchululi puta ka libbichi chatuk oke.

7. Nampoa ilaiyuka, micha hushi, micha nana hosh aka a ita balvlli, mikmvt okhvta anuka ai asha puta kvt kostini chatuk: hatak isht ai unchululi puta kvt yummak okvno kostininchu chatuk oke:

8. Amba isunlvsh ak okvno hatak naha hosh kostininchu hi o keyu; yummak okvt nan ik vlpeso, kostina hi o keyu, hatak isht illi banot alotowa hoke.

9. Yummak o Iki Chihowa ha isht il ai okpahanchikmvt; anonti yummak Chihowa ha holba hosh toba tok hatak puta kash yummak ash inli ho anumpa okpulo isht e mihachishke.

10. Itakha mih achvfa holitoblit isht ai okpvchi, mikmvt anumpa okpulo isht mihachi aieno hosh akohonchvshke. Itibapishi li vhleha ma! ilvppa puta kvt yakohma he tuk o keyushke.

11. Kvli hv akocha achvfa ka oka champuli, takba aieno ho akohonchi chatuk o?

12. Itibapishi li vhleha ma! fik vpi vt alif vni yo vna hinla ho? keyukmvt pak-vpi vt fik o vna hinla cho? yumm-

mak inli chiyuhmit kvli nanta hak osh hvpi oka, micha oka kash̄ha aienā ka kohonchi chatuk keyushke.

13. Kvta hak osh hatak hopoyuksa, micha nan ithana anukfohka achv̄kma kvt huchi takla ahanta cho ? mih mak osh hopoyuksa chukvsh yohbi hosh nana kvt ai vlhpiesa ho yvmohmi kvt na toksuli ha isht otvnihinchashke.

14. Amba it i potvnno homi, micha itachowa aienā hosh huchi chukvsh a fōka hokmvno, isht hvch ik ilauato, mikmvt nan ahli ka hvch ik a holabo kashke.

15. Na hopoyuksa ilvppak okvto vba ak o a minti keyu, amba yakni, hatak, micha nan isht ahullo okpulo aienā kak o immi hoke.

16. Kanima yo it i potvnno, micha itachowa aienā kvt ashakma, ai itasheha, mikmvt nana a kaniohmi ik vlhpeso moma aienā kvt yummak oka a takali hoke.

17. Amba na hopoyuksa vba ak o a minti hatuk osh vmmona ka hanta achv̄kma tuk mvt, anonti it i nanaiyachi, yohbi, ilap nan ahni ak bano keyu, nan i nukhaklo, micha nan ai vlhpiesa yohma he aienā kvt alotowa, iti shahsholechi iksho, micha peh il ahobi vt ik im iiksho chatuk oke.

18. Mikma nan ai vlhpiesa vni a nanaiyachi vhleha yummak osh im anukfila nuktaiyala hosh hohokchi hoke.

C H A P T A I V.

Nan ashv̄chi il-aiyuka ka ahah ! im ahna he i miha, 1 ; 13 mihmvt nan okchaya ilvppr̄t ont ataha kia kil ithano, yohmi hokvt pishno, micha nana ho il, ieshi moma kvt Chihowa hosh nan ai ahni kak a chi ka il im asilhashke.

1. IT in tanampi, micha itibi puta kvt huchi takla ya takali kvt, katima ko a toba cho ? hvchishno hvchi haknip isht ai yukpa he ahni kvt huchi haknip a a tanahampi kak o a toba ilvppak o keyu ?

2. Nana ka huchi bunna fehna ho kak osh hvch ik esho ; hvsh bi mvt, ishi ka hvchi bunna kia, hvsh isha hi o keyushke ; itibit it in tanampi aienvt hvsh aiasha kia, hvch ik asilhho kak okvt, hvch ik eshoshke.

3. Hush asilhha kia, hvch ik esho ; yummak oka hvchish-no hvchi haknip isht ai yukpa he ahni pulla kak o isht yopomot hush tahla ch_i kvt, ai vlpiesa keyu ho hush asilhha hokvt.

4. Hatak hau, ohoyo hau vhleha hvchia hvt yakni anush-kunna hokvto, Chihowa h_a in tanampi chatuk a, hvch ik ithano cho ? Yohmi hoka kuna hoh kia yakni a it i kanvt ahanta ch_i mak okmv_t, Chihowa h_a in twvp oke.

5. Chukvsh pi anukf_oka kak osh il it i potvnna hi a ahni ka Holisso Holitopa vt achi ka, ik ahlo h_o hvchim ahobo cho ?

6. Yohmi kia yummak okvto i shahlichit isht i kana y_a ima hoke ; yohmi hatuk osh Chihowa hvt ilefehnuchi puta ka i sanalikmv_t, amba chukvsh akanlosi yokvno i kanvt ape-lahanchi, achi hoke.

7. Yohmi hoka Chihowa ak o hush il im issa cha, hush im antiashke. Nan isht a hullo okpulo a hush i sanalashke, yohmikma yummak okvt hvch i kanulla hinla hoke.

8. Chihowa ai i bili_ka pit hush kanvllashke, yohmikma ilap mv_t hvchi bilincha ch_i hoke. Nan ashvchi vhleha hvchia hvt hvch ibbak a hush kashofikma, anonti im anukfila mia tuklo hvchia mv_t hvchi chukvsh a hush kostinin-chashke.

9. Il ilbushachit nukhaklot yaiyvt hush ai ashashke ; yukpvt hush ai asha tuk a na y_aya tobakma, na hvchi yupa yatuk vt chukush isht nukhaklo y_o tobashke.

10. Chitokaka itikba y_a a hush il akanlosechashke ; yohmikma yummak okvt halvllit hvchi wakela ch_i hoke.

11. Itibapishi li vhleha ma ! hvchishno hvchi bi_ka y_a nan it i mihachit hvch ik anumpulo kashke. Kuna hosh itibapi-shi h_a na mihachit anumpuli kvt itibapishi hash o anumpa onochi hokvt, nan vlpisa ak o nanumachi, micha nan vlpisa hash o kanimanchi mak oke ; amba nan vlpisa y_a ish kanimanchi hokv_t, nan vlpisa y_a holitobli mak o chia keyu, amba nan vlpisa kanimanchi mak o chia hoke.

12. Nan vlpisa ikbi vt yummak okvto okchalinchi, micha vbi aien_a kvt im ai vlpesa he bano mak osh achvfa kvt

ashvshke; chishno ak osh k̄ta chia hatuk osh inla ya anumpa ish onochi cho?

13. Inta! himak nitak, onna h̄a kanima ka tvmaha yvm-mak o il ona cha, afummi achvfa ka yvmmak o ashwvt, nan ita tobvt nan isht ahayuchit il ahashwashke, achi hvchia ma!

14. Onna h̄a nana a kaniohma hi a hvsh ithana keyu kvt. Hvchim ilhfiopak vt nanta ho? oka shobulli yvmmak okvt chekosi takla hokvno otvni tuk osh kvnia chatuk a, yvmmak o itilaui hoke.

15. Yohmi hoka Chitokaka ak osh yvmmma ahni hokma, pi okchaya cha ilvppa, keyukmv̄t yvmmma kanimá ka pi yv-mohma chi chishke, hvsh acha he tuk oke.

16. Amba himak okvno hvchishno hvsh il atambli kak osh isht hvchi yukpushke; nan isht ai yukpa yvmmma choh-mi puta kvt vlpesa keyu bano hoke.

17. Yohmi hatuk o kvna hosh nana ai vlpesa ka yohma hi vt ithana hosh, yvmmak ash ik yohmo hokvto, mihi yosh ashvchi mak oke.

CHAPTA V.

Chihowa yvt na palvmmi isht im atobbi yoka, hatak nan in laua nan ashvchi vt i nukshohompashke, 1, 7 Chob atok a nan im ai ithvnvt nana kvt ik pvlvmmi kia nuktaiyala he tuk; 13 nana kvt palvmmi ka anumpa ilvsha yo anumpohonlikmv̄t, anonti nana kvt isht im achukmakmv̄t vba taloa isht talohowashke; 16 pishno na kil aighlo nukhaklot il itim anohonla he tuk, micha vba isht it anumpohonla he tuk, 19 itibapishi nan ashvchi tuk a falvminchit nan ai ahli ka a hilechi aina hi a isht anumpuli.

1. INTA! hatak nan in laua hvchia ma! na palvmmi hvch on itula chi kvt, nishkin okchi mintit chitoli hosh hvsh yahayashke.

2. Nana laua hvchim ai asha tuk vt toshbit taha ma, hv-chi na fohka puta ka shushi ai vpa bano hoke.

3. Hvchin tvli holisso lakna, micha hvchin tvli holisso hvta aieno kvt laknv̄t taha: yohmi kvt lakna yvmmak atuk vt nan isht hvchi atokola he; mikmv̄t luak o chiyuhmit

huchi nipi a ahampa chi hoke. Nitak huchim ishtaiyopik mak a hi a huchim ilayak a hvsh itahobi tuk oke.

4. Yakeh! toksvli vhleha huchim osapa puta nana ai vmo tuk isht vlhtoba he tuk, yummak oka huchishno ak osh nana ik vlhpesalot falaminchit hvsh ishi tuk a, pahayvshke: yohmikma nan vmo tuk vhleha paya kvt Sabaolh Chitokaka haksobish a ont chukowa hoke.

5. Nan isht aiyukpa il impa in lauvt, hauj toba hosh yakni pakna ya hvsh maya tuk: vlhpoba illa chi hokvt ilhpinta chatuk mak o, itilauechit huchi chukush a hosh ipi-hinta tuk oke.

6. Hatak ai vlhpiesa yatuk a anumpa onochit hvsh bi tok; yohmi kia yummak okvt ik huchi sanalo kisha hoke.

7. Yohmi hoka itibapishi li vhleha ma! nukchintot hvsh hoyo na Chitokaka yvt vlashke. Yakeh! hatak osapa toksvli vt nan vni hochukma yakni a waya ka anukfillit hohoyo; yohmi kvt yamma ahni kvt nukchintot falaiachi hosh, vmona micha ont ishtaiyopi aienka im on umba chatuk oke.

8. Yohmi ka huchishno ak kia nukchintot huchi chukush a ai ahlichit hvsh hlampkochashke: Chitokaka vt ai vla he tuk vt atukonofut taha hoke.

9. Nanasi kia isht hvch ik it i potvntno kashke, itibapishi li vhleha ma! yummak keyukmut nana isht huchim vlhpisa hinla hoke. Yakeh! nan apesa yvt okhissa itikba ya hikia hoke.

10. Itibapishi li vhleha ma! hopaii Chitokaka i hohchifo pulla hatuk mak o anumpohonli tok vhleha hvt na palvmmi pisa, micha nukchinto tok puta mak o nan isht ithanvt hvsh hobacha chi kvt hvsh anukfillashke.

11. Yakeh! kvna hosh nuktanvt achunanchi mak o yummak okvt na yukpa, il ahni chatuk. Chob vt nuktanvt achunanchi tok okvno hvsh haklo chatuk: yohmi cha Chitokaka nana ai ahni tok ash hvsh akostininchis: yohmi kvt Chitokaka yvt nan i nukhaklo fehna, micha i kana fehna hoka hvsh akostininchiske:

12. Yohmi kia itibapishi li vhleha ma! ik kaniyohmi nana kia vba shutik, keyukmut yakni, keyukmut anumpa kullo

isht ai vlhpisa inla nana kia anumpa kyllo ai isht hvch ik il onocho kashke: amba yau, hvsh achikma, ik ai ahlí; mikmvt keyu, hvsh achikma, keyu mak ashke: yummak keyukma nan isht hvchim vlhpisa hvt hvchi on itula hi oke.

13. Kvna kia na palummi pisa kvt hvchi takla ahanta cho? yohmikmvt vba pit anumpohonlashke; kvna kia na yukpa kvt asha? yohmi hokmvt vba isht taloa mak o isht taloashke.

14. Kvna kia abeka kvt hvchi takla ahanta cho? yohmi hokmvt ilap ak osh iksa pehlichi vhleha ha hoyashke: yohmikma yummak ash osh vba isht anumpulit, Chitokaka i hohchifo ho nan ahama ya okla ahummichashke.

15. Yohmi hokma na yimmi hosh vba isht anumpuli pulla kak osh abeka ya hlakoficha he; mikma Chitokaka yvt yummak ash tanicha hi oke: mikma nana ho ai ashvchi tuk ok mak heno i kashofa he mak oke.

16. Nan hvsh ai ashvchi puta ka hvchishno bika yvt hvsh it im anohonlashke; mikmvt hvchi hlakofa chi kvt, vba isht hvsh it im anumpuli pullashke. Hatak ai vlhpiesa hosh na yimmi hosh vba pit anumpohonli kvt nana ka ai ahlichi fehna chatuk oke.

17. Elias vt hatak im anukfila im a kaniohma he vt hvpishno ak inli chohmi tok; yohmi hatuk osh ik umbo ka hi a ai ahlí fehnvt vba pit anumpohonli tok; yohmi ma yakni yvmma ik ai umbo ho afvmmi tuchina cha hvshi hannali aiena tok.

18. Yohmi ma anonti yummak ash inli hosh vba pit anumpohonli ma, Chitokaka yvt umbachi na yakni a nana kvt a wahaya tok.

19. Itibapishi li vhleha ma! hvsh kanima hosh vbanumpa ha i filvmmi hvsh aya na anonti achvfvt nukfohkichit falaminchi hokma,

20. Kvna hosh hatak nan ashvchi vt yoshubut ataya tuk a nukfohkichit falaminchi hokut, yummvt hatak shilombish a ai illi ya a hlakoficha he; mikmvt nan ai ashvchika laua ho ompohoma he aiena hoka ithaiyanashke.

PITA

I H O L I S S O V M M O N A H O K E .

CHAPTA I.

Shilombish nan isht i kana laua pulla kak o Chihowa ya aiokpahanchi, 1; 10 Hopaaii vhleha pulla ho Klaist isht im ai okchaya yvt tikbanli anohowa tok a anoli; 13 Chihowa im anumpa ho isht ai vta hatuk okvt, nan ashvchi ikshot maya chi ka i miha.

1. PITA, Chisvs Klaist im apostel okvt i yakni keyu ai it a simimpvt Pontvs, Kaleshi Kappatosia, Asia, micha Bihlinia aienai a sha ka pit ai okpvchi kvt,

2. Iki Chihowa hak osh tikbanli ithaiyanvt, okchaya he atokoli tok yummak oka Shilombish Holitopa yak osh kashohofi na, nana ka im antia ho Chisvs Klaist im issish isht o fima tok hvchia hoka; Nan isht i kana yvt hvchi anukfouyuka, micha nan isht it i nanaiya yvt hvchin lauashke.

3. Pin Chitokaka Chisvs Klaist Iki, micha in Chihowa hokvt holitopashke, yummak osh pi nukhaklo chinto hatuk osh, Chisvs Klaist vt illi tuk kia, falaminchit tanichi kak osh anonti himonvchit pikbi tok o, na yukpa fehna hosh,

4. Ai ahanta okpula himma keyu, micha liteha he keyu, micha aksha he keyu ho e hohoyo ka, hvchiimmi hosh vba yakni ya ai vlhtaiyaha hoke;

5. Yummak oka na yimmi pulla kak o Chihowa imi hlampko kvt ishi na ai okchaya nitak ishtaiyopi otaiyana chi ka ona hoke.

6. Yummak oka nan isht a hvchi yukpa fehna; yohimi kia yakosi itintakla ka ai yvmohma he vlhpesa ho isht

imomaka pisa ilaiyuka hush pihisa kak osh isht a huchi nukhaklo hoke :

7. Yohmi kia na huchi yimmi ka isht imomaka pihisa kak osh holitopa kvt, tuli holisso lakna okpulo chatuk, yummak oka luak isht imomaka pisa chatuk ak kia i shahli fehna hokvt, Chisvs Klaist vt haiakakma, isht a holitopa, micha annoa chinto aieno kvt isht a huchi otaiyani hokbano ;

8. Yummak oka huch ik peso kia, hush i hullo ; yummak ash himonasi ka hush pisa keyu ak inli kia, huch i yimmi hosh, nan isht ilaiyukpa annoa he keyu, micha isht a holitopa alotowa aieno ka isht a huchi yukpa :

9. Na huchi yimmi isht vltoba ka hush ihishi kvt, huchi shilombish isht ai okchaya yak fehna hoke.

10. Ai okchaya yummak o-hopaii vhleha hvt a ponahaklo, micha achunanchit hohoyo tok, isht i kana yosh huchim vla hi oka yummvt tikbanli anohonli kvt ;

11. Nitak katiohmi, micha nitak nanta, Chisvs imi Shilombish vt yummak ash anukfoyska hatuk vt Chisvs vt isht ai ilvursha he puta, micha yvmohmi hosh isht a holitopa he aieno ka tikbanli atokolit anoli tok a, ai ahnit hohoyo tok.

12. Yummak ash o im otaiyani kvt, ilap ak atuk ak o yohmi keyu ; amba pishno ak atuk mak o nana ka otvnhinchi tok yummak ash himonasi ka vbanumpa ha Shilombish Holitopa vba yakni mihinti hosh awant aya ho, isht huchim anumpohonli kash osh huchim anohonli tok ; nana yvmma puta kash enchil vhleha hokvt akostininch bahana fehna hoke.

13. Yvmohmi hoka huchi chukvsh a okchvlit aiksiachi cha, ahah ! ahnit, Chisvs Klaist vt ant haiakakma, isht i kana yosh huchim vla hi okvt ai ahli bano hosh hush hohoyashke.

14. Yohmi kvt vlla nan im antia yo hush chiyuhmit, tikba hokvno nana huch ik ithano hosh chukvsh nan ahni kak o hush yvmohmi beka tok vt, huch ik ile hobacho kashke :

15. Amba hvsh im antia ch̄i hvchi howa tok, yummvt nan ai ashvchika ik im iksho hoka, nan ai ashvchika ik hvch im iksho ak inlashke :

16. Uno vt nan ai ashvchika ik sv̄m iksho hoka, nan ai ashvchika ik hvch im iksho kashke ; achi hosh holihiso hoka ;

17. Yohmi ka Iki ak o hvsh im asithha hokmvt, yummak okvt hatak it i shahshohlechi iksho hosh hatak puta kvt ilap a kaniohmi tuk ak o isht im apesa yoka, ilvppa hvsh ai ahanta takla kvt hvsh holitoblashke :

18. Yohmi kvt hvch iki vhleha hak o hvsh im ai ithvna tok nana hvsh a kaniohmi ik achukmo yoka a hvchi filum-michi kvt nana okpula he tvli hvta, micha tvli holisso lakna chiyuhmi ho isht hvchi vlhtoba tok keyu kvt hvsh ithanushke ;

19. Amba Klaist im issish holitopa Chukfulhpobushi ai okpuloka iksho, micha liteha iksho yak a tok ;

20. Yummak osh yakni intolahpi vt ik tobo pilla kash o tikbanli vlhtoka tok osh, hvchishno yak atuk pulla kak o himak ont ishtaiyopi ilvppa otaiyani tok oke ;

21. Hvchishno yvt yummak atuk pulla kak o Chihowa ha hvch i yimmi pulla kvt, yummak osh illi tuk a falamin-chit tanichi cha, isht a holitopa ka ima tok oka ; ai okchaya ya Chihowa yak o im ai ishi la he ai ahnit, hvch i yim-mashke.

22. Yvmohmi ka Shilombish ak osh hvchi anukfoyuka ho vbanumpa ai ahli ka hvsh im antia hosh, hvchi shilombish a hvsh kashofi hatuk osh, itibapishi vhleha hoka ilahobi keyu hosh isht i shahlichi fehna hosh hvsh it i hullashke ;

23. Chihowa im anumpa, yummvt mahayvt bilia yak atuk pulla kak o na nihi okpula he keyu yo atuklant isht hvsh a toba hoke.

24. Yohmi ka haknip puta kvt haiyukpulo yak o chiyuhmi, micha hatak isht a holitopa moma kvt haiyukpulo pakanli yak o chiyuhmi hoke. Haiyukpulo yash ot brshikma, pakanli yash ot liwelit taha hoke.

25. Amba Chihowa im anumpa hokvto mahayvt bilia hoke. Yohmi ka anumpa ilvppak o vbanumpa hvt isht a hvchim anuhumpa hatuk oke.

CHAPTA II.

Nan ik vhlpeso isht im anukfila puta ka naksika bohla chi ka i miha, 1; 5 Klaist akosh tikba intola yo okla ai itabana hatuk a anoli; 11 haknip imma nan isht im anukfila yokvno kano pit kancha chi ka achi; 13 yakni pakna nan apesa maya ka im antia he; 18 yvka hvt kaniohmit i nahollo ya im antia hi a ithvnachi.

1. YUMOHMI hoka isht i nukkilli, na haksichi, nan ilahobi, na potvnnno, anumpa chukushpvli puta a moyuma ka mokofit naksika hvsh boyuhli cha;

2. Ullosi himona vta chiyuhmit, yummak o isht a hvchi hofahantit ai okchaya ya hvsh ona chi mak osh, vbanumpa pishukchi ai ahli kak o bunna fehnvt hvsh hohoyashke.

3. Chitokaka yvt hvchi kana achukma fehna ho hvsh akostininchai ai ahli hatuk okmvt;

4. Yummak okvt tvli okchaya chiyuhmi ho hvsh im ohona ka, hatak okvto ik ahnincho fehna tok kia, Chihowa hokvto holitobli fehnvt atokoli tok;

5. Hvchishno ak kia tvli okchaya chiyuhmit, shilombish chuka hvsh toba hosh, na holitompa isht vlla holitopa yosh Chisvs Klaist ak atuk pulla kak o, Chihowa hokvt im ulhpiesa ho, chukrsh isht aiokpvchi puta ka pit hvsh im ihisa hi a tok.

6. Yumohmi hoka anonti Holisso Holitopa ya a foyuka kvt, Yakeh! chukbi in tola tvli vlhtoka, holitopa fehna ho Saion a a bohli lishke: yohmi ka kvna hosh yummak oka i yimmi hokvt hofahya he keyu hoke, achi tok.

7. Yohmi hoka yummma i yimmi hvchia hokvno hvchi holitopa fehna; amba ik im antio yokvno, chuka ikbi vhleha yash ot tvli ya ik ahnincho ki tok, yummak ash inli hosh chukbi in tola noshkoboka yo toba hoke.

8. Micha ik im antio yo vbanumpa isht ai ibetvblu yummak fehna kak osh isht ai ibetvbla he tvli, micha isht ai

okpula he t̄li chito aienā h̄o, yummak o ai yvmohma he im v̄lhp̄ihisa tok.

9. Amba isht atiaka v̄lhtoka, m̄iko i na holitompa isht v̄tta; oklushi holitopa, Chihowa immi ai əhli fehna hvchia hoke: yohmi ka yummak osh hvch̄i howvt ai okhlilika ya a kohchit im atohwikeli chinto ka hvchi foyuki tuk o, ilap isht aiokpahancha he a puta ka otvñinchit hvsh anohonla he a tok:

10. Yohmi kvt nitak tikba hokvno Chihowa im okla hvchia ha tok keyu kia, himak ano Chihowa im okla hvchia hoke; isht i kana ya hvch ik esho ki tok kia, himak ano isht i nukhaklo ka hvsh išhi tuk oke.

11. A holitopa vhleha ma! nana hvchim ai ahni li kvt hatak ik ithano, micha ilap i yakni keyu ai itvñowa chiyuhmit, haknip imma nan ahni, yvmmvt shilombish in tanampi yoka hvsh i filahamashke:

12. Nana hvsh a kaniohmi kvt achukma hosh v̄banumpa ik ithano okla h̄a iba takla hvsh ahantashke: yohmi na nana ik achukmo yvmihchi chohmichit hvch̄i sanalit anum-pohonli kia, nana achukma puta hvsh yimihinchi ka pihsakmvt, Chihowa yvt i nowvt aya nitak oka yummā okla holitoblashke.

13. Chitokaka yak atuk pulla mak o hatak i nan v̄lhp̄isa puta ka hvsh im antiashke: m̄iko yok má moma i shahli yo chohmichit hvsh holitoblashke.

14. Micha nan v̄lhtoka vhleha nana ik achukmo yvmohmi puta hokvno nan v̄lhp̄isa onochikmvt, nana achukma yvmohmi yak okvno aiokpvcha ch̄i h̄o, m̄iko yvt atokohonli tok a hvsh holitoblashke.

15. Yohmi ka nana kvt ai v̄lhpiesa h̄o hvsh yvmohmi hosh hatak im anukfila iksho nan ik ithano itih puta ka hvsh i kamala he yak o, Chihowa hokvt ai ahni hoke:

16. Yuka keyu hvchia kia, hvsh yvmohmi kak osh nan ik v̄lhpeso ya isht hvsh ompohomo ná: amba Chihowa in tishu vhleha mak o hvsh chiyuhmashke.

17. Hatak puta ka hvsh holitoblashke. Hvsh itibapishi

vhleha hä hush i hullashke. Chihowa yä i nukshoput hush holitoblashke. Miko yoka hush holitoblashke.

18. Yuka hvchia hvt isht a holitopa he vlhpesa ho hvchi nahullo yoka isht hush im antia kvt achukma, micha im anukfila yohbi aienā kak bano keyu, amba hvch i kvlo aie-na ka hush im antia ak inlashke.

19. Yohmi ka hatak vt chukvsh ak osh Chihowa yä isht im vlhpiesa kak osh isht a nukh^äklo yä vlhpiesa ahnit, ai vlhpiesa keyu ho isht ilbahasha hokma, ilvpput isht i kana hoke.

20. Yohmi ka nana ai vlhpiesa keyu ho hush ymohmi tuk osh vlhpiesa ahnit, isht hvchi bohöwa hokmt, ymmvt nan isht annoa achukma nanta ho? amba nana ai vlhpiesa ho hush ymohmi tuk kia, vlhpiesa ahnit isht hvch ilbahasha hokvno, ilvppak o Chihowa hokvto isht im vlhpiesa hoke.

21. Yohmi ka ilvppak o hush ymohma he osh hvchi vlhtoka tok; pishno ak atuk pulla mak o Klaist ak kia ilbahasha kvt, ilap a nohöwa tok a il iakaiya he mak o pim abahanchi hatok oka:

22. Ymmvt nan ashvchi tok keyu, haksichi kia itih hä foyuka tok keyu:

23. Ymmvt ilap a isht ik ahobalot anumpuli mak o, afalaminchit isht ik ahobalot anumpuli keyu; na palvmmi onochi ma, na palvmmi onocha hé kia miha tok keyu; amba ai vlhpiesa apihisa yak o il im issa tok:

24. Ymmak osh nan il ai ashvchika yä ilap haknip fehna ak o ilap inlit il onochi hosh iti yä takali tok: yohmi ho nan ai ashvchika puta il im ihinli hosh, nan ai vlhpiesa yä il im okchaya chi ha tok: ymmvt fahama tok ak o isht hvchi hlakofi hoke.

25. Yohmi ka chukfvlpoba tamoa chiyuhmit hush ituno-wa tok kia, himonasi kano chukfvlpoba Apesvchi micha hvchimi shilombish ma Nan im atahli yoka falamvt hush im ona hoke.

CHAPTA III.

Hatak vt im ohoyo itatuklo kvt nan vlpiesa ho itim anukfilvt itapela he im abvchi, 1; 8 it i hullot it ibai achvfa he; 14 na palvmmi ka isht it ibai il bvsha he; 19 Oka falama yvt ik ayo kisha ma okchayvt aiasha tuk a Klaist vt nan i kanimihchi tok a anoli.

1. ANONTI tekchi hvchia hvt hvchi hatak oka hvsh im antiashke; yohmi na kania kvt vbanumpa ha ik ahnincho hokmvt, vbanumpa hash ik haklo kia, tekchi ak osh nana a kaniohmi kak o, yvmmvt vlhpesa ahnit isht anukfohka ak inli yoba na;

2. Yohmi kvt haui imma ai yvmohmi ik hvchim iksho, micha hvsh holitobli aien a pihisa kak osh yvmohma hinla hoke.

3. Yvmma isht shema yvt pashi tanvffo, micha vli holisso lakna isht shema, micha na fohka fohka aien paknali isht shema yvmmak ovno keyu:

4. Amba chukvsh anukaka a toba hatak luma okpula himma keyu, anukfila yohbi, micha nuktanla isht shema yo fehna yvmmak ashke; ilvppak osh nan ai vli chinto fehna Chihowa hvt ai ahni hoke.

5. Nitak tikba ma ilvppak o yakohmit ohoyo hochukma Chihowa i yimmi ak inli hosh, isht ile shemahanchi kvt, ilap i hatak a im antia ya tok.

6. Sela ak oh kia Eblaham a i shahli hochihifot im antia tok: yvmmak o ushetik hvchia hoke, nana ai vlpiesa ka hvsh yvmohmi takla, micha isht a nukshopa he kia hvch ik i nukshopo hokmuto.

7. Anonti i hatak hvchia hvt nana ka ithaiyana hosh ibai ahantvt, hlampko ik hvchi lauwo mak o chiyuhmichit, isht i kana ai okchaya bilia hvsh it ibai isha he mak okvt, hvchi tekchi a hvsh holitoblashke; yohmi ho anumpa ilbvsha hvsh anumpohonli kvt ik ai ataklamo kashke.

8. Ai ishtaiyopi ka moyumvt hvchim anukfila hvt ai achvfa cha, it i nukhaklot, itibapishi vt i hullo chiyuhmit, inla i kanvt chukvsh akanlosi mvt aienashke.

9. Micha nana ik achukmo hvchi yvmihchikma, nana ik achukmo yo hvch ik falamincho kashke: micha isht ik hvchi ahobalokma, isht ik ahobalo yo hvch ik falamincho kashke; amba ilvppa ik holbo i kanvt hvsh im anumpulashke; ilvppak o hvsh yvmohma hi osh hvchi vlhtoka tok vt hvsh ithana hokvt, yohmi hosh nan isht ai yukpa ya hvsh pisa he vlhpesa yatok.

10. Yohmi ka kvna hosh, Si okchaya cha, nitak hochukma ho pihisa li hokbano ai ahnikmvt, isunlvsh oka nana ik achukmo ka i filvmminchchi cha, itivlbi yoka na haksichi ya isht ik anumpulo kashke.

11. Nan ik achukmo kvno i filvmmi cha, nana achukma kak o yvmihinchashke; it i nanaiya yak o hohoyot, achunanchit iakaiyashke.

12. Yohmi ka Chitokaka nishkin okvt ai vlhpiesa yokvno o wakaya, micha haksobish okvt im anumpa ilbvsha puta ka in tiwa hoka; amba nana ik achukmo yvmihchi puta hokvno Chitokaka nashuka yvt i sanali hoke.

13. Micha nana achukma yvmihchi yak o iakaiya vhleha hvchia hokma, keta hak osh hvchi hotopala hinla ho?

14. Amba nan ai vlhpiesa yak atuk pulla mak o isht hvsh ilbahasha hokmvt, hvchi yukpa hoke; micha nan isht nukshobli yoka i nukshopvt isht hvch ik komunto kashke;

15. Amba Chitokaka Chihowa yak o i nukshopvt hvchi chukush isht hvsh holitoblashke; micha ai okchaya pisa la he ai ahnit hvchi anukfoyuka a kaniohmi ka hvchi ponohaklo puta ka anukfila akanlosit, holitoblit anumpa falama ka hvsh ima chi kvt hvch im vlhtaha kak banashke.

16. Isht il akostininchchi achukma ho hvsh ieshashke: yvmohmi ho nana ik achukmo yvmihchi chohmichit nana ik achukmo isht hvchi anumpohonli kvt, Klaist a anukfoyukvt nana achukma hvsh yvmohmi ka, anumpa ahli keyu hvchi onochi tuk vhleha hvt isht a hofahyashke.

17. Yohmi ka Chihowa hak osh ik yohmi ai ahni hokma, nana achukma ho yvmohmi cha, isht ilbvsha kak osh achukma kvt, nana ik achukmo ho yvmohmit isht ilbvsha ka, i shahli hoke.

18. Yohmi ka Klaist ak kia himonna ma nan ai ashvchika pulla kak o ai vlpesa yvt ik ai vlpeso yak o vlhtobvt isht ilbusha tok ; yohmi hosh pi pehliechit Chihowa ya isht pim ona chi ha tok : haknip okvto illi ha tok kia, amba shilombish okvto okchaya tok :

19. Yummak ash o shilombish yuka vhleha ai asha ka ivt ont isht im anumpohonli ak inli tok :

20. Yummak okvt nitak tikba ma peni yokvt toba itin t^akla Noah okvt ahanta nitak yummak ash fehna kuno, Chihowa hut i nukhaklot isht i nukkilli onochi svlaha hosh ahanta ma, im antia he keyu ki tok ; peni yummak ash o kanimosi yvmmvt shilombish untuchina hosh oka ya isht a hlakofi tok.

21. Yummak ash o chiyuhmi hosh himonasi ak kia baptismo yvt, yummak osh haknip liteha yoka isht kanchi keyu, amba Chihowa itikba isht il akostininchu achukma ai yvmohma he il apihisvt, Chesus Klaist illi tok kia falamvt tani tok pulla kak o yvmoohmi kak osh pi okchalinchi ak inli hoke.

22. Yummak okvt vba yakni yoka ona tuk osh, Chihowa im isht im pakimma yak o binili hoke ; yummak oka enchil, micha miko, micha nan vltoka puta kvt i nutvt im antia he ya tok.

CHAPTA IV.

Nana moma kvt ont ai vhla chi kvt olanlosi vla hoka, Klaist iakaiya pullvt nanashvchi issvt ai i filvnmmit itanowa he i miha, 1 ; 12 nan i palvmmi puta ka hopohlvli.

1. **YUMOHMI** ka Klaist vt hvchishno yak atuk pulla kak o haknip a isht ilbahasha tok a, chiyuhmit hvchishno yak kia im anukfila hatok chiyuhmi ka hvsh il ataiyahli mak inlashke : yohmi ka haknip a isht ilbahasha tok vt nan ai ashvchi ya issvt ai i filvmmi ha tok oke :

2. Yohmi kvt yvmmvt haknip vt okchaya ai itin t^akla kvt hatak haknip imma nan ahni isht ahanta he a tok keyu, amba Chihowa nan ai ahni kak a hi a tok.

3. Yohmi ka pi okchayet il ahanta tok ash ai vhli itin takla kak kia, haui imma anukfilli, chukvsh nan ahni, oka homi ishkot hoita, isht a haksichit tasimbot atampa, micha na holba nan isht ik ahobo puta ka isht il ahanta kvt, vbanumpa ik ithano vhleha nan ai ahni hokvno il a yvmihcha hi ya ona tok oke.

4. Yummak oka isht ahanta hosh ilap vt nan ik achukmo puta ka isht afekommit a tasimbo atampa ka hvch ik ibafokko kak o okokko ! ahnit, isht im anukfila hosh nan ik achukmo kia isht hvchi anumpohonli hoke.

5. Yummak okvt illi, okchaya aienka nan im apesa he im vlhtaiyaha yak o ilap nana a kaniohmi tuk vt il im ai anola hi oke.

6. Yohmi ka ilvppak a he mak o illi tok vhleha yummak kia vbanumpa hv isht im anuhumpa ak inli tok ; yohmi ma hatak haknip imma nan ahni yokvt nana ka im apihisa kia, Shilombish Holitopa yak osh apelahanchi ho Chihowa ya holitoba hi a tok.

7. Amba nan okluha kvt ont ai vhla chi kvt atukonofuske ; ymohmi hoka nana ka hvsh ile oktambli cha, ahah ! ahnit, anumpa ilbusha hvsh anumpohonlashke.

8. Mikmv t hvchishno inli hvsh iti hullo ai qhli fehna hosh nan okluha ka hvchim i shahli hosh hvsh ieshashke : yohmi ka it i hullo yak osh nan ai ashvchika lawa kia ompohoma hi oke.

9. Ik im vlhpesot anumpuli iksho hosh it i kanvt hvsh it apelvhashke.

10. Hatak puta kvt isht i kana hvlbina ishi ha tok mvt, yummak ash inli ho isht iti apihinla kvt, Chihowa isht i kana ilaiyuka nan im apesvchi achukma yak o chiyuhmashke.

11. Hatak kanima hosh anumpuli hokmvt, Chihowa im anumpa hv abuchi kak o anumpulashke ; hatak kanima hosh vbanumpuli ilbusha ya nan isht im ahanta hokmvt, Chihowa hv kanimihchit hlampkochi kak o isht ahantashke : yohmi na Chihowa hv Chisus Klaist ak atuk pulla kak o nan okluha ka isht a holitopashke, yummak o isht a holitopa, mikot ahantvt bilia yvt immit biliashke. Amen.

12. A holitopa vhleha ma! isht hvchi imomaka pisa chi luak nan isht imomaka pisa imma hokvno, okokko! ai ahnit, nana ilapissa fehna kaniohmi hosh a hvchi yomohmi ka ik hvchim ahobo kashke.

13. Amba Klaist vt ilbvsha puta tok a chiyuhmit hvsh ibai ilbvsha ak inli hokvt, hvchi yukpashke: yohmi kvt ilap isht a holitopa hokvt otaiyanikma, hvchishno yak kia nan isht il ai yukpa chinto ho isht a hvchi yukpa mak a hinla hoke.

14. Klaist hohchifo ak atuk pulla kak o isht ik hvchi ahobalo hokma, hvchi yukpa hoke; yohmi kvt isht a holitopa Shilombish, micha Chihowa imi Shilombish vt hvchi onvtuyula hoke; yvmmrto Klaist a isht ik ahobalot isht anumpohonlikma, amba hvchishno yokvto hvsh holitobli hoke.

15. Yohmi kia hvsh kanimi kvt hatak bi^{ka} vbi, na huko-pa, nan ik achukmo yvmihchi, micha hatak inla nan im a kaniohmi ka ataklummi aien a hokvno chiyuhmit ik hvch ilbvsho kashke.

16. Amba hatak kanima kvt vbanumpuli yo chiyuhmit ilbahasha hokmv, ik hofahyo kashke: amba ilvppa yakohmi hokvt Chihowa yak o holitoblashke.

17. Yohmi ka Chihowa im aboha yak o nan vlpisa yvt ai onvtulvt isht ia chi pulla ka nitak vt vla hoka; yohmi ka pishno ak o t^{ik}ba ai isht ia hokma, Chihowa im vbanumpa ik im antio vhleha ont im ai vhli kvt katiohma hi o?

18. Micha ai vlpiesa yokut palummi ho okchaya hokma, Chihowa ik holitoblo, micha nan ashvchi aien a kuto katima ko ai otaiyana hi oh cho?

19. Yvmohmi hoka Chihowa nana ai ahni ho im antia kvt ilbahasha vhleha hokvto, nana achukma ho ai yvmohmit nana Ihikbi ai ahli yoka ai ahnit, ilap shilombish a iesha chi ho, im ihjsashke.

1. U^BANUMPULI iksa apesuchi vhleha hvch itin takla aiasha ka nana atohnochi li kvt, vno ak kia ubanumpuli iksa ibai apesuchi, micha Klaist vt ilbahasha tok puta atokowa anoli, micha na holitopa kvt otaiyana hi oka ibai isha he ak inli sia hoke.

2. Chihowa in chukfvlpoba hvch itin takla ai asha ka hvsh ipihinta kvt, yohmi la he atuk okvt ik kaniohmi kia ahni keyu, amba yohmi likbano ahnit, ai vlpiesa keyu isht a hofahya he nan isht ahayuchi bvnna keyu, amba hvchim anukfila hvt vlhtaha achukma hosh apesvchit hvsh pehlichashke.

3. Yohmi kvt Chihowa immi hoka i shahli chiyuhmit ahanta he keyu, amba chukfvlpoba ya nan isht im vlbuchi ya he tuk.

4. Yohmi ka chukfvlpoba apesuchi Miko yvt ant il otv-ninchikma, isht a holitopa iachuka okpula himma keyu mak o hvsh isha hi oke.

5. Yvmmak i chiyuhmit himita hvchia hvt asvnonchi ya hvsh im antiashke; ahli, moyuma kvt hvsh it im antia cha, im anukfila akanlosi ho isht hvsh shemashke: yohmi ka Chihowa hokvt ilapunla yano i sanali cha, im anukfila akanlosi yokuno isht i kana ya ima chatuk oka.

6. Yvmohmi hoka Chihowa ibbak hlampko nuta ya hvsh im il akanlosehashke; yohmi na ont ai yvmohma he ai vlpiesak ma vba hvchi wakeli mak inlashke:

7. Anukfila isht a hvchi komunta puta ka yummak o hvsh onochashke: yohmi ka yvmmvt hvchi anukfihinli hoka.

8. Ahah! ahnit, hvchi okchashke, hvchi sanali nan isht ahullo okpulo yvt kvna kia isht nanvblu bunnna kvt, hohoyot, koi chito wohoha chiyuhmi hosh nohowa hoka.

9. Yummak oka na yimma kvllo ai ahli hosh hvsh i sana-lashke: hvsh itibapishi vhleha yakni ilvppa ai asha hokvt, na palvmmi yummak o chiyuhmi puta ka pihsa ha tok oka, hvsh ithaiyanashke.

10. Amba Chihowa isht i kana chinto yummak osh Chisvs Klaist ha tok pulla mak o ilap isht aholitopa bilia yoka il esha he mak o pi atokoli tok vt, yakosi itin takla hvsh

ilbahasha ha yak o, ai ahlichit kvlochit hilechit, hlampkohonchit, chukvsh fitikvchi iksho ho hvchi anukfokihinhashke.

11. Yummak o isht a holitopvt, mikot bilia yvt immit biliashke. Amen.

12. Silfanus hvsh itibapishi ai ahli ahni li ha tuk osh, anumpa kanomosi ka holissochit ima li ho, isht hvchim ia tok; yohmi kvt nana hvchi miha li kvt, hvsh a hikia yummak osh Chihowa hvt isht i kana ai ahli mak o, atokolit hvchim anoli lishke.

13. Ubanumpuli iksa Babulon hikia kvt, hvch ibai vlhtoka ha tok vt hvchi aiokpvchishke; mikma svso Makus vt yohmi ak inli.

14. It i hullo it i suksowa isht hvsh it aiokpvchashke. Klaist ibai achvfa hvsh moyuma ka isht it i nanaiya kvt hvchi anukfoyukashke. Amen.

II. PITA

I HOLISSO ATUKLA HOKE.

CHAPTA I.

Nan isht il aiyukpa chinto nan ho vbanumpuli vt isha chi hosh vln-toka ka anoli, 1 ; 5 nan ai vlnhpiesa a yvmihcha he moma ka yv-mihchi, yohmi pulla hosh ai okchaya pisa chi kvt ai ahlicha chi i miha : 14 ilap vt illa chi nitak vt ai vla hosi ka anoli ; mihmvt Klaist i yimmit akvllot hiela hi a i miha.

1. SAIMON Pita, Chisvs Klaist im apostel, micha in tishu hokvt pin Chihowa, micha pi Okchalinchi, Chisvs Klaist vt nan aivlhpiesa yvmohmi tok pulla mak o, na yim-mi pi holitopa itilaui ka ahayuchi tok vhleha yvmmak o pit aiokpuchi kvt,

2. Chihowa, micha Chisvs pin Chitokaka hush ithaiyana kak osh nan isht i kana, micha isht it i nanaiya aieno kvt huchin lauashke ;

3. Yohmi kvt ilap ai ahli kak osh nan okluha isht ai ok-chaya, micha Chihowa isht holitobi imma aieno ka pihima kvt, ilap ithvna kak osh nan ashvchi ik pim iksho hosh isht a holitopa ya e pihisa he mak o, pi atokoli tok :

4. Yvmmak o nana holitopa, micha achukma chinto puta ka isht a pihima ; yohmi kvt ilvppak atuk pulla kak o nan okpulo chukvsh nan ai ahni yatuk pulla kak o yakni ilvppa ai asha ka hush i filummi hosh, Chihowa im anukfila ha hush ibai isha chi ha tok.

5. Micha ilvppa atuk pulla kak o achunanchi fehna hosh na huchi yimmi ya nan vlnhpesali ya isht hush otvnin-

chashke: micha nan v̄lhpesali ya nan ithana ya isht hvsh otvninchashke.

6. Micha nan ithana ya ile oktampli ya isht hvsh otvninchashke: micha ile oktampli ya nuktaiyalvt achunanchi ya isht hvsh otvninchashke; micha nuktaiyalvt achunanchi ya Chihowa isht holitobli ya isht hvsh otvninchashke.

7. Micha Chihowa isht holitobli ya itibapishi vbanumpuli it i hullo ya isht hvsh otvninchashke; micha itibapishi vbanumpuli it i hullo ya hatak moma i kana ya aieninchit isht hvsh otvninchashke.

8. Yohmi ka nana ilvppa puta kvt hvchi anukfoyuka kvt isht i shahlit laurt ia hokmvt, pin Chitokaka Chisvs Klaist hvsh ithaiyana kvt, in takobit hvch ik vno ka hi o hvch ikbi keyu hoke.

9. Amba nana ilvppa puta ka ik im iiksho hokmvt, nishkin tamoia hosh mishema pit pisa he keyu, micha tikba ilap nan ai ashvchika yvt i kashofa ha tok vt imi haksi hoke.

10. Yvmohmi hoka na hvchi vlhtoka, micha na hvchim annoa aieno kvt hvchim ai ahla chi kvt ai yiminta hosh hvsh achunanchashke: yohmi ka nana ilvppak o hvsh yimihchi hokmvt, chi tula himma keyu hoke:

11. Hvsh yakohmi hok mak o pin Chitokaka, micha pi Okchalinchi Chisvs Klaist apehliechi ka bilia ya im vltaha achukma hosh ik chukowá, hvchim ai ahni fehna hi oke.

12. Yvmohmi hoka nana ilvppa puta ka hvsh ithaiyana, micha vbanumpa hvchi yimmi kvt kvllo t hvsh a hikia ak inlia, hvsh ithaiyana chi ka himonna hvchi anukfohkihinchi li kvt an takoba he keyu hoke.

13. Ahli, vlhtipo ilvppa anukaka ahanta li t̄akla kvt, hvsh ithaiyana chi kak o hvchi anukfokihinchit hvchi okchvli li kvt ilvppvt ai vlhpiesa, ahni lishke.

14. Chekosikma v̄m vlhtipo ilvppa mokofit boyuhli la chi pulla ithaiyana li kvt, pin Chitokaka Chisvs Klaist ak kia v̄m otvninchi akinli ha tok ak oke.

15. Yvmohmi hoka a sulli ha kia, nana ilvppa puta ka hvsh ithaiyana bieka hi ak o hvchim ai ahni li kvt achunanchi la hi oke.

16. Pin Chitokaka Chisus Klaist vt vla tok, micha nan im ai ahli tok aienka e hvchim anohonli mvt, anumpa nan isht ik ahobo nan isht haksicha he nana ho il iakaiya ha tok keyu, amba ilap isht a chinto ka nishkin isht ai atokoli pia ha tok.

17. Yohmi ka, Ilvppak osh Suso a holitopa yoke, yummak o nan isht vm vlhpiesa hoke, ahanchi anumpa yosh Holitopa chinto ka a minti hosh im vla kak osh isht a holitopa, micha isht annoa achukma ka Iki Chihowa yak o im ai eshi tok.

18. Mihma itvpehvt nvnih paknaka holitopa yak o e hieli ho, anumpa ilvppvt vba yak o minti hosh vla ho e haiyaklo tok.

19. Hopaïi im anumpa hak osh isht ai atokowa i shahli hvt pin tonla ak inlishke : yummak oka pula hosh ai okhlili-ka yo hikia chiyuhmi ho hvsh anukfihinli na onnvut taha, micha onnahinli fochik vt hvchi chukush a a kohcha hi okvt hvchim vlhpiesa hoke.

20. Hopaïi im anumpa hvt ilap im anukfila ha tok keyu ka tikba ilvppa hvsh ithanashke.

21. Yohmi ka hatak nana ai ahni ho nitak tikba kash hopaïi im anumpa hvt vla tok keyu, amba hatak holitopa yosh Chihowa nana ai ahni pulla ho Shilombish Holitopa yak osh nukfokihinchi ho anumpohonli tok.

CHAPTA II.

Vbanumpa ithvnachi ik ai ahli vt wakaya he, atuk kia yummak ashott im antia pit a moma ka Chihowa yvt okpvnit tahla he; amba hopyuksa vleha hokvno okchalincha he tikbanli anoli, 1; 10 nan ithvnanchi ik vlheso ilvppak ash achukmvt anoli.

1. **YOHMI** kia hopaïi ai ahli keyu vleha hvt okla ai itin takla ya ai asha ak inli beka tok a, anonti nan ithvnanchi ai ahli keyu kvt hvch itin takla ai asha he ak inli; yummak okvt isht okpula he ai ahli isht anumpa keyu puta ka lumvt isht hvch iba chukowa mvt, ilap a chumpa tok, Chitokaka

kanchi hosh isht ai okpulo ya tushpa fehnvt isht il onocha hi oke.

2. Mikma lawa kvt yummvt nan isht ai okpuloka he ai yvmohmi puta ka hobacha he; yummvt yvmohmi kak o hina ai ahli yvt nan isht ik ahobot isht anumpa hi oke.

3. Micha yummvt nan ahayuchi bvnna kak osh isht hak-sichi anumpa ho nan isht itatoba yo isht hvch ikba hi oke; yvmmma nan isht im vlhpisa tok a hopaki kia svlaha he keyu, micha yvmmma isht ilbvsha hi vt nosilhha keyu hoke.

4. Yohmi ka Chihowa yvt enchil vhleha hvt nan ashvchi ma ik il atombo hosh, amba ai okhlilika tvli itatakvli isht takchi cha, ai okpuloka ya pit ashachi kvt yvmmma ai asha na nan vlhpisa hi vt ai ona hi a tokma;

5. Micha yakni vmmona ka ila tomba tok keyu, Chihowa holitobla he keyu vhleha yakni paknaka ai asha tuk ash oka falama yo isht onochi tok: yohmi kia Noah hatak isht untuchina nan ai vlhpiesa isht anumpohonli yano okchalin-chi tok.

6. Chihowa ik holitoblo himak a pilla ai asha he ak osh isht im vlbvcha hi o ihikbi hosh, tvmaha hochito Sotom micha Komola ita tuklo ka hushmit hituk chubbi banochi kvt, okpulo ai ahli mak o im apihisa tok.

7. Mihmvt hatak achukma Lot okvt, hatak haksi nan a kaniohmi liteha ya isht nukhaklot ik im achukmot ahanta tuk a, a hlakofichi tok.

8. Yohmi ka hatak ai vlhpiesa yummvt yvmmma ai itin-takla ahantvt, nana ka pihsa, micha hahaklot, nan ai vlhpiesa keyu ai yvmohmi kak o onna hosh onnakma chukvsh vt isht a hotoyupa tok:

9. Chitokaka yokvt Chihowa i hullo yokvno isht imo-maka pisa ya kanimihchit akohchi kvt ithana; micha ai vlhpiesa ka yvmihincha he keyu yokvno kanimihchit ishi na nan im vlhpisvt isht ilbvsha chi nitak vt ai ona hi oka ithana hoke:

10. Micha haknip isht ai yukpa anuksitia hosh chukvsh nan ai ahni kak bano iakaiya, micha nan vlhpisa yo ik holitoblo aieno kak fehna ho kak heno i yvmihcha hi oke.

Ilapunla, ilap nan ai ahni kak bano, nan vlhtoka puta ka nan isht ik ahobalot anumpuli kvt ik nukshoposhke.

11. Yohmi kia enchil vhleha hokvto isht ai ahli, micha isht hlampko aieno kvt yvmmma i shahli fehna kia, Chitokaka itikba ya isht ik ahobalo anumpa kia yvmmma ai onochi keyu hoke.

12. Amba ilvppvto nampoa nan ithana keyu ilap nan ahni bano hosh itvnova ka, ishit okpvna hi o toba tok chiyuhmit nana ka akostininch keyu kvt, isht ik ahobalot anumpulishke; yohmi kvt ilap im anukfila okpulo nan isht ai yvmohmi kak osh isht ai okpulot kvnia chi hoke:

13. Micha yvmmvto nitak kia nan impvt, nan ishkot isht a haui kvt nan isht ilaiyukpa yo im ahobut ai asha kia, nan ai vlhpiesa keyu ai yvmohmi isht vlhtoba ka isha chi hoke: yvmmvt na liteha okpulo, na hofahyali yosh yvmmvt hvch ibai impa itin takla kvt na haksichi kak osh nan isht ilaiyukpa hoke:

14. Yohmi kvt nishkin mvt isht a haui yak osh alotowa, micha nan ashvchi kvt issa keyu hosh, hatak im anukfila fitikuchi ya haksihinchi hoke; micha nan ahayuchi bvnnna atampa isht ai yvmohmi puta ka chukvsh isht a toksahanli hosh, isht ai ilbushvt onvtula he vlhpiesa vlla vhleha hoke.

15. Yvmmak okvt hina ai vlhpiesa issa cha, yoshubut kvnia hosh Boso ushi, Belam, yvmmvt nan ai vlhpiesa keyu isht vlhtoba yak o anuksitia hosh nan a kaniohmi tok ak o iakaiya hoke:

16. Yohmi kia Belam ash ot nan ai vlhpiesa keyu yvmmohmi kvt ik vlhpieso ka im.otvninch kvt, issuba haksobish falaia anumpula he keyu kia, hatak im anumpa ho anumpuli hosh, hopaii im anukfila tasimbo yash im olvbi tok.

17. Ilvppvt kvli oka iksho puta, micha hoshonti ha apeli vt isht aya mak oke: yvmmak okvno okhlili chinto yak osh immit bilia hi osh takali hoke.

18. Yohmi ka yvmmak okvt nan isht ik ahobo isht anumpa ilauatvt anumpohonlikmvt, haknip imma nan ahni, micha haui anukfilli isht alotowa kak osh nan ashvchi aiasha

yvmmma yakosi itin t^akla h^o ai i filummi tok ash yummak o haksihinchi hoke.

19. Ilap ai ahni hosh nana ka yummvt yvmohma he im ihisa ak inli kia, ilap ak okvto nan ai ashvchi yak o chukvsh okpulo ai yvmohmi yak o i yuka vhleha hoke: yohmi ka kvna hosh hatak a imaiyachi hokma, yummak ash inli h^o i yuka toba chatuk oka.

20. Yohmi ka pin Chitokaka, micha pi Okchalinchi Chisvs Klaist oka ithaiyana kak osh yakni ilvppak inli isht a liteha puta ka ai i filummi ha ya tuk osh, anonti yummak ash inli h^o isht ai apakfort isht ai imaiya hokmvt, yummvt ont im ai ishtaiyopi kvt ik achukmo kvt im ai ishtia vmmona tuk ash i shahli hoke.

21. Yohmi ka yummak okvt nan ai vlhpiesa hina ya ik ithano hatuk mak osh im achukma kvt yummma ithana cha, anumpa vlhpisa holitopa yvt im anohowa ha ya tuk osh i filummi kvt, im i shahla he atuk oka.

22. Yohmi kia yummak okvt nan isht vlhpisa ai ahli h^o ai yvmohmishke; yohmi ka, Ofi yvt hoita kash osh falamin-chit vpvshke; mikma, Shukha tek vt vlchifa kash osh, falamvt lukchuk a oka tonolishke, achishke.

CHAPTA III.

Nan vlhpisa chinta he nitak a Klaist vt vla pulla hi a ahlichit im anoli 1, 10 kaniohmit yakni, micha vba pit a moyuma kvt ont ai okpulo ka he anoli; 14 nan ai okpula hi pit anukfoukvt anumpuli mvt nan ashvchi ikshot holitopvt itanowa chi ka i miha.

1. **A** HOLITOPA vhleha ma! ilvppvt holisso atukla mak o himonasi ka pit hvchⁱ holissohonchi li kvt, ita tuklo ka nana ka isht hvsh ithaiyana chi h^o hvchim anukfila tohwikeli tok a isht okchvli lishke.

2. Yohmi na hopaii vhleha hokvt tikba kash anumpa puta isht anumpohonli tok; micha Chitokaka, micha Okchalinchi im anumpeshi pia hvsh nana e hvchim apihisa tok aienka isht hvsh ithaiyana chi hatuk;

3. Ilvppa tikba hvsh ithana, yohmi ka ishit yopula anum-

puli, micha chukvsh nan ahni iakaiya puta kvt ont ai ishtai-yopi nitak puta ka vla hi oke;

4. Mikmvt, Yvmmvt vla he anumpohonli tok muto katimak o? hatak tikba vhleha hvt nusi tok takla ha ya, nan okluha hokvto tikba vmmona tok ash osh imomvt mahaya hoka, ahancha hi oke.

5. Yohmi ka ilvppa ithuna ik bvnno hokvt, hopaki pilla kash vba yakni okvt Chihowa im anumpa hak o isht atoba tok, mihma yakni ilvppvt oka akohcha cha, itin takla talaia tok:

6. Yvmmak o yakni yvmmak atuk vt oka yosh isht omnipoholmot kvnia ho, isht ai okpulot kvnia tok.

7. Amba vba shutik, micha yakni ilvppa ita tuklo hokvno Chihowa im anumpa yvmmak ash inli hosh Chihowa ik holitoblo hatuk puta kvt ai okpulot kvnia chi nan vlhpisa nitak mak o lua he ai ahni hosh achukmalit ieshi hoke.

8. Amba a holitopa vhleha ma! nana achufa ilvppa huch ik ithano ki na, yohmi kvt nitak achufa kvt Chitokaka yokvno afvmmi tahlepa sipokni achufa ka im itilaui; micha afvmmi tahlepa sipokni kvt nitak achufa ka im itilaui hoke.

9. Chitokaka yokvt nana ka im ihisa tok vt, a svlaha hatak kaniohmi kvt ahni kia, svlaha keyu hoke; amba pi nuk-haklo hosh pi svlaha kvt, achufona kia okpunlot ik kvnio hosh, amba moyuma kvt ile kostininchha he, im ai ahni hoke.

10. Yohmi kia Chitokaka i nitak okvt, ninak anukaka yo na hukopa yvt aya chatuk mak o, chiyuhmit vla hi oke; yvmohmikma shutik moma kvt nan ola chinto ho isht ai okpulot ont ai iksho ka he, mikma fochik moma kvt luak lvshpa fehna ho isht a luvt bihinlakma, yakni, micha nan okluha ai vlhtaiyaha puta tuk vt luvt taiyaha hi oke.

11. Yvmoymi ka nan okluha ilvppvt ont ai vhlit kvnia chi hoka, hatak kaniohmi hosh nana a kaniohmi puta ka nan ai ashvchi iksho hosh Chihowa holitoblit hvsh ai asha hi atuk o?

12. Micha Chihowa i nitak vt vlakma, vba shutik moma kvt lua hatuk osh ont ai vhlit kvniakma, fochik moyuma kvt

luak lvshpa fehna ho isht a luv̄t bihinla he, yummak o ho-hoyot t̄ushpv̄t hvsh mahaya hokv̄t.

13. Yohmi kia pishno yokv̄to nana ka pim ihisa tok pulla kak o, v̄ba shutik himona, micha yakni himona ita tuklo nan ai vlhpiesa ai ahanta yummak o e hohoyo hoke.

14. Yvmohmi ka a holitopa vhleha ma! nana ilvppa chiyuhmi puta ho hvsh hohoyo hokv̄t, anumpa isht ai onvtula he, micha na liteha aiena ik hvchim iksho hosh hvsh i nanaiya ho, hvsh im otaiyana hi vt hvsh achunanchashke.

15. Mikmvt pin Chitokaka yvt ilbushala ch̄i kvt svlaha kvt isht pi ai okch̄aya he atuk, il ai ahnashke; ilvppa chiyuhmi il itibapishi Pal ak kia isht a hopoyuksa yā anukfokihinchi ho hvchi holissohonchi tok:

16. Yohmi kvt holisso ihikbi puta kvt nana ilvppa moma ka isht anumpohonli ak inli hatok okv̄t; yummak oka nana kaniohmi kvt akostininchi kvollo kvt ai asha, yummak oka nan ik ithano, micha anukfila apissali iksho aiena hokv̄to ilap isht ai okpula ch̄i kvt anumpa holitopa inla ka yvmihinchi hatuk ash osh, chohmichit shanaiyuchi hoke.

17. Yvmohmi ka a holitopa hvchia ma! t̄ikba nana ilvppa puta ka hvsh ithana hatuk okv̄t ahah! hvchik ai ahnokmvt, hatak nan vlhpiesa ik holitoblo isht ai yoshuba yā isht ai yoshubv̄t isht a hvchi yimmi kvollo kash i filummit chi tula ná.

18. Amba isht i kana hvchi anukfokv̄t hvsh yvmohmi kvt i shahlichit mahayvt, pin Chitokaka pi Okchalinchi Chisus Klaist a hvsh ithaiyana kvt i shahlichit hvsh mahayashke. Yummak oka isht a holitopa yokv̄t, himonasi, micha himak a pilla ka immit biliashke. Amen.

C H A N

I HOLISSO UMMONA HOKE.

C H A P T A I.

Klaist a isht anumpuli, mihmvt yvymma anonti Iki itatuklo ka ibachvfrt nan im anukfila he miha, 1; 5 nan ib achvfa ilvppa yakohmi kvt nan isht il aiyukpa hokmvt, atohwekinli ka il ai itanowa he; 9 mikmvt na pim ai ashvchika puta ka il il anohonlikma, pi kashofa hinla.

1. AI okchaya anumpa yvmmak osh ummona ka ahanta tok mak o e hahaklot, pi nishkin a isht e pihisvt, il o hopokohoyo tok, micha pibbak vt pushohonli tok mih mak oke.

2. Ai okchaya yvmmvt haiaka na e pihisa tuk osh atokowa anolit, Ai okchaya bilia yvmmvt Iki a takla ahanta chatuk mak osh, ant pi haiaka tok a e hvchim anoli hoke.

3. Hvchishno mvt hvsh pibai achvfa he mak o, nana ka e pihisa tuk, micha e hahaklo tuk aieno kvt e hvchim anoli hoke: yohmi kvt pishno vt Iki, micha Ushi Chisus Klaist aieno kak o il ibai achvfa mvhli hoke.

4. Mikmvt nana a hvchi yukput alotowa he mak o, yakohmi ka pit e hvchi holisochishke.

5. Yohmi ka Chihowa yvt tohwikelika, micha yvymma okhlilika yvt atakali iksho kymohmi aieno ilvppak o anumpa yvymma il ai i haponaklo tuk mak osh e hvchim anolishke.

6. Yvmmak oka pit il ibai achvfa, il achi hosh, anonti ai okhlilika yo il itvnowa hokmvt, e holabi; micha nan ai ahlika mvno a pi yvmohmi keyu hoke.

7. Amba yvmmak okvt atohwikelika yo anta hoka, pishno vt atohwikelika yo il itvnowa hokmvt, iloh it ibai achvfa.

Yohmikma Ushi Chisus Klaist im issish vt nan ai ashvchika ya mominchit a hvpi kashofa hoke.

8. Nan ai ashvchika yvt ik pim iksho, il achi hokmvt, peh il ile haksichi: micha nan ai ahlika yvt pi anukfoyuka keyu mak oke.

9. Na pim ai ashvchika ya il im anohonli hokma, yummak okvt ai ahli achukmvt, ai vlhpiesa hatuk osh na pim ai ashvchika ya pi kanvllichi; micha nan ik ai vlhpeso ka mominchit pi kashofa hinla hoke.

10. Nana il ai ashvchika chatuk keyu, il achi hokmvt, yummak oka holabi il ikbi; mikma im anumpa hvt pi anukfoyuka keyu mak oke.

CHAPTA II.

Klaist vt pi a pelvt isht pi anumpuli, 1; 3 ai ahlit Chihowa ya ithana hokvto im anumpa vlhpisa ya holitobli hoke. 9 Pitibapishi ha il oh i hullashke; 15 yohmikmvt yakni imma hokvno keyu kashke; 18 na yoshubli a ahah! il im ahnashke.

1. UM vlla chipunta vhleha ma! hvch ik ashvcho ka chi mak o, ilvppa puta ka pit hvchi holissochi lishke. Micha hatak nana hosh ashvchi hokma, isht anumpuli vt Chisus Klaist achukma yvt Iki a itikba pim anta hoke.

2. Yummak osh na pim ai ashvchika ya, vlhtoba kvt pish-no pimmi hak bano keyu, amba yakni moma nan ashvchi aieno ka okluha vlhtoba mak oke.

3. Micha im anumpa vlhpisa yak o e holitobli hok mak osh, yummak oka ithaiyana ho mvlhi kvts isht il akostininch hoke.

4. Kvna hosh yummak oka ithana li, achi hosh, anonti im anumpa vlhpisa ya holitobli keyu hokvto, holabi; micha nan ai ahlika yvt anukfoyuka keyu mak oke.

5. Amba kvna hosh yummak oka im anumpa ha holitobli hokvto, mihi yosh Chihowa ya i hullo ai ahli fehna hoke. Ilvppak o yummak oka ibai achvfa kvts isht il akostininch hoke.

6. Kvna hosh yummak oka ai iba foyuka, miha hokvto, ilap mak kia, yummvt kaniohmit aya tok mak o, a chohmit aya he tuk oke.

7. Itibapishi li vhleha ma! anumpa vlpisa himona nana ho pit hvchi holissochi li keyu; amba anumpa vlpisa si-pokni vmmona kash inli ho hvchin tonlv̄t isht auehinchı tok ash oke. Anumpa vlpisa sipokni vt anumpa vmmona kash inli ho haklot isht hvsh auehinchı tok ak oke.

8. Ai okhlilika yvto ant ia ma, himak okvno tohwikelı ahli mak osh tommi hoka, anonti anumpa vlpisa himona, yvmmak okv̄t ilapo, micha hvchishno aieno hokvno ahli mak o pit hvchi holissochi lishke.

9. Kvna hosh atohwikelika yo anta li, achi cha, itibapishi ha i nukkilli kvt, himonasi ak kia ai okhlilika yo aya moma hoke.

10. Kvna hosh itibapishi ha i hullo hokvto, mihi yosh atohwikelika yo ahanta; yohmi cha kaniohmit ai ibetvbla hi vt ik im iksho mak oke.

11. Amba kvna hosh itibapishi ha i nukkilli hokvto, ai okhlilika yo ahanta cha, ai okhlilika yo nohowa; yohmi ma okhlilika kvt nishkin a tummoli hatuk o, kanima yo ia kvt ithana keyu hoke.

12. Ulla chipunta hvchia ma! yvma hohchifo pulla ho na hvchim ai ashvchika yvt isht a hvchi kashofa hatuk oka, pit hvchi holissochi lishke.

13. Iki hvchia ma! vmmona makinli ho ahanta tok yvmmak ash hvsh ithaiyana hatuk oka, pit hvchi holissochi lishke. Hatak himita hvchia ma! nan okpulo atukma hvsh imaiyachi hatuk oka, pit hvchi holissochi lishke. Ulla chipunta hvchia ma! Iki a hvsh ithaiyana hatuk oka, pit hvchi holissochi lishke.

14. Iki hvchia ma! vmmona makinli ho ahanta tok yvmmak ash hvsh ithaiyana hatuk oka, pit hvchi holissochi li tuk oke. Hatak himita hvchia ma! hvsh hlampko, yohmi ma Chihowa, im anumpa hvt a hvchi anukfoyuka, micha nan okpulo atukma hvsh imaiyachi aieno hatuk oka, pit hvchi holissochi li tuk oke.

15. Yakni a, micha nana kvt yakni paknaka asha ka hvch ik i hullo kashke. Hatak nana hosh yakni a i hullo hokma, Iki i hullo kvt yvma anukfoyuka keyu hoke.

16. Yakni asha kvt moma, haknip nan isht anushkunna, micha nishkin nan isht anushkunna, mikmvt yakni pakna nan ai isht ilefehnvchi aienā kvt Iki ak o a minti ho keyu; amba yakni ak o a minti hoke.

17. Micha yakni vt, mikmvt nan ai isht anushkunna aienā hokvto, ant ayut kvnighiya hoke; amba Chihowa nan ai ahni yak o a yvmo^hmi hosh ahanta hokvto, antvt bilia hoke.

18. Ulla chipunta ma! ai ishtaiyopi mak oke: yohmi ka Klaist im asanali vt aya hi oka, hvsh haklo tok mak o, himonasi ak kia Klaist im asanali vt lauvt aiasha; yohmi ho ont ai ishtaiyopi ka isht il akostininchishke.

19. Yvmmak ash ot a pi filvmmmit kocha wiha tok; yohmi kia yvmmvt a hvpibai achvfa tok o keyu hoke; yvmmvt pishno ak o a hvpibai achvfa tok okmvt, a hvpibai afoka na bilia he tuk pulla chishke: amba yvmmvt moma kak osh a hvpibai achvfa ho keyu hatuk vt otvna chi kak osh a hvpi filvmmmit kocha wiha tok oke.

20. Amba hvchishno yokvto Shilombish Holitopa ak o hvsh im ai ahama tuk osh nan okluha ka hvsh ithanvshke.

21. Nan ai ahlika ya hvch ik ithano hatuk o, pit hvchi holissochi li ho keyu, amba yvmma micha holabi hv^t achvfonā kia nan ai ahlika ya ahalaia keyu aienā ka hvsh ithana kak atuk oke.

22. Kuta hosh holabi yo? amba Chisus ak osh Klaist mak atuk a keyu achi kak oke. Iki micha Ushi aienā ka i yimmi keyukmvt, yvmmak osh Klaist im asanali mak oke.

23. Kvna hosh Ushi a i yimmi keyukmvt, yvmmak osh Iki a pit ahalaia keyu mak oke; amba Ushi a i yimmi hvkuto Iki a ib ahalaia ak inli hoke.

24. Yohmi hoka nana ka hvsh haklo vmmona tok yvmmvt a hvchi anukfoyukashke. Nana ka hvsh haklo vmmona tok yvmmvt a hvchi anukfoyuka hokma, hvchishno mvt Ushi, mikmvt Iki aienā ka hvsh ai ibafoyuka hi oke.

25. Micha nana miha kvt ai okchaya bilia ilvppak o pim issa tok oke.

26. Na hvchi yoshubli vhleha ha ai immuchi kvt yakohmi kak o pit hvchi holissochi li tuk oke.

27. Amba yvymma nana hvsh ai im ahama tuk amo a hvchi anukfoyuka ; yohmi ka hatak osh nana hvchim abvcha he hvsh ahni k_a keyu ; amba nan ahama yvmmak asl inli kak osh nana moma ka a hvchim abvchi kvt ai ahli, holabi keyu ; yohmi ka na hvchim abvchi tuk ash fehna ka yvymma hvsh ai ibafoyuka hi oke.

28. Yohmi ka inta ! vlla chipunta ma ! yvmmak o hvsh ai iba foyukashke ; yohmi tuk o yvmmak ash ot ant haiakakma, il anukcheto cha, mihintikma itikba ma a ik pi hofahyo kashke.

29. Yvmmak okvt ai vlhpiesa y_o hvsh akostininch hokmvt, ai vlhpiesa h_o a yvmohmi hokvto, momvt yvmmak o isht a toba y_o hvsh akostininchishke.

CHAPTA III.

Chihowa yvt ilap ushi y_o pihikbi kvt p_i hullo fehna, 1 ; 3 yvmohmi hoka i nan vlhpisa y_a e holitobla he tuk ; 11 il it_i hulla he tuk.

1. CHIHOWA ushi vhleha hvpi hohchifa hi a Piki vt nan i hullo kvt a kaniohmit hvp i hullo tok a ho pesá : yohmi hatuk o yakni vt pishno a ik hvp ithano ; yvymma ik ithano tok okvt.

2. Holitopa vhleha ma ! himak okvno Chihowa ushi hvapia, yohmi kia e kaniohma hi a himonasi kano ik otano kishvshke ; amba yvmmak osh ant haiakakma, pishno vt yvmmak o e holba hi vt il ithana, yvmmvt kaniohmi hatuk ma e pisa hi okvt.

3. Yvymma anukchieto hosh si yakohma he ahnit, yvmmak ash ot kashofa achukma yatuk a chiyuhmit momvt ile kashofi hoke.

4. Kvna hosh nana ashvchi kvt anumpa vlhpisa ma kobvffi hoke : nan ai ashvchika yak osh anumpa vlhpisa y_a kobvffi hoka.

5. Yohmi ka yvmmak okvt pim ai ashvchika y_a isht hvpi kancha ch_i mak osh ant haiaka tok a hvsh ithana ; micha yvymma ai ashvchika nana hosh atakali keyushke.

6. Kvna hosh yummma ai iba foyuka hokvto ashahanchi chatuk keyu; kvna hosh ashahanchikmvt, yummma pisa tuk keyukmvt, anonti ithana tuk keyu aieno mak oke.

7. Ulla chipunta ma! hatak nana kia ik hvchi yoshublo kashke: kvna hosh nan ai vlhpiesa ya a yvmohmi hosh ahantakmvt, ai vlhpiesa kvt, yummvt ai vlhpiesa yatuk a, chohmi mak oke.

8. Kvna hosh ashahanchi kvt Setan ak o ibai achvfa mak oke: Setan ak okvt vmmona mak inli ho ashvchit isht auehinchi tok oka. Setan vt nan ai isht vtta tok puta ka okpvna chi pulla kak osh Chihowa Ushi at ant haiaka tok.

9. Kvna hosh Chihowa ak o isht a toba hokvto ashahanchi chatuk keyu: yummma i na nihi vt anukfoyuka hatuk o; micha yummak okvt Chihowa ak o isht a toba hatuk okvt, ashahancha he keyu hoke.

10. Ilvppak o Chihowa im vlla vhleha, mikmvt Setan im vlla vhleha aieno kvt isht ai otvni hoke: kvna hosh nan ai vlhpiesa ya a yvmohmi keyu, mikmvt itibapishi ha ik i hullo aieno kvt, Chihowa ak o ai ibai achvfa ho keyu hoke.

11. Illoh it i hulla he anumpa ilvppak o vmmona mak inli ho hvsh hahaklo tok.

12. Nan opuloo a ai ibai achvfa cha, itibapishi ha vbi tok Ken ak okvno ke chohmo kashke. Micha nanta katiohmi ho yummva vbi tok o? Ilapo nana a kaniohmi kvt ai vlhpiesa keyu ma, itibapishi hvto ai vlhpiesa kak a tok oke.

13. Itibapishi li vhleha ma! yakni vt hvchi nukkilli hokma, ik hvchi nukhlakancho kashke.

14. Il itibapishi vhleha ha il i hullo hatuk osh, ai illika ya a kohchvt ai okchaya ya il ona kvt il ithanvshke. Kvna hosh itibapishi ha i hullo keyu hokvto, ai illika yo anta hoke.

15. Kvna hosh itibapishi ha i nukkilli kvt, hatak vbi yoke: yohmi ka hatak vbi nana hak osh okchayvt bilia vt anukfoyuka keyu ka hvsh ithanvshke.

16. Pishno pulla hatuk mak o ilap im ilhfiopak a isht pi atobbi tok a ilvppa fehna ak o Chihowa vt pi hullo ka, isht

il akostininchishke : yohmi ka pishno vt il itibapishi vhleha ha pim ilhfiopak a isht il atobba he vlpesa hoke.

17. Amba kuna hosh yakni ilvppa nana isht il ai yvkpa vt im asha ; yohmi hosh itibapishi hut ilbvsha ho pisa kvt, yummak ash i nukhaklo iksho ; yohmikma Chihowa i hullo kuto katiohmit yummma anukfoyuka hinla cho ?

18. Um vlla chipunta ma ! anumpa, micha isunlvsh aien a kak bano ho ishit kiloh it i hullo kashke ; amba nan isht ahanta, micha ai ahli mak ashke.

19. Micha ilvppak o nan ai ahli ka ya il ibai achufa kvt isht il akostininch ; mikmvt pi chukvsh a nuktalanlit itikba ya il asha hi oke.

20. Pi chukvsh vt isht pi atokoli hokma, Chihowa ho kak heto pi chukvsh a i shahli, micha nana moma ka ithana hoke.

21. Holitopa vhleha ma ! pi chukvsh vt isht pi atokoli keyu hokmvno, Chihowa ya il ai nanaiya mak oke.

22. Micha im anumpa vlpisa ya e holitobli, mikmvt nana ka ilapvt ai ahninch ak o a pi yvmohmi aien ahatuk osh, nana ho il asilhha kvt, yummma il ai i habena chatuk oke.

23. Yohmi kvt yummak a hi o, anumpa vlpisa ha pima tok oka, Ushi Chisus Klaist hohchifo ha pi yimmi cha, it i hulla he aien a ilvppak osh im anumpa vlpisa mak oke.

24. Micha kuna hosh im anumpa vlpisa ya holitobli kvt, yummak o ai ib achufakma, ilap mvt yummma ai ibai achufa hoke : micha yummvt a pi nukfoyuka kvt, yummvt Shilombish pima tok ilvppak o isht il akostininch hoke.

C H A P T A I V.

Nan ithvnanchi moma kak o i yimma he keyu amba Chihowa im anumpa ho isht imomaka pisa hi a i miha, 1 ; 7 nana hosh kaniohmi kak o il it i hulla hi a lauachit nan isht miha.

1. HOLITOPA vhleha ma ! hopaii ilahobi lauvt yakni a atiapa hatuk oka, shilombish a uhvlinchit hvchi yimmi

ná; amba Chihowa yak o a minti hokma, nana tukmá, shilombish puta kash imomakachit hvsh pisashke.

2. Ilvppak o Chihowa im Shilombish a isht hvsh akostininchishke; shilombish vt, Chisvs Klaist vt haknip asha hosh vla tok a atokoli hokvto, Chihowa ak o a minti bano hoke.

3. Mikma shilombish vt, Chisvs Klaist vt haknip asha hosh vla tok a atokoli keyu hokvto, Chihowa ak o a minti keyu bano hoke; micha ilvppak osh shilombish Klaist i sanali, yummvt aya hi a hvsh haklo tok a, anonti himonasi kak kia yakni paknaka ya aiasha ka mak oke.

4. Ulla chipunta ma! Chihowa ak o immi hvchia; yohmi hosh yummak ash hvsh imaiyachi tok; hvchishno a a hvchi anukfoyuka kak osh yakni paknaka ya anta kvno i shahli hatuk okvt.

5. Yummak ash ot yakni ak o ai ibai achufa; yohmi hatuk osh yakni ak o isht anumpuli ma, yakni vt i haponakloshke.

6. Pishno vt Chihowa ak o immi hvquia hoke; kvna hosh Chihowa ya ithana hokvto, hvpi haponaklo: kvna hosh Chihowa ya immi keyu hokvto, ik hvpi haponakloshke. Ilvppak o shilombish ai ahli, mikmvit shilombish na yosubli aienka isht il akostininchishke.

7. Holitopa vhleha ma! nan i hullo vt Chihowa ak o a minti hoka, iloh it i hullashke: micha kvna hosh i hullo hokut moyumut Chihowa ak o isht a toba; micha Chihowa ya ithana mak oka.

8. Kvna hosh nan ik i hullokmt, Chihowa ya ik ithano mak oka. Chihowa ak okvto nan i hullo mak oka.

9. Yummak atuk mak o pishno vt isht pi okchaya hi a Chihowa yvt Ushi achufa illa yatuk a yakni a auet kanchi tok oka, ilvppak o Chihowa yvt auet hvpi hullo ka isht ai ovni tok oka.

10. Pishno ak osh Chihowa ya il i hullo tok o keyu, amba ilap ak osh pishno a pi hullo cha, na pim ai ashvchika yvt isht vlhtoba hi a, Ushi a auet kanchi tok ilvppak osh nan i hullo mak oka.

11. Holitopa vhleha ma! Chihowa yvt pi hullo kvt yakohmi tok okma, pishno ak kia iloh it i hulla he vlpesa hoke.

12. Hatak achvfa kia nitak nan ash Chihowa ya pisa tok keyushke. Pishno vt iloh it i hullo hokma, Chihowa yvt hvpi anukfoyuka; yohmikma yummma il i hullo kvt ai ahli mak oke.

13. Ymmak okvt imi Shilombish a ai isht pima tok oka, pishno vt yummma il ibai achvfakma, anonti ilap mvt pibai achvfa ka ilvppak o isht il ai akostininch hoke.

14. Micha pishno vt e pihisa mak osh yakni a okchalinchi a he Iki vt Ushi a auet kanchi tok a atokowa il anohonlishke.

15. Kvna hosh Chisvs vt Chihowa ya Ushi yoke, achi hoka, Chihowa ak osh yummma anukfoyuka ma, anonti ilap mvt Chihowa ya anukfoyuka hoke.

16. Mikmvt pishno a Chihowa vt pi hullo ka il akostininch, micha pi yimmi aiena tok. Chihowa vt nan i hullo hoke: yohmi ka kvna hosh nan i hullot ahanta hokvt, Chihowa ak o ai ib anukfoyukakma, anonti Chihowa mvt ilap a ai ib anukfoyuka hoke.

17. Nan vlpisa nitak fehnakma pi nukwaya iksho ka he vt ilvppak o nan il i hullo kvt isht ai ahli hoke: ilap vt kaniohmi ka, pishno mvt yummak inli ho chohmi hosh yakni ilvppa il qsha hokvt.

18. Nan i hullo ka nukshopa hvt iksho hoke; amba nan i hullo ahlika yvt nukshopa ha kohchit kanchi yoke; na nukshopa hvt issikkopali yoka. Kvna hosh nukshompa hokvto nan i hullo kvt ai ahli ho keyu mak oke.

19. Ilap ak osh tikba pi hullo tok oka, pishno vt yummma il i hulloshke.

20. Hatak vt Chihowa ya i hullo li, achi hosh anonti itibapishi ha i nukkilli hokmvt, yummvt holabi yoke. Itibapishi ha pisa kvt ik i hullo kuto, anonti katiohmi hosh Chihowa pisa chatuk keyu kvt yummma i hulla hinla cho?

21. Kvna hosh Chihowa ya i hullo hokvto, itibapishi ma i hullo ak inla he anumpa vlpisa ilvppa yummak osh pima tok oke.

CHAPTA V

Kuna hosh Chihowa ya i hullo kvt i nan vlhpisa ma holitobli cha, yummma im vlla puta ka i hullo hoke, 1; 7 nan atokowa yvt tuchina hosh vba ya aasha; 8 mikmia tuchina makinli hosh aka ya asha; 9 Chihowa ushi Chisvs vt pi okchalincha hinla kvt im vlhpiesa.

1. KUNA hosh Chisvs vt Klaist mak atuk a yimmi hokvto, Chihowa ak o isht a toba mak oke; micha na toba-chi tok ash i hullo hokvto, moma kvt yummma isht a toba tok puta ma i hullo ak inli hoke.

2. Chihowa ya il i hullo, micha im anumpa vlhpisa aienka e holitobli hokmvt, ilvppak o Chihowa im vlla vhleha ha il i hullo kvt isht il akostininch hoke.

3. Im anumpa vlhpisa ya e holitobli ilvppak osh Chihowa i hullo mak oke; micha im anumpa vlhpisa yvt a palvmmi ka keyu hoke.

4. Kuna hosh Chihowa yak o isht a toba tuk okvto, yakni a imaiyachi hoke; micha yakni a nan isht imaiyachi kvt nana pi yimmi ka ilvppak oke.

5. Kuta hosh yakni a imaiyachi cho? amba Chisvs vt Chihowa ya Ushi a yimmi kak o banoshke.

6. Oka, micha issish aienka kak o isht otvnit aya tok vt Chisvs Klaist ilvppak oke: oka yak o illa keyu; amba oka, micha issish aienka tok. Mikma Shilombish ak osh ai ahli ka mak okvt, Shilombish ak osh atokowa ka anoli hoke.

7. Tuchina hosh nan atokoli kvt vba ya asha, Iki, micha Anumpa, mikmvt Shilombish Holitopa aienka kak oke; mikmvt tuchina ilvppvt achvfa hoke.

8. Yohmikma tuchina hosh nan atokoli kvt yakni a asha, Shilombish, micha oka, mikmvt issish aienvshke; mikmvt tuchina ilvppvt ai it im achvfa hoke.

9. Hatak osh nana atokoli ka pi yimmi chatuk ma, Chihowa hosh nana atokoli ho kak heto ai i shahli fehna hoke. Chihowa yvt nana ai atokoli Ushi ya isht ai anohonli tok ilvppak oke.

10. Kvna hosh Chihowa Ushi ya i yimmi hokvto, nan isht atokowa kvt ilapo inlit anukfoyuka hoke: kvna hosh Chihowa ya ik i yimmo hokvto, Chihowa yvt Ushi a nan isht ai atokowa ka anoli tok a, ik yimmo hokvt, yummma holabi hoke.

11. Yohmi ka Chihowa yvt ai okchayvt bilia ya pim issa tok ilvppak osh nan atokowa annoa mak oke; mikma ai okchaya ilvppvt Ushi yak o ai in takali hoke.

12. Kvna hosh Ushi vt anukfoyuka hokvto, ai okchaya ya ishi hoke; mikma kvna hosh Chihowa Ushi yvt ik anukfoyuko hokvto, aikchaya yvt ik im ikshoshke.

13. Chihowa Ushi hohchifo ha yimmi vhleha hvchia hvut ai okchaya bilia yvt hvchin takanli kvt hvsh ithaiyana chi, mikmvt Chihowa Ushi hohchifo ha hvchi yimma chi aienakak o na yakohmi ka pit hvchi holissochi li hatuk oke.

14. Nana ka ilap nan ai ahni ka ya pit ai vlhpesa ho isht ai il im asilhhvchi hokma, pi haponaklo pulla ka ilvppa pi yimmi hoke.

15. Micha nana ho il im asilhha ka, pi haponaklo ka il akostininchu hokmvt, anonti nana ho il im asilhha tuk vt, il eshi kvt il akostininchu mak inlishke.

16. Hatak nana hosh itibapishi hvut nan ashvchi kvt isht ai illa he keyu ho isht ai ashvchika pisa hokmvt, yummak ash ot asilhha na isht ai illa he keyu yo isht ai ashvchi tuk vhleha hash yummvt ai okchaya ya ima hi oke. Isht ai illa he ai ashvchika yvt takanlishke; yohmi hokvno vba pit isht anumpula hi a ak mihoshke.

17. Nana ai vlhpesa keyu vt aiashvchika yo banoshke; yohmi ka isht ai illa he keyu nan ai ashvchika yvt takanlishke.

18. Kvna hosh Chihowa yak o isht a toba tuk okvto, ashahanchi keyu chatuk a il ithanushke: amba Chihowa ak o isht a toba tuk okvto achukmalit il apesahanchi chatuk; yohmikma nan okpulo yummak ash ot ik halelo chatuk oke.

19. Micha pishno vto Chihowa yak o immi pia; mikma yakni moma kuto ik ai vlhpeso banot talaia ka iloh ithanushke.

20. Micha Chihowa Ushi vt vla cha, yvmmak osh nan ai
ahli ka mak atuk ash il akostininchä chi ka, nan isht akostin-
inchä a pi anukfoki tuk a iloh ithanvshke ; yohmi ho pishno
vt yummak osh nan ai ahli ka mak atuk Ushi Chisus Klaist
a il ai ibai achvfa hoke. Ilvppak osh Chihowa ai ahli, micha
ai okchayut bilia mak oke.

21. Ulla chipunta ma ! na holbvt toba ya hvch ik ai
ahalaio kashke. Amen.

CHAN

I HOLISSO A TUKLO HOKE.

Nan isht ai i hullo a kyllot achunancha chi ka ohoyo holitopa, im vlla aienā ka i miha, 1; 10 Klaist im vbanumpa ha isht aya keyu yvt na yoshubliche yoka yvmmma hvchik ahalaio kashke.

1. U BANUMPESHI sipokni yokut ohoyo vlhtoka, micha im vlla vhleha aienā ka pit ai okpuchishke, yvmmak ash o uno vt ai ahli hosh i hullo li chatuk; mikmvt uno ak bano chatuk keyu; amba nan ai ahli ka akostininch tuk okvto i hullo ak inli chatuk;

2. Nan ai ahli ka yvt a pi nukfoyska kvt a pi nukfoyskvt bilia chi pulla ho yvmohmi hoke.

3. Hvch i hullo li ai ahli mak osh Iki Chihowa, mikmvt Iki a Ushi, Chitokaka Chisvs Klaist ita tuklo a mihinti nan isht i kana, mikmvt ai i nukhakloka, micha nan isht it i nanaiya aienā kvt hvchi anukfoyska hi a ahni lishke.

4. Anumpa vlhpisa Piki vt pima tok mak o, chim vlla vhleha hvt nan ai ahli ka mak o ai itvnowa na pisa li kvt, sa yukpa fehna tuk oke.

5. Yvmohmi ka ohoyo ma! anumpa vlhpisa himona nana ho pit chi holissochi li ho keyu: amba vmmona mak inli ho hvpin tonla tok ash iloh it i hulla he yak o chim ai ahni lishke.

6. Micha im anumpa vlhpisa yak o ai iakaiyvt il itvnowa ilvppak osh nan i hullo mak oke. Ilvppak osh anumpa vlhpisa mak oke; vmmona mak inli ho hvsh hahaklo tok vt, yvmmak o hvsh ai itvnowa he tuk oke.

7. Na yoshubli laua kvt yakni a atiapa cha, Chisvs Klaist

vt haknip asha hosh vla tok a atokowa anoli keyushke. Ilvppak osh na yoshubli, micha Klaist i sanali aien a mak oke.

8. Hush il apesahanchi pulla na nana ka iloh atahli tuk vt ik hvp i kvnio hosh, amba ai vlhtoba vlhpiesa ka iloh ishashke.

9. Kvna hosh ashahanchi cha, Klaist im anumpa anukfoyukvt aya keyu hokvto, Chihowa ya pit ai ibai achvfa ho keyu hoke. Kvna hosh Klaist im anumpa ha afoyukvt aya hokvto, mihi yosh Iki, micha Ushi aien a ka pit ai ibai achvfa hoke.

10. Kanima kvt ayvt hvchim vla kvt, anumpa ilvppak o isht aya keyukma, hoyot hvchim aboha ya hvch ik chukowachokmvt, hvch ik ai okpacho kashke.

11. Kvna hosh yvymma ai okpvchi hokvto, nan ik vlhpeso a yohmi ya pit ahalaia mak oke.

12. Nana ka pit chi holissochi la hi vt lauvt asha; yohmi kvt holisso tohbi, micha isht holissochi okchi aien a ho isht a pit holissochi la he keyushke; amba nashuka bika it atokowvt anumpulit a pi yukpa fehna chi ka, vno vt ayvt chim ona la chi, vm ahoba hoke.

13. Chitibapishi ohoyo vlhtoka ya im vlla vhleha hvt pit chi ai okpvchishke. Amen.

CHAN

I HOLISSO ATUCHINA HOKE.

Kaiws vbanumpa anukfoyuka ka im ahninchit miha, 1; 5 i kanvt hiahni ka im aiokpanchi; 9 Tiotifvs nan akariohmi kvno vlhpesa ik im ahno; 12 Temetivs vno ahninchit isht anumpuli.

1. **UBANUMPESHI** sipokni yokvt Kaiws holitopa fehna yvmma ai ahli hosh i hullo li chatuk mak o pit ai okpv-chishke.

2. Holitopa ma! chi haknip vt achukmaka cha, i shahlit ia kvt, chi shilombish vt isht i shahlit ia kak inli ho chohma hi a ahni li kak osh nana moma ka vm i shahlishke.

3. Il itibapishi vhleha hvt ai vla mvt, nan ai ahli ka yvt a chi anukfoyuka cha, nan ai ahli ka ai ish ataya ka atokowa anohonli ka a sa yukpa fehna tok.

4. Na sa yukpa kvt, vm vlla vhleha hvt nan ai ahli ka ya ai itvnowa na haklo li ka vm i shahli kvt iksho.

5. Holitopa ma! il itibapishi vhleha, micha hatak itvnowt aya aiena ka nana ho ish ai i kaniohmi kvt, ish ai ahli achukma bieka hoke.

6. Yvmmak ash ot, i hullot ish apelahanchi ka, chuch a im a chi atokowvshke; yvmmak oka nowvt aya ka Chihowa aiahni vlhpiesa ho pit ai ish apelahanchi hokmv^t ish ai vlhpiesa he mak oke:

7. Yvmmak okvt yvmma hohchifo pulla hatuk mak o Chentail a nanasi kia ik im ai esho hosh itvnovt aya hatuk oka.

8. Yohmi hoka pishno vt nan ai ahlika ya pit ai im

apeluchi pia ha chi kvt, yvymma chohmi ka ai okpuchit nana il im atahanla he vlpiesa hoke.

9. Chvch a pit i holissochi li tok ; yohmi kia yvymma ai i shahli bunna hosh Tiotlefes yummak okvt ik pim ai okpacho tok oke.

10. Yohmi hoka vla li hokmvt, yvmmvt nana a kaniohmi tuk, anumpa okpulo ka isht a pi achukushpvli tuk : mik-mvt yvymma illa hokvto ik im ono mvt, anonti il itibapishi vhleha ha ai okpuchit nan ik im atahlo mvt, anonti kanima kvt yohma he tuk a im alvmmiit, yummak ash chvch a akocha weli tuk a ithaiyana la he mak oke.

11. Holitopa ma ! nana kvt achukma keyu hokvno chik iakaiyo hosh, amba achukma kak ashke. Kvna hosh achukma ho a yohmi hokvto, Chihowa yvt anukfoyuka hoke, amba kvna hosh nan ik achukmo ya yohmi kvt, Chihowa ya pisa tok keyu mak oke.

12. Hatak moma, micha nana ai ahli ka fehna aiena kash kia Temetius a annoa achukma ka anolishke ; ahli, micha pishno ak kia yvymma ai atokoli kvt il anoli ak inlishke ; yohmi kvt pishno nan il atokoli ka ai ahli ka hush ithaiyanuske.

13. Nana ka holissochi la he vt lauvt asha hatuk : yohmi kia isht holissochi okchi, micha isht holissochi aiena ak okvno isht pit ak chi holissocho ka chishke :

14. Yohmi kia chekosikma chi pisvt, nashuka ai it atokowvt isht chim anumpuli la chi ka um ahoba hoke, Nan isht il ai yukpa yvt chi anukfoyukashke. Pi kana vhleha hvt pit chi ai okpuchishke. Il iti kana vhleha ha hochifo cha, pit ish ai okpuchashke. Amen.

C H U T E

I HOLISSO HOKE.

Nan ai yimmika ya a kvllot achunanchit hiela he im ahni, 1; 4 nan ithvnanchi ik ai ahlo puta kvt ib a chukowa he, yahmi kia yvm-mvt ai ilvsha hi okvto im vhltaha; 20 Chihowa anukfoyuka yok-vto shilombish holitopa apelachi pulla, mikmvt vbanumpohonli aiena pulla hosh ilap a okchalinchi cha, anonti inla na yoshubli isht a yoshuba tuk puta ma hlakoficha hi oke.

1. CHUTE, Chisvs Klaist in tishu, micha Chemis itibapishi hokvt, Iki Chihowa ya, i holitopa vhleha, micha okchaya he vlhtoka tok; micha Chisvs Klaist ak atuk pulla kak o ai ahlit i yimmit mahaya yvmmak o pit i holissochi kvt,
2. Isht i nukhaklo yvt hvchimmi hashke, micha isht iti nanaiya, micha nan i hullo aiena kvt hvchin lauashke.

3. A holitopa vhleha ma! nana ka achunanchi fehna hosh moma isht ai okchaya yak o pit hvchi holissochi la chikmvt, hvchi holissochi li kvt nana ka hvchi atohnochi la he vm vlpiesa he tuk: yohmi kvt vbanumpa ai ahli yvt himonna ma vbanumpuli vhleha hoka im anohowa tok ak o i yimmi aiahlit hvsh mahaya chi kvt yichina fehna hosh hvsh hohoyashke.

4. Yohmi ka hatak kaniohmi hokvt ik i nuktahlo fehna ho iba chukowa, yvmmak okvt nitak pilla kash o nan ik achukmo ilvppa ai yvmohma he vt im vlpiesa tok: yvm-mvt Chihowa holitobli keyu hokvt, pin Chihowa isht i kana ya haui imma isht ai ihikbi, micha yvmmak illa hosh Chito-

kaka Chihowa, micha pi Okchalinchi Chisus Klaist ash o ik holitoblo hoke.

5. Yvmohmi ka Chitokaka yokut kanimihchit Echip yak-ni a a kohchit okla ha hlakofichi ha yvt na yimma he keyu vhleha hokvno vbit taiyahli tok; ilvppa himonna ma hvsh ithana hatuk ak inli kia, hvsh ithaiyana he mak o hv-chim ai ahni lishke.

6. Micha enchil vhleha hokut a toba vmmona tok ash inli ai ahanta keyu hosh, amba ilap ai ahanta kash issa tok puta hokuno, ai okhlilika chinto tvli itatakvli isht talakehit bilia hosh nitak chinto nan ai vlhpisa ka ona he im ai ahni hoke.

7. Yohmi ka Sotom, Komolah, micha tumaha hochito auet i bilika aieno kash osh yummak ash o chiyuhmit, hauai ai yvmoohmi fehna, micha haknip inla ho asitia aieno tok ut nana ka isht ilbusha he otaiyani mak osh isht i nukkilli luak bilia yo isht ilbusha hoke.

8. Yummak o chiyuhmi hosh holhpokunna liteha vhleha ilvppak kia haknip a litehlit, nan i shahli ya kyllakshichi, mica hatak nan vlhtoka holitopa he vlhpiesa kia nan isht ik ahobalot anumpuli hoke.

9. Yohmi kia Mikael, enchil miko yvt nan isht ahullo ok-pulo ya it im anumpuli kyt, Moses, haknip imma yo isht it im anumpunli kia, isht a hofahya he anumpa hoka mihachi kyt nukshopa mvt, amba Chitokaka yak osh chim olvbashke, achi tok.

10. Amba ilvppvto nana yakohmi puta ka akostininch
keyu kvt, nan isht ik ahobalot isht anumpulishke ; yohmi
kvt nampoa im anukfila iksho yak i chiyuhmit, haknip nan
isht ai anushkunna ithana yvmmak puta ho isht il ai okpu-
nit tahlishke.

11. Yummvt i palvmmi mak oke; Ken nana a kaniohmi tok ak o chiyuhmit itvnova hokvt, micha nan isht vlhtoba yak o bvnna hosh Belam vt nan ashahanchi tok ak o chiyuhmit, ai yimitvt kvnivt yihlihimpa hatuk osh Koli vt i sa-nalit anumpohonlit isht illi ha tok a chiyuhmit isht ai okpulo tok.

12. Iluppak okut iti hullo impa huch ibai impakmvt, na

liteha vhleha yosh nukshopa kia ik im iksho hosh il impahanchi kvt; hoshonti oka iksho yo mahli puta kvt kanima isht aya; iti vni bvshit, vni iksho puta, hitukla illi, akshish momvt lobahli mak oke:

13. Okhvta chito oka piakvchit it ai ihissot, ilap isht ahofahya ya pokpokit kohonchi; fochik yoshuba puta hoka ai okhlilika chinto yak osh yummak okvno immit bilia he im vlhpisa hoke.

14. Mihma Enok, Alum isht ai unchululi ont isht untuklo kak kia, anumpa ilvppa tikbanli anohonli kvt, Yakeh! Chitokaka yokvt i holitopa vhleha tahlepa sipokni pokoli ka ai itvpehut vla kvt.

15. Moyuma ka nan im apesvt, Chihowa im antia he keyu yvt Chihowa ik holitoblo hosh nan ai vlhpesa keyu puta yvmoohmit ai asha chatuk, micha nan ashvchi Chihowa ik im antio vhleha hvt ilap i sanalit anumpa kvlo anumpohonli chatuk aieno moyuma ka na palvmmi ka onocha hi oke.

16. Ilvppak okvt ik ahninchot lumasit isht anumpuli vhleha hosh ilap chukvsh okpulo nan ahni kak o iakaiya yoke; micha isht ilauata fehna anumpa puta ka itih ha isht anumpohonli kvt, ilap nan isht im achukma he, ahni kak osh, hatak nashuka puta ka ahninchhi yoke.

17. Amba a holitopa vhleha ma ! hvchishno yvto pin Chitokaka Chisvs Klaist im anumpeshi vhleha hvt tikba kash anumpa isht hvchim anumpohonli tok puta kak o hvsh ithaiyanashke :

18. Yohmi kvt ont ai ishtaiyopit mahayakma, nan isht ik ahobalo vhleha hvt Chihowa ik holitoblo hosh ilap chukvsh okpulo nan ahni kak o iakaiya hosh ai asha hi oka, hvchim anohonli tok a hvsh ithaiyanashke.

19. Ilvppak osh vbanumpuli iksa ai ahli ka il ai i filvmmichi kvt, haknip nan ahni yo iakaiya hosh, Shilombish Holitopa yvt ik im iksho hoke.

20. Amba a holitopa hvchishno yvto, Shilombish Holitopa yvt hvchi anukfoyuka hosh anumpa ilvshva anumpohonlit, na hvchi yimmi holitopa fehna kvt hvsh il ai ahlihashke;

21. Chihowa ya hvsh i hullo kvt hvsh il achunanchi hosh, Chitokaka Chisvs Klaist okvt hvchi nukhaklo na aiok-chayvt bilia ya hvsh ona chi kvt hvsh hohoyashke.

22. Mikmvt yakohmi hoka im ahnit, kaniohmi kuno hvshi nukhaklashke.

23. Micha inla kuno nukshoblit halvllit, luak a a kohchit hvsh hlakofichi kvt, na fohka haknip isht aliteha yak heno hvsh i yuwalashke.

24. Yohmi ka yummak osh hvchi halanli ho ik hvch ibetvblo ka he, micha ilap ai o binili holitompa itikba ya anumpa ik achukmo hvchi onvtonla iksho nan isht il aiyukpa chinto ho isht hvchi ona hinla,

25. Pi Okchalinchi Chihowa hopoyuksa kak bieka yummak o isht a holitopa, isht a chinto, micha isht a miko, micha nan isht ai ahli aieno kvt himonasi, micha himak a pillka immit biliashke. Amen.

UBA NUMPESHI CHAN A

NANA KV T IM OTUNI TOK.

CHAPTA I.

Vba nan im otaiyani tok vt tvli holisso lakna pula ai o hikia untuklo
nan isht vlpisa ho Chan vt chvch untuklo Asia a hiohmaya ka
pit i holisso chi tok, 1; 7 Klaist vt minta chi; 14 nan isht im ai
ahli holitopa chinto aienka anoli.

1. **C**HISUS Klaist nan isht otvninchi yummak oka Chihowa hvt ima na in chekosikma nana a kaniohmi pulla chi ka, in tishu vhleha ha im otvnincha hi a tok; atuk o ymmak ash osh im enchil ak o pit chvffichi hosh in tishu Chan a nan it apesa hosh im anoli tok.

2. Mihi yosh Chihowa im anumpa, mikmvt Chisus Klaist nan isht im atokowa, micha nana ho pisa tok aienka kvt atokowa anoli tok mak oke.

3. Kvna hosh ilvppa it im anumpohonli, mikma kvna hosh na tikbanli annoa anumpa ilvppa haklo cha, nana hosh a holihiso tuk a holitobli hokvto momvt na yukpushke; yakohma chi ka ai ona hosi hoka.

4. Chan vt Asia yakni chvch a hiohli untuklo ka pit aiokpuchi; yummvt okchayvt ahanta kvt, yummak osh okchayvt ahanta tok osh, anonti himak a pilla ka okchayvt ahanta he mak o nan isht i kana, isht it i nanaiya aienka kvt a minti, ymmma im ai o binili holitompa itikba ya a hieli Na shilombish untuklo aienka a minti;

5. Micha Nan atokowa anoli ai ahli, mikmvt illi tuk osh

falamvt tani kvt illi vhleha hak o Uttahpi hosh holitopa i shahli ; micha miko yakni pakna ai asha puta I shahli Chisvs Klaist mak o a minti hosh hvchi anukfoyukashke. Hvp i hullo cha, na hvpim ai ashvchika puta hatuk ma ilap im issish ak inli ho isht achifvt hvp i kashof i cha,

6. Iki Chihowa na holitompa isht im vtta, micha miko yo ohminchi hosh pi atokoli tuk mak osh mihi yo isht a holitopa, micha nana moma isht imaiya ita tuklo kvt immi hosh bilivt biliashke. Amen.

7. Yakeh ! hoshonti ho il ai eshi hosh minti mak oke ; yohmi ka hatak nishkin puta, mikma kvna hosh yvmmma tvli halupa isht bahli tok vhleha ash kia moyumvt pisa he ; yohmikma oklushi puta yakni pakna ai asha tuk vt moyumvt yvmmak atuk pulla kak o komuntrt yahaya hi oke ; yakohmi mak inlashke. Amen.

8. Chitokaka nan okluha imaiya yvt himak a okchayvt ahanta kvt, yvmmak osh okchayvt ahanta tok osh, himak a pilla ka okchayvt ahanta he mak osh, Uno ak osh Alfa, Omeka, ai isht ia vmmona, micha ont ai vhli aienia sia mak oke, achishke.

9. Chan sia hvch itibapishi, mikmvnt na palvmmi ka hvch iba pihisa sia, micha Chisvs Klaist apehlichika ibafohka, micha Chisvs vt nuktanvt achunanchi tok a ohmit isht a hvch iba achvfa sia hatuk vt, Chihowa im anumpa, micha Chisvs Klaist nan isht im atokowa pulla hatuk mak o yakni tashaiyi Patmos hohchifo ho ont anta li tok.

10. Atuk osh Chitokaka i nitak o Shilombish Holitopa yvt si anukfoyuka fehnut ahanta li ho, vm asha ka imma ya nan ola chinto isht puwa ola ho chohmi kvt,

11. Uno ak osh Alfa, mikmvnt Omeka, vmmona, mikmvnt ont ishtaiyopi aienia sia mak oke ; yohmi hoka nana ho ish pihisa kvt holisso ha ish a holissochi cha, Asia yakni chuch a hiohli untuklo Efesvs, micha Smvna, mikmvnt Pvkamos, micha Hlaiatila, mikmvnt Satis, micha Filatelfia, mikmvnt Laotisea aienia ka pit ish pilashke, ahanchi ho haklo li tok.

12. Yohmi ma auet vm anumpohonli yvmmak ash o pisa

la chi hosh pit filema li tok. Yohmi kvt pit filema li mvt, twli holisso lakna pula ai o hikia untuklo ka pisa li tok:

13. Yohmi ma pula ai o hikia untuklo yummak ash ik-lvnnna ya Hatak Ushi ak o holba hosh, anchi vt iyi pilla ona ho ai anchi hosh, twli holisso lakna isht vskofuchi o chinuko foka ak o isht takchi hosh hikia tok.

14. Mihma noshkobo, micha pašhi aieno kvt tohbi kvt chukfi hishi, micha okti pushi aieno kak o chiyuhmi ma, nishkin vt luak libbi hak o chiyuhmi tok:

15. Yohmi mvt iyi yvt malanta kvt tvli lakna yosh tvli abila yo fohkvt hullokm̄i tuk mak o chiyuhmi ma, itih ola kvt oka chinto fopa ho chiyuhmi tok.

16. Mihmvt ibbak isht impak imma ya fochik untuklo ho isht ieshi tok; mihma itih ha bushpo falaia itahlakla halupa yosh a kohcha ma, nashuka yvt shohpakali kvt, hušhi tom̄mi ai ahli tom̄mi chatuk mak o chiyuhmi tok.

17. Yohmi ma yummak ash o pisa li mvt, illi yo chohmit iyi ituma ya ont sa tula tok. Yohmi ma ibbak isht impak imma ya ishit si umbitepa mvt, Uno ak osh ummona, micha ont ishtaiyopi aieno sia mak oke, ik chi nukshopo kashke.

18. Uno ak osh okchayvt ahanta sia mak osh, svlli tok nana kia, anonti yakeh! okchayvt sa bilia hoke, Amen: yohmi hosh isht ai illa he, micha shilombish aiasha aieno isht-tiwa ya ieshi li hoke.

19. Nana ish pisa tuk, micha nana kvt a kaniohmi, mik-mvt himak a pilla ho nana kvt a kaniohma he puta ka ish holissochashke.

20. Fochik untuklo svbbak isht impak imma alhto ho ish pisa kash, micha tvli holisso lakna pula ai o hikia puta aieno kash ot nan isht vlpisa kvt iluppak oke. Fochik untuklo kvt chuch a hiohli untuklo ka nan isht im vta vleha untuklo kak oke; yohmikma pula ai o hikia untuklo ish pisa kash ot chuch a hiohli untuklo kak oke, um achi tok.

CHAPTA II.

Efesvs, 1, 8 Smvna, 12 Pvkamos, 18 Hlaiatila aienā chvch a hiohli ka vbanumpa isht im vtta puta nana ho pit i holissocha chi ka Chan a im apesa kvt, nana kvt ai vlhpiesa, anonti nana ka ik ai onot aiasha kak a tok.

1. CHUCH Efesus a hikia nan isht im vtta ya pit ish i holissochashke: Ibbak isht impak imma ya fochik untuklo ka isht ieshi cha, tvli holisso lakna pula ai o hikia untuklo ho iklvnna a nohōwa yak osh iluppa puta ka achishke.

2. Nana ish a kaniohmi puta, nan isht ahantut a chi hoyv bli, nuktanlut ish achunanchi, mikmvt ai vlhpiesa keyu vhle ha ha kaniohmit ish im ahninch keyu, yohmikmvt kvna kia ilap ak osh vbanumpeshi mak o ile miha hatuk kia, keyu hatuk puta ka imomaka pisvt holabi atuk o ish akostininch:

3. Micha nana kvt palummi ka ish pihsa kia, nuktanlut ish achunanchi, mikmvt vno sa hohchifo pulla hatuk mak o ish toksahanli mvt, ik chi hoyvblo a puta hatuk a chim ithaiyana lishke.

4. Yohmi nana kia vmmona ka nan i hullo chi anukfo yuka tuk vt chik a lauecho hatuk o, nana ka isht ak chim ahninch kvt vñ ashvshke.

5. Yohmi hoka kanima yo a hikvt ik a lauwot ish ia tuk vt pit anukfihinlit, ish ile kostininch cha, nan isht ish ai vtta vmmona tok ak o ish yumihchashke: yummak keyukma chekosi chim aya likmvt, ish ile kostininch ho keyukma, chi pula ai o hikia ya ishit, a hikia tuk a kanvllichi la hi oke.

6. Amba chishno yokuto ilvpak o a chi yakohmi hatuk osh, Nikolaitan okla nana a kaniohmi puta ka chik ahninch ka, yummva vno ak kia ak ahninchoshke.

7. Kuna hosh haksobish vt i hinli hokvto, Shilombish Holitopa yvt chvch vhleha ha nan im ok ahanchi puta ka haklashke. Kvna hosh nana ka imaiyachit a hlopulli hokvto, mihi yosh ai-okchaya iti Chihowa i Palatais iklvnna hikia hatuk ma ai vpa hi a ima la hi oke.

8. Mikmvt chvch Smvna a hikia nan isht im vtta ya pit

ish i holissochashke. Ummona, micha ont ishtaiyopi aieno, yummak osh illi tok vt, okchayut ahanta mak osh, ilvppa puta ka achishke.

9. Nana ish a kaniohmi puta, mikmvt na palummi ish a pihisa puta, micha ilbusha chim aieno, (yohmi kia nana kvt chin laua ka ithana li,) mikmvt kanima kvt nana ka ik ahobalot anumpulit mihi yo keyu kvt, amba Setan i sinakak mak okak osh, Chu mak o ile mihvt aiasha ka, ithana li hoke.

10. Nana kvt isht chi ai ilbusha he puta asha ka chik i komunto kashke. Yakeh! hvsh kanima ka hvch imomaka pisa chi ka, Setan vt aboha kyllo a hvchi apitta he ; yohmikma nitak pokoli ho na palummi hvsh pisa chi hoke : ai ahlit mahayut ont chillashke ; yohmikma iachuka okchaya yo chima la he mak oke.

11. Kuna hosh hak**ş**obish vt i hinli hokvto, Shilombish Holitopa yut chvch vhleha ha nan im ok ahanchi puta ka haklashke. Kuna hosh nana ka imaiyachit a hlopulli hokvto, ai illi atukla ka ik im a palummo ka he mak oke.

12. Mikmvt chvch Pukamos a hikia nan isht im vtta ya pit ish i holissochashke : Bushpo falaia itahlakla halupa ishi mak osh ilvppa puta ka achishke.

13. Nana ish a kaniohmi puta, mikmvt kanima yo Setan vt apehlichi yummak kia ish ai vtta ka ithana lishke ; yohmi kvt sa hohchifo hatuk ma kyllochit ish ieshi mvt, anonti Antipas yummak okvt um antia ai ahlit atokowa otvninchi yosh hvchi takla ahanta tok a Setan ai vtta yak o ai vbi tok nitak foka kak kia, vno a is sai yimmi tuk vt chik kancho tok a ithana lishke.

14. Yohmi kia na holbvt toba puta isht aiokpvchi tuk puta ka vpa chi, mikmvt itin lumaka ma ymohma chi ka, Islael okla itikba ya isht ai ibetvbl i bohla chi ka Belam vt Balak a im abvchi tok nan vlbuchi ilvppa holitobli vhleha yummak o ish il a pehlichi hoka, nana ka isht ak chim ahnincho ka achafoa kvt um ashvshke.

15. Yohmi mvt anonti Nikolaitan okla nana isht ithvnan-

chi yvmmak oka ak ahnincho chatuk mak o, mihi yō holitobli vhleha yvmmakma ish il apehlichi ak inlishke.

16. Ile kostininchí; yvmmak keyukma chekosi fehna chim aya lish, okla yvmmak oka bvshpo falaia svtih a kohcha hatuk ma ont isht itibi la he mak oke.

17. Kvna hosh haksobish vt i hinli hokuto, Shilombish Holitopa yut chchh vhleha ha nan ok im ahanchi puta ka haklashke. Kvna hosh nana ka imaiyachit a hlopulli hokuto, mihi yosh manna lumpoa vpa chi ka ima likmvt, anonti tvli tohbi yō yummma hohchifo himona yosh a holisso, yohmi ka yummma hatak nana hosh ithana he keyu, amba ishi tuk ak illa hosh akostininchí mak o ima la hi oke.

18. Anonti chvch Hlaiatila a hikia nan isht im vtta ya pit ish i holissochashke: Chihowa Ushi yvmmvt nishkin vt luak libbi ho chiyuhmi ma, iyi mvt tvli lakna malanta achukma ho chiyuhmi mak osh ilvppa puta ka achishke.

19. Nana ish a kariohmi puta, micha ish i hullo, nan isht ish ahanta, na chi yimmi, nuktanlv̄t ish achunanchi, mikmvt nana ish a kariohmi puta, yohmi kvt ont ishtaiyopi kak osh tikba ya tok a imaiyachi ka chim ithaiyana lishke.

20. Yohmi nana kia ohoyo Chesebel, yvmmak okvt ohoyo hopaii mak o ile miha hosh, yvmmvt an tishu vhleha ha nan im abvchit, yoshubli na itin lum^äka yvmohma he, mikmvt nana ka na holbvt toba yō isht aiokpvchi tuk puta kia vpt ai asha hi a, vlpesa ish im ai ahni hatuk oka, nana ka isht ak chim ahnincho ka achafoa kvt vm ashvshke.

21. Yohmi mvt itin lum^äkvt ahanta chatuk vto ai ile kostininchá chi ka nitak a ima li tok, nana kia ile kostininchá he keyu ki tok.

22. Yohmi hoka yakeh! yummma atuk ma topa pakna yo pit ai om bohli likmvt, yummma itin lum^äka yatuk ma na palvmmi chinto ka onochi la chi hoke; nana a kariohmi yatuk puta kvt ai ile kostininchí ho keyukma.

23. Mikmvt ohoyo yummma im vlla vhleha hatuk ma illi mak o isht ahambi la chi hoke; yohmikma vno ak osh hatak chukvsh nana ai ahni puta ka afvnalechit ithana sia

hatuk a chvch vhleha puta kvt ithaiyana he mak oke : yohmikma hvchishno hvsh a kaniohmi puta kak o isht ai vlpesa aiyukali mak o hvch ima la hi oke.

24. Yohmi kia hvchishno, micha inla Hlaiatila maya aie-na, laua kvt kaniohmi hosh nan vlbuchi ilvppak ash ik ahninch, micha Setan vt im anukfila ont ai vhli mak o, okla miha ka, ik ithano hvchia hokvno na weki inla nana ho hvchi onochi la chi ho keyu, hvchim achi lishke.

25. Amba nana ka hvsh ieshi mashko hatuk okvto, kvullo-chit hvsh iши na vla li hayashke.

26. Yohmikma kuna hosh nana ka imaiyachit, nana kvt yakohma he ahni li ka holitoblit im antivt a hlopulli hokvto, mihi yosh oklushi puta hatuk ma i shahla he mak o, vno a Aki vt vm apesa tok a, chohmichit im apesa la he mak oke :

27. Yohmikma yummak ash ot tvli fuli toba ho ieshi hosh yvmmma nan im apihisa he ; mikma yummak atuk mv̄t shuti tuna yosh na tuna tuk o bushullit tvmoa chatuk a chiyuh-ma hi oke.

28. Yohmikma yummak amo onnahinli fochik a ima la he mak oke.

29. K̄na hosh haksobish vt i hinli hokvto, Shilombish Holitopa yvt chvch vhleha ha nan im ok ahanchi puta ka haklashke.

CHAPTA III.

Satis chvch hikia vbanumpa isht im vtta ya nan i miha, 1 : 3 tle nuk-haklonchit ilekostininchia chi ka i miha : Filatelfia chvch hikia ka nan isht im vtta yvto nana ka ahlit achunanchit ahanta ka im ah-ninch ; 15 Laotisea chvch nan isht im vtta ya tuk vt libisha keyu, mikmv̄t kapvsa keyu aien aha tuk o im alvmmi ; 20 Klaist vt ok-hissa ya hikiut sokoha.

1. MIKMUT chvch Satis a hikia nan isht im vtta ya pit ish i holissochashke. Chihowa imi shilombish untuklo, micha fochik untuklo aien aha tuk vt libisha keyu, okchaya mak o chi hohchifo ak inli kia, illi yo chia hoka chim ithaiyana lishke.

2. Nana kvt ai vlhpiesa əhli hq Chihowa itikba ya ish a yvmohmi na pisa li keyu hoka, ahah ! ish il ai ahni cha, nana kvt illi mak o mahaya kia asha moma hatuk okvno ish hlampkohonhashke.

3. Yohmi kvt nana ka ish ishi, micha ish haklo aien a tuk vt, ithaiyanvt kullochit ish ieshi cha, ish ile kostininchashke. Amba ahah ! chik il ai ahno hok mvno, hukopa nowvt aya hq chohmi hosh ant chi kohcha la chi ; yohmi ka hushi kanvlli nana hq ant chi kohcha la chi ka ish ithana hi o keyu hoke.

4. Satis ak okvno holhtina kanomosi kvt, yvmmak okvto im ilefoka ya ik litehlo kvt, chim ashvshke ; yohmi hatuk osh yvmmak okvto yvmmak a he im ai vlhpesa hokvt, na fohka tohbi foyuka cha sub ai itunowa he mak oke.

5. Kvna hosh nana ka imaiyachit a hlopulli hokvto, mihi yosh nafohka tohbi a fohka he ; yohmikma yvmma hohchifo hvt ai okchaya holisso a takali tuk a kashofi la he keyu, amba hohchifo ha Aki, micha im enchil vhleha aien a itikba ya ai anohonli la he mak oke.

6. Kvna hosh haksobish i hinli hokvto, Shilombish Holitopa yvt chvch vhleha ha nan im ok ahanchi puta ka hakashke.

7. Mikmvt chvch Filatelfia a hikia nan isht im vtta ya pit ish i holissohashke : Holitopa, ai əhli mak osh, Lewi im isht tiwa ya ieshi hosh, yvmmvt okhishta haya, hatak nana hosh wakumma he keyu ; anonti tiwa haya, hatak nana hosh okhishta he keyu chatuk mak o ilvppa puta ka achishke.

8. Nana ish a kaniohmi puta ka ithana lishke : yakeh ! isht hlampko iskvtnosi kvt chin takanli cha, vñ anumpa ha ish holitobli mvt, sa hohchifo ha chik kancho hatuk oka, okhissa ya tiwit chi tikba ya hilechi li : yohmi ka hatak nana hosh yvmmak oka okhishta hi o keyu hoke.

9. Kanima kvt mih mak o keyu kvt, Chu mak o ile mihv holabi vhleha hvt Setan i sinakak atuk a atokolit anoli la chi hoke : yakeh ! yvmma puta kash ot chiyi ituma ya ai vvt ant aiokpvchi hosh, vno vt chi hullo li hatuk a akostininchah a im anukfilli la chi hoke.

10. Chishno vt nuktanlv̄t ish achunancha hi chim apesa li tok v̄m anumpa h̄ ish holitobli tuk oka, vno ak kia na palv̄mmi yvmmvt yakni pakna ̄sha puta ka imomaka pisa chi mak osh yakni pakna onvtuyula hi oka, hv̄shi kanv̄lli yvmmma fehna ka chi hlakofihinchi la he oke.

11. Yakeh! chekosi vla la chi mak oke: nana ish iši yvmmak atuk vt kvlochit ish ieshi pulla na iachuka h̄ hatak nana kia ik chim esho kashke.

12. Kv̄na hosh nana ka imaiyachit a hlopulli hokv̄no mihi yo an Chihowa in tempel in tonik o ikbi la he: yohmikma yvmmak atuk mvt nitak nana ik kohcho ka he mak oke: yohmikma an Chihowa hohchifo, mikmvt an Chihowa in tu-maha chito hohehifo, yvmmvt Chelusalem himona, an Chihowa ak o minti hosh v̄ba yakni ̄ a kohchvt vla hatuk ̄ a yvmmma isht a holissochi la he, mikmvt, sa hohchifo himona ma yvmmak ash isht a holissochi la hi oke.

13. Kv̄na hosh haksobish vt i hinli hokv̄to, Shilombish Holitopa yvt chvch v̄leha h̄ nan im ok ahanchi puta ka haklashke.

14. Mikmvt chvch Laotisea a hikia nan isht im v̄tta ya pit ish i holissochashke: Amen, Nan atokowa anoli ̄hli, Chihowa nana ikbi tok ̄ moma in Tikba mak osh ilvppa puta ka achishke.

15. Nana ish a kariohmi puta ma ithana li ka, chi kapv̄ssa, keyukmvt, anonti ik chi lvshposhke; yohmi ka chi kapv̄ssa hokmá, chi lvshpa hokmá, nana tuk okbano, ahni lishke.

16. Yohmi kvt chi kapv̄ssa keyukmvt, anonti ik chi lvshpo hosh peh chi libisha v̄monna hatuk oka, hoitvt sa takha a kohchit chi kanchi la hi oke.

17. Nana kvt an laua kvt, i shahlit isht ia hatuk osh nana kia sa bunna keyu, ish achi; yohmi cha na palv̄mmi pihisut chilbusha, micha nana ik chim iksho, chik hoponayo, nipi bano aieno ho kak osh chik ithano hokvt.

18. Nan chin laua chi kvt, tvli holisso lakna luak isht imomaka pisvt v̄lhtaha yo vno ak o is san chumpa chi, mikmvt na fohka ish fohka cha, nipi banot hofahya kvt ik chim

iksho ka ch̄i kvt, vno ak o na fohka tohbi yo is san chumpa ch̄i, micha nishkin ahama ma an chumpvt, chi nishkin a ish ahami cha, ish hoponaya ch̄i ka, ch̄i miha lishke.

19. Kvna ho vno vt i hullo li hokvto, nana ka im olvbbit kostininchli chatuk: yohmi hoka nana ka amosholi hosh ish ile kostininchashke.

20. Yakeh! okhissa ya hikivt sukohoha lishke: Kvna hosh um anumpa ha haklo cha, okhissa ya tiwi hokma, iba chukowa lish, ibai impa likma, anonti ilap mvt subai impa ch̄i mak oke.

21. Kvna hosh nana ka imaiyachit a hlopulli hokvto, mihi yosh, vno vt imaiyachit a hlopulli lish, Aki a awant im ai o binili holitompa ya a binili li kvt, yummak inli ho chohmit um ai o binili holitompa ya a binila ch̄i ka, im apesa la he mak oke.

22. Kvna hosh haksobish vt i hinli hokvto, Shilombish Holitopa yvt chvch vhleha ha nan im ok ahanchi puta ka haklashke.

C H A P T A IV.

Chihowa im aiasha holitopa vba ya Chan vt pisa, 1 ; 4 hatak tikba pokoli tuklo akucha ushta; 6 nan okchaya kvt itikba, olvbl aien a nishkin vt alotowa; 10 aiasha holitopa o binili kash o hatak tikba vhleha hash ot iachuka holitopa ya aka bohli cha, aiokpahanchi.

1. NANA kvt a yakohmi haya, anonti pit hopokoyo li ma, yakeh! vba shutik a okhissa yvt tiwa tuk atok: yohmi ma auet svt im anumpuli anumpa vmmona haklo li ka, isht pu fa yo chiyuhmi hosh, Ilvppak o oiyá, mikma himak a pilla nana a kaniohma he puta ka chim otvninchi lashke, achi tok.

2. Yohmi ma mih-mak inli ho Shilombish Holitopa isht a sa nukfoyuka ma, ai o binili holitompa kvt vba shutik a ai o hikia ma, ai o binili holitompa yummak ash achvfa kvt o binili tok.

3. Yohmi ka ai o binili holitompa o binili yummak okvt pisa ka tvli holitopa chaspa, micha satin aien kak o holba

tok : mihma pisa ka emelal ak o holba hosh hinak bitepuli hut ai o binili holitompa yash apakfoyupa tok.

4. Yohmi ma ai o binili holitompa yash ai o binili pokoli tuklo akucha ushta hosh hiohlit folubli tok : yohmi ma hatak tikba pokoli tuklo akucha ushta kvt na fohka tohbi abehkvuchi hosh tvli holisso lakna iachuka ho iachukoli hosh ai o binili yash o binohmaya tok.

5. Yohmi ma ai o binili holitompa yash malvtha, hiloha ola aien a hosh a kohoncha tok. Mihma ai o binili holitompa yash itikba ya pula luak untuklo, yummvt Chihowa imi Shilombish untuklo mak osh hieli tok.

6. Yohmi ma ai o binili holitompa itikba ya okhvta shohkoali hosh klistal ak o chiyuhmi hosh talaia tok ; yohmi ma ai o binili holitompa ai iklvnna, mikmv^t auet a bilika fullota aien a ka nan okchaya ushta kvt itikba, micha im ashaka aien a nishkin biekvt alotowa hosh aiasha tok.

7. Yohmi ka nan okchaya vmmona kash ot koi chito yo holba ma, nan okchaya ont atukla kash ot wakushi yo holba ma, nan okchaya ont atuchina kash ot nashuka asha kvt hatak nashuka yo holba ma, anonti nan okchaya ont aiushta kash ot ossi hika ho holba tok.

8. Mihmvt nan okchaya ushta hash ot sanahchi vt i haniali aiyuka ma, nishkin biekvt isht alotowa tok : mihmvt ymmak ash ot, Holitopa, holitopa, holitopa, Chihowa Chitokaka nana moma imaiya, yummak osh okchayvt ahanta tok osh himak a okchayvt ahanta kvt, himak a pill a ka okchayvt ahanta hi oke, ahanchi kvt nitak, ninak aien a ik ai yokoposhke.

9. Nan okchaya vhleha ymmak ash ot okchayvt ahantvt bilivt bilia yvt ai o binili holitompa o binili kash, yak oke im ai ahnit, holitoblit, aiokpahanchi ma,

10. Hatak tikba pokoli tuklo akucha ushta kash osh okchayvt ahantvt bilivt bilia yvt ai o binili holitompa o binili kash itikba ya ant hlipkvchit, aiokpahanchi mvt, im iachuka hash shoelit ai o binili holitopa itikba ya pit asachi mvt,

11. Chishno ak osh nan okluha ka ish ikbi tok : micha

chishno nana ish ai ahni ho nana ai asha kvt toba tok oka, Chihowa ma! nan isht a holitopa, micha isht ahninch, mikmvt isht chim ai ahli puta kvt a chimmi ha he vt chim vlhpesa hoke.

CHAPTA V.

Holisso hvt nan isht ashana untuklo ho isht ashana ho Chan vt pisa, 1; 9 yvmmma chukfvlhpoba ushi yvmmvt illi tok ak bano hosh wakama hi vt im vlhpesa, yohmi hoka hatak tikba vhleha hashot yvmmak ash o aiokpahanchi; 9 ilap im issish o isht okchalinchi tuk a okla anohonli.

1. YUMOHMI ma a holisso yvt anukaka, mikmvt pakna aienka holisso hosh, isht ashana untuklo ho isht ashana hosh ai o binili holitompa o binili ibbak isht impak imma yaq foyuka na pisa li tok.

2. Mihma enchil hlampko fehna kvt chitolit anumpohonli mvt, Kuta hak osh isht ashana puta hatuk a mokohlichcha, holisso hash tiwa hi vt im vlhpiesa cho? achi ho pisa li tok.

3. Yohmi ma vba shutik, micha yakni, mikmvt yakni nutaka aienka ai ahanta kvt kvna kia holisso yvmmma tiwa he, mikmvt pisa he ai im vlhpiesa aienka kvt iksho ki tok.

4. Yohmi ma kvna kia holisso hatuk a tiwi cha, it im anumpula he, micha yvmmma pisa he ai im vlhpiesa kvt iksho hatuk o, sa nishkin okchi vt mihinti fehna tok.

5. Mihma hatak tikba vhleha hash osh achufut, Chi nishkin okchi vt minti ná; yakeh! Koi chito Chuta okla a minti, yvmmvt Lewi a minti hakshish filaminchi yak osh isht ashana untuklo kash mokohlichcha, holisso hash tiwa chi kvt ont im ai ahli hatuk oke, um achi tok.

6. Yohmi ma yakeh! ai o binili holitompa, micha nan okchaya ushta, mikmvt hatak tikba vhleha aienka ai itin takla yaq Chukfvlhpobushi vt hikia kvt illi tuk a ahoba hosh, lapish vt untuklo cha, nishkin mvt untuklo, yvmmvt Chihowa imi shilombish untuklo yakni moyuma ai im aya mak o pisa li tok.

7. Mihmvt yummak ash ot minti mvt, ai o binili holitompa o binili im ibbak isht impak imma holisso hvt foka tuk ash ant kohchit ishi tok.

8. Mihma yummvt holisso ha ant ishi ma, nan okchaya ushta, micha hatak tikba pokoli tuklo akucha ushta kash ot, hap, micha vl holisso lakna nan ai vl yosh na balama alotowa, yummvt vbanumpuli puta im anumpa ilbusha mak osh yohmi ho ishi banot, Chukfvlhpobushi itikba ya okla ont hlipkvchi tok.

9, 10. Micha taloa himona ka okla talohwa kvt, Chishno ak osh chilli hosh oklushi ilaiyuka, im anumpa ilaiyuka puyuta, hatak okla moma a kohchi hosh Chihowa immi e toba chi ka, chishno chim issish ak o isht ish pi chumpa hatuk; yohmi hosh Chihowa ha na holitompa isht im vtta, micha miko vhleha aiena ka ish pikbi tok: atuk o yakni pakna ka a mikot il ai asha chi hoka, Chishno ak osh holisso hash ish ishi cha, isht ashana yash ish tiwa he vt a chim vl hlpiesa hoke, ahanchi tok.

11. Yohmi ma pit pisa li ma, ai o binili holitompa bilika fullota ka, enchil vhleha laua, mikmvt nan okchaya, micha hatak tikba vhleha aiena ka itih ola bieka ho haklo li tok; yohmi kvt yummvt holhtena kvt tahlepa sipokni pokoli banot ia kvt tahlepa sipokni pokoli cha, anonti tahlepa sipokni bano hosh tahlepa sipokni achvfa hosh,

12. Chitolit miha hosh, Chukfvlhpobushi illi tok vt nan isht im ai ahla he, micha nan uha in laua, mikmvt isht a hopoyuksa, micha isht hlampko, mikmvt isht ahninch, micha isht aholitopa, mikmvt isht aiokpanchi aiena ka a chimmi ha he vt chim vl hlpesa hoke, ahanchi ho haklo li tok.

13. Yohmi ma vba, micha yakni pakna, mikmvt yakni nutaka, mikmvt okhvta anukaka, nan okchaya aiasha tuk, mikmvt yummak ash ot minti mvt, Ai o binili holitompa o binili, micha Chukfvlhpobushi ita tuklo kvt isht ai okpanchi, micha isht ahninch, mikmvt isht a holitopa, mikmvt isht im ai ahli aiena kvt ai immi kvt bilivt biliashke, ahanchi ho haklo li tok.

14. Yohmi ma nan okchaya ushta kash ot Amen, achi tok: mihma hatak tikba pokoli tuklo akucha ushta kash ot aka hlipkvchi cha, okchayvt ahantvt bilivt bilia yash o aiok-pahanchi tok.

CHAPTA VI.

Nan ashana kash it iakaiyachit wakamohli; tiwakma nana hosh kaniohmi; nana kvt ont ai vlikma kaniohma he anoli.

1. YOHMI ma pisa li ho, Chukfvlhpobushi vt holisso isht ashana achvfa kash tiwi tok: mihma hiloha wimimpa ho chiyuhmi hosh nan okchaya ushta kash ot achvft, Manti cha, ant pisá, achi ho haklo li tok.

2. Mihma yakeh! issuba tohbi yo pisa li tok: mihma iti tanampo ishi hosh yvmmak ash o o binili; yohmi ma yvmmak ash o iachuka ima ma, yvmmak ash ot imaiyachit hlopulla chi kvt imaiyahanchit ishit mahaya tok.

3. Atuk o anonti holisso isht ashana atukla kash tiwi ma, nan okchaya atukla kash osh, Manti cha, ant pisá, achi ho haklo li tok.

4. Atuk o issuba inla yvmmvt humma yosh kohchvt ia tok: yohmi ma yvmmma o binili kvt nanaiya hatuk a yakni pakna ya a mokofit isha chi kvt im vlpisa na okla hvt ilap biika ya itilicha he mak atok; yohmi ma yvmmak ash o bvshpo falaia chinto ho ima tok.

5. Mihma anonti holisso isht ashana ont atuchina kash tiwi ma, nan okchaya atuchina kash osh, Manti cha, ant pisá, achi na haklo li tok; mihma yakeh! issuba lusa yo pisa li tok; mihma yvmmma o binili kvt nan-isht-weki ibbak isht ishi tok.

6. Yohmi ma nan okchaya ushta ai itintakla ya ai anum-pa ola kvt, Iskvli achvfakma onush isht vlpisa achvfa, mik-ma iskvli achvfa ka bale vt isht vlpisa tuchinashke; yohmi kia ahah! ish ai ahni cha, alif vni, mikmvts oka paiki aien a hokvno chik okpano kashke, achi ho haklo li tok.

7. Atuk o anonti holisso isht ashana ont ai ushta kash

tiwi ma, nan okchaya ont ai ushta kash osh miha mvt, Minti cha, ant pisá, achi na haklo li tok.

8. Yohmi ma yakeh ! issuba hato-lakna yo pisa li tok : mihma Isht-ai-illi hohchifo hosh yummak ash o o binili ma, ai okpulo ka ai asha tuk vt pit iakaiya tok. Mihma yummak ash ot yakni itakashkoa ont isht ai ushta ka bvshpo falaia, micha na hohchvfo, mikmvt nan-illi, micha nampoa nukskopa puta yakni pakna ai asha aienakak o isht illichachij kvt im vlpisa tok.

9. Atuk o holisso isht ashana ont isht tahlapi kash tiwi ma, Chihowa im anumpa pulla, micha nana atokowa anolit ieshi pullvt isht illi tok vhleha shilombish vt alta nutaka ya ai asha na pisa li tok.

10. Mihma yummak ash ot, chitolit anumpulit miha mvt, Chitokaka ai ahlili holitopa chia hvt pim issish a tok a atobvuchi kvt yakni pakna ai asha ka chik im apeso ho, hopaki kvt katiohmi foka chij cho ? ahanchi tok.

11. Yohmi ma yummak ash o ilefoka tohbi falaia holitompa aiyuka ho ima tok : mihma chekosi takla hokvno nukchintot fohvt maya na itibapishi vhleha tishu ilap ai itilaui puta kak kia, ilap ak atok ak inli ho chohmit illa hi atuk vt, ont ai ahla hi a i miha tok.

12. Mihma holisso isht ashana ont isht hannali kash tiwi ma, yakeh ! yakni winakuchi chinto ho pisa li tok : mihma hvshi vt lusa kvt na pashi tunna yo chiyuhmi ma, hvshinak-aya yvt issish ak o chiyuhmi tok.

13. Yohmi ma vba fochik puta kvt chilofut akakoha kvt, fik vpi yvt mahli kullo fehna ho faiokahanchi na ik ai ono ho vni vt chilofa chatuk ak o chiyuhmi tok.

14. Mihma vba shutik vt ita pahlatvt, a holisso yosh bonuntvt ont taiyahvt kvnia ho chohmit pit kvnia tok : mihma nvnih chaha, micha tashaiyi puta kvt a taloha tuk a ka-nvllit taha tok.

15. Mihma miko vhleha yakni pakna ai asha tuk, micha hatak hochitokaka vhleha, mikma hatak nan in laua vhleha, kwpitvni hochito, hatak holitompa vhleha, mikmvt hatak yuka, micha hatak yuka keyu puyuta kvt nvnih chaha

puta tvli hochito aienā ka chiluk ai asha tuk ą a lumpoa tok.

16. Mihmvt nvnih chaha puta, micha tvli hochito aienā kash օ, Auet hvsh pi օ kinahli cha, ai օ binili holitompa օ binili կ ի nashuka, micha Chukfvlhpobushi nan isht ի nukkilli aienā hatuk ma pisht hvsh ի luhmashke.

17. Himak ą nan isht ի nukkilli nitak chinto kvt vlvshke ; yohmi ka kvta hak osh hikia hinla cho ? achi tok.

CHAPTA VII.

Chihowa in tishu vhleha ibitakla յա enchil osh in chunli, 1 ; 4 Islael isht ai unchululi laua kaniomhi hosh yakohmit nan isht ai in chսwa, 9 Oklushi inla mvt aholhtina iksho hosh in chսwa, ilvppak ashott na tohbi holitopa falaia isht fohkvt aiasha holitopa itikba յա hiohmaya ; 14 im anchi vt chukfvlhpobushi im issish օ isht ahchifa ha tok.

1. ATUK օ ai yvmohmi ha ya, enchil ushta kvt, mahli hvt yakni, micha okhvta, mikmvt iti aienā ka ik օ mahlo ka չի ka, yakni auet a mahli ushta hatuk ma ieshi hosh, yakni achukbeli ushta ka hieli հօ pisa li tok.

2. Mihma anonti enchil inla hosh Chihowa okchaya im isht in chսwa լի hosh hvshi akochaka, imma յօ vttvt oiyvt minti հօ pisa li tok ; mihma yummak ash osh enchil ushta yakni, micha okhvta aienā okpvna չի im vlhpisa tuk ash օ chitoli hosh pit in tahpvet,

3. Yakni, mikmvt okhvta, micha iti puta aienā ka hvch ik okpano հօ, hvpin Chihowa in tishu vhleha ibitakla յա iloh in chonli hayashke, ahanchi tok.

4. Atuk օ in chսwa tok vhleha holhtina ka haklo li tok : yohmi ma Islael okla isht ai unchululi vhleha moma kvt tahlepa sipokni banot tahlepa achvfa cha, tahlepa sipokni pokoli ushta akucha ushta hosh in chսwa tok.

5. Chuta isht ai unchululi hvt tahlepa sipokni auah tuklo hosh in chսwa tok. Luben isht ai unchululi hvt tahlepa sipokni auah tuklo hosh in chսwa tok : Kat isht ai unchululi hvt tahlepa sipokni auah tuklo hosh in chսwa tok.

6. Ase isht ai unchululi hvt tahlepa sipokni auah tuklo hosh in chuwa tok. Neftalim isht ai unchululi hvt tahlepa sipokni auah tuklo hosh in chuwa tok. Manasses isht ai unchululi hvt tahlepa sipokni auah tuklo hosh in chuwa tok.

7. Simeon isht ai unchululi hvt tahlepa sipokni auah tuklo hosh in chuwa tok. Lefai isht ai unchululi hvt tahlepa sipokni auah tuklo hosh in chuwa tok. Issaka isht ai unchululi hvt tahlepa sipokni auah tuklo hosh in chuwa tok.

8. Sabulon isht ai unchululi hvt tahlepa sipokni auah tuklo hosh in chuwa tok. Chosef isht ai unchululi hvt tahlepa sipokni auah tuklo hosh in chuwa tok. Benchamin isht ai unchululi hvt tahlepa sipokni auah tuklo hosh in chuwa tok.

9. Ilvpput ai yakohmi haya, anonti yakeh ! okla chinto fehna, hatak nana hosh hotehna kvt tahla he keyu mak o, oklushi ilaiyuka, im anumpa ilaiyuka puta yakni pakna ai asha moma ka a minti hosh, ilefoka tohbi falaia holitompa abehkuchi hosh, pam vt ibbak a foyuka ho ai o binili holitompa, micha Chukfvlpobushi ita tuklo itikba ya hieli ho pisa li tok.

10. Mihma chitolit miha hosh, Hvpin Chihowa ai o binili holitompa o biniли kak osh, micha Chukfvlpobushi ita tuklo kak osh pi okchalinchi tuk mak oke.

11. Mihma enchil vhleha ai o binili holitompa, micha hatak tikba vhleha, mikmvt nan okchaya ushta aien a kash a foluplit hieli tuk vt ai o binili holitompa itikba ya okla oka hlipkvchit Chihowa ha aiokpahanchi mvt,

12. Amen, hvpin Chihowa yvt hopoyuksa, hlampko, micha nan okluha imaiya aien a hoka, yak oke im ai ahnit ahninchit, holitoblichit, il aiokpahanchi na bilivt biliashke, Amen, ahanchi tok.

13. Yohmi ma hatak tikba vhleha hash ot achvfut auet anumpuli mvt, Ilefohka tohbi falaia abehkuchi yakohmi kvt kvt ho ? micha katima yo okla minti tok oh cho ? v*m* achi tok.

14. Mihma, A shahli ma ! yvmmak okvno ish ithanushke, im achi li tok. Mihma, Ilvppa yakohmi kak osh na palv-

mi chinto hq asht kohchut aya hosh, im ilefoka yash Chukfulhpobushi issish o isht achifut tohbichi tok mak oke.

15. Yohmi hatuk osh Chihowa im ai o binili holitompa itikba ya nitak, micha ninak moyuma ka yummma in tempel anukaka ya aiokpahanchi hoke: yohmi ka ai o binili holitompa o binili kvt yummma ai itin takla ya ahanta hi oke.

16. Yohmikma himak a pill a ik hohchafo ka he, mikmvt ik itukshilo ka he, mikmvt hushi vt ik onvtulo ka he, mikmvt kocha lvshpa mvt ik towulhkocho ka hi oke.

17. Chukfulhpobushi ai o binili holitompa iklvnna binili yummak osh impuchit, pehlichit oka kvli okchaya hiohli puta ka isht ohona he: yohmikma Chihowa ak osh nishkin okchi puta ma mominchit i kasholichit tahla he mak oke, um achi tok.

C H A P T A V I I I .

Nan ashana ont isht untuklo kash o wakami, 1; 2 isht pufa untuklo hq enchil untuklo ka ima, 6 ushta kvt olachi ma na palvmmi chinto kvt ovni; 3 enchil achufa kvt vbanumpuli vhleha vba pit • anumpohonli t^äklak ma tvli holisso lakna alta toba ka na balama pit o bohli.

1. ATUK o holisso isht ashana ont isht untuklo kash tiwi ma, hushi kanvlli isht vlhpisa iklvnna itintakla ka vba aholitopa yvt chullusvt talaia tok.

2. Mihma enchil untuklo Chihowa itikba hieli tuk a pisa li tok: yohmi ma yummak ash o isht pufa untuklo hq ima tok.

3. Mihma enchil inla hosh tvli holisso lakna na-balama ai-vlhto yo sholi kvt, mintit alta ya ant a hikia tok: yohmi kvt vbanumpuli vhleha moyuma kvt vba pit anumpohonlikma ai atakla ma tvli holisso lakna alta toba yvt ai o binili holitompa itikba hikia tuk a ai o huhukma ch^ä ka, na balama laua hq ima tok.

4. Atuk o na balama ya a shobulli kvt, vbanumpuli vhleha vba pit anumpohonli ka ai itiba fokvt enchil ibbak a a kohchut ia hosh, Chihowa itikba ohona tok.

5. Atuk o enchil ash ot na balama ai vlhto yash ishi cha, alta yak o luak a ai ishit alotuli mvt, aka pit fojobli tok ; yohmi ma nan ola, micha hiloha, malvtha, mikmvt yakni winakvchi aieno tok.

6. Mihma enchil untuklo kash ot isht pufa untuklo ka ishi tuk ash, olacha chⁱ kvt il ai atahli tok.

7. Mihma enchil vmmona kash ot olachi ma, hatafo, mikmvt luak, issish it ib vlhto aieno ho yakni a o kanchi tok : mihma iti okchaki moma ka a kashapa ont isht a tuchina kvt luvt taha ma, hvshuk okchaki mvt momvt luvt taha tok.

8. Mihma anonti enchil ont atukla kash ot olachi ma, nvnih chito yosh luak o isht luhua chiyuhmi hosh okhvta ha pit okatula tok : mihma okhvta a kashapa ont isht atuchina kvt issish o toba tok.

9. Yohmi ma okhvta anukaka nana toba tok puta im ilhfopak asha tuk vt, kashapa ont isht atuchina kvt illi tok ; mihma peni hochito yatuk vt kashapa ont isht atuchina kvt okpulot taha tok.

10. Mihma anonti enchil ont atuchina kash ot olachi ma, fochik chito yosh p^ula ho chiyuhmit luhua hosh, vba shutik a a mintit aka ant itola cha, okhina puta kashapa ont isht atuchina, mihmvt kvli a hiohli kashapa ont isht atuchina aieno ka onvtula tok.

11. Yohmi kvt fochik yymma hochifo kvt wumwut achi hatok ; yohmi hatuk o oka moyuma ka kashapa ont isht atuchina kvt wumwut o toba tok : mihma oka ak osh takbut kvnia hatuk oka, hatak vt oka yash o isht illi kvt laua tok.

12. Mihma anonti enchil ont ai ushta kash ot olachi ma, hvshi, hvshi ninak aya, fochik puta aieno kvt koyufa ont isht atuchina hosh ai okpuloka tok ; yohmi hatuk osh koyufa ont isht atuchina kvt im okhlili na nitak koyufa ont isht atuchina kvt ik tommo ma, anonti ninak vt mihinli tok.

13. Mihma anonti pit hopokoyo li mvt, enchil achvfa kvt ossi hika ho chiyuhmit vba shutik iklunna ya hlopullit aya mvt, chitolit tahpulvt, enchil tuchina kash ot himak pilli isht pufa ola inla ka olacha chⁱ kvt asha ka, yummak osh

ohnla hokvno, hatak yakni pakna asha hatuk vt i Palvmmi, palvmmi, palvmmi chinta chi mak oke, ahanchi ho haklo li tok.

C H A P T A I X.

Enchil ont isht tahlapi kash ot olachi ma, fochik vt aka auet itula ma, yvmmak ashochittuk hofobi ont ataha he iksho isht tiwa ya ima, 1 : 2 chiluk ash o tiwi ma hawa puta halambia ho choh mi hosh auet kocha wiha tok ; 13 isht pufa isht hannali kash ot ola ; 15 mihma enchil ushta talakchi atuk vt i holhtofa.

1. YUMOHMI ma enchil ont isht tahlapi kash ot olachi ma, fochik vt vba shutik ak o a mintit yakni a ant onvtula ho pisa li tok ; mihma yvmmak ash o chiluk hofobi ont ai vhli iksho isht tiwa ya ima tok.

2. Mihma yvmmak ash ot chiluk hofobi ont ai vhli iksho yash tiwi ma, tvli a bieleli chito yo shobullit a kohcha ka, chiyuhmit chiluk hofobi a a shobullit kohoncha tok ; mihma chiluk hofobi a a shobullit kohoncha kak o hvshi, micha shutik takla aienan kvt isht okhlilit kvnia tok.

3. Yohmi ma hawa puta mvt shobohli ka asht kohchvt, yakni a ai itvnowa tok ; yohmi ka yvmmak atuk mvt nan okpuna he im vlhpisa kvt, halambia yakni pakna ai asha kvt nan okpuna he im vlhpisa tok ak inli ho chiyuhmi tok.

4. Yohmi mvt yakni pakna hvshuk ai asha ka, micha nan okchaki puyuta, mikmvt iti aienan hokvno ik okpano ka chi, amba hatak kaniohmi hosh Chihowa im isht in chuwa yvt in lapanli keyu hatuk ak illa chi ho im vlhpisa tok.

5. Yohmi kia yvmmak oka ik illico ka chi, amba ilvp-pak ash ot nan i palvmmi kvt hvshi tahlapi ka ona chi ho im vlhpisa tok ; yohmikma hawa vt yvmmak ash o i palvmmichi kvt halambia hosh hatak a nvhlkmt i palvmmichi chatuk a chiyuhmi tok.

6. Mikmvt nitak yummfa foyuka hokvno hatak vt illa hi a hohoyo kia, ik ahayucho ka he ; micha illi ka ik bvnna kia, nan illiche vt i kunihiya hi oke.

7. Yohmi ma hawa yash osh issuba hosh tvnvp ia chi hosh im vlhtahvt kvnia chatuk a chiyuhmi tok : mihmvt tvli

holisso lakna holba ho iachuka iachukoli ma, nashuka yut hatak nashuka yo chiyuhmi tok.

8. Mihmvt pashi vt ohoyo pashi ak o chiyuhmi ma, noti vt koi chito noti yo chiyuhmi tok.

9. Yohmi mvt ikkishi alata puta kvt twli ikkishi alata holba ho okla ishi tok: mihmvt i sanahchi fopa kvt itichanli issuba laua shali ho twvp itibit ia hosh yihleput aya na winihuchi ho chiyuhmi tok.

10. Mihmvt hasimbish vt halambia hasimbish o holba hosh asha ho, nan isht nvhlri mvt asha tok; yohmi hosh nan im vlpisa kvt hvshi tahlapi ho hatak a ilvshala chi hatok.

11. Mihmvt i mikko vt binili tok: yvmmvt chiluk hofobi ont ai vhli iksho a im enchil mak a tok: yvmmvt Heblu anumpa hokma Abatton hohchifo ma, amba Klik anumpa hokuno hohchifo kvt Apolyon oke.

12. Nana palvmmi achufa kash ot ant ivt kvnia ma, anonti na palvmmi tuklo hosh himmakma mihinta chi oke.

13. Atuk o enchil ont isht hannali kash ot olachi ma, twli holisso lakna alta Chihowa itikba hikia tuk lapish ushta ka, anumpa ola hut a kohcha mvt, enchil ont isht hannali kash ot isht pufa ishi hosh hikia kash o,

14. Enchil ushta talakchi yosh okhina chito Euflates a oka asha ka ont ish i hotofashke, im achi ho haklo li tok.

15. Mihma enchil ushta kash ot i holhtofa mvt, hatak puta kashapa ont isht atuchina ka vba chi kvt, hvshi kanvlli achufa, nitak achufa, hvshi achufa, afvmmi achufa aienka im vltaha tok.

16. Mihma issuba o binilit twvp aya holhtina kvt tahlepa sipokni tahlepa tuklo bat tahlepa sipokni achufa tok: mihma holhtina ka haklo li tok.

17. Mihma nan isht atokowa kvt yakohmi ho pisa li tok; issuba o binili vhleha ilvpak ash ot ikkishi alata yvmmvt humma, micha okchamali, micha lakna ai itaiyoma aienka ho ieshi tok; mihma issuba noshkobo hut koi chito noshkobo ho chiyuhmi ma, itakha ya luak shobohli, mikmvt hituk lakna aienka hosh a kohoncha tok.

18. Luak shobohli, mikmvt hituk lakna aienka kvt itakha

ya a kohoncha tuchina ilvppa pulla kak o, hatak moma ka kashapa ont isht atuchina kvt isht illi tok.

19. Itakha, mikmvt hasimbish aienā ka nan isht i palvm-micha hi vt im vlhpisa hoke; mihmvt i hasimbish vt noškobo ašha kvt sinti chilita yo holba hatuk o, ilvppak o nana ka isht okpani yoke.

20. Yohmi kia nan isht ahullo okpulo puta, micha tvli holisso lakna, tvli hvta, mikmvt tvli lakna, tvli, iti aienā na-holbw̄t toba puta, yummvt pisa keyu, micha haklo kia haklo keyu, mikmvt nowa kia nowa keyu aienā ilap ibbak vt ikbi tuk okvno ik aiokpacho ka chi kvt, hatak kanimi na palymmi ilvppa isht ik illo ke tuk okvto yummva i filvmmi ik ile kostininchō kish;

21. Hatak vbi, il isht ahullochi, nan itin lumaka, micha na hukopa aienā ka i filvmmi ik ile kostininchō ki tok oke

CHAPTA X.

Enchil hlampko kvt holisso tiwa yvt ibbak a foyuka ho haška, 1, 6 okchaya bilia yummak atuk mak o himak ma nitak vt atakala chi keyu, achi tok: 9 holisso hosh ishi cha vpa chi kvt, Chan vt im vlhpisa.

1. YOHMI ma enchil chinto inla yosh hoshonti ho iba-foyuka hosh vba shutik a mintit aka vla na pisa li tok; mihma hinak-bitepuli hosh noškobo ha apakfoyupa ma, nashuka yvt hvshi yo chiyuhmi ma, anonti iyi yvt luak tonik o chiyuhmi tok.

2. Mihmvt holisso iskvtnosi kvt wakama yo ibbak a isht ieshi tok; mihmvt iyi isht impak imma ya okhvta ha o hile-chi mvt, anonti iyi isht im afvbekimma yano yakni ya o hilechi cha,

3. Koi chito woha chatuk a chohmit chitolit tahpvlt miha tok; atukmvt yummak ash ot tahpvla ma, hiloha untuklo kvt hilohoha tok.

4. Atuk o hiloha untuklo kash ot hilohoha haya, holisso-chi la chi hatok; atuk ak o vba aholitopa ya auet anumpa na, Nana yakohmi ka hiloha untuklo kash ot anumpuli tuk

ə chik holissocho hosh ish ashanichashke, um achi na haklo li tok.

5. Yohmi ma enchil yummvt okhvta, micha yakni ita tuklo ka ə hikia na pisa li kash, yummak ash ot ibbak ə vba shutik pit weli tok.

6. Mihmvt okchayvt ahantvt bilivt bilia, yummak osh vba, micha yummma nana kvt aiasha puta, mikmvt yakni, micha yummma nana kvt aiasha puta, mikmvt okhvta, micha yummma nana kvt aiasha puta aienka ikbi tok mih mak ə isht a miht anumpa kvollo isht il onochi kvt, nana kvt a yohma he tuk ont ia he keyu ka hi atok;

7. Amba enchil ont isht untuklo im anumpa chī nitak ovno yummak ash ot olachit isht iakma, Chihowa nana ai ahni tuk vt in tishu hopaii vhleha nan im otvñinchi tok mak osh ont vlhtaha chī mak oke.

8. Yohmi ma anumpa yummma vba aholitopa pit a haklo li tok ash ot anonti auet um anumpuli tok: mihmvt, Ia cha, holisso iskvtnosi yummvt tiwa yash enchil, yummvt okhvta, micha yakni ita tuklo ka ə hikia ka ibbak foka ka ont ishi, um achi tok.

9. Mihma enchil ash im ona lish, Holisso iskvtnosi yash et umá, im achi li tok: mihma, Ishi cha, vput tahli; yohmikma chikfoka ya takbacha chī hoke, amba chitakha anukaka yano champuli kvt foi bila yo chohma chī hoke, um achi tok.

10. Yohmi ma enchil ibbak ə a kohchit holisso iskvtnosi yash ishi lish, vput tahli li tok; mihma satakha anukaka yokvno champuli kvt foi bila yo chohmi tok: yohmi kia isht nanvbl li mak inli ho, sakfoka yash ot takbvt kvnia tok.

11. Mihma yummak ash ot, Hatak oklushi, mikmvt im anumpa ilaiyuka, miko vhleha puta lawa ka itikba ya nana ka tikbanli ish ai otvñihinchcha chī pulla hoke, um achi tok.

CHAPTA XI.

Vlhtokowa anoli tuklo hosh nan anohonli, 1; 5 ik umbo ka chī ka vba shutik akamala hi vt im vlpisa; 7 nampoa nukshopa yvt i sanalit

itihibit yvmmak ash vbi; 8 ik hollopo hosh k̄ha na, 4 nitak ont atuchina cha iklvnnvt aienā ma tanit okla; 15 isht p̄ufa isht untuklo kashot oia.

1. YUMOHMI ma k̄ushak osh fuli yo holba ho vma tok; mihmvt, Wakaya cha, Chihowa in tempel, micha alta, mikmvt kvna hosh yvmmma ai ashvt aiokpahanchi vhleha aienā ma ish apesashke.

2. Yohmi kia apishia, yvmmvt tempel a ai ibachvfa keyu hoka, yvmmak okvno Chentail okla ho immi hoka, chik ape-
so kashke; yohmi ka hushi pokoli ushta cha tuklot aienā ka
tv̄maha chito holitopa ya iyi p̄vtha okla isht a hvhlihincha
chi hoke.

3. Mikma nan isht ai əhli ka nana v̄m atokowa ishi tuklo ka ima la chi; mikma mihi yosh p̄ashi tv̄nna na fohka yo foyuka hosh nitak tahlepa sipokni achvfa cha, tahlepa tuklo pokoli hannali aienā ka nana ka tikbanli otvñihincha chi hoke.

4. Ilvppak osh Alif iti tuklo, mikmvt p̄vla ai o hikia tuklo aienā kvt yakni pakna in Chihowa itikba hieli mak oke.

5. Yohmi ka hatak nana hosh ilvppa ilbvshali hokma, ilvppak ash itakha ya luak osh a kohcha hosh in tv̄nvp puta hatuk ma isht v̄pa hoke; yohmi ka hatak nana hosh yvmmma ilbvshali hokmvt, nana ai yakohmi mak o illashke.

6. Ilvppak ash osh nan ai atokowa anohonli kvt isht ahanta t̄kla nitak a ik umbo ka chi ka, v̄ba shutik a okshita hi vt ilvppak osh ai im v̄lhpesa mak oke; mikmvt oka puta ma imaiyvt yvmmak ash o issish o ikba hi vt ai im v̄lhpesa; mikmvt yvmmvt nana ka ik yohmi ahni hokmvt, na palvum-
mi puta ma yakni ya isht ihissa hinla hoke.

7. Yohmi tok kia ilvppak ash ot nana atokowa ishi kash ot ont taiyahli tuk mak o, nampoa nukshopa chiluk hofobi ont ai vhli iksho a kohcha mak osh in tanampit, yvmmak ash imaiyachit v̄ba hi oke.

8. Mihma tv̄maha chito yvmmak o hvpin Chitokaka yak kia ititaiyukhuna a honahla tok, nan isht it apesa kvt Sotom, micha Echip achi ka hina yvmmā illi haknip vt a k̄ha chi hoke.

9. Mikma okla ilaiyuka im anumpa ilaiyuka, oklushi puta mvt nitak tuchina cha iklvnna aienka, illi haknip ash pihi-sa kia, ahollopi ya ik a hollopí, okla ik ai ahno ka hi oke.

10. Yvmohmikma yakni paknaka ai asha tok puta ka hopaii tuklo ilvppak ash osh i palvmmihinchu tuk oka, yakni paknaka ai asha ak inli kvt nan isht il im ai yukpvt, na yuk-pa ikbit mayakmvt, ilap bika nana iti habenvchit ai asha hi oke.

11. Yohmi na nitak tuchina cha iklvnna aienakma shilombish okchaya Chihowa ak o a minti hosh yvmmak ash chukowa ma, yvmmak ash ot ilap iyi yosh isht o hinli tok : mihma ilvppa pisa puta tok okvno na nukshopa chinto kvt onrtuyula tok.

12. Yohmi ma vba aholitopa a minti anumpa chito ka haklot okla ma, Oiyvt ho minti, auet im ahaya tok. Mihma vba aholitopa ya ia kvt hoshonti anukaka mahaya ma, in tunvp puta tuk vt pihsa tok.

13. Mihma hvshi kanvlli yvmmak inli ho yakni vt winakuchi chito tok ; mihma tvmaha chito kashapa ont isht pokoli kvt kinafa tok ; yohmi ma hatak tahlepa sipokni untuk-lo hosh yakni winakuchi ka ai illi tok ; mihma hlakofi tok okvto nukhlakancha mvt, vba aholitopa in Chihowa ya holtoblichu tok, achi tok.

14. Na palvmmi atukla kash ot ant a yohmi ka, anonti yakeh! na palvmmi atuchina kash ot chekosikma minta chi hoke.

15. Atuk o enchil isht untuklo kash ot olachi tok : mihma anumpa ola chinto kvt vba aholitopa ya auet takali kvt, Yakni ilvppa apehlichika puta kvt hvpin Chitokaka, mikmvt Ushi Klaist ita tuklo im apehlichika yo tobushke ; yohmi hatuk o mihi yosh mikot ahanta na bilivt bilia hi oke.

16. Yohmi ma hatak tikba pokoli tuklo akucha ushta, yvmmvt Chihowa itikba ya ilap im ai o binili o binohlit maya kash osh aka hlipkuchi cha, Chihowa ha aiokpahan-chi mvt,

17. Chitokaka Chihowa nana moma imaiya ma! okcha-yvt ahanta tok osh, okchayvt ahanta, anonti himak a pilla

ma okchayut ahanta he chia, yohmi kvt chishno nan isht chim ai ahli chinto ma il ai ishit, mikot ish ahanta hoka, yak oke e chim ai ahnishke, ahanchi tok.

18. Yohmi ka oklushi puta chukvsh vt nukhobela tok : mikma nan isht ish i nukkilli yvt vlvshke : mikma illi puta kvt nan im ai vlpisa chi, mikmvt chin tishu hopaii vleha, mikmvt vbanumpuli ahli puta, mikmvt kvna hosh chi hohchifo ha i nukshohompa aieno hokvno nan isht vltoba ma ish ai ima chi, mikmvt kvna hosh yakni ya okpvni hokma, yvnima ish ai okpvna chi nitak vt vlvshke.

19. Yohmi ma Chihowa in tempel vt vba aholitopa ya a tiwa tok ; mihma in tempel angkaka ya nan it im vlpisa itombi holitopa kvt otvni tok ; mihma malvha, anumpa ola, hiloha, micha yakni winakuchi, mihmvt hatafo chito aieno kvt a takali tok.

CHAPTA XII.

Ohoyo hvt hvshi yo isht foyukvt vlla isha chi nan i palvmmi, 1 ; 4 sinti chilita humma yosh yvmmak ash itikba hikia kvt im vlla ya isht vpa chi kvt im vltaiyaha ; 6 vlla yvt in tola mvt, ohoyo hash ot yakni haiaka yo pit maleli ; 7 Mikael, micha im enchil aieno kvt nan okpulo sinti chilita yash itihjbit imaiyachi ; 13 sinti chilita yash ot vba mintit aka itola cha, ohoyo hash i twnahampi tok.

1. YOHMI ma na fehna chinto kvt vba shutik a ai otaiyani kvt, ohoyo hosh hvshi yo foyuka ma, hvshi-ninakaya yvt iyi nuta yo takali tok, yohmi ma fochik auah tuklo iachuka toba ho iachukoli tok.

2. Mihmvt yvmmak ash ot chakali hatuk osh, vlla itola he nan isht i palvmmi na hotopa tuk vt itola hokbano ahnit, tahpahanla tok.

3. Mihma na fehna inla kvt vba shutik a ai otvni kvt, yakeh ! sinti chilita humma chinto hosh, noshkobo hvt im untuklo mvt, anonti in lapish vt pokoli ma, iachuka untuklo kvt noshkobo ha afoyua tok.

4. Mihma i hasimbish vt vba fochik a kashapa ont isht atuchina ka halanlit aka auet fohopli tok ; yohmi ma vlla yvt

in tola he ai ona hatuk o, vlla yvt itola mak inli ho isht im vpa chi kvt, ohoyo hash itikba sinti chilita yash ot hikia tok.

5. Atuk o yummak osh tvli fuli yo ieshi hosh okla moma ka imaiyachit nan im apesa chi mak o, ohoyo hash ot vlla nakni yo sholi tok; atuk o im vlla yash o Chihowa, mikmvt im ai o binili holitompa pill a maya tok.

6. Yohmi ma yakni haiaka kanima' yo ai vta hi o Chihowa yvt ai im atahli tok mak o, ohoyo hash ot pit maleli tok: yummak o nitak tahlepa sipokni achufa tahlepa tuklo cha pokoli hannalit aiena ka yummak oka okla nan ai im atahanla chi hatok.

7. Mihma vba ya ai it in tanampit ai asha tok: Mikael vt im enchil vhleha aiena kvt sinti chilita yash itihimbi ma, anonti sinti chilita yash ot yummak ash, mikmvt im enchil aiena ka itihimbi kia,

8. Imaiachi keyu ki tok; mihmvt ai vta he nana kia vba ya iksho ki tok.

9. Mihma sinti chilita chinto, sinti sipokni, nan isht ahullo okpulo, micha Setan achi chatuk, yummak osh yakni moma ka yoshubli chatuk mak o yumm a kohehi tok, atuk o aka pill a ho yummak ash ot pit itola tok; mihma im enchil vhleha hash ot apehvt pit kaha tok.

10. Mihma vba aholitopa ya anumpa ola chinto ka pit a haklo li ma, Himak ano isht ai okchaya, isht hlampko, mikmvt hvpin Chihowa im apehlichika, micha Ushi Klaist nan isht im ai ahli aiena hash ot vlushke; hvp itibapishi vhleha i nukkillit na-mihachi yummak osh nitak, ninak aiena ka hvpin Chihowa itikba ya ai i nukkillit na-mihachi yatuk ash osh aka pit itolvshke, ahanchi tok.

11. Mihmvt Chukfvlpobushi im issish, mikmvt ilap im anumpa isht atokowa puta ho yummak ash okla isht imaiyachi tok; yohmi kia isht ai illa he kia, ilap im ilhfipak a i hullo tok keyu.

12. Yumohmi hoka vba aholitopa puta, micha yumm a i asha puta hvchia ma! ho yukpa, nan isht ahullo okpulo, yummvt chekosi itintakla ho anta chi kvt ithana hosh, nan isht i nukkilli chinto ka il ai eshit hvchim vla hoka, yakni

pakna, micha okhuta aienā ka ai asha tuk vt nana i palvmmi mak oke.

13. Yohmi ma sinti chilita yash ot aka ya pit itola kvt il ithana mvt, ohoyo yummak osh vlla nakni ishi kash, ilbu-shahli tok.

14. Mikma ilap ai vta yakni haiaka hikvt ia chi ka, ohoyo hash ossi chito sanahchi tuklo ho ima tok; yohmi ma yummak o afvmmi tuchina iklvnnvt aienā ka sinti chilita yash o itikba ai i filvmmiit ai ilhpihintashke.

15. Mihma sinti chilita yash ot oka falama ohmi kvt oka yo ohoyo hash iakaiyachit ilap itakha a kohchi kvt, yvmmvt oka chito yosh yummak ash shalit kanima isht ia hi a ahni hatok.

16. Yohmi tok kia yakni vt ohoyo hash apela tok; mihmvt yakni ash ot ilap itakha ya wakummi cha, oka chito yvmma sinti chilita yvt ilap itakha ya a kohchi kash isht nanvpli tok.

17. Yohmi ma sinti chilita yash ot ohoyo hash i nukkilli fehna mvt, ivt ohoyo hash isht ai unchululi kaniohmi maya, yvmmvt Chihowa im anumpa vlhpisa puta ka holitobli, mik-mvt Chisvs Klaist nan isht im atokowa aienā ka ieshi vhleha' hash o in tanampi tok.

C H A P T A X I I I .

Nampoa nukshopa yvt noshkobo hvt untuklo, lapish mvt pokoli hosh okhuta ha akohcha tok; mihma yvmmak o sinti chilita yash ot nan ai ahli ima tok, 1; 11 nampea nukshopa inla yosh yakni a akohcha; 14 nampoa nukshopa tikba ya tuk toba chi ka na holbvt toba ya im ahni; 15 yohmi na yvmmak ash o hatak puta kvt aiok pahancha chi; 16 mikmvt isht ai in chuya chi ha tok.

1. **YUMOHMI** ma okhuta shinuk pakna ya ai o hikia li mvt, nampoa nukshopa achvfa kvt okhuta ha a koyucha ho pisa li ma, noshkobo hvt untuklo mvt, lapish vt pokoli, mihma in lapish pakna ya iachuka pokoli ma, anonti Chihowa isht ik ahobalo hohchifo hosh noshkobo ha ai o holisso tok.

2. Mihma nampoa nukshopa yummma pisa li kash o koi chikchiki ho holba ma, iyi yvt nita iyi yo chiyuhmi ma, anonti itakha mvt koi chito itakha yo chohmi tok: mihma sinti chilita yash ot nan isht hlampko, micha miko ai o binili, mikmvt nan isht im ai ahli aiena ka yummak ash o ima tok.

3. Yohmi ma yummma noshkobo achvfa kamo nvhlt isht illa hi o chiyuhmi tok; atuk ak osh nvhlt isht illa he kash ot hlakofi tok; mihma nampoa nukshopa hash o yakni moma kvt, okokko! ai ahnit iakaiya tok.

4. Yvmohmi mvt sinti chilita yummak osh nampoa nukshopa ya nan isht ai ahli ima hatok oka, okla aiokpahanchi mvt; anonti nampoa nukshopa hash o okla aiokpahanchit, Kvta hosh nampoa nukshopa holba cho? kvta hosh yummma in tanampit ahanta hinla cho?

5. Yohmi ma na chinto fehna, micha nana ka ik ahobalo puta isht anumpula chi ka yummak ash o itakha ima tok; yohmi ka hrshi pokoli ushta akucha tuklo ka a moyumvt isht ahanta chi mak osh im vlpisa tok.

6. Yohmi ma yummak ash ot itakha ya wakummit, Chihowa ya ik ahobalot isht anumpulit, i hohchifo, micha im vltipo, mikmvt vba aholitopa aiasha puta ma ik ahobalot na mihachi tok.

7. Yohmi kvt vbanumpuli ahli vhleha in tanampit yummak ash o imaiyacha chi kvt nan im vlpisa tok; micha hatak oklushi ilaiyuka, mikmvt im anumpa ilaiyuka puta ka imaiyacha chi ka yummak ash o nan isht im ai ahli ima tok.

8. Mikma kvna hosh hohchifo hvt yakni tobvt a minti tok ai vhli ka vltobvt illi tok Chukvlpobushi i holisso ai-okchaya a holisso tok keyu kvt, yakni pakna ai asha moma kvt yummak ash o aiokpahancha chi hoke.

9. Hatak nana hoh' kia haksobish vt i hikiakmvt, ik haklo.

10. Kvna hoh kia inla ya yuka ikbit isht aya hokvto, ilap mvt yuka tobvt aya hi oke; kvna hoh kia inla ya bvshpo falaia yo isht vbi hokvto, ilap mvt bvshpo falaia yo isht

illa hi oke. Ilvppak ə vbanumpuli vhleha hvt nuktanlut achunanchit na yimmi ka isht otaiyani hoke.

11. Yakohmi ma nampoa nukshopa inla kvt yakni ə auet a kohcha na pisa li tok; yohmi ka yummak ash ot in lapisht əsha kvt Chukfvlhpobushi ak ə holba mvt, anonti sinti chilita yak ə chiyuhmit anumpuli tok.

12. Mikmvt yummak ash ot nampoa nukshopa vmmona isht im ai əhli ash yummma itikba yə isht ahanta hoke; mikmvt yakni, micha yummma ai asha pit aienā kvt nampoa vmmona, yummvt bahut illit hlakofi tok ash aiokpahancha chī ka im ahni hoke.

13. Mikmvt yummak ash ot na fehna chinto ka yvmihchi; yohmi hatuk osh yummak ash ot luak vt vba mintit hatak puta itikba yakni ə ant onvtuyula chī ka ahni hoke.

14. Yohmi hatuk osh yummak ash ot nan im ai əhlit nampoa nukshopa itikba ya na fehna puta ka a yvmihchi kak osh yakni pakna ai asha puta ka yoshublihinchī mvt; bvshpo falaia isht baha tok kia, anonti okchaya tok nampoa nukshopa yummma na-holbachit okla im ikba chī ka, yakni pakna ai asha vhleha hə im ahanchi hoke.

15. Mihmvt nampoa nukshopa holba yash ot anumpuli, mikmvt laua kvt kaniohmi hosh nampoa nukshopa holba yash aiokpvcha hi ə keyukmvt, illa hi ə aienā ka im ahna hi oka nampoa nukshopa holba yash ilhfiopak ima hi vt im vlhpisa hoke.

16. Yohmi kvt hochitoka, mikmvt ik a lauwo, nan in laua, mikmvt ilbvsha, yuka keyu, mikmvt yuka a moyuma kvt ibbak isht impak imma, keyukmvt ibitakla ya in chūwa hi ə yummak ash ot im apesa yoke.

17. Yohmikma hatak nana kia nanasi kia chumpa, keyukmvt kancha he keyu mak a tok: amba kva hosh nampoa nukshopa isht in chūwa, yummak keyukmvt i hohchifo, yummak keyukmvt i hohchifo hə isht a holhtina kvt isht ai in chūwa ak a hi oke.

18. Ilvppak ə nan isht ithana yoke. Kva kia im amukfila isht akostininchī im əshakmvt, nampoa nukshopa isht im a holhtina ka ik hotehná, yummma hatak vt a hotehna

yoka: yohmi ka yvmmma isht im a holtena kvt tahlepa hannali cha pokoli hannali akucha hannali hoke.

CHAPTA XIV.

Chukfvlhpobushi vt ilap ai itapeha itapehvt Saion nvnih a hiohmaya,

1. 6 Enchil osh vbanumpa isht anumpuli; 8 Babulon vt akama; 15 yakni pakna nawaya hoiyo; 20 Chihowa nan isht i nukkilli oka pa^{ki} toba ya^q itahobi.

1. YAKOHMI ma hopokoyo li ma, anonti yakeh! Chukfvlhpobushi ash osh Saion nvnih ha o hikia ma, tahlepa sipokni bat tahlepa achufa cha pokoli ushta akucha ushta kvt, yvmmma Iki i hohchifo hvt ibitakla ai o holisso hosh yvmmak ash o apeha tok.

2. Yohmi ma vba aholitopa ya^q auet anumpuli ka oka laua fopa, mikmvt hiloha chinto ola chiyuhmi ho haklo li tok: mikma hap olachi vhleha hvt ilap i hap ai olahanchi na ola ka haklo li tok.

3. Yohmi ma ai o binili holitompa itikba, mikmvt nan okchaya ushta, micha hatak tikba vhleha aiena itikba taloa himona yo okla a talohowa tok; yohmi ka taloa yvmmma hatak nana hosh ithuna he keyu ma, amba tahlepa sipokni bat tahlepa achufa cha pokoli ushta akucha ushta yvmmak o yakni a a kohehit chumpha ak illa tok.

4. Ilvppak ash osh ohoyo nana kia isht a liteha tok keyu vhleha hoke; ohoyo himithoa hatak haleli keyu ho chiyuhmi vhleha hoke. Ilvppak ash osh Chukfvlhpobushi, yvmmvt kanima yo ia hoh kia, iakaiya vhleha mak oke. Ilvppak o hatak puta ai itintakla a kohchit chumpha tok o, Chihowa, micha Chukfvlhpobushi ita tuklo ka immi nawaya vmmoma vhleha hoke.

5. Yohmi ka yvmmma itakha ya^q na holabi kia ai otvni chatuk o keyu; Chihowa ai o binili holitompa itikba ya^q na liteha nana kia ik im iksho vhleha hoka.

6. Yakohmi ma anonti okla, oklushi ilaiyuka, mikmvt hatak im anumpa ilaiyuka moma yakni pakna ai asha tok a

im anumpula chi hosh, enchil inla yvt vbanumpa ai ahlit
bilia il ai eshi hosh vba shutik iklunna ya hikut aya mvt,

7. Chitoli hosh miht, Chihowa hvt nan ai apesa chi
hvshi kanvlli vt vla hoka; yummak o i nukshumpvt ho
holitobli; micha yummak osh vba shutik, yakni, okhuta,
mikmvt kvli hiohli puta aien a ka ikbi tok oka, oh aiokpa-
hanchi, ahanchi na pisa li tok.

8. Yohmi ma anonti enchil inla kvt iakaiya mvt, Ilap nan
itin lumaka nan isht haksichi oka pak i chiyuhmi ho okla
moma ka ishkochi tok okvt, Babulon tvmaha chito yummak
ash ot aiokpulokushke, aiokpuloka mak oke, ahanchi tok.

9. Anonti enchil ont isht atuchina kvt yummak ash o pit
iakaiya mvt, chitoli hosh miht, Hatak nana kia nampoa
nukshopa, micha yummma holbvt toba yash aiokpuchi cha,
anonti isht in chuwa ma ibitakla, keyukmvt ibbak isht impak
imma okma, nana ka isht ai in chuwa hok mak osh,

10. Mihi yosh Chihowa nan isht i nukkilli oka pak yum-
mvt nan itaiyoma keyu hosh, yummvt nan isht i nukhobel a
isht ishko ya a toshowa mak o ai ishka chi hoke; yohmik-
mvt yummak ash ot enchil holitopa vhleha itikba, mikmvt
Chukfvlhpobushi itikba aien a ka luak, micha hituk lakna
aien a ho isht ai ilbusha hi oke, ahanchi tok.

11. Atuk o yummma isht ai ilbusha shobohli hvt vba ai
ihiya kvt bilivt bilia hoke; yohmi ka kuna hosh nampoa
nukshopa, micha yummma holbvt toba yash aiokpahanchi,
mikma kuna hosh yummma i hochohifo isht in chuwa ya isht
ai in chuwa hokvto nitak, nirak aien a ka a foha he ik im
iksho vhleha hoke.

12. Ilvppak o vbanumpuli vhleha hvt nuktanlv t achu-
nanchi ka isht otaiyani hoke; ilvppak o Chihowa im anumpa
vlhpisa puta holitobli, micha Chisus i yimmi aien a isht
otaiyani hoke.

13. Yakohmi ma vba aholitopa ya auet anumpa na haklo
li ma, Ish holissochashke, Kuna hoh kia himak a pill a ka
Chitokaka ya ibai achvft illi hokvto na yukpa hoke; ahli
yummak okvt nana ka isht ahantvt isht hoyvbl tok puta
ka a mokofvt a foha chi hatok, Shilombish Holitopa yvt

achishke; mikma nan-toksuli puta kash ot ilap a iakaiya hoke, vñ achi tok.

14. Atuk o anonti yakeh! hoshonti tohbi ka pisa li ma, hoshonti pakna yã hatak Ushi ak o holba hosh o binili cha, tvli holisso lakna iachuka iachukoli mvt, anonti nan isht vlmo halupa fehna ka ibbak isht ieshi tok.

15. Mihma enchil inla yvt tempel a a kohchvt minti mvt, hoshonti o binili yvmmak ash chitolit in tahpvlvt, Nan isht chim vlmo yã fahvmmmit na-waya yã vmó; nan ish ma he vlhpesa ka ai ona hoka; micha yakni pakna nan a waya kvt a laknv^t tahuvhk^e, im achi tok.

16. Mihma hoshonti o binili yvmmak ash ot nan isht im vlmo yã ishit yakni pakna moma o fahvmmi tok: mihma yakni vt vlmot taha tok.

17. Anonti enchil inla yosh yvmmak kia nan isht vlmo halupa ka ishi hosh, tempel vba aholitopa talaia ka auet a kohchvt minti tok.

18. Mihma enchil inla yvmmvt luak o imaiya hosh alta yã ai vtvt kohchvt minti tok: mihmvt nan isht vlmo halupa ishi yvmmak ash o chitoli hosh in tahpvlvt, Nan isht chim vlmo halupa yash ishi cha, yakni pakna pákvi ai vnit pokspoa ka tvptulit itahobi; páki vt nuna fehnvt taha hoka, im achi tok.

19. Mihma enchil ash ot nan isht im vlmo yash yakni pit o fahvmmi mvt, yakni pakna pákvi a ai vmot itahobi cha, Chihowa nan isht i nukkilli yã oka páki atoba chito yã pit fohopli tok.

20. Yohmi ma tvma chito kochanli ak o oka páki atoba yash o a hvhlchi tok: mihma issish osh oka páki atoba yash a kohoncha kvt, kowi tahlepa tuklo a taiyakla ka cha-ha kvt issuba tvli kapali itih hã kapanli ona hosh talaia tok.

CHAPTA XV.

Enchil untuklo kvt na palvmmi untuklo ishtaiyopi ka il ai ishi, 1;

3 nampoa nukshopa yash im aiyachi tok vhleha in taloa; 7 koto-bushi untuklo kvt Chihowa nan isht i nukkilli alota.

1. MIHMA nan isht atokowa inla yut isht anukhlakancha he a chinto ho vba aholitopa yo a pisa li ma, enchil untuklo kvt na-palummi untuklo ishtaiyopi yummak o Chihowa nan isht i nukkilli yut isht ai ahli mak o ieshi tok.

2. Yohmi ma okhuta shohkoali hosh luak it ieshit talaia chiyuhmi na pisa li tok; mihma nampoa nukshopa, micha yummma holbut toba, mikmvt isht in chuwa, yumohmikmvt yummma hohchifo isht aholhtina aienka imaiyachi tok vhleha a moyuma hokuto Chihowa i hap ieshi hosh, okhuta shohkoali yash o hiohli tok.

3. Mihmvt Chihowa in tishu Moses im vlhtaloak, micha Chukfvlhpobushi im vlhtaloak aienka okla talohowa kvt, Chitokaka Chihowa nana moma imaiya, vbanumpuli vhleha i Miko chia ma! nana ish a tokshanli puta ka isht a nukhlakancha he a chinto hoke: yohmi kvt ai vlhpiesa ai ahli yak osh a chim anukfila yoke.

4. Chitokaka ma! Chishno ak bano hosh chi holitopa hoka, kuta hosh ik chi nukshohompot, chi hohchifo ha ik holitablecho ka chi cho? ai vlhpiesa na palummi ish onochi hatuk a otvi hoka, oklusi moma kvt chi tikba ya ai vlt chi aiokpahancha hi oke, ahanchi tok.

5. Yakohmi ha ya anonti hopokoyo li tok; mihma yakeh! nan isht atokowa vlhtipo in tempel vt vba aholitopa ya a tiwa tok.

6. Yohmi ma enchil untuklo kvt na palummi untuklo kash ieshi hosh, linen kashofa tohbi yo foyuka mvt, anonti tvli holisso lakna isht uskofuchi toba ho chunuko ya isht uskofaiyachi hosh, tempel ash auet a kohcha tok.

7. Yohmi ma nan okchaya ushta kash ot achwfut Chihowa, yummvt okchayvt anta kut bilivt bilia nan isht i nukkilli ya tvli holisso lakna kotobushi untuklo alotowa ho enchil untuklo kash ima tok.

8. Yohmi ma Chihowa nan isht im aholitopa, mikmvt nan isht im ai ahli a minti shobohli ho tempel ash osh isht alotowa tok; yohmi ka enchil untuklo man isht im a palummi untuklo kash ot ont ik ai ahlo kisha hokuno hatak nana kia tempel ash a chukowa he keyu hatok.

CHAPTA XVI.

Nan isht i nukkilli kotabushi alota kash o enchil vt fohopli, 1; 6 mih ma na palummi hosh aya; 15 hukopa yo chohmit Klaist vt vla chi; mikma kvna hosh okchvt hohoyo tuk okvto na yukpa he.

1. YUMOHMI ma anumpa ola chinto kvt tempel a auet a kohcha kvt, Oh ia cha, Chihowa nan isht i nukkilli koto-bushi ai vlhto kash yakni pakna oh ai o fohopli, enchil un-tuklo kash im ahanchi na haklo li tok.

2. Mihma vmmona kash ot ia mvt, ilap i kotobushi vlhto kash yakni ont o fohopli tok; mihma kvna hosh nampoa nukshopa isht in chuwa ya isht ai in chuwa tok, mikmvt kvna hosh yummma holvt toba ya aiokpahanchi tok hatak puta kash o hichi okchushba nan okpunlo kvt onvtuyula tok.

3. Anonti enchil atukla kash ot ilap i kotobushi vlhto kash okhvta ont o fohopli tok; mihma hatak illi im issish o chohmit toba na nan okchaya okhvta ai asha tuk vt moyumut illit taha tok.

4. Anonti enchil atuchina kash ot ilap i kotobushi vlhto kash okhina, mikmvt kvli puta ka o fohopli tok; mihma yummak ash ot issish o toba tok.

5. Yohmi ma oka puta ka im enchil osh okchayvt ish ahanta kvt, okchayvt ish ahanta tok osh, anonti okchayvt ish ahanta hi osh nana ka yakohmichit ish apesa hoka, Chitokaka ma! nan ai vlhpiesa chia hoke.

6. Yummak okvt vbanumpuli vhleha, mikmvt hopaii vhleha aiena im issish a hlatahambli tok okvt, ilap mvt, ai i yvmohma he vlhpesa mak o, ishka chi ka issish o ish ihimushke, achi ho haklo li tok.

7. Anonti inla kvt alta ya auet a kohcha kvt, Ik yvmohmi mvhli, Chitokaka Chihowa nana moma imaiya ma! nan ai ahli ai vlhpesa kak o ish apesa yoke, achi ho haklo li tok.

8. Anonti enchil ont ai ushta kash ot ilap i kotobushi vlhto kash hvshi yo o fohopli tok: mihma hatak puta ka

luak o isht towulhkocha chi ka yummak ash o nan isht ai ahli yosh im vlhpisa tok.

9. Atuk o hatak puta kash ot na lvshpa chinto ka isht towulhko mvt, Chihowa, yummak osh na palvmmi iluppa puta ka i shahli yatuk a i hohchifo ha ik ahobalot na miachi tok ; mihmvt yummak ash o holitoblicha hi atok vt okla ik ile kostinincho ki tok.

10. Yohmi ma enchil ont isht tahlapi kash ot ilap i kotobushi vlhto kash nampoa nukshopa yash im ai o binili o fohopli tok ; mihma yummka im apehlichika ya ai okhlili kvt kvnia ma, nan anukhahvni hokvt, isunlvsh atuk a okla ahampa tok.

11. Mihmvt hichi okchushbut hotohompa hokvt, ilap nana a kaniohmi tok puta ka okla ai ile kostininchi keyu mvt, vba aholitopa in Chihowa yak o ik ahobalot na miha-hanchi tok.

12. Anonti enchil ont isht hannali kash ot ilap i kotobushi vlhto kash okhina chito Euflates a o fohopli tok ; mihma hvshi a kochaka miko vhleha im ataya yvt vlhtaha chi mak o, oka yummka foyuka tuk vt shilvt taha tok.

13. Yvmohmi ma shilombish ik kashofo tuchina kvt hatonlvbi ho holba hosh sinti chilita itakha, mikmvt nampoa nukshopa itakha, micha hopaii ilahobi itakha aieno kash akohcha na pisa li tok.

14. Yummak okvt nan isht ahullo okpulo imi shilombish vhleha hatuk osh, nafehna puta ka yumihinchi mvt, Chihowa nana moma imaiya i nitak a chintokma ai itiba chi mak o itvnala chi hosh, miko vhleha yakni moma ai asha ka ivt im ohonvshke.

15. Yakeh ! hukopa yo chiyuhmit vla lishke ; isht a hofahya ka okla pisa hinla ka, nipi banot ik ayo ka chi kvt, kvna hosh okchut ahah ! ahnit ilap imi nafohka puta ka ilatomba hokvto nayukpvshek.

16. Yohmi ma Heblu anumpa hvt Amaketton achi yummak o ai itahobit tahli tok.

17. Yvmohmi ma enchil ont isht untuklo kash ot ilap i kotobushi vlhto kash vba shutik takla yak o a fohopli tok ;

mihma anumpa ola chinto kvt ai o binili holitompa yak o a minti hosh vba aholitopa in tempel a auet a kohcha mvt, Ulhtaiyahvshke, achi tok.

18. Yohmi ma nan ola, hiloha, mikmvt malvtha puta aien-a kvt yummak ash o a takali tok: yohmi ma yakni winnakvchi chinto atampa, yvmma chohmi kvt hatak vt yakni pakna ai vta tok taiyakla ka iksho chatuk vt, yakni winnakvchi chinto kvt ituyula tok.

19. Yohmi ma tvmaha chito yash ot itakovshkout kashapa tuchina ma, anonti oklushi in tvmaha puta hatuk vt aiokpuloka tok; yohmi ma Chihowa hvt ilap nan isht i nukkilli kvollo chinto oka paki isht ishko vlhto ka ima chi kvt Babulon chito ash ithahana tok.

20. Mihma tishaiyi yut momvt atoshowa tok osh iksho ma, anonti nunih hochito puta hatuk mvt ik otaiyano ki tok.

21. Yumohmi ma hatafo chinto kvt vba shutik a minti hosh, weki kvt talent achufa foka aiyuka hosh hatak puta ka onvtuyula tok; yohmi ma hatafo nan isht palummi pulla hatuk mak o, hatak puta kvt Chihowa ha ik ahobalot namihahanchi tok, yvmma nan isht palummi kvt chinto hoka.

CHAPTA XVII.

Ohoyo hvt natishipa humma lapushki yo foyuka mvt, tvli hvti lakna isht ishko toba ho ieshi hosh nampoa nukshopa yash pakna, yvm mvt Babulon mak o binili, 1; 5 noshkobo untuklo kvt nana ka anoli: 12 mikmvt lapish pokoli kvt nana hatuk aien-a kvt annoa ohoyo hau i yashot nan i palummi; 14 chukfvlhpobushi vt nan im aiyachi.

1. **YUMOHMI** ma enchil untuklo, yvmmvt kotobushi untuklo ieshi tok vhleha hash achvfvt ant vm anumpuli mvt, olehma minti; hau i chinto yvmmvt oka lawa pakna o binili;

2. Yummak o miko puta yakni pakna ai asha kvt isht itin lumaka tok; yohmi ma ilap nan itin lumaka oka paki a yakni pakna ai asha vhleha hvt ishkot ik haksi im ahni tok,

yummvt nan isht i palummi im vlpisa ka chim otvninchi la chj hoke, vm achi tok.

3. Yohmi ma shilombish si anukfoka ho yummak ash ot ishit yakni haiaka svsh ona tok: mihma nampoa nukshopa humma hosh nana ka ik ahobalot miha hohchifo ho isht alo-towa mvt, noshkobo untuklo cha, anonti lapish mvt pokoli ho ohoyo hosh o binili ho pisa li tok.

4. Yvmohmi ma ohoyo hash ot na hummakbi mikmvt na tishepa na fohka hosh tvli holisso lakna, tvli holitopa puta, mikmvt pvl aien a isht a shema ho foyuka mvt, ilap itir lumaka isht a liteha na yuwaluchi puta kvt tvli holisso lakna isht ishko yo alotowa hosh ibbak a foyuka tok.

5. Yvmohmi ma, NAN IK OTANO, NA CHINTO BABULON, HAUI PUTA, MIKMUT YAKNI PAKNA A YUWALUCHI PUTA ISHKI, hohchifo hosh yummma ibitakla ya a holisso hatok.

6. Yohmi ma ohoyo hash ot vbanumpuli vhleha im issish, mikmvt Chisvs isht im atokowa kak o isht illi tok vhleha im issish aien a ishkot haksi na pisa li tok; mikmvt pisa li mvt, sa nukhlakancha mvt, okokko! ai ahni li fehna tok.

7. Atuk o enchil ash ot, Nanta katiohmi ho chi nukhlakancha tuk oh cho? ohoyo hash, micha nampoa nukshopa yash ot, yummvt ohoyo ha isht aya kvt, noshkobo hvt untuklo mvt, anonti lapish mvt pokoli ka nan isht ik im otano ka chim anoli lashke.

8. Nampoa nukshopa yash, yummma ish pisa tuk a anta tuk osh, anonti ikshoshke; yohmi kia yummvt chiluk hofobi ai vhli iksho a auet a kohcha chj hoke; mikmvt aiokpuloka ont chukowa chj hoke: mikma yakni pakna ai asha puta kvt, kuna hosh i hohchifo hvt yakni toba tok taiyakla ka holisso ai okchaya ya a holisso tok keyukmvt, nampoa nukshopa, yummvt anta tok osh, anonti iksho kia, anonti anta ak inli ka okla pisakmvt, nukhlakancha chj hoke.

9. Yohmi ka ilvppak o nan ithana anukfohka kak osh akostininchishke. Noshkobo untuklo kvt nvnih hochito untuklo mak o yummma pakna ya ohoyo hash ot o binili hoke.

10. Mikma miko untuklo kvt ai asha ka, tahlapi hosh ik-

sho ma, achvfa kvto anta, mikma achvfa kvto ik lo kishā hoke; mikmvt kariohmi hō yummvt vla hokmvt, chekosi ai itin takla hō anta chī hoke.

11. Anonti nampoa nukshopa yash ot, yummvt anta tok osh, anonti iksho kvt, yummak ash kia isht untuchina kvt, isht untuklo kak o ibai achvfa hosh aiokpuloka ya pit a chukowa mak oke.

12. Mihma lapish pokoli hō ish pisa tuk ash miko pokoli hoke; yummvt apehlichika ik im iksho kishā hoke; yohmi kia miko vhleha chohmit hvshi kanvlli achvfa ka nampoa nukshopa yash ibai achvft nan isht ai ahli yut im vlpisa hoke.

13. Ilvppak ash ot, im anukfila hvt achvfa cha, anonti ilap nan isht im ai ahli, mikmvt im ile hlampko ita tuklo ka nampoa nukshopa yash ima chī mak oke.

14. Mikmvt ilvppak ash ot Chukfvlpobushi ya itinta-nampa chī, mikma yummak okvt chitokaka vhleha in Chitokaka, micha miko vhleha i Miko yokvt Chukfvlpobushi yash ot yummak ash o imaiyacha chī hoke; yohmi ka kuna hosh yummva ai ibachvfa hokvto vlhtoka, mikmvt ai ahli, micha holitopa mak oke, um achi tok.

15. Mihmvt oka puta yummva ish pisa tuk a, haui yash osh yummva o binili ka, hatak okla chinto, oklushi puta im anumpa ilaiyuka mak oke.

16. Mikmvt lapish pokoli, yummvt nampoa nukshopa on talohmaya na ish pisa tuk, ilvppak okvto na haui yash i nukkillit, a chukillissvchit nipi banochi cha, nipi a vpa cha, anonti luak a isht hukma hi oke.

17. Chihowa yut yummak ash chūkvsh anukfohki na ilap nan ai ahni hō ai ahliche chī ka im anukfila achvfa hosh ilap im apehlichika yatuk ma nampoa nukshopa yash ihima na Chihowa im anumpa puta kvt ont ai ahlik mak a hi oke.

18. Yohmi ka ohoyo yummva ish pisa tuk vt tūmaha chito mak oke, yummak osh miko vhleha yakni pakna ai asha ka ai i shahli mak oke, um achi tok.

CHAPTA XVIII.

Babulon vt akama 1; 4 Chihowa im okla hvt yummma a kocha chi kvt im vlpisa; 11 yakni pakna a miko vhleha, mikmvt na chumpa, okhvt aya vlpisa aieno kvt isht yahaya; 20 Chihowa nan im vlpisa na palvmmi kvt onvtula hoka, vbanumpuli puta kvt na yukpa.

1. A IYAKOHMI ha ya, anonti' enchil inla yvt nan isht ai ahli chinto ieshi hosh, vba a mintit aka vla na pisa li tok: mihma yummma i shohpakali yo yakni vt isht a tohwikeli tok.

2. Mihma yummak ash ot anumipa ola chinto ka isht chitol fehnvt tahprla mvt, Babulon na-chinto yash ot aiokpulokushke, aiokpuloka mak oke: yohmi mvt nan isht ahullo okpulo puta im aboha kullo, micha shilombish ik kashofo, mikmvt hushi okpulo ik kashofo moma ka in chuka yo toba mak oke.

3. Yummvt nan itin lumaka nan isht haksichi oka paki yo okla momvt ishko tok, mihma miko vhleha yakni pakna ai asha kvt yummma ai itinlumaka tok; mihma na chumpa vhleha yakni pakna ai asha kvt, nan ilimpa hochukma in laua kak o nan in laua toba tok oka, ahanchi tok.

4. Anonti anumipa ola inla yvt vba aholitopa ya a minti mvt, Um okla hvchia mvt, yummva nan im ai ashuchi puta ka, mikmvt na-palvmmi im vlpisa puta ka hvch ik ibai esho ka chi kvt, yummva a kohchvt ho minti.

5. Yummva nan im ai ashuchiika puta kvt vba shutik a ont a bikeli hatuk o, Chihowa hvt, yummvt nan ik ai vlpeso puta ka ithaiyana tok oke.

6. Nana ka hvchi yvmihchi tok mak o chohmichit oh i yvmihchi; mikmvt nana ka a yvmihchi tok a vlbita ho apesut oh im vlbitelichi; isht ishko yummva alotoli ka, ilap ma vlbitelit oh im alotoli.

7. Ilap inli ile holitoblich'i kvt, mihma nan ilimpa-champuli isht il ai atahlit, impvt anta kvt kaniohmi hatuk okma, yummva chohmichit na palvmmi, na-nukhaklo aieno ka oh

imá ; I hatak illi sia keyu, yohmi kvt na-nukháklo pisa la chí keyu, ohoyo miko sia hosh binili li, ilap chukvsh anú-kaka achi hoka.

8. Yohmi hoka na palumm̄i puta, nan illi, yaiya, mikmvt hohchvfo aienā kvt nitak achufa ka im aya chí; mikmvt yummak ash ot luak o isht hullukmit taiyaha chí hoke ; Chitokaka Chihowa hut hlampko hokvt, yummak ash nan im apesvt i palummichishke.

9. Yohmikma miko vleha yakni pakna ai asha kvt yumm̄a ai itin lumákvt, nan ilimpa champuli ai it atahlit impvt ai asha tuk vt, yummvt luhuwvt shobulli ka okla pisa cha isht yahayvt, nishkin okchi mihinti mvt,

10. Yummvt nan isht i palumm̄i ka nukshopa hatuk osh, auet i mishema ho hiohm̄ayut Ikikkeh ! ikikkeh ! tumaha chito, Babulon tumaha chinto kullo atampa, yummvt hushi kanvlli achufa mak inli ho nan isht palumm̄i chim vlhpisa kvt chim ayvshke.

11. Nan itatoba yakni paknaka ai asha kvt yummak ash o nan isht nukháklot nishkin okchi mihinti tok ; ilap im vlhpoyak a himak a pilla ma kuna kia ik in chumpo hoka ;

12. Tuli holisso lakna, micha tuli hvta, micha tuli holitopa, pvl, linen lapushki, nahummakbi, silk, na-tishepa, mikmvt iti sitlon moma, mikmvt aifoli, nan ai vlhto ilaiyuka moma, mikmvt iti holitopa fehna nan ai vlhto ilaiyuka moma, micha tuli lakna, tuli, mabvl aienā nan ai vlhto ilaiyuka moma atoba ;

13. Mikmvt sinnamon, na balama, nan ahama, micha filakinsen, oka paki, na bila, bota tohbi achukma, onush, mikmvt nampoa puta chukfulhpoba, issuba, micha itichanvli, yuka, hatak shilombish puta aienā kash o kuna kia ik in chumposhke.

14. Nan vnit waya puta yummak o chi chukvsh vt anush-kunna tuk ash a chim afilumm̄i ; mihma nana moma na champonli, micha na shohwalvshli aienā tuk ash ot a chim okpulo ; yohmi kvt himak a pilla ma yummak ash ish ahyucha chí keyu kamohmi hoke.

15. Nana ilyppa puta kash nan itatoba, yummak okvt

yummak o nan isht ai in laua tok vt, yummvt i palvmmi ka nukshopa hatuk osh, auet i mishemanchit hiohmayat isht nukhaklot nishkin okchi mihintit,

16. Ikikkeh! ikikkeh! tvmaha chito yummak amo! yummak okvt linen lapushki, micha na-hummakbi, micha na-tishepa aieno ka isht ai im ai vltah, yohmi kvt twli holissolakna, micha twli holitopa puta pvl aieno ho isht a shema tok amo!

17. Nan laua chinto yakohmi kash ot hvshi kanvlli achvfa ho ont aiokpulokvt kvnia hoka, ahanchi tok. Yohmi ma peni chito isht aya apesuchi aiyuka, micha peni chito ai asha yatuk moma, micha a toksvli aieno, mikmvt okhvta nan ai itatoba yatuk vt momvt auet i mishemanchit hiohmavt,

18. Yummvt luhuvvt shobulli ka okla pisa mvt, tahpulvt, Nanta hosh tvmaha chito ilvppa chiyuhmi cho? ahanchi tok.

19. Mihmvt hituk chubbi okla ishit noshkobo il o fohopli mvt, taipulvt, nishkin okchi mihintit yahaya hosh Ikikkeh! ikikkeh! tvmaha chito yummak amo! yummvt nan isht il ahayuchit, nan isht shema ai vlli hochito puta ka chumpa hatuk mak o, okhvta pakna peni im a takohli maya moma kvt nan in laua yo toba kumo! hvshi kanvlli achvfa ma yummak ash ot a chukillissut kvnvishke, ahanchi tok.

20. Uba a holitopa chia ma! vbanumpeshi holitopa, micha hopaii holitopa hvchia ma! Chihowa yvt yummak ash nan im apesvt i palvmminch hokvt hvchi atobvchi hoka, nan isht il oh aiyukpá.

21. Yohmi ma enchil chinto yvt twli na-botoli twli chito yo chohmi ka ishit, okhvta pit pila ma, yummva chiyuhmi hosh tvmaha chito Babulon vt ai okluhvt kinahla chi hoke; mikmvt himak a pilla ma otaiyana he keyu kamohmi hoke.

22. Yvmohmikma hap olachi, micha nan taloa, micha oskula olachi, micha isht puva olachi aieno nan im ola ka himak a pilla ma a chi a haiyakla he keyu kamohmi; mikma hatak nan imponna nana ho isht ai imponna yatuk kia himak a pilla ma a chi a otaiyana he keyu; mikma twli na botoli kia himak a pilla ma a chi a haiyakla he keyu kamohmi hoke.

23. Mikma pvla tohwikeli mvt himak a pilla ma a chi on

tohwikela he keyu ; mikma hatak himona nan itauwaya, mi-cha ohoyo nan auwaya im anumpa ola himak a pilla ka a chi a haiyakla he keyu kamohmi hoke : na chin chumpha vhleha hut yakni paknaka a hochito kvt maya tok oka ; ik-hish isht yushpakvmmi isht ish ahanta hatuk mak o, oklushi moma kvt isht yushpakama hatok, ahanchi tok.

24. Yohmi ma hopaii vhleha, micha vbanumpuli ahli vhleha, mikmvt yakni paknaka ya ai vbi tok moma im issish vt yummva ai otaiyani tok.

CHAPTA XIX.

Ilap im antia puta im issish hlatahampli tuk isht vlhtoba mak o haui chinto yash na palvmmi ka im apesa hoka, vba a holitopa ai asha yvt Chihowa ya aiokpahanchi, 1 ; 7 Chukfvlhpobushi nan im itau waya ; 16 ilap okvno aiokpvcha hi a enchil vt ik im ahno ; 17 nan illi lawa ai asha ka ai vla chi kvt hushi puta kvt im annoa.

1. NANA ilvpput ai yakohmi ha ya, hatak laua im anumpa ola chinto ka vba aholitopa pit a haklo li ma, Alleluia, isht ai okchaya, isht a holitopa, isht ahninch, nan isht ai ahli aieno kvt Chitokaka hvpin Chihowa ya ai immi hoke.

2. Nan apesa kvt ai ahli, micha ai vlpiesa hoke ; yohmi kvt haui chinto yash, yummvt itin lumaka kak o yakni ya isht okpaiyani hatuk a, yummak ash ot nan im apesvt i palummichi tuk : mihmvt in tishu vhleha im issish yummva ibbak vt hlatahampli tok a ai isht im atobbi tok, ahanchi tok.

3. Atuk o anonti, Alleluia okla achi tok. Mihma yummva i shobohli hut vba ya ihiya na bilivt bilia hoke.

4. Mihma hatak tikba pokoli tuklo akucha ushta, micha nan okchaya ushta aieno kash ot aka hlipkvchi mvt, Chihowa, yummvt ai o binili holitompa o binili tuk ash aiokpvchit, Amen ; Alleluia, ahanchi tok.

5. Mihma anumpa ola hut ai o binili holitompa ya auet a kochvt takali kvt, Pin Chihowa ya in tishu vhleha hvchia, micha kuna hosh yummva i nukshohompa aieno kvt ik alauwo, i shahli, a moyuma kvt oh aiokpahanchi, ahanchi tok.

6. Yohmi ma okla chinto im anumpa ola ho chiyuhmi,

mihmvt oka lawa fopa ho chiyuhmi, mihmvt hiloha chinto ola ho chiyuhmi ho haiyaklo li ma, Alleluia; Chitokaka Chihowa nana moma imaiya hvt miko yoka.

7. Chukfulhpobushi vt itauwaya chi nitak vt vla, yohmi ma tekchi ya chi mvt, il ai atahli tuk oka, nan ik hvpi yukpa cha, keho tulli, ahanchi tok.

8. Yohmi ma linen lapushki vt vbanumpuli ahli isht im ai ulhpiesa mak o, linen lapushki kashofa tohbi ka isht il ashemvcha chi kvt, tekchi vt im ulhpisa tok.

9. Yohmi ma, Holissochí, Chukfulhpobushi im ai itauwaya opiaka impa aya chi kvt kvna hosh im annoa tuk mvt, mihi yosh na yukpa hoke, um achishke. Mikmvt ilvppak osh Chihowa im anumpa ahli mak oke, um achishke.

10. Mihma aiokpuchi la chi hosh iyi ya a hlipia li tok. Atuk ak o yummak ash ot, Ahah ! ahnit chik yohmo kashke ; tishu chitilaui, chitibapishi, Chisvs nan isht im atokowa ieshi vhleha ibai achufa sia hoke ; Chihowa hak o aiokpuchi ; Shilombish Holitopa yvt hopaïi anukfoyukvt Chisvs nan isht atokowa ka anumpohonli yoke, um achi tok.

11. Yohmi ma vba aholitopa yvt tiwa ma, yakeh ! issuba tohbi ho pisa li tok ; mihma yummak o binili kvt, Ai ahli, mi-chi Na miha tuk vt ai ahliche mak o hohchifo hosh, yummvt nan ai ulhpiesa bano ho nan apesvt, tvnvp ikbi yoke.

12. Nishkin vt luak libbi ho chiyuhmi ma, anonti iachuka lawa kvt noshkobo ha afoyua hatok ; mihma i hohchifo holiso kvt lapali kia, kvna kia ik ithano ho, ilap ak bano tok.

13. Yohmi mvt issish isht humma anchi o ai anchi tok ; mihmvt i hohchifo hvt, Chihowa im Anumpa, achi tok.

14. Yohmi ma vba aholitopa ai asha tuk vt issuba tohbi o binili hosh yummak ash okla iakaiya kvt, linen lapushki tohbi kashofa ho ai anchi tok.

15. Yohmi ma im itakha ya bushpo falaia halupa hosh a kohcha na yummak o oklushi puta ka isht ahamba hi yatok ; yohmi kvt tvli fuli yo yummak ash nan isht im apihisa hi oke ; yohmi kvt oka pakⁱ atoba yo chohmit Chihowa Chitokaka nan okluha imaiya nan isht i nukkilli chinto ka isht a hvhlhinchⁱ hoke.

16. Yohmi kvt miko PUTA. 1. Miko, MIKMUT CHITOKAKA PUTA IN CHITOKAKA hohchifo hosh yummma im anchi, mik-mvt iyubi ita tuklo ka ai o holisso hoke.

17. Yvmohmi ma enchil vt hushi a ai o hikia na pisa li tok : mihma yummak ash ot chitolit taipula mvt, hushi puya ; yummvt vba a helit itvnova moma kvt, Hvchishno inli hosh mintit Chihowa chinto im opiaka ai impa oh ai itvnahá.

18. Yohmi kvt miko vhleha nipi, micha kwpitni vhleha nipi, hatak ishtokaka nipi, issuba puyuta, mikmvt kuna hosh yummma o binili tuk puyuta nipi, hatak moyuma, yuka keyu, micha yuka, yohmikmvt ik alauwo, i shahli aienka nipi y hush pa chi hoke, im ahanchi tok.

19. Anonti nampoa nukshopa yash ot, mikmvt yakni pak-naka a miko vhleha, mikmvt in tushka chipota vhleha aienka kvt itahobvt taiyaha cha, issuba o binili, micha in tushka chipota aienka yummak ash in tanahampi na pisa li tok.

20. Yohmi ma nampoa nukshopa yash ot yuka tok ; mihma hopaⁱⁱ ilahobi yash yummvt na fehna puta ka yummma itikba ai yvmihinchi kvt, yummak o yvmihchi kak osh nampoa nukshopa isht in chuwa ieshi tuk vhleha, mikmvt yummva holbvt toba y kuna hosh aiokpvchi yatuk puta ka yoshumbl tok. Ilvppak ash ot ita tuklot okchaya na okhuta hituk lakna isht ita luhuwa ka pit a kanchi tok.

21. Yohmi ma inlaka yatuk vto issuba o binili yummva i bushpo falaia, yummak osh im itakha y a kohcha tuk mak o isht ihinli tok ; mihma hushi puyuta kash ot yummva nipi y isht a kaiya tok oke.

CHAPTA XX.

Setan vt talakchi na afvmmi tahlepa sipokni achvfa chi, 1; 6 illi yt tani vmmona yummva ai ib ahalaia hokvto na yukpa he ; 7 chekosi takla ka Setan ashott i holhtofa he. 8 Kok micha Makok imma ho isht anumpuli. 10 Okhvta hituk lakna isht aluhuwa ho Setan amo pit itakanchi ; 12 nan vlpisa chinto isht aiyopi.

1. YOHMI ma enchil vt chiluk hofobi ont ai vhli iksho ash isht tiwa ieshi mvt, tuli itatakvli chito yosh ibbak a fo-yuka hosh vba ya a minti ho pisa li tok.

2. Mihma yummak ash ot sinti chilita chito yash, sinti sipokni, yummvt nan isht ahullo, micha Setan mak o afvmmi tahlepa sipokni achvfa ka ona chi ho ishit yukachi tok.

3. Mihmvt yummvt himmakma oklushi puta ik yoshublo ho afvmmi tahlepa sipokni achvfa he tuk vt ont ai ahli ha yo, misha pilla ho chekosi itintakla ka i hlitofa hi o, yummak ash chiluk hofobi ont ai vhli iksho ash pit pilvt im okshita mvt, isht in chuwa on lapalichi tok.

4. Mihma ai o binili holitompa puta ka pisa li tok, mihma yummma o binohmaya kvt nan ai apihisa he im vlpisa tok: yohmi ma nampoa nukshopa, mikmvt i holbvt toba aienka ik aiokpacho, mikmvt isht in chuwa yvt ilap ibitakla, ibbak aienka ik a lapalo hosh; Chists nan isht im atokowa, micha Chihowa im anumpa pulla ho noshobo hvt tahampa tok vhleha imi shilombish a pisa li ma, yummak ash ot okchaya cha afvmmi tahlepa sipokni achvfa ka, miko yo chohmit Klaist a ibai ahanta tok.

5. Amba illi inla maya tok okuto ik okchayo ho afvmmi tahlepa sipokni achvfa kvt tahak mak a hi atok. Ilvppak' osh illit falamvt tani vmmona mak oke.

6. Illit falamvt tani vmmona ka kuna hosh ibahalaia hokvto, mihi yosh na yukvvt holitopa: yohmi hokvno atukla illi vt nan isht i shahla he ik im iksho hoke; Chihowa, micha Klaist na holitompa isht im vttva vhleha ha chi, mikmvt miko yo chohmit ibai ahanta na afvmmi tahlepa sipokni achvfa chi hoke.

7. Yvmohmi tuk ma afvmmi tahlepa sipokni achvfa kash ot ont ataiyahakma, Setan ash ot aboha kvlo a ik akohchá, im ai ahna hi oke.

8. Yohmikmak o oklushi puta, yummak okvt yakni pakna akvshkowa ushta ka ai asha Kok, micha Makok okla yummvt holhtina kvt okhvta alaka shinuk ai asha kak o chiyuhmi ho yoshublihinchit itahobi cha, tanahampa chi hosh akohcha hi oke.

9. Mihmut yummak ash ot, yakni pakna a mominchit ilhkoli mvt, yummvt vbanumpuli ahli vleha i bina, mikmut tmaha chito holitopa aien a okla ai apakfokahanchi; mihma luak osh Chihowa a mintit vba akohchvt vlt, yummak ash ishit vpa tok.

10. Yohmikma yummma yoshublich tuk nan isht ahullo vyt okhvta hituk lakna isht ita luhwa, yummma nampoa nukshopa, micha hopaii ilahobi aien a kash ot pit itvtula tok: yohmi kvt nitak, ninak aien a ai ilbahasha na bilia hosh bilia hi oke.

11. Yohmi ma ai o binili holitompa tohbi chinto, micha yummma o binili ita tuklo ka pisa li ma; yummma nashuka ya i filvmmmit yakni, mikmut vba shutik ita tuklo kvt tamoa kvt, kanima yo a taloha he kia ik im iksho ki tok.

12. Yohmi ma illi, ik alauwo, micha i shahli pit aien a kvt ai o binili holitopa itikba hiohmaya ka pisa li tok; yohmi ma holisso puta kvt wakama tok; anonti holisso inla, yummak osh holisso ai okchaya mak osh wakama tok: mihma illi yash ot ilap nana a kariohmi tuk puta, yummvt holisso ha a holihiso tok ilvppa puta ho isht ai im vlhpihsa tok.

13. Yohmi ma okhvta hvt illi puta, yummvt im aiasha tuk vt il ai a kocha welikma, anonti nan-illichi, micha illi ai asha mvt illi puta, yummvt im ai asha tuk vt il ai a kochcha weli na yummak ash ot ilap nana a kariohmi puyulla tuk mak o hatak moma kash ot nan isht im vlhpihsa tok.

14. Mihma nan-illichi, micha illi ai asha yamo okhvta luak o pit itokaha tok. Ilvppak osh atukla illi mak oke.

15. Yohmi ka holisso ai okchaya ya a holisso tuk osh otvni keyu hokvto okhvta luak mak o pit a kvnia tok.

CHAPTA XXI.

Vba vmmona micha yakni vmmona ita tuklo ka Chan vt pisa, 1; 10 Chelusalem vba isht annoa ahli moma; 23 yummak oka hrshi vt a tomma he ahna he keyu, Chihowa im atohwikeli yak osh a tom-mi; 24 yakni pakna ai i miko puta kvt yummak o im aholitopa ya isht im ohona.

1. **U**BA vmmona, micha yakni vmmona ita tuklo kash ot ont ik ai iksho ma, anonti himak a pill a okhvta mvt iksho ka ch_i ho vba himona, micha yakni himona ita tuklo ho pisa li tok.

2. Mihma Chan sia hvt tvmaha chito holitopa Chelusalem himona Chihowa ya a mintit vba ya auet a kohcha kv_t, ohoyo himita hatak auwaya ch_i hosh isht il a shema chatuk ak o chiyuhmi tok.

3. Yohmi ma anumpa ola chinto kv_t vba aholitopa ya a kohcha na haklo li ma, yakeh! Chihowa hvt im vlhtipo yvt hatak puta ka ibafoyuka hatuk o, yummak o ibai ahanta ch_i, mikma im okla tobakma, anonti Chihowa ilap mvt yumm a in Chihowa hosh ibafoyukv_t ahanta ch_i hoke.

4. Mikmvt Chihowa yvt yumm a i nishkin okchi puyuta ma im a kasholichit kaiyancha ch_i; mikma nana tikba tuk vt ont taiyaha hoka, himak a pill a ma isht ai illi, micha na-nukhaklo, micha yahaya aien a kut ik ai iksho ka he, mikmvt na-hotopa mvt ik ai iksho ka hi oke, ahanchi tok.

5. Yohmi ma ai o binili holitompa o binili yummak ash ot, Yakeh! nana moma kv_t himona ho ikbi lishke, achi mvt, yummak ash ot, Anumpa ilvpput aiahli, micha na miha ka ont ai ahla ch_i hoka holissochí, um achi tok.

6. Atuk osh yummak ash ot, Ulhtaiyahushke; Alfa, micha Omeka, ai isht ia vmmona, micha ont ai vhli sia hosh, kvna hosh itukshila hokma, oka ai okchaya kvli hak o pill a i ima la ch_i mak oke.

7. Kvna hosh nana ka imaiyachi tuk mak osh nana moma ka ai immi ha ch_i im ai vlhpiesa; mikma in Chihowa sia hokma, anonti ilap vt svso ha ch_i hoke.

8. Amba na nukshopa, micha nan ik yimmo, i yuwala he vlhpesa kia yvmihchi, mikmvt hatak bi_ka vbi vhleha, hau_vleha, mikmvt ikhish isht yushpakummi vhleha, na holbvt toba aiokpuchi vhleha, holabi puta a moyuma hokvto atukla illi mak osh okhvta yummak okvt hituk lakna isht ita luhuwa ho isht ai i palvmma ch_i hosh im vlhpisa he mak oke, um achi tok.

9. Yumohmi ma enchil untuklo kash ai ibai achvfa, yum-

mak okvt kotobushi untuklo nan isht palvmmi ishtaiyopi untuklo kash isht alotowa hq ieshi hosh, vlt svt im anumpuli mvt, Mintí, himona nan auwaya Chukfvlpobushi tekchi chi haiakvchi la chj hoke, achi tok.

10. Mihma shilombish o si anukfoyuka hq svsh ia ma, nvnih chinto chaha yo svsh ona cha, tumaha chito, Chelusalem holitopa yvt Chihowa isht im aholitopa ai ishit Chihowa a mintit, vba aholitopa auet a kohcha mak o a haia-kuchi tok :

11. Mihma in tohwikeli hvt tvli holitopa fehna, tvli chaspa chohmi kak o hoyulba hosh, bvlancha kvt klistal o chiyuhmi tok ;

12. Mihmvt tvli yosh isht a holihta kvt chito, micha cha ha ma, anonti okhissa yvt im auah tuklo ma, enchil mvt okhissa ya vlhpisvt auah tuklo kvt a hieli tok ; mihma yvmmma ai o holisso hohchifo kvt Israel okla it a kvshkowa auah tuklo i hohchifo hatok.

13. I hvshi akochak-imma ya okhissa tuchina ma, i falvmmi imma ya okhissa tuchina ma, im oka-mahli imma ya okhissa tuchina ma, anonti i hvshi ai okvtulik-imma ya okhissa tuchina tok.

14. Yohmi ma tumaha chito a holihta ka in tolahpi auah tuklo tok ; mihma Chukfvlpobushi im anumpeshi auah tuklo hohchifo hosh a lapanli tok.

15. Yohmi ma svt im anumpuli tuk yvmmak ash ot tumaha chito, micha okhissa, mikmvt a holihta aien a ka-isht apesa chj kvt tvli holisso lakna nan isht vlhpisa yo ieshi tok.

16. Yohmi ma tumaha chito yvt a itilaia bat fullotvt bolukta ma, afalaiaka yvt chito kvt okhowataka ya itilaui tok ; mihma tumaha chito yash yvmmak ash ot nan isht vlhpisa yash isht apesa ma, kowi tahlepa auah tahlapi tok. Afalaiaka pilla, micha okhowataka pilla, mikmvt chaha aien a kvt ai itilaui bano tok.

17. Mihmvt aholihta kash o hatak i nan isht vlhpisa yo yvmmma enchil ash ot isht apesa ma, kubit tahlepa achvfa pokoli ushta akucha ushta tok.

18. Yohmi ma a holihta kvt chaspa tvli yosh toba hatok ;

yohmi hoka tumaha chito yvt tuli holisso lakna bieka ho chohmi kvt apisa kashofa achukma ka chohmi tok.

19. Yohmi ka tumaha chito aholihtaka in tolahpi vt tuli holitopa ilaiyuka puta ho isht a shema hatok; in tolahpi ummona kvt chaspa yatok; atukla kvt saffaia yatok; atuchina kvt kalsetoni yatok; ai ushta kvt emelal atok;

20. Isht tahlapi kvt salonik atok; isht hannali kvt sativs atok; isht untuklo kvt klisolait atok; isht untuchina kvt belil atok; isht chakkali kvt topas atok; isht pokoli kvt klisofasvs atok; isht auah achufa kvt chasinlh atok; isht auah tuklo kvt amehlist atok.

21. Yohmi ma okhissa isht vlkvma auah tuklo kvt pvl auah tuklo tok; okhissa isht vlkvma achrfakma, pvl. achrfut ia tok; yohmi ma tumaha chito anukaka ya ai itvnova yvt tuli holisso lakna bieka ho chohmit apisa shohkoali kak o chiyuhmi tok.

22. Yohmi ma yvymma anukaka ya tempel a ak peso ki tok: Chitokaka Chihowa nana moma imaiya, micha Chukfulhpobushi ita tuklo hosh in tempel oka.

23. Mihma Chihowa im aholitopaka yosh a tohwikeli ma, anonti yvymma ai i pyla hvt Chukfulhpobushi yak atuk o, hushi, mikmvt hushi-ninak-aya kia im a tomma hi a tumaha chito yash ot ik bunno ki tok.

24. Yohmi ka oklushi puta yummak okvt okchaya mak osh a tohwikeli ka ya ai itvnohowa he; mikma yakni pakna a miko vleha atukmvt ilap im aholitopaka isht aiokpvchi hosh ai vlvshke.

25. Yummak oka ninak vt iksho ka chi hoka, nitak moma ka okhissa puta mvt ik okshilito kamohma hi oke.

26. Yohmikma oklushi puta im aholitopa, nan isht il ahnnichi aienama yvymma anukaka ya isht ai vlv chukowa hi oke.

27. Mikma yummak oka nana kvt liteha, micha ai yuwala he kia ai yohmi, micha na holabichi a moyuma hokuto kaniohmi kia a chukowa himma keyu hoke; amba Chukfulhpobushi i holisso ai okchaya kuna hosh a holisso tok ak bana hi oke.

CHAPTA XXII.

Oka ai okchaya okhina, 1 ; 2 ai okchaya iti. 5 Tumaha chito i pula hvt Chihowa ilap fehna kak inli: 9 ilap a aiokpvcha hi a enchil vt ik im ahno. 14 Tumaha chito ash anukaka ai anta hokvto holitopa, amba kocha yo asha tuk okvto nan i palvmmiit vltakshi: 16 anumpa ai okchaya ya nana ho isht achakvla he keyu, mikmvt kanimihchit ai ishit anumpa ha ishit kancha he keyu.

1. ANONTI ai okchaya okhina kashofa achukma, shohkoali klistal ak o chiyuhmi hosh Chihowa, micha Chukfvlhpobushi ita tuklo im ai o binili holitompa ak o akohoncha mak o, yummak ash ot a haiakvchi tok.

2. Okhina itahlakla ai itenowa, okhina ititakla, iti ai okchaya yvt a hiohli kv, auah tuklo ha nan-vnit waya beka kv, hvshi achvfa aiyukakma vnit wahaya hoke; yohmi ka iti yummma hishi puta hokvto oklushi moma isht a hlakofi mak oke.

3. Yohmi ka yummak oka himak a pilla ma na palvmmi kvt ik ai iksho ka he; amba Chihowa, micha Chukfvlhpobushi ita tuklo im a i o binili holitompa yosh a hikia na yummma in tishu vhleha hosh aiokpahancha hi oke.

4. Yvmohmikmvt yummma nashuka ya okla pihsa he; mikma yummma i hohchifo hosh ibitakla puta ma a lapanla hi oke.

5. Mikma ninak vt yummak oka iksho ka he; Chitokaka Chihowa yosh in tohwikeli hoka, pula, mikmvt hvshi tommi aieno ka okla ik bvtno hosh, miko yo chohmit okla ahanta na biliit bilia hi oke.

6. Yohmi ka anumpa puta ilvppvt ai ahli, micha nana miha ka ont ai ahla hi oke; yohmi hoka hopaii holitopa vhleha in Chihowa Chitokaka yvt, nana kvt chekosi ont ai yvmohma chi yummma in tishu vhleha im otvnihincha chi ka im enchil a auet chvffichi tok.

7. Yakeh! chekosikma vla lishke; holisso ilvppa tikbanli nan ai anohowa anumpa puta tuk a kuna hosh holitobli kak osh na yukpvhk, yummak ash ot vñ achi tok.

8. Yohmi ma Chan sia mak osh nana ilvppa puta ka pisvt haiyaklo li tok: yohmi mvt pisvt haiyaklo li mvt, nana ilvppa puta ka vm otvninchi tuk, enchil a aiokpvchi la chi hosh iyi itikba ya hlipia li tok.

9. Yohmi ma, Ahah! ahnit chik yohmo kashke; tishu chitilaui, micha chitibapishi hopaii vhleha, micha holisso ilvppa ai anuhumpa tuk a holitobli vhleha ai ibachufa sia hoke; Chihowa ak o ish aiokpvchashke, yvmmak ash ot vm achi tok.

20. Mihmvt nitak vt ai ona hosi hoka, holisso ilvppa tikbanli ai anohowa tuk anumpa puta ka chik ashunicho kashke.

11. Kvna hosh nan ik ai vlhpieso hokuto, mihi yosh ik ai vlhpieso kvt ik imoyumá; mikma kvna hosh liteha hokuto, mihi yosh liteha kvt ik imoyumá; mikma kvna hosh ai vlhpiesa hokuto, mihi yosh ai vlhpiesa kvt ik imoyumá; mikma kvna hosh nan ai ashvchika ik im iksho hokuto, mihi yosh nan ai ashvchika ik im iksho kvt ik imoyumá, vm achi tok.

12. Atuk osh yakeh! chekosikma vla lishke: yohmi kvt hatak moma kvt ilap nana a kaniohmi yvt kaniohmi aiyukali ho nana ka isht im atobbi la chi kvt il ai jshi lishke.

13. Alfa, Omeka, ai isht ia vmmona, ont ai vhli, vmmona, ont ishtaiyopi sia mak oke.

14. Kvna hosh im anumpa vlhpisa puta ka holitobli hokuto na yukpvhkse: yohmi hok mak osh iti ai okchaya isht im ai vlhpiesa hosh okhissa ont a hlopullit tumaha chito yash chukowa chi hoke.

15. Akochanli yak okvno ofi, ikhish isht yushpakummi, hau, hatak bika vbi, na holbvt toba aiokpvchi; mikmvt kvna kia il imj holabichi kvt isht im achukma a moyuma kak osh ai asha yoke.

16. Ilvppa puyuta ka atokolit chvch a hiohli puta ka a hvchim anohonla chi hoka, Chisvs sia mak osh vm enchil a chvffichi li tuk oke. Uno ak osh Lewi a minti hakshish filminchi yosh anonti unchululi, mikmvt shohpakali onnahinli fochik sia mak oke, ahanchi tok.

17. Yohmi ma Shilombish Holitopa, micha Klaist himona

nan im auwaya ita tuklo kash ot, Mintí, achishke. Yohmi ka kvna hosh haiyaklokvt, mihi yosh, Mintí, ik achí. Mikma kvna hosh itukshila hokmvt, mihi yosh ik mintí. Yohmi ka kvna hoh kia bunnakmvt, mihi yosh pilla oka ai okchaya ya ik eshi.

18. He'iso ilvppak oka tikbanli nan ai anohowa tuk anumpa puta ka hatak vt haiyaklo tuk moma im atokowa lishke : nana yakohmi tuk a hatak vt nana kia ibafohkit achakalikma, na palvmmi yvmmvt holisso ilvppa a holihiso tuk a yummak ash o Chihowa hvt isht im achakala hi oke.

19. Mikma hatak nana hosh tikbanli nan ai anohowa tuk holisso ilvppa anumpa puta hatuk a kaniohmichit isht a kanchi hokma, ilap vt holisso ai okchaya, micha tumaha chito holitopa yash, mikmvt nana kvt holisso ilvppa yvmma isht a holisso tuk puyuta ka ahalaia hatuk a yummak ash Chihowa hvt isht kancha hi oke.

20. Ilvppa puyuta ka atokowvt otvninchi mak osh, Chekosikma vla lishke, achishke. Amen. Chitokaka Chisus ma! ik yvmohmi, ish lashke.

21. Pin Chitokaka Chisus Klaist nan isht i kana yvt hvsh moyuma ka hvchi anukfoyukashke. Amen.

THE END.





SMITHSONIAN INSTITUTION LIBRARIES



3 9088 00795 9513